


# Tũpa Ñehengagüer



New Testament in Guarayu (BL:gyr:Guarayu)

**Tũpa Ñehengagüer**  
**New Testament in Guarayu (BL:gyr:Guarayu)**

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Guarayu

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 18 Apr 2025 from source files dated 29 Jan 2022

c27c2d97-c359-59f5-b367-83efb2e33739

## Contents

SAN MATEO . . . . .	1
SAN MARCOS . . . . .	56
SAN LUCAS . . . . .	90
SAN JUAN . . . . .	150
LOS HECHOS . . . . .	193
ROMANOS . . . . .	247
1 CORINTIOS . . . . .	270
2 CORINTIOS . . . . .	294
GALATAS . . . . .	309
EFESIOS . . . . .	317
FILIPENSES . . . . .	325
COLOSENSES . . . . .	331
1 TESALONICENSES . . . . .	336
2 TESALONICENSES . . . . .	341
1 TIMOTEO . . . . .	344
2 TIMOTEO . . . . .	351
TITO . . . . .	356
FILEMÓN . . . . .	359
HEBREOS . . . . .	361
SANTIAGO . . . . .	378
1 SAN PEDRO . . . . .	384
2 SAN PEDRO . . . . .	391
1 SAN JUAN . . . . .	395
2 SAN JUAN . . . . .	401
3 SAN JUAN . . . . .	402
SAN JUDAS . . . . .	403
APOCALIPSIS . . . . .	405

## MATEO REMBICUACHIA JESUS RECOCUER RESENDAR SAN MATEO

*Ava eta oyesu vahe Jesucristo yesu renondeve*

<sup>1</sup> Co yipindar Jesucristo renondeve yuvirecoi vahe aracahe Abraham suindar, mborerecuar guasu David suindar avei:

<sup>2</sup> Abraham rahir Isaac, Isaac rahir evocoyase Jacob, ipare Jacob rahir ahe Judá ambuae tiqehir, tivireta reseve.

<sup>3</sup> Judá rahir yuvirecoi Fares iyavei Zara (ahe ichi rer Tamar). Fares rahir Esrom, Esrom rahir evocoyase Aram.

<sup>4</sup> Aram rahir Aminadab, Aminadab rahir Naasón, Naasón rahir evocoyase Salmón,

<sup>5</sup> Salmón rahir Booz (ahe ichi rer Rahab). Booz rahir Obed (ahe ichi rer Rut), Obed rahir Isai,

<sup>6</sup> Isai rahir mborerecuar guasu David, David rahir evocoyase Salomón, Urías rembirecocer pipe oyesu vahe.

<sup>7</sup> Salomón rahir Roboam, Roboam rahir Abías, Abías rahir Asa.

<sup>8</sup> Asa rahir Josafat, Josafat rahir Joram, Joram rahir evocoyase Uzías.

<sup>9</sup> Uzías rahir Jotam, Jotam rahir Acaz, Acaz rahir ahe Ezequías.

<sup>10</sup> Ezequías rahir Manasés, Manasés rahir Amón, Amón rahir evocoyase Josías.

<sup>11</sup> Josías rahir Jeconías tivireta reseve, Babilonia ve mbiguai yuvirecoi vahecuer.

<sup>12</sup> Mbiguai yuvirecoire Jeconías omboyesu Salatiel, Salatiel rahir ahe Zorobabel.

<sup>13</sup> Zorobabel rahir Abiud, Abiud rahir ahe Eliaquim, Eliaquim rahir evocoyase Azor.

<sup>14</sup> Azor rahir Sadoc, Sadoc rahir ahe Aquim, Aquim rahir evocoyase Eliud.

<sup>15</sup> Eliud rahir Eleazar, Eleazar rahir ahe Matán, Matán rahir evocoyase Jacob.

<sup>16</sup> Jacob rahir José, María mer, María evocoyase Jesús si secoi. Ahe imembrí Tūpa Rembiporavo Poropísirosar.

<sup>17</sup> Evocoyase Abraham yesusa sui tupri oyepota oso David yesusa rupive. Ahe catorce yesu yoapi agüer. David reco agüer sui oyepota oso ava mbiguai sereco agüer pipe Babilonia ve; ahe omomba avei catorce yesu yoapi agüer. Mbiguai ava serecosa sui oyepota araviter Poropísirosar haragüer rupi, ahe omomba iri avei ambuae catorce yesu yoapi agüer.

*Jesucristo yesu agüer*

<sup>18</sup> Na ehi Jesucristo oyesu aracahe. María, ichi, ahe omenda pota vahe José rese. Oyese yuvirecoiñhi viteseve rumo, Espíritu Santo pīratasa pipe imembi.

<sup>19</sup> Evocoyase José, imevi, ahe ava seco catupri vahe, “Tapoiño ayase ava icuañhisa pipe che remimbotar rupi ichui” ehi chupe viña ‘co rupi tarecomegua eme co cuñatai rer aviye vahe’ ohesa pipe.

<sup>20</sup> Aipo opihañemoñeta reseve oque. Iquerve rumo, Tūpa rembiguai oyemboyecua chupe aipo ehi: “José, David suindar, eresiquiyei rene María rese nde menda ãgua. Esepia, Espíritu Santo sui ou imembiã.

<sup>21</sup> María virecose omembrí, pemondora sererguã Jesús. Esepia, ahe oipísirora omu judío eta yangaipa sui” ehi.

<sup>22</sup> Co rupi opa yaviye yande Yar remimombehugüer aipo ehi vahecuer ñehe mombehusar aracahe:

<sup>23</sup> “Cuña ndaseco marai vahe imembiã.

Ahe imembrí rer-ra Emanuel” ehi  
(Tūpa yande rese ité secoi’ oya aipo ehi).

<sup>24</sup> Omaha José, Tūpa rembiguai oyeupe ñehe agüer omboyeroya ité. Ichui omenda María rese cute.

<sup>25</sup> Ndoyapo vitei eté rumo mbahe oyese yuvireco. Yipindar imembira rane ité, ahese José omondo Jesús sererguã.

## 2

### *Ava yasitata rese oyembohe vahe ari sêsa cotindar yuviraso pītani repia*

<sup>1</sup> Herodes mborerecuar guasu recose, Jesús oha Judea ivi rupi tecua Belén ve. Coiye yugüeru ava yasitata rese oyembohe vahe ari sêsa coti sui Jerusalén ve.

<sup>2</sup> Ahe oporandu Herodes upe yuvireco aipo ehi:

—¿Que vo aipo oha judío rerecuar guasu? Esepia niha, caharu coti yasitata orosepia. Sese oroyu ari sêsa coti sui imboetei ãgua —ehi yuvireco chupe.

<sup>3</sup> Aipo ihese, mborerecuar Herodes oyembosiquiye tēi, ava Jerusalén pendar avei ãgüe ehi pãve yuvireco.

<sup>4</sup> Iyavei cūriteimi opa omonuha uca pahi rerecuareta, Moisés porocuita rese oporombohe vahe avei. Ipare oporandu chupe:

—¿Que vo aipo ohara Poropĩsirosar? —ehi.

<sup>5</sup> Ahe omboyevi yuvireco chupe:

—Ahe ohara Judea rupi Belén ve —ehi—. Esepia, Tūpa ñehe mombehusar Miqueas rembicuachiagüer pīpe aipo ehi:

<sup>6</sup> ‘Pe, tecua mini Belén pipendar, ndahei ivi coti tēi vahe ambuae tecua Judá pipendar sui peico.

Esepia, pe sui osēra mborerecuar che recua iguar Israel yocuai ãgua’ ehi —ehi yuvireco Herodes upe.

<sup>7</sup> Aipo hese, Herodes oñehe ñemi ava yasitata rese oyembohe vahe upe ‘toicua eme ava yuvireco’ oyapave oporandu: “¿Mbahe yasi pīpe ité vo pesepia ramo aipo yasitata?” ehi.

<sup>8</sup> Oyeupe mombehu pare, omondopa Belén ve aipo ehi chupe:

—Peso evocoyase, peseca pītani. Acoi peyosuse, co rupi avei peyevi cheu icua uca ãgua. Che avei evocoyase tasomi imboetei —ehi angahu chupe.

<sup>9</sup> Aipo oyeupe he pare, yasitata rese oyembohe vahe osiriño voi yuviraso. Ahe pīpeve yasitata oyemboyecua iri senonera. Ichui pītani recosa rese tupri tecua Belén ve opita yasitata.

<sup>10</sup> Sepiase, ovihareté yuvireco.

<sup>11</sup> Ipare yuviroique oi pīpe, osepia pītani ichi María reseve yuvireco. Ichui oñenopiha sovai imboeteisa pīpe. Ipare opōhe ombahe riru pīpe yuvireco oicuvēhe vaherã oporerecosa sepirusu vahe oro, itaisi, ambuae mbahe sñacua vahe mirra serer vahe avei.

<sup>12</sup> Yuviroyevise güecuave yuviraso, ndoyuviroyevi iri Jerusalén rupi mborerecuar Herodes upe imombehu. Esepia, Tūpa aipo omombehu iquerve chupe ambuae peri rupi iyeve ãgua.

### *Jesús pītani seroñemisa Egipto ve*

<sup>13</sup> Aipo ava yepipi pare, José upe oyemboyecua Tūpa rembiguai iquerve, aipo ehi chupe: “Eñarapuha, eroñemi pītani ichi reseve eraso Egipto ve. Aheve erepitara acoi che amombehuse voi nde yevi ãgua. Esepia, mborerecuar Herodes osecara pītani yuca ãgua oico” ehi chupe.

<sup>14</sup> Ahe pītu pīpeve voi José viraso pītani ichi reseve Egipto ve.

<sup>15</sup> Aheve yuvirecoi co mborerecuar Herodes mano rãro. Co rupi imboaviyesa Tūpa ñehe mombehusar remimombehugüer: “Egipto sui anose che Rahir” ehi vahe.

### *Herodes oyuca uca chñivahe eta*

<sup>16</sup> Mborerecuar Herodes rumo oñemoiró iteanga yasitata rese oyembohe vahe ombopa tēisa rese. Sese, “Toyuvirasó sundao tecua Belén ve, toyucapa chihivahe cuimbahemi yuvireco opacatu ñuvirío araviter ovireco vahe, chihivahemi catu vahe avei, ahe tecua ivirindar pipe avei no” ehi. Esepia, omoñetase yasitata rese oyembohe vahe yuvireco, oicua ahe araviter opa cūrítei.

<sup>17</sup> Ëgüe ehi yaviye Tūpa ñehe mombehúsar Jeremías remimombehugüer aipo ehi vahe:  
<sup>18</sup> “Oyeendu ava Ramá ve.

Ahe Raquel oyaseho ité omembireta manose;  
ndoyembovaha catui eté ipipe” ehi.

<sup>19</sup> Mborerecuar Herodes manore, Egipto ve José upe oñehe iri Tūpa rembiguai iquerve aipo ehi:

<sup>20</sup> “Eñarapuha, eroyeví pītani ichi reseve Israel recuave. Esepia, opa omano pītani yuca potasar yuvireco” ehi.

<sup>21</sup> Aipo oyeupe hese, oñarapuha, viroyeví pītani ichi reseve Israel recuave.

<sup>22-23</sup> Perí rupi oyanduse rumo Arquelao vu recoyar mborerecuar chinise, ahese oyembosiquiye aheve oso ãgua. Coiyemi tēi iquerve Tūpa, “Peso Galilea ivi rese” ehi chupe. Ichui yuvirasó tecua Nazaret ve. Aheve opita yuvireco cute. Ëgüe ehi yaviye Tūpa ñehe mombehúsar remimombehugüer: “ ‘Nazaret pendar’ ehira serecosa” ehi vahe.

### 3

#### *Juan Oporoãpiramo vahe ivi iporupirēhisa rupi secoi*

<sup>1</sup> Ipare Juan Oporoãpiramo vahe Tūpa recocuer rese oñehe oico Judea ivi rupi ava yemboerecuaēhisave

<sup>2</sup> aipo ehi: “¡Pemboasi pe angaipa; peyeví Tūpa upe! Esepia, co Tūpa mborerecuasa cōimi secoi yandeu” ehi.

<sup>3</sup> Co Juan rese niha oñehe yipive Tūpa ñehe mombehúsar Isaías aipo ehi güembicuachiagüer pipe:

“Oyeendu ñehesa ava yemboerecuaēhisave:

‘Pemoingatu yande Yar raperã; pemohivi tupri avei’ ehi” ehi aracahe.

<sup>4</sup> Juan turucuar ahese camello ragüer apopri, sumbicusasa mbahe pিরer, sembihu evocoyase tucru, eiri caha pipendar avei.

<sup>5</sup> Opacatu ava Jerusalén pendar, Judea rupindar tecua, ïai Jordán rerovica pendar avei yuvirasó ñehe rendu

<sup>6</sup> oangaipagüer mombehu ãgua. Ahese Juan oñapiramo ïai Jordán pipe.

<sup>7</sup> Yugüeru atise rumo fariseo iyavei saduceo oñeapiramo uca ãgua, Juan aipo ehi ahe ava upe: “¡Pe mboi mboetasa tēi peico! ¿Ava vo, ‘Pesēra Tūpa ñemoirosa ou vaheerã sui’ ehi tupri tēi pēu?

<sup>8</sup> Yipindar toyecua tupri rane Tūpa upe pe yevisa pe angaipa mboasisa pipe.

<sup>9</sup> Iyavei ndapeyeroyai chira ‘ore Abraham suindar oroico’ pe hesa rese tēi pe ñepisiro ãgua. Esepia, Tūpa oicatuño ité co ita sui Abraham suindar nungar tupri apo ãgua oyeupe nara yepi.

<sup>10</sup> Hacha niha imoingatusa voi eté opacatu ivira ndihai vahe sapa rupi yasia ãgua. Ichui yasia pare imondosa tatave.

<sup>11</sup> Che i pipe tēi opoãpiramo Tūpa upe pe yeví ãgua. Oura rumo ambuae che raquicuei, ahe pe ãpiramora Espíritu Santo tata nungar pipe. Ahe seco pírata catu vahe secoi che sui. Sese cheu ndiyai eté ahe ipitaquisã yora ãgua ichui.

<sup>12</sup> Ahe oipehara mbahe rãhií ihigüer sui. Sãhií evocoyase oyapocatura, ihigüer rumo omondora tata apirēhi vahesave” ehi.

*Jesús ãpiramosa*

<sup>13</sup> Ipore Jesús oso Galilea sui ïai Jordán ve Juan recosave ‘tache ãpiramo’ oya.

<sup>14</sup> Yipindar rumo Juan ndoipotai eté, aipo ehiño chupe:

—Nde rumo iya ité che ãpiramora eve viña, ¿nde rumo ereyu che nde ãpiramo ãgua? —ehi.

<sup>15</sup> —Ëgüe tehiño aipo. Iyacatu yayapora Tũpa porocuaite —ehi Juan upe.

Evocoyase Juan, “Aviye” ehi chupe.

<sup>16</sup> Oãpiramo pare, osẽ ïve sui. Ahe pipeve voi ïva oyemboi tupri, aheseve avei osepia Tũpa Espiritu ogüeyise ou ïharive apicasu nungar.

<sup>17</sup> Iyavei oyeendu ñehesa ïva suindar aipo ehi vahe: “Co che Rahir, che rembiaisu. Sese aviharete vichico” ehi.

## 4

### *Jesús recoãhasa*

<sup>1</sup> Ipore Tũpa Espiritu viraso Jesús ava yemboerecuaẽhisave ‘tosecoãha Carugar’ ohesa pipe.

<sup>2</sup> Aheve cuarenta ari, cuarenta pĩtu ndocarui. Sese ndasiepoi eté oico.

<sup>3</sup> Evocoyase oyemboya Carugar sese secoãha ãgua, aipo ehi chupe:

—Tũpa Rahir ité nde recose, co ita sui eyapo pan cũritei —ehi.

<sup>4</sup> Jesús rumo omboyevi chupe:

—Icuachiapri pipe rumo aipo ehi:

‘Ndahei chira pan sui güeraño ava yuvirecove.

Ëgüe ehi rumo opacatu Tũpa Ñehengagüer reroya pipe ava yuvirecovera yepi’ ehi —ehiño chupe.

<sup>5</sup> Ichui Carugar viraso Jesús Jerusalén maranehi pipendar tũparo torre apiterve.

<sup>6</sup> Aheve aipo ehi chupe:

—Tũpa Rahir ité nde recose, eviapi cohava sui. Esepia niha, icuachiapri pipe:

‘Tũpa oyocuirai güembigui eta nde rãro ãgua.

Ahe nde mopuhara yuvireco que ñepeï ita nde momara rãgüer sui’ ehi —ehi Carugar chupe.

<sup>7</sup> Evocoyase omboyevi Carugar upe:

—Icuachiapri pipe rumo aipo ehi avei no: ‘Nderesecoãhai chira nde Yar Tũpa’ ehi —ehi chupe.

<sup>8</sup> Ipore Carugar viraso iri ivitri ivate vahe apiterve secoãha ãgua. Aheve aipo opacatu ivi pipendar, tecua guasu pipendar mbahe porañete vahe yemboivate aisa omboyecua chupe,

<sup>9</sup> aipo ehi:

—Che rovai ereñenopihase che mboeteisave, co opacatu mbahe nde rembiepia amondora nde mahera —ehi Carugar chupe.

<sup>10</sup> Aipo oyeupe hese:

—Eyepepi che sui cũritei, Carugar —ehi—. Esepia, icuachiapri: ‘Emboetei nde Yar Tũpa, ahe güeraño tupri avei eremboyeroyara’ ehi —ehi Carugar upe.

<sup>11</sup> Ahese Carugar oyepepi ichui. Ipore Tũpa rembiguai yuvirogüeyi Jesús rese hañeco ãgua yuvireco.

### *Jesús omboipi oporombohe Galilea rupi*

<sup>12</sup> Jesús oyanduse Juan roquendasa, oso Galilea ivi rese Nazaret ve.

<sup>13</sup> Ndopitai rumo aheve. Osoño Capernaum ve, aheve opita. Ahe tecua ïpa Galilea ivi, ivi Zabulón iyavei Neftalí rupi avei.

<sup>14</sup> Na ehi yaviye Tũpa ñehe mombehusar Isaías rembicuachiagüer aipo ehi vahe aracahe:

<sup>15</sup> “Co ava ivi Zabulón pendar, Neftalí pendar, para guasu ivirindar, ïai Jordán rovaindar iyavei Galilea pipendar ndahei vahe judío,

16 ahe aviye p̄t̄umimbisave yuvirecoi vahe, osepia ramo vahe tesapesa yuvireco; iyavei mano r̄ägüer pipe yuvirecoi vahe upe avei aviye oyecua ramo vahe tesapesa” ehi.

17 Ahe ari suive Jesús omombehu Tūpa recocuer ava upe: “Pemboasi pe angaipa; peyevi Tūpa upe. Esepia, cõimi eté Tūpa mborerecuasa secoi” ehi.

*Jesús, “Perio che rupi” ehi irungatu pira mbohasar upe*

18 Coiye ipa Galilea ivi oguatase, Jesús osepia mbia Simón Pedro serer vahe tivri Andrés reseve. Ahe pira omboha yuvireco.

19 Evocoyase:

—Pe pira recasar peico. Perio che rupi. Na peye aveira ava reca água cheu nara —ehi chupe.

20 Aipo he ramoseve, opoi opira mbohasa sui yuvireco, yuviraso supi.

21 Coi coti catu aipo Jesús osepia ambuae mbia Santiago tivri Juan reseve, ahe oguapi yuvinoi carite pipe oyesupa Zebedeo piri; omoingatu opira mbohasa yuvinoi.

22 “Perio che rupi” he ramoseve, opaño oporaviquisa sui opoi yuvireco, oseyaña oyesupa, yuviraso supi.

*Jesús ombohe ava rehi*

23 Jesús evocoyase oguata opacatu Galilea ivi rupi, judío tūparo yacatu rupi oporombohe oico. Aheve ñehesa aviye vahe omombehu Tūpa mborerecuasa resendar. Oporombogüera avei opacatu-catu tēi mbaherasisa ava vireco vahe sui.

24 Oyepotase rumo serācua opacatu Siria ivi rupindar upe, ahese güeru opacatu iparaisu vahe yuvireco chupe: imbaheasi vahe, carugar vireco vahe, que nañaca pōrai vahe iyavei ndoguatai vahe. Ahe opa tupri ombogüera.

25 Ēgüe ehi ava rehi oguata yuvireco opacatu iguatasa rupi supi: Galilea pendar, Decápolis pendar, Jerusalén pendar, opacatu Judea pendar, iai Jordán rovaindar avei no.

## 5

*Jesús oporombohe ivitri*

1 Ñepe ari pipe, ava rehi repiase, Jesús oyeupi ivitri rese. Aheve oguapi oĩ. Ahese semimbohe oyemboya yuvireco sese.

2 Ichui omboipi imbohe aipo ehi:

3 “Sorivete catura acoi ava oicuae mbahe ipane vahe Tūpa rese ité güeco tupri água. Esepia niha, chupe nara ité Tūpa mborerecuasa.

4 “Sorivete catura acoi ava oyaseho vahe oviharēhisa pipe. Esepia niha, Tūpa omboura viharetesa chupe coiye.

5 “Sorivete catura ndaseco asiimi vahe. Esepia, ahe chupe imondosara co ivi imahera curi.

6 “Sorivete catura ava oipota vahe teco catuprisa Tūpa suindar. Esepia, chupe ité ahe imondosara.

7 “Sorivete catura acoi ava oporoparaisuereco vahe. Esepia, ahe Tūpa oiparaisuerecora.

8 “Sorivete catura acoi ava ipihañemoñeta tupri vahe. Esepia niha, ahe osepiara Tūpa yuvireco curi.

9 “Sorivete catura acoi ava oporomoñeroi vahe mbahe tupri pipe. Ahe chupe, ‘Che rahir ité’ ehira Tūpa.

10 “Sorivete catura acoi ava seco catupri rese imombaraisupri. Esepia, ahe chupe nara Tūpa mborerecuasa.



11 “Perorivete catura pe acoi ava iñehe-ñehe tēise pēu, iyavei pe mombaraisuse, acoi oyapo-yapo tēise güemira-mira tēi pipe mbahe pe rese che recocuer sui tēi yuvireco.

12 Pe rumo peyembovihanora. Esepia, ivave tuvichá vahe porerecosa peipisira curi. Ëgüe ehi avei niha yipindar evocoi ava ramoi Tūpa ñehe mombehusareta mombaraisu yuvireco aracahe” ehi.

*Jesús reroyasar aviye yucrí iyavei tesapesa yuvirecoi ava upe*

13 “Co ivi pipe pe aviye yucrí peico opacatu ava upe. Yucrí rumo nasehe irise, ndayaicatuí imoehe iri água, ndiporusai chietera; imombopasara ava pirunga água yuvireco.

14 “Iyavei pe tesapesa nungar peico opacatu ava upe co ivi pipe inungar que tecua guasu yapopri ivitri rese. Ahe ndayaicatuí ñomi água.

15 Iyavei ndayamoendi chira tataendi mbahevrive tēi. Iyacatu rumo yasupi ivate sendave opacatu oi pipendar ava resape água.

16 Pe Ëgüe peye aveira pemboyecua ava eta upe pe recocuer aviye vahe. Ipipe sui toboetei yande Ru Tūpa íva pendar yuvireco” ehi ava rehí upe.

*Jesús oporombohe Moisés porocuita rese*

17 “Aní chira, ‘Co mbia revo oporombohe Tūpa ñehe mombehusar rembicuachía mboyeroyaēhi água iyavei Moisés porocuita cuachiapri mboyeroyaēhi água avei no’ peye tēi cheu. Ëgüe ehi rumo che ayu imboaviye água.

18 Supi eté co íva, ivi avei yandeu oime vitemiseve, ndipoi chietera que ñepeí yepe Moisés porocuita, que ambuae Tūpa ñehe mombehusar rembicuachiagüer ocañi tēi vaherã; ñepeí-peí porocuita imombehupri imboaviyesaño itera.

19 Sese acoi ava ndoviroyai vahe que ñepeí mborocuitamira viña, ombohe avei ava seroyaēhi água, ahe evocoiyase ivi coti catu vahe aveira Tūpa mborerecuasave yuvirecoi. Acoi viroya vahe rumo Tūpa porocuita yuvireco iyavei oporombohe vahe yuvirecoi sese, ahe evocoiyase Tūpa osecomboivate catura omborerecuasave curi.

20 Iyavei amombehu pēu: acoi pe reco ívi tuprisa ndaheise aviye catu vahe fariseo recocuer sui iyavei ndaheise aviye catu vahe Moisés porocuita rese oporombohe vahe recocuer sui avei, ahese ndapeiquei chietera Tūpa mborerecuasave” ehi.

*Jesús oporombohe ñemoiroēhi água rese*

21 “Pe peicua acoi pe ramoi aracahendar upe aipo ehi vahe: ‘Peporoyucaí rene. Acoi que ava oporoyuca vahe rumo, ahe serasosara mborerecuar porandusave mbahe sembiapocuer repirã’ ehi.

22 Che rumo aipo ahe pēu: acoi ava ambuae ava rese oñemoiro vahe yuvireco, ahe avei serasosara aheve. Iyavei acoi ‘nde Ëgüe ere tēi vahe eico’ ehi vahe ambuae ava upe, ahe serasosara porandu água mborerecuar ivate catu vahe rovai. Acoi ava rumo oñehe marase seroïrosave ambuae ava upe, ahe iyacatu imondosa ité tata guasuve.

23 “Sese Tūpa upe pe porerecosa reropovēhesave tūparo pipe pemahenduhase ava pe amotarēhimbar rese,

24 peseya rane pe porerecosa aheve; peyevi rane pe amotarēhimbar upe pēu iñero água rese. Acoi peñerose oyeupe, ahese voi peyevi, tapeicuavēhe pe porerecosa Tūpa upe.

25 “Iyavei peyemotarēhise, peñero voi oyeupe peyoepiase. Anise, aviyeteramo coiye catu tēise pe mombehu tēira pe amotarēhimbar mborerecuar upe pe reraso água. Ichui aviyeteramo ahe pe roquenda ucara.

26 Supi eté aipo ahe pēu: Ndapesēi chietera acoi peyemboepipase voi eté pesēra ichui” ehi.

*Jesús oporombohe yemboaguasaēhi água rese*

<sup>27</sup> “Peicua niha Moisés porocuita yipindar: ‘Peaguasai rene ambuae ava rembireco rese’ ehi vahe.

<sup>28</sup> Che rumo aipo ahe pëu: Acoi ava omahese cuña rese ipotasa pipe, ahe inungar oyapo vahe ité mbahe sese opiha pipe yepi.

<sup>29</sup> “Iyavei inungar que pe resa pe acato cotindar oipota rai ucasa mbahe pëu pe mboangaipa água tēi, iya penose ité, pemombo amombri peyesui. Aní pe mondo uca opacatu pe recocuer tata guasuve.

<sup>30</sup> Iyavei inungar que pe po pe acato cotindar pe mboangaipa ucasa, iya peyasía ité imombo amombri peyesui. Aní pe mondo uca opacatu pe recocuer tata guasuve” ehi.

*Jesús oporombohe ava mendasa sui poiēhi água rese*

<sup>31</sup> “Iyavei aipo ehi Moisés aracahe: ‘Opoi potase que omenda vahe oyesui, iyacatu cuachiar imondosa poisa resendar mborerecuar rovai yuvireco chupe’ ehi.

<sup>32</sup> Che rumo aipo ahe pëu: ava opoise güembireco sui, cuña ndoyavise mbahe, ahese ombopihañemoñeta tiētera güembireco mboaguasa uca água. Iyavei cuimbahe omendase cuña omenda vahecuer rese, oyemboaguasa tēi avei sese” ehi.

*Jesús oporombohe Vu Tūpa rer poru tēiēhi água rese*

<sup>33</sup> “Iyavei peicua acoi aipo ehi vahe pe ramoi upe aracahe: ‘Pemboaviye itera pemoingatu tuprise Tūpa rer pipe mbahe pemombehu vahe yepi’ ehi.

<sup>34</sup> Che rumo, ‘Ndapeñehei chira que mbahe rer pipe, iva rer pipe tēi avei’ ahe pëu. Esepia, ahe niha Tūpa renda;

<sup>35</sup> ivi rer pipe tēi avei ndapeñehei chira. Esepia, ahe Tūpa pirunga; Jerusalén rer pipe avei ndapeñehei chira. Esepia, ahe niha mborerecuar ivate catu vahe recua.

<sup>36</sup> Pe āca rer pipe avei ndapeñehei chira. Esepia, ndapeicatui chira que ñepepe ha momorochi água, imou água avei.

<sup>37</sup> Sese niha peñehese, ñepepe reseve, ‘Aviye’ peyera; anise, ‘Aní’ peye voira. Esepia, aipo ndehi vahe mbahe tēi” ehi.

*Jesús oporombohe yande amotarēhisar upe mbahe tēi mboyeviēhi água*

<sup>38</sup> “Peicua acoi Moisés porocuita aracahendar aipo ehi vahe: ‘Que ava vinose vahe ambuae ava resa ichui, ahe sesa avei senosesara. Iyavei vinose vahe sāi ichui, sāi avei senosesara’ ehi vahe.

<sup>39</sup> Che rumo aipo ahe pëu: Aní chira pemboyevi pëu mbahe tēi aposar upe. Acoi que pe amotarēhisar pe rovapetese yuvireco, ambuae coti pe rova avei pemoporēhiñora chupe.

<sup>40</sup> Porandusave pe rerasose pe camisa rerocua água yuvireco pe sui, pe saco avei pemondoñora chupe.

<sup>41</sup> ‘Ñepepe legua rupi evosi co mbahe rese cheu’ ehise que ava pëu, pe rumo perasoñora ñuvirío legua rupi chupe.

<sup>42</sup> Iyavei oporanduse que pe mbahe rese yuvireco pëu, pemondoño avei chupe. Aní chira perecatēhi sese” ehi.

*Pesaisu pe amotarēhimbar*

<sup>43</sup> “Iyavei pesendu ñehesa yipindar: ‘Pesepia potai rene pe amotarēhimbar, pe mboripar güeraño pesaisu’ ehi vahe.

<sup>44</sup> Che rumo aipo ahe pëu: Pesaisu catu pe amotarēhimbar iyavei peyeroqui pe momara potasar rese.

<sup>45</sup> Evocoi nungar apo pipe pe Ru Tūpa iva pendar rahir ité peicora. Ahe niha osesape uca ari ava naporai vahe upe, ava aviye vahe upe avei. Ombou avei amar seco catupri vahe upe, ava ndaseco pōrai vahe upe avei.

<sup>46</sup> Pe raisupar güeraño pesaisu catu tēise, ndapeipisi chietera porerecosa evocoi nungar sui. Esepia niha, ava guarepochi rerocuasar ndipihai vahe guaisupar tēi osaisu yuvireco yepi.

<sup>47</sup> Ndahei yande mboripar upe güeraño yayapora ‘avirave’. Esepia, ava ndoicuai vahe avei Tūpa oyapo ‘avirave’ omboripar upe yuvireco yepi.

<sup>48</sup> Sese pe recocuer perecoa pe Ru Tūpa iva pendar seco catupri vahe nungar” ehi.

## 6

### *Jesús oporombohe mbahe aviye vahe apo ãgua rese*

<sup>1</sup> “Tūpa upe mbahe peyapo potase, ‘Tache repia ava yuvireco’ ndapeyei chira. Esepia, ěgüe peyese, ndapeipisi chietera pe Ru Tūpa iva pendar porerecosa.

<sup>2</sup> Evocoyase iparaisu vahe rese peporerecose, ‘Tamombehupa ava upe vichico’ ndapeyei chira inungar ava Tūpa reroyasar angahu tēi yuvireco yepi. Tūparove iyavei ocar rupi mimbī omoñehe yuvireco ‘Co ava aviye ité yuvirecoi, tehi angahu yuvireco yandeu’ oya tēi. Supi eté aipo ahe pēu: ěgüe ehi vahe rumo opa voi oipisi porerecosa co ivi pipe tēi yuvireco.

<sup>3</sup> Pe rumo peporerecose iparaisu vahe rese, aní chira pemombehu ambuae ava upe yepera que pe mboripar ité viña.

<sup>4</sup> Peporereco catu ava pe repiaēhisa pipe; pe Ru Tūpa niha mbahe ndoyecuai vahe osepia. Ahe omboura porerecosa pēu opacatu ava rembiepiave curi” ehi.

### *Jesús oporombohe yerure ãgua rese*

<sup>5</sup> “Acoi peyuresa, peicoi rene acoi ava ‘tosepia che yeruresa yuvireco’ ehi vahe nungar. Esepia, ahe opūha-pūha catu tūparo pipe oyeruqui yuvireco cupiha yacatu avei ‘tayande repia angahu ava’ ohesa pipe tēi. Supi eté che aipo ahe pēu: ěgüe ehi vahe opa voi eté co ivi pipeve tēi oipisi porerecosa yuvireco.

<sup>6</sup> Iyacatu rumo pe, peyeruqui potase, peiquera pe rēta pipe peyeoquendara pe ae pe yeroqui ãgua pe Ru Tūpa upe. Evocoyase pe Ru Tūpa oicua vahe mbahe pe rembiapo, iporecora pe rese.

<sup>7</sup> “Iyavei peyeruquise, ndapemboyevi-yevī chira pe ñehe pe poranduse mbahe rese Tūpa upe inungar ava Tūpa ndoicuai vahe. Ahe omboyevi-yevī oyeruresa ‘Tūpa revo co rupi yande mboyeroa voirā’ ohesave yuvireco viña.

<sup>8</sup> Aní chira inungar tēi peico. Esepia, pe Ru Tūpa oicua pe porandu renondeva mbahe ipane vahe pēu.

<sup>9</sup> Sese aipo peyera peyeruqui:

‘Ore Ru Tūpa, ivave ereico vahe, imboeteipri nde rer tasecoi.

<sup>10</sup> Tou nde mborerecuasa oreu.

Tayaposa nde remimbotar co ivi pipe, inungar ivave yaposa.

<sup>11</sup> Embou ore rembihu ari yacatundar oreu co ari pipe.

<sup>12</sup> Iyavei ñeñero ore angaipa rese oreu inungar ore oreño ore amotarēhimbar upe.

<sup>13</sup> Ore mboangaipa ucai rene eve; eipeha mbahe naporai vahe ore sui’ peyera.

<sup>14</sup> “Esepia, pe amotarēhimbar upe peñerose, pe Ru iva pendar avei iñerora pēu;

<sup>15</sup> ndapeñeroise rumo, ahe avei niñeroi chietera pēu” ehi.

### *Jesús oporombohe yecuacusa rese*

<sup>16</sup> “Acoi peyecuacuse, ndapemboyecuai chira pe viharēhisa, inungar acoi Tūpa reroyasar angahu tēi yuvireco yepi. Esepia, ahe opa oyeerecomeguapa tupri yuvireco, ‘Co oyecuacu vahe, tehi ava yande repiasar yuvireco yandeu’ ohesa pipe tēi. Supi eté aipo ahe pēu: ěgüe ehi vahe opa voi oipisi porerecosa ava güepia pipe tēi yuvireco.

<sup>17</sup> Pe rumo peyecuacuse, peñeaca monodoro tupri, peyovai tupri aveira.

<sup>18</sup> Evocoyase, ‘Co oyecuacu vahe’ ndehi chira ava yuvireco pēu. Pe Ru Tūpa, ndayasepia vahe, güeraño oicua pe yecuacusa. Ahe evocoyase iporecora pe rese curi” ehi.

*Mbahe porañeté vahe oime ivave*

<sup>19</sup> “Ndapemonuha atii chietera mbahe pe rembiereco co ivi pipe. Esepia, ahe mbahe pe rembiereco mbahe rasoi omboaso ati-ati imocañipa, iyavei sâve-sâve tēi opochi ati-ati oapocatusave, imonda vahe avei evocoyase imondaño sese pēu.

<sup>20</sup> Iya peseca catu tecocuer aviye vahe ivave nara. Aheve niha ndipoi chira co ivi pipendar nungar pe reco mocañi ãgua.

<sup>21</sup> Esepia, pe mbahe pe rembiereco setá catu vahesa rupi-rupi pe pihañemoñeta yepi, yepera que co ivi pipe, anise que ivave avei” ehi.

*Yande resa inungar tataendi yande recocuer uve*

<sup>22</sup> “Iyavei yande resa inungar tataendi yande retecuer upe. Evocoyase yande resa aviye, opacatu yande retecuer upe osesape;

<sup>23</sup> acoi imarase rumo, opacatu yande retecuer pĩtumimbisave tēi secoi. Tesapesa oime vahe yande rese, ahe ogüese rumo yande sui, mbahe tēi eté, pĩtumimbi nungar opacatu yande recocuer upe” ehi.

*Guarepochi pota raisa; Tũpa mboyeroyaẽhisa*

<sup>24</sup> “Iyavei ndipoi chietera que ava ñuvirío güerecuar omboyeroya vahe. Esepia, ñepi oyamotarẽhira imboyeroya potaẽhisa pipe, ambuae evocoyase osaisu catura imboyeroysa pipe. Ëgüe peye avei, ndapeicatu Tũpa mboyeroya guarepochi pota raisa pipe” ehi.

*Tũpa osãro guahireta*

<sup>25</sup> “Iyavei ndapeyemomahenduha guasu ai chira mbahe pe remihura rese pe recove ãgua, pe ihu ãgua rese, pe turucuarã rese tēi avei no. Esepia, yande recovesa aviye catu vahe tembihu sui, yande retecuer avei aviye catu turucuar sui no.

<sup>26</sup> Pesepia vĩrai eta oveve vahe: nomahetii vahe, nomonuhai avei, ndoyapocatu avei mbahe yuvireco. Pe Ru Tũpa ìva pendar ité niha omoime mbahe itohu. ¡Pe rumo ivate catu vahe ité peico vĩrai sui!

<sup>27</sup> Ndipoi que ñepi pe pãhu pendar oicatu vahe opihañemoñetasa pipe tēi güecocuer mopucu iri ãgua.

<sup>28</sup> “Ndahei chira pe turucuarã rese tēi peyemomahenduha guasu ai. Pemahecia ru mbahe potri caha pipendar rese: ndoporaviquii eté iyavei ndoipiai oturucuarã.

<sup>29</sup> Iyavei yepe mborerecuar guasu Salomón vireco setá ombahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese.

<sup>30</sup> Tũpa niha omboporañete raimi tēi mbahe potri caha pipendar, moviro ari tēi yasepia, ichui sapisapaño horno pipe. ¡Ahe rumo omondo catura turucuar pēu, pe ava nimbahe reroya tuprii vahe!

<sup>31</sup> Sese, ‘¿Mbahe pĩha yahura, yaihura?’ Iyavei, ¿mbahe pĩha yamondera?’ ndapeyei chira pe yemomahenduha guasu aisa pipe.

<sup>32</sup> Ava Tũpa reroyasarẽhi aipo nungar reseño tēi ipihañemoñeta yuvireco yepi. Pe Ru Tũpa ìva pendar rumo oicua ité pēu mbahe ipane vahe.

<sup>33</sup> Pemahenduha rane Tũpa rese pe recocuer tupri pipe ipovrive mbahe pe yapo ãgua semimbotar rupi, ahese omboura opacatu co mbahe ipane vahe pēu.

<sup>34</sup> Peyemomahenduha guasa ai eme mbahe peyapo vaheã rese. Iyacatu rumo ahe ari oyepotase voi, peyemomahenduhara sese. Esepia, ari yacatu rupi oime mbahe pemoingatu vaheã yepi.

**7**

*Aní, “Oyavi mbahe” peye voi ambuae upe*

1 “Ndiyai, ‘Oyavi ité mbahe’ peye voiño tēi ambuae ava upe; evocoyase Tūpa, ‘Oyavi mbahe’ ndehi chira pēu.

2 Esepia, inungar pe ambuae ava upe peico, ěgüe ehi aveira niha Tūpa pēu.

3 ¡Mahera ambuae ava rembiavimi rese tēi pemahe! ¡Iya rumo peyese rane mbahe tuvichá catu vahe pesepia!

4 Ndiyai pēu, ‘Che toropitivii mbahe nde rembiavi rese’ peye vaherã chupe. Esepia, ¡pe peyavi guasu catu mbahe ichui!

5 ¡Pe Tūpa reroyasar angahu tēi peico vahe! Penose uca rane mbahe pe rembiavi tuvichá catu vahe peyesui, ahese ramo ambuae ava rembiavi tahimi vahe moingatu peicatura.

6 “Pemondo eme mbahe maranehi ava cave nungar tēi upe, iyavei ndapemondo chira mbahe porañete vahe ava cuchí nungar tēi upe. Aviyeteramo oyemboyerera mbahe-mbahe tēi apo yuvireco pēu” ehi.

### *Peporandu Tūpa upe pēu mbahe ipane vahe rese*

7 “Peporandu mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ěgüe peyera pe yeroquisa pipe Tūpa upe, ahese imbousara pe porandusa pēu.

8 Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyoquisa pipe omota vahe oquenda Tūpa upe, chupe imboisara.

9 “Ndipoi eté revo que ñepepe pe pãhu pendar omondo vaherã ita tēi guahir upe pan rese oyeupe poranduse.

10 Que pira rese oyeupe poranduse revo, ndomondo chiaveira mboi tēi chupe.

11 Yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru íva pendar oipota catu mbahe aviye vahe mondo ãgua acoi ava mbahe rese oporandu vahe upe!

12 “Acoi mbahe peipota vahe ambuae ava oyapo vaherã pēu, ahe tupri avei peyapora chupe. Ahe niha Moisés porocuita iyavei Tūpa ñehe mombehusareta porombohesa” ehi.

### *Oime peri icãhimi vahe ava recocuer upe nara*

13 “Peique oquendipi icãhimi vahe rupi. Esepia, oquendipi guasu iyavei peri guasu cañi tēisave oso vahe. Ahe supi setá catu ava yuvirasó;

14 teco apirēhisave oso vahe rumo oquendipi, peri reseve icãhimi. Supi guata ãgua yavai eté; moviromi tēi ava oseca yuvireco” ehi.

### *Ivira aviye vahe icuasa iha rese*

15 “Coieye yugüerura ava Tūpa Ñehengagüer mombehusar angahu tēi pe pãhuve. Ahe ndoyavii chira ovesa ndaseco marai vahe yuvireco. Ipiha pipe rumo secocuer aviye mahembiar oñaro ai vahe. Sese peicua catu evocoi nungar sui.

16 Ava recocuer icuasa sembiapo rese. Esepia, ndahipohosai yu sui uva, ndipohosai avei higuera ha ivira sãchi ati vahe sui.

17 Evocoyase ivira aviye vahe, iha aviye avei; ivira naporai vahe, iha naporai avei no.

18 Esepia, ivira aviye vahe ndovirecoi oha naporai vahe, iyavei ivira naporai vahe ndovirecoi oha aviye vahe.

19 Sese opacatu ivira iha naporai vahe yasiasa yepi. Ichui imondosapa tatave.

20 Na peyera ava recocuer cua sembiapo rese” ehi.

### *Ndahei chira opacatu ava yuviroique Tūpa mborerecuasave*

21 “Ndahei opacatu ava ‘che Yar, che Yar’ ehi vahe yuvireco cheu yuviroiquera che Ru Tūpa mborerecuasave. Che Ru íva pendar remimbotar aposar año tupri rumo yuviroiquera aheve.

<sup>22</sup> Ari cañi pipe setá tēi ava aipo ehira yuvireco cheu: ‘Ore Yar, nde ñehe mombehusar niha ore oroico cuese, setá avei oromombo carugar ava sui nde rer pipe, setá poromondiisa oroyapo’ ehi tēira yuvireco cheu.

<sup>23</sup> Che rumo, ‘¡Aní, ndopocuai! ¡Pe mbahe tēi peico vahe, peyepēi che sui!’ aheñora aipo nungar upe” ehi.

### *Ñuvirío oi apopri*

<sup>24</sup> “Iyavei que ava osendu vahe che ñehengagüer, omboaviye vahe avei, ahe inungar ava ipihañemoñeta tupri vahe omopuha ita harive güetarã.

<sup>25</sup> Yepe ahe oi upe oyepota tēi ivitu ai, amarusu reseve, ichui oyeapo tēi avei iai chupe, oi rumo ndoviapi eté. Esepia, ita harive ité yaposa.

<sup>26</sup> Acoi ava che ñehengagüer rese ndoyapisacai vahe rumo, ahe inungar ava opihañemoñeta tupriēhisa pipe omopuha vahe ivi cuhi harive tēi güetarã.

<sup>27</sup> Ipare rumo oyepotase ivitu ai amarusu reseve chupe, ndaracaheimi ahe oi omondurupa” ehi Jesús ava rehii upe.

<sup>28</sup> Iñehe renduse ava rehii, “¿Mara ehi rutei?” ehi tēi yuvireco chupe.

<sup>29</sup> Esepia, ndahei Moisés porocuita rese oporombohe vahe nungar; ahe rumo oporombohe güeco pīratasa pipe.

## 8

### *Jesús ombogüera ava lepra vireco vahe*

<sup>1</sup> Ivitri sui ogüeyise Jesús, ava rehii avei yuvirecoi supi.

<sup>2</sup> Ahese ava lepra vireco vahe ou, oñenopiha sovai aipo ehi chupe: —Che Yar, ereipotase, che mbogüerami eve co mbaherasi sui —ehi.

<sup>3</sup> Aipo ihese, Jesús opoco sese aipo ehi:

—Taa, aipota. ¡Ecuera cūrítei! —ehi.

Aipo ihe ramoseve, ocuera voi eté.

<sup>4</sup> —Nde cuerasa eremombehu eme ambuae ava upe —ehi—. Nde poyavaño eso, eyemboyecua judío pahi upe. Ipare eicuavēhe nde porerecosa nde cuera agüer resendar Moisés porocuita rupi. Ipipe sui toicua ava nde cuerasa yuvireco —ehi.

### *Jesús ombogüera sundao rerecuar remimboacua*

<sup>5</sup> Ipare Jesús oguataño, ēgüe ehi tecua Capernaum ve oyepota oso. Aheve oime sundao rerecuar Roma iguar. Ahe ou chupe

<sup>6</sup> aipo ehi:

—Che Yar, che remimboacua imbaheasi guasu vupave ou. Ndoguata catui, oiporara tēi ombaherasisa ou —ehi.

<sup>7</sup> —Aviye, cūrítei evocoyase asora imbogüera —ehi.

<sup>8</sup> —Aní, che Yar, ndiyai eté che rēta pipe nde reique āgua; iyacatu niha cohapeve ereñeheño tēi icuera āgua. Evocoyase nde ñehe pipe tēi che remimboacua ocuerara.

<sup>9</sup> Esepia, che niha serecua vahe avei no, areco avei sundao che voya. Ahe chupe, “Eso peve” ahese, cūrítei oso; ambuae upe, “Erio ave” ahese, ou voi avei cheu; che remimboacua upe, “Ahe mbahe eyapo” ahese, che reroya avei —ehi.

<sup>10</sup> “¡Too!” ehi Jesús aipo oyeupe hese. Ichui aipo ehi oyeupindar ava rehii upe:

—Yepe ahe ndahei vahe judío viña, opacatu Israel recua pipendar rumo ndasepiai eté ava imbahe reroya vahe yuvireco yepi co ava nungar.

<sup>11</sup> Che aipo ahe pēu: Setá ava yugüerura añihivei coti sui, caharu coti sui avei no, inungar co sundao rerecuar. Iyavei opacatu ava ivi rupindar oguapira yuvireco Tūpa mborerecuasave Abraham, Isaac iyavei Jacob piri coie.

12 Judío eta rumo, oyeupe ñehesa reroyaẽhi pipe setá pĩtumimbisave ocañi tẽira yuvireco. Aheve oyaseho tẽira yuvireco iyavei oñeaimbotere-tere tẽira mbaherasicuer rereco yuvireco —ehi oñehe.

13 Evocoyase sundao rerecuar upe aipo ehi:

—Eso, nde mbahe reroya pipe yaposa nde remimbotar ndeu —ehi.

Ahe pipeve semimboacua ocuera tupri ité.

*Jesús ombogüera Pedro rembireco si*

14 Ipare Jesús oso Pedro rõtave. Aheve osepia Pedro rembireco si sohí iteangase vupave ou.

15 Opocose ipo rese, ahe ramoseve sohí opĩtuhu ichui. Ocuerare, oñarapuha ava rese ohañeco ãgua.

*Jesús ombogüera setá ava imbaheasi vahe*

16 Ipare pĩtu ramose setá caruguar vireco vahe ogüeru yuvireco chupe. Jesús rumo ñepi reseve oñehe pipe tẽi omombopa caruguar ava rehii sui, iyavei opacatu imbaheasi vahe ombogüera avei no.

17 Ëgüe ehi omboaviye Tũpa ñehe mombehúsar Isaías rembicuachiagüer aipo ehi vahe aracahe: “Ahe ae vırocua opacatu yande mbaherasisa yande sui iyavei oiporara opacatu mbahe tasi vahe yande rese” ehi.

*Oguata pota tẽi vahe ava Jesús rupi yuvireco*

18 Jesús osepiase ava rehii oyere guasu vahe oyese, oyocuai güemimbohe eta aipo ehi: “Peyemoingatu yandeu ipa rovai yande so ãgua” ehi.

19 Ahese Moisés porocuita rese oporombohe vahe aipo ehi chupe:

—Porombohesar, che mo aso pota nde rupi opacatu nde guatasa rupi —ehi.

20 Jesús rumo aipo ehi imboyeve chupe:

—Yavaira rumo ndeu. Esepia, vıraı vıreco guaiti, iyavei aguara vıreco oquesa; che rumo, Ava Rıquehir, ndarecoi que che rēta ité che pĩtuhu ãgua yepi —ehi.

21 Ipare ñepi ivoya aipo ehi chupe:

—Che Yar, che ru manore voi che nde rupiño ité aicora —ehi.

22 —Anı, cūrıtıei voi eyu che rupi —ehi—. Ëgüe tehiño ava secocuer omano vahe nungar, ahe ae toñeñeti yuvireco —ehi chupe.

*Jesús omombituhu ivıtu ai, ohıtu vahe avei*

23 Ipare Jesús yuvıroha güemimbohe reseve yuvıraso carite pipe.

24 İpa pipe yuvıraso pucu ramoseve Jesús oque ou. Ahese avıyeteramo tẽi ivıtu ai opũha ipa pipe; i ohıtu vahe ndıguayıı eté, seni-seni carite oyopi.

25 Evocoyase semimbohe yuvıraso voi imomahe:

—ıOre Yar, yande rerasora mo co carite ipıve! İYande pıısiro eve! —ehi yuvıreco chupe.

26 Evocoyase aipo ehi:

—ıMahera pesıquıye! İNdapeyeroyai eté che rese! —ehi güemimbohe upe.

Ahese oñarapuha aipo ehi itu guasu upe, ivıtu ai upe avei no: “Pepıtuhupa” ehi. Aheseve voi opa tupri opıtuhu yuvıreco.

27 —ıMara ehi rutei pııha co? —ehi tẽi semimbohe yuvıreco chupe—. ıMara ehi vahe pııha co ava secoi?

Esepia niha, ivıtu, para guasu avei omboyeroya yuvıreco no —ehi.

*Jesús omboyepeıpa caruguar Gadara pendar sui*

28 Jesús oguataño güemimbohe eta reseve oyepota ipa rovai Gadara ivı rese yuvıraso. Aheve ñuvırıo ava caruguar vıreco vahe yugüeru sovaıchi. Ahe ava tehögüer ruvıpa rupi tẽi yuvırecoi vahe, iyavei ndıporomboetei vahe yuvıreco. Ichui osıquıyepave ava ndoguata potai ahe perı rupi yuvıreco yepi.

- <sup>29</sup> Jesús repia ramoseve rumo, oñehe pĩrata yuvireco chupe aipo ehi:  
—¡Jesús, Tũpa Rahĩr, eyepepi ore sui! Esepia niha, ndoyepota vitei ari nde ore mombaraisu āgua oreu —ehi tẽi yuvireco.
- <sup>30</sup> Namombriimi cuchi rehi yuvirecoi ichui.
- <sup>31</sup> Carugar evocoyase aipo ehi yuvireco chupe:  
—Ore mombopaño tẽi eve evocoi cuchi rese —ehi.
- <sup>32</sup> —Aviye, peso —ehi carugareta upe.  
Aipo hese, carugar opa yuvĩnose ava sui, yuvĩroique cuchi rehi avĩterve. Ipare rumo cuchi ndayaracua iri yuvireco; ivi socuer rupi yuvĩnoña yuvĩraso, opa ipa pipe ocañi tẽi yuvireco.
- <sup>33</sup> Yuvĩnoña evocoyase cuchi rãrosar tecuave yuvĩraso opacatu mbahe güembiepia mombehu ava upe yuvireco.
- <sup>34</sup> Ichui opacatu ava tecua pendar yuvĩnose ati Jesús upe, “¡Eso cohava sui!” ehi yuvireco chupe.

## 9

### *Jesús ombogüera ava ndoguatai vahe*

- <sup>1</sup> Ipare Jesús oha carite pipe osasa iri ipa rovai oso güecua Capernaum ve.
- <sup>2</sup> Aheve, ava ndoguatai vahe omboyovai seraso imbaheasi vahe riru pipe yuvireco chupe. Ahe oicuae co ava yuvirecoi vahe oyese yeroya, aipo ehi imbaheasi vahe upe:  
—Che rahĩr, eyemopase, che ñero nde angaipa rese ndeu —ehi.
- <sup>3</sup> “¡Co mbia oyemboivate ai tẽi vahe, Tũpa ñehe nungar pipe tẽi oñehe!” ehi Moisés porocuita rese oporombohe vahe yuvireco chupe.
- <sup>4</sup> Jesús rumo oicua ipihañemoñetasa, sese aipo ehi chupe:  
—¡Mahera pepihañemoñeta rai pe yapisacasa rereco!
- <sup>5</sup> ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pĩha, anise, ‘Epũha, eguata’ hesa tie?
- <sup>6</sup> Tapeicua ru che, Ava Riquehĩr, areco mborerecuasa co ivi pipe ava angaipa upe che ñero āgua —ehi.  
Evocoyase aipo ehi imbaheasi vahe upe:  
—Epũha, esupi nde rupa seraso nde rõtave —ehi.
- <sup>7</sup> Ahese opũha voi, oso güõtave.
- <sup>8</sup> “¡Too! ¿Mara ehi rutei vo?” ehi ava rehi yuvireco imboeteisave. “Esepia, ahe niha ombou opĩratasa ava upe” ehi yuvireco chupe.

### *Jesús, “Erio che rupi” ehi Mateo upe*

- <sup>9</sup> Ichui oose Jesús, che repia, che Roma pendar mborerecuar guasu upe guarepochi rerocuasa mesave che rẽise. Ipare aipo ehi cheu:  
—Erio che rupi —ehi.  
Evocoyase apũha, aso voi supi.
- <sup>10</sup> Ahe ari pipeve Jesús güemimbohe reseve yuvĩroique che rõtave. Ambocarú setá ambuae ava guarepochi Roma pendar mborerecuar guasu upe monuhasar reseve, ava angaipa viyar yuvirecoi vahe reseve avei.
- <sup>11</sup> Co nungar repiase, fariseo oporandu semimbohe upe yuvireco:  
—¿Mahera ru pe mbohesar ocaru evocoi nungar ava angaipa viyar pãhuve tẽi? —ehi seroĩrosa pipe yuvireco chupe.
- <sup>12</sup> Jesús rumo, osenduse oyesendar ñehesa, aipo ehi:  
—Ava nimarai vahe ndosecai eté oporopõsano vahe; imbaheasi vaheño rumo oseca yuvireco.



13 Peyap̄isaca icuachiap̄ri aracadendar aipo ehi vahe rese: ‘Poroparāisuerecosa aipota; ndaipotai mbahe cheu serocuavēhep̄ri tēi’ ehi. Esepia, ndayui ava seco catup̄ri vahe reca, ēgūe ehi rumo ayu ava angaipa viyar reca —ehi Jesús ava eta upe.

*Yecuacu rese ñehesa*

14 Ipare Juan Oporoãpiramo vahe rupindar yugüeru oporandu Jesús upe:

—Ore iyavei fariseo eta oroyecuacu yepi, ¿mahera ru evocoyase nde remimbohe eta ndoyecuacui yuvireco yepi? —ehi yuvireco chupe.

15 Ahe rumo omboyev̄i ahe ava upe:

—¡Ndiyai eté ichohop̄ri mendasave ndoyembov̄ihai yuvireco imer oicovese ipãhuv̄e! Oimera rumo ar̄i imer reraso āgua ichui curi. Ahese ramo oyecuacura yuvireco cute —ehi.

16 “Ndipoi chietera revo que ava oturucuar cuacua oyapete vahe turucuar ip̄iasu vahe pipe. Esepia niha, yapetesa ip̄iasu vahe oichohoño turucuar cuacua imondorō. Ichorosa evocoyase tuvicha catu-catuño ité.

17 Iyavei ndiyai ava uva ricuer p̄iasu oyapocatu siru mbahe p̄irer cuacua vahe pipe. Ēgūe ehise, mbahe p̄irer opura viña, ocañi tēira, uva ricuer avei evocoyase ocañi tēi aveira viña no. Acoi uva ricuer ip̄iasu vahe mbahe p̄irer ip̄iasu vahe pipe yapocatup̄ri rumo oyoya ndoyemomarai yuvireco” ehi.

*Jairo rayri iyavei cuña Jesús turucuar rese opoco vahe*

18 Jesús oporombohe viteseve, ou mborerecuar oñenop̄iha sovai aipo ehi chupe:

—Che rayri mo cūr̄itei omano pota ité. Yaso, nde eremondose rumo nde po sese oicovera —ehi chupe.

19 “Aviye” ehi. Evocoyase op̄uha yuv̄iraso güemimbohe reseve supi.

20 Ahe pipeve cuña doce arav̄iter rupi suv̄i ndopai vahe opoco saquicuei coti iturucuar popi rese.

21 Esepia, ahe aipo ehi op̄iha pipe: “Yepe que iturucuar popi resemi tēi apocora, acuerara rumo” ehi.

22 Jesús evocoyase oyemboyere cuña rese aipo ehi chupe:

—Che rayri, eyemopoase, erecuera cūr̄itei nde yeroyasa pipe —ehi.

Aipo ihe ramoseve, cuña ocuera voi eté.

23 Oyepotase Jesús mborerecuar rētave, osepia omimb̄i vahe iyemoingatupase omano vahe t̄i āgua, ava yaseho atise avei no.

24 Ahese aipo ehi ava oyaseho vahe upe:

—Pesēpa coh̄ave sui. Co cuñatai nomanoi; oque tēi ou —ehi.

Ahe ava rumo opucaēte atiño seroyaēhisave yuvireco.

25 Ichui opa ava omose, ahese oi que oi pipe oipop̄isi cuñatai. Evocoyase ahe oñarapuha voi.

26 Co sembiapo evocoyase oyandupa voi opacatu tecua rupi yuvireco.

*Jesús ombogüera ñuvirío ava ndasesap̄isōi vahe*

27 Acoi osēse evocoi oi sui Jesús, ahese ñuvirío ndasesap̄isōi vahe osaquicue moña, osapucāi yuvireco chupe aipo ehi:

—¡Jesús, David suindar, ore parāisuerecomi tēi eve! —ehi pucu-pucu yuvireco chupe.

28 Oi pipe seiquese, oyemboya ndasesap̄isōi vahe yuvireco sese. Ahese Jesús oporandu chupe:

—¿Che reroya ité vo pe mbogüera āgua rese peye? —ehi.

—Nde reroyasa ité, ore Yar —ehi yuvireco.

29 Aipo oyeupe hese, opoco sesa rese, aipo ehi chupe:

—Tayapo pe che reroyasa pipe mbahe p̄ēu —ehi.

30 Aipo ihe ramoseve osareco tup̄ri voi yuvireco. Ipare,

—Peicua catu. Peicua ucai rene ambuae ava upe —ehi chupe viña.

<sup>31</sup> Ahe rumo ichui oyepepi pare, yuviraso opacatu tecua rupi, “Jesús ore mbogüera” ehi-ehiño ité yuvireco.

*Jesús ombogüera niñhengatui vahe*

<sup>32</sup> Ichiri ramoseve rumo, ambuae ava viroyepota ava niñhengatui vahe caruguar rerecosar Jesús upe yuvireco.

<sup>33</sup> Ichui omosese caruguar, iñhengatu cute. Sepiase opacatu ava, —¡Too! —ehi—. ¡Ndasepiasai vahe ité co nungar mbahe yande recua pipe yepi! —ehi tēi yuvireco.

<sup>34</sup> Fariseo eta rumo aipo ehiño yuvireco:

—Caruguar rerecuar pīratasa pipe co mbia omose caruguar ava sui —ehi tupri tēi yuvireco chupe viña.

*Jesús oiparaisuereco ava*

<sup>35</sup> Ichui opacatu tecua rupi Jesús oguata oporombohe tūparo yacatu. Omombehu tecovesa aviye vahe Vu mborerecuasa resendar iyavei oporombogüera opacatu-catu tēi mbaherasisa sui avei no.

<sup>36</sup> Osepiase ava rehi, oiparaisuereco yuvireco. Esepia, ahe oñemosañño tēi mbahe rasicuer pāhuve inungar ovesa ndovirecoi vahe guārosar yuvireco

<sup>37</sup> Evocoyase aipo ehi güemimbohe upe:

—Supi eté mbahe miti imonuhapirā setá iteanga; sese oporaviqui vahe rumo moviromi tēi.

<sup>38</sup> Sese peporandu mbahe miti Yar upe, ahe tomondo ava imonuha āgua —ehi güemimbohe eta upe.

## 10

*Jesús oiporavo doce tupri apóstol*

<sup>1</sup> Evocoyase, “Perio” ehi Jesús doce güemimbohe upe. Chupe omondo güeco pīratasa caruguar ava sui imboyepepi āgua iyavei iporombogüera āgua opacatu-catu tēi mbaherasisa sui.

<sup>2</sup> Ahe ava doce tupri apóstol yuvirecoi vahe: yipindar Simón Pedro, ahe tivri Andrés; ambuae Santiago, Zebedeo rahir, ahe tivri Juan;

<sup>3</sup> Felipe, Bartolomé, Tomás; iyavei che, Mateo, guarepochi monuhasarer; ambuae Santiago, Alfeo rahir; ambuae Tadeo;

<sup>4</sup> iyavei Simón, güecua rese secatēhi vahe pāhu pendarer; ipa vahe Judas Iscariote, ahe Jesús omondo vahe yamotarēhimbar upe.

*Jesús oyocuai güemimbohe Vu mborerecuasa mombehu āgua*

<sup>5-6</sup> Ipare oyocuai güemimbohe imondo aipo ehi chupe: “Pesora yipindar judío recua rupi. Esepia, inungar ovesa ocañi vahe, ēgüe ehi tēi secocuer yuvireco. Evocoyase pesoi rene ndahei vahe judío recua rupi iyavei ndapeiquei chira tecua Samaria ve” ehi.

<sup>7</sup> “Judío recua rupi pesoseve, ‘Cōimi Tūpa mborerecuasa secoi yandeu’ peyera imombehu.

<sup>8</sup> Iyavei pembogüera imbaheasi vahe, pembogüerayevi avei omano vahe, pembogüera lepra rerecosar iyavei caruguar pemboyepepi serecosar sui. Esepia niha, peipisi pīratasa ndasepii vahe. Sese peyapoño evocoi mbahe guarepochi pisiēhisa pipe.

<sup>9-10</sup> “Ava oporaviqui pipe sui ocaru yepi. Sese ndaperaso chira guarepochi peyese. Ndaperaso chiaveira pe mbahe riru, iyavei ambuae pe turucuar, pe pitaqui; peyendar güeraño tupri perasora. Pe pococa avei ndaperaso chira” ehi.

<sup>11</sup> “Iyavei que tecuave peyepotase, peseca rane ava imboyeroyapri. Ahe sētave pepitami ranera. Pemboaviyese pe cuaita, ahese ramo pesora ichui” ehi.

12 “Evocoiyase peique ramoseve oi pipe, peyapora, ‘Avirave, Tūpa tape rovasa’ peyera chupe.

13 Acoi aviyese oi pipendar ava pēu, ahe oipisira Tūpa porovasasa; acoi ndahaviyeise rumo ava, ndoipisii chira Tūpa porovasasa yuvireco.

14 Acoi ndosendu potaise pe ñehe, ndape pisi potaise avei yuvireco, ahese pesēño ahe oi pipe sui, anise tecua sui. Peipipetera pe pi ivi rātachigüer sui, pesē pecua ichui ‘toipisi Tūpa ñemoirosa yuvireco’ pe yapave.

15 Evocoiyase supi eté ari cañi oyepotase co tecua upe, ivate catura Tūpa ñemoirosa ava Sodoma, Gomorra iguar upendar sui curi” ehi.

### *Yamotarēhiprira Jesús reroyasar*

16 “¡Psendu tupri che ñehe! Che opomondo ovesa nungar ava mbahe mimba oñaro ai vahe nungar pāhuve. Sese peresaeté tuprira peyese mboi nungar, iyavei inungar apicasu seco tupri vahe peicora.

17 Iyavei peicua catu peamotarēhimbar sui. Esepia, mborerecuar rovai pe rerasora iyavei pe nupara otūparo pipe yuvireco,

18 ichui pe reraso aveira mborerecuareta ivate catu vahe rovai yuvireco che recocuer sui tēi, ěgüe peyera peñehe che recocuer rese chupe iyavei ava ndahei vahe judío upe avei.

19 Acoi pe rerasose mborerecuar upe yuvireco, ‘¿Mbahe pñha amombehura chupe?’ ndapeyei chira; acoi peñehe potase rumo, Tūpa omondora pe ñehe āgua pēu.

20 Esepia, ndahei chira peyesui tēi peñehe, pe Ru Tūpa Espíritu pemoñehe ucara.

21 “Ipare rumo ava vīvri omondora oamotarēhisar upe ‘toyuca yuvireco’ oya. ěgüe ehi aveira ava guahir upe; tahir avei oyamotarēhira oyesupa yuca uca āgua yuvireco che recocuer rese.

22 Iyavei opacatu ava ndape ambotai chira che recocuer sui tēi yuvireco. Acoi oyemoviracua vaheño rumo ari ipa vahe rupi, ahe ipisiropri yuvirecoira curi.

23 Iyavei acoi pe mañeco tēise ñepeu tecuave yuvireco, ahese peyepipiñora ichui ambuae tecua pipendar upe che recocuer mombehu āgua. Supi eté Ava Riquehir oura ndapemboaviye viteiseve pe guatasa judío recua rupi.

24 “Ñepeu yepe niha ava oyembohe vahe ndahei eté ivate catu ombohesar sui; que ava rembiguai ndahei avei ivate catu vahe güerecuar sui.

25 Iyavei semimbohe, ‘Aviye ité’ ehiñora ombohesar osecoupitise. ěgüe ehi aveira mbiguai güerecuar upe. Acoi oi yar upe: ‘Caruguar rerecuar Beelzebú’ ehise, aipo ehi aveira niha oi pipendar upe yuvireco no” ehi.

### *¿Uma sui pñha siquiyesara?*

26 “Sese ndapesiquiyei chira ava pe amotarēhimbar sui. Esepia, yaposva vahe imombe-hupirēhi cūrítei, icuasaño itera curi; iyavei mbahe ñomipri, icuasaño aveira no.

27 Acoi che amombehu vahe pītumimbisave pēu, pemombehu ari pipe coiye, iyavei acoi amombehu vahe pēuñomi, perosapuca pe rēta harive imombehu opacatu ava upe.

28 Iyavei ndapesiquiyei chira acoi ava peyuca potasar sui. Esepia, ndoicatu niha ava hã mocañi āgua yuvireco. Tūpa sui rumo pesiquiye catura. Esepia, ahe oicatu yande retecuer, yande hã reseve imocañi āgua tata guasu pipe” ehi.

29 “Yamondo niha ñuvirío vīraimi repirã ñepeimi guarepochi yepi. Yande Ru Tūpa ndoipotaise rumo, ndoviapí chietera que ñepeu vīraimi” ehi.

30-31 “Sese pesiquiye eme. Esepia, pe niha ivate catu vahe ité peico opacatu vīrai sui. Supi eté Tūpa niha oicua opacatu ñepeu-peu pe ha retacuer” ehi.

### *“Che aicua Jesucristo” ehi vahe opacatu ava rovaque*

32 “Acoi ava ‘che aicua Jesucristo’ ehi vahe opacatu ava rovaque, che avei evocoiyase: ‘Co ava che rupindar secoi’ ahera che Ru íva pendar upe.

<sup>33</sup> Acoi ava ‘che ndahei Cristo rese aico’ ehi vahe rumo cheu ava rovaque, che avei evocoyase, ‘Ndahei co che rupindar secoi’ ahera che Ru iva pendar upe.

*Jesús reroyasa pipe sui oimera yeamotarēhisa*

<sup>34</sup> “Mbahe tupri ai revo güeru co ivi pipe’ ndapeyei chira cheu. Ēgüe ehi rumo che yusa omoime ucara yeamotarēhisa.

<sup>35-36</sup> Sese ava oñemu ae oyeamotarēhi-rēhira yuvireco; ava oyesupa oyamotarēhira, iyavei cuña membri osi oyamotarēhira, cuña vovayar oyamotarēhi aveira.

<sup>37</sup> “Iyavei acoi oyesupa tēi osaisu catu vahe che sui, ahe ndiyai eté secoi che voyarā; inungar avei osaisu catu vahe guahir, anise guayri che sui.

<sup>38</sup> Iyavei acoi noñemosai vahe mbahe rasicuer upe, inungar-ra curusu rese ovosii vahe ité viña che rupi oguata pipe, ahe chupe ndiyai eté che voya seco āgua.

<sup>39</sup> Acoi ava oipisiro pota vahe güecocuer tēi, ahe ocañi tēira; acoi omocañi vahe rumo güecocuer che recocuer rese, ahe oñepisirora” ehi Jesús güemimbohe eta upe.

*Porerecosa resendar ñehesa*

<sup>40</sup> “Acoi ava pe pisi tupri vahe, ahe che pisi tupri avei yuvireco, iyavei acoi che pisi vahe, ahe oipisi avei che mbousar.

<sup>41</sup> Acoi ava oipisi tupri vahe ambuae ava Tūpa ñehe mombehusar secosa rese, ahe oipisi aveira porerecosa inungar tupri. Iyavei acoi ava oipisi tupri vahe ava seco catuprisa rese, ahe oipisi aveira porerecosa inungar tupri.

<sup>42</sup> Iyavei acoi omondo vahe que chíhi i sōhisa vahe que ñepeico seco mbegüemi catu vahe toihu che reroyasar seco rese, ahe oipisi aveira Tūpa suindar porerecosa” ehi.

## 11

*Juan Oporoāpiramo vahe ovoya omondo Jesús recocuer cua uca āgua*

<sup>1</sup> Opase Jesús oyocuai doce güemimbohe, ahese yuviraso oporombohe Tūpa Ñehengagüer rese judío recua rupi yuvireco.

<sup>2</sup> Ahese Juan Oporoāpiramo vahe voquendasave chinise, oyandu mbahe Jesucristo rembiapo. Sese omondo vupindar Jesús upe mbahe rese

<sup>3</sup> imboporandu āgua: “¿Nde ité vo Tūpa Rembiporavo aipo sãrombri ereico? anise, ¿oime tie ambuae orosãro vaherã?” ehi yuvireco chupe.

<sup>4</sup> Ipare omboyevi chupe aipo ehi: “Peso, pemombehupa Juan upe mbahe pe rembiepia iyavei pesendu vahe.

<sup>5</sup> ‘Ndasesapisoi vahe osareco tupri cūritei yuvireco, ipāri-pāri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa pīsirosa resendar ñehesa’ peyera chupe.

<sup>6</sup> ¡Oviharetera acoi ava oyeroyaño vahe che rese!” ehi Juan rupindar upe.

<sup>7</sup> Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porēhisave capihata ivitu ombova-mbova vahe nungar pīha?

<sup>8</sup> Anise, ¿pesepia tie iturucuar porañete ai vahe iyemboeteise? ¡Aní! Ēgüe ehi vahe rumo secoi mborerecuar guasu rētave yepi.

<sup>9</sup> Evocoyase pesepiase, ¿‘Ava’ peye vo pe chupe? ¿Tūpa ñehe mombehusar ité pīha? Taa, ahe ité. Evocoi niha ivate catu vahe Tūpa ñehe mombehusar sui.

<sup>10</sup> Ahe chupe ité Tūpa icuachiapri aracahendar pipe aipo ehi:

‘Che amondora nde renondeve che ñehe mombehusar nde raperã moingatu āgua’ ehi.

<sup>11</sup> Supi eté ndipoi que ñepeico ava seco ivate catu vahe Juan Oporoāpiramo vahe sui. Yepe ahe ivate catu vahe viña, Tūpa mborerecuasave rumo ava seco mbegüemi catu vahe ivate catu ichui.

12 “Juan yusa suive tupri Tũpa povri pendar oiporara mbahe tẽi yuvireco. Osãha-sãha ava opĩratasa pipe imocañi ãgua.

13 Opacatu Tũpa ñehe mombehusar rembicuachia pipe, Moisés porocuita icuachiapri pipe avei mombehusa Juan yusa rupive co Tũpa mborerecuasa resendar.

14 Yepe yavaira seroya ãgua pẽu viña, Juan rumo, Tũpa ñehe mombehusar Elías. Ahe mombehupri ou vahe.

15 Acoi ava osendu pota vahe che ñehe, toyapisacaño sese” ehi.

16 “¿Mbahe rese pĩha amboyoyara ava recocuer cũriteindar? Esepia, co ava inungar acoi chĩhivahe iguayĩ tẽi vahe ocar rupi. Ipare oñehe pucu-pucu omboripar upe yuvireco aipo ehi:

17 ‘Oromoñehe tẽi mimbĩ pẽu, ndapepivoi eté rumo iyavei orosapucaĩ tẽi sapucaisa viharẽhisa resendar pẽu, pe rumo ndapeyasehoi eté’ ehi.

18 Esepia, ouse Juan Oporoãpiramo vahe, ahe ndohui tembihu sepĩrusu ai vahe iyavei ndohui uva ricuer ipĩrata vahe, sese, ‘Co mbia carugar vireco vahe oyese’ peye tupri tẽi chupe.

19 Coiye che ayu, Ava Riquehir, acarũ, aihu tupri avei. Ipare, ‘Co icaru guasu ai vahe secoi, iihu guasu ai vahe avei’ peye cheu; ‘Ava angaipa viyar mboripar tẽi iyavei guarepochi rerocuasar mboripar tẽi’ peye avei cheu. Acoi ava supi eté vireco vahe Tũpa mbahecuasa, ahe icuasara sembiapo rese yepi” ehi.

### *Tecua ndiporeroyai vahe*

20 Ahese Jesús oñehe pĩrata moviro tecua pendar upe. Esepia, aheve acoi oyapo ati catu mbahe poromondisa viña. Ahe pendar ava rumo ndosecuñaro potai eté güecocuerai Tũpa upe nara yuvireco. Evocoyase aipo ehi chupe:

21 “¡Peparaisu, ava tecua Corazín pendar! ¡Pe avei peparaisu tecua Betsaida pendar! Esepia, acoi poromondisa pe pãhuve yapopri, yaposara yipive tecua Tiro, Sidón ve viña, co tecua pendar aracaheve anga omondera turucuar viharẽhisa resendar, tanimbu avei omondora oãca rese oangaipa mboasisa pipe yuvireco viña no.

22 Pe rumo peipisira ivate catu vahe Tũpa ñemoirosa ava Tiro, Sidón pendar sui ari cañi pipe coiye.

23 Pe avei no, tecua Capernaum pendar pemoha co ivave pe reco ãgua viña. ¡Pe rumo pe mombosara ivicuar ipicucu catu vahe pipe. Ehi revo tecua Sodoma ve rane, acoi poromondisa yapopri vahe pe pãhuve yaposara viña, cũritei oime vitera ahe tecua viña.

24 Sese, pe peipisira ivate catu Tũpa ñemoirosa ava Sodoma iguar sui ari cañi pipe coiye” ehi.

### *Peyu cheu mbituhusa reca*

25 Iyavei ahe ari pipe Jesús oyerure: “Che Ru, aviye ndeu. Nde niha iva pendar, ivi pipendar Yar ereico. Esepia, nde ereñomi co ñehesa supi tupri vahe ava imbahecua vai vahe sui; eremboyecua rumo ava seco mbegüemi vahe upe.

26 Ëgüe ere niha mbahe nde remimbotar apo, che Ru” ehi.

27 “Opacatu mbahe che Ru ombou cheu iyavei ndipoi ava che cua tupri vahe yuvireco, che Ru güeraño ité rumo che cua; ndipoi avei che Ru oicua tupri vahe yuvireco no, che güeraño ité aicua iyavei acoi que ava upe aicua uca potase, evocoi nungar upe aicua uca tupri.

28 Peyu cheu opacatu icuerai vahe. Che amondora pe pituhu ãgua.

29-30 Peico che povrive, peyembohe avei che sui. Esepia, che ndache reco asii, iyavei che povrive pe recosa ndayavaimi eté. Ahese ramo oimera mbituhusa pẽu” ehi.

## 12

*Mbituhusa ari pipe Jesús remimbohe oipoho trigo yuvireco*

<sup>1</sup> Mbituhusa ari pipe Jesús yuviraso güemimbohe rese, oguata mbahe miti pãhu rupi. Ahese semimbohe ndasiepoi. Evocoyase trigo rãhii oipoho-pohomi güemihura yuvireco.

<sup>2</sup> Fariseo yuvirecoi vahe osepiase, aipo ehi Jesús upe:

—Esepia nde remimbohe. Oporaviquiño mbituhusa ari pipe yuvireco —ehi yuvireco chupe.

<sup>3</sup> Ahe rumo omboyevi ahe fariseo upe:

—Peicua tãi niha icuachiapri arachendar mborerecuar guasu David rembiapogüer resendar ñehesa ondugüer reseve ndasiepoise yuvireco.

<sup>4</sup> Ahe niha yuviroique ité tũparo pipe pan imboeteipri Tũpa upendar hu ãgua ondugüer reseve. Ahe chupe acoi ndipotasai ihu ãgua yuvireco viña. Judío pahi yuvirecoi vahe upeño ité niha ipotasa ihu ãgua yepi.

<sup>5</sup> ¿Ndapeyeroqui vo Moisés porocuita resendar pipe? Esepia, judío pahi tũparo rese hañecosar ndopituhui eté tũparo pipe yuvireco mbituhusa ari pipe yepi. Ndahei rumo oyemboangaipa ipipe yuvireco.

<sup>6</sup> Cũritei cohave oime ava ivate catu vahe tũparo sui.

<sup>7</sup> Evocoyase pe ndapesenducuai eté Tũpa Ñehengagüer aipo ehi vahe: ‘Che aipota peporoparisuereco, aní chira peropovẽhepa porerecosa mbahe mimba tãi cheu’ ehi vahe. Pesenducuae viña, ahese, “Oyavi mbahe” ndapeye voi chira che remimbohe mbahe ndoyavi vahe upe viña.

<sup>8</sup> Esepia, Ava Riquehir mbituhusa ari rerecuar ité secoi —ehi fariseo eta upe.

### *Mbia ipo nomii vahe Jesús ombogüera*

<sup>9</sup> Ichui oose Jesús, oique judío tũparove.

<sup>10</sup> Aheve oime mbia ipo co cotigüer nomii vahe. Aheve avei fariseo, “Yaiñhengapo angahu Jesús” ehi yuvireco viña. Sese,

—¿Iyaño pãha mbituhusa ari pipe ava imbogüerasa yepi’ —ehi yuvireco chupe.

<sup>11</sup> Evocoyase Jesús aipo ehi imboyevi:

—¿Ava vo pe pãhu pendar acoi mbituhusa ari pipe oviapise seimba ovesa ivicuarve ndosoi chira senose viña?

<sup>12</sup> ¡Ava niha aviye catu ovesa sui! Sese iyacatu yande yayapo mbahe aviye vahe mbituhusa ari pipe yepi —ehi.

<sup>13</sup> Ahese aipo ehi aipo mbia upe:

—Eichoho nde yiva —ehi.

Evocoyase oichohose oyiva, ocuera tupri voi inungar ambuae iyiva.

<sup>14</sup> Evocoyase fariseo opa yuvinose yuviraso oyemoingatu Jesús yuca ãgua yuvireco.

### *Yaviye arachendar imombehupri Jesús recocuer resendar*

<sup>15</sup> Evocoyase Jesús oicuae fariseo pihañemoñetasa, osẽ oso, ava rehii avei yuviraso supi. Setá avei imbaeasi vahe ombogüera,

<sup>16</sup> iyavei, “Che mombehui rene ava upe peyé” ehi.

<sup>17</sup> Ëgüe ehi yaviyepa Tũpa ñehhe mombehugar Isaías remimombehugüer:

<sup>18</sup> “Co ité che mboyeroyasar che rembiporavo.

Ahe asaisu etepri.

Sese ité ayemboviha.

Amondora che Espiritu chupe.

Ahe omombehu aveira mbahe ihivi vahe opacatu ava ivi pipendar upe.

<sup>19</sup> Noiñehepoepi-epii chira ava, nasase-sasei tãi chiaveira; iyavei ndosendui chietera ava iñehhe ocar rupi.

<sup>20</sup> Iyavei nomopei chietera que ñepeí patavimi oyeapa vahe; nombogüei chiaveira tataendi sãtachiñomi tãi vahe.

Ëgüe ehira mbahe ihivi vahe pipe opacatu secopipa.

21 Evocoyase opacatu tecua pendar ava ndahei vahe judío oyeroyara yuvireco sese' ehi Isaías aracahe.

*“Jesús vireco carugar pĩratasa oyese” ehi tẽi ava yuvireco*

22 Ichui ava ndasesapiso vahe, noñehi vahe carugar rerecosar vıraso Jesús upe yuvireco. Evocoyase Jesús ombogüera. Ahese osareco, oñehi avei.

23 Evocoyase opacatu ava oyepıhamondiisave aipo ehi yuvireco: “¿Tũpa Rembiporavo David suindar pĩha co?” ehi yuvireco chupe.

24 Osenduse rumo fariseo, “Co mbıa carugar rereciar Beelzebú pĩratasa pipe tẽi omboyepı carugar ava sui” ehi yuvireco.

25 Oicuaño rumo ipıhañemoñetasa. Sese aipo ehi: “Que mborereciar guasu povrı pendar ovava-vavase oyeupe oyeamotarẽhisave yuvireco, ahese evocoi mborereciar pĩratasa ocañi tẽira. Iyavei que tecua pendar, anise, que ava omu rese ovavase oyeupe, oyoya oyemocañi tẽira yuvireco.

26 Ëgüe ehi avei carugar. Esepia, sereciar omboyepıse opovrı pendar, ovavara oyeupe yuvireco viña. Evocoyase ahe oyemocañi tẽira yuvireco.

27 Iyavei pe, ‘Beelzebú pĩratasa pipe sui tẽi omboyepı carugar ava sui’ peye tẽi cheu. Evocoyase, ¿ava pĩratasa pipe vo pe voya eta omboyepı carugar ava sui yuvireco? Tũpa pĩratasa pırese, che avei evocoyase ayapo evocoi nungar ipĩratasa pipe. Pe voya ae omboyecua pe ñehi pe rembiavi yuvireco pẽu.

28 Che rumo Tũpa Espıritu pĩratasa pipe amboyepı carugar ava sui. Sese cũritei pesepia ité Tũpa mborerecuasa.

29 “Iyavei no, que ava oi que potase ambuae ava ipĩrata eteprı vahe rõtave imbahe rerocua ãgua ichui viña, yıpındar opa rane itera oñapıchi-pıchi. İpare voi opara vırocua imbahe ichui.

30 “Iyavei acoi ava ndache mboyoyai vahe, ahe che amotarẽhimbar yuvirecoi; acoi ava ndosecai vahe ava cheu nara, ahe omosai tẽi yuvireco che sui.

31 “Sese ava upe oimera ñeroisa opacatu angaıpa rese iyavei iñehi mara-mara tẽi vahe upe avei. Co catu acoi iñehi-ñehi tẽi vahe Tũpa Espıritu upe, ahe chupe ndıpoi chıtera ñeroisa.

32 Iyavei acoi ava oñehi-ñehi tẽi vahe che, Ava Rıquehir rese, ahe chupe oimeño ñeroisa; acoi oñehi-ñehi tẽi vahe rumo Espıritu amotarẽhisave, ahe chupe ndıpoi chıra ñeroisa co ivı pipe iyavei ivave” ehi Jesús fariseo eta upe.

*Ava recocuer icuasa sembiapo rese*

33 “Emoatıro tuprı ivıra, ahe iha avıyera; nderemoatıro tuprıise ivıra, ahe evocoyase vırecora oha naporai vahe. Esepia, ivıra icuasa iha rese.

34 İEvocoyase pe, mboi nungar tẽi peico vahe, pe recocuer naporaise, ndapeicatui chıra mbahe avıye vahe rese pe ñehi ãgua! Esepia, pe pıha pipe sui tẽi osẽ pe ñehi ãgua.

35 Iyavei acoi ava avıye vahe oñehi tuprı opıhañemoñeta catuprısa pipe; acoi ava recocuer naporai vahe rumo, opıhañemoñeta raisa pipe tẽi oñehi.

36 Sese arı cañi pipe opacatu ava opara omombehu oñehi-ñehi tẽisa Tũpa rovai yuvireco.

37 Esepia, pe ñehi avıye vahe reprı peıpısıra, pe ñehi naporai vahe reprı peıpısi aveira” ehi Jesús.

*Ava eta ndaseco põrai vahe oporandu poromondiisa rese yuvireco*

38 Evocoyase fariseo iyavei Moısés porocuaıta rese oporombohe vahe aipo ehi yuvireco Jesús upe:

—Porombohesar, ore orosepia pota mbahe nde rembiapo poromondiisa nde recocuer cua ãgua —ehi yuvireco.

39 Jesús rumo omboyevı iñehi:

—Pe ava ndaseco pōrai vahe, ndiporeroyai vahe, peporandu tēi poromondiisa tecocuer cua āgua rese. Che rumo namboyecuai chira ambuae poromondiisa; Jonás recocuer rese güeraño opomomahenduhara.

<sup>40</sup> Esepia, inungar Jonás secōi mbosapī ari pira guasu aviterve aracahe, ēgüe ehi aveira Ava Riquehir mbosapī ari ivivrive taira omano vahe pāhuve.

<sup>41</sup> Evocoyase ari cañi pipe ava tecua Nínive pendar porandusave omombehura ava cūrteindar cañipa āgua. Esepia, Nínive pendar niha omboasise oangaipa, oyevi Tūpa upe yuvireco Jonás omombehuse Tūpa Ñhengagüer chupe. Cūrtei rumo oime Jonás sui aviye catu vahe pe pāhuve.

<sup>42</sup> Iyavei ari cañi pipe cuña mborerecuar guasu irohi coti secua vahe porandusave, omombehura cūrteindar ava cañipa āgua. Esepia, ahe ou amombri sui Salomón mbahecuasa rendu āgua. Cūrtei rumo oime ivate catu vahe Salomón sui —ehi fariseo eta upe.

### *Carugar oyevi iri ava güeco agüerve*

<sup>43</sup> “Iyavei carugar osēse ava sui, oguata tēi ivi ipiru vahe rupi opituhu āgua reca. Ipare rumo ndoyosuse, ipihañemoñeta,

<sup>44</sup> ‘Ayevi irira che reco agüerve vicho’ ehi. Aheve oyevisē, osepia iri secocuer inungar oī ndiporusai vahe, sahuvapri tupri.

<sup>45</sup> Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tēi catu ité secocuer yipindar güeco agüer sui. Ēgüe ehi aveira ava cūrteindar ndaseco pōrai vahe upe” ehi.

### *Jesús si, tivireta avei*

<sup>46</sup> Jesús oñehe vitesēve ava upe, ahese ichi, tivireta reseve ocarve yuvinochai. Ahe oñehe pota yuvireco chupe.

<sup>47</sup> Evocoyase mbia omombehu Jesús upe:

—Nde si, nde rivireta reseve co ocarve yuvinochai. Ahe oñehe pota yuvireco ndeu —ehi.

<sup>48</sup> Ahe rumo,

—¿Ava piha che si; ava piha che rivri? —ehi ahe mbia upe.

<sup>49</sup> Evocoyase omboyecua opo pipe güemimbohe eta aipo ehi:

—Co che si eta, co che rivireta.

<sup>50</sup> Esepia, acoi che Ru iva pendar remimbotar oyapo vahe, ahe che rivri, che reindri iyavei ahe che si yuvirecoi —ehi.

## 13

### *Mbahe miti sui yembohesa*

<sup>1</sup> Ahe ari pipe Jesús osē oī sui oso, oguapi ipa popive oī.

<sup>2</sup> Aheve ava oñemonuha atise yuvireco, oha carite pipe oguapi oī, evocoyase opacatu ava opita ipa popi rupi yuvireco.

<sup>3</sup> Ahese omboyoya-yoya oporombohesa setá mbahe rese aipo ehi:

“Ñepeī mbia osē omaheti oico.

<sup>4</sup> Ahe otiapi-apiise mbahe rāhi oso, moviro oiti peri rupi. Vīrai ogüeyise rumo sese, opaño yuvirohu.

<sup>5</sup> Iyavei moviro oiti ivi nayanai vahesave ita pāhuve. Sese cūrteimi sorī;

<sup>6</sup> ari tasise rumo, opaño ipiru. Esepia, ndasapoi niha.

<sup>7</sup> Iyavei ambuae mbahe rāhi oiti yu pāhuve. Ahe yu rumo sorī poyava catu yuvireco ichui. Sese opaño oyopi.

<sup>8</sup> Ambuae rumo oiti ivi aviye vahesave, ahe setá iha imonuhasa; ñepeī ihī sui osē cién iha, ambuae sui osē sesenta, ambuae sui treinta.

<sup>9</sup> Acoi ava osenducua pota vahe che ñehe, toyapisacaño sese” ehi Jesús ava eta upe.



*¿Mahera pñha co yembohesa imboyoyasa ambuae mbahe rese?*

<sup>10</sup> Ichui semimbohe eta oyemboya Jesús rese yuvireco mbahe rese oporandu āgua chupe: “¿Mahera vo eremboyoya-yoya mbahe rese nde porombohesa ava upe yepi?” ehi.

<sup>11</sup> Jesús aipo ehi: “Pēu rumo Tūpa oicua uca ité mbahe ndicuasai vahe omborerecuasa resendar; ambuae ava upe rumo ndoicua ucai eté.

<sup>12</sup> Esepia, acoi vireco vahe upe, imondosa catura; acoi ndovirecoi vahe evocoi osenducua raimi vahe serocuasañora ichui.

<sup>13</sup> Sese añehese chupe, amboyoya-yoya aipo nungar mbahe yavai vahe ambuae mbahe rese yepi. Esepia, ahe osepia tēi, ndosepiacuai rumo yuvireco iyavei osendu tēi, ndosenducuai avei yuvireco no.

<sup>14</sup> Na ehi yaviye Tūpa Ñehengagüer Isaías remimombehu:

‘Pe niha pesendu tēira, ndapeicuai chira rumo; iyavei pesepia tēira, ndapesepiacuai chira rumo.

<sup>15</sup> Esepia, evocoi ava eta upe yavai eté ipiha pipe imbahe reroya āgua, ndayapisai eté sendu potaēhisave; ndoyemboesapisoi avei sepia potaēhisave.

Esepia, ndosenducua potai opiha pipe yuvireco cheu oyeví potaēhisave ombogüera āgua’ ehi

Isaías aracahe.

<sup>16</sup> “Pe rumo perorivete ité sepiacuase, pesenducuae avei no.

<sup>17</sup> Supi eté setá Tūpa ñehe mombehugar iyavei ava seco catupri vahe aracahendar osepia pota tēi mbahe pe rembiepia, ahe rumo ndosepiai eté yuvireco; iyavei osendu pota tēi co pe remiendu, ahe rumo ndosendui avei yuvireco” ehi Jesús güemimbohe eta upe.

*Jesús omombehu yembohesa mbahe miti resendar*

<sup>18</sup> Ipare aipo ehi: “Peyapisaca omaheti vahe recocuer rese.

<sup>19</sup> Acoi osendu tēi vahe Tūpa Ñehengagüer imborerecuasa resendar, ipare rumo ndosenducuai, ahe inungar acoi mbahe rāhi oviapi vahe peri rupi. Ipare rumo carugar ou chupe. Ahe ipiha pipe osendu vahe Tūpa Ñehengagüer opa tupriño omocañi ichui.

<sup>20</sup> Iyavei acoi mbahe rāhi seitipri ita pāhuve, ahe inungar ava recocuer yipiño osendu vahe, oipisi vahe avei vorivetesa pipe Tūpa Ñehengagüer.

<sup>21</sup> Ipare rumo inungar co mbahe miti ndovirecoi vahe guapo oviracua āgua, ēgüe ehi avei evocoi nungar ava oimese mbahe-mbahe tēi Tūpa Ñehengagüer sui chupe, cūrteimi seroyaēhisave oyepepi ichui.

<sup>22</sup> Acoi mbahe rāhi seitipri yu pāhuve, ahe inungar ava osendu vahe Tūpa ñehe. Ipare rumo ahe ipihañemoñeta catu saisusave opacatu ombahe eta co ivi pipendar rese. Ipipe sui oyembopa uca ombahe eta upe. Ichui ndoguata iriño Tūpa Ñehengagüer rupi. Sese secocuer ndaviye iri eté, inungar mbahe miti ndihai vahe.

<sup>23</sup> Acoi itisa vahe mbahe rāhi ivi aviye vahe rese, ahe inungar ava osenducua vahe Tūpa Ñehengagüer. Iyavei inungar acoi co mbahe miti ihá iteanga vahe, ēgüe ehi avei ava secocuer aviye vahe inungar ñepeipei sāhi sui osē que cien iha, sesenta iha, anise que treinta” ehi Jesús güemimbohe eta upe.

*Trigo pāhuve caha naporai vahe sui yembohesa*

<sup>24</sup> Jesús omombehu iri co ambuae mbahe rese yembohesa oyoya vahe: “Tūpa mborerecuasa oyoya tupri ava oivi pipe mbahe rāhi oñoti vahe rese.

<sup>25</sup> Opacatu ava queseve rumo oyepota yamotarēhisar, caha tēi rāhi oñoti trigo pāhuve oso.

<sup>26</sup> Acoi trigo iha potase, supive avei sorí caha.

<sup>27</sup> Evocoiyase oporaviqui vahe yuviraso, omombehu iyar upe aipo ehi yuvireco: ‘Ore rerecuar, ¿ndahei vo acoi mbahe rãhii aviye vahe ereñoti nde ivi pipe? ¿Que sui ru caha sorì ipãhuve?’ ehi yuvireco chupe.

<sup>28</sup> Iyar rumo aipo ehi chupe: ‘Oime revo que che amotarẽhisar’ ehi. Evocoiyase oporaviqui vahe oporandu yuvireco chupe: ‘¿Ndiyai pãha caha tẽi orosapohopara ichui viña?’ ehi.

<sup>29</sup> Ahe rumo aipo ehi chupe: ‘Aní, aviyeteramo caha rupive pesapoho tiẽtera trigo’ ehi.

<sup>30</sup> ‘Evocoiyase peseya, tocuacuaño oyoya yuvireco. Yaviyese voi mbahe miti, ahese che ayocuairea oporaviqui vahe caha tẽi rane rerocua ãgua imboapuha uca sapi. Ipare oyapocatura trigo rãhii che mbahe apocatusave yuvireco’ ehi ivi yar” ehi Jesús.

### *Yembohesa mostaza rãhii suindar*

<sup>31</sup> Jesús omombehu iri co ambuae mbahe rese yembohesa oyoya vahe: “Tũpa povri pendar oyoya tupri mostaza rãhii rese. Ahe mbia oñoti vahe oivi pipe.

<sup>32</sup> Supi eté co mostaza rãhii tahimi catu opacatu ambuae mbahe rãhii sui. Ipare rumo, ocuacuase, tuvichá catu ambuae mbahe miti sui inungar ivira tuvichá vahe. Ahe sãca rese vïrai rehii oyapo guaitirã” ehi oporombohe.

### *Yembohesa pan mboapeposa sui*

<sup>33</sup> Ipare Jesús oporombohe iri ambuae mbahe rese aipo ehi: “Tũpa povri pendar oyoya tupri pan mboapeposa rese, acoi cuña omboyeseha tupri vahe trigo cuhi rese opacatu imboapepo ãgua yepi” ehi oporombohe.

### *Jesús oiporu oporombohe ãgua mbahe rese mboyoyasa yepi*

<sup>34</sup> Jesús omombehu opacatu evocoi nungar mbahe omboyoya-yoyase oporombohesa ambuae mbahe rese opacatu ava upe.

<sup>35</sup> Co rumo na ehi Tũpa ñehe mombehusar rembicuachiagüer aviye ãgua: “Che añehese, amboyoyara che porombohesa ambuae mbahe rese. Iyavei amombehura Tũpa ivi apo suive mbahe niporẽhii vahe” ehi.

### *Jesús omombehu tupri oporombohesa caha tẽi resendar*

<sup>36</sup> Ahese Jesús, “Aviye” ehi ava upe. Ipare oique oi pipe. Aheve semimbohe oyemboy-apa yuvireco sese ‘tomombehu trigo pãhuve caha oime vahe resendar yandeu’ oya.

<sup>37</sup> Evocoiyase omboyevi chupe: “Acoi ava mbahe rãhii aviye vahe oñoti vahe, ahe che, Ava Riquehir.

<sup>38</sup> Ivi mbahe miti rupa, ahe ava co ivi pipendar. Iyavei mbahe rãhii aviye vahe, ahe ava Tũpa povri pendar; caha naporai vahe, ahe ava carugar suindar yuvirecoi vahe.

<sup>39</sup> Acoi yamotarẽhimbar, oñoti vahe caha, ahe niha Carugar ité. Evocoiyase ari mbahe miti pohosa, ahe ari cañisa; acoi omonuha vahe mbahe miti, ahe Tũpa rembiguai iva pendar yuvireco.

<sup>40</sup> Iyavei inungar acoi caha tẽi imonuhapri sapi ãgua, ãgüe ehi aveira ari cañi pipe coiye.

<sup>41</sup> Evocoiyase che, Ava Riquehir, che rembiguai iva pendar amondora opacatu ava ambuae omboangaipa uca vahe, mbahe-mbahe tẽi aposar avei rerocua ãgua che povrive yuvirecoi vahe pãhu sui.

<sup>42</sup> Ichui omondopara tata guasuve. Aheve oyaseho tẽira iyavei ombotere-tere tẽira guã yuvireco.

<sup>43</sup> Aheseve voi ava Tũpa reroyasar seco tupri vahe, ari nungar sendi yaira Vu mborerecuasave yuvireco. Que ava osendu pota vahe che ñehe, toyapisacaño sese” ehi.

### *Mbahe repirusu ñomimbri sui yembohesa*

<sup>44</sup> “Evocoiyase Tũpa mborerecuasa oyoya tupri mbahe sepirusu vahe que ivi pipe ñomipri rese. Ipare ava aviyeteramo tẽi oyosura viña. Ahe rumo aheve avei oñomi. Ipare

vorivetesa pipe opacatu ombahe omondopa co ivi rerocua ãgua mbahe sepirusu vahe pota raisa pipe” ehi.

*Mbohír sepírusu catu vahe sui yembohesa*

<sup>45</sup> “Iyavei Tūpa mborerecuasa inungar ava mbahe rerocuar oseca vahe mbohír icatupri vahe yepi.

<sup>46</sup> Ahe oyosuse mbohír sepi catu vahe, oso opacatu ombahe mondo co sepi catu vahe rerocua ãgua.

*Pira mbohasa sui yembohesa*

<sup>47</sup> “Iyavei Tūpa mborerecuasa inungar pira mbohasa. Imondopri ipive. Ipare omboha opacatu-catu tēi pira.

<sup>48</sup> Acoi savapipose pira mbohasa, vinose ivi ãtasave yuvireco. Aheve oiporavo pira aviye vahe oñoñapa ombahe riruve yuvinoi, naporai vahe rumo opaño omombo yuvireco.

<sup>49</sup> Ēgüe ehi aveira ari cañi pipe: ahese Tūpa rembiguai iva pendar yuvinosera opacatu ava ndaseco pōrai vahe mboyepipi ãgua ava seco catupri vahe sui.

<sup>50</sup> Evocoyase ava ndaseco pōrai vahe imondosara tata guasuve. Aheve oyaseho tēira iyavei ombotere-tere tēira guāi yuvireco” ehi.

*Mbahe ipiasu vahe iyavei ocuacua vahe sui yembohesa*

<sup>51</sup> Evocoyase oporandu güemimbohe eta upe:

—¿Pesenducua vo aipo opacatu? —ehi.

—Taa —ehi yuvireco chupe.

<sup>52</sup> Evocoyase ahe aipo ehi:

—Acoi ava oporombohe vahe porocuaite rese, oyembohe vahe avei che Ru mborerecuasa rese, ahe inungar ava oi yar vinose vahe ombahe ipiasu vahe, ocuacua vahe avei yapocatusa sui —ehi güemimbohe eta upe.

*Jesús Nazaret ve secoi*

<sup>53</sup> Oñehe pare, Jesús osē ichui

<sup>54</sup> oyepota güecuave oso. Aheve ombohe ava judío tūparo pipe oico. Evocoyase ahe pendar ava oyepihamondi tēi:

—¿Que pīha co ava oyembohe catu ombahecua ãgua? iyavei, ¿mara ehi pīha co mbahe poromondiisa apo? —ehi yuvireco—.

<sup>55</sup> ¿Ndahei vo acoi carpintero rahír tēi? Ichi niha acoi María, iyavei yuvirecove tivri, ahe Santiago, José, Simón, Judas.

<sup>56</sup> Seindri avei niha yuvirecove yande pāhuve. Evocoyase, ¿que pīha oyembohera viña? —ehi tēi yuvireco chupe.

<sup>57</sup> Ipipe sui ndoviroyai yuvireco. Ahe rumo aipo ehi chupe:

—Tūpa ñehe mombehusar niha omboetei opacatu rupi yuvireco yepi. Secua pipendar, sēta pipendar ae rumo nomboetei yuvireco —ehi.

<sup>58</sup> Evocoyase, ahe ava viroyaēhisa rese, moviro tēi oyapo mbahe poromondiisa ipāhuve.

## 14

*Juan Oporoãpiramo vahe mano agüer*

<sup>1</sup> Ahe ari rupi Herodes, mborerecuar guasu Galilea pendar, oyandu Jesús rerãcua.

<sup>2</sup> Evocoyase aipo ehi opitiviisar upe: “Juan Oporoãpiramo vahe revo ocuerayevi. Sese oyapo poromondiisa ipirata vahe” ehi.

<sup>3</sup> Esepia niha, yipindar Herodes Juan oipisi, oñapichi carena pipe soquenda ãgua vivri Felipe rembireco Herodías sui tēi,

<sup>4</sup> “Ndiyai eté nde rembireco nungar ererecora” oyeupe hese.

<sup>5</sup> Herodes oyuca pota Juan viña, osiquiyeño rumo ava eta sui. Esepia, ahe, “Tũpa ñehe mombehusar secoi” ehi yuvireco chupe.

<sup>6</sup> Acoi Herodes haragüer mboeteisa pipe rumo aipo cuña Herodías membri osë opivoi ava rehi rembiepiave. Herodes upe evocoyase aviye ai eté.

<sup>7</sup> Sese ahe oyemoingatu ñepei reseve que mbahe oyeupe oporanduse imondo ãgua chupe.

<sup>8</sup> Evocoyase ahe cuñatai oyeupe osi remimombehu rupi, aipo ehi Herodes upe:

—Embou Juan Oporoãpiramo vahe ãca poratu pipe cheu —ehi.

<sup>9</sup> Aipo ñehesa nombovihai eté Herodes; ndiya iri rumo, “Aní” ohe ãgua. Esepia, opacatu ava güemimbori eta rovaque aipo ehi. Sese, “Taperu chupe” ehiño.

<sup>10</sup> Ahese oporocuai Juan ãca hasia ãgua soquendasave.

<sup>11</sup> Ipare viraso poratu pipe cuñatai upe yuvireco. Evocoyase ahe omondo osi upe.

<sup>12</sup> Ahese Juan remimbohe oyepota yugüeru, viraso sete ñoti yuvireco. Ipare yuviraso Jesús upe imombehu.

### *Jesús oyopoi cinco mil cuimbahe*

<sup>13</sup> Jesús oyanduse Juan manosa, ahese ahe ae oso ava porëhisave carite pipe. Ava rehi rumo oyanduse, yuvinose voi güecua sui, ivi rupi yuviraso osupiti secosave yuvireco.

<sup>14</sup> Evocoyase osëse carite pipe sui, osepia ava rehi. Ahese oiparisuereco ava eta. Sese opa ombogüera imbaheasi vahe serasopri.

<sup>15</sup> Evocoyase caharuse semimbohe oyemboya yuvireco sese aipo ehi:

—Caharú ité moco cute iyavei ndipoi oi co rupivemi vahe. ¿Ndiyai vo eremondopa ava tecua-tecuami rupi, ahe supi tovirocua mbahe güemihura yuvireco? —ehi yuvireco chupe.

<sup>16</sup> —Aní, ndiyai yuviraso. Pe pemonдора mbahe semihura yuvireco —ehiño chupe.

<sup>17</sup> —Poyandepomi tēi rumo pan orovireco iyavei ñuviriomi tēi avei pira —ehiño semimbohe yuvireco chupe.

<sup>18</sup> —Peruño ave cheu —ehi güemimbohe upe.

<sup>19</sup> Ipare aipo ehi ava rehi upe: “Peguapi capihi harive” ehi. Evocoyase oipisi poyandepomi vahe pan, ñuviriomi vahe pira. Ichui omahese iba rese, “Aviye ndeu, che Ru” ehi. Ichui omombite-mbite pan imondo güemimbohe upe. Ahe evocoyase omboyaho-yaho ava eta upe semihura yuvireco.

<sup>20</sup> Evocoyase opacatu ava ocaru vahe ihitaropa tēi yuvireco. Ipare semimbohe omboapipopa doce tupri iruova sembihu rumbirer yuvireco.

<sup>21</sup> Ahe cuimbahe ocaru vahe retacuer cinco mil. Cuña rumo iyavei chihivahe ndipapasa yuvireco.

### *Jesús oguata i hari rupi*

<sup>22</sup> Ipare Jesús, “Peha pe rane carite pipe, pesasa ipa peso che renondeve. ‘Aviye’ tahe rane ava eta upe” ehi güemimbohe upe.

<sup>23</sup> “Aviye” ohe pare ava upe, oyeupi oso ahe ae ivitri rese oyeroqui ãgua. Pıtuse chupe, opitaño aheve.

<sup>24</sup> Aheseve carite oso pucuse ipa popi sui, ivitu ipirata vahe osovaichi yuvireco. Sese ohitu vahe nambegüe-mbegüei ocua sese.

<sup>25</sup> Cõhe potase, oguata i hari rupi oso güemimbohe coti.

<sup>26</sup> Semimbohe i hari rupi iguatase, oyembosiquiye yuvireco ichui. Sese, —jNdahei vo evocoi hãgüer secoi! —ehi yuvireco chupe.

<sup>27</sup> Güemimbohe upe rumo aipo ehi:

—jPeyemoviracuaño, che tēi! jPesiquiye eme che sui! —ehi.

<sup>28</sup> —Che Yar —ehi Pedro—. Nde ité ereicose, taguata i hari rupi vicho nde piri —ehi.

29 —Erio ru —ehi chupe.

Evocoyase Pedro ogüeyi carite pipe sui, uguata i hari rupi. Osora ipiri viña.

30 Iviitu pĩrata repiase rumo, osiquiye ichui. Oso senise rumo ipive,

—¡Che Yar! ¡Che pĩsiromi eve! —ehi.

31 Ahese cũriteimi voi oipisi Pedro po rese, aipo ehi chupe:

—¡Chĩhi tẽi ereyeroya che rese! ¡Mahera ndereyeroya tuprii che rese! —ehi.

32 Oyuvirohase rumo carite pipe, opituhu voi ivitu.

33 Evocoyase carite pipe yuvirecoi vahe oñenopiha sovai,

—¡Supi eté catu nde Tũpa Rahir ereico! —ehi yuvireco chupe.

*Jesús ombogüera imbaheasi vahe Genesaret pendar*

34 Osasase ipa, oyepota Genesaret ivi rese yuviraso.

35 Opacatu ahe pendar ava oicuaase Jesús yepota, ahese opacatu tecuami rupi omombehu-mbehu ava upe yuvireco. Evocoyase viraso imbaheasi vahe chupe,

36 aipo ehi yuvireco: “Topocomi tẽi nde turucuar popi rese yuvireco” ehi; evocoyase opacatu sese opoco vahe, ocuerapa voi eté yuvireco.

## 15

*Porombohesa yande mboangaipa vahe resendar*

1 Oyemboya Jesús rese moviro fariseo iyavei Moisés porocuita rese oporombohe vahe, yugüeru vahe tecua guasu Jerusalén sui. Ahe oporandu yuvireco chupe:

2 —¿Mahera vo nde remimbohe ndoguatai yande ramo aracahendar aracuasa rupi yuvireco? ¿Mahera vo yande porocuita mboaviyeẽhisa pipe ndoyepoi ocaru ãgua yuvireco yepi? —ehi.

3 Jesús omboyevi aipo ehi chupe:

—Pe no, ¡mahera ndapemboyeroyai Tũpa porocuita pe ramo aracahendar aracuasa rupi tẽi pe guata ãgua!

4 Esepia, Tũpa aipo ehi: “Pemboyeroyara iyavei peipĩtivira pe ru, pe si avei no. Acoi iñehe mara vahe oyesupa upe, ahe tomanoño” ehi aracahe.

5 Pe rumo aipo peye tẽi: “Acoi ava aipo ehi vahe vu upe, osi upe avei no: ‘Ndiyai chira mbahe mondo ãgua pẽu. Esepia, che opacatu mbahe areco vahe imondopri Tũpa upe’ ehise,

6 ahese ndiyai eté ipĩtivii ãgua chupe” peye. Ëgüe peye pe aracua raisa pipe pemocañi Tũpa porocuita peyesui.

7 ¡Pe Tũpa reroyasar angahu tẽi peico vahe! Supi tupri ité Tũpa ñehe mombehusar Isaías rembicuachía aracahendar omombehu pe recocuer:

8 ‘Co tecua pendar ava oyuru pipe tẽi che mboetei yuvireco; ipihañemoñetasa rumo amombri tẽi che sui.

9 Oyerure tupri tẽi yuvireco cheu.

Esepia, iporombohesa ava porocuita tẽi’

ehi Isaías rembicuachiagüer pipe aracahe —ehi Jesús imombehu.

10 Ipare,

—Perio —ehi ava rehi upe—. Peyapisaca, pesenducua tupri che ñehe:

11 mbahe oique vahe ava yuru rupi nomboangaipa ucai. Mbahe osẽ vahe ava yuru pipe sui, ahe rumo omboangaipa uca —ehi.

12 Evocoyase semimbohe oyemboya sese, oporandu yuvireco chupe:

—¿Ereicua vo acoi fariseo oñemoiro nde ñehe renduse yuvireco? —ehi.

13 Ahe rumo aipo ehi chupe:

—Opacatu mbahe miti ndahei vahe che Ru iva pendar remiti, opara sapohosa curi —ehi—.

14 Ëgüe tehiño yuvireco. Esepia, evocoi inungar ndasesapısoi vahe viroguata ambuae ava ndasesapısoi vahe yuvireco. Ahe evocoyase oyoya voira oviapi ivıciuar pıpe yuvıraso —ehi.

15 Evocoyase Pedro oporandu chupe aipo ehi:

—Emombehu tuprı catu iri mbahe eremombehu vahe oreu —ehi.

16 —¿Ndapesenducua vıtei avei catu pe co ñehesa?

17 ¿Ndapeicuai vo opacatu mbahe acoi ava yuru rupi oique vahe oso yavıterve, ipare osē setecuer sui?

18 Ava pıhañemoñetasa sui osē vahe rumo iyuru rupi, ahe ava omboangaipa.

19 Esepia, ava pıhañemoñetasa sui osē pıhañemoñeta raisa, porapichisa, mendasa sui yemboaguasasa, nomendai vahe yemboaguasa tēisa, mondasa, temira iyavei ava rese ñemoñeta tēisa.

20 Evocoi nungar mbahe rumo omboangaipa ava; ndahei angaipa acoi yande caru renonde yande yepoiēhısa nungar —ehi.

### *Cuña ndahei vahe judıa viroya Jesús*

21 Ichui osē Jesús oso, oguata Tiro ivı rupi, Sidón ivı rupi avei.

22 Cuña cananea, Tiro, Sidón ivı rese secoi vahe oyemboya Jesús rese aipo ehi:

—ıChe Yar, David suindar, che paraisuerecomi eve! ıChe membri vıreco caruguar oyese! —ehi pucu-pucu ou chupe.

23 Ahe rumo nomboyevei eté chupe. Evocoyase semimbohe oyemboya yuvireco sese aipo ehi:

—Emboyepepi co cuña yande sui. Esepia, sãse pucu-pucu ou yande raquıcuei —ehi yuvireco chupe.

24 Evocoyase aipo ehi güemimbohe upe:

—Che Ru Tüpa rumo che mbou Israel recua pendar upeño. Esepia, ahe ovesa ocañi tēi vahe nungar yuvireco —ehi.

25 Ahe cuña rumo oñenopiha sovai, aipo ehi chupe:

—ıChe Yar, che pıtivıimi eve! —ehi.

26 Ahe rumo aipo ehi chupe:

—Naporai rumo yarocua pan tahır sui cave tohu yamondo vaherã —ehi.

27 —Supı eté, che Yar, cave avei rumo ohuño ité pan rahıcier oviapi vahe yepı —ehiño chupe.

28 —ıCuña, tuvichá nde yeroyasa! Avıye, Ëgüe tehi eté nde remimbotar rupi —ehi.

Aipo ihe ramoseve, ocuera voi eté imemברי.

### *Jesús setá ombogüera ava imbaheasi vahe*

29 Ichui Jesús osē oso ipa Galilea ivıi. Ipare oyeupi ivıtri rese oguapı oı.

30 Aheve setá ava oyepota, güeru atı imbaheasi vahe yuvireco chupe: ndipındugüei vahe, ndasesapısoi vahe, ipãri-pãri vahe, niñhengatui vahe, iyavei ambuae setá imbaheasi vahe no. Omondose sovai yuvireco, ahe opa ombogüera.

31 Ichui ava niñhengatui vahe oñehe; ipãri-pãri vahe ocuera tuprı; ndoguatai vahe oguata avei iyavei ndasesapısoi vahe osareco yuvireco. Sepıase ava rehi oyepıhamondiı aipo ehi: “Imboeteıprı Israel Tüpa tasecoi” ehi yuvireco.

### *Jesús oyopoi cuatro mil cuimbahe*

32 Evocoyase Jesús oñehe güemimbohe upe aipo ehi:

—İparaisu catu co ava yuvireco cheu. Esepia, mbosapı arı yuvirecoi yande pıri iyavei ndıpoi eté mbahe semihura. Ndiyai sētave sıe porēhi reseve amondo. Avıyeteramo ovırovıapi-api tiētera tieporēhi perı rupi yuvireco viña —ehi.

33 Evocoyase semimbohe aipo ehi yuvireco chupe:

—¿Que sui p̄ha orosecara tembihu ava rehii upe nara cohava ava porēhisave viña? —ehi yuvireco.

<sup>34</sup> —¿Mbovi vo pan pereco? —ehi.

—Orovirecomi siete pan iyavei moviromi tēi pirami —ehi semimbohe yuvireco chupe.

<sup>35</sup> Evocoyase, “Peguap̄i ivi harive” ehi ava rehii upe.

<sup>36</sup> Ahese oip̄isi siete pan, pirami reseve, “Aviye ndeu” ehi Vu upe. Ichui omboyahoyaho güemimbohe upe imondo. Ahe evocoyase omondopa ava rehii upe yuvireco.

<sup>37</sup> Opacatu ava ocaru vahe ih̄itaro yuvireco. Ipare semimbohe omboap̄ipo iri rane sumbirer siete iruova yuvireco.

<sup>38</sup> Cuimbahe ocaru vahe retacuer cuatro mil. Cuña, ch̄hivahe retacuer rumo ndicuasai.

<sup>39</sup> Ipare Jesús, “Aviye” ehi ava upe, ahese oha carite p̄ipe oso ivi Magadán rupi.

## 16

### *Fariseo iyavei saduceo oporandu poromondiisa rese yuvireco*

<sup>1</sup> Fariseo iyavei saduceo yuviraso Jesús repia secoãha ãgua yuvireco viña. “Emoporēhi Tūpa suindar nde recosa poromondiisa p̄ipe oreu” ehi yuvireco chupe.

<sup>2</sup> Aipo ehi rumo fariseo, saduceo yuvirecoi vahe upe: “Supi eté amove caharuse pe aipo peye: ‘Ari tupri aira. Esepia, ìva rese p̄irã iteanga’;

<sup>3</sup> iyavei añihivei: ‘Co p̄ipe ari naporai chira. Esepia, ìva rese p̄ira vai anga, p̄itu guasuguasu avei’ peye. Pe niha peicua mbahe ìva resendar tēi oyecua vahe mombehu; ndapeicuai rumo mara oyapave co poromondiisa cūriteindar ava upe imombehu.

<sup>4</sup> Co ava ndaseco p̄orai vahe oyep̄ep̄i vahe Tūpa sui oporandu poromondiisa rese ‘¿Tūpa suindar ité p̄ha?’ oyapave. Che rumo namboyecuai chira ambuae poromondiisa chupe; acoi poromondiisa Tūpa oyapo Jonás upe güeraño tupri aseyara chupe” ehi.

Ichui oseyapaño ava rehii oso.

### *Fariseo iyavei saduceo porombohesa inungar pan mboapeposa*

<sup>5</sup> Evocoyase semimbohe oyepota ìpa rovai yuviraso. Pan sui rumo sesarai eté yuvireco.

<sup>6</sup> Evocoyase Jesús aipo ehi chupe:

—Peicua catu fariseo iyavei saduceo pan mboapeposa sui —ehi.

<sup>7</sup> Iñehe renduse, semimbohe aipo ehi oyeupe yuvireco:

—¿Ndayarui eté rumo pan! —ehi-ehi tēi oyeupe yuvireco.

<sup>8</sup> Ahe rumo oicua güemimbohe p̄ihañemoñetasa. Sese aipo ehi chupe:

—¿Mahera, “Ndayarui pan” peye! ¿Pe ndapeyeroya tuprii che rese!

<sup>9</sup> ¿Ndapeicua v̄itei vo che rembiapo? ¿Ndapeyemomahenduha v̄itei eté vo acoi poyandepo pan mboyaho agüer acoi ava cinco mil upendar rese, iyavei mbovi iruova pemboap̄ipo sumbirer imonuhase?

<sup>10</sup> ¿Ndapeyemomahenduha v̄itei avei vo acoi amboyaho vahe siete pan ava cuatro mil vahe upe, iyavei mbovi iruova pemboap̄ipo sumbirer?

<sup>11</sup> ¿Too, mara peye rutei pe aipo senducuañhi! Ndahei mo pan rese ité añehe. Peicua catu fariseo iyavei saduceo pan mboapeposa sui —ehi.

<sup>12</sup> Ahese ramo oicua yuvireco cute, ndahei pan mboapeposa rese ité oñehe, Jesús rumo oñehe fariseo iyavei saduceo eta porombohesa rese tēi.

### *Pedro oicua uca Jesús Tūpa Rembiporavo secose*

<sup>13</sup> Oyepotase Jesús, oso tecua Cesarea coti Filipino ivi rese, aheve oporandu güemimbohe upe aipo ehi:

—¿Mara ehi vo ava oñehe yuvireco che rese, Ava Riquehir che recose? —ehi.

<sup>14</sup> Semimbohe evocoyase aipo ehi yuvireco chupe:

—Amove ava: “Juan Oporoãpiramo vahe” ehi yuvireco ndeu; ambuae aipo ehi yuvireco: “Elías”; ambuae ava aipo ehi avei yuvireco: “Jeremías”; anise ambuae ava, “Tũpa ñehe mombehúsar mboetasa” ehi yuvireco ndeu —ehi.

<sup>15</sup> —Pe no, ¿‘Ava co secoi’ peye ru pe cheu no? —ehi güemimbohe upe.

<sup>16</sup> —Nde niha Tũpa supi eté vahe Rembiporavo imombehupri; Tahir ité ereico —ehi Simón Pedro.

<sup>17</sup> —Nde sovasapri ereico Simón, Jonás rahir. Esepia, ndahei ava tẽi omboyecua co mbahe ndeu, che Ru iva pendar teieté omboyecua ndeu —ehi—.

<sup>18</sup> Nde Pedro ereico, co ita guasu harive amopuhara che tũparoguã. Ñepe yepe manosa ndosecoreroyi chietera opĩratasa pipe.

<sup>19</sup> Evocoyase che amondo Tũpa mborerecuasa resendar mboisa ndeu; acoi, “Aviye” erese que mbahe uve co ivi pipe, ãgüe ehi aveira ivave; iyavei, “Ani” erese que mbahe uve co ivi pipe, ãgüe ehi aveira ivave —ehi.

<sup>20</sup> Ipare Jesús aipo ehi güemimbohe upe: “ ‘Co Tũpa Rembiporavo Poropĩsirosar’ peye eme ava upe cheu” ehi.

### *Jesús omombehu omano ãgua*

<sup>21</sup> Ichuive tupri Jesús omboipi imombehu güemimbohe upe oico: “Iya niha cheu che so ãgua tecua guasu Jerusalén ve. Aheve judío rerecuar, pahi rerecuar ivate catu vahe iyavei Moisés porocuita rese oporombohe vahe, ahe che mombaraisu ucara iyavei che yuca ucara yuvireco. Che yucasa sui rumo imombosapisa ari pipe acuerayevira” ehi.

<sup>22</sup> Pedro rumo viraso co cotimi chupe oñehengata ãgua:

—¡Tũpa ndoipotai eté evocoi nungar nde reco ãgua, che Yar! ¡Ndipoi chietera mbahe ndeu! —ehi Pedro chupe viña.

<sup>23</sup> —¡Esiri che sui, Carugar! —ehi Pedro upe—. Nde che reiti pota eve mbahe tẽi pipe. Esepia, nandepihañemoñetai mbahe Tũpa upendar rese, ava nungar tẽi nde pihañemoñeta eico —ehi.

<sup>24</sup> Ipare aipo ehi güemimbohe upe:

—Acoi oguata pota vahe che rupi, tasesarai mbahe güemimbotar aposa sui iyavei inungar-ra curusu rese ovosira viña, toyemoingatu voi che recocuer rese oparaisu ãgua iyavei toguata tupri che rupi.

<sup>25</sup> Esepia, acoi ava güetecuer tẽi raisupar, ocañi tẽi etera; acoi ava omocañi tẽi vahe rumo güetecuer che recocuer rese, ahe oñepisiora.

<sup>26</sup> Esepia, ¿aviye ai angahu pĩha ava upe opacatu mbahe co ivi pipendar pisi ãgua, ahe ae tẽi omocañise güecocuer yuvireco viña? ¿Mbovi pĩha omondora ava güecocuer repirã viña?

<sup>27</sup> Esepia che, Ava Riquehir, ahevira che Ru reco pĩratasa pipe che rembiguai iva pendar reseve curi. Che evocoyase aicuara ñepeipei ava rembiapo agüer rupi chupe.

<sup>28</sup> Supi eté oimera amove cohava ava nomano vitei chivaherã, ahe che, Ava Riquehir, che repia rane itera che yevise che mborerecuasa pipe yuvireco curi —ehi güemimbohe upe.

## 17

### *Jesús ñecuñaro agüer*

<sup>1</sup> Seis ari pare Jesús viraso Pedro, Santiago, tivri Juan reseve co coti ivitri ivate vahesave oyeupi.

<sup>2</sup> Aheve, aviyeteramo tẽi oñecuñaro güemimbohe rovai. Evocoyase sendi sova inungar ari, iturucuar morochí, sendi avei.

<sup>3</sup> Aheseve voi oyemboyecua Moisés, Elías reseve yuvireco chupe. Ahe oñemoñeta oyeupe yuvinoha.

<sup>4</sup> Ahese Pedro aipo ehi chupe:



—Che Yar, javiye ai eté cohave yaico! Ereipotase, ayapora mbosapi teyupami: ñepeí ndeu nara, ambuae Moisés upe, ambuae evocoyase Elías upe nara —ehi.

<sup>5</sup> Aviyeteramo tēi i va quiha rese osesapé ogüeyi ou oyopipa tupri ité. Ipãhuve oyeendu ñehesa aipo ehi: “Co che Rahir, che rembiaisu. Che mboviharete; peyapisaca catu iñehe rese” ehi vahe.

<sup>6</sup> Aipo renduse, semimbohe osiquiyé iteangasa pipe opaño ivi rese oñaca mboya yuvireco ichui.

<sup>7</sup> Ahese oyemboya oso güemimbohe rese, oñatoi aipo ehi chupe:

—Pepũha; pesiquiyeyi rene —ehi.

<sup>8</sup> Evocoyase omahe yuvireco sese, ahese ahe güeraño osepia imoha yuvireco.

<sup>9</sup> Ipare yuvirogüeyi ivitri sui aipo ehi evocoi mbosapi güemimbohe upe:

—Ndapemombehui chietera que ñepeí ava upe co mbahe pesepia vahe, pemombehura rumo acoi che, Ava Riquehir, acuerayevise voi —ehi.

<sup>10</sup> Evocoyase semimbohe oporandu yuvireco:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

<sup>11</sup> Evocoyase omboyevi güemimbohe upe aipo ehi:

—Elías rane ité niha oura opacatu mbahe moingatu ñgua curi.

<sup>12</sup> Ahe rumo ou ité cuese. Ndoicuai rumo ava yuvireco. Amove rumo opacatu güemimbotar tēi oyapo yuvireco sese. Ëgüe ahe aveira niha cheparaisura ahe ava povrive vichico —ehi.

<sup>13</sup> Evocoyase semimbohe osenducua ramo iñehe yuvireco. Ëgüe ehi Jesús oñehe Juan Oporoãpiramo vahe rese.

### *Jesús ombogüera chñivahe caruguar rerecosar*

<sup>14</sup> Viroyepota Jesús güemimbohe ava rehaisave seraso. Aheve mbia oyemboya oso sese, oñenopiha sovai aipo ehi chupe:

<sup>15</sup> —Che Yar, ereiparaisuerecomi tēira che rahir cheu viña. Esepia, ahe ipiha mbaheasi vahe, oyemombaraisú iteanga. Setá yupagüer oviapi tatave, ive avei no.

<sup>16</sup> Sese aru tēi nde remimbohe upe. Nombogüera catui rumo yuvireco —ehi.

<sup>17</sup> —¡Too, ndapeyeroya tupri viteí eté che rese! ¡Co coti tēi vite pe pihañemoñetasa! ¡Mbovi rupi rutei vo aico vitera pe pãhuve che ñemosasa pipe! Peru evocoi chñivahe cheu —ehi.

<sup>18</sup> Ahese oñehe pñrata caruguar upe chñivahe sui imose. Aheseve ocuera tupri voi eté.

<sup>19</sup> Ipare semimbohe oporandu co cotimi yuvireco chupe:

—¿Mahera pñha ndoromose catui eté caruguar ichui? —ehi yuvireco.

<sup>20</sup> —Esepia, ndapeyeroya tupri Tũpa rese. Supi eté sese pe yeroyasa, yepe ndoyavi chira mostaza rãhi tahimi vahe viña, aipo peyera co ivitri upe: ‘Esiri, eso coi coti’ peyera. Evocoyase ivitri osiriño itera. Ahese ndapemboavaimi chira mbahe.

<sup>21</sup> Evocoi nungar caruguar imosesa yayerurese yande yecuacusa pipe —ehi.

### *Jesús omombehu iri omano ñgua*

<sup>22</sup> Jesús oguata vitesese Galilea ivi rupi, aipo ehi güemimbohe upe oico:

—Che, Ava Riquehir, imondopri aicora che amotarẽhimbar povrive.

<sup>23</sup> Che yuca aveira yuvireco. Acuerayevira rumo imombosapisa ari pipe —ehi.

Osenduse semimbohe aipo ihe, ndovihai tēi yuvireco.

### *Jesús omondo guarepochi tũparo uve nara oyeupe oporandu vahe upe*

<sup>24</sup> Oyepotase Jesús güemimbohe reseve tecua Capernaum ve, aheve guarepochi rocuasar tũparo upe nara yuviraso Pedro upe, oporandu yuvireco chupe:

—¿Supi eté pe rereciar ndomondoi guarepochi tũparo upe nara? —ehi.

<sup>25</sup> —Omboepi niha —ehi Pedro chupe.

Evocoyase oiqueste Pedro oi pipe, aheve Jesús rane oñehe chupe aipo ehi:

—¿Mara ehi nde pihañemoñeta, Simón? ¿Ava sui vo virocua guarepochi mborerecuar guasu co ivi pipe yepi? ¿Omu sui pīha, ambuae ava sui tie? —ehi.

<sup>26</sup> Pedro evocoyase omboyevī chupe:

—Ambuae ava sui —ehi.

—¡Taa! —ehi—. Evocoyase mborerecuar povri pendar nomboepi chira yuvireco —ehi—.

<sup>27</sup> Guarepochi rerocuasar moñemoiroēhi āgua rumo, eresora ipa pipe, epirapoi. Acoi yipindar pira erenose vahe, ahe iyuru pipe ereyosura ñepei guarepochi. Ahe eraso chupe. Ipipe iyacatura imboepi āgua yandeu —ehi Jesús Pedro upe.

## 18

*¿Ava vo seco ivate catu vahe?*

<sup>1</sup> Ahe ari pipeve semimbohe oyemboya Jesús rese yuvireco mbahe rese oporandu āgua chupe:

—¿Uma vo seco ivate catu vahe Tūpa mborerecuasa pipendar? —ehi.

<sup>2</sup> Evocoyase Jesús: “Erio” ehi ñepei chīhivahemi upe, omondo güemimbohe pāhuve imoha,

<sup>3</sup> aipo ehi:

—Supi eté, acoi ndapeñecuñaroise iyavei ndapeicoise chīhivahemi nungar, ahese ndapeiquei chira Tūpa mborerecuasa pipe.

<sup>4</sup> Acoi oñemomini vahe rumo inungar co chīhivahemi, evocoi nungar seco ivate catura Tūpa mborerecuasave.

<sup>5</sup> Acoi ava oipisi vahe co chīhivahemi nungar che rer pipe sereco, che ité che pisi yuvireco —ehi.

*Iparaisu itera ava oporomboangaipa uca vahe*

<sup>6</sup> “Acoi que ava rumo omboangaipa uca vahe co chīhivahemi nungar che reroyasar, iyacatu evocoi nungar ava ñapichisa ita guasu iyesho rese para guasu pipe imombo āgua.

<sup>7</sup> ¡Iparaisu co ivi pipendar che reroyasar omboangaipa uca vahe yuvireco! Che reroyasar upe rumo oimeño itera poroatoisa yepi, jahe imboangaipa ucasar rumo iparaisu itera!

<sup>8</sup> “Sese inungar pe po, anise que pe pi avei pemboangaipa uca vahe, peyasia, pemombora amombri peyesui viña. Esepia, aviye catu peiquera tecove apirēhisave ñepei pe pi, pe po rese, peso rāgüer sui tata guasu apirēhisave ñuvirío pe po, que ñuvirío pe pi reseve.

<sup>9</sup> Iyavei pe resa pe mboangaipa ucase, penose, pemombo amombri peyesui. Esepia niha, aviye catu peiquera ñepeimi pe resa rese tecove apirēhisave, ñuvirío pe resa rese tata guasu apirēhisave pe reique rāgüer sui.

*Porombohesa ovesa ocañi tēi vahe resendar*

<sup>10</sup> “Peroñroi rene que ñepei chīhivahemi che reroyasar. Esepia, ivave sembiguai che Ru pirindar ité yuvirecoi yepi” ehi.

<sup>11</sup> “Che niha, Ava Riquehir, ayu ava ocañi tēi vahe pīsiro āgua.

<sup>12</sup> “¿Mara ehi pe pihave? Acoi virecose mbia cien tupri ovesa güeimba, ipare rumo ocañira ñepei ichui viña, evocoyase oseya ranera noventa y nueve tēi vahe ovesa ivitri rese. Oyevira ocañi vahe reca oso.

<sup>13</sup> Ipare oyosuse rumo, oviharete catuñora evocoi ovesa rese ambuae noventa y nueve nocañi vahe sui.

<sup>14</sup> Egüe ehi avei che Ru ivave secoi vahe, ndoipotai eté que ñepei ava che reroyasar chīhivahemi nungar cañi āgua” ehi.

*Porombohesa yande ñero āgua rese*

15 “Acoi nde mboetasa Tũpa reroyasar oyapose que mbahe tẽi ndeu, eresora nde ae, eñehe mbahe ndeu oyavi vahe rese chupe. Nde ñehe viroyase, ahese peñero oyeupe cute.

16 Nande reroyaise rumo, ahese ereñehera ñepei, anise ñuvirio ava upe nde pĩtivii ãgua rese. Ahe avei tosendu pe ñehe. Ahese oimera que ñuvirio, anise mbosapi sendusar.

17 Acoi ndoviroyaise pe ñehe, ahese emombehu opacatu Jesús reroyasar upe; ahe ndoviroyaise ité no, evocoyase Tũpa ndoicuai vahe nungar pereco iyavei inungar mbahe-mbahe tẽi aposar, ãgũe peye sereco” ehi.

18 “Supi eté acoi, ‘Aviye’ peyese que mbahe upe co ivi pipe; ãgũe ehi aveira ivave. Iyavei co ivi pipe, ‘Aní’ peyese que mbahe upe, ãgũe ehi aveira ivave.

19 “Iyavei co amombehu potami avei pẽu: Acoi ñuvirio co ivi pipe pe pihañemoñetasa oyoya tuprise que mbahe rese peporandu ãgua pe yeruresa pipe, evocoyase che Ru iva pendar omondora pe porandusa pẽu.

20 Esepia, acoi ava ñuvirio, que mbosapi oñemonuhase che rer pipe yuvireco, aheve che aico ipãhuve” ehi.

21 Ipare Pedro oyemboya sese oporandu:

—Che Yar, ¿mbovi rupi vo che ñerora che mboetasa mbahe tẽi cheu oyapose? ¿Siete yupagüer rupi pĩha? —ehi.

22 —¡Aní! —ehi—. ¡Setenta rupi siete oyupagüer! —ehi Pedro upe.

### *Yembohesa ava niñero potai vahe resendar*

23 “Tũpa mborerecuasa inungar mborerecuar guasu omoingatu pota vahe güembiguai revesa chupe.

24 Evocoyase omboipi imoingatu ãgua, ahese ipĩtiviiisar güeru ireve atĩ catu vahe guarepochi rese chupe.

25 Ahe rumo ndovirecoi imboepi ãgua. Sese co mborerecuar oyocuai opĩtiviiisar aipo ehi: ‘Timondopasa co che rembiguai sembireco reseve, tahir iyavei opacatu mbahe vireco vahe reseve irevesa mboepipa ãgua cheu’ ehi.

26 Evocoyase sembiguai oñenopiha sovai aipo ehi chupe: ‘¡Too! Che rerecuar, eñemosañomi tẽi cheu. Opara niha amboepi ndeu’ ehi chupe.

27 Ahese oiparaisuereco, opoi irevesa sui.

28 “Aheseve voi rumo sembiguai osẽse, osepia ambuae ondugüer oyeupe ndaseta tupri vahe ireve. Ahe chupe aipo ehi iyesho pisi: ‘¡Emboepipa acoi nde revesa cheu!’ ehi.

29 ‘¡Aní!’ ehi oñenopiha oso sovai, ‘Eñemosañomi tẽi cheu’ ehi, ‘amboepipara niha acoi che revesa ndeu’ ehi.

30 Niñero potai eté rumo. ‘Tomboepipa rane ité orevesa cheu’ ehi soquenda uca.

31 Osepia rumo ambuae imboetasa, tasí iteanga ipiha pipe. Ahese yuviraso omombehu güerecuar uve opacatu sembiapocuer yuvireco.

32 Evocoyase ahe serecuar güeru uca aipo ehi chupe: ‘¡Mbahe tẽi eté nde rembiapo! Che apoiño opacatu nde revesa sui. Esepia, ereyemombaraisu catumi ereporandu cheu.

33 ¡Ndiyai vo nde avei ereiparaisuereco nde mboetasa viña, inungar che oroparaisuereco!’ ehi.

34 Ichui serecuar oñemoirosave oyocuai imombaraisu ãgua ‘tomboepipa rane ité orevesa cheu’ oyapave.

35 “Indó, evocoyase ãgũe ehi aveira che Ru iva pendar pẽu ndapeñeroise ité peyeupe” ehi Jesús güemimbohe upe.

## 19

### *Jesús oporombohe mendasa sui poiẽhi ãgua*

1 Ipare Jesús osẽ Galilea sui, oso Judea ivi rupi ari sãsa coti iai Jordán rovai.

<sup>2</sup> Ava rehii yuvirasó saquicuei. Aheve setá imbaheasi vahe ombogüera.

<sup>3</sup> Evocoyase oyemboya fariseo Jesús rese yuvireco; secoãhasave oporandu yuvireco chupe:

—¿Aviye pñha opoi cuimbahe güembireco sui que mbahe tēi oyapose? —aipo ehi yuvireco chupe.

<sup>4</sup> Ahe rumo omboyeví fariseo upe:

—¿Ndapesenducuaimi vo ñehesa icuachiapri pīpe peyeroquise: ‘Yipindar yande Aposar oyapo cuimbahe, cuña avei’ ehi?

<sup>5</sup> Iyavei aipo ehi: ‘Sese niha cuimbahe omendase, oyepepīra oyesupa sui güembireco rese ité yuvirecoi ãgua. Evocoyase ñuvirío yuvirecoira ñepeí ava nungar’ ehi.

<sup>6</sup> Sese ndahe iri ñuvirío, ñepeí vahe ité yuvirecoira. Evocoyase ava Tūpa omomenda vahe oyese, ndiyai ava tēi omboyepēpī yuvireco oyesui —ehi.

<sup>7</sup> Evocoyase fariseo oporandu yuvireco chupe:

—¿Mahera ru oyocuai Moisés cuimbahe omondo vaheerã güembireco upe cuachiar poisa resendar opoi ãgua ichui? —ehi.

<sup>8</sup> —Pe poreroyaēhisa pīpe niha Moisés ēgüe ehi pēu. Yipisuive ité rumo Tūpa ndoipotai oyesui opoi ãgua yuvireco.

<sup>9</sup> Esepia, acoi opoi vahe güembireco mbahe ndoyavii vahe sui omendase ambuae cuña rese, ahe oyemboaguasa tēi vahe —ehi fariseo upe.

<sup>10</sup> Ipare semimbohe aipo ehi yuvireco chupe:

—Ēgüe ehise cuimbahe güembireco rese, evocoyase aviye catu ndayamendai chira —ehi.

<sup>11</sup> —Ndahei chira rumo opacatu osenducua che aipo ahe vahe yuvireco. Tūpa ombou vahe sembiaporã, ahe güeraño osenducua yuvireco —ehi güemimbohe upe—.

<sup>12</sup> Esepia, oime pñhañemoñetasa ava mendaēhi ãgua: amove ohasa suive ndatahii vahe, ambuae nomboahi ucai ava yuvireco, ambuae evocoyase nimendasei. Esepia, ahe oporaviqui pota Tūpa mborerecuasa reseño ité. Acoi oicatu vahe co ñehesa reroya ãgua, tovirroyaño —ehi.

### *Jesús osovasa chñhivahe*

<sup>13</sup> Ipare ahe pendar güeru moviro chñhivahe Jesús upe yuvireco ‘tomondo opo iharive; toyerure avei sese no’ oyapave; semimbohe rumo, “¿Mahera vo peruño tēi chñhivahe?” ehiño serusar upe yuvireco.

<sup>14</sup> Jesús rumo aipo ehi:

—¡Mahera ndapeipotai iyu ãgua! Toyugüeruño chñhivahe cheu. Esepia, co chñhivahe nungar ava yuviroiquera che Ru povrive —ehi.

<sup>15</sup> Ipare omondo opo chñhivahe harive osovasa. Ichui osē oso.

### *Mbia chñhivahe imbahe eta vahe omõñeta Jesús*

<sup>16</sup> Mbia chñhivahe mbahe yar oso Jesús upe oporandu:

—Porombohesar, ¿mbahe vo aviye vahe ayapora tecovesa apirēhi vahe rereco ãgua? —ehi.

<sup>17</sup> —¡Mahera ereporandu cheu mbahe aviye vahe rese! —ehi—. Ñepeíño ité aviye vahe oime. Erereco potase rumo tecovesa apirēhi vahe, emboyeroya mborocuita —ehi.

<sup>18</sup> —¿Uma vo aipo mborocuita? —ehi.

Ahese omboyeví chupe:

—‘Ndereporoyucái chira, nandeaguasái chira, nandemondai chira, nanderemirai chiveira ambuae ava rese,

<sup>19</sup> eremboyero yara nde ru, nde sí avei, eresaísura ambuae ava nde yeaisu nungar eico’ ehi icuachiapri pīpe —ehi mbahe yar upe.

<sup>20</sup> —Co rumo mborocuaita opacatu amboaviye ité yepi. ¿Mbahe vo evocoyase ipane vite che ayapo vaheerã? —ehi.

<sup>21</sup> —Ereipotase mbahe tupri pipe nde reco ãgua, emondopa rane nde mbahe; ahe sepri evocoyase eremondora ava iparaisu vahe upe. Ichui ererecora mbahe aviye vahe ivave. Ipare ereguatara che rupi —ehi chupe.

<sup>22</sup> Aipo oyeupe hese rumo, ahe mbia oyepepiño ichui oviharẽhisave oso. Esepia, mbahe yar ité seci.

<sup>23</sup> Evocoyase aipo ehi güemimbohe upe:

—Supi eté yavai eteanga imbahe eta vahe upe oi que vaheerã che Ru mborerecuasave.

<sup>24</sup> Aipo ahe iri: Yavai rai camello upe yucuar rupi seique ãgua; ava imbahe eta vahe upe rumo yavai catu che Ru mborerecuasave seique ãgua —ehi.

<sup>25</sup> Aipo iñehesa renduse, semimbohe oyepihamondi aipo ehi:

—¡Ava angahu pñha evocoyase oñepisira yuvireco viña! —ehi yuvireco.

<sup>26</sup> Omahe güemimbohe rese, aipo ehi:

—Ava tẽi upe yavai aipo nungar mbahe apo. Tũpa upe rumo mbahe opacatu ndayavaimi eté —ehi.

<sup>27</sup> Ahese Pedro aipo ehi chupe:

—Ore rumo oroseyapa opacatu ore mbahe nde rupi ore guata ãgua. ¿Mbahe evocoyase oimera oreu? —ehi.

<sup>28</sup> —Oime itera niha mbahe pẽu. Esepia, acoi ari oyepotase opacatu mbahe recuñaro ãgua, ahese che, Ava Riquehir, aguapira che rendave che mborerecuasave. Pe avei, che rupindar, peguapira doce tenda harive. Ahese opacatu judío acoi doce imar Israel suindar recocuer rese peporandura curi.

<sup>29</sup> Acoi opacatu ava oseya vahe güeta, anise que viquehir, anise vivri, güeindri, que vu, anise osi, guahir, que oivi avei che raisusa pipe, ahe oipisira omahera cien yupagüer rupi mbahe oseya vahe iyavei virecora tecovesa apirẽhi vahe.

<sup>30</sup> Seta vai rumo cũritei yipindar vahe, ipa tẽira yuvirecoi; setá aveira cũritei ipa tẽi vahe, yipindar yuvirecoira curi —ehi.

## 20

### *Yembohesa oporaviqui vahe resendar*

<sup>1</sup> “Tũpa mborerecuasa inungar acoi ava ivi yar osẽ añihiveive oyeupe nara oporaviqui vahe reca ‘toporaviqui che uva tive yuvireco’ oyapave.

<sup>2</sup> Oyosuse ava, ahese omoingatu oyeupe oporaviqui vaheerã upe ñepe ari mboraviqui repri imboepi ãgua. Ahese opa omondo ocove imboporaviqui.

<sup>3</sup> Ipare osẽ, oso añihivei, arivate catumi osepia ocarusu pipe ambuae ava oporaviquisa ndovirecoi vahe,

<sup>4</sup> aipo ehi chupe: ‘Peso, tapeporaviqui che uva tive. Amboepi tupri niha pẽu’ ehi. Ahe evocoyase yuviraso oporaviqui ãgua icove.

<sup>5</sup> Ipare oso iri mbiter ari rupi oyeupe oporaviqui vahe reca, ãgüe ehi tupri avei caharuse, las tres rupi.

<sup>6</sup> Ipa osẽ iri las cinco pipe, aheve avei osepia ambuae ava ndovirecoi vahe oporaviquisa yuvinoha. Chupe aipo ehi: ‘¿Mahera peyembohĩ tẽi ari momba cohove pehã?’

<sup>7</sup> ‘¡Aní!’ ehi yuvireco, ‘Esepia, ndipoi eté ava, tapeporaviquimi, ehi vahe oreu’ ehi. Evocoyase, ‘Peso, pe avei peporaviqui tive’ ehi.

<sup>8</sup> “Pĩtu ramose, cove yar aipo ehi oporaviqui vahe rese yangarecuar upe: ‘Eñehẽpa ava oporaviqui vahe upe. Emboepi ipa yugüeru vahe upe rane iporaviqui yuvireco chupe. Ipare tenonendar uve’ ehi.

<sup>9</sup> Evocoyase las cinco pipe yuviroique vahe oporaviqui, ahe rane tenonde yugüeru. Oyacatu ñepe-peipei ñepe ari rupindar oipisi guarepochi yuvireco.

<sup>10</sup> Ipape tenonde catu yuviroique vahe oporaviqui, ahe chupe ipa tēi imboepisa. Ahe ipihañemoñeta, ‘Yaipisi catura revo guarepochi’ ehi oyeupe yuvireco viña. Ipape rumo ahe tupriño avei oipisi ñepei ari rupindar yuvireco.

<sup>11</sup> Guarepochi pisire rumo oñemoiro cove yar upe yuvireco,

<sup>12</sup> aipo ehi: ‘Co ava yugüeru ipa tēi vahe, ñepei horami tēi oporaviqui yuvireco. Nde rumo eremboepi oyoya tupriño ité oreu eremboepi vahe rese. Oroñemosañño tēi oroporaviqui ari momba sacucuer upe oroico’ ehi.

<sup>13</sup> Cove yar rumo aipo ehi ñepei ipāhu pendar upe: ‘Mbori, ndahei mbahe tēi ayapo ndeu. Esepia, amboepi guarepochi ñepei ari resendar ndeu acoi, Avīye, peye vahecuer rese cheu’ ehi.

<sup>14</sup> ‘Evocoyase ndo co, eipisi nde guarepochi, eraso. Che rumo amondo pota co ava ipa tēi oique vahe upe inungar tupri ndeu amboepi.

<sup>15</sup> Esepia, cheu iyacatu ité che remimbotar rupi mbahe ayapo che guarepochi rese. Nderecatēhi tie ambuae ava mbahe rese che ayapose mbahe avīye vahe chupe’ ehi.

<sup>16</sup> “Indó, ěgüe ehi aveira ava seco ivi coti catu vahe seco ivate catura yuvireco; iyavei yipindar ava seco ivate catu yuvirecoi vahe, ahe seco ivi coti catu tēi vaheṛā yuvireco curi” ehi güemimbohe upe.

### *Jesús omombehu iri omano āgua*

<sup>17</sup> Jesús oguata oso tecua Jerusalén piar rupi. Ahese co cotimi oipeha güemimbohe doce vahe oyeupe aipo ehi chupe:

<sup>18</sup> –Peyapisaca tupri che ñehe rese: yasora tecua Jerusalén ve. Aheve che, Ava Riquehir, che pisira, che mondo pahi eta rerecuar iyavei Moisés porocuita rese oporombohe vahe povrive yuvireco. Ahe, “Tomano” ehira yuvireco cheu.

<sup>19</sup> Ipape che mondora ava ndahei vahe yande mu upe mara-mara tēi che rereco āgua che reroirosa pipe. Ipipe che yucara curusu rese yuvireco. Imombosapisa ari pipe rumo acuerayevira –ehi.

### *Santiago, Juan si oporandu Jesús upe mbahe rese omembri upe nara*

<sup>20</sup> Ipape Zebedeo rembireco ñuvirio omembri reseve, oyemboya Jesús rese yuvireco. Ahese oñenopiha sovai oporandu āgua mbahe rese.

<sup>21</sup> Evocoyase,

–¿Mbahe vo ereipotami? –aipo ehi ichi upe.

–Che aipota che membri eremboguapira ndeyepiri ñepei nde mbahe rese pocosa coti, ambuae nde mbahe rese pocoñhisa coti nde mborerecuasave –ehi chupe.

<sup>22</sup> –Pe ndapeicuai mbahe rese peporandu. ¿Peiporara catura pīha co mbahe-mbahe tēi aiporara vaheṛā, inungar-ra que igua iro vahe aihu vaheṛā viña? –ehi.

–Taa, oroicatuño itera –ehi yuvireco.

<sup>23</sup> –Supi eté peiporarara mbahe-mbahe tēi. Co rumo ndiyai cheu, che piri opomboguapi āgua che mbahe rese pocosa coti, ambuae che mbahe rese pocoñhisa coti avei. Che Ru rumo omoingatu güembiporavo upe nara oguapi vaheṛā che ipive –ehi.

<sup>24</sup> Aipo iñehesa renduse ore ambuae diez semimbohe, oroñemoiro Santiago, Juan upe avei.

<sup>25</sup> Evocoyase, “Perio” ehi oreu.

–Peicua niha acoi mborerecuar guasu yuvirecoi vahe Tūpa cuaparēhi oporocuai oporoyuca ai tēisa pipe, iyavei acoi ivate catu vahe oyeecoapirasá omborerecuasa pipe yepi.

<sup>26</sup> Pe rumo ěgüe ndapeyei chira peico. Iyacatu rumo acoi ava oipota vahe ivate catu güeco āgua pe pāhuve, ihañeco rane itera opacatu ambuae ava rese.

<sup>27</sup> Iyavei acoi pe pāhu pendar oipota vahe tenonde catu güeco āgua, ihañeco tupri ranera opacatu pe pāhu pendar rese.

<sup>28</sup> Esepia, che, Ava Riquehir, ayu ndahei ava che rese ihañeco ãgua, che rumo ayu ava rese che hañeco ãgua iyavei amano vaherã ava eta repirã Carugar povri sui senose ãgua —ehi.

*Jesús ombogüera ñuvirío ndasesapisoi vahe*

<sup>29</sup> Ipare Jesús, güemimbohe reseve oñocuase tecua Jericó yuvireco, ahese ava rehii yuviraso saquicuei.

<sup>30</sup> Aheve perĩ popive ñuvirío ava ndasesapisoi vahe oguapĩ yuvinoi. Evocoyase osenduse Jesús ocuase supi, osapucái pĩrata yuvireco chupe aipo ehi:

—¡Ore Yar, mborerecuar guasu David suindar, ore paraĩsuerecomi tẽi eve! —ehi yuvinoi.

<sup>31</sup> Ahe ava oyaca-yacaño: “Quiriri” ehi yuvireco chupe. Ahe rumo osapucái pĩrata catuño ité yuvireco aipo ehi:

—¡Ore Yar, David suindar, ore paraĩsuerecomi tẽira eve viña! —ehi iriño ité yuvireco.

<sup>32</sup> Evocoyase osendu iñehe, opita, “Perio” ehi chupe. Ipare,

—¿Mbahe vo peipota ayapo vaherã pẽu? —ehi.

<sup>33</sup> —¡Ore Yar, ore mbosarecomi tẽi eve! —ehi.

<sup>34</sup> Evocoyase saĩsusave opoco sesa rese. Ahe ramoseve ndasesapisoi vahe osareco tupri ai eté yuvireco. Ipare yuvirasoño ité supi.

## 21

*Jesús oique Jerusalén pipe*

<sup>1</sup> Acoi orovirovise Jerusalén, oroyepota tecuami Betfagé popive, ivitri Olivo serer vahe ñipiimi. Aheve omondo ñuvirío güemimbohe

<sup>2</sup> aipo ehi chupe:

—Peso co tecuami yande rovaindarve. Aheve pesepiara guaricu imembri reseve ñapichimbri imoha. Ahe peyorañora seru cheu.

<sup>3</sup> Acoi que ava oporanduse yuvireco pẽu sese, “Yar oiporu pota, ipare niha omboyevĩ voiñora” peyera chupe —ehi güemimbohe upe.

<sup>4</sup> Co ãgüe ehi chupe aracahendar Tũpa ñehe mombehusar ñehengagüer mboaviye ãgua, aipo ehi vahe:

<sup>5</sup> “Pemombehu Sión pendar upe:

‘Pesepia, pe rerecuar guasu ou oico güeco mbegüesa pipe pẽu guaricu harive imembri reseve’ peyera” ehi.

<sup>6</sup> Evocoyase evocoi semimbohe yuviraso, oyapo ité ocuaise yuvireco.

<sup>7</sup> Güeru guaricu imembri reseve yuvireco chupe. Omondo oturucuar icupeao ãgua yuvireco. Ipare Jesús oyeupi iharive.

<sup>8</sup> Iyavei ava rehii oipipira oturucuar perĩ rupi imboetei guasusa pipe. Ambuae evocoyase oyasia pindo omondo perĩ rupi yuvireco saperã.

<sup>9</sup> Ava rehii senonde, saquicuei avei oguata vahe osapucái yuvireco aipo ehi:

—¡Co mborerecuar guasu David suindar, imboeteipri tasecoi! —ehi—. ¡Sovasapri secoi ou vahe yande Yar rer pipe! ¡Ivave imboeteipri tasecoi! —ehi yuvireco.

<sup>10</sup> Oiquese Jerusalén pipe, opacatu co tecua pipendar oyepihamondii yuvireco. Iyavei setá oporandu-randu yuvireco:

—¿Ava pĩha co mbia? —ehi tẽi yuvireco.

<sup>11</sup> Ava rehii oguata vahe Jesús rupi aipo ehi yuvireco chupe:

—Co niha Jesús, Tũpa ñehe mombehusar, ivi Galilea rupindar, Nazaret pendar —ehi yuvireco chupe.

*Jesús omombopa ava mbahe mboepisar tũparo pipe sui*

<sup>12</sup> Ipare Jesús oi que judío tũparo guasu pipe. Ipiendar opa omombo ichui ava mbahe mondosar, mbahe rerocuasar. Iyavei ava guarepochi recuñarosar mesa opa omboviapi ichui; apicasu mondosar renda avei omboviapi imondo.

<sup>13</sup> Ipare aipo ehi chupe:

—Icuachiapri aracahendar pipe aipo ehi: ‘Che rēta yeruresa rētarā’ ehi. Pe rumo imonda rai vahe rēta nungar tēi pereco —ehi.

<sup>14</sup> Aheve oyemboya Jesús rese yugüeru ava ndasesapiso vahe, ipãri-pãri vahe avei. Ahe opa ombogüera.

<sup>15</sup> Osepiase rumo pahi rerecuar guasu iyavei judío porocuita rese oporombohe vahe yuvireco mbahe ndayasepiai vahe sembiapo, iyavei tũparo pipe osenduse chĩhivahe sapucaisa: “¡Imboetepri David suindar tasecói!” ehise, ahese oñemoiro yuvireco

<sup>16</sup> aipo ehi chupe:

—¡Eresendu vo aipo ehi tēi vahe chĩhivahe yuvireco! —ehi.

—Taa, asendu ité —ehi—. Pe no, ¿ndapeyeroqui vo sesendar ñehesa icuachiapri pipe: ‘Chĩhivahemi, pĩtanimi avei osapucaira nde mboeteisa pipe yuvireco’ ehi vahe? —ehi.

<sup>17</sup> Ipare opaño oseya ava oso tecua Betania ve. Aheve ñepepi pĩtu oque.

### *Jesús omomara ivira higuera ndihai vahe oñehe pipe*

<sup>18</sup> Ahere ayihive añihiveive, oyeveise tecua Jerusalén ve, Jesús ndasiepoi oico.

<sup>19</sup> Aheve peri popive osepia ivira higuera. Ahe sese oyemboya oso ‘¿iha pĩha?’ oya viña. So güeraño tēi rumo osepia. Evocoyase ahe aipo ehi chupe:

—¡Co pipe suive nandehai chietera! —ehi.

Aheseve voi opa ipiru.

<sup>20</sup> Ahe mbahe repiase, ore,

—¡Too, mara ehi rutei pĩha co cũriteimi opa voi ipiru! —orohe tēi chupe.

<sup>21</sup> Ahese omboyevi oreu:

—Acoi peyeroyase ité Tũpa rese, ahese ndahei co mbahe güeraño peyapora. Co ivitri uve avei rumo: ‘Esiri ave sui, eso para guasu pipe’ peyese, ahe evocoyase osiriño itera.

<sup>22</sup> Indó, acoi peyerurese mbahe pe porandusa rese Tũpa rese pe yeroyasa pipe, peipisi itera ahe mbahe —ehi.

### *Jesús mborerecuasa*

<sup>23</sup> Ichui Jesús oi que iri judío tũparo guasu pipe oporombohe. Ahese pahi eta rerecuar, judío rerecuar avei oyemboya sese, oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu? —ehi.

<sup>24</sup> Evocoyase ahe aipo ehi chupe:

—Che avei aporandura mbahe rese pēu. Pemboyevise che porandusa, ahese che avei amombehura ava porocuita rupi eté pĩha ayapo co mbahe vichico.

<sup>25</sup> ¿Ava vo Juan ombou ava ãpiramo ãgua? ¿Tũpa pĩha, ava tēi tie? —ehi.

Evocoyase oñemoñeta aipo ehi oyeupe yuvireco: “ ‘Tũpa ombou’ yahese chupe, ahe evocoyase omboyevira yandeu: ‘¿Mahera ru evocoyase ndaperoyai?’ ehira.

<sup>26</sup> Anise, ‘Ava tēi remimbou’ yahese rumo, aviyeteramo opacatu ava yande amotarēhira yuvireco. Esepia, opacatu: ‘Juan omombehu vahe ñehesa Tũpa suindar’ ehi eté yuvireco chupe” ehi.

<sup>27</sup> Sese,

—Ndorocuai eté Juan mbousar —ehiño yuvireco.

Ahese ahe aipo ehi:

—Evocoyase che avei, “Ahe iporocuita pipe co mbahe ayapo” ndahei chietera pēu —ehi mborerecuar guasu upe.

*Ñuvirío ava rahir recocuer sui yembohesa*



<sup>28</sup> Iyavei Jesús aipo ehi judío rerecuareta upe:

—¿Mara ehi pe pihañemoñetasa co rese? Oime mbia vireco vahe ñuvirío guahir. Ahe aipo ehi ocuacua catu vahe upe: ‘Che rahir, co pipe eresora, eporaviqui cove’ ehi.

<sup>29</sup> ‘¡Nachequerēhil!’ ehi voño. Coiye rumo, ‘¿Mahera ěgüe ahe?’ ehi. Ipare osoño ité, oporaviqui.

<sup>30</sup> Ipare oso ambuae guahir upe: ‘Eresora, eporaviqui cove’ ehi tupri avei. Evocoyase, ‘Asora, che ru’ ehi angahu. Ipare rumo ndosoi eté.

<sup>31</sup> ¿Uma vo co ñuvirío yuvirecoi vahe oyapo vu remimbotar? —ehi.

—Co yipindar vahe —ehi yuvireco.

—Supi eté. Esepia, co angaipa viyar mbahe-mbahe tēi aposar, cuña oyemondo-mondo tēi vahe avei, ahe rane yuviroiquera Tūpa mborerecuasave pe sui.

<sup>32</sup> Esepia, Juan Oporoāpiramo vahe ou co tecocuer ihivi vahe mboyecua āgua pēu pe reco tupri āgua viña. Pe rumo ndaperoyai eté. Co angaipa viyar iyavei co cuña oyemondo-mondo tēi vahe ava upe, ahe rumo viroya ité yuvireco. Yepe pesepia tēi opacatu evocoi mbahe viña, ipare rumo ndapeñecuñaroi pe recocuera sui seroya āgua —ehi mborerecuar guasu yuvirecoi vahe upe.

### *Ava mbahe tēi oporaviqui vahe recocuer sui yembohesa*

<sup>33</sup> “Pesendu ambuae ava recocuer rese yembohesa: Oime ivi yar oñoti vahe uva oivi pipe, ahe oñachi tupri sereco, oyapo uva riavi āgua; oyapo avei oi ivate vahe ahe sese mahemoha āgua. Ipare oseya oivi ava oporaviqui vahe upe iporu āgua. Ichui osē oso amombri vahesa rupi.

<sup>34</sup> Coiye oyepotase ari uva pohosa, ahese omondo güembigui oporaviqui vahe upe imboporandu āgua ‘taipisi uva pohopri cheundar cute’ oyapave viña.

<sup>35</sup> Ipare rumo oporaviqui vahe oipisi sembigui yuvireco: amove oinupa-nupa yuvireco, amove oyuca, oyapi-yapi avei amove ita pipe yuvireco.

<sup>36</sup> Ipare rumo ivi yar setá catu omondo iri güembigui. Oporaviqui vahe rumo mara-mara tēño avei vireco yuvireco.

<sup>37</sup> “Coiye rumo guahir teieté omondo chupe cute. Ahe ipihañemoñeta: ‘Omboyeroya catura revo che rahir yuvireco’ ehi viña.

<sup>38</sup> Evocoyase ahe ava tahir repiase, ‘Co aipo oipisira vu mbahe; yayucaño, evocoyase co ivi opitara yandeu nara’ ehi oyeupe yuvireco.

<sup>39</sup> Evocoyase oipisi, vinose miti pāhu sui, oyuca ité yuvireco” ehi.

<sup>40</sup> “Acoi ouse ivi yar, ¿mbahe vo oyapora oporaviqui vahe upe?” ehi oñehe rendusar upe.

<sup>41</sup> Ahe evocoyase,

—Opara revo oyuca saisuēhisa pipe ité co ava ndipihai vahe yuvireco. Ipare revo omondora oivi ambuae ava oporaviqui vahe uve iporu āgua ‘ahe tombou voimi uva ipohopirer cheundar cheu curi’ ohesa pipe —ehi yuvireco.

<sup>42</sup> Aipo ihe pare, aipo ehi oñehe rendusar upe:

—¿Ndapeyeroqui vo co aipo ehi vahe icuachiapri pipe?

‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri āgua.

Ěgüe ehi niha Yar yapo yande mohapisi ai eté’

ehi icuachiapri pipe.

<sup>43</sup> Sese che Ru Tūpa mborerecuasa serocuasara pe sui. Ambuae ava upe rumo imondosara. Ahe virasora che Ru mombahesa chupe.

<sup>44</sup> Acoi que oviapi vahe evocoi ita harive, opa tēira ahe ae oyemomara; iyavei acoi oviapise evocoi ita que ava harive, ahese opa tupri aveira omocañi —ehi Jesús oñehe oyese.

<sup>45</sup> Acoi osenduse pahi rerecuar iyavei fariseo yuvirecoi vahe, osenducua oyesendar ñehesa yuvireco.

<sup>46</sup> Aheseve oipisi pota voi yuvireco viña. Osiquiyeyño rumo ava rehii sui yuvireco. Esepia, opacatu ava ipihañemoñeta: “Co ité Tūpa pīratasa pipe oñehe” ehi yuvireco chupe.

## 22

### *Jesús oporombohe carusa mendasa resendar rese*

<sup>1</sup> Ipare Jesús oporombohe iri ambuae ava recocuer rese aipo ehi:

<sup>2</sup> “Tūpa omborerecuasave inungar mborerecuar guasu guahir mendase oyapo pieta.

<sup>3</sup> Ipare oyocuai güembigui eta ‘ava ichohopri upe toyugüeru cute’ oya. Ichohopri rumo niquerēhi iri yugüeru aheve.

<sup>4</sup> Ipare oyocuai iri ambuae güembigui eta aipo ehi: ‘Aipo peyera ichohopri upe: ¡Toyugüeruño ité! Esepia, opa ité oingatu tembihu iyavei ayuca uca t̄vi iyavei ambuae mbahe m̄imba iquira vahe. Che opacatu amoingatu. Sese toyugüeruño ité mendasave, ehi, peyera chupe’ ehi güembigui upe.

<sup>5</sup> Ichohopri rumo ndoviroyai eté yuvireco. Evocoyase ñepeí osoño ocove, ambuae oso ombahe movendesave,

<sup>6</sup> ambuae rumo oipisi sembigui mara-mara t̄i sereco āgua. Ahe ipipe oyuca yuvireco.

<sup>7</sup> Evocoyase mborerecuar guasu oñemoiro etep̄isave omondo osundao eta co ava oporapichi vahe yuca uca āgua, iyavei secua rap̄ipa āgua.

<sup>8</sup> Ipare aipo ehi ambuae güembigui eta upe: ‘Opa oingatu tembihu mendasave. Co rumo yip̄indar ichohopri, ndiya iri chira yugüeru vahe r̄ã cohave.

<sup>9</sup> Sese peso opacatu ava guata catusa rupi, peñehe mendasave yugüeru vahe r̄ã opacatu pe rovañchisar upe’ ehi.

<sup>10</sup> Evocoyase sembigui eta yuv̄inosepa yuv̄iraso ocar rupi. Ahe osovañchi vahe setá omonuha yuv̄ireco que seco tupri vahe, seco rai vahe avei; ēgüe ehi ava savap̄ipo tupri oi guasu mendasave yuv̄ireco.

<sup>11</sup> “Evocoyase acoi mborerecuar oique ava ichohopri repia. Ipare omahecua tupri ñepeí ava ip̄ahu pendar rese. Ahe rumo ndomondei turucuar mendasa resendar.

<sup>12</sup> Evocoyase aipo ehi chupe: ‘Che mbor̄ipar, ¿mara ere eique ave co turucuar mendasa resendar por̄ēhi?’ ehi. Ahe rumo noñeheiño ité chupe.

<sup>13</sup> Evocoyase, ‘Peip̄isi co mb̄ia, peñap̄ichi ipi, ipo avei, pemose ocarve p̄itumimbisave. Aheve oyaseho t̄ira, s̄aitere-tere t̄ira mbaheras̄icuer rereco’ ehi ichohopri rese hañecosar upe.

<sup>14</sup> Esepia, setá t̄i ichohopri, mov̄iromi t̄i rumo iporavopri ip̄ahu sui” ehi mborerecuareta uve.

### *Fariseo osecoñha iri t̄i Jesús guarepochi rese yuv̄ireco*

<sup>15</sup> Ipare fariseo oñemonuha, ipihañemoñeta yuv̄ireco oyeupe Jesús ñehe yavi uca āgua mborerecuar rovai imomara-mara t̄i āgua.

<sup>16</sup> Ahe evocoyase omondo mov̄iro ovoya yuv̄ireco mborerecuar Herodes rupindar reseve Jesús upe. Ahese aipo ehi angahu chupe:

—Porombohesar, ore oroicua nde supi eté vahe mbahe eremombehu eico iyavei ereporombohe mbahe supi tupri vahe Tūpa recocuer rese. Nde niha ndereroyai vahe ava ñehesa t̄i. Esepia, ava p̄ihañemoñeta rupi ndereicoi vahe; nde p̄ihañemoñeta rumo ñepeí reseve erereco.

<sup>17</sup> ¿Mara ehi nde p̄ihañemoñeta? ¿Aviyera p̄iha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuv̄ireco.

<sup>18</sup> Oicua rumo fariseo p̄ihañemoñeta raisa. Sese aipo ehi chupe:

—Pe seco tupri angahu t̄i vahe peico. ¡Mahera che moingue pota mbahe t̄i p̄ipe peye!

<sup>19</sup> Pemboyecua ru ñepeí guarepochi mborerecuar guasu upendar cheu —ehi.

Evocoyase güeru yuvireco chupe.

<sup>20</sup> —¿Ava rahanga vo co guarepochi rese chini iyavei ava rer vo co chini sese no? —ehi.

<sup>21</sup> —Roma pendar mborerecuar guasu —ehiño fariseo yuvireco chupe.

—Pemondora evocoyase mborerecuar upe mbahe chupendar, Tüpa upendar mbahe evocoyase pemondora Tüpa upe —ehi fariseo upe.

<sup>22</sup> Osenduse, oyepihamondi tēi yuvireco. Evocoyase yuvirase yuviraso ichui.

### *Saduceo oporandu Jesús upe cuerayevisa rese secoãhasave*

<sup>23</sup> Ahe ari pipe saduceo “ndipoi eté cuerayevisa” ehi vahe yugüeru Jesús upe, oporandu tēi angahu yuvireco chupe:

<sup>24</sup> —Porombohesar, Moisés aipo ehi aracahe:

‘Que cuimbahe omanose guahiẽhiseve, ahese tivri omendara sembirecocuer rese ahe viquehir omano vahecuer upe nara tahirã oico’ ehi —ehi yuvireco chupe—.

<sup>25</sup> Cohave, ore pãhuve, oime siete tupri oyesuindar pãve yuvirecoi vahe. Yipindar vahe omenda. Ipare omanoño guahiẽhiseve. Evocoyase tivri omenda sembirecocuer rese.

<sup>26</sup> Ahe omano guahiẽhiseve avei no. Ëgüe ehi avei opacatu ambuae tivri, omano avei guahiẽhiseve yuvireco.

<sup>27</sup> Opacatu imano pare, cuña avei omano cute.

<sup>28</sup> Evocoyase opase ocuerayevi yuvireco, ¿uma rese ité pïha opitara ahe cuña? Esepia, opacatu niha omenda yuvireco sese —ehi saduceo yuvireco chupe.

<sup>29</sup> —Pe pihañemoñetasa co coti tēi eté. Esepia, ndapeicuai eté Tüpa ñehe icuachiapri arachendar, ndapeicuai avei Tüpa pïratasa —ehi—.

<sup>30</sup> Esepia, acoi omano vahe ocuerayevise, chupe ndipo iri chira mendasa. Ahe rumo Tüpa rembiguai ìva pendar nungar yuvirecoira ìvave —ehi—.

<sup>31</sup> Co cuerayevisa resendar rumo amombehura pëu. Aviye ndapeyeroqui anga vahe acoi Tüpa omombehu vahecuer rese. Supi eté ahe aipo ehi aracahe:

<sup>32</sup> ‘Che Abraham, Isaac iyavei Jacob Tüpa aico’ ehi. ¿Tüpa ndahei omano vahecuer Tüpa, ahe rumo oicove vahe ité Tüpa secoi! —ehi.

<sup>33</sup> “¿Too!” ehi ava rehi. “¿Mara ehi rutei iporombohesa!” ehi tēi yuvireco.

### *Porocuita aviye catu vahe*

<sup>34</sup> Ipare fariseo oyanduse yuvireco Jesús omonguiriripañose saduceo oyesui, ahese oñemonuha yuvireco.

<sup>35</sup> Ñepe ipãhu pendar Moisés porocuita rese oporombohe vahe, ahe oyemboya oso Jesús rese oporandu ‘toyavi oñehe Moisés porocuita sui yandeu’ oyapave viña:

<sup>36</sup> —Porombohesar, ¿uma ité vo porocuita aviye catu vahe opacatu ambuae porocuita sui? —ehi.

<sup>37</sup> Evocoyase ahe aipo ehi chupe:

—‘Eresaisura nde Yar Tüpa opacatu nde pihañemoñetasa pipe, opacatu nde recocuer pipe, nde yapisacasa pipe avei’ ehi.

<sup>38</sup> Co porocuita aviye catu vahe ambuae porocuita sui.

<sup>39</sup> Imoñuviriosa inungar tupri avei aipo ehi no: ‘Eresaisura ambuae ava nde yeaisu nungar’ ehi.

<sup>40</sup> Co ñuvirío porocuita rupi uguata opacatu Moisés porocuita icuachiapri, opacatu Tüpa ñehe mombehusar rembicuachía avei —ehi.

### *¿Ava suindar pïha Poropïsirosar?*

<sup>41</sup> Fariseo ñemonuha viteseve,

<sup>42</sup> Jesús oporandu chupe:

—¿Mara ehi pepihañemoñeta acoi Tüpa Rembiporavo ou vahe ñehe ava pïsiro ãgua rese? ¿Ava suindar-ra pïha secoi? —ehi.

—Ahe niha David suindar secoira —ehi fariseo yuvireco chupe.

<sup>43</sup> Ahese aipo ehi fariseo upe:

—¿Mahera pñha evocoyase David oñehese Espíritu pñratasa pñpe aracahe, “Che Yar” ehi chupe? Esepia, ahe aipo ehi:

<sup>44</sup> ‘Yar aipo ehi che Yar upe:

Eguapi che acato coti acoi che amondose voi eté nde amotarẽhimbar nde povrive yuvireco’

ehi David aracahe.

<sup>45</sup> Evocoyase, ¿mahera ru: “Poropñsirosar David suindar secoira” peye, David teieté, “Che Yar” ehise chupe? —ehi fariseo upe.

<sup>46</sup> Evocoyase ndoicatu iri imboyeve ãgua yuvireco cute. Ahe ari pñpe sui ndipo iri que ñepe iquerẽhi vahe iñehe avi uca ãgua oñehe pñpe yuvireco.

## 23

*Jesús oicua uca fariseo iyavei Moisés porocuita rese oporombohe vahe recocuerai*

<sup>1</sup> Ipare Jesús aipo ehi ava eta upe, oreu avei no:

<sup>2</sup> “Co Moisés porocuita rese oporombohe vahe iyavei fariseo eta, ahe icuita Moisés porocuita mombehu tupri ãgua yuvireco.

<sup>3</sup> Sese iya peroyaño ité iyavei peyapo opacatu mbahe semimombehu; aní chira rumo peyapo mbahe sembiapo ai. Esepia, omombehu tupri tẽi mbahe viña, ipare rumo co coti tẽi mbahe oyapo yuvireco.

<sup>4</sup> Iyavei omondo porocuita inungar mbahe ndayasupi catui vahe ava upe ‘tomboaviye opacatu ité yuvireco’ oya. Ahe ae rumo nomboaviyei eté que ñepe oporocuita yuvireco no.

<sup>5</sup> Oyapo angahu mbahe opacatu ava rembiepiave yuvireco yepi ‘tayande repia yuvireco’ oyapave tẽi. Osiva rese, oyiva rese avei ipe guasu vahe vireco-reco tẽi oturucuar rese Tũpa Ñehengagũer cuachiapri yuvireco. Iyavei ipi catu vahe oturucuar popi moaro ãgua omondo yuvireco.

<sup>6</sup> Oipota carusa rupi gũenara aviye catu vahe yuvireco, oseca avei tenda porañete catu vahe gũenara otũparo pñpe yuvireco no.

<sup>7</sup> Oipota avei ava oyeupe ‘avirave’ apo ãgua omboeteisave ocar rupi iyavei oipota, ‘Porombohesar’ oyeupe he yuvireco.

<sup>8</sup> “Pe rumo, ‘Porombohesar’ ndapembohe ucai chira ava peyeupe. Esepia, pe opacatu guasu peyevri peico, iyavei ñepeño ité pereco pe Mbohesar.

<sup>9</sup> Iyavei, ‘Che ru’ ndapeyei chira que ava co ivi pñpendar tẽi upe. Esepia, ñepeño ité pe Ru pereco, ahe niha ìva pendar.

<sup>10</sup> Ndiyai avei, ‘Mborerecur’ pembohe uca ava peyeupe. Esepia, Poropñsirosar gũeraño ité pe rerecur secoi.

<sup>11</sup> Acoi ava seco ivate catu vahe, ahe toporopñtivii gũeco mbegüesa pñpe.

<sup>12</sup> Esepia, acoi oyemboivate ai vahe opara seco reroyisa, iyavei acoi ava seco mbegüe vahe, ahe seco mboivate catusara curi.

<sup>13</sup> “¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tẽi vahe peico! Pemombitaño ava Tũpa povrive seique rãgũer sui peico yepi. Pe avei eté ndapeiquei ipovrive, iyavei acoi yuviroique pota vahe pemombitaño seique rãgũer sui.

<sup>14</sup> “¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tẽi vahe peico! Esepia, perocua-rocuano tẽi cuña imer mano vahecuer rẽta ichui, ipare peyeroqui tupri tẽi angahu ava rembiepiave. Sese peipisira Tũpa ñemoirosa ipñrata catu vahe curi.

15 “¡Peparaísu catu itera pe Moisés porocuaíta rese oporombohe vahe, pe avei fariseo, pe guata tēi angahu vahe Tūpa rese! Peguata opacatu ivi rupi iyavei para guasu rovai rupi ava mbohe. Ipape rumo pe remimbohecuer mbahe tēi catu pe sui. Pe nungar carugar ratave nara tēi pereco uca.

16 “¡Peparaísu catu itera, pe ava mbohesar ndasesapísoi vahe nungar peico! Pe aipo peye tēi vahe: ‘Yamombehuse mbahe tūparo rer pipe yande ñehe mboaviye āgua, ēgüe yahe tēi eté; co rumo yamombehuse mbahe oro tūparo pendar rer pipe, ahese iya itera yamboaviye yepi’ aipo peye tēi.

17 ¡Pe ndapembahecuai vahe nungar, ndasesapísoi vahe nungar avei peico! ¿Uma vo aviye catu vahe: oro pīha, anise tūparo tie? Tūparo pipe niha oro rovasasa yepi.

18 Iyavei co uve avei aipo peye tēi peico: ‘Yamombehuse mbahe seropovēhepri renda rer pipe yande ñehe mboaviye āgua, ēgüe yahe tēi eté; co rumo mbahe yamombehuse mbahe seropovēhepri renda hari pendar rer pipe yande ñehe mboaviye āgua, ahese iya ité yamboaviyera yande ñehe yepi’ aipo peye tēi.

19 ¡Pe ndasesapísoi vahe nungar peico yepi! ¿Uma vo aviye catu vahe? ¿Evocoi porrecosa seropovēhepri pīha, anise mbahe seropovēhepri renda tie? Ahe tenda harive niha porrecosa sovasasa yepi.

20 Sese acoi mbahe omombehu vahe mbahe seropovēhepri renda rer pipe oñehe mboaviye āgua, ndahei serer pipe güeraño, omombehu avei opacatu ihari pendar mbahe seropovēhepri rer pipe,

21 iyavei acoi ava omombehu vahe mbahe tūparo rer pipe oñehe mboaviye āgua, ahe omombehu ipipendar rer pipe avei. Ahe niha Tūpa secói.

22 Iyavei acoi omombehu vahe mbahe que ambuae ava upe iva resendar rer pipe oñehe mboaviye āgua, omombehu avei Tūpa recua rer pipe, Tūpa rer pipe avei. Esepia, Tūpa aheve ité secói.

23 “¡Peparaísu catu itera, pe Moisés porocuaíta rese oporombohe vahe iyavei pe fariseo peico vahe, pe peyapo angahu tēi vahe pe recocuer pipe mbahe peico yepi! Yepe pemondo ñepeí-peí diez pe remiti menta, anis, comino pereco vahe sui ñepeí Tūpa uve nara viña, pe rumo pepoi co porombohesa aviye catu vahe porocuaíta resendar sui. Ahe peyapora mbahe ihívi vahe, peporoparaísuerecora iyavei pemboaviye tuprira pe cuaita yepi. Iyacatu rumo ahe pemboaviye aveira viña.

24 ¡Pe ava mbohesar ndasesapísoi vahe nungar peico! Pe pembogua rutei mbahe rahicuer sui pe igua; mbahe tuvicha vahe rumo pemocoño ité evocoiyase. Ēgüe peye co mborocuaíta upe.

25 “¡Peparaísu itera pe Moisés porocuaíta rese oporombohe vahe iyavei pe fariseo peico vahe, pe seco tupri angahu tēi vahe! Esepia, inungar igua riru iyavei tembihu riru icupe rupi tēi yoseipri. Ipipe rumo iquiha opitaño ité. Ēgüe ehi tēi pe recocuer pe monda raisave, mbahe pota-pota tēisave avei.

26 ¡Pe fariseo peico vahe, ndapepihañemoñetai vahe mbahe pe rembiapo ai rese, pemoatiro rane pe piha pipe mbahe yavaeté vahe sui! Ahese ramo pe rembiapo icatuprira cute.

27 “¡Peparaísu catu itera, pe Moisés porocuaíta rese oporombohe vahe, fariseo peico vahe, peyapo angahu tēi vahe mbahe pe recocuer pipe peico! Pe recocuer inungar tuvipa imomorochimbrí tēi. Iharive tēi icatupri chupe. Ipipe rumo tehögüer cangüer iyavei opacatu mbahe yavaeté vahe ovireco oyese.

28 Ēgüe peye: ava rembiepiave aviye pe reco ihívi vahe viña, pe piha pipe rumo oime pe porombopasa iyavei opacatu mbahe-mbahe tēi.

29 “¡Peparaísu catu itera pe Moisés porocuaíta rese oporombohe vahe, pe fariseo peico vahe, pe reco tupri angahu tēi vahe! Esepia, pemoingatu Tūpa ñehe mombehusar

ruvīpagüer peico sese pe yemomahenduha ãgua iyavei pemoporañete ai tēi ava seco ihĩvi vahe ruvīpagüer yepi viña.

<sup>30</sup> Ipare aipo: ‘Yande yaicose revo aracahe yande ramoi recose, ndayaipĩtivii chietera Tũpa ñehe mombehusar yuca ãgua yuvireco viña’ peye tupri tēi.

<sup>31</sup> Aipo peyese rumo, pemboyecua Tũpa ñehe mombehusarer yucasar suindar pe yesusa.

<sup>32</sup> ¡Pemboyeapi iriño evocoyase pe ramoi rembiapocuerai!

<sup>33</sup> “¡Pe mboi vai suindar tēi peico! Ndapesoyepi chira rumo Tũpa ñemoirosa sui, pesora rumo tata guasuve.

<sup>34</sup> Evocoyase che amboura pēu Tũpa ñehe mombehusar ava yaracua vahe iyavei ava pe mbohe ãgua yuvireco viña. Amove rumo ipãhu pendar peyucara, ambuae peyaticara curusu rese sereco. Ambuae peinupara pe ñemonuhasa rupi iyavei ambuae peseca-secara peico tecua yacatu rupi.

<sup>35</sup> Sese pēuño ité oura Tũpa ñemoirosa opacatu ava aviye vahe yuca agüer rese co ivi pipe; Abel seco ĩvi tupri vahe yuca agüer sui, ipare opacatu ambuae saquicuerindar ava yuca agüer sui, ipa Berequías rahir Zacarías sui avei, ahe peyuca vahe tũparo pipe mbahe seropovēhepri renda rovai.

<sup>36</sup> Supi eté opacatu co mbahe tēi oura pe recove vitesese” ehi.

### *Jesús oyaseho Jerusalén pendar rese*

<sup>37</sup> “¡Too rutei, pe Jerusalén pendar, peyuca vahe Tũpa ñehe mombehusar, ita pipe peyapi-yapi ava Tũpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembrĩ opepovrive! Ĕgüe ahe pota tēi pe rereco viña, pe rumo ndapeipotai eté evocoi nungar pe rereco ãgua.

<sup>38</sup> Sese seyapirã tēi peicora.

<sup>39</sup> Esepia, ndache repiai chira peye acoi, ‘¡Imboeteipri Yar remimbou tasecoi!’ peyese voi che repia irira peye” ehi Jesús ava eta upe.

## 24

### *Jesús omombehu judío tũparo guasu mocañi ãgua*

<sup>1</sup> Ipare Jesús osē judío tũparo pipe sui oso. Aheseve ore semimbohe oroyemboya sese aipo orohe chupe: “¡Ore Yar, esepia co tũparo!” orohe.

<sup>2</sup> Ahe rumo:

—Supi eté amombehu pēu: co opacatu pesepia vahe, ndipoi chietera que ñepeĩ ita oyeha vite vahe. Opacatu ité imondurusara curi —ehi oreu.

### *Jesús omombehu mbahe oime vahe rã arĩ cañi renonde*

<sup>3</sup> Ipare Jesús oso ivitri Olivo ve oguapi oĩ. Aheve ore güeraño tupri oroso chupe mbahe rese ore porandu ãgua:

—Emombehu catu oreu: ¿Mbahese vo aipo mbahe yaviyera? ¿Mbahe poromondiisa rese rane vo icuasara nde yu ãgua iyavei arĩ cañi ãgua? —orohe chupe.

<sup>4</sup> —Peicua catu, peyembopa ucai rene ambuae ava upe peico.

<sup>5</sup> Esepia, setá ava yugüerura, ‘Che aico Tũpa remimbou ava pĩsiro ãgua’ ehi tēira ava eta mbopa yuvireco.

<sup>6</sup> Iyavei pesendura ñehesa vavasa resendar cohava iyavei que rupi. Ndapeyembosiquiyei chira rumo ichui. Esepia, Ĕgüe ehi rane itera niha; ndehi vitei chira rumo arĩ cañisa.

<sup>7</sup> Esepia, ñepeĩ ivi pipendar ovavara ambuae ivi pipendar rese oyeupe yuvireco. Ahese oimera tiavor, ivi rirĩi opacatu-catu tēi tecua rupi.

<sup>8</sup> Opacatu evocoi mbahe rumo omboipri ramomi vahe mbahe tēi porarasa.

<sup>9</sup> “Ahese pe pisira yuvireco mara-mara tēi pe rereco ãgua, pe yuca ãgua avei. Iyavei opacatu ava-ava tēi ndape ambotai chira che recocuer sui tēi yuvireco.

<sup>10</sup> Ahe arı rupi evocoyase setá ava ndache reroya iri chira yuvireco. Ahe oyeamotarēhira iyavei omondora ambuae omboetasagüer yamotarēhimbar povrıve yuvireco.

<sup>11</sup> Iyavei setá Tūpa ñehe mombehusar angahu tēi oimera, ahe ava ombopa-mbopa tēira yuvireco.

<sup>12</sup> Ombouvicha catura mbahe-mbahe tēi naporai vahe. Ipipe sui ndoyeaisu tuprı iri chira ava yuvireco.

<sup>13</sup> Acoi ava oyemoviracua vaheño rumo arı ipa vahe rupi, ipısiropı yuvirecoira.

<sup>14</sup> Iyavei co ñehesa icatuprı vahe Tūpa mborerecuasa resendar imombehusapa ranera opacatu ivı rupi icua uca ãgua. Ahese ramo oimera cañisa co ivı pipe” ehi oreu.

<sup>15</sup> “Tūpa ñehe mombehusar Daniel oicuachía mbahe-mbahe tēi aposa resendar oime vaherã tūparo guasu maranehi vahe pipe aracahe. Ahe pesepiase oi maranehi pipe —acoi oyerogui vahe, ahe tosenducua tuprı yuvireco—,

<sup>16</sup> evocoyase Judea ve yuvirecoi vahe toñemipa poyava ivıtri rese yuvireco ichui;

<sup>17</sup> iyavei acoi güeta harıve yuvirecoi vahe ogüeyise, toi que iri eme güetave ombahe reca;

<sup>18</sup> iyavei acoi que rupi tēi yuvirecoi vahe, toyevi iri eme güetave que oyeaosa renose ãgua yuvireco.

<sup>19</sup> İparaisu itera cuña ipuruha vahe, imembı pıtani vahe avei yuvireco!

<sup>20</sup> Peoporandu Tūpa upe pe recua pipe sui pe sēñhi ãgua irohi pipe, mbıtuhusa arı pipe avei.

<sup>21</sup> Esepia, ahe arı pipe ava iparaisu catura opacatu yıpıve ava ivı apo ramo suive yuvirecoi vahe sui. İpare ndipo iri chietera evocoi nungar.

<sup>22</sup> Iyavei nomombıtuhıse Tūpa co arı naporai vahe, ndipo chietera ava oñepısiro vahe yuvireco viña. Ahe rumo güembıporavo raisusa pipe omombıtuhura” ehi.

<sup>23</sup> “İyavei que ava, ‘Esepia co Poropısirosar secoi’; anise, ‘Peve secoi’ ehise yuvireco pēu, anı chira peroya aipo ehi vahe.

<sup>24</sup> Esepia, yugüerura ava ‘che Poropısirosar aico’ ehi tēi vahe iyavei ‘che amombehu vahe Tūpa Ñehengagüer’ ehi angahu tēi vahe; iyavei oyapora mbahe ava ndoyapoi vahe poromondiısa güeco pıratasa mboyecua ãgua yuvireco. İpipe osecoãhara Tūpa rembıporavo imbopa ãgua yuvireco.

<sup>25</sup> Opa aipo co senondeve amombehu pēu.

<sup>26</sup> Sese que ava pēu: ‘Pesepia pe ivı iporupırēhisave secoi’ ehise, pesoi rene aheve seroyasave, anı chiaveira peroya acoi ‘pesepia co secoi oi pipe’ ehi vahe yuvireco.

<sup>27</sup> Che rumo inungar overa vahe sendı añihıvei sui caharu cotı ocua ıva rese, ěgüe ahera che, Ava Rıquehı, opacatu ava rembiepiave ayevı irise vitu curi.

<sup>28</sup> Esepia, mbahe rehögüer reimesave, uruvu oñemonuha atı yuvireco yepı” ehi güemimbohe eta upe.

### *Jesús yevı ãgua resendar*

<sup>29</sup> “Ahe arı pipe mbahe-mbahe tēi pare cūrıteimi ndoyecua iri chira arı, yası avei ndosesape iri chira, yasıtata avei opara ovıapi ıva sui iyavei ıva resendar mbahe orırıira yuvireco.

<sup>30</sup> Ahese oimera ıva rese iporēhi vahe che, Ava Rıquehı, yu ãgua resendar. Evocoyase opacatu ava-ava tēi co ivı pıpendar oyaseho tēira osıquıyepave yuvireco. Che repia aveira yuvireco agüeyise ıva quıha rese che pıratasa rendıgüer porañetesa pipe.

<sup>31</sup> İyavei amboura che rembiguai eta ıva pendar. Ahe evocoyase güemimbı omoñehe pıratara opacatu che rembıporavo co ivı rupındar que amombı rupı yuvirecoi vahe monuha ãgua” ehi.

32 “Peyembohera ivira higuera recocuer sui: Co ivira soqui ramose, yaicua cõimi ari sacu vahe yepota ãgua yandeu yepi.

33 Na ehi aveira pëu che ñehe rupi tupri mbahe pesepiase, sese peicuara cõimi eté che yevi ãgua.

34 Supi eté yuvirecove vitera ava osepia vahe co mbahe opase yaviye.

35 Iva, ivi opara ocañi, che ñehengagüer rumo imboaviyesa rane itera.

36 “Ndipoi eté rumo ava oicua vahe ari iyavei hora che yevi ãgua. Iva pendar che Ru rembiguai avei ndoicuai yuvireco. Che avei ndaicuai eté. Che Ru güeraño ité rumo oicua.

37 “Inungar ava Noé recose yuvirecoi aracahe, ãgüe ehi tupri aveira che, Ava Riquehir, yevi ãgua renonde.

38 Yipive amarusu renonde, ahese ava ocaru, oihu; guahir, guayri avei omomendaño yuvireco. Noé arca pipe seiqueese, ãgüe ehi vite yuvireco.

39 Nomohai eté rumo amarusu viapi ãgua yuvireco oyeupe viña, ãgüe ehi rumo aviyeteramo tõi amaroviapi imocañipa. ãgüe ahe aveira che, Ava Riquehir, ayevi aviyeteramo tõi.

40 Evocoi ari pipe oimera ñuvirío ava amombri güecua sui yuvirecoi vahe: ñepi serasosara, indugüer rumo opitara.

41 ãgüe ehi aveira ñuvirío cuña ohicho vahe upe: ñepi serasosara, indugüer rumo opitara.

42 “Sese pemahemoha yepi. Esepia, ndapeicuai mbahe ari pipe che, pe Yar, ayevira iva sui.

43 Iyavei peyapisaca tupri co rese: inungar acoi oi yar oicuase revo que hora pïtu pipe imonda vahe yepota ãgua, ahese imahemohara sese güeta pipe seiqueehi ãgua viña.

44 ãgüe peye aveira peyemoingatu che yevi ãgua rese. Esepia niha, che, Ava Riquehir, aporoesapiha tẽira vitu curi” ehi.

### *Mbiguai omboaviye vahe ocuaita, nomboaviyei vahe avei*

45 “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarã güeta pipendar rese hañeco ãgua ‘tembihu tomondo che rëta pipendar upe che porocuita rupi’ ohesave.

46 Acoi omboaviyese ocuaita, ahese oviharetera güerecuar yevise.

47 Supi eté niha serecuar oyocuaire opacatu ombahe rese hañeco ãgua.

48 Ahe mbiguai rumo ndipihaise ‘ndoyepota vitei chira revo che rerecuar’ oya,

49 omboetasa omboipi mara-mara tõi sereco iyavei oyemboya caguar tõi rese ipiri ocaru iyavei oihu tõi ãgua.

50 Ipare rumo serecuar oyepotara imahemohaẽhiseve.

51 Ahese omobaraisu catura, ‘Tinupasa, ava seco tupri ai angahu tõi vahe nupasa nungar pipe’ ehira chupe. Ahese oyaseho tẽira, oyemoaitere-tere tõi aveira” ehi güemimbohe upe.

## 25

### *Diez cuñatai ndaseco marai vahe resendar ñehesa*

1 “Evocoi ari pipe Tũpa mborerecuasa inungar-ra mendasave diez cuñatai ndaseco marai vahe virasora tataendi ambuae cuña mevi pisi ãgua yuvireco.

2 Ipãhuve yuvirecove cinco ndipihañemoñetai vahe, ambuae cinco rumo ipihañemoñetai tupri vahe yuvireco.

3 Ipare ndipihañemoñetai vahe oipisi guataendirã yuvireco, ndovirasoi rumo yandi guataendi riru mboapipo iri ãgua yuvireco;

4 evocoi ipihañemoñetai tupri vahe rumo viraso yandi siru pipe guataendi reseve yuvireco.



<sup>5</sup> Acoi ndoyepota apihaise cuña mevi, ahese sopesi tēi yuvireco. Coiye opaño yuviroque yuvireco ichui.

<sup>6</sup> Pĩtu mbiter senise rumo, osendu ñehesa aipo ehi vahe yuvireco: ‘¡Coi imevi turi! ¡Pesē ipisi āgua cute!’ ehi.

<sup>7</sup> Evocoyase opacatu evocoi cuñatai oñarapuha voi iyavei omoingatu guataendi yuvireco.

<sup>8</sup> Ahese nimahemohai vahe aipo ehi ambuae imahemoha vahe upe yuvireco: ‘Pemboumi tēi chíhi pe yandi oreu. Esepia, ogüe pota ité ore rataendi’ ehi tēi yuvireco.

<sup>9</sup> ‘Aní, ndiyai chira revo oromondo vaherā pēu. Iyacatu revo peso imboepisave serocua peyeupe nara’ ehi.

<sup>10</sup> Imboepi yuviraso viteseve, ou cuña mevi cute. Oyemoingatu vahe rumo yuviroique supi mendasave. Evocoyase saquicuerive voi omboya oquenda rārosar.

<sup>11</sup> Ipare oyepotase ambuae cinco cuñatai yugüeru aipo ehi yuvireco oi yar upe: ‘¡Emboimi tēi oreu!’ ehi tēi yuvinoha.

<sup>12</sup> ‘Aní, ndopocuai vahe ité’ ehiño chupe.

<sup>13</sup> “Pe evocoyase pemahemohara. Esepia, ndapeicuai mbahe ari pipe, mbahe hora pipe che, Ava Riquehir, ayevira” ehi Jesús oreu.

### *Ñehesa guarepochi mondose resendar*

<sup>14</sup> “Iyavei Tūpa omborerecuasave inungar-ra ava mbahe yar oso āgua renonde ivi amombisave omonuha güembiguai oguarepochi rāro āgua viña.

<sup>15</sup> Yipindar ñepi upe omondo cinco mil guarepochi, ambuae upe omondo dos mil, iyavei imombosapisa upe omondo mil tēi: ahe omondo ñepi-pei upe seco etegüer rupi-rupi. Ipare voi oso cute.

<sup>16</sup> Evocoyase evocoi mbiguai oipisi vahe cinco mil guarepochi, ahe oporaviqui co guarepochi rese. Ipipe sui coiye oipisi catu iri ambuae cinco.

<sup>17</sup> Inungar avei ambuae oipisi vahe dos mil, ichui oipisi catu iri ambuae dos mil.

<sup>18</sup> Ambuae oipisi vahe rumo ñepi guarepochi, ahe oyoho ivicuar. Aheve oñoti güerecuar guarepochi.

<sup>19</sup> “Ipare coiye oyevise serecuar, ahese oñehe güembiguai upe oguarepochi retacuer cua āgua.

<sup>20</sup> Yipindar cinco mil guarepochi oipisi vahe ranengatu oyemboya güerecuar rese aipo ehi: ‘Ndo co acoi erembou vahe cinco mil cheu, ichui co ambuae cinco aipisi irimi ndeu’ ehi.

<sup>21</sup> ‘Aviye ité, nde mbiguai seco aviye vahe ereico iyavei eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique che piri, yayembovihara che rese’ ehi chupe.

<sup>22</sup> Ipare ambuae sembiguai oipisi vahe dos mil guarepochi, oyemboya güerecuar rese aipo ehi chupe: ‘Ndo co erembou vahe dos mil cheu. Ipipe sui co ambuae aipisi irimi dos mil avei ndeu’ ehi.

<sup>23</sup> ‘Aviye ité, nde mbiguai seco aviye vahe, eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique che piri, yayembovihara che rese’ ehi avei chupe.

<sup>24</sup> “Ipare acoi oyepotase ambuae mbiguai oipisi vahe mil guarepochi, ahe aipo ehi güerecuar upe: ‘Che aicua nde reco; nde acoi ndihavai vahe ereico. Esepia, ava remitigüer tēi eremouha iyavei imbovepírer tēi avei ereipisi ndeyeupe nara.

<sup>25</sup> Sese che siquiyesa pipe añomi ivivrive nde guarepochi. Ndo co nde mbahe’ ehi chupe.

<sup>26</sup> ‘Nde mbiguai ndaseco pōrai vahe, yangaipa vai vahe avei ereico. Nde niha ereicua che recocuer aipisise mbahe nañotii vahe sui.

<sup>27</sup> Ereyapocatumira che guarepochi guarepochi apocatusave cuese rahe viña che yevise voi senose ãgua cheu imboyevi catumi ãgua viña' ehi.

<sup>28</sup> Ipare aipo ehi: 'Perocua guarepochi ichui, pemondora evocoi diez rupi guarepochi omboeta vahe upe' ehi.

<sup>29</sup> 'Indó, acoi vireco vahe mbahe, chupe imondosa catura, sumbire aveira; acoi ndovirecoi vahe rumo mbahe, opaño itera serocuasa mbahe sembierecomi ichui.

<sup>30</sup> Sese pemose co mbiguai êgüe ehi tẽi vahe ocarve pĩtumimbisave. Aheve toyaseho, tasãitere tẽi oĩ ehira sereciar chupe" ehi Jesús oreu.

*Jesús oura opacatu ava recocuer rese porandu ãgua*

<sup>31</sup> "Che, Ava Riquehĩ, ayevise, opacatu che Ru rembiguai iva pendar reseve che reco ivategüer pĩpe, ahese aguapĩra che renda porañete vahesave ava recocuer rese porandu ãgua.

<sup>32</sup> Evocoiyase ava opacatu tecua rupindar imonuhasara che rovai yuvireco. Ahese aipehara ava oyesui, inungar ovesa rãrosar oipeha vahe ovesa cavara sui.

<sup>33</sup> Che evocoiyase ovesa aipehara mbahe rese che pocosa coti, cavara mbahe rese che pocoẽhisa coti.

<sup>34</sup> Ahese che mborereciar ivate catu vahe aipo ahera che acato cotindar upe: 'Perio pe opacatu che Ru sui sovasapri peico vahe, peique che Ru mborereciusa pĩpe; ahe acoi yipive ivi apo ramo suive imoingatupri pẽu nara.

<sup>35</sup> Esepia, ndacheriepoise, pe evocoiyase pembou mbahe che remihura; iyavei che huseise, pe evocoiyase pembou taihu; che aguata tẽise pe recua rupi vichico, pe avei oi pembou che que ãgua.

<sup>36</sup> Turucuar cheu ipanese, pe avei pembou che turucuarã; chembaheasise, peso avei che piri; che roquendasave peso avei che repia no' ehi.

<sup>37</sup> Evocoiyase evocoi seco catupri vahe aipo ehira yuvireco cheu: 'Ore Yar, ¿mbahese vo nde repiasa nanderiepoise eico iyavei imondosa nde remihura? ¿Mbahese vo nde repiasa ndehuseise, ipare imondosa tereihu?

<sup>38</sup> ¿Mbahese vo nde repiasa nde guatase ore recua rupi, ipare nde monguesa ore piri, ipanese nde turucuarã, ore aipo evocoiyase oromondo ndeu?

<sup>39</sup> Iyavei, ¿mbahese vo aipo nde repiasa nembahesise, anise que nde roquendasave, aheve aipo oroso nde repia yepi?' ehira yuvireco cheu.

<sup>40</sup> Evocoiyase che, mborereciar ivate vahe, amboyevira yuvireco chupe aipo ahera: 'Supi eté, opacatu mbahe peyapose que ñepei seco mbegüemi vahe che reroyasar pãhu pendar upe viña, cheu rumo êgüe peye' ahera.

<sup>41</sup> "Ahese aipo ahera cute che mbahe rese pocoẽhisa cotindar upe: 'Pesiri che sui. Esepia, pe peico Tũpa ñemoirosavri pendar. Pesopa tata guasu apirẽhisave, evocoi imoingatupri opacatu carugar upe nara sereciar reseve.

<sup>42</sup> Esepia, ndacheriepoise, pe evocoiyase: Yamondomi icaru ãgua, ndapeyei eté cheu; che huseise, ahese, Yamondomi toihu, ndapeyei avei cheu;

<sup>43</sup> ambuae tecua pĩpe aguata tẽise vichico, ahese, Eique che rõtave che piri, ndapeyei eté cheu. Ipanese che turucuarã, pe rumo ndapemboui cheu, chembaheasise vichico, iyavei che roquendasave, Yasomi tẽi sepia, ndapeyei eté cheu' ahera.

<sup>44</sup> 'Ore Yar, ¿marase vo aipo nde repiasa nanderiepoise, anise aipo nde huseise, ipanese nde turucuarã ndeu no, nembahesise, anise nde roquendasave, marase vo mbahe rese nande pĩtĩisai?' ehi tẽira yuvireco cheu.

<sup>45</sup> 'Supi eté acoi amove mbahe ndapeyapoise que seco mbegüemi vahe upe viña. Ipipe rumo cheu avei mbahe ndapeyapoi eté' ahera.

<sup>46</sup> Ahe ava yuvirasora Tũpa ñemoirosa apirẽhi vahesave. Seco ñvi vahe rumo teco ori opaẽhisave yuvirasora" ehi Jesús oreu.

## 26

### *Jesús yamotarēhimbar omboguai yuca āgua yuvireco*

<sup>1</sup> Ipare Jesús aipo ehi oreu:

<sup>2</sup> —Pe peicua ñuvirío ari tēi ipane vite co Pascua pieta yepota āgua yandeu. Ahese che, Ava Riquehir, imondopri aicora che atica āgua curusu rese yuvireco —ehi.

<sup>3</sup> Ahe pipeve avei Jerusalén ve, co pahi rerecuareta, iyavei judío rerecuareta oñemonuha yuvireco pahi rerecuar ivate catu vahe Caifás rētave.

<sup>4</sup> Aheve oñemoñeta: ‘Yambopa ipisi yuca āgua’ ehi yuvireco oyeupe.

<sup>5</sup> Ahe rumo:

—Ndiyai pieta pipe ité yaipisi ava rehii yemondii guasuēhi āgua yandeu —ehi.

### *Cuña oipiyere Jesús āca rese mbahe sīacuá vahe*

<sup>6</sup> Jesús tecua Betania ve secoi, Simón lepra vireco vahecuer rētave.

<sup>7</sup> Aheve mesave chiniseve, cuña vireco vahe mbahe sīacuá vahe siru reseve viroyepota chupe. Ahe oipiyere Jesús āca rese.

<sup>8</sup> Orosepiase rumo oroñemoiro aipo orohe oreyeupe:

—¡Mahera vo co omocañi tēi!

<sup>9</sup> Omondo vahe ité tie co setá guarepochi rupi ava iparaisu vahe pītiviī āgua viña —orohe tēi chupe.

<sup>10</sup> Jesús rumo oicua ore pīhañemoñetasa. Sese aipo ehi oreu:

—¡Mahera vo co cuña pemañeco tēi! Esepia, co mbahe oyapo vahe aviye ité cheu.

<sup>11</sup> Ava iparaisu vahe niha yuvirecoiño itera pe pāhuve. Che rumo ēgüe ndahe viteñoi chira vichico pe pāhuve.

<sup>12</sup> Esepia, co cuña oipiyere mbahe sīacuá vahe che rese che tī āgua renondeve.

<sup>13</sup> Supi eté aipo ahe pēu: co ñehesa pīsirosa resendar mombehuse opacatu tecua rupi, imombehusa aveira co cuña rembiapo sese mahenduha āgua —ehi.

### *Judas Iscariote oyemoingatu Jesús mondo āgua yamotarēhimbar povrive*

<sup>14</sup> Ipare ñepeī ore pāhu pendar, Judas Iscariote, oso, oñehe pahi eta rerecuar yuvirecoi vahe upe

<sup>15</sup> aipo ehi:

—¿Mbovi rupi vo pemboepira cheu amondose Jesús pēu viña? —ehi.

“Treinta guarepochi rupi” ehi yuvireco chupe.

<sup>16</sup> Ahesa reseve voi oseca Jesús mondo āgua yamotarēhimbar upe.

### *Jesús caru agüer ipa vahe güemimbohe rese*

<sup>17</sup> Ari yipindar vahe pieta resendar, pan ndayapepoi vahe husa pipe, ahese ore Jesús remimbohe oroico vahe oroyemboya sese aipo orohe:

—¿Que vo ereipota oromoingatura carusa Pascua pieta resendar yandeu? —orohe chupe.

<sup>18</sup> Evocoyase,

—Peso tecua guasuve che cua vahe rētave aipo peyera chupe: ‘Ore Mbohesar aipo ehi: Cōimi che mano āgua, sese ayapo potami sētave Pascua pieta che remimbohe reseve, ehi ndeu’ peyera chupe —ehi.

<sup>19</sup> Evocoyase oyapo semimombehu rupi tupri ité yuvireco, omoingatu carusa Pascua pieta resendar yuvireco aheve.

<sup>20</sup> Pītu ramomise, opacatu oroguapi mesave Jesús piri ore caru āgua.

<sup>21</sup> Ore carusave aipo ehi oreu:

—Supi eté aipo ahe pēu: ñepeī pe pāhu pendar che mondora che amotarēhisar upe —ehi.

<sup>22</sup> —Che Yar, ¿che pīha? —orohe-rohe tēi ñepeī-peī ore yacatu ore viharēhisa pipe chupe.

<sup>23</sup> —Omondo vahe opo che caro pipe, ahe che mondora che amotarêhisar upe —ehi—.

<sup>24</sup> Imboaviyesa itera che, Ava Riquehir, rese ñehesa icuachiapri. ¡Iparaisu catura rumo acoi mbia che mondosar! Aviye catura ndoyesuisse viña —ehi.

<sup>25</sup> Ahese Judas imondosavi oporandu:

—Ore Mbohesar, ¿che tie? —ehi.

—Taa, ¡nde ité niha êgüe erera! —ehi chupe.

<sup>26</sup> Ore caru viteseve, Jesús oipisi pan, “Aviye ndeu” ehi Vu upe. Aipo ohe pare, ombohi-mbohi oreu imondo, aipo ehi:

—Ndo co, pehu co che rete —ehi.

<sup>27</sup> Ipare oipisi igua riru, “Aviye ndeu” ehi Vu upe. Aipo ohe pare ombou oreu aipo ehi:

—Peihu peyacatu co sui.

<sup>28</sup> Esepia, co che ruvi, ahe omoimera che Ru remimbotar ipiasu vahe pëu, ahe oyepiyerera ava rehi angaipa rese ñero ãgua.

<sup>29</sup> Ndaihu iri chira uva ricuer cheu ari oyepotase voi che Ru mborerecuasave aihura pe rese ambuae uva ricuer ipiasu vahe —ehi oreu.

*Jesús, “‘Ndaicuai vahe ité aipo mbia’ erera cheu” ehi Pedro upe*

<sup>30</sup> Ore sapucaire, oroso ivitri Olivo ve.

<sup>31</sup> Evocoyase Jesús aipo ehi oreu:

—Opara pemocañi che rese yeroyasa peyesui co pïtu pipe. Esepia, acoi icuachiapri pipe aipo ehi: ‘Ayucara ovesa rãrosar, ahese oñemosai tẽira ovesa opacatu rupi yuvireco’ ehi vahe.

<sup>32</sup> Che cuerayevire rumo, aso voi etera pe renonera Galilea ve —ehi.

<sup>33</sup> Pedro rumo,

—Yepe ambuae opacatu nande reroya iri chira yuvireco, che rumo ndayepepi chi-etera nde sui —ehi chupe.

<sup>34</sup> —Che rumo supi eté aipo ahe ndeu: co pïtu pipeve voi eté tacura ñehere renondeve, “Ndaicuai vahe ité aipo mbia” erera mbosapi oyupagüer rupi cheu —ehi Pedro upe.

<sup>35</sup> Pedro rumo,

—Yepe amanora nde rupi viña, che rumo, “Ndaicuai vahe aipo mbia” ndahei chietera —ehi-ehi catuño ité chupe.

Aipo orohe pãve tupri tẽi chupe.

*Jesús oyeroqui Getsemaní ve*

<sup>36</sup> Ipare Jesús rupi orosoño Getsemaní ve. Aheve aipo ehi oreu:

—Peguapi cohavẽ; che aso ranera peve catumi, ayeroqui —ehi.

<sup>37</sup> Aheve viraso Pedro oyepi iyavei ñuvirio Zebedeo rahir. Ahese oyandu oviharêhisa oico.

<sup>38</sup> Evocoyase ahe aipo ehi chupe:

—Ndavihai eté. Esepia, che hã oyandu ité manosa. Pepita rane cohavẽ iyavei pemahemohara pe yeroqui pipe che rese —ehi.

<sup>39</sup> Evocoyase oso tenonde catumi. Aheve oñenopiha ovapi ivi rese oyeroqui Vu upe aipo ehi: “Che Ru, iyase ndeu che renose mbahe-mbahe tẽi sui eve; tayapo eme ru che remimbotar tẽi, nde remimbotar rupi catu tayapo” ehi.

<sup>40</sup> Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—¡Ndapeñemosai eté vo pe ropesi upe che rãro ãgua que ñepi hora che mondugüe ãgua peye!

<sup>41</sup> Pemahemoha, peyeroqui mbahe tẽi pipe pe viapiẽhi ãgua. Supi eté pequerẽhi ité viña, pe retecuer tẽi niha nipiratai pëu —ehi.

<sup>42</sup> Ichui imoñuviriosa rupi oso iri oyeroqui aipo ehi: “Che Ru, ereipotase che reique ãgua co mbahe tẽi pipe, eyapo nde remimbotar che rese” ehi.

<sup>43</sup> Ipare oyevise, osesapiha iri iqueseve ou. Esepia, sopesii nomboyeroyai eté yuvireco.

<sup>44</sup> Evocoyase oseyapa iri oso oyeroqui ãgua imombosapisa rupi. Aipo ehi tupriño avei oyeroqui Vu upe.

<sup>45</sup> Ipare oyevi iri güemimbohe upe aipo ehi chupe no:

—¡Pequeño vite vo peyu! Osupiti che, Ava Riquehir, mundo ãgua ava yangaipa vahe povrive.

<sup>46</sup> Pepũha, yaso. Esepia, cõimi eté che amotarẽhisar upe che mundo vaherã secõi —ehi.

### *Jesús oipisi yuvireco*

<sup>47</sup> Jesús ñehe viteseve, Judas oyepota oso chupe. Ahe ñepi semimbohe ore pãhu pendar, iyavei setá iteanga ava yugüeru quise pucu, ivira reseve-seve supi. Ahe pahi eta rerecuar yuvirecoi vahe judío rerecuareta porocuita rupi oyapo yuvireco.

<sup>48</sup> Yipindar rumo imondosar Judas aipo ehi: “Asovaupitese, ahese peicuara; ahe peipisira” ehi.

<sup>49</sup> Ipare oyemboya voi oso sese.

—¡Avirave, Porombohesar! —ehi sovaupite.

<sup>50</sup> —Che mboripar —ehi Jesús—, eyapoño mbahe nde remimbotar cheu —ehi.

Aheseve voi oipisi yuvireco.

<sup>51</sup> Evocoyase semimbohe secõi vahe supi vinose oquise pucu, oyasia pahi rerecuar ivate catu vahe rembiguai nambi.

<sup>52</sup> —¡Aní! —ehi güemimbohe upe—. Emoingue siru pipe nde quise pucu. Esepia, acõi ava opacatu ovava vahe oquise pipe yuvireco, ipipe avei opara yucasa yuvireco.

<sup>53</sup> ¿Ndereicuai vo aporanduse che Ru uve viña, ahe evocoyase cõritei voi omboura doce mil sui setá catu vahe güembiguai che repi ãgua viña?

<sup>54</sup> Ëgüe ehise rumo Tũpa Ñehengagüer icuachiapri ndayaviyei chietera viña, ahe co cõritei osupiti —ehi.

<sup>55</sup> Ahese aipo ehi ava rehii upe:

—Pe quise pucu, ivira reseve-seve rutei co peyu che ropeña che pisi ãgua imonda rai vahe nungar che rereco peye. Che ari yacatu rupi aguapise pe pãhuve pe mbohe ãgua tũparo pipe, ndapeyapoi eté co nungar cheu.

<sup>56</sup> Co rumo opacatu Ëgüe peye Tũpa ñehe mombehusar rembicuachiagüer mboaviye ãgua cute —ehi ava rehii upe.

Ahese voi opacatu oroñemosaipe, oroseya ahe aetemi Jesús ava rehii upe imoha.

### *Jesús serasosa pahi rerecuar ivate catu vahe rovai*

<sup>57</sup> Ahese Jesús pisisar viraso Caifás rõtave yuvireco, ahe pahi rerecuar ivate catu vahe secõi. Aheve oñemonuha Moisés porocuita rese oporombohe vahe, judío rerecuar yuvirecoi vahe avei no.

<sup>58</sup> Pedro rumo amombri rupive tõi osaquicue moña oso. Ëgüe ehi oyepota pahi rerecuar ivate catu vahe rëta rocar ãchisave. Aheve oique ipipe, iyavei oguapi oĩ sundao pãhuve ‘¿mara ehi etera pãha sereco yuvireco?’ oya.

<sup>59</sup> Ahese pahi eta rerecuar iyavei opacatu porandusa ivate catu vahe pendar, ahe oñhengapo-ngapo uca tõi ava Jesús amotarẽhisave yuca uca ãgua yuvireco,

<sup>60</sup> yepe oyemboyecua setá iteanga yamotarẽhisar semira-mira tõi vahe yuvireco viña, ndoyosui eté rumo mbahe sembiapo naporai vahe yuca uca ãgua yuvireco. Aheseve yugüeru ñuvirío yamotarẽhisar oporombopa-mbopa tõi vahe yuvireco cute.

<sup>61</sup> —Co mbia aipo ehi: ‘Che aicatu co tũparo monduru; aicatu aveira imopuha iri mbosapi ari rupi’ ehi —ehi tõi yuvireco chupe.

<sup>62</sup> Ahese pahi rerecuar ivate catu vahe opũha, oporandu Jesús upe:

—¿Mahera vo nderemboyevii eté iñehe yuvireco chupe? ¿Mbahe ehi vo aipo nde amotarẽhisar nde rese oñehe? —ehi.

<sup>63</sup> Noñehi eté rumo. Ahese,

—Che orocuai Tūpa supi eté vahe rer pipe emombehu oreu: ¿Poropĩsĩrosar ité nde ereico, Tūpa Rahĩr? —ehi pahi rerecuar ivate catu vahe chupe.

<sup>64</sup> —Taa, supi eté niha aipo aipo ere cheu, co catu amombehura pẽu, che repiara niha peye che, Ava Riquehir, aguapise Tūpa mbahe mboavaisarẽhi acato coti, ayevise avei iva quihã rese curi —ehi.

<sup>65</sup> Evocoyase pahi rerecuar ivate catu vahe imboasipave omondo oturucuar aipo ehi:

—¡Indó, mbahe tẽi eté iñehẽ Tūpa upe! ¡Mbahe iri vo yaipota vite yaico! Yasendupa niha aipo Tūpa upe iñehẽ-ñehẽ tẽisa cũritei.

<sup>66</sup> ¿Mara ehi aipo pe pihave? —ehi.

—Supi eté, oyavĩ mbahe. ¡Tomanoño ité! —ehiño ivoya eta yuvireco chupe.

<sup>67</sup> Ahese ondivi-ndivi sova rese iyavei yuvirocua-rocua yuvireco sese. Ambuae osovapete-pete,

<sup>68</sup> aipo ehi yuvireco chupe:

—Nde niha aipo ereico Tūpa remimbou Poropĩsĩrosar, ¿eicua ité ru, ava evocoi ocua nde rese? —ehi yoyai catu-catu yuvireco.

### *Pedro, “Ndaicuai vahe evocoi mbia” ehi Jesús upe*

<sup>69</sup> Pedro evocoyase oguapĩ sãro ocarve ñachimbri pipe oĩ. Aheve oyemboya cuña mbiguai oso sese aipo ehi chupe:

—Nde avei Jesús Galilea pendar rupindar ereico —ehi.

<sup>70</sup> Ahe rumo aipo ehiño opacatu ava rovaque:

—Ndaicuai aipo nde ñehesa —ehiño cuña mbiguai upe.

<sup>71</sup> Ichui oso oquendipive. Aheve omahe ambuae cuña sese. Ahe sepiase aipo ehi ava ahe pendar yuvirecoi vahe upe imombehu:

—Co ava avei acoi secoi Jesús Nazaret pendar rupi yepi —ehi ava upe.

<sup>72</sup> —¡Aní! —ehi iri ahe cuña upe—. ¡Tūpa oicua, supi eté ndaicuai aipo mbia! —ehi angahu tẽi.

<sup>73</sup> Iparemi tẽi aheve yuvirecoi vahe, oyemboya sese aipo ehi yuvireco chupe:

—Nde avei eté niha supindar ereico. Esepia, nde ñehẽ pãrigüer rese nde cuasaño —ehi yuvireco.

<sup>74</sup> Ahe evocoyase,

¡Tūpa niha oicua ndopombopai eté niha! ¡Che ndaicuai vahe ité evocoi mbia, ahe mo aipo pẽu! —ehi angahu tẽi chupe.

Aipo iheseve, tacura oñehẽ.

<sup>75</sup> Ahese Pedro oyemomahenduha Jesús oyeupe, ‘Acoi tacura ñehẽ renondeve mbosapĩ oyupagüer rupi: Ndaicuai vahe ité aipo mbia, erera cheu’ ihe agüer rese. Ahese osẽ, oyasehó iteanga oso.

## 27

### *Jesús serasosa Pilato rovai*

<sup>1</sup> Cõhe ramosẽ, ahese opacatu pahi eta rerecuar, judío rerecuar avei oñemonuha atĩ oyemboyoya guasu ‘Jesús tayucasa ité’ oyapave yuvireco.

<sup>2</sup> Ipare oipocua-pocua seraso mborerecuar guasu Pilato upe yuvireco.

### *Judas yeyuca agüer*

<sup>3</sup> Judas, acoi Jesús omondo vahe yamotarẽhisar uve oicua, “Jesús tayucasa cute” ehise, ahese tasí iteanga chupe. Evocoyase oso voi tẽi tũparo guasuve pahi eta rerecuar yuvirecoi vahe upe iyavei judío rerecuareta upe treinta guarepochi mboyevi ãgua aipo ehi:

4—Che ayemboangaipa tiēte vichico. Esepia, amondoño tēi mbia seco catupri vahe pēu yuca uca āgua —ehi mborerecuareta upe.

—Mara etemo ore orovireco. ¡Nde remimbotar niha! —ehiño yuvireco chupe.

5 Evocoyase opaño guarepochi omombó tūparo pīpe. Ichui voi oso oyemboyaseco, oyeyuca.

6 Pahi eta rerecuar rumo omonuhase guarepochi aipo ehi yuvireco oyeupe:

—Ndiyai rumo yamondo co guarepochi porerecosa riru pīpe. Esepia, ava yucapirā repri tēi —ehi yuvireco.

7 Ipare oyoya guasu ipihañemoñeta yuvireco co guarepochi rese ñaihu rese oporaviqui vahe ivi rerocua āgua ‘toime ava secua ambuae vahe rehōgüer tī āgua’ oyapave yuvireco.

8 Sese cūrtei co ivi upe, “Ava ruvi repri tēi” ehi yuvireco yepi.

9 Ēgüe ehi co imboaviye ité Tūpa ñehe mombehugar Jeremías remimombehugüer aipo ehi vahe: “Oipisipa treinta guarepochi yuvireco, ahe ava Israel suindar mborerecuar remimombehugüer rupi eté evocoi mbia pisi āgua.

10 Ipipe virocua ñaihu rese oporaviqui vahe ivi yuvireco. Cheu che Yar omombehu vahecuer rupi tupri ité oyapo yuvireco” ehi Tūpa ñehe mombehugar aracahendar.

### *Jesús serasosa mborerecuar Pilato rovai*

11 Jesús serasosa mborerecuar Pilato upe, ahese Pilato oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, ‘Ahe ereico’ ere cheu —ehiño imboyevi Pilato upe.

12 Evocoyase acoi pahi eta rerecuar iyavei judío rerecuareta oñemonuha vahe eipeve oiñhengapo-ngapo tēi yuvireco. Nomboyevei eté rumo iñehe chupe oyeepi āgua.

13 Evocoyase:

—¿Nderesendui vo aipo co opacatu ndeu ñehe-ñehe tēisa? —ehi Pilato chupe.

14 Nomboyevei eté rumo que ñepei angara ñehesa chupe viña. “¡Too, mara ehi rutei vo co!” ehi-ehi tēi mborerecuar chupe.

### *“¡Tayaticasa!” ehi Jesús upe ava yuvireco*

15 Mborerecuar guasu recosa ité ñepei ava soquendapri renose āgua Pascua pieta pīpe ava rehi remimbotar rupi yepi.

16 Aheve oime soquendapri mbia icuapri vahe ité Barrabás serer vahe;

17 evocoyase ava rehi oñemonuha atise, Pilato oporandu chupe yuvireco:

—¿Uma peipota che amose ucara pēu: Barrabás pīha, anise Jesús “Poropīsīrosar” ehi vahe yuvireco chupe tie? —ehi.

18 Esepia, ahe oicuaño ité ava rese yemoecatēhisa pīpe sui imondopri secoise.

19 Pilato güendave chini viteseve, sembireco omondo oñehe chupe aipo ehi: “Ereyapoi rene mbahe evocoi ava seco catupri vahe upe. Esepia, che querve asepi mbahe tēi eté sesendar” ehi.

20 Evocoi pahi eta rerecuar iyavei judío rerecuareta rumo ava rehi omonguerēhi, “Barrabás tosē; Jesús evocoyase tomano” he āgua yuvireco.

21 Evocoyase Pilato oporandu iri ava rehi upe:

—¿Uma peipota catu co ñuvirío yuvirecoi vahe sui amose vaherā pēu? —ehi.

—¡Barrabás tosē! —ehi yuvireco.

22 —¿Mbahe vo evocoyase che ayapora Jesús rese chupe acoi ava, “Poropīsīrosar” ehi yuvireco? —ehi.

—¡Tayaticasa curusu rese! —ehi ati-atiño yuvireco chupe.

23 —¿Mbahe ité vo oyapo naporai vahe? —ehi tēi ava rehi upe.

Ahe rumo:

—¡Tayaticasa ité curusu rese! —ehi ati-ati iriño yuvireco chupe.

24 Evocoiyase Pilato: “Ndaicatui mbahe moingatu sepî ãgua” ehi tēi oyeupe. Sese ava yaïvu guasu catu-catu irise, ogüeru uca i. Ipîpe oyepoi opacatu ava rehî rovaque aipo ehi:

—Ndahei che remimbotar rupi co mbia yucasara; pe remimbotar rupi eté —ehi.

25 —¡Ore rese ité, ore rahîr rese avei toviapî que mbahe tēi co mbia mano sui! —ehi atîño ité yuvîreco.

26 Ahese Pilato omose uca Barrabás; Jesús rumo oinupá iteanga uca tucumbo tupeicha nungar pîpe imondo curusu rese yaticã ãgua.

27 Evocoiyase mborerecuar sundao viroique Jesús ambuae oi pîpe. Aheve opacatu omboetasa omboyere tupri uca sese yuvîreco.

28 Ahese osequiipa iturucuar ichui. Ipape omunde turucuar pîra vahe yuvîreco sese

29 iyavei omunde ñaca rese yu piapri, omondo avei ñepeî tacuarmi mbahe rese ipocosa cotî ipove yuvîreco. Ipape oñenopiha angahu sovai yuvîreco aipo ehi:

—¡Imboeteipri judío rerecuar tasecoi! —ehi angahu sese oguayî tēisa pîpe yuvîreco.

30 Iyavei ondivî-ndivî yuvîreco sese. Ipape yuvîrocua-rocua ipo pendar tacuarmi pîpe ñaca rese yuvîreco.

31 Ëgüe ehi yoyai catu-catu yuvîreco. Ipape virocuase turucuar pîra vahe ichui, ahese omunde iturucuar ité yuvîreco sese. Ichui viraso curusu rese yaticã ãgua yuvîreco cute.

### *Jesús yaticasa curusu rese*

32 Acoi yuvînosese yuvîraso, osepia mbia Cirene pendar, Simón serer vahe. Ahe chupe, “Erio, terevosî co curusu Jesús vîreco vahe rese” ehi voiño tēi yuvîreco.

33 Oyepotase yuvîraso Gólgota serer vahesave, ahe ‘ava ãcagüer’ oya aipo ehi chupe,

34 aheve uva ricuer imboyesehapri mbahe pihaupiar rese omondo tēi yuvîreco Jesús toihu. Osãha tēi, ndoihu potai rumo.

35 Ipape oyaticã curusu rese yuvîreco. Ahese sundao iguayîño oyeupe iturucuar mboyaho-yaho ãgua rese.

36 Ipape aheve oguapî yuvînoi sãro.

37 Iyavei omombehu ivate curusu rese ñaca harîve mbahe sui oyuca yuvîreco: “Co Jesús judío rerecuar guasu” ehi icuachiapri oî.

38 Ñuvîrío imonda rai vahe yaticasa avei curusu rese supive yuvîreco, ñepeî mbahe rese ipocosa cotî, ambuae evocoiyase mbahe rese ipocoêhisa cotî yuvîreco.

39 Acoi ava ñocuasar iñehe-ñehe tēi, oñeaca mbovava,

40 aipo ehi yuvîreco chupe:

—Nde acoi, “Opara tûparo amonduru. Ipape mbosapî arî rupi opa irira amopuha” ere acoi cuese. ¡Eñepîsîro ru nde ae cute! ¡Tûpa Rahîr nde recose, egüeyî curusu sui! —ehi tēi yuvîreco chupe.

41 Aipo ehi avei pahî eta rerecuar, Moisés porocuaita rese oporombohe vahe iyavei judío rerecuareta avei; ahe iñehe mara-mara tēi yuvîreco chupe aipo ehi:

42 —Oipîsîro ambuae, ahe ae rumo ndoicatui oñepîsîro. Israel rerecuar guasu secoise, ¡togüeyî curusu sui cûritei, ahese voi seroyasara!

43 Ahe oyeroya Tûpa rese, Tûpa evocoiyase oipotase, toipîsîro cûritei. Esepia, ahe, “Che Tûpa Rahîr aico” ehi yandeu cuese —ehi yuvîreco.

44 Imonda rai vahe avei rumo acoi yaticapri supive, ahe avei mara ehi-ehi tēi chupe.

### *Jesús mano agüer*

45 Ahese mbîter arî pîpe, opa tupri pîtu ivî rupi. Ëgüe ehi las tres rupi.

46 Ahese tupri avei Jesús oñehe pîrata aipo ehi: “Elí, Elí, ¿lema sabactani?” ehi, (ahe ‘che Ru Tûpa, che Ru Tûpa, ¿mahera vo che reya eve?’ oyapave aipo ehi).

47 Ava aheve yuvîrecoi vahe osenduse iñehe, aipo ehi yuvîreco:

—Esendu co mbia, Tûpa ñehe mombehusar Elías upe oñehe —ehi yuvîreco chupe.



<sup>48</sup> Aheseve voi imboetasa oña, oso mbahe saviyu vahe reca, omoaqui vinagre pipe imondo ivira apri rese chupe 'toihu' oya.

<sup>49</sup> Ambuae rumo aipo ehiño yuvireco:

—Ĕgüe tehiño rane, ¿oura pñha Elías ipñsiro āgua? —ehi yuvireco.

<sup>50</sup> Ahese Jesús sãse pñrata iri, omano.

<sup>51</sup> Ahe pipeve voi tũparo guasu turucuar ivate coti sui ovo tupri. Aheseve avei ivi oriri iyavei ita guasu-guasu oyeca.

<sup>52</sup> Tehõgüer ruvipa ita apopri avei oyemboi yuvireco iyavei setá Tũpa reroyasar omano vahecuer, ahe avei opa ocuerayevi yuvireco.

<sup>53</sup> Ĕgüe ehi Jesús cuerayevire, ahe opa yuvinose tehõgüer ruvipa sui. Ipare yuviroique Jerusalén maranehi pipe. Aheve setá ava upe oyemboyecua yuvireco.

<sup>54</sup> Evocoyase co sundao rerecuar iyavei Jesús rãrosareta, ahe oyanduse ivi riri yuvireco iyavei ambuae mbahe Ĕgüe ehi vahecuer repiase, ahese oyembosiquiye guasu aipo ehi yuvireco:

—¡Supi eté catu co mbia Tũpa Rahir ité secoi! —ehi tẽi yuvireco.

<sup>55</sup> Iyavei setá cuña aheve amombrive osepia catu yuvinoha, ahe acoi Galilea sui yugüeru vahecuer Jesús rupi iyavei setá rupi oipñivi yuvireco yepi.

<sup>56</sup> Ahe ipãhuve María Magdalena secoi, iyavei ambuae María ahe Santiago, José si, Zebedeo rahir si avei supi secoi.

### *Jesús apocatu agüer tuvipa pipe*

<sup>57</sup> Pñtu potase, ou mbia mbahe yar José serer vahe, ahe Jesús reroyasar tecua Arimatea pendar.

<sup>58</sup> Evocoyase ahe oso Pilato upe oporandu Jesús rehõgüer rese. Evocoyase Pilato aipo ehi: “Aviye, timondosaño chupe” ehi.

<sup>59</sup> José evocoyase vıraso sehõgüer. Ipare oimama tupri turucuar secose vahe ndiquihai vahe pipe.

<sup>60</sup> Ichui omoingue ombahe tuvipa ipiasu vahe, ita oyoho uca vahe pipe. Ipare osovapi ita guasu yapayere vahe pipe oso.

<sup>61</sup> Aheve María Magdalena ambuae María rese suvipa rovai oguapi yuvinoi.

### *Jesús ruvipa osãro sundao yuvireco*

<sup>62</sup> Ahere ayihive mbıtuhusa ari pipe, yuvıraso pahi eta rerecuar iyavei fariseo Pilato upe mbahe rese oporandu āgua

<sup>63</sup> aipo ehi yuvireco:

—Ore rerecuar, ore oroyemomahenduha acoi iporombopa serai vahe ñehe agüer rese: “Acuerayevira mbosapi ari pare omano vahe pãhu sui” ehi acoi cuese oicove vıtese —ehi yuvireco—.

<sup>64</sup> Sese emondo sundao sehõgüer ruvipa rãro tupri āgua mbosapi ari rupi semimbohe ñomiẽhi āgua pñtu pipe yuvireco. Aviyeteramo, “Ocuerayevi omano vahe pãhu sui” aipo ehi tupri tẽi tiẽtera ava upe yuvireco. Aipo ehise yuvireco, yipindar semira tẽi vahe sui ivate catura serecosa —ehi yuvireco.

<sup>65</sup> Pilato evocoyase aipo ehi chupe yuvireco:

—Aviye —ehi—. Amondora sundao pẽu. Peraso, pemovıracua tupri ité sãro āgua —ehi.

<sup>66</sup> Evocoyase yuvıraso tehõgüer ruvipa rãro tupri āgua yuvireco. Ahese omondo tehõgüer rovapısa ita guasu rese mbahe imomiisa cua āgua yuvireco. Ipare oseya aheve sundao sãro āgua yuvireco cute.

<sup>1</sup> Cõhe ramomise, domingu pipe, María Magdalena iyavei ambuae María yuviraso tehõgüer ruvipa repia yuvireco.

<sup>2</sup> Aviyeteramo tõi orirõi piratá ivi Tũpa rembiguai iva sui igüeyise. Ëgüe ehi oyepota tehõgüer ruvipave ou, ahe vïrocua itape guasu sovapisa ichui. Ipare iharive oguapi oĩ.

<sup>3</sup> Ëgüe ehi sendí iteanga aviye acoi overa vahe. Iturucuar evocoyase morochí eté.

<sup>4</sup> Osepiase sundao, orirõi eteanga osiquiyepave yuvireco ichui, opa oyuca pucu-pucu tõi yuvireco.

<sup>5</sup> Tũpa rembiguai rumo aipo ehi voi eté cuña upe:

—Pesiquiyei rene. Esepia, che aicua pe peseca Jesús yaticapirer.

<sup>6</sup> Ndipoi eté cohave. Esepia, ahe ocuerayevi güemimombehu rupi eté. Tapesepia ru supagüer —ehi.

Ipare aipo ehi:

<sup>7</sup> —Peso poyava voi, tapemombehu semimbohe eta upe: ‘Ocuerayevi omano vahe pãhu sui iyavei ahe rane osora pe renonera Galilea ve. Aheve pesepiara’ tapeye chupe. Co che cuaita imombehu ãgua pẽu —ehi Tũpa rembiguai cuña upe.

<sup>8</sup> Evocoyase cuña yuviraso poyava voi suvipa sui, osiquiye pãhuve rumo ovihãno yuvireco; Ëgüe ehi yuvinoñá iteanga imombehu yugüeru oreu.

<sup>9</sup> Ahese Jesús oyemboyecua cuña upe cute omboavirave. Ahe cuña evocoyase oyemboya sese oñenopiha ipicuhaguã imboeteisave yuvireco.

<sup>10</sup> Evocoyase ahe aipo ehi chupe:

—Pesiquiyei rene che sui. Pesoño, tapemombehu che reroyasareta upe. Ahe toyuviraso Galilea ve. Aheve che repiara yuvireco —ehi cuña upe.

### *Sundao omombehu mbahe güembiepia yuvireco*

<sup>11</sup> Cuña yuviraso vïteseve, ahese moviro sundao yuviroique tecua guasu Jerusalén pipe yuvireco. Ahe omombehupa pahi eta rerecuar upe opacatu mbahe osepiã vahecuer yuvireco.

<sup>12</sup> Evocoyase pahi rerecuareta oñemoñeta judío rerecuar rese opihãmoñeta mboyoya ãgua. Ichui omondo setá guarepochi sundao upe yuvireco,

<sup>13</sup> aipo ehiño yuvireco chupe:

—Aipo peyera ava uve: “Oroque vïteseve pĩtu pipe, ahese revo Jesús remimbohe yugüeru sehõgüer ñomi ãgua ore sui” peyera —ehi mborerecuar yuvireco chupe—.

<sup>14</sup> Acoi oyanduse rumo mborerecuar guasu curi, ahese opoviroya ucara chupe. Evocoyase ndipoi chira mbahe pe rese —ehiño pahi eta rerecuar sundao upe yuvireco.

<sup>15</sup> Evocoyase oipisipa guarepochi yuvireco. Ipare yuviraso oyapo oyeupe imombehu agüer yuvireco. Ëgüe ehi vite cõritei judío Jesús cuerayevisa reroyãehi yuvireco yepi.

### *Jesús omondo güemimbohe ivi yacatu rupi oñehengagüer mombehu ãgua*

<sup>16</sup> Evocoyase Ëgüe orohe oroso semimbohe once oroico vahe Jesús remimombehu ivi Galilea pendar ivitrive.

<sup>17</sup> Acoi orosepiase rumo Jesús, ahese oromboetei oroico, yepe moviro tõi ore pãhu pendar ndoviroya tupri vitei yuvireco viña.

<sup>18</sup> Evocoyase ahe oyemboya ore rese aipo ehi oreu:

—Tũpa che mbou mborerecuar ivate catu vahe che reco ãgua ivave, ivive nara avei no —ehi—.

<sup>19</sup> Peso ava upe opacatú ivi rupi iyavei pembohe che recocuer rupi eté yuvirecoi vaherã; peñapiramo avei che Ru rer pipe, che rer pipe, Espiritu Santo rer pipe avei no.

<sup>20</sup> Iyavei pembohe che opacatu pe mbohe agüer reroya ãgua rese —ehi—. Peicuañora che aicovera pe reseve arĩ yacatu rupi yepi, acoi arĩ ipa vahe rupi —ehi Jesús oreu.

Aviye, aipo rupive.

## MARCOS REMBICUACHIA JESUS RECOCUER RESENDAR San Marcos

### *Juan Oporoãpiramo vahe ivi iporupirẽhisa rupi secoi*

<sup>1</sup> Co yipindar aviye vahe ñehesa Jesucristo, Tũpa Rahir, recocuer resendar amombehu potami pẽu.

<sup>2</sup> Yipiindar Tũpa aipo ehi imombehu oñehe mombehusar Isaías rembicuachía pipe aracahe:

“Amondora che ñehe mombehusar nde renonera, ndeu peri moatiro ãgua” ehi.

<sup>3</sup> “Oyeendu ñehesa ipĩrata vahe ava porẽhisa: ‘Pemoingatu yande Yar raperã; pemohivi tupri avei’ ehi” ehi aracahe.

<sup>4</sup> Ëgüe ehi Juan ou ava ãpiramo ivi iporupirẽhisa rupi oico, aipo ehi: “Pemboasi pe angaipa, peyevi Tũpa upe, ahese opoãpiramora Tũpa pẽu ñero ãgua pe angaipa rese” ehi ava upe.

<sup>5</sup> Opacatu ava oyugüeru ñehhe rendu ãgua ivi Judea rupindar, iyavei tecua Jerusalén pendar oangaipagüer mombehu ãgua. Ahese Juan oñapiramo iai Jordán pipe.

<sup>6</sup> Juan turucuar camello ragüer apopri, sumbicuasa mbahe pirer, sembihu evocoyase tucru, eiri caha pipendar avei.

<sup>7</sup> Ahe aipo ehi oñehe ava upe oico: “Che raquicuei oura seco pĩrata catu vahe che sui, sese cheu ndiyai chira ayeaivi ipitaquisã yora ãgua.

<sup>8</sup> Che supi eté opoãpiramo i pipe tẽi; ahe rumo pe ãpiramora Espiritu Santo pipe” ehi.

### *Jesús ãpiramo agüer*

<sup>9</sup> Ipare Jesús osẽ tecua Nazaret sui oso Galilea rupi. Aheve Juan oñapiramo iai Jordán pipe.

<sup>10</sup> Osẽ ramoseve i sui, Jesús osepia iva oyemboi tupri, ahese Espiritu ogüeyi iharive apicasu nungar.

<sup>11</sup> Ahese oyeendu ñehesa iva sui aipo ehi: “Nde che Rahir ereico, che rembiaisu, aviha etepri nde rese” ehi vahe.

### *Jesús recoãhasa*

<sup>12</sup> Ipare voi, Espiritu Santo viroguata Jesús ava porẽhisa rupi.

<sup>13</sup> Aheve Jesús secoi cuarenta ari mbahe mimba vai pãhuve. Aheve avei Carugar osecoãha; Tũpa rembiguai iva pendareta rumo ihañecoño yuvireco sese.

### *Jesús omboipi oporaviqui Galilea rupi*

<sup>14</sup> Juan roquenda pare, Jesús oso ivi Galilea rupi, omombehu ñehesa aviye vahe Vu recocuer resendar ava upe oico

<sup>15</sup> aipo ehi: “Oyepota ari iyavei cõimi eté Tũpa mborerecuasa yandeu. Sese, pemboasi pe angaipa, peyevi Tũpa upe, iyavei peroya co ñehesa aviye vahe Tũpa suindar” ehi.

### *Jesús, “Perio che rupi” ehi irungatu pira mbohasar upe*

<sup>16</sup> Ñepe ari Jesús uguata ipa Galilea ivi. Ahese osepia Simón, tivri Andrés avei, ahe pira omboha yuvireco.

<sup>17</sup> Ahese Jesús aipo ehi chupe:

—Pe pira recasar peico, perio che rupi, na peye aveira ava reca ãgua cheu nara —ehi.

<sup>18</sup> Aipo he ramoseve voi, opoi opira mbohasa sui yuvireco, yuviraso supi.

<sup>19</sup> Ipare chĩhi uguata irimise, ahese osepia Santiago, Zebedeo rahir, tivri Juan reseve carite pipe omoingatu opira mbohasa yuvinoi vu piri.

<sup>20</sup> Ahe chupe avei: “Perio che rupi” ehi, evocoyase vu oseya carite pipe ipĩtĩvisar reseve, yuviraso supĩ.

*Mbia carugar vireco vahe oyese*

<sup>21</sup> Oyepotase tecua Capernaum ve yuvireco mbĩtuhusa arĩ pipe, Jesús oi que oporombohe tũparove.

<sup>22</sup> Evocoyase ava osenduse iporombohesa, “¿Mara ehi rutei?” ehi tẽi yuvireco chupe. Esepia, ahe oporombohe güeco pĩratasa pipe, ndahei Moisés porocuaita rese oporombohe vahe nungar.

<sup>23</sup> Aheve mbia ahe tecua pendar vireco vahe carugar oyese, oñehe pĩrata chupe aipo ehi:

<sup>24</sup> —¿Mahera vo ereyuño tẽi cohava oreu, Jesús Nazaret pendar? ¿Ereyu vo ore mocañĩ ãgua tẽi? Che orocua ité, nde Tũpa suindar ndaseco marai vahe ereico —ehi chupe.

<sup>25</sup> Oñehe pĩrata rumo carugar upe aipo ehi: —¿Quiriri, esẽ co mbia sui! —ehi chupe.

<sup>26</sup> Evocoyase carugar mbia rese secoi vahe omoehoha seiti ivive, sãse, osẽ oso ichui.

<sup>27</sup> Opacatu ava ombosiquiye, ichui oporandu-randu oyeupe yuvireco aipo ehi: —¿Mbahe pĩha co? ¿Iporombohesa ipiasu vahe ité! ¿Co mbia vireco ité omborerecuasa! ¿Carugar avei eté omboyeroya oyeupe iñehese! —ehi tẽi ava yuvireco.

<sup>28</sup> Cũriteimi voi yandusa serãcua opacatu ivi Galilea rupi.

*Jesús ombogüera Pedro rembireco si*

<sup>29</sup> Jesús yuvinosese tũparo sui, yuviraso Santiago, Juan rese Simón, Andrés rõtave.

<sup>30</sup> Aheve Simón rembireco si sohi iteanga vupave ou. Evocoyase omombehu Jesús upe imbaherasisa yuvireco.

<sup>31</sup> Ahese oso chupe oipisi ipo rese imopuha, ahe ramoseve, sohi opituhu ichui. Ipare voi ahe cuña ihañeco semihura rese.

*Jesús setá ombogüera ava imbaheasi vahe*

<sup>32</sup> Pĩtu ramose opacatu imbaheasi vahe iyavei carugar vireco vahe viraso yuvireco chupe imbogüera ãgua.

<sup>33</sup> Opacatu ava ahe tecua pendar oñemonuha oquendipive yuvireco.

<sup>34</sup> Evocoyase setá ombogüera mbaherasi-rasi tẽi vireco vahe, iyavei omboyepipi setá carugar ava sui. Ndoipotai rumo carugar ñehe. Esepia, ahe oicua ité evocoyase seco yuvireco.

*Jesús Vu Tũpa Ñehengagüer ombombehu judío tũparo rupi*

<sup>35</sup> Ayihiteve Jesús oñarapuha oso ava porẽhisave oyeruqui ãgua.

<sup>36</sup> Evocoyase Simón ondugüer reseve yuviraso seca.

<sup>37</sup> Osepiase,

—Opacatu ava nde reca tẽi yuvireco —ehi yuvireco chupe.

<sup>38</sup> Ahe rumo,

—Yaso ambuae tecua namombrii vahesa rupi Tũpa Ñehengagüer ombombehu ãgua aheve; evocoi nungar apo ãgua niha che ayu —ehi.

<sup>39</sup> Ëgüe ehi uguata opacatu Galilea ivi rupi, ombombehu Vu Tũpa Ñehengagüer judío tũparo yacatu rupi oico, iyavei setá omose carugar ava sui.

*Jesús ombogüera mbia lepra vireco vahe*

<sup>40</sup> Ñepe mbia lepra rerecosar oyemboya Jesús rese, oñenopiha sovai aipo ehi:

—Ereipotase, iya nde che mbogüerami eve —ehi.

<sup>41</sup> Iparaisuerecosave opoco sese.

—Aipota. ¿Erecuerara cũritei! —ehi chupe.

<sup>42</sup> Aipo ihe ramoseve, ocuera voi eté.

<sup>43</sup> Ahese aipo ehi iri chupe icho renondeve:

44 —Aní chira eremombehu ambuae ava upe, esoño ipa voi pahi upe nde cuerasa mombehu, iyavei eremondora porerecosa nde cuerasa resendar Moisés porocuita rupi. Evocoyase toicua opacatu ava yuvireco nde cuerasa —ehi chupe viña.

45 Ahe mbia rumo oso omombehu-mbehu opacatú ava upe. Sese Jesús ndoicatu iri güeique ãgua güecocuer mombehuse tecua rupi; secoiño tēi tecua popi rupi ava porēhisave. Ava rumo yugüeruño ité opacatu tecua rupindar sepia.

## 2

### *Jesús ombogüera ava ndoguatai vahe*

1 Ñepeí arí pipe Jesús oyeví ou tecua Capernaum ve, ahese opacatu oyandu ñepeí oive secoise yuvireco.

2 Cūriteimi voi eté setá ava oñemonuha yuvireco secosave. Sese ndipoi eté ava reique iri ãgua oí pipe oquendipi rupi. Ahe rumo omombehuño ité Vu Ñehengagüer.

3 Aheseve irungatu mbia viroyepota ndoguatai vahe yuvireco chupe.

4 Ahe rumo ndiyai seroique ãgua Jesús uve ava rehíisave yuvireco. Sese viroyeupi oí haríve seraso yuvireco. Aheve teca virocua oí sui yuvireco; supí viroyí supa reseve imondo Jesús rovai tupri yuvireco.

5 Ahe oicuaase co mbia yuvirecoi vahe oyese yeroya, aipo ehi imbaheasi vahe upe:

—Che rahír, che ñero nde angaipa rese ndeu —ehi.

6 Moisés porocuita rese oporombohe vahe rumo ipihañemoñeta aheve yuvinoi:

7 “¿Mahera co mbia aipo ehiño tēi oñehe? Ahe oyemboivate ai tēi vahe Tūpa ñehe nungar pipe tēi oñehe. Tūpaño ité niha oicatu ava angaipa upe oñeroi ãgua” ehi.

8 Ahe rumo oicuaño ipihañemoñetasa, sese aipo ehi:

—¿Mahera vo pepihañemoñeta rai tēi che rese?

9 ¿Uma rupi vo ñehesa ndayavaimi catu ndoguatai vahe upe: “Nde angaipa rese che ñero ndeu” hesa pñha, anise: “Eñarapuha, esupi nde rupa, eguata” hesa tie?

10 Tapeicua ru che, Ava Riquehír, areco mborerecuasa co ivi pipe ava angaipa upe che ñero ãgua —ehi.

Evocoyase aipo ehi imbaheasi vahe upe:

11 —Eñarapuha, esupi nde rupa, eso nde rētave —ehi.

12 Imbaheasi vahe aipo ihe ramoseve, oñarapuha, osupi vupagüer, osē oso ichui opacatu ava rembiepiave. Sese opacatu oyepihamondí yuvireco, omboetei Tūpa yuvireco aipo ehi:

—Yipisuive ndayasepiái vahe ité co nungar mbahe —ehi tēi yuvireco.

### *Jesús oñehe mbia Leví serer vahe upe*

13 Ipare Jesús oso iri ipa iví. Aheve oporombohe oyese ava rehí yemboyase.

14 Ichui oguata vitesé, osepia Leví, Alfeo rahír, guarepochi reroquasave chinise, aipo ehi chupe:

—Erió che rupi —ehi.

Evocoyase Leví opñha, oso voi supi.

15 Ipare ocaru Leví rētave güemimbohe reseve yuvireco, ava sui guarepochi reroquasar iyavei ava yangaipa vahe pñhuve. Esepia, setá ava osaquicue moñaño ité yuvireco.

16 Evocoyase Jesús ocaruse ipñhuve, fariseo eta, oporombohe vahe Moisés porocuita rese avei oporandu semimbohe eta upe yuvireco:

—¿Mahera ru pe mbohesar ocaru ava guarepochi reroquasar iyavei yangaipa guasu vahe pñhuve tēi? —ehi.

17 Ahe rumo osenduse iñemoñetasa, aipo ehi chupe:

—Ava nimarai vahe ndosecai eté oporoposano vahe, imbaheasi vaheño rumo oseca yuvireco. Che ndayui ava seco tupri vahe reca; che rumo ayu ava yangaipa guasu vahe reca —ehi.

### *Yecuacusa rese ñehesa*

<sup>18</sup> Ñepeí ari pipe Juan Oporoãpiramo vahe remimbohe oyecuacu yuvireco, fariseo eta avei oyecuacu yuvireco no. Evocoyase moviro mbia ipãhu pendar yuviraso, oporandu Jesús upe:

—¿Mahera ru nde remimbohe ndoyecuacui eté yuvireco? Esepia, Juan remimbohe iyavei fariseo eta oyecuacu yuvireco yepi —ehi yuvireco chupe.

<sup>19</sup> Evocoyase omboyevi ahe ava upe:

—¡Ndiyai eté ichohopri mendasave iyecuacu ãgua imer oicove vitesse ipãhuve!

<sup>20</sup> Oimera rumo ari imer reraso ãgua ichui curi, ahese ramo oyecuacura yuvireco cute —ehi.

<sup>21</sup> “Ndiyai yayapete turucuar cuacua turucuar ipiasu vahe pipe. Esepia niha, ipiasu vahe oichohó turucuar cuacua imondoro iri ãgua, ichorosa evocoyase tuvicha catu-catuño ité.

<sup>22</sup> Iyavei uva ricuer ipiasu vahe ndiyai iñasa mbahe pিরer cuacua pipe. Esepia, uva ricuer ipiasu vahe orose mbahe pিরer cuacua vahe pipe, ombopuñora, uva ricuer evocoyase ocañipa tẽira, iyavei mbahe pিরer ocañi tẽi aveira. Sese uva ricuer ipiasu vahe ñoñasara mbahe pিরer ipiasu vahe pipe yepi” ehi.

### *Jesús remimbohe oipoho trigo mbituhusa ari pipe yuvireco*

<sup>23</sup> Ñepeí mbituhusa ari pipe, Jesús oguata güemimbohe rese trigo pãhu rupi fariseo rembiepiave yuvireco. Ahese semimbohe oipoho-poho sãhi yuvireco.

<sup>24</sup> Evocoyase fariseo aipo ehi:

—¡Mahera nde remimbohe mbituhusa ari pipe oporaviquiño yuvireco! —ehi yuvireco chupe.

<sup>25</sup> Ahe rumo aipo ehi:

—Peyeroqui niha icuachiapri aracahendar pipe mborerecuar guasu David rembia-pogüer rese acoi ndasiepoise ondugüer reseve yuvireco aracahe.

<sup>26</sup> Pahi rerecuar ivate catu vahe Abiatar serer vahe recose, ahese David oique Tũpa rẽta pipe pan imboeteipri Tũpa upendar reca ondugüer reseve yuvirohu ãgua. Ahe chupe acoi ndipotasai ihu ãgua yuvireco viña; judío pahi yuvirecoi vahe upeño ité niha ipotasa ihu ãgua yepi. Ahe rumo ohuño, omondo avei ava oyeupindar tohu aracahe —ehi.

<sup>27</sup> Iyavei aipo ehi:

—Mbituhusa ari yaposa ava upe nara, ndahei ava yaposa mbituhusa ari upe nara.

<sup>28</sup> Sese Ava Riquehir mbituhusa ari rerecuar secoi —ehi Jesús fariseo upe.

## 3

### *Mbia ipo nomii vahe Jesús ombogüera*

<sup>1</sup> Jesús oique iri judío tũparove. Aheve oime mbia ipo co cotigüer nomii vahe.

<sup>2</sup> Aheve avei fariseo ‘¿ombogüerara pãha mbituhusa ari pipe?’ oya omahengatu yuvireco sese ‘yaiñhengapo angahu’ oyapave tẽi.

<sup>3</sup> Evocoyase Jesús aipo ehi co mbia ipo nomii vahe upe:

—Epũha ore mbiterve —ehi.

<sup>4</sup> Ipare oporandu ambuae upe:

—¿Mbahe vo yaposara mbituhusa ari pipe yepi: mbahe aviye vahe pãha, mbahe naporai vahe tie? ¿Yaipisiro pãha ava recocuer, yamocañi uca tẽi tie? —ehi chupe.

Ahe rumo opaño iquiriri tupri yuvireco.

<sup>5</sup> Evocoyase omahe ava oyese oyere tupri vahe rese vorĩẽhisave iyavei ndovihai ava ndosenducua catuise yuvireco. Sese aipo ehi ipo nomĩ vahe uve:

—Eichoho nde yiva —ehi.

Evocoyase oichoho oyiva, ocuera tupri ité.

<sup>6</sup> Ahese fariseo opa yuvĩnose yuvĩraso oyemoingatu Herodes rupindar rese Jesús yuca ãgua yuvireco.

*Ava rehĩ ipa popĩ rupi yuvirecoi*

<sup>7</sup> Ipare Jesús yuvĩraso güemimbohe reseve ipa popĩ rupi, ava rehĩ avei ivi Galilea rupindar yuvĩraso supĩ.

<sup>8</sup> Oyanduse mbahe sembiapo yuvireco, setá avei ambuae ava yugüeru Judea rupindar, Jerusalén pendar, Idumea rupindar, iai Jordán cotindar avei, opacatu ava Tiro, Sidón pendar yugüeru sepia ãgua.

<sup>9</sup> Sese oyocuai güemimbohe vireco voi vaherã ñepeĩ carite yuvireco ava omboti etepriẽhi ãgua yuvireco.

<sup>10</sup> Esepia, setá imbaheasi vahe ombogüera. Sese opacatu ambuae imbaheasi vahe yuvĩraso chupe sese opoco ãgua.

<sup>11</sup> Iyavei ava carugar vireco vahe sepia, oñenopiha sovai, oñehe pucu-pucu yuvireco:

—¡Nde Tũpa Rahĩ ereico! —ehi.

<sup>12</sup> Jesús rumo oñehe pĩrata chupe: “Che mombehui rene ava rovaque peye” ehiño imondo.

*Jesús oiporavo doce tupri güemimboherã*

<sup>13</sup> Ipare Jesús oyeupi ivitri rese oso. Aheve ava viroyasar upe oñehe iporavo ãgua güemimbotar rupi. Ichui oyugüeru yuvireco chupe.

<sup>14</sup> Ahe ipãhu pendar osenoi doce tupri güemimboherã ‘toguataño che rupi, tomombehu Tũpa Ñhengagüer opacatu ivi rupi’ oya. Ahe osero “apóstol”

<sup>15</sup> ‘toipisi avei mborerecuasa carugar ava sui imboyepipi ãgua yuvireco’ oyapave.

<sup>16</sup> Evocoi doce yuvirecoi vahe, ahe: Simón (sererguã acoi omondo Pedro),

<sup>17</sup> Santiago iyavei tivri Juan Zebedeo rahĩ, ahe avei omondo sererguã Boanerges (‘osunu vahe rahĩ’ oya aipo ehi);

<sup>18</sup> iyavei Andrés, Felipe, Bartolomé, Mateo, Tomás, Santiago Alfeo rahĩ; Tadeo, Simón, ava güecua rese secatẽhi vahe pãhu pendarer;

<sup>19</sup> iyavei Judas Iscariote, ahe omondo vaherã Jesús yamotarẽhisar upe.

*“Jesús carugar pĩratasa vireco oyese” ehi tẽi ava yuvireco*

<sup>20</sup> Ipare Jesús oi que oi pipe güemimbohe reseve. Aheve oñemonuha ati irise ava yuvireco sese, ndiyai icaru ãgua yuvireco.

<sup>21</sup> Oyanduse imu secocuer yuvireco, oyugüeru seraso ãgua ‘ndayaracua iri revo’ oya.

<sup>22</sup> Iyavei oporombohe vahe Moisés porocuita rese oyugüeru vahe Jerusalén sui aipo ehi: “Co mbia carugar rerecuar Beelzebú oyocuai vahe, ipĩratasa pipe tẽi omboyepipi carugar ava sui” ehi yuvireco.

<sup>23</sup> Evocoyase Jesús omombehu carugar recocuer aipo ehi: “¿Mara ehira aipo carugar ahe ae oyeenose ava sui viña?”

<sup>24</sup> Acoi mborerecuar guasu povri pendar, ahe ovava-vavase oyeupe; evocoi nungar mborerecuar pĩratasa ocañi tẽira.

<sup>25</sup> Acoi oñemu oyese ae oyeamotarẽhise, oyemboyahose yuvireco viña, ahe ndipocopiĩ chiaveira yuvireco.

<sup>26</sup> Acoi carugar oyemboyahose ovava ãgua oyeupe ae yuvireco, ndipocopiĩ chiaveira yuvireco, ahe evocoyase secocuer ocañi tẽi vaherã ité yuvireco.

<sup>27</sup> “Ndipoi eté niha ava oique vahe que ava ipĩrata etepri vahe rēta pipe imbahe rerocuapa āgua ichui; oñapichi rane itera. Ipare voi opara imbahe vırocuva ichui.

<sup>28</sup> “Supi eté aipo ahe pēu: Acoi ava yangaipa vahe upe Tūpa iñerora opacatu yangaipa rese, iñehe-ñehe tēisa rese avei.

<sup>29</sup> Acoi iñehe-ñehe tēi vahe rumo Espıritu Santo rese, ahe chupe ndipo iri chietera ñerosa apirēhi vahe rā ité” ehi.

<sup>30</sup> Aipo ehi Jesús imboyevı ava upe. Esepia, “Carugar tēi erereco” ehiño ava yuvıreco chupe.

### *Jesús si, tivıreta avei*

<sup>31</sup> Coiye opa oyepota Jesús rivıreta iyavei ichi; ahe rumo opitaño ocarve yuvıreco. Ichui omondo oñehe yuvıreco chupe oyeupe ichē āgua.

<sup>32</sup> Yıvıi yuvınoi vahe oñehe yuvıreco chupe:

—Nde si, nde rivıreta, nde reindri reseve ocarve nde reca tēi yuvıreco —ehi.

<sup>33</sup> Ahe rumo,

—¿Ava pıha che si; ava pıha che rivıreta yuvırecoi? —ehi.

<sup>34</sup> Evocoyase omahe ava ovıvındar yuvınoi vahe rese aipo ehi iri chupe:

—Co che si eta; co che rivıreta.

<sup>35</sup> Esepia, acoi Tūpa remimbotar oyapo vahe yuvıreco, ahe che rivıri, che reindri, che si avei yuvırecoi —ehi.

## 4

### *Mbahe miti sui yembohesa*

<sup>1</sup> Jesús oporombohe iri ipa popı rupi. Aheve ava rehıi oyemboya yuvıreco sese. Ipare oha carite imbehıve tui vahe pipe. Aheve oguapı oı oñehe. Ava rumo opacatu ivı ātasa rupi opitaño yuvıreco.

<sup>2</sup> Evocoyase ava mbohe āgua omboyoya tecocuer mbahe tısa rese aipo ehi:

<sup>3</sup> “Pesendu co ñehesa: Ñepeı mbıa osē omaheti.

<sup>4</sup> Ahe otıapı-apıise mbahe rāhıi oso, movıro ovıapı perı rupi. Vırai yugüeruse rumo, opaño yuvırohu.

<sup>5</sup> Iyavei movıro oiti ivı nayanai vahesave, ita pāhuve. Sese cūrıteimi sorı.

<sup>6</sup> Arı tasıse rumo, opaño ipıru. Esepia, ndasapoi niha.

<sup>7</sup> Iyavei ambuae mbahe rāhıi oiti yu pāhuve; ahe yu rumo sorı poyava catu. Sese opaño oyopı. Evocoyase ahe miti ndıhai eté.

<sup>8</sup> Ambuae mbahe rāhıi oiti ivı avıye vahesave. Ahe opa ocuacua miti, iha tuprı ai yuvıreco: amove iha treinta tuprı ohı rese, amove sesenta, amove cien tuprı ité oha vıreco” ehi.

<sup>9</sup> Evocoyase, “Acoi osendu pota vahe che ñehe, toyapısacaño sese” ehi Jesús ava rehıi upe.

### *¿Mahera pıha co yembohesa imboyoyasa ambuae mbahe rese?*

<sup>10</sup> Ipare Jesús opıta ahe ae. Ava opıta vıte vahe semimbohe eta reseve oyemboya yuvıraso sese oporandu yuvıreco chupe, “¿Mara oya vo co yembohesa aipo ehi?” ehi yuvıreco chupe.

<sup>11</sup> Ahe aipo ehi: “Pēu niha Tūpa oicua uca mbahe ndıcuasai vahe omborerecuasa resendar. Ndache reroya potai vahe upe rumo imboyoyasa mbahe ambuae mbahe rese yepı.

<sup>12</sup> Yepe osepiā tēira, ndosepiacuı chietera rumo yuvıreco. Iyavei yepe osendu tēira, ahe rumo ndosenducuı chietera yuvıreco, Tūpa upe oyevı potaēhısave, ipıpe sui ndipoi chıra ñeroısa yuvıreco chupe” ehi.

### *Jesús omombehu tuprı yembohesa mbahe tısa resendar*



13 Iyavei aipo ehi: “¿Ndapesenducuaimi vo aipo porombohesa? ¿Mara peyera ru opacatu ambuae che porombohesa cua tupri ãgua?

14 Evocoi mbahe rãhi oñoti vahe, Tũpa Ñehengagũer mombehusar nungar.

15 Amove ava recocuer inungar co mbahe rãhi seitipri peri rupi: osendu angahu Tũpa Ñehengagũer. Sendu pare rumo, ou Caruguar ovirocuapaño oique vahe ipiha pipe ichui.

16 Ambuae ava recocuer inungar mbahe rãhi seitipri ita pãhu rupi: osendu Tũpa Ñehengagũer, oipisi tupri angahu oyeupe nara vorivetesã pipe;

17 ndovirecoi rumo guapo oyese opĩrata ãgua. Evocoyase yuvirecoise mbahe-mbahe tẽi pipe Tũpa Ñehengagũer sui tẽi, cũriteimi seroyaẽhisave, ‘Apoira ichui’ ehi yuvireco.

18 Ambuae ava recocuer inungar mbahe rãhi ñotimbri yu pãhu rupi: osenduse ñehesa Tũpa suindar,

19 ahe rumo ipihañemoñeta catu opacatu ombahe eta co ivi pipendar rese saisusave. Oyembopa uca rumo ombahe eta upe. ‘Opacatu itẽ mbahe tareco’ ehi tiẽte viña. Ipipe sui omocañi tẽi Tũpa Ñehengagũer. Ndoyapo ucai avei mbahe eta aviye vahe evocoi nungar ava upe.

20 Ambuae ava rumo osendu vahe Tũpa Ñehengagũer seroyasa pipe, oyapoño itẽ mbahe aviye vahe. Ahe inungar mbahe rãhi ñotimbri ivi aviye vahe rese: amove vireco ohi rese treinta, ambuae sesenta, ambuae cien” ehi.

#### *Tataendi resendar porombohesa*

21 Iyavei aipo ehi: “¿Serecosa vo tataendi mbahe riruvrive nara tẽi iyavei yande rupavrive nara tẽi no? Anĩ, tataendi imondosa ivate poroesape ãgua.

22 Ndipoi chietera mbahe ñomipri ndayasepiaí vaherã curi.

23 Acoi osendu pota vahe che ñehẽ, toyapisacaño yuvireco sese” ehi.

24 Iyavei aipo ehi: “Peyapo catu mbahe pesendu vahe. Pe rembiapo nungar rupi tupri asenducua ucara che ñehẽ pẽu. Iharive amondo iri catura pẽu.

25 Vireco tupri vahe upe, imondosa catura. Acoi ndovireco tupri vahe sui, serocuasañora” ehi.

#### *Yembohesa mbahe rãhi rorisã resendar*

26 Aipo ehi iri avei Jesús: “Tũpa mborerecuasa co ivi pipe inungar que ava oñoti vahe mbahe rãhi.

27 Omaheti pare, oso oque. Ipare coiye catu oñarapuha. Ahe oñocua pĩtu, ari avei, evocoyase mbahe rãhi sorĩ poyava yuvireco. Itĩsar rumo ndoicuai mara ehi vorĩ.

28 Ivi rese niha oyesu miti: yipindar sorĩ, ipare iha, ipare sãhi yuvinose sese.

29 Evocoyase co mbia mbahe ha yaviyese, oipoho. Esepia, oyepota ari ipoho ãgua chupe” ehi.

#### *Yembohesa mostaza rãhi suindar*

30 Iyavei aipo ehi: “¿Mara ehi vo Tũpa povri pendar co ivi pipe pẽu; mbahe rese pĩha iyacatu imboyoyasa icua ãgua?

31 Ahe oyoya tupri mostaza rãhi rese. Ahe tahimi catu opacatu ambuae mbahe rãhi sui.

32 Ñoti pare rumo, sorĩ, ocuacuase tuvichã catu ambuae mbahe miti sui. Sãca tuvichã itẽ, sese vĩrai oyemboaiti sovri rupi yuvireco” ehi.

#### *Jesús omboyoya ambuae mbahe rese oporombohe yepi*

33 Ñgũe ehi Jesús oporombohe Tũpa Ñehengagũer rese, omboyoya-yoya ñepeí mbahe ambuae mbahe rese ava mbahecuagũer rupi.

34 Nomombehui etẽ mbahe ambuae mbahe rese imboyoyaẽhi pipe. Ahe rumo omombehu tupri gũemimbohe upe ahe aemi yuvirecoise.

#### *Jesús omombituhu i ohitu vahe, ivitu ai reseve*

<sup>35</sup> Ahe ari pipe pĩtu ramomise, aipo ehi güemimbohe upe:

—Yaso ipa rovai —ehi.

<sup>36</sup> Evocoiyase ava sui osiri yuvireco, yuviraso carite pipe. Ambuae carite pipendar avei yuviraso supĩ.

<sup>37</sup> Oyepotase rumo ivĩtu ai ipĩrata vahe, i ohĩtu vahe oha guasu-guasú carite pipe, omboapĩpo seni yuvireco chupe.

<sup>38</sup> Jesús rumo oyeatocoño, oque ou supĩta coti. Evocoiyase omomahe voi yuvireco, aipo ehi chupe:

—¡Porombohesar! ¿Nandemahemohaimi rutei vo yande rese? ¡Opara moco yaso ipĩve! —ehi.

<sup>39</sup> Evocoiyase aipo hese, omahe, oñehe pĩrata ivĩtu ai upe, ipa upe avei:

—¡Pepĩtuhu! —ehi.

Aheseve voi opĩtuhu tupri.

<sup>40</sup> Ipare aipo ehi güemimbohe upe:

—¿Mahera pesiquiyé iteanga? ¿Ndapeyeroya vĩtei vo che rese? —ehi.

<sup>41</sup> Ahe rumo osiquiyepave oporandu-randu oyeupe yuvireco:

—¿Ava pĩha co mbia secoi? Esepia niha, ivĩtu ai, ipa avei omboyeroya —ehi tẽi yuvireco chupe.

## 5

### *Mbia Gerasa iguar vireco vahe carugar oyese*

<sup>1</sup> Jesús güemimbohe reseve oyepota ipa rovai Gerasa ivi rese yuviraso.

<sup>2</sup> Yuvinose pare carite pipe sui, ahese mbia carugar rerecosar tuvĩpa pãhu rupi secoi vahe oso Jesús upe.

<sup>3</sup> Co mbia tuvĩpa pãhu rupi secoi vahe yepi. Ndipoi eté ava secopisar, carena avei eté opa-opaño omondoso.

<sup>4</sup> Setá yupagüer rupi tẽi ñapichisa carena pipe ipi, ipo rupi avei yepi. Ahe rumo opa-opaño ité omondoso carena yepi. Ndipoi eté ava osecoreroyi vahe.

<sup>5</sup> Ari, pĩtu rupi oguata, osapucaí oico ivĩtri mahugüer rupi, tuvĩpa mahugüer rupi avei; oca-oca ita pipe oyese yepi.

<sup>6</sup> Amombri Jesús repia ramoseve, oña senonde oñenopiha voi sovai,

<sup>7</sup> oñehe pĩrata chupe:

—¡Eyepipi che sui Jesús, Tũpa seco ivate catu vahe Rahir! ¡Aporandu Tũpa rer pipe che mombaraisuẽhi ãgua eve! —ehi.

<sup>8</sup> Aipo ehi, esepia, yipĩndar Jesús aipo ehi chupe:

—¡Carugar mbahe tẽi vahe, esẽ co mbia sui! —ehi chupe.

<sup>9</sup> Aheve oporandu chupe:

—¿Mara vo nde rer? —ehi.

Ahe omboyevi chupe:

—Che rer Legión. Esepia, ore rehi eté —ehi.

<sup>10</sup> Oporanduño chupe omondopaẽhi ãgua co ivi sui.

<sup>11</sup> Ichui namombriimi setá cuchi ocaru vahe ivĩtri rese yuvireco.

<sup>12</sup> Sese carugar oporandu yuvireco chupe:

—Ore mondopaño cuchi avĩterve eve —ehi yuvireco.

<sup>13</sup> Evocoiyase Jesús omondo carugar sẽ ãgua ahe mbia sui. Ahe opa yuviroique cuchi avĩterve. Ahe cuchi retacuer dos mil tupri vahe, ahe yuvinoña yuviraso ivivite sui ipa pipe ocañipa.

<sup>14</sup> Evocoiyase cuchi rãrosar yuvinoña osiquiyepave yuviraso imombehu ãgua tecuave, caha pipe rupi yuvirecoi vahe upe avei. Sese ava opa yugüeru sepia ‘¿mbahe pĩha?’ oya yuvireco.

15 Oyepotase Jesús recosave, aheve osepia mbia carugar vireco vahecuer yuvireco oyemonde tuprise oĩ, yaracua tuprise avei. Ahese oyembosiquiye tẽi yuvireco.

16 Mbahe oime vahe carugar vireco vahe rese, cuchí rese avei, ahe sepiasar omombehupa ambuae ava upe yuvireco.

17 Evocoyase ava Jesús upe: “Esẽ cohave sui” ehi yuvireco.

18 Oha irise Jesús carite pĩpe, co mbia carugar rerecosarer oporandu chupe supi oso ãgua.

19 Ahe rumo,

—Esoño nde rõtave, nde mu piri. Aheve emombehupa Yar oporoaisusa pĩpe mbahe oyapo vahecuer nde rese —ehiño chupe.

20 Ahe mbia oso, omombehu opacatu tecua Decápolis rupi Jesús oyapo vahecuer mbahe sese. Evocoyase ava opacatu, “¡Mara ehi rutei!” ehi tẽi yuvireco.

*Jesús ombogüera Jairo rayri, iyavei cuña opoco vahe iturucuar rese ombogüera*

21 Oyevise Jesús carite pĩpe ipa rovai oso, aheve oñemonuha ati ava yuvireco chupe. Ahe evocoyase opitaño ipa popive.

22 Evocoyase oyepota mbia mborerecuar tũparo pendar, ahe serer Jairo. Jesús repiase, oñenopiha sovai,

23 aipo ehi chupe:

—Che rayri omano pota. Yaso, teremondomi tẽi nde po iharive imbogüera ãgua —ehi.

24 Evocoyase oso supi. Ava rehi avei yuviraso supi.

25 Ipãhuve avei oime cuña doce araviter rupi suvi yepiyere-yere vahe.

26 Iparaisú iteanga, setá oporoposano vahe ndoicatui imbogüera yuvireco omandavete catu iposanosa pĩpe yuvireco. Opa tupri tẽi omondo mbahe vireco vahe, ivate catuño rumo imbaherasisa chupe.

27 Co cuña osenduse Jesús rese ñehesa, oguata saquicuei oso ava rehi pãhuve, iturucuar rese opoco.

28 Aipo ehi oyeupe oico: “Iturucuar rese apocose rumo, acuerara” ehi.

29 Ahe ramoseve voi ndasuvi yepiyere iri. Ipare oyandu güttecuer yemoingatu tuprisa, ocuerase ombaherasisa sui.

30 Jesús rumo oyandu osẽse opĩratasa oyesui. Sese omahe guaquicuei coti ava rese, ahese oporandu:

—¿Ava vo opoco che turucuar rese? —ehi.

31 Semimbohe omboyevi yuvireco chupe:

—¿Nderemahei vo ava oyere tupri yuvireco nde rese? ¿Mahera ru, ‘¿Ava vo opoco che rese?’ ere iri? —ehi yuvireco chupe.

32 Ahe rumo omaheño vite ité ava oiviindar rese ‘¿uma ité pĩha opoco che turucuar rese?’ oya.

33 Evocoyase co cuña oicuse mbahe oyesendar, oyembosiquiye. Ipare oso sovai, oñenopiha, ahese opacatu mbahe supi vahe omombehu chupe.

34 Evocoyase Jesús aipo ehi chupe:

—Che rayri, erecuera cõritei nde yeroyasa pĩpe. Eso tupri. Esepia niha, erecuera nde mbaherasisa sui —ehi chupe.

35 Ñehe viteseve, oyepota moviro Jairo rõtã pendar tayri mano mombehu yuvireco:

—Omano ité nde rayri. Aní eremañeco tẽi vite Porombohesar —ehi yuvireco chupe.

36 Ahe rumo Jairo upe aipo ehi:

—Aní eresiquiye. Eyeroya catuño —ehi.

37 Ndoipotai rumo ambuae ava oyeupi icho ãgua; Pedro, Santiago, Juan güeraño oipota.

38 Oyepotase Jairo rõtave, osepia ava yemondii oyaseho vahe.

39 Ichui oiquese oi pĩpe, aipo ehi:

—¿Mahera vo perãse guasu tẽi peyaseho peyu? Co cuñatai nomanoi, oque tẽi ou —ehi ava upe.

<sup>40</sup> Ava rumo opucaete-eteño seroyaẽhisave yuvireco. Evocoyase omose opacatu ava. Ipare omoingue iyepupa, ichi, oyeupindar reseve cuñatai rehõgüersave.

<sup>41</sup> Ipare oipopisi aipo ehi:

—Talita, cum —ehi chupe (‘cuñatai, eñarapuha, ahe ndeu’ ohesave aipo ehi).

<sup>42</sup> Ahe ramoseve voi cuñatai doce araviter vahe oñarapuha, ipare oguata. Sepiase ava, oyembosiquiye guasu yuvireco.

<sup>43</sup> Jesús rumo oyocuai imombehuẽhi ãgua ambuae ava upe. Ipare,

—Pembocarar co cuñatai —ehi.

## 6

### *Jesús Nazaret ve secoi*

<sup>1</sup> Jesús osẽ co tecua sui oso güecuave; semimbohe avei yuviraso supi.

<sup>2</sup> Oyepotase mbituhusa ari, ahese oporombohe tũparo pipe. Setá ava ñehe rendusar oyepihamondiisave oporandu-randu yuvireco:

—¿Que sui vo co ava oicuapa opacatu mbahe? ¿Que sui pĩha vinose co mbahecuasa co poromondiisa apo ãgua? —ehi yuvireco oyeupe—.

<sup>3</sup> Co niha carpintero, María membri; Santiago, José, Judas iyavei Simón riqueri; seindri avei yuvirecove yande pãhuve —ehi.

Sese ndoviroyai yuvireco.

<sup>4</sup> Jesús rumo aipo ehi ahe ava eta upe:

—Tũpa ñehe mombehusar avei niha ava omboetei opacatu rupi yuvireco yepi, imu sãta pipendar ae rumo nomboetei yuvireco —ehi.

<sup>5</sup> Ndoicatui mbahe oporomondi vahe apo ãgua ava viroyaẽhisa pipe, sese moviro tẽi imbaheasi vahe harive omondo opo imbogüera ãgua.

<sup>6</sup> Ndoyembovihai ava viroyaẽhisa rese.

### *Jesús oyocuai güemimbohe Tũpa mborerecuasa mombehu ãgua*

Ipare Jesús oso, oguata tecua-tecuami namombrii vahe rupi oporombohe oico.

<sup>7</sup> Evocoyase, “Perio” ehi güemimbohe doce vahe upe. Ipare oyocuai ñuvirío-río, iyavei omondo güeco pĩratasa carugar mboyepipi ãgua chupe.

<sup>8</sup> —Ndaperaso chira rumo mbahe peguatasa rupi, pe pococa güeraño ité perasora —ehi—. Ndiyai avei peraso mbahe riru, pan, guarepochi avei.

<sup>9</sup> Iyavei pemondera pitaqui güeraño. Ndapemondugüei chiaveira pe camisa seraso.

<sup>10</sup> —Que pesosave peique se oi pipe, pepitaño ipipe, ichuive tupriño ité pesãra pecua.

<sup>11</sup> Acoi ambuae tecua pendar ndape pisi potaise, ndosendu potaise avei pe ñehe yuvireco, peyepipiñora ichui. Peipipeteño aveira pe pi ivi rãtachigüer sui. Ëgüe pe hesa omboyecuar cañisa apirẽhi yuvireco chupe —ehi.

<sup>12</sup> Evocoyase semimbohe eta yuviraso, “Pemboasi pe angaipa, peyevi Tũpa upe” ohe ãgua yuvireco.

<sup>13</sup> Iyavei setá omboyepipi carugar ava sui, setá avei omondo mbahe quira ava imbaheasi vahe rese imbogüera ãgua yuvireco.

### *Juan Oporoãpiramo vahe mano agüer*

<sup>14</sup> Mborerecuar guasu Herodes oyandu ñehesa Jesús resendar, iyavei opacatu rupi oicua yuvireco. Sese Herodes aipo ehi:

—Juan Oporoãpiramo vahe revo ocuerayevi. Sese oyapo poromondiisa ipĩrata vahe —ehi.

<sup>15</sup> Ambuae rumo,

—Tũpa ñehe mombehusar Elías mo evocoi —ehi yuvireco.

Ambuae evocoyase,

—Tūpa ñehe mombehusar aracahendar mo evocoi —ehi yuvireco.

<sup>16</sup> Osenduse Herodes co nungar ñehesa, aipo ehi:

—Juan ité niha evocoi che añaca asia uca vahecuer, ahe cūrítei ocuerayevi —ehi.

<sup>17</sup> Herodías recocuer sui tēi niha Herodes Juan oñapichi uca carena pipe soquenda. Esepia, co cuña Herodías yipindar Felipe rembireco, co Felipe Herodes rivri viña. Herodes rumo omendaño vivri rembireco rese.

<sup>18</sup> Juan aipo ehi Herodes upe: “Ndiyai eté nde ererecora nde rivri rembireco” ehi.

<sup>19</sup> Herodías evocoyase oyuca pota Juan yamotarēhisave; ndoicatui rumo yuca.

<sup>20</sup> Esepia, Herodes osiquiyēño ichui oicuase co mbia reco tupri aisa iyavei seco maranehise. Sese osepí ité; yepe ndoyembohe catui osenduse iñehe viña, ahe rumo osendu pota raiño ité.

<sup>21</sup> Coiye rumo osupiti ari Herodías remimbotar apo ãgua, ahese Herodes oharagüer pipe oyapo carusa guasu mborerecuareta rese, ava Galilea pendar icuapri ivate catu yuvirecoi vahe rese avei.

<sup>22</sup> Herodías membrí cuñatai oi que carusave. Aheve opivoi ava rovaque. Ipivoisa aviye ai Herodes upe, ambuae ava ocaru vahe upe avei. Ichui aipo ehi cuñatai upe:

—Eporandu mbahe nde remimbotar rese cheu, che evocoyase amondora ndeu —ehi.

<sup>23</sup> Ipare aipo ehi iri opacatu ava rovaque chupe: “Amondora nde remimbotar ndeu, anise, che mbahe eta amboyahora ndeu” ehi.

<sup>24</sup> Ahe cuñatai osē oso, osi upe oporandu:

—¿Mbahe rese pñha aporandura chupe? —ehi.

Ichí aipo ehi chupe:

—Eporandu Juan Oporoãpiramo vahe ãca rese —ehi chupe.

<sup>25</sup> Ipare cuñatai oña, oi que oso mborerecuar guapisave, aipo ehi chupe:

—Che aipota co pipeve voi eremboura Juan Oporoãpiramo vahe ãca poratu pipe cheu —ehi.

<sup>26</sup> Mborerecuar rumo ndoyembovihai tēi. Esepia, ava ichohopri rovaque ité yipindar oñehe. Sese ndoicatui, “Aní” ohe ãgua.

<sup>27</sup> Evocoyase ipare voi mborerecuar oyocuai sundao Juan ãca reru ãgua.

<sup>28</sup> Sundao oso soquendasave, oyasía Juan ãca, seru poratu pipe. Mborerecuar omondo co cuñatai upe, evocoyase cuñatai omondo osi upe.

<sup>29</sup> Oyanduse Juan remimbohe, yuviraso setecuer reca. Ipare viraso yuvireco tuvipave yapocatu.

### *Jesús oyopoi cinco mil cuimbahe*

<sup>30</sup> Co pare, apóstol oñemonuha Jesús piri yuvireco. Ipare omombehu mbahe güembiapogüer, oporombohe agüer avei yuvireco chupe.

<sup>31</sup> Ahese aipo ehi oapóstol upe:

—Perio cohave, yaso, yapituhumi rane co coti —ehi.

Esepia, oyepindecuaño ité ava yugüeru chupe, sese ndiyai icaru ãgua yuvireco.

<sup>32</sup> Evocoyase ahe güeraño apóstol reseve yuviraso carite pipe co coti ava sui.

<sup>33</sup> Setá rumo ava osepia ichose. Ichui opacatu ava tecua rupindar osaquicue moñaño; ahe ranengatu oyepotapa yuvireco ichui.

<sup>34</sup> Ogüeyise rumo carite pipe sui, osepia ava rehí, ahese iparaisu ava eta chupe, inungar ovesa ndovirecoi vahe guãrosar. Ipare ombohe opacatu mbahe rese.

<sup>35</sup> Caharuse rumo, semimbohe oyemboya yuvireco sese, aipo ehi yuvireco chupe:

—Caharu etepri moco, iyavei ndipoi oi co rupivemi vahe.

<sup>36</sup> ¿Ndiyai vo eremondopa ava tecua-tecuami cōi vahesa rupi? Aheve tovirocua ocaru ãgua yuvireco —ehi yuvireco chupe.

<sup>37</sup> Ahe rumo omboyevi:

—Pe pemondora mbahe semihura —ehi.

Semimbohe aipo ehi yuvireco chupe:

—¿Iyacatura pīha oreu dosciento denario pan repirã ava mbocaru ãgua? —ehi.

<sup>38</sup> Jesús aipo ehi:

—¿Mbovi vo pereco pan? Peso, tapesepia —ehi.

Sepia pare, omombehu:

—Poyandepo pan, ñuvirío pira —ehi yuvireco chupe.

<sup>39</sup> Evocoyase omboyaho-yaho ava imboguapí capihí harí rupí.

<sup>40</sup> Cincuenta, cien rupí-rupí oyemboyaho yuvireco.

<sup>41</sup> Ichui Jesús oipisí poyandepo pan, ñuvirío pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehí upe imondo ãgua yuvireco. Pira ñuvirío vahe avei omboyaho-yaho opacatu ava upe.

<sup>42</sup> Evocoyase opacatu ava ocaru vahe ihitaropa tēi yuvireco.

<sup>43</sup> Ipare semimbohe omboapipopa doce tuprí iruova pan iyavei pira rumbirer yuvireco.

<sup>44</sup> Cuimbahe ocaru vahe retacuer cinco mil tuprí.

### *Jesús uguata i harí rupí*

<sup>45</sup> Ipare Jesús, “Peha pe rane carite pípe, pesasa ipa Betsaida ve peso che renondeve. ‘Aviye’ tahe rane ava eta upe” ehi güemimbohe upe.

<sup>46</sup> “Aviye” ohe pare ava upe, oyeupi oso ivitri rese oyerogui ãgua.

<sup>47</sup> Pītuse carite ipa mbiterve ité secoi. Jesús rumo ahe ae opitaño ivive.

<sup>48</sup> Ahese omahe güemimbohe rese iyeapicui catuēhise. Esepia, ivitu ipirata vahe osovañchi yuvireco. Cōhe potase, uguata i harí rupí güemimbohe coti oso. Aviye ité acoi oñocuaño vahe rã oso.

<sup>49</sup> Sepiase rumo ‘hãgüer tēi revo’ oya, sãse pucu-pucu i harí rupí iguatase semimbohe yuvireco.

<sup>50</sup> Esepia, opacatu osepiase osiquiye yuvireco ichui. Ahe rumo aipo ehi:

—¡Peyemoviracuaño, che tēi! ¡Pesiquiye eme che sui! —ehi güemimbohe upe.

<sup>51</sup> Ahe ohase carite pípe, opituhu voi ivitu. Evocoyase, “¡Mara ehi rutei!” ehi tēi yuvireco.

<sup>52</sup> Esepia, ndoicua vitei eté pan apo ati agüer yuvireco, yavai vite seroya ãgua yuvireco chupe.

### *Jesús ombogüera ava imbaheasi vahe Genesaret pendar*

<sup>53</sup> Osasase ipa, oyepota Genesaret ivi rese yuviraso, ahe imbehive oñapichiño carite yuvireco.

<sup>54</sup> Yuvínosepa ramomiseve, ava oicua voi Jesús yuvireco.

<sup>55</sup> Ichui opacatu ahe ivi pípendar güeru imbaheasi vahe Jesús upe yuvireco.

<sup>56</sup> Oyepotase que tecuamive, anise tecua guasuve, caha pípe oi-oimi rupí, ahe supí imbaheasi vahe ocar rupí vínosepa voi yuvireco. “Topocomi tēi nde turucuar popí rese” ehi yuvireco chupe. Evocoyase opacatu sese opoco vahe, ocuerapa voi eté yuvireco.

## 7

### *Mbahe omonguaha vahe ava recocuer*

<sup>1</sup> Evocoyase fariseo eta, Moisés porocuita rese oporombohe vahe avei yugüeru Jerusalén sui oyemboya Jesús rese yuvireco.

<sup>2</sup> Ahese ahe osepia Jesús remimbohe ocaru ãgua iyepoiēhise porocuita mboaviyeēhise yuvireco, sese oñemoiro yuvireco chupe.

<sup>3</sup> (Esepia, fariseo iyavei opacatu judío eta aracahendar recocuer sui ndipoisai eté yuvireco, sese oyepoiēhise ndocarui eté yuvireco yepi.

<sup>4</sup> Mbahe rerocuasa sui oyevise, ndocarui oyepoiñhi viteseve yuvireco. Iyavei tecocuer arachendar tēi oyapo vite yuvireco inungar igua riru piisa, mbahe riru guarepochi apopri iyavei vupa moatiro tupriisa.)

<sup>5</sup> Sese fariseo eta iyavei Moisés porocuita rese oporombohe vahe oporandu Jesús upe yuvireco:

—¿Mahera vo nde remimbohe yande ramoi arachendar recocuer ndoviroya iri yuvireco? Esepia ru, ahe ocaruño opo quiha reseve yuvireco —ehi.

<sup>6</sup> Jesús rumo aipo ehi chupe:

—Pe Tūpa reroyasar angahu tēi peico vahe, supi tupri ité Tūpa ñehe mombehusar Isaías rembicuachía arachendar aipo ehi:

‘Co tecua pendar ava oyuru pipe tēi che mboetei yuvireco; ipihañemoñeta rumo amombri tēi che sui.

<sup>7</sup> Oyerure tupri tēi yuvireco cheu.

Esepia, iporombohesa ava porocuita tēi’ ehi.

<sup>8</sup> Ëgüe peye pepoipa Tūpa porocuita sui ava recocuer arachendar rupi tēi pe guata ãgua —ehi.

<sup>9</sup> Iyavei aipo ehi iri chupe:

—Pe ramoi recocuer arachendar pipe tēi peseyaño co coti Tūpa porocuita.

<sup>10</sup> Esepia, Moisés aipo ehi: ‘Pemboyeroyara iyavei peipitivira pe ru, pe si avei no. Acoi ñehe mara vahe oyesupa upe ahe, Tomanuño, ehi’ ehi aracahe.

<sup>11</sup> Pe rumo aipo peye tēi: ‘Acoi ava aipo ehi vahe vu upe, osi upe avei no: Ndiyai chira mbahe mondo ãgua pēu. Esepia, che opacatu mbahe areco vahe Tūpa upe imondopri, ahe Corbán, ehi’ peye;

<sup>12</sup> pe evocoyase, aipo ehi vahe upe, ‘Ndiyai eté oyesupa pitivi ãgua’ peye.

<sup>13</sup> Co nungar apo pipe Tūpa porocuita ndaperoyai. Esepia, ndapepoi potai ava recocuer arachendar sui. Setá mbahe co nungar peyapo vite —ehi.

<sup>14</sup> Ipare, “Perio” ehi iri ava rehi upe.

—Peyapisaca, pesenducua tupri che ñehe:

<sup>15</sup> Ndahei ocar sui tēi ou ava recocuer monguiha ãgua. Ahe rumo osē ipiha sui.

<sup>16</sup> Acoi osendu pota vahe che ñehe, toyapisacaño sese —ehi.

<sup>17</sup> Ipare oseyapase ava, oique oi pipe. Aheve semimbohe eta oporandu yuvireco co porombohesa omombehu vahe rese chupe.

<sup>18</sup> Ahe evocoyase aipo ehi güemimbohe upe:

—Evocoyase pe avei no, ¿ndapesenducuai? ¿Ndapeicuai vo acoi ocar sui oique vahe ava aviterve nomboangaipai eté?

<sup>19</sup> Esepia niha, ndahei ipihave oso, ahe rumo oso yaviterve. Ipare osē ichui —ehi ‘opacatu tembihu aviyeyño ité’ oyapave aipo ehi.

<sup>20</sup> Ipare aipo ehi:

—Ava piha sui osē vahe rumo mbahe, ahe omonguiha ava recocuer.

<sup>21</sup> Esepia, ava pihañemoñetasa sui osē pihañemoñeta raisa, yemboaguasasa, mondasa, porapichisa,

<sup>22</sup> mendasa sui yemboaguasasa, mbahe pota raisa, teco raisa, porombopasa, mbahe tēi pota raisa, mbahe rese ñemoirosa, ava rese ñemoñeta tēisa, teco ivate aisa, pihañemoñetasa nihivi vahe.

<sup>23</sup> Co mbahe opacatu naporai vahe yuvinose ava sui imboangaipa uca ãgua —ehi.

### *Cuña ndahei vahe judía viroya Jesús*

<sup>24</sup> Ichui Jesús osē oso tecua Tiro coti. Aheve oique oi pipe, ndoyecua uca potai ava upe viña; ndoicatui rumo ava sui oñemi.

<sup>25</sup> Oime cuña vireco vahe omombri cuñatai, ahe vireco carugar oyese; ahe cuña oicuae Jesús recosa, oso voi sovai oñenopiha.

<sup>26</sup> Ahe rumo ndahei judía, sirofenícia iguar ité. Ahe aipo ehi Jesús upe: “Enose che membri sui carugar” ehi.

<sup>27</sup> Jesús rumo aipo ehi chupe:

—Tahír judío rane toipisi mbahe yuvireco. Esepia, naporai yarocua pan tahír sui cave tohu imondo água —ehi.

<sup>28</sup> Co cuña aipo ehi:

—Supi eté, che Yar, cave avei rumo ohuño ité pan rahicuer oviapi vahe tahír mesavri pendar —ehi.

<sup>29</sup> Aipo ihese, aipo ehi:

—Aviye ité nde ñehe. Eyevi eso. Carugar osẽ nde membri sui —ehi chupe.

<sup>30</sup> Co cuña oyepotase güetave, osepia omembri supave; yipive rumo osẽ carugar ichui.

### *Jesús ombogüera mbia ndayapisai, iñehe ipiti-piti vahe*

<sup>31</sup> Jesús oyevi oso Tiro ivi sui. Ipare osasa Sidón rupi oso, ambuae tecua eta Decápolis ivi rupi avei. Ichui oyepota ipa Galilea ve.

<sup>32</sup> Aheve mbia ndayapisai, iñehe ipiti-piti vahe rerasosar: “Emondomi tẽi nde po iharive” ehi yuvireco chupe.

<sup>33</sup> Ichui Jesús viraso coi cotimi ava sui. Aheve ocuã omonde yapisa pipe. Ipare omondo güendi ñapecu rese.

<sup>34</sup> Ipare omahe iva rese, ipĩtuhe pucu aipo ehi: “¡Efata!” ehi (“timboisa’ ohesave aipo ehi).

<sup>35</sup> Ahe pipeve voi yapisa tupri, oñehe tupri avei.

<sup>36</sup> “Ndapemombehui chira ambuae upe” ehi ahe mbia upe. Ahe rumo oicua ucaño ité ambuae ava upe yuvireco.

<sup>37</sup> Evocoyase ava oyembovaha guasusave, aipo ehi yuvireco: “Aviye ité rumo mbahe sembiapo. ¡Esepia, ndayapisai vahe omboapisa, iñehe ipiti-piti vahe avei omoñhengatu tupri!” ehi yuvireco.

## 8

### *Jesús oyopoi cuatro mil cuimbahe*

<sup>1</sup> Ñepeí arí pipe setá ava oyemboya iri Jesús rese yuvireco. Ndipoi rumo mbahe icaru água. Sese oñehe güemimbohe eta upe aipo ehi:

<sup>2</sup> —Iparaisu catu co ava yuvireco cheu. Esepia, mbosapí arí yuvirecoi yande píri, iyavei ndipoi eté mbahe semihura.

<sup>3</sup> Amondopase sètave sieporẽhi reseve, viroviapi-api tiẽtera tieporẽhi perí rupi yuvireco viña. Esepia, setami ava yugüeru amombri sui —ehi.

<sup>4</sup> Semibohe aipo ehi yuvireco chupe:

—¿Mara yahera vo ava tohu mbahe mondo cohava ava porẽhisave? —ehi.

<sup>5</sup> Ahe oporandu:

—¿Mboví vo pan pereco? —ehi.

—Orovireco siete pan —ehi semimbohe yuvireco chupe.

<sup>6</sup> Evocoyase, “Peguapí ivi harive” ehi ava rehí upe. Ahese oipisi siete pan, “Aviye ndeu” ehi Tũpa upe. Ichui omboyaho-yaho pan imondo güemimbohe upe, semimbohe evocoyase omondo ava rehí upe yuvireco.

<sup>7</sup> Iyavei vireco moviro pirami yuvireco, sese avei, “Aviye ndeu” ehi iri Tũpa upe. Ichui güemimbohe upe, “Pemboyaho-yaho ava upe” ehi.

<sup>8</sup> Opacatu ité ava ocaru vahe ihítaro yuvireco. Ipare rumo semimbohe omboapipo iri rane sumbirer siete iruova yuvireco.

<sup>9</sup> Ava rehí ocaru vahe retacuer cuatro mil tupri. Ipare Jesús, “Aviye, peso tupri” ehi ava upe.



<sup>10</sup> Ipare voi eté yuviraso güemimbohe eta reseve carite pipe Dalmanuta ivi rese.

*Fariseo eta oporandu poromondiisa rese yuvireco*

<sup>11</sup> Ipare fariseo eta oyepota Jesús ñehe poepi-epi ãgua yuvireco. Jesús recoãha ãgua, oporandu iva pendar poromondiisa rese ‘¿Tũpa sui eté pĩha ou?’ oya yuvireco chupe.

<sup>12</sup> Sese Jesús ipĩtuhe pucu, aipo ehi:

—¡Mahera vo co ava oipota iva pendar poromondiisa che recocuer cua ãgua yuvireco! Namboyecuai chietera rumo que ñepeí evocoi nungar mbahe pẽu —ehi.

<sup>13</sup> Ipare oseyapaño ava. Ichui yuviroha iri carite pipe, osasapa ipa yuviraso sovai.

*Fariseo porombohesa inungar pan mboapeposa*

<sup>14</sup> Jesús remimbohe sesarai pan sui yuvireco, ñepeimi tẽi pan viraso güemihura yuvireco.

<sup>15</sup> Evocoyase Jesús aipo ehi:

—Peicua catu fariseo iyavei Herodes pan mboapeposa sui —ehi güemimbohe upe.

<sup>16</sup> Aipo ehise, semimbohe: “Pan ndayarui revo aipo ehi yandeu” ehi-ehi tẽi oyeupe yuvireco.

<sup>17</sup> Ahe rumo oicua güemimbohe pĩhañemoñetasa, aipo ehi:

—¿Mahera, “Pan ndayarui” peye? ¿Ndapeicua vitei vo che rembiapo? ¿Yavai vite tie seroya ãgua pẽu?

<sup>18</sup> Oime tẽi pe resa, ndapesepiai rumo; oime tẽi pe nambi, ndapesendui rumo mbahe. ¿Ndapeyemomahenduha iri vo

<sup>19</sup> acoi amboyaho-yahose cinco pan sui ava cinco mil vahe tohu? ¿Mbovi iruova vo acoi sumbirer pemonuha iri? —ehi.

—Doce iruova —ehi yuvireco chupe.

<sup>20</sup> —Iyavei acoi amboyaho-yahose siete pan sui ava cuatro mil vahe tohu, ¿mbovi iruova vo acoi pemonuha sumbirer no? —ehi.

—Siete iruova —ehi yuvireco chupe.

<sup>21</sup> Ipare aipo ehi:

—¿Ndapesenducua vitei vo? —ehi güemimbohe upe.

*Jesús ombogüera ava ndasesapısoi vahe tecua Betsaida ve*

<sup>22</sup> Oyepotase Jesús tecua Betsaida ve, ahe ramoseve voi ogüeru ndasesapısoi vahe yuvireco chupe ‘epocomi tẽi sese’ oya yuvireco.

<sup>23</sup> Evocoyase oipopısi ndasesapısoi vahe seraso co cotımi tecua sui. Aheve omondo güendi sesa rese, omondo avei opo iharıve. Ipare oporandu chupe: “¿Eresepia vo mbahe?” ehi.

<sup>24</sup> Ndasesapısoi vahe omahese, aipo ehi:

—Asepia ava inungar ivıra uguata vahe yuvireco —ehi.

<sup>25</sup> Evocoyase omondo iri opo sesa rese. Ipare co mbıa omahe tuprı ité cute, ocuera ité, opacatu mbahe osepia tuprı.

<sup>26</sup> Ichui Jesús omondo sètave aipo ehi chupe:

—Ereyevi iri eme tecuave —ehi.

*Pedro oicua uca Jesús Tũpa Rembıporavo seco rese*

<sup>27</sup> Ipare yuviraso Jesús güemimbohe reseve ivi Galilea sui tecua Cesarea cotı, Filipino ivi rese. Peri rupı oporandu güemimbohe upe:

—¿Mara ehi vo ava oñehe yuvireco che rese? —ehi.

<sup>28</sup> Semimbohe evocoyase omboyevi yuvireco chupe:

—Amove ava, “Juan Oporoãpiramo vahe” ehi yuvireco ndeu; ambuae evocoyase, “Elías” ehi; ambuae, “Tũpa ñehe mombehısar mboetasa” ehi yuvireco ndeu —ehi.

<sup>29</sup> Evocoyase oporandu iri güemimbohe upe:

—Pe no, ¿ava, “Co secoi” peye ru pe cheu no? —ehi.

Pedro evocoyase aipo ehi chupe:

—Nde niha Tūpa Rembiporavo Poropĩsiosar ereico —ehi.

<sup>30</sup> Jesús rumo, “Pemombehui rene que ñepei ava upe” ehi.

### *Jesús omombehu omano ãgua*

<sup>31</sup> Evocoyase Jesús omboipi oporombohe: “Che, Ava Riquehir, che paraisu itera, iyavei opacatu judío rerecuareta, pahi rerecuar ivate catu vahe iyavei Moisés porocuita rese oporombohe vahe remiamotarēhi aicora. Ahe avei che yuca ucara yuvireco. Acuerayevira rumo mbosapi ari rupi” ehi.

<sup>32</sup> Ahe omboyecua tupri ité chupe. Evocoyase Pedro viraso co cotimi chupe oñhengata ãgua.

<sup>33</sup> Oyemboyere rumo, omahe güemimbohe eta rese, oñhengata Pedro upe aipo ehi:

—¡Esiri che sui, Carugar! Esepia, nde nandepihañemoñetai mbahe Tūpa upendar rese; ava nungar tēi nde pihañemoñeta eico —ehi.

<sup>34</sup> Evocoyase Jesús, “Perio” ehi güemimbohe upe, iyavei ambuae ava upe aipo ehi:

—Acoi ava oguata pota vahe che rupi, topoi mbahe güemimbotar tēi aposa sui, iyavei inungar-ra curusu rese ovosira viña, toyemoingatu voi che recocuer rese oparaisu ãgua iyavei toguata tupri che rupi.

<sup>35</sup> Esepia, acoi ava güetecuer tēi raisupar, ocañi tēi etera. Acoi ava omocañi tēi vahe rumo güetecuer che recocuer rese, ñehesa ñepisirosa sui avei, ahe oñepisiora.

<sup>36</sup> ¿Aviye ai angahu pñha ava upe opacatu mbahe ivi pipendar pisi ãgua tēi, ahe ae tēi omocañi güecocuer yuvireco viña?

<sup>37</sup> ¿Mbovi pñha omondora ava güecocuer repirã viña?

<sup>38</sup> Esepia, acoi ava yuvinochi ai vahe che sui iyavei che ñehengagüer sui ava angaipa viyar ndaseco tupri vahe rovai, che avei, Ava Riquehir, ãgüe ahera acoi ayevisé che Ru reco pñrata porañetesa pipe, sembiguai rehi iva pendar maranehi reseve curi —ehi.

## 9

<sup>1</sup> Ipare Jesús aipo ehi iri:

—Supi eté, oimera amove cohava ava nomano vitei chivaherã, osepia rane itera ouse Tūpa mborerecuasa ipñratasa pipe yuvireco curi —ehi.

### *Jesús ñecuñaro agüer*

<sup>2</sup> Seis ari pare, Jesús viraso Pedro, Santiago, Juan reseve ivitri ivate vahesave oyeupi. Aheve aviyeteramo tēi oñecuñaro güemimbohe rovai.

<sup>3</sup> Iturucuar sendí, morochí eteanga. Ndipoi eté que ava co nungar co ivi pipe turucuar oyoisei vahe.

<sup>4</sup> Iyavei aviyeteramo tēi oyemboyecua Elías, Moisés reseve Jesús rese oñemoñeta yuvinocha.

<sup>5</sup> Ipare Pedro aipo ehi chupe:

—Ore mbohesar, ¡aviye ai eté cohava yaico! Toroyapo mbosapi teyupami: ñepei ndeu nara, ambuae Moisés upe, ambuae evocoyase Elías upe nara —ehi.

<sup>6</sup> Osiquiye tēi semimbohe yuvireco. Sese Pedro ndoicuaise oñehe ãgua, aipo ehiño tēi.

<sup>7</sup> Ahe ramoseve avei ogüeyi iva quiha iharive, oyopipa tupri yuvireco. Ahe ipãhuve oyeendu ñehesa aipo ehi vahe: “Co che Rahir, che rembiaisu; peyapisaca catu iñehe rese” ehi vahe.

<sup>8</sup> Ahe ramoseve avei omahese oivi yuvireco, ndosepia eté que ambuae ava, Jesús güeraño tupri ité osepia opãhuve yuvireco.

<sup>9</sup> Ipare ogüeyi ivitri sui yuvireco, aipo ehi güemimbohe upe ou: “Ndapemombehui chietera que ñepei ava upe co mbahe pesepia vahe, pemombehura rumo acoi che, Ava Riquehir, acuerayevise voi” ehi.

<sup>10</sup> Oyeupeñomi tēi vireco aipo ñehesa yuvireco, ahe rumo oporandu-randu oyeupe: “¿Mara oya pīha aipo, ‘Acuerayevira’ ehise?” ehi tēi yuvireco.

<sup>11</sup> Evocoyase semimbohe oporandu chupe:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

<sup>12</sup> Evocoyase aipo ehi chupe:

—Elías rane ité niha oura opacatu mbahe moingatu ãgua. ¿Mahera arachendar icuachiapri pipe aipo ehi: “Ava Riquehir oiporarara mbahe, yamotarēhimbri avei secoira” ehi?

<sup>13</sup> Che niha aipo ahe pēu: Elías rumo ou ité, ava evocoyase opacatu güemimbotar tēi oyapo yuvireco sese. Ëgüe ehi opacatu yaviye arachendar icuachiapirer sese —ehi.

*Jesús ombogüera chñivahe caruguar rerecosar*

<sup>14</sup> Ipare oyevi yuvireco güemimbohe recosave. Aheve osepia ava rehi oyere guasuse yuvireco sese, iyavei oime aheve Moisés porocuita rese oporombohe vahe oiñehopepi-epi semimbohe yuvireco.

<sup>15</sup> Ichui Jesús repiase, opacatu yuvinoña yuviraso chupe “avirave” apo.

<sup>16</sup> Evocoyase ahe oporandu ava eta upe:

—¿Mbahe rese vo peporandu-randu peyeupe? —ehi.

<sup>17</sup> Ñepeí ipāhu pendar omboyevi chupe:

—Porombohesar, co aru che rahir ndeu, vireco vahe caruguar oyese, nomoñehengatu ucai vahe yepi.

<sup>18</sup> Iyavei que iguatasa rupi co caruguar aviyeteramo tēi opocose sese, oiti voi ivive iyavei sendiriyuiyusu, sāitere-tere avei; sese cūrítei nipirata iri eté. “Penosemi caruguar ichui” ahe tēi nde remimbohe eta upe. Ahe rumo ndoicatui eté yuvireco —ehi.

<sup>19</sup> Jesús omboyevi chupe:

—¡Too, ndapeyeroya tupri vitei eté che rese! ¿Mbovi rupi rutei vo aico vitera pe pāhuve che ñemosasa pipe? Peru evocoi chñivahe cheu —ehi.

<sup>20</sup> Evocoyase ogüeru yuvireco chupe. Osepia caruguar Jesús, oiti uca iri chñivahe ivive. Omboapayere-yere iyavei sendiriyui guasu-guasú.

<sup>21</sup> Sese oporandu tu upe:

—¿Mbahese vo na ehi chupe? —ehi.

Tu evocoyase aipo ehi:

—Ichñivahemi suive ité.

<sup>22</sup> Amove co caruguar oiti uca tatave, ive avei yuca pota uca ãgua yepi. Sese ereicatusé, ore pñiviñomi tēi catu eve ore paraisuerecosave —ehi.

<sup>23</sup> Jesús aipo ehi chupe:

—¡Mahera, “Ereicatusé” ere cheu! Acoi che rese oyeroya vahe upe opacatu mbahe yaposa —ehi.

<sup>24</sup> Aipo hese tu,

—¡Oroviroya niha, che pñivii ru eve nde reroya catu ãgua! —ehi pñirata chupe.

<sup>25</sup> Osepia Jesús ava rehi, oyemboyase sese, oñehe pñirata caruguar upe aipo ehi:

—Caruguar noñehi vahe, ndayapísai vahe, che orocuai, epoi co chñivahe sui, ereique iri eme secocuer rese —ehi.

<sup>26</sup> Caruguar sãse pucu chñivahe yuca tupri oso. “Omano ité co chñivahe” ehi ambuae ava yuvireco.

<sup>27</sup> Jesús rumo oipopísi imopuha; evocoyase chñivahe opñuha tupri voi eté.

<sup>28</sup> Ichui oique oi pipe. Aheve semimbohe ahe aemi oporandu yuvireco chupe:

—¿Mahera pñiha ndoromose catui eté caruguar ichui? —ehi yuvireco.

<sup>29</sup> Jesús rumo aipo ehi güemimbohe upe:

—Yeroqui iyavei yecuacu pipeño ité niha co nungar caruguar yaicatu imombo —ehi.

*Jesús omombehu iri omano ãgua*

<sup>30</sup> Ichui yuvínosepase, yuviraso ivi Galilea rupi. Jesús rumo ndoyemboyecua uca potai eté que ambuae ava upe.

<sup>31</sup> Esepia, güemimbohe güeraño ité ombohe aipo ehi:

—Che, Ava Riquehír, imondopri aicora che amotarẽhimbar povrive, che yuca aveira yuvireco, mbosapi ari rupi rumo acuerayevira —ehi.

<sup>32</sup> Semimbohe rumo ndosenducuai eté oyeupe ñehesa yuvireco iyavei osiquiye chupe porandu ãgua yuvireco yepi.

*¿Ava vo seco ivate catu vahe?*

<sup>33</sup> Ipare oyepota tecua Capernaum ve yuvireco. Yuviroiquese oi pipe,

—¿Mbahe rese vo acoi peyeaca-aca peico peri rupi? —ehi güemimbohe upe.

<sup>34</sup> Ahe rumo noñehi tupri yuvireco chupe. Esepia, peri rupi, “¿Ava pñha ivate catu vahe?” ehi asi-asi oyeupe yuvireco.

<sup>35</sup> Evocoyase oguapisave, “Periopa” ehi güemimbohe upe, aipo ehi avei:

—Oimese pe pñhu pendar oyemboivate ai vahe, ahe rumo seco ivi coti catura opacatu sui ava eta pñivii ãgua —ehi.

<sup>36</sup> Ipare oipisi chñhivahe güemimbohe pñhuve senoha aipo ehi:

<sup>37</sup> —Acoi ava oipisi vahe co chñhivahemi nungar che rer pipe sereco, che ité che pisi yuvireco; iyavei acoi ava che pisi vahe, ndahei che güeraño che pisi, oipisi aveira che mbousar —ehi.

*Acoi ndahei vahe yande amotarẽhimbar, ahe yande mboyoyasar secoi*

<sup>38</sup> Evocoyase Juan aipo ehi chupe:

—Ore mbohesar, orosepia mbia nde rer pipe omombo vahe caruguar. Ahe rumo ndoguatai cñritei ore rupi; ore ité ndoroipotai chupe —ehi.

<sup>39</sup> Jesús rumo,

—Aní ãgüe peye —ehi—. Esepia, ndipoi eté que ambuae oyapo vahe poromondiisa che rer pipe, oicatu vaheñã oñehi rai che rese.

<sup>40</sup> Sese ndayande amotarẽhi vahe, ahe yande mboyoyasar secoi.

<sup>41</sup> Acoi que omondo vahe i vaso pipe che rupi pe recosa pipe pñu, evocoi nungar oipisi itera porerecosa oyeupe nara —ehi.

*Yaicua catura mbahe tñi apoñhi ãgua*

<sup>42</sup> “Acoi que ava omboangaipa uca vahe co chñhivahemi nungar che reroyasar, iyacatu evocoi nungar ñapichisa ita mbahe mbocuhisa iyesho rese para guasu pipe imombo ãgua.

<sup>43</sup> Sese pe po pe mboangaipa uca vahe peyasia ité peyesui. Esepia, aviye catu peiquera tecove apirẽhisave ñepi pe po rese, peso rãgüer sui que ñuvirío pe po rese tata guasu apirẽhisave.

<sup>44</sup> Aheve acoi uru nomanoi vahe, tata ndogüei vahe avei.

<sup>45</sup> Pe pi pe mboangaipa ucase, peyasia avei peyesui. Esepia, aviye catu ndape pñindugüei peique tecovesave, que ñuvirío pe pi rese peique rãgüer sui tata guasu ndopai vahesave.

<sup>46</sup> Aheve acoi uru nomanoi vahe, tata ndogüei vahe avei.

<sup>47</sup> Pe resa avei pe mboangaipa ucase, penose ité peyesui. Esepia, aviye catu peique ñepi pe resa rese Tñpa mborerecuasave que ñuvirío pe resa rese tata guasu apirẽhisave pe reique rãgüer sui.

<sup>48</sup> Aheve acoi uru nomanoi vahe, tata ndogüei vahe avei.

<sup>49</sup> “Esepia, opacatu ava imoehesara tata nungar pipe.

<sup>50</sup> Sese yucri aviye ai eté. Nasehe irise rumo, ndayaicatui chira imoehi iri ãgua. Peico catu yucri nungar mbahe tupri pipe peyeupe nara” ehi.

## 10

### *Jesús oporombohe mendasa sui poiēhi āgua*

<sup>1</sup> Ipare Jesús osē tecua Capernaum sui, oso Judea ivi rupi iai Jordán rovai ari sēsa coti. Aheve ava rehii oñemonuha iri yuvireco sese. Iyavei ombohe iri ava güecocuer rupi tupri.

<sup>2</sup> Evocoyase fariseo oyemboya seco rāha āgua tēi yuvireco sese, “¿Aviye pīha cuimbahe omenda vahe opoi güembireco sui?” ehi yuvireco chupe.

<sup>3</sup> Ahe rumo omboyevi chupe:

—¿Mara ehi vo acoi Moisés porocuita pipe? —ehi.

<sup>4</sup> Ahe evocoyase omboyevi yuvireco chupe:

—Moisés remimombehu aipo ehi: “Pemondora pe rembireco upe cuachiar poisa resendar pe poi āgua pe rembireco sui” ehi —ehi fariseo yuvireco chupe.

<sup>5</sup> Evocoyase fariseo upe aipo ehi:

—Moisés omondo co porocuita pe poreroyaēhisa pipe sui pēu.

<sup>6</sup> Yipisuive ité niha, “Tūpa oyapo opacatu mbahe, oyapo avei cuimbahe, cuña reseve.

<sup>7</sup> Sese niha cuimbahe omendase, oyepepira oyesupa sui güembireco rese ité yuvirecoi āgua.

<sup>8</sup> Evocoyase ñuvirío yuvirecoira ñepi ava nungar.’ Sese ndahe iri ñuvirío, ñepi nungar ité yuvirecoira.

<sup>9</sup> Evocoyase ava Tūpa omomenda vahe oyese, ndiyai ava tēi omboyepipi yuvireco oyesui —ehi.

<sup>10</sup> Oive yuvirecoi vitesé, semimbohe oporandu iri co mbahe rese yuvireco chupe.

<sup>11</sup> Evocoyase ahe aipo ehi:

—Acoi opoi vahe güembireco sui omendase ambuae cuña rese, oyemboaguasa tēi vahe güembireco sui.

<sup>12</sup> Acoi cuña oprise omer sui omendase ambuae cuimbahe rese, ahe oyemboaguasa tēi vahe avei —ehi güemimbohe upe.

### *Jesús osovasa chīhivahe*

<sup>13</sup> Ipare ogüeru chīhivahe Jesús upe yuvireco sese ipoco āgua. Semimbohe rumo, “¿Mahera vo peruño tēi chīhivahe?” ehi opiha vīracuasa pipe serusar upe yuvireco.

<sup>14</sup> Evocoyase Jesús osepiase, ndasorii güemimbohe upe aipo ehi:

—¡Mahera ndapeipotai iyu āgua! Toyugüeruño chīhivahe cheu. Esepia, co chīhivahe nungar ava yuviroiquera che Ru Tūpa mborerecuasave.

<sup>15</sup> Supi eté, acoi ndoipisii vahe che Ru Tūpa mborerecuasa chīhivahe nungar yuvireco, ahe evocoyase ndoyuviroiquei chietera ipipe —ehi.

<sup>16</sup> Evocoyase oipisi, omondo opo iharive osovasa.

### *Ñepi mbia chīhivahe imbahe eta vahe oñehe Jesús upe*

<sup>17</sup> Oguata vitesé Jesús yuvireco, aheseve mbia chīhivahe oña oso sovai, oñenopiha, oporandu chupe:

—Porombohesar aviye vahe, ¿mbahe vo ayapora tecovesa apirēhi vahe rereco āgua? —ehi.

<sup>18</sup> Jesús evocoyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepi aviye vahe ité, ahe Tūpa secoi.

<sup>19</sup> Ereicua niha Tūpa porocuita: ‘Ndereporoyucaí chira, nandeaguasai chira, nandemondai chira, nanderemirai chira ambuae ava rese, ndereporombopai chira, eremboyeroyara nde ru, nde si avei’ ehi vahe —ehi.

<sup>20</sup> Ahe mbia rumo,

—Porombohesar, che aipo nungar opacatu amboaviye ité che chīhivahe suive —ehi.

<sup>21</sup> Evocoyase omahe saiskusave sese, aipo ehi chupe:

—Ñepei mbahe rumo ipane vite ndeu: eso, emondopa rane nde mbahe; ahe sepi evocoyase emondo ava iparaisu vahe upe. Ichui ererecora mbahe aviye vahe ivave. Ipare ereguatara che rupi —ehi chupe.

<sup>22</sup> Aipo oyeupe hese rumo, ahe mbia oyepepiño ichui oviharēhisave oso. Esepia, ahe mbahe yar ité secoi.

<sup>23</sup> Evocoyase omahe oiviindar güemimbohe rese, aipo ehi:

—¡Yavai eté rumo ava mbahe yar reique ãgua che Ru Tūpa mborerecuasave! —ehi.

<sup>24</sup> Semimbohe evocoyase, “¡Mara ehi rutei!” ehi tēi iñehe renduse yuvireco. Ahe rumo omombehu iri:

—Che rahireta, ¡yavai eté Tūpa mborerecuasave imbahe eta vahe reique ãgua ombahe eta rese tēi ipihañemoñeta vahe upe!

<sup>25</sup> Yavai rai camello upe yucuar rupi seique ãgua, ava imbahe eta vahe upe rumo yavai catu che Ru mborerecuasave seique ãgua —ehi.

<sup>26</sup> Aipo nungar renduse oyepihamondii guasu yuvireco. Oporandu-randu tēi oyeupe yuvireco: “¿Ava angahu pīha oñepisiora yuvireco viña?” ehi.

<sup>27</sup> Evocoyase omahe güemimbohe rese aipo ehi:

—Ava tēi upe rumo yavai aipo nungar mbahe apo ãgua; Tūpa upe rumo ndayavaimi eté. Esepia, Tūpa opacatu mbahe mboavaisarēhi secoi —ehi.

<sup>28</sup> Ipare Pedro aipo ehi:

—Ore Yar, ore rumo oroseyapa opacatu ore mbahe nde rupi ore guata ãgua —ehi chupe.

<sup>29</sup> Omboyevi rumo Pedro upe:

—Supi eté co aipo ahe pēu: acoi che raisusa pipe iyavei ñehesa ñepisirosa raisusa pipe oseyapa vahe güeta, viquehir, vivri, güeindri, vu, osi, guahir iyavei oivi,

<sup>30</sup> ahe oipisira omahera co ivi pipe cien yupagüer rupi avei oi, vivri, güeindri, osi, guahir iyavei ivi. Yepe oiporarara mbahe-mbahe tēi viña. Ipare rumo tecua ambuaeve oipisi aveira tecovesa apirēhi vahe curi.

<sup>31</sup> Setá vai rumo cūritei yipindar vahe; ipa tēira yuvirecoi. Setá aveira cūritei ipa tēi vahe, yipindar yuvirecoira curi —ehi.

### *Jesús omombehu imombosapisa rupi omano ãgua*

<sup>32</sup> Yuvirasose Jerusalén ve, Jesús tenonde secoi güemimbohe upe. Semimbohe rumo ndoyembovīhai iyavei saquicuerindar osiquiye yuvireco. Aheve Jesús oñehe iri co cotimi güemimbohe doce yuvirecoi vahe upe. Ichui omboipi imombehu co mbahe-mbahe tēi reime ãgua chupe aipo ehi:

<sup>33</sup> “Peicua niha, yasora tecua Jerusalén ve, aheve rumo che, Ava Riquehir, che pisira che mondo pahi eta rerecuar iyavei Moisés porocuita rese oporombohe vahe povrive yuvireco. Ahe, ‘Tomano’ ehira yuvireco cheu. Ipare che mondo aveira ava ndahei vahe yande mu upe yuvireco.

<sup>34</sup> Mara ehi-ehi tēira yuvireco cheu, ondivi-ndivira, oyuvirocua-rocuara che rese, che yuca aveira yuvireco. Mbosapi ari rupi rumo acuerayevira” ehi güemimbohe upe.

### *Mbahe aviye vahe rese oporandu Santiago, Juan reseve yuvireco*

<sup>35</sup> Ipare oyemboyase Zebedeo rahir Santiago, Juan Jesús rese aipo ehi yuvireco chupe:

—Ore mbohesar, oroipota ereyapo mbahe aviye vahe oreu —ehi.

<sup>36</sup> Ahe evocoyase,

—¿Mbahe vo peipota ayapo vaherã pēu? —ehi chupe.

<sup>37</sup> —Ore oroipota nde mborerecuara porañetesave ore mboguapira ndeyepiri eve, ñepei nde mbahe rese pocosa coti, ambuae nde mbahe rese pocoēhisa coti —ehi yuvireco chupe.

<sup>38</sup> Evocoyase omboyevi:

—Pe ndapeicuai mbahe rese pe porandu. ¿Peiporara catura pīha che co mbahe-mbahe tēi aiporara vaheṛã, inungar-ra que igua iro vahe aihu vaheṛã viña? Iyavei, ¿peicatura pīha che ãpiramosa aipisi vaheṛã pisi? —ehi.

<sup>39</sup> —Taa, oroicatuño itera —ehi yuvireco.

Evocoyase ahe aipo ehi chupe:

—Supi eté peihura co mbahe iro vahe, peipisi aveira ãpiramosa che aipisi vaheṛã nungar.

<sup>40</sup> Co rumo ndiyai cheu che piri pe guapi ãgua, che mbahe rese pocosa coti, ambuae che mbahe rese pocoẽhisa coti. Che Ru Tũpa omoingatu güembiporavo upe nara oguapi vaheṛã che ipive —ehi.

<sup>41</sup> Evocoyase ambuae semimbohe diez yuvirecoi vahe iñehe renduse, oñemoiro Santiago, Juan upe yuvireco.

<sup>42</sup> Ahe rumo, “Perio” ehi opacatu upe. Ipare aipo ehi:

—Peicua niha acoi mborerecuar guasu yuvirecoi vahe Tũpa cuaparēhi oporocuai oporoyuca ai tēisa pīpe. Iyavei acoi ivate catu vahe oyeecoapirasá iteanga omborerecuasa pīpe yepi.

<sup>43</sup> Pe rumo ãgüe ndapeyei chira pe yeereco. Iyacatu rumo acoi ava oipota vahe ivate catu güeco ãgua pe pãhuve, ihañeco rane itera opacatu ambuae ava rese.

<sup>44</sup> Iyavei acoi pe pãhu pendar oipota vahe tenonde catu güeco ãgua, ihañeco tupri ranera opacatu pe pãhu pendar rese.

<sup>45</sup> Aherã niha che, Ava Riquehir, ayu ndahei ava che rese ihañeco ãgua; che rumo ayu ava rese che hañeco ãgua, iyavei amondo vaheṛã che recocuer manosave ava eta repirã Carugar povri sui senose ãgua —ehi.

### *Jesús ombogüera Bartimeo sesapisoẽhisa sui*

<sup>46</sup> Ipare oyepota tecua Jericó ve yuvireco. Ahe tecua sui yuvinosese güemimbohe reseve, ava rehii avei, aheve peri popive mbia ndasesapisoi vahe Bartimeo serer vahe, Timoteo rahir, oguapi oĩ.

<sup>47</sup> Osenduse, “Jesús Nazaret pendar” hesa, osapucaí pĩrata:

—¡Jesús, David suindar, che paraisuerecomi tēi eve! —ehi chupe.

<sup>48</sup> Ava rumo oyaca-yacaño, “¡Quiriri!” ehi yuvireco chupe. Ahe rumo,

—¡David suindar, che paraisuerecomi tēi eve! —ehi pĩrataño ité chupe.

<sup>49</sup> Evocoyase osenduse iñehe, opita,

—Peñehe chupe —ehi.

Ichui oñehe yuvireco chupe:

—Eyemonguerēhi, epũha. Esepia, oñehe aipo ndeu —ehi.

<sup>50</sup> Aipo oyeupe he ramoseve, omomboño oturucuar guasu, opũha yesapiha oso chupe.

<sup>51</sup> Evocoyase oporandu ndasesapisoi vahe upe:

—¿Mbahe vo ereipota ayapo vaheṛã ndeu? —ehi.

Ahe evocoyase,

—Porombohesar, che mbosarecomi tēira eve viña —ehi.

<sup>52</sup> Evocoyase aipo ehi ahe mbia upe:

—Eso tupriño eico; erecuera niha. Esepia, ereyeroya ité che rese —ehi.

Ahe ramoseve ndasesapisoi vahe osareco tupri ité. Ipare osoño ité Jesús raquicuei peri rupi.

## 11

### *Jesús oi que Jerusalén pīpe*

<sup>1</sup> Ovirovise tecua Jerusalén yuviraso, serovicave oime ñuvirío tecuami: Betfagé, Betania avei ivitri Olivo ipimi. Aheve Jesús omondo ñuvirío güemimbohe,

<sup>2</sup> aipo ehi chupe:

—Peso evocoi tecuami yande rovaindarve. Peyepotase aheve, pesepiara guaricu ñapichimbri imoha, ava ndoyeupi vïtei vahe yuvireco sese, ahe peyorañora seru.

<sup>3</sup> Acoi que ava: “¿Mahera vo êgüe peye?” ehise pëu, “Ore Yar oïporu pota, ipare niha omboyevi voiñora” peyera chupe —ehi.

<sup>4</sup> Evocoyase ahe yuviraso peri rupi. Aheve guaricu ñapichimbri osepia imoha yuvireco oquendipive. Ichui oyoraño seru yuvireco.

<sup>5</sup> Evocoyase ahe pendar ava,

—¿Mbahe peyapo? ¿Mahera vo peyora guaricu? —ehi yuvireco chupe.

<sup>6</sup> Ahe rumo Jesús ombohosa rupi tupri ité omboyevi yuvireco chupe. Evocoyase, “Tovirasoño” ehi yuvireco chupe.

<sup>7</sup> Ipare viraso guaricu Jesús upe, iyavei oturucuar omondo iharive yuvireco. Ahese Jesús oyeupi iharive.

<sup>8</sup> Setá ava oipipira oturucuar peri rupi, ambuae ava evocoyase oyasia pindo omondo peri rupi saperã yuvireco.

<sup>9</sup> Ava senonendar, saquicuerindar avei,

—¡Imboeteipri, sovasapri tasecoi ou vahe yande Yar rer pipe! —ehi pïrata yuvireco chupe—.

<sup>10</sup> ¡Sovasapri yande ramoi David mborerecuasa tasecoi ou vahe oico! ¡Ivave imboeteipri tasecoi! —ehi yuvireco chupe.

<sup>11</sup> Êgüe ehi Jesús oiquese Jerusalén ve. Ipare oi que tũparo pipe. Aheve opacatu rupi mbahe osepia. Ipare yuviraso Betania ve caharuse ité doce güemimbohe rese.

### *Jesús vireco megua higuera ndihai vahe*

<sup>12</sup> Ahere ayihive, yuvinosese Jesús tecua Betania sui, ndasiepoi oico.

<sup>13</sup> Osepia amombri ivira higuera so ati vahe, oso chupe ‘¿iha pïha?’ oyapave. Ahe rumo osepia so pãve tõi sese. Esepia, ahe ivira upe ndosupiti vïtei iha ãgua.

<sup>14</sup> Evocoyase aipo ehi ahe ivira upe:

—¡Co pipe suive ndipo iri chira ava nde ha yuvirohu vaherã! —ehi.

Semimbohe osendu iñehe yuvireco.

### *Jesús omombopa ava mbahe mboepisar tũparo pipe sui*

<sup>15</sup> Ipare oyepota Jerusalén ve yuvireco. Aheve Jesús oiquese judío tũparo guasu pipe, omboipi ava mbahe mondosar, mbahe rerocuar mombopa tupri ocarve oico iyavei ava guarepochi recuñarosar opa ombovapi mesa imondo, apicasu mondosar renda avei omboviapi imondo.

<sup>16</sup> Ndoipotai eté que ambuae mbahe seroiquepirã tũparo pipe.

<sup>17</sup> Ipare oporombohe aipo ehi:

—Icuachiapri aracahendar pipe aipo ehi: ‘Co che rëta yeruresa rëtarã opacatu ava ivi pipendar uve nara’ ehi. Pe rumo imonda rai vahe rëta nungar tõi pereco —ehi.

<sup>18</sup> Pahi eta rerecuar iyavei oporombohe vahe Moisés porocuaite rese osenduse, “¿Mara yahera pïha sereco yuca uca ãgua?” ehi voi yuvireco chupe. Osiquiye rumo opacatu ava sui. Esepia, ahe ndoyembovïhai iporombohosa rese yuvireco.

<sup>19</sup> Pïtu ramomise, Jesús yuvinose güemimbohe eta reseve yuviraso ahe tecua sui.

### *Ivira higuera ndihai vahe ipiru*

<sup>20</sup> Ahere ayihive, añihiveive yuvirasose, osepia ivira higuera sapo suive ipirupa vahe yuvireco.

<sup>21</sup> Evocoyase Pedro oyemomahenduha voi iñehe agüer rese, sese aipo ehi Jesús upe:

—Ore mbohesar, esepia co ivira higuera upe ereñehe rai vahecuer, opa ité ipiru —ehi.

<sup>22</sup> Jesús evocoyase,

—Peyeroya Tũpa rese —ehi—.



<sup>23</sup> Supi eté aipo ahe pëu: acoi que ava ivitri upe: ‘Esiri ave sui, eso para guasu pipe’ ehi vahe oyeroya tuprise ité aipo hesa rese, ãgüe ehi etera chupe.

<sup>24</sup> Sese aipo ahe pëu: opacatu que mbahe rese peporanduse pe yeroquisa pipe, peyeroya itera mbahe oime vaheã rese pëu, ahese peipisi itera.

<sup>25</sup> Acoi peyeroquise, yipindar peñero rane que pe amotarëhimbar upe, ahese ãgüe ehi aveira pe Ru iva pendar iñero pe angaipa rese pëu.

<sup>26</sup> Ëgüe ndapeyeise, pe Ru iva pendar avei niñeroi chira pe angaipa rese pëu —ehi.

### *Jesús mborerecuasa*

<sup>27</sup> Ipare oyeve Jerusalén ve yuvireco. Aheve Jesús secoise judío tũparo guasu pipe, pahi eta rerecuar, Moisés porocuita rese oporombohe vahe, ava rerecuar guasu avei oyemboya yuvireco sese.

<sup>28</sup> Aheve oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu co nungar apo ãgua? —ehi yuvireco chupe.

<sup>29-30</sup> Evocoyase omboyevi chupe:

—Che avei aporandura mbahe rese pëu: ¿Ava vo Juan ombou ava ãpiramo ãgua; Tũpa pĩha, ava tẽi tie? Pemboyevise cheu, ahese che avei amombehura pëu ava porocuita rupi eté pĩha ayapo co mbahe vichico —ehi.

<sup>31</sup> Evocoyase oñemoñeta aipo ehi oyeupe yuvireco: “‘Tũpa ombou’ yahese chupe viña, ahe evocoyase: ‘¿Mahera ru ndaperoyai?’ ehira yandeu.

<sup>32</sup> ‘Ava tẽi remimbou’ ndayahei chiveira chupe” ehi. Ahe osiquiye tẽi ambuae ava sui yuvireco. Esepia, opacatu ité oicua Juan oñehe Tũpa suindar ñehesa rese yepi.

<sup>33</sup> Evocoyase omboyevi chupe yuvireco:

—Ndoroicuai eté Juan mbousar —ehi.

Ahese ahe aipo ehiño chupe:

—Sese che avei, “Ahe iporocuita pipe co mbahe ayapo” ndahei chietera pëu —ehi mborerecuar guasu upe.

## 12

### *Ava mbahe tẽi oporaviqui vahe recocuer sui yembohesa*

<sup>1</sup> Evocoyase Jesús omboyoya tecocuer ambuae ava recocuer rese aipo ehi: “Oime mbia oñoti vahe uva oivi pipe, ahe oñachi tupri sereco iyavei oyapo mbahe uva ricuer renose ãgua. Oyapo avei oi ivate vahe opacatu mbahe moha ãgua. Ipare oseya oivi ava oporaviqui vahe upe iporu ãgua. Ichui osẽ, oso amombri vahesa rupi.

<sup>2</sup> Oyepotase ari uva pohosa, ahese omondo güembiguai oporaviqui vahe upe imboporandu ‘tomboumi uva pohopri cheundar cheu cute’ oyapave viña.

<sup>3</sup> Ahe rumo oipisiño, inupa-nupa imboyevi tupri tẽi yuvireco.

<sup>4</sup> Evocoyase ahe ivi yar omondo iri ambuae güembiguai. Ahe oyapicha-pichaño ñaca rupi, iñehe mara-mara tẽiño avei yuvireco chupe.

<sup>5</sup> Ipare omondo iri ambuae. Ahe oyucaño yuvireco. Ichui omondo ati iri tẽi. Ahe ipãhu pendar rese yuvirocua-rocuano yuvireco, oyucaño avei ambuae yuvireco.

<sup>6</sup> “Iyavei ñepe opita vite, tahir ité, sembiaisu. Ahe omondo ipa ‘co omboyeroyara yuvireco’ oyapave viña.

<sup>7</sup> Oporaviqui vahe rumo aipo ehi oyeupe yuvireco: ‘Co aipo oipisira vu mbahe. Yayucaño, yandeu nara pãve topita co ivi’ ehi yuvireco.

<sup>8</sup> Ichui oipisi, oyucaño yuvireco. Ipare ovinose sehögüer ahe miti sui co coti yuvireco.

<sup>9</sup> “¿Mbahe vo evocoyase oyapora ivi yar? Osora chupe, opara oyuca oporaviqui vahe, iyavei omondopara oivi ambuae ava upe.

<sup>10</sup> “¿Ndapeyeroqui vo pe co icuachiapri pipe? Aipo ehi niha acoi:

‘Co ita oi aposar opaño omombo yuvireco.  
Ahe ita rumo aviye catu vahe oi moviracua tupri ãgua.

<sup>11</sup> Ëgüe ehi niha yande Yar yapo.  
¡Mara ehi rutei revol! ehi icuachiapri pipe” ehi.

<sup>12</sup> Evocoyase oviraso pota voi Jesús soquenda ãgua yuvireco. Esepia, ahe osenducua ité oyesendar iporombohesa yuvireco. Ava sui osiquiyepave rumo opoiño yuvireco ichui.

*Fariseo osecõha iri tõi Jesús guarepochi rese yuvireco*

<sup>13</sup> Ipare mborerecuar omondo fariseo iyavei mborerecuar Herodes rupindar avei Jesús upe ‘toyavi angahu õñehe’ oya yuvireco chupe.

<sup>14</sup> Ahe yuviraso chupe aipo ehi:

—Porombohesar, ore oroicua nde supi eté vahe mbahe eremombehu eico, nde niha ndereroyai vahe ava ñehesa tõi. Esepia, “Ëgüe ehi co mbia” nderei eté ava upe iyavei ereporombohe mbahe supi tupri vahe Tũpa remimbotar apo ãgua rese. ¿Aviyera pĩha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

<sup>15</sup> Oicua ité rumo fariseo pihãhisa, sese aipo ehi voi chupe:

—¿Mahera che moingue pota mbahe tõi pipe peye? Peru evocoyase ñepei guarepochi cheu, tasepia —ehi.

<sup>16</sup> Ipare fariseo güeru yuvireco chupe, ahe guarepochi repiase, oporandu chupe:

—¿Ava rahanga vo co chini sese, iyavei ava rer vo co chini sese no? —ehi chupe.

—Roma pendar mborerecuar guasu —ehiño fariseo yuvireco chupe.

<sup>17</sup> Evocoyase aipo ehi fariseo upe:

—Pemondora mborerecuar upe mbahe chupendar; Tũpa upendar mbahe evocoyase pemondora Tũpa upe —ehi.

Evocoyase oyepihamondii tõi aipo oyeupe hese yuvireco.

*Saduceo oporandu Jesús upe cuerayevisa rese secoãhasave*

<sup>18</sup> Evocoyase saduceo “ndipoi eté cuerayevisa” ehi vahe yugüeru Jesús upe. Oporandu tõi angahu yuvireco chupe:

<sup>19</sup> —Porombohesar, Moisés niha oseya güembicuachiagüer yandeu aipo ehi: “Que cuimbahe omenda vahe omanose guahẽhiseve, tivri evocoyase omendara sembirecocuer rese ahe viquehir omano vahecuer upe nara tahira oico.”

<sup>20</sup> Oime siete tupri oyesuindar pãve yuvirecoi vahe. Yipindar vahe omenda. Ichui omanoño, ndatahii eté rumo.

<sup>21</sup> Ipare tivri omenda viquehir rebirecocuer rese. Ahe rumo omanoño, ndatahii avei rumo. Ëgüe ehi tupri avei tivri imombosapisa.

<sup>22</sup> Ëgüe ehi co siete tupri omenda ahe cuña rese, ndatahii eté rumo yuvireco. Coiye rumo cuña omano avei no.

<sup>23</sup> Evocoyase opase ocuerayevi yuvireco, ¿uma rebireco itera pĩha? Esepia niha, siete tupri ité omenda tõi yuvireco sese —ehi yuvireco chupe.

<sup>24</sup> Evocoyase Jesús omboyevi chupe:

—Pe pihãñemoñeta pipe peyavi. Esepia, ndapeicuai eté Tũpa ñehe icuachiapri arachendar, ndapeicuai avei Tũpa pĩratasa.

<sup>25</sup> Supi eté omano vahe ocuerayevise, chupe ndipo iri chira mendasa. Ahe rumo Tũpa rembiguai iva pendar nungar yuvirecoira ivave.

<sup>26</sup> Co cuerayevisa resendar rumo amombehura pẽu: aviye ndapeyeroqui anga vahe Moisés rebicuachiagüer pipe, acoi caha rese sendi guasu vahe aviterve Tũpa aipo ehise chupe: ‘Che Abraham, Isaac, iyavei Jacob Tũpa aico’ ehi vahe.

<sup>27</sup> ¡Tūpa ndahei omano vahecuer Tūpa! ¡Ahe rumo oicove vahe Tūpa secoi! Sese pe pihañemoñeta pipe peyavi —ehi saduceo yuvirecoi vahe upe.

*Porocuita aviye catu vahe*

<sup>28</sup> Ñepei Moisés porocuita rese oporombohe vahe osendu ñehe pīratase oyeupe yuvireco, oicua avei Jesús omboyevi tuprise ñehe yuvireco chupe, evocoyase oyemboya sese oporandu chupe:

—¿Uma vo porocuita aviye catu vahe opacatu sui? —ehi.

<sup>29</sup> Jesús omboyevi chupe:

—Yipindar mborocuita aviye catu vahe aipo ehi: ‘Pesendu Israel: yande Yar Tūpa aheño ité ñepei yande Yar secoi.

<sup>30</sup> Eresaisura nde Yar Tūpa opacatu nde pihá pipe, opacatu nde recocuer pipe, opacatu nde yapisacasa pipe iyavei opacatu nde pīratasa pipe’ ehi.

<sup>31</sup> Iyavei imoñuviriosa porocuita ahe co: ‘Eresaisura ambuae ava nde yeaisu nungar’ ehi. Ndipo iri ambuae porocuita aviye catu vahe co sui —ehi.

<sup>32</sup> Evocoyase porocuita rese oporombohe vahe aipo ehi chupe:

—Aviye tupri ité aipo nde ñehe, Porombohesar. Supi eté aipo ere oime ñepei Tūpa iyavei ndipoi eté ambuae.

<sup>33</sup> Iyavei yasaisura Tūpa opacatu yande pihá pipe, opacatu yande yapisacasa pipe, opacatu yande pīratasa pipe, iyavei yasaisura ava yande yeaisu nungar. Ahe ité aviye catu mbahe seropovēhepri sui iyavei opacatu porerecosa sapipri tēi sui —ehi.

<sup>34</sup> Evocoyase Jesús icuase co ava pihañemoñeta tuprise, aipo ehi chupe:

—Namombriimi ereico Tūpa mborerecuasa sui —ehi.

Ipare ndipo iri oyemonguerēhi vahe oporandu vaheñã mbahe rese yuvireco chupe.

*¿Ava suindar pīha Poropīsīrosar?*

<sup>35</sup> Jesús oporombohese tūparo pipe aipo ehi:

—¿Mahera ru Moisés porocuita rese oporombohe vahe: “Poropīsīrosar David suindar ité” ehi yuvireco?

<sup>36</sup> Esepia, David ité aipo ehi Espiritu Santo pīratasa pipe:

‘Yar aipo ehi che Yar upe:

Eguapi che acato coti, acoi che amondose voi eté nde amotarēhimbar nde povrive yuvireco’

ehi David aracahe.

<sup>37</sup> ¿Mahera ru, “Poropīsīrosar David suindar secoira” peye, David teieté, “Che Yar” ehise chupe? —ehi.

Ava rehii oquerēhisave ité osendu Jesús ñehe yuvireco.

*Jesús oicua uca Moisés porocuita rese oporombohe vahe recocuerai*

<sup>38</sup> Jesús aipo ehi oporombohesave: “Peicua catu Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo ãgua ocar rupi omboeteisa pipe yuvireco.

<sup>39</sup> Oseca avei tenda porañete catu vahe güenara otūparo pipe yuvireco yepi, iyavei carusave tenda aviye catu vahesave oguapi yuvireco yepi no.

<sup>40</sup> Iyavei cuña imer mano vahecuer rêta virocua-rocuã tēi ichui. Oarondaguã tēi avei oyeroku pucu-pucu yuvireco. Ahe rumo oipisira Tūpa ñemoirosa ipīrata catu vahe yuvireco curi” ehi.

*Cuña imer mano vahecuer porerecosa*

<sup>41</sup> Ñepei ari Jesús oguapi oĩ porerecosa riru rovai ava repia ãgua mara ehi oporerecosa imondo ipipe yuvireco. Aheve setá mbahe yar omondoño ité guarepochi yuvireco.

<sup>42</sup> Ahe pīpeve oyepota cuña imer mano vahecuer iparaisu vahe. Ahe avei omondo ñuviriomi guarepochi oporerecosa ipipe.

<sup>43</sup> Evocoyase Jesús oñehe güemimbohe upe aipo ehi:

—Supi eté che aipo ahe pēu: co cuña imer mano vahecuer iparaisu vahe setá catu guarepochi oporerecosa omondo ambuae ava eta sui co guarepochi riru pīpe.

<sup>44</sup> Ambuae ava eta rumo oguarepochi rumbirermi tēi omondo oporereco ãgua yuvireco; co cuña rumo oparaisusa pīpe opa ité omondo oguarepochi —ehi güemimbohe upe.

## 13

*“Imondurusara tūparo guasu” ehi Jesús*

<sup>1</sup> Jesús osēse tūparo guasu pīpe sui, ahese ñepei semimbohe aipo ehi chupe:

—Ore mbohesar, jesepia oi ita imopuhapri, icatupri ai! —ehi.

<sup>2</sup> Jesús rumo omboyevī chupe:

—¿Pesepia co oi tuvichá vahe ité? Ndipoi chietera rumo que ñepei ita oyeha vite vahe; opacatu ité imondurusara curi —ehi.

*Cañi renonde mbahe oime vaherã*

<sup>3</sup> Evocoyase Jesús yuviraso ivitri Olivo ve, ahe ivitri tūparo guasu rovai tupri. Aheve Jesús oguapise oñ, Pedro, Santiago, Juan iyavei Andrés oporandu co cotimi mbahe rese yuvireco chupe:

<sup>4</sup> “¿Mbahese vo aipo mbahe yaviyera? ¿Mbahe poromondiisa rese rane vo icuasara?” ehi.

<sup>5</sup> Jesús rumo omboyevī chupe: “Peicua catu, peyembopa ucai rene ambuae ava upe.

<sup>6</sup> Esepia, setá ava yugüerura, ‘Che niha Poropĩsirosar aico’ ehi tēira ava eta mbopa yuvireco.

<sup>7</sup> “Pesenduse rumo ñehesa vavasa resendar cohava, iyavei que rupi, ndapeyembosiquiyei chietera. Esepia niha, ãgüe ehi rane itera; ndehi vitei chira rumo ari cañi.

<sup>8</sup> Esepia, ñepei ivi pīpendar ovavara ambuae ivi pīpendar rese oyeupe yuvireco; iyavei oimera ivi rirī opacatu-catu tēi tecua rupi, tiavor avei. Co rumo omboipī ramomira mbahe tēi porarasa.

<sup>9</sup> “Peñearo catu. Esepia, pe rerasora mborerecuar rovai yuvireco, iyavei pe nupara tūparove yuvireco. Pe reraso aveira mborerecuareta rovai, iyavei mborerecuar ivate catu vahe rovai che recocuer sui tēi yuvireco. Ëgüe peyera peñehe che recocuer rese chupe.

<sup>10</sup> Cañi renonde rumo co ñehesa pĩsirosa resendar opacatu rane ité ava upe icua ucasara ivi rupi.

<sup>11</sup> Iyavei, ‘¿Mbahe pīha amombehura chupe?’ ndapeyei chira pe mondose mborerecuar rovai yuvireco. Aheve voi eté omboyecuara Tūpa pe ñehe ãgua pēu. Esepia, ndahei chira peyesui tēi peñehe, Espiritu Santo ité oñehera.

<sup>12</sup> Ipare rumo ava omondoñora vivri yamotarēhisar upe ‘toyuca yuvireco’ oya. Ëgüe ehi aveira ava guahir upe; tahir avei oyamotarēhiñora oyesupa yuca uca ãgua yuvireco che recocuer rese.

<sup>13</sup> Opacatu avei ava ndape ambotai chira che recocuer sui tēi yuvireco. Acoi ava oyemoviracua vaheño rumo ari ipa vahe rupi, ahe ipĩsiropri yuvirecoira.

<sup>14</sup> “Tūparo guasu maranehi pīpe pesepiase mbahe-mbahe tēi aposa —acoi oyeruqui vahe, ahe tosenducua tupri yuvireco—, evocoyase acoi yuvirecoi vahe ivi Judea rupi, toñemipa poyava ivitri rese yuvireco.

<sup>15</sup> Acoi güēta harive secoi vahe, ahe ari toique iri eme güētave mbahe renose ãgua.

<sup>16</sup> Acoi que rupi tēi secoi vahe, toyevī eme avei güētave oyeaosa renose ãgua.

<sup>17</sup> ¡Iparaisu itera cuña ipuruha vahe ahe ari pīpe, imembi pītani vahe avei!

18 Peporandu Tūpa upe, toime eme co nungar mbahe sōhisa vahe pipe pēu.

19 Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui; ipare ndipo iri chietera evocoi nungar.

20 Iyavei yande Yar nomombituhuse ari naporai vahe, ndipoi chietera oñepisiro vahe yuvireco viña; ahe rumo güembiporavo raisusa pipe omombituhura.

21 “Que oimese aipo ehi vahe: ‘Esepia, co Poropisrosar secoi’ ehi, anise, ‘Peve secoi’ ehise yuvireco pēu, aní chira peroya aipo ehi vahe.

22 Esepia, yugüerura ava, ‘Che Poropisrosar aico’ ehi tēi vahe, iyavei, ‘Che amombehu vahe Tūpa Ñehengagüer’ ehi angahu tēi vahe, iyavei oyapora mbahe ava ndoyapoi vahe poromondiisa güeco pīratasa mboyecua āgua yuvireco. Aviyeteramo ombopa aveira ava Tūpa reroyasar.

23 ¡Peicua catura! opa aipo co senondeve amombehu pēu” ehi.

### *Mara ehira Tūpa Rahir oyevise*

24 “Ahe ari pipe rumo co mbahe-mbahe tēi pare ndoyecua iri chira ari, yasi avei ndosesape iri chira,

25 yasitata avei opara oviapi iva sui, iyavei iva resendar mbahe oririira yuvireco.

26 Ahese che, Ava Riquehir, iva quiha rese ayecua itera vitu che pīratasa pipe che rendigüer porañetesa pipe avei.

27 Ipare amboura che rembiguai eta iva pendar. Ahe evocoyase omonuhara opacatu ivi rupindar che rembiporavo yuvireco, que amombri rupi yuvirecoi vahe, que iva rese yuvirecoi vahe avei.

28 “Peyembohera ivira higuera recocuer sui: co ivira soqui ramose, yaicua cōimi ari sacu vahe yepota āgua yandeu yepi.

29 Na ehi aveira niha pēu che ñehhe rupi tupri mbahe pesepiase. Sese peicuara che, Ava Riquehir, cōimi eté che yevi āgua.

30 Supi eté yuvirecove vitera ava osepia vahe, co mbahe opase yaviye.

31 Iva, ivi opara ocañi; che ñehengagüer rumo imboaviyesa rane itera.

32 “Ndipoi eté rumo ava oicua vahe ari iyavei hora che yevi āgua yuvireco, che Ru rembiguai iva pendar avei ndoicuai yuvireco, che avei ndaicuai eté. Che Ru güeraño ité rumo oicua.

33 “Sese niha pemahemohara yepi, che rārora peye. Esepia niha, ndicuasai che yevi āgua.

34 Inungar que mbia amombri oso pota āgua renonde, güembiguai oseyapa güeta rāro āgua, omondo avei ñepeipei upe iporaviqui āgua, iyavei omondo güeta roquendipi rāro āgua.

35 Pe evocoyase pemahemohara. Esepia, ndapeicuai marase che oi yar ayevira pēu, aviyeteramo pītu ramose, pītu mbiter, tacura ñehese, anise añihivei.

36 Ndaipotai pemahemohaēhiseve tēi ayevira.

37 Che aipo ahe pēu, opacatu upe avei: ¡Pemahemohaño ité yepi!” ehi güemimbohe eta upe.

## 14

### *Oyemomborandu Jesús yuca āgua rese yuvireco*

1 Ipare ñuvirio ari judío Pascua pieta āgua ipane, ahe pieta pipe yuvirohu pan ndayapepoi vahe yepi, pahi rerecuareta, Moisés porocuita rese oporombohe vahe avei oyemomborandu: “¿Mara yahera Jesús mbopa ipisi yuca āgua?” ehi yuvireco.

2 Ambuae rumo aipo ehi yuvireco:

—Ndiyai pieta pipe ité yaipisi ava rehi yemondiēhi āgua yandeu —ehi.

### *Cuña Jesús rese mbahe siacua vahe oipiyere*

<sup>3</sup> Ahese Jesús secoi Betania ve Simón lepra vireco vahecuer rētave. Aheve mesave chiniseve, cuña güeru mbahe sñacua vahe siru reseve sepí iteanga vahe. Ahe osovapisa rerocua, ipare oipiyere Jesús ãca rese.

<sup>4</sup> Ambuae ava aheve yuvinoi vahe rumo oñemoiro tēi aipo ehi yuvireco oyeupe:

—¿Mahera vo co omocañi tēi mbahe sñacua vahe?

<sup>5</sup> Omondo vahe ité tie co tresciento arí rupindar mboraviqui reprü rupi ava iparaisu vahe pñivii ãgua viña —ehi yuvireco.

Omañeco tēi avei ahe cuña yuvireco.

<sup>6</sup> Jesús rumo aipo ehi ahe ava upe:

—Teheni, ãgüe tehiño, ¿mahera vo pemañeco tēi? Co mbahe oyapo vahe rumo cheu aviye ité.

<sup>7</sup> Ava iparaisu vahe niha yuvirecoiño itera pe pñhuve, iyavei peyapoño itera mbahe aviye vahe peyapo potase chupe; che rumo ãgüe ndahe viteñoi chira vichico pe pñhuve.

<sup>8</sup> Iyavei co cuña oyapo mbahe ocatugüer rupi; opa voi omoiacua che rete che manoñhi viteseve.

<sup>9</sup> Supi eté aipo ahe pñu: ñehesa pñirosa resendar mombehuse opacatu tecua rupi, imombehusa aveira co cuña rembiapo sese mahenduha ãgua —ehi.

### *Judas oyemoingatu Jesús mondo ãgua yamotarẽhimbar upe*

<sup>10</sup> Evocoyase Judas Iscariote, semimbohe doce vahe pñhu pendar, oso pahi eta rerecuar upe imoñeta Jesús mondo ãgua.

<sup>11</sup> Senduse, oyemboviharete: “Yamondo guarepochi chupe” ehi voi eté yuvireco. Evocoyase Judas oseca voi Jesús mondo ãgua yamotarẽhimbar upe.

### *Jesús caru agüer ipa vahe güemimbohe rese*

<sup>12</sup> Yipindar arí pan ndayapepoi vahe husa pipe, ahese avei ovesa Pascua resendar yucapri seropovñehesa yepi, ahe arí pipe semimbohe oporandu Jesús upe yuvireco:

—¿Que vo ereipota oromoingatura carusa Pascua pieta resendar yandeu? —ehi.

<sup>13</sup> Aipo oyeupe hese, omondo ñuvirío güemimbohe, aipo ehi chupe:

—Peso tecuave. Aheve pesepiara mbia vireco vahe cambuchi pipe i. Supi pesora,

<sup>14</sup> seiquesave aipo peyera sēta vahe upe: ‘Ore mbohesar oporandu: ¿Uma oi pipe vo Pascua pieta resendar orohura che remimbohe reseve? ehi’ peyera.

<sup>15</sup> Evocoyase ahe omboyecuara oi guasu ivatendar imoingatupri pñu. Aheve pemoin-gatu mbahe yahu vaheñā —ehi güemimbohe upe.

<sup>16</sup> Evocoyase semimbohe yuviraso tecuave. Aheve semimombehu rupi tupri osepiā mbahe yuvireco. Ichui omoingatu carusa Pascua pieta resendar yuvireco.

<sup>17</sup> Pñtu ramomise, Jesús doce güemimbohe rese aheve oyepota yuviraso.

<sup>18</sup> Iyavei ocaruse ité mesave yuvinoi, güemimbohe upe aipo ehi:

—Supi eté aipo ahe pñu: ñepei pe pñhu pendar yande pñri ocaru vahe che mondora che amotarẽhimbar upe —ehi.

<sup>19</sup> Evocoyase semimbohe ndoyembovihai tēi yuvireco, iyavei oporandu-randu tēi ñepei-pei chupe yuvireco:

—¿Che pñha? —ehi yuvireco.

<sup>20</sup> Omboyevi rumo güemimbohe upe:

—Ñepei eté pe pñhu pendar ahe co omoaqui pan che caro pipe.

<sup>21</sup> Supi eté che, Ava Riquehir, amboaviyera icuachiapri; iparaisu catura rumo acoi mbia che mondosa! Aviye catura ahe mbia ndoyesuisse viña —ehi.

<sup>22</sup> Yuvirocaru viteseve, Jesús oipisi pan, “Aviye ndeu” ehi Vu upe. Aipo ohe pare, ombohi-mbohi imondo güemimbohe upe aipo ehi:

—Peipisi; co che rete —ehi.

<sup>23</sup> Ipare oipisi igua riru, “Aviye ndeu” ehi Vu upe. Aipo ohe pare omondo güemimbohe upe, ipare opacatu yuviroihu.

<sup>24</sup> Ahese aipo ehi:

—Co che ruvi, ahe che Ru remimbotar ipiasu vahe pëu nara. Oyepiyerera ava rehi recocuer rese nara.

<sup>25</sup> Supi eté aipo ahe pëu: ndaihu iri chietera uva ricuer cheu ari oyepotase voi che Ru Tüpa mborerecuasave aihura uva ricuer ipiasu vahe —ehi.

*“Pedro, ‘Ndaicuai vahe evocoi mbia’ erera cheu” ehi Jesús Pedro upe*

<sup>26</sup> Osapucaire, opa yuviraso ivitri Olivo ve.

<sup>27</sup> Ahese Jesús aipo ehi:

—Opara pemocañi che rese yeroyasa peyesui. Esepia, acoi icuachiapri pipe aipo ehi: ‘Ayucara ovesa rãrosar, ahese oñemosai tẽira ovesa opacatu rupi yuvireco’ ehi.

<sup>28</sup> Che cuerayevire rumo aso voi etera pe renonera Galilea ve —ehi.

<sup>29</sup> Evocoyase Pedro aipo ehi chupe:

—Yepe ambuae opacatu nande reroya iri chira yuvireco, che rumo ãgüe ndahei chietera —ehi.

<sup>30</sup> Aipo ehi rumo Pedro upe:

—Che rumo supi eté aipo ahe ndeu: co pĩtu pipeve voi eté tacura ñehe yupagüe renondeve, “Ndaicuai vahe evocoi mbia” erera mbosapi oyupagüer rupi cheu —ehi.

<sup>31</sup> Ahe rumo,

—Yepe che amano tẽira nde rupi viña, che rumo, “Ndaicuai vahe evocoi mbia” ndahei chietera —ehi-ehi catuño ité chupe.

Ambuae opacatu aipo ehi tupri tẽi avei yuvireco chupe.

*Jesús oyerogui Getsemaní ve*

<sup>32</sup> Ipare yuviraso Getsemaní ve yuvireco. Aheve Jesús aipo ehi güemimbohe upe:

—Peguapi cohove, che aso ranera ayeroqui peve —ehi.

<sup>33</sup> Aheve viraso Pedro, Santiago, Juan oyeupi. Ahese ndoyepihambovıhai eté oico

<sup>34</sup> aipo ehi:

—Che cüritei ndavıhai eté. Esepia, che hã oyandu ité manosa. Pepita rane cohove, iyavei pemahemohara pe yeroqui pipe —ehi güemimbohe viraso vahe upe.

<sup>35</sup> Evocoyase oso tenonde catumi. Aheve oyavi ivi rese oso, oporandu Tüpa upe mbahe tasi vahe reimeñhi ãgua oyeupe.

<sup>36</sup> Oyerogui pipe aipo ehi: “Che Ru, che rembiaısu, ndeu niha mbahe ndayavai vahe ité: che renose co mbahe-mbahe tẽi sui eve; tayapo eme che remimbotar tẽi, nde remimbotar rupi catu tayapo” ehi.

<sup>37</sup> Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—Simón, ¿ereque? ¿Ndereñemosai eté vo que ñepeı hora nde ropesıı upe?

<sup>38</sup> Pemahemoha, peyerogui mbahe tẽi pipe pe viapiñhi ãgua. Pe niha pequerẽhi ité viña, pe retocuer tẽi rumo nipirataı pëu —ehi.

<sup>39</sup> Ichui oso iri oyerogui, aipo ehi tupri avei oñehe.

<sup>40</sup> Ipare oyevisı, osesapiha iri iquesıve tẽi aveı. Esepia, sopesıı nomboyeroyai eté yuvireco, ahese ndoicatui eté iñehe mboyevi yuvireco.

<sup>41</sup> Imombosapısa rupi oso irise aipo ehi chupe:

—ıPequeño vite vo peyu! Aviye revo peque. Osupiti ité che, Ava Rıquehir, mondo ãgua ava yangaıpa vahe povrıve.

<sup>42</sup> Pepũha, yaso. Esepia, cõimi eté che amotarẽhisar upe che mondo vaherã secoı —ehi.

*Jesús ipısa*

<sup>43</sup> Jesús oñehe vitesese ohã, Judas oyepota oso chupe, ahe doce pãhu pendar semimbohe, iyavei setá ava yugüeru quise pucu, ivira reseve-seve supi. Ahe pahi eta rerecuar, Moisés porocuita rese oporombohe vahe, judío rerecuareta porocuita rupi oyapo yuvireco.

<sup>44</sup> Yipindar rumo imondosar Judas aipo ehi: “Asovaupite vahe rese peicuara. Ahe peipisi tupri itera seraso” ehi.

<sup>45</sup> Oyepotase Jesús upe, oyemboya voi oso sese aipo ehi chupe:

—¡Porombohesar! —ehi sovaupite.

<sup>46</sup> Ahese oipisi Jesús yuvireco.

<sup>47</sup> Semimbohe secoi vahe supi ovínose oquise pucu. Ipipe oyasia pahi rerecuar ivate catu vahe rembiguai nambi.

<sup>48</sup> Ahese Jesús aipo ehi ava upe:

—Pe quise pucu, ivira reseve-seve rutei co peyu che ropeña che pisi ãgua. Imonda rai vahe nungar che rereco peye.

<sup>49</sup> Ari yacatu rupi niha pe pãhuve aporombohese tũparove vichico, na ndapeyei eté cheu. Co rumo ãgüe peye icuachiapri mboaviye ãgua cute —ehi.

<sup>50</sup> Ahese semimbohe oñemosaipe oseyá Jesús ahe ae tupri imoha yuvireco.

<sup>51</sup> Mbia chñihave rumo turucuar pipe güerañomi oñemama vahe supive secoi viña;

<sup>52</sup> ahe avei oipisi yuvireco. Oipoequiño rumo oturucuar reya oso nani tupri.

### *Jesús serasosa pahi rerecuar ivate catu vahe rovai*

<sup>53</sup> Evocoyase Jesús vïraso pahi rerecuar ivate catu vahe rovai yuvireco. Aheve oñemonuha pahi eta rerecuar, judío rerecuar, Moisés porocuita rese oporombohe vahe avei no.

<sup>54</sup> Pedro avei amombri rupive tẽi oi que ité oso pahi rerecuar ivate catu vahe rẽta ãchisa pipe. Aheve oguapiño mbia sundao pãhuve tata ipive oyephe oĩ.

<sup>55</sup> Pahi eta rerecuar rumo iyavei opacatu porandusa ivate catu vahe pendar oseca-seca tẽi ava oñehe-ñehe tẽi vahe rã Jesús rese yamotarẽhisave yuca uca ãgua yuvireco; ndoicatui eté rumo yuvireco.

<sup>56</sup> Iyavei setá iteanga tẽi semira yuvireco sese; oyeecopi-copi tẽi rumo güemira pipe.

<sup>57</sup> Amove aipo ehi tẽi yuvireco seco momara ãgua:

<sup>58</sup> —Ore orosendu iñehe aipo ehise: ‘Che opara amonduru co tũparo ava tẽi rembiapo. Ipare rumo mbosapi ari rupi opara amopuha. Ndahe iri chira evocoyase ava tẽi rembiapo’ ehi —ehi tẽi yuvireco chupe.

<sup>59</sup> Ndahoyoyai rumo ambuae imombehusa rese.

<sup>60</sup> Ahese pahi rerecuar ivate catu vahe opũha oporandu Jesús upe:

—¿Nderemboyevei chira vo iñehe yuvireco chupe? ¿Mbahe vo aipo nde amotarẽhimbar oñehe nde rese? —ehi chupe.

<sup>61</sup> Noñeheiño ité rumo chupe. Pahi rerecuar ivate catu vahe rumo oporandu iri chupe:

—¿Poropĩsirosar ité vo nde ereico, Tũpa imboeteipri Rahir? —ehi.

<sup>62</sup> —Taa, ahe ité niha che aico. Pe niha che repiara peye che, Ava Riquehir, aguapise che Ru mbahe mboavaisarẽhi acato coti; ayevise avei iva quiha rese curi —ehi chupe.

<sup>63</sup> Evocoyase pahi rerecuar ivate catu vahe omondo oturucuar aipo ehi:

—¿Mbahe iri vo yande yaipota vite yaico?

<sup>64</sup> Yasendupa niha aipo Tũpa upe iñehe-ñehe tẽisa, ¿mara ehi aipo evocoyase pe pihave? —ehi.

Ipare opacatu guasu ava, “¡Tomanoño ité!” ehi yuvireco chupe.

<sup>65</sup> Ahese amove ava ondivi-ndivi sese iyavei osesacua, ipare yuvirocua-rocua sese aipo ehi yuvireco:

—¡Eicua ité ru, ava evocoi ocua nde rese! —ehi-ehi yuvireco chupe.

Sundao tũparo rãrosar avei osovapete-pete yuvireco.



*Pedro, “Ndaicuai vahe evocoi mbia” ehi Jesús upe*

<sup>66</sup> Pedro ivive ñachimbri pipe secoi. Aheve cuña oyepota ou pahi mborerecuar ivate catu vahe rembiguai chupe.

<sup>67</sup> Osepiase Pedro iyepese tata ipive, omahengatu ohã sese aipo ehi chupe:

—Nde avei acoi Jesús Nazaret pendar rupindar ereico —ehi.

<sup>68</sup> Ahe rumo aipo ehiño:

—Ndaicuai vahe ité rumo aipo mbia; ndaicuai avei aipo nde ñehesa —ehiño chupe.

Ichui osese oquendipive ohã, ahese oñehe tacura.

<sup>69</sup> Omahe irise co cuña mbiguai sese, ahe aipo ehi ahe pendar ava yuvirecoi vahe upe:

—Co ava niha supindar ité —ehi.

<sup>70</sup> Pedro rumo, “Ndahei eté che” ehiño. Iparemi tēi ambuae ava aheve yuvirecoi vahe aipo ehi iri yuvireco chupe:

—Nde ité niha supindar ereico. Esepia, nde Galilea iguar ité ereico —ehi chupe.

<sup>71</sup> Pedro evocoyase,

—¡Tũpa niha oicua, ndopombopai eté niha aipo, ndaicuai eté aipo mbia pe ñehesa! —ehi.

<sup>72</sup> Aipo iheseve, tacura oñehe imoñuviriosa rupi. Ahese Pedro oyemomahenduha, “Tacura ñehe yupagüesa renondeve, mbosapi oyupagüer rupi, ‘Ndaicuai vahe evocoi mbia’ erera cheu” ihe agüer rese. Sese oyasehó iteanga.

## 15

*Jesús serasosa Pilato rovai*

<sup>1</sup> Cõhe potase, pahi eta rerecuar, judío rerecuar, Moisés porocuaita rese oporombohe vahe iyavei opacatu ava porandusa ivate catu vahe pendar oñemonuha yuvireco. Ipare oipocua-pocua Jesús seraso Pilato upe yuvireco.

<sup>2</sup> Pilato aheve oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, “Ahe ereico” ere cheu —ehi.

<sup>3</sup> Pahi eta rerecuar rumo omombehu-mbehu tēi mbahe sembiaviēhi yuvireco chupe.

<sup>4</sup> Evocoyase Pilato oporandu iri chupe aipo ehi:

—¿Mahera vo ndereñehi eté? Esepia, setá mbahe nde rembiavi omombehu yuvireco —ehi.

<sup>5</sup> Nomboyevii eté rumo Pilato upe. Evocoyase, “¿Mara ehi rutei pñha?” ehi tēi.

*“¡Tayaticasa!” ehi ava Jesús upe yuvireco*

<sup>6</sup> Mborerecuar guasu recosa ité ñepeí ava soquendapri renose ãgua Pascua pieta pipe ava rehii porandusa rupi yepi.

<sup>7</sup> Mbia Barrabás serer vahe, ahe pipeve avei soquendasa yuvireco ambuae oporapichi vahe reseve.

<sup>8</sup> Ava yugüeru Pilato upe ‘tayaposa pieta pipe yaposa vahe yepi’ oyapave yuvireco.

<sup>9</sup> Pilato rumo aipo ehi:

—¿Peipota amose vaheñã judío rerecuar? —ehi.

<sup>10</sup> Esepia, Pilato oicuaño ité ava rese yemoecatēhisa pipe sui pahi eta rerecuar remimondo secoise.

<sup>11</sup> Pahi eta rerecuar rumo ‘Barrabás tosē’ ombohe ati-ati uca ava yuvireco.

<sup>12</sup> Evocoyase Pilato oporandu ahe ava upe:

—¿Mbahe vo peipota ayapora co mbia chupe acoi, ‘Judío rerecuar’ peye vahe rese? —ehi.

<sup>13</sup> Ahe rumo omboyevi Pilato upe:

—¡Tayaticasa curusu rese! —ehi ati-atiño yuvireco.

<sup>14</sup> Pilato rumo aipo ehi ava upe:

—¿Mbahe ité vo oyapo naporai vahe? —ehi.

Ahe rumo,

—¡Tayaticasa ité curusu rese! —ehi ati-ati iriño yuvireco.

<sup>15</sup> Evocoiyase Pilato, mbahe tupri opita água ava rese, omose uca Barrabás. Ipare oinupá iteanga uca Jesús tucumbo tupeicha nungar pipe, imondo curusu rese yatica água.

<sup>16</sup> Ahese sundao viraso mborerecuar rêta sui ambuae oi pipe, aheve opacatu omboetasa omonuha yuvireco.

<sup>17</sup> Aheve omboyemonde turucuar pĩraumbi vahe pipe yuvireco, ipare yu piapri omunde ñaca rese.

<sup>18</sup> Sãse avei yuvireco:

—¡Imboeteipri judío rerecuar tasecoi! —ehi angahu yuvireco chupe.

<sup>19</sup> Iyavei yuvirocua-rocua ivira pipe ñaca rupi yuvireco sese, ondivi-ndivi avei oñenopiha-piha avei sovai yuvireco imboeteisave angahu.

<sup>20</sup> Mara-mara tẽi sereco pare, ovirocua iturucuar pĩraumbi vahe yuvireco ichui, ahese omunde iturucuar ité yuvireco sese. Ichui vinose ocarve yatica água yuvireco.

### *Jesús yaticasa curusu rese*

<sup>21</sup> Ñepe mbia Simón serer vahe Cirene pendar, Alejandro, Rufo yesupa, ahe pipe avei oyepota chupe que co coti rupi sui ou. Oñocua potase ocua viña: “Erio, terevosii curusu co Jesús vireco vahe rese” ehi voiño tẽi yuvireco chupe.

<sup>22</sup> Jesús oviraso Gólgota serer vahesave yuvireco (‘Ava Ñca Cangüer’ oyapave aipo ehi).

<sup>23</sup> Iyavei uva ricuer oyeseha vahe mirra rese omondo tẽi yuvireco chupe. Ahe rumo ndoihui eté.

<sup>24</sup> Evocoiyase oyatica yuvireco. Ipare sundao iguayĩño Jesús turucuar rese ‘¿uma pĩha virasora oyeupe’ oyapave yuvireco.

<sup>25</sup> Ahe oyatica añihivei la nueve rupi yuvireco.

<sup>26</sup> Curusu rese rumo omombehu mbahe sui oyuca yuvireco: “Judío rerecuar guasu” ehi icuachiapri oĩ.

<sup>27</sup> Supive avei yaticasa ñuvirío imonda rai vahe ñepe mbahe rese ipocosa coti, ambuae mbahe rese ipocoẽhisa coti.

<sup>28</sup> Ëgüe ehi imboaviye icuachiapri aipo ehi vahe: “Ava mbahe-mbahe tẽi aposar nungar ipãhuve serecosa” ehi.

<sup>29</sup> Acoi ava ñocuasar iñehe-ñehe tẽi, oñeaca mbovava aipo ehi yuvireco chupe:

—Nde acoi, “Opara tũparo amonduru. Ipare mbosapi ari rupi opa irira amopuha” ere acoi cuese.

<sup>30</sup> ¡Eñepisiro ru nde ae cute; egüeyi curusu sui! —ehi yuvireco chupe.

<sup>31</sup> Ëgüe ehi avei pahi eta rerecuar, oporombohe vahe avei Moisés porocuita rese iñehe mara-mara tẽi yuvireco chupe, aipo ehi yuvireco oyeupe:

—Oipisiro ambuae. Ahe ae rumo ndoicatu oñepisiro.

<sup>32</sup> ¡Poropisirosar Israel rerecuar guasu, toyeeroyi ahe ae curusu sui cũritei, ahese voi seroyasara —ehi.

Iyavei supive yaticapri mara ehi-ehi tẽi avei chupe.

### *Jesús mano agüer*

<sup>33</sup> Osupitise rumo mbiter ari, opa tupri pĩtu ivi rupi. Ëgüe ehi las tres rupi.

<sup>34</sup> Ahese tupri avei Jesús oñehe pĩrata aipo ehi: “Eloi, Eloi, ¿lema sabactani?” ehi, (ahe ‘che Ru Tũpa, che Ru Tũpa, ¿mahera vo che reya eve?’ oyapave aipo ehi).

<sup>35</sup> Aheve ava yuvirecoi vahe rumo osenduse iñehe, aipo ehi yuvireco:

—Pesendu aipo Tũpa ñehe mombehusar Elías upe oñehe —ehi yuvireco chupe.

<sup>36</sup> Evocoiyase ñepei imboetasa oña oso mbahe saviyu vahe reca. Ahe omoaqui vinagre pipe imondo ivira apri rese chupe 'toihu' oya:

—Ĕgüe tehiño rane, ¿oura pñha Elías seroyi ñgua curusu sui? —ehi.

<sup>37</sup> Ahese Jesús sãse pñrata. Ipare omano.

<sup>38</sup> Aheseve tũparo asiasa turucuar ivate coti sui ovo tupri.

<sup>39</sup> Iyavei sundao rereciar Roma iguar, ahe Jesús rehögüer rese omahengatu ohã. Osenduse Jesús rãse iyavei osepiase imano, aipo ehi:

—Supi eté catu, co mbia Tũpa Rahir ité —ehi.

<sup>40</sup> Iyavei cuña aheve amombrive osepia catu yuvinoha; ahe yuvirecoi María Magdalena, José si María, ahe avei Santiago chñivahe catu vahe si iyavei ambuae cuña Salomé.

<sup>41</sup> Co cuña eta yuvirecoiño vahe ité Jesús rupi, oipñivi vahe avei Galilea ve yuvirecoise. Setá avei ambuae ava supi yugüeru vahe Jerusalén ve yuvirecoi.

### *Jesús apocatu agüer tuvipa pipe*

<sup>42</sup> Pñtu ramosé, ahe ari pipe oyemoingatu ava yuvireco ari mbñtuhusa upe nara yepi,

<sup>43</sup> ahese José, tecua Arimatea pendar, porandusa ivate catu vahe pendar, acoi Tũpa mborerecuasa osãro vahe oico, oquerñhisa pipe ité oi que oso Pilato upe oporandu ñgua Jesús rehögüer rese.

<sup>44</sup> Pilato rumo oyepñhamondi tñi, "Omano" hese. Oñhe sundao rereciar upe oporandu ñgua '¿marase vo ñgüe ehi?'

<sup>45</sup> Sundao rereciar omombehuse chupe, ahese omondo sehögüer José upe.

<sup>46</sup> Evocoiyase José virocu turucuar secose vahe. Curusu sui seroyi pare, oimama voi eté ipipe. Ipare omoingue tuvipa ita yohopri pipe. Ichui ita yapayere vahe pipe osovapi.

<sup>47</sup> María Magdalena iyavei María, José si, osepiño yapocatuse yuvireco.

## 16

### *Jesús ocuerayevi*

<sup>1</sup> Mbñtuhusa ari pare, María Magdalena, María, Santiago si, Salomé avei, ahe virocu mbahe siacua vahe Jesús rehögüer rese nara yuvireco.

<sup>2</sup> Iyavei añihiveive, yipñdar ari semana pipe, oyepota Jesús ruvipave icatu ramosé yuviraso.

<sup>3</sup> Aheve aipo ehi oyeupe yuvireco:

—¿Ava pñha co tehögüer rovapisa virocuara yuvireco yandeu? —ehi.

<sup>4</sup> Osepiase rumo ita guasu yuvireco, ndahe irise güendave ihñi,

<sup>5</sup> yuviroiquese tehögüer ruvipave yuvireco, aheve osepia ombahe rese pocosa coti mbia chñivahe, iturucuar pucu morochi vahe oguapise oñ. Ahese cuña oyembosiquiye yuvireco.

<sup>6</sup> Ahe rumo aipo ehi chupe:

—Pesiquiye eme. Pe peseca Jesús Nazaret pendar, yaticapri. Ahe rumo ocuerayevi; ndipoi eté cohave. Pesepia ru supagüer.

<sup>7</sup> Peso, tapemombehu semimbohe eta upe iyavei pemombehu Pedro upe: 'Jesús rane osora pe renonera Galilea ve. Aheve pesepiara mbahe che remimombehu rupi tupri' peyera —ehi.

<sup>8</sup> Evocoiyase ahe cuña yuvinosese tuvipa sui, yuvinoña yuviraso, orñri avei osiquiyepave. Iyavei nomombehui eté ambuae ava upe osiquiyepave yuvireco.

### *Jesús oyemboyecua María Magdalena upe*

<sup>9</sup> Jesús ocuerayevire añihiveive domingu pipe, oyemboyecua yipñdar María Magdalena upe, ahe ichui acoi siete tupri caruguar opa omboyepipi.

<sup>10</sup> Ahe oso imombehu supindar upe. Ahe rumo oyaseho vite ovñharñhisave yuvireco.

11 Osenduse cuña ñehe: “Jesús ocuerayevi, che ité asepia” ehise, ndoviroyai eté yuvireco.

*Jesús oyemboyecua ñuvirío güemimbohe upe*

12 Ipare Jesús oyemboyecua iri ñuvirío güemimbohe upe ambuae güepiaca pipe peri rupi.

13 Ahe avei yuviraso omboetasa upe imombehu; ndoviroya viteiño avei rumo yuvireco.

*Jesús oyocuai güemimbohe*

14 Coiye catumi tēi, Jesús oyemboyecua güemimbohe once tupri yuvirecoi vahe upe mesave yuvinoi viteseve, oñhengata ahe oyese yeroyaēhisa rese chupe, iyavei ocuerayevisa mombehusar reroyaēhi rese avei.

15 Ipare aipo ehi güemimbohe upe: “Peso opacatu ivi rupi, pemombehu co ñehesa pĩsirosa resendar peico.

16 Acoi viroya vahe, iyavei oñeapiramo vahe, ahe oñepisirora yuvireco; acoi ndoviroyai vahe rumo, ahe imocañipirã tēi yuvirecoira.

17 Co mbahe poromondiisa omboyecua che reroyasar yuvireco: Che rer pipe omboyepipira caruguar ava sui. Oñehe aveira ñehesa ndicuasai vahe pipe yuvireco.

18 Oipisi aveira mboi yuvireco, yuviroihuse mosa oporoyuca vahe, ndoyapoi chietera mbahe yuvireco chupe; iyavei omondose opo ava imbaheasi vahe harive, ombogüera aveira yuvireco” ehi.

*Jesús oso ivave*

19 Oñehe pare, yande Yar Jesús oso ivave. Aheve oguapi Vu Tũpa acato coti oĩ.

20 Semimbohe evocoyase opa yuviraso opacatu ivi rupi ñehesa pĩsirosa resendar mombehu. Yande Yar avei oipitivii, iyavei mbahe poromondiisa pipe omboyecua uca ité ñehesa pĩsirosa resendar supi eté vahe. Aipo rupive.

## LUCAS REMBICUACHIA JESUS RECOCUER RESENDAR SAN LUCAS

### *Lucas oicuachía Teófilo upe*

<sup>1-2</sup> Imboeteipri Teófilo, setá ava oicuachía yuvireco opacatu aracahendar mbahe imombehupri mboaviyesa cūritei yande pãhuve co Jesucristo recocuer resendar. Acoi ava yipisuive osepia vahe omombehu tupri vahe Jesucristo recocuer ava upe yuvireco, ahe omombehu tupri avei yuvireco cheu.

<sup>3</sup> Sese che avei opa aseca tupri yipisuive opacatu co mbahe cua tupri ãgua, Teófilo. Ichui che amoingatu tupri pota icuachiapri sesendar ndeu nara avei sereco.

<sup>4</sup> Evocoyase nde ereicua tupri co porombohesa supi eté vahe acoi nde mbohe agüer.

### *Tūpa rembiguai omombehu Juan Oporoãpiramo vahe ha ãgua*

<sup>5</sup> Yipindar Jesús ha renondeve, Herodes mborerecuar ivi Judea rupindar recose aracahe, ahese aipo judío pahí secoi Zacarías serer vahe. Ahe pahí Abías rupindar secoi. Sembireco aipo pahí Aarón suindar, ahe serer Isabel.

<sup>6</sup> Co ñuvirío secocuer aviye tupri Tūpa upe; viroya tupri opacatu Yar porocuita yuvireco. Evocoyase ndipoi eté que ava “mara” ehi vahe yuvireco chupe.

<sup>7</sup> Zacarías rumo yipisuive ndatahi vahe. Esepia, sembireco ndimembii vahe ité, iyavei oyoya ité ocuacua-cuacuami yuvireco.

<sup>8</sup> Ñepeí ari aipo osupiti icuaita tūparo pipe imboetasa reseve iporaviqui ãgua Tūpa rovaque yuvireco.

<sup>9</sup> Pahí recosa ité ãgüe ehi aracahe suive, ahese iporavosa Zacarías yipindar yasiapri tūparo maranehi pipe oi que vahe ãgüe itaisi rapí ãgua.

<sup>10</sup> Itaisi rapí viteseve aipo, opacatu ava oyerure yuvireco ocarve.

<sup>11</sup> Aheseve aipo oyemboyecua yande Yar rembiguai itaisi renda maranehi ique coti chupe.

<sup>12</sup> Tūpa rembiguai repiase aipo, oyembosiquiyé iteanga.

<sup>13</sup> Tūpa rembiguai rumo aipo ehiño chupe:

—Zacarías —ehi—, eresiquiye eme. Tūpa osendu nde yeruresa. Sese nde sembireco Isabel imembira ndeu. Ahe nde rahir rer-ra Juan.

<sup>14</sup> Ereviharetera sese, iyavei oyemboviharera opacatu ava yuvireco nde rahir ohase.

<sup>15</sup> Esepia niha, nde rahir secocuer tuvichara oico Tūpa rovaque. Ndoi hui chietera uva ricuer sai vahe, iyavei que ambuae mbahe sai vahe; secoira rumo Espíritu Santo rese ohaēhi viteseve.

<sup>16</sup> Ëgüe ehira omonguerēhi setá ava judío Yar Tūpa reroya iri ãgua oico.

<sup>17</sup> Ahe virecora espíritu piratasa oyese oyoyara Tūpa ñehe mombehusar Elías rese ‘ava guahir rese tiñero yuvireco oyeupe’ oya, ‘toyembohe avei ava ndiporeroyai vahe yuvireco seco catupri vahe aracuasa mboyeroya ãgua rese’ oyapave. Ëgüe ehira ava mbohe imoingatu yande Yar pisi ãgua sereco —ehi chupe.

<sup>18</sup> Evocoyase,

—¿Mara ahera pñha aipo reroya? Che rumo acuacuami eté vichico, iyavei che rembireco ocuacuami avei no —ehi Tūpa rembiguai upe.

<sup>19</sup> —Aní —ehi chupe—. Che aico Tūpa rembiguai Gabriel, Tūpa rovaindar. Ahe niha che mbou ndeu che ñehe ãgua iyavei co ñehesa aviye vahe mombehu ãgua.

<sup>20</sup> Nde rumo ndereroyai acoi amombehu vahe ndeu. Sese co pipe suive ité nandehengatui chira eico. Osupitise voi che remimombehugüer, acoi ohase nde rahir, ahese ramo ndehengatura —ehi aipo Tūpa rembiguai chupe.

21 Osãro pucu tēi aipo ocarve ambuae imboetasa eta yuvireco. “¿Mahera pīha nose vītei tūparo pipe sui?” ehi tēi yuvireco chupe.

22 Osēse aipo tūparo pipe sui, niñhengatui voi eté. “Ñaro osepia mbahe tūparo pipe” ehiño ité aipo imboetasa eta yuvireco chupe. Ipo āta-āta tēi aipo oñhengatuēhise mbahe mombehu oico.

23 Ipare omboaviyese ocuaita tūparo pipe, oyevi oso güētave.

24 Coiye aipo sembireco Isabel ipuruha oico. Judío porocuita mboyeroyasave nose iri eté ambuae ava pīri poyandepo yasi rupi. Ipihañemoñeta:

25 “Yar Tūpa ité ēgüe ehi cheu ava che rese ñeheēhi iri āgua yuvireco” ehi vorivetesave pipe aracahe.

### *Tūpa rembiguai Jesús yesu āgua omombehu*

26 Coiye seis yasi pipe Tūpa omondo güembiguai Gabriel tecua Nazaret ve ivi Galilea rupi

27 cuñatai ndaseco marai vahe upe iñehe āgua; ahe serer María. Ahe omenda pota vahe cuimbahe mborerecuar guasu David suindar José serer vahe rese.

28 Tūpa rembiguai oique co cuña rētave aipo ehi chupe:

—¡María, Tūpa nde rovasa, erereco mbahe icatupri vahe pītiviisa Yar Tūpa suindar! Tūpa nde rese ité secoi; nde rovasa catu opacatu cuña sui —ehi chupe.

29 Tūpa rembiguai repiase, “¿Mara oya pīha co aipo ehi cheu?” ehi tēi osiquiyepave opihañemoñeta rereco.

30 Evocoyase Tūpa rembiguai aipo ehi chupe:

—María, eresiquiye eme. Esepia niha, Tūpa ité nde poravo nde rovasa āgua.

31 Cūritei voira rumo ndemembira: ererectora nde membri; ahe serer-ra Jesús.

32 Ahe niha secouvicha catu vaherā secoira; “Tūpa seco ivate vahe Rahir secoi” ehira yuvireco chupe. Iyavei niha Yar Tūpa ité omoinguera mborerecuar guasu seco āgua inungar tamoi David aracahe.

33 Mborerecuar guasu secoira judío recua rupi apirēhi vaherā; imborerecuasa niha apirēhi vaherā ité secoira —ehi.

34 Evocoyase ahe aipo ehi:

—¿Mara ahera vo aipo che membri viña? Esepia niha, ndaico vītei vahe cuimbahe rese —ehi Tūpa rembiguai upe.

35 —Espíritu Santo ogüeyira nde harive iva quiha nungar; Tūpa güeco pīratasa pipe nde momembira. Sese acoi ohasa nde membri seco maranehi vahe, “Tūpa Rahir” hesara chupe.

36 Cūritei nde mu Isabel avei ocuacuami pipe imembí oico; ahe niha ndimembí vahe yipindar viña, cūritei rumo vireco seis yasi omembri vie pipe.

37 Esepia niha, Tūpa upe ndipoi eté mbahe yavai vahe —ehi.

38 Evocoyase María aipo ehi:

—Che Yar rembiguai aico, tayaviye ayase Tūpa remimbotar cheu nde ñehe rupi —ehi. Aipo ihe pare, Tūpa rembiguai oyepipi oso ichui.

### *María oso omu Isabel pīri*

39 Ahese María oso voi eté ivitri rupi tecua ivi Judea ve.

40 Aheve aipo Zacarías rēta pipe oiquese oso, oyapo “avirave” omu Isabel upe.

41 Evocoyase Isabel rie pipe omi imembri iñehe renduse. Ahese Espíritu Santo oique Isabel aviterve.

42 Ipare osapucái pīrata aipo ehi chupe vorivetesave:

—¡Tūpa nde rovasa cuña opacatu sui, iyavei osovasa nde membri!

43 Noromohai eté che pīri ereyu vaherā viña, che Yar si.

44 Esepia, cheu “avirave” ereyapose, che membri omi voi vorivetesave che rie pipe.

<sup>45</sup> ¡Sovasapri ereico! Esepia, ereroya ité ñehesa ndeundar. Iyavei Tũpa omboaviyera güemimombehu nde rese —ehi Isabel chupe.

<sup>46</sup> Evocoyase aipo ihese,

“Che niha amboetei che Yar vichico;

<sup>47</sup> cheroriveté Tũpa che Pĩsirosar rese.

<sup>48</sup> Esepia, ahe omahe che rese che reco yemominisa pipe seroyasar che recosave.

Co pipe suive, ‘Sovasapri secoi’ ehira opacatu ava yuvireco cheu.

<sup>49</sup> Esepia niha, Tũpa mbahe mboavaisarēhi, oyapo mbahe tuvichá vahe cheu.

¡Tũpa imboeteipri catu tasecoi yepi!

<sup>50</sup> Ahe oiparaisuereco opacatu omboeteisar yepi.

<sup>51</sup> Nomboavai eté mbahe yapo.

Osecoreroyi ava oyemboivate ai tēi vahe.

<sup>52</sup> Viroyi mborerecuar seco pĩrata vahe pĩratasa sui; ava seco mbegüemi vahe rumo osecomboivate.

<sup>53</sup> Ava yaracua pota vahe, omboaracua; ava ‘che aracua vai’ ehi vahe rumo, nomboaracuai eté.

<sup>54</sup> Oipitivi niha opacatu viroyasareta judío yuvirecoi vahe.

Esepia, ndasesarai eté poroparaisuerecosa mondo ãgua

<sup>55</sup> güemimombehugüer rupi yande ramoi aracahendar Abraham upe, ichuindar upe avei yepi no” ehi vorivetesave pipe omu

Isabel upe.

<sup>56</sup> Ipare María opita Isabel piri mbosapi yasi rupi. Ichui oyevei oso güëtave.

### *Juan Oporoãpiramo vahe haragüer*

<sup>57</sup> Osupitise ari Isabel upe, imembira. Ahe imembri cuimbahemi.

<sup>58</sup> Imu iyavei icotindar oyanduse Tũpa rembiapo mbahe aviye vahe, aipo ehi yuvireco chupe: “Aviye ai catu Yar Tũpa secoi co cuña rese” ehi vorivetesave yuvireco.

<sup>59</sup> Ocho ari pipe aipo, ahe pĩtani ombocircuncida yuvireco judío porocuita mboyeroyasa pipe. Ipare aipo omondo pota iyepi Zacarías rer yuvireco sese viña,

<sup>60</sup> ichi rumo,

—Aní —ehiño—. Juan itera rumo serer —ehi.

<sup>61</sup> —¿Mahera vo? Ndipoi eté rumo nde mu rer aipo nungar —ehi yuvireco chupe.

<sup>62</sup> Evocoyase aipo omahe pĩtani yesupa rese yuvireco ‘¿mbahe pĩha ahe omondo pota sererguã viña?’ oyapave yuvireco.

<sup>63</sup> Evocoyase aipo iyepi oporandu ivirapemi rese sese serer oicuachía vaheerã. Ahe serer oicuachía: ‘Juan sererguã’ ehi imoi. Ahese aipo opacatu ava: “¿Mara ehi rutei pĩha co?” ehi tēi oyeupe yuvireco.

<sup>64</sup> Ahese ramo Zacarías iñhengatu, omboipi Tũpa upe osapucai oico.

<sup>65</sup> Opacatu aipo sēta cotindar oyembosiquiye tēi yuvireco, iyavei aipo opacatu Judea recua rupi omombehu-mbehu mbahe osepia vahecuer yuvireco.

<sup>66</sup> Mbahe osendu vahecuer rese avei aipo oporandu-randu oyeupe yuvireco: “¿Mbahe pĩha aipo pĩtani oyapora curi?” ehi. Esepia niha, supi eté Tũpa osovasa.

### *Zacarías sapucaí agüer*

<sup>67</sup> Zacarías, Espiritu Santo pĩratasa pipe, oñehe Tũpa oyeupe ñehesa pipe aipo ehi:

<sup>68</sup> “¡Yande Yar Tũpa imboeteipri tasecoi!

¡Esepia niha, ahe ou yande judío yaico vahe pĩsiro ãgua!

<sup>69</sup> Ombou niha Poropĩsirosar güembiguai David suindar yandeu.

<sup>70</sup> Ëgüe ehi imombehu opacatu oñhengagüer mombehusar seco maranehi vahe upe aracahe,

<sup>71</sup> Ahe yande pĩsirora yande amotarēhimbar sui.

- 72 Ēgüe ehi Tūpa imbou oporoparaisuerecosa yande ramoi aracahendar upe, iyavei iyemomahenduha āgua güemimbotar maranehi mombehu agüer rese.
- 73 Evocoiyase, ‘Che supi eté ayapora evocoi mbahe’ ehi yande ramoi Abraham upe aracahe
- 74 yande renose āgua yande amotarēhimbar povri sui ‘tache mboetei osiquiyeēhisa pipe yuvireco’ oya;
- 75 ‘toyuvirecoi che rembiepiave güeco ĩvisa pipe iyavei güeco maranehisa pipe ari yacatu rupi’ oyapave.
- 76 Nde, che rahir, ‘Co Tūpa ivate vahe ñehe mombehusar secoi’ ehira ava yuvireco ndeu. Esepia, nde eremoingatura ava recocuer Yar pisi āgua senondeve eico.
- 77 Supi eté nde niha eremboyecuara opacatu ava Tūpa upendar yuvirecoi vahe upe angaipa sui ñeroisa pisi āgua iñepisiro āgua.
- 78 Esepia, yande Ru Tūpa, oporoparaisuerecosa pipe ombou oporoesapesa iva pendar yandeu yande reco mbopiasu āgua
- 79 iyavei ava Tūpa cuaparēhi resape āgua ‘toyuvirecoi mbahe tupri pipe’ oyapave. Esepia, ahe inungar ava pītumimbisave yuvirecoi vahe, ocañi tēi vaheṛā yuvireco” ehi Zacarías.
- 80 Ichui pītani ocuacua iyavei vireco pīratasa Espiritu suindar oyese. Ipare rumo oso oyemboerecua ivi iporupirēhi rupi. Coiye oyemboyecua omu Israel pendar upe oico.

## 2

### *Jesús yesu agüer*

- 1 Yipindar mborerecuar guasu Augusto oporocuai oico, “Tayecuachiasa opacatu tecua rupi” ehi.
- 2 Ahe yipindar yecuachiasa mborerecuar Cirenio, Siria pendar rēise.
- 3 Opacatu ava yuviraso güecua yacatu rupi oyecuachía āgua yuvireco.
- 4 Sese José avei osē Nazaret, Galilea ivi rupi sui oso ivi Judea rupindar tecua Belén ve. Esepia niha, aracahendar mborerecuar guasu David aheve oha vahecuer, iyavei José ichuindar avei secoi.
- 5 Ēgüe ehi oyoya yuviraso güembirecovi María rese oyecuachía āgua. María rumo imembira pota ité oico.
- 6 Aheve oyepota ramosa, osupiti ari imembira āgua.
- 7 Aheve oha imembri yipindar vahe cuimbahemi. Ahese María oyao omembri turucuar pipe, ēgüe ehi imoñeno imondo mbahe mimba rembihu riru pipe. Esepia niha, ndoyosui eté oque āgua aheve yuvireco.

### *Tūpa rembiguai eta omombehu Jesús haragüer ovesa rārosar upe yuvireco*

- 8 Namombrimi Belén sui ovesa rārosar yuvirecoi. Aheve osāro ovesa pītu pipe yuvireco.
- 9 Aviyeteramo tēi oyemboyecua Tūpa rembiguai iva pendar chupe. Tūpa porañetesa avei sendi yivii chupe yuvireco. Ahe sepiase, oyembosiquiyé iteanga tēi yuvireco ichui.
- 10 Ahe rumo aipo ehi chupe: “Pesiquiye eme. Esepia, che ayu mbahe icatupri vahe mombehu āgua pēu pe mboviharete āgua iyavei opacatu ava mboviharete āgua avei no.
- 11 Co pipe oha David recua Belén ve Poropisirosar pēu nara. Ahe niha Tūpa Rembiporavo, pe Yarguā secoi.
- 12 Icuā āgua peyosura pītani yaopri tuprimi vahe tui mbahe mimba rembihu riru pipe” ehi.
- 13 Aviyeteramo tēi oyemboyecua ambuae setá Tūpa rembiguai iva pendar yivii yuvireco. Tūpa upe osapucái yuvireco aipo ehi:
- 14 “¡Imboeteipri tasecoi Tūpa ivave!  
 ¡Ivive ava Tūpa rembiaisu toyuvirecoi tupri oyeaisusa pipe!” ehi osapucái yuvireco.



15 Opase oyeve Tūpa rembiguai ivave yuviraso, ahese ovesa rãrosar aipo ehi oyeupe yuvireco:

—Yaso ru Belén ve; yasepiara aipo mbahe, acoi oicua uca vahe Yar oico yandeu —ehi yuvireco.

16 Evocoyase ipoyava yuviraso. Ipare osepia María, José, Jesús pītani avei yuvireco cute. Ahe pītani omoñenomi mbahe mimba rembihi riru pipe ino.

17 Ipare yuvinose omombehu-mbehu ambuae ava upe Tūpa rembiguai remimombe-hugüer pītani resendar ñehesa yuvireco.

18 Evocoyase opacatu ava oyepihamondii co ñehesa renduse yuvireco.

19 María rumo opacatu co mbahe rese oyapısacaño; ahe ehiño ité ipihañemoñetasa.

20 Oyeveise ovesa rãrosar yuviraso, omboetei iyavei osapucái Tūpa upe yuvireco. Esepia niha, opacatu mbahe osendu vahe, osepia vahecuer yuvireco imombehupri rupi tupri ité.

### *Jesús pītani seropovēhesa Tūpa upe tūparo pipe*

21 Ocho ari pipe ahe pītani ombocircuncida yuvireco; omondo sererguã Jesús yuvireco, ahe terer tupri avei acoi Tūpa rembiguai omombehu María upe imembiehi viteseve.

22 Ipare omboaviyese ohari güetave oñemoatiro ãgua, ahe aipo ěgüe ehi Moisés porocuita rupi yuvireco yepi, ahese vinose pītani seraso tecua guasu Jerusalén tūparo pipe seropovēhe ãgua Yar upe yuvireco.

23 ěgüe ehi yuvireco. Esepia, Yar porocuita aipo ehi icuachiapri pipe aracahe: “Opacatu yipindar pītani cuimbahe mini yuviroha vahe ipehasara Tūpa upe nara yepi” ehi.

24 Yuviraso oporerecosa reropovēhe ãgua yuvireco yande Yar porocuita rupi: “Ñepeí oyovaichor reseve picuhi, anise ñuvirío apıcasu peropovēhera” ehi vahe.

25 Ahe pipe mbıa Jerusalén ve secoi Simeón serer vahe. Ahe mbıa aviye etepri vahe. Oyerure vahe Tūpa upe, osãro vahe avei Israel recua pendar Pısirosar imombehupri. Ahe secoi vahe ité Espıritu Santo rese.

26 Ahe chupe Espıritu Santo opa uca oicua “eresepia rane itera Poropısirosar Tūpa remimbou nde mano renondeve” ehi vahe.

27 Ahe ari pipe Espıritu Santo viroguata tūparove. Oyepotase José, María reseve yuvireco tūparove Jesús pītani reropovēhe ãgua Tūpa porocuita rupi tupri,

28 ahese Simeón oyemboya oso sese, osupi ichi sui, viroyeroqui Tūpa upe señoa aipo ehi:

29 “Che Yar, cūrıteı che, nde rembiguai, amano tupriño itera.

Esepia niha, nde remimombehugüer eremboaviye ité cheu.

30 Asepia ité niha Poropısirosar vichico cute.

31 Nde niha erembou opacatu ava rembiepiave.

32 Ahe niha poroesapesa ité secoi.

Esepia, omboyecuarı mbahe supı eté vahe ava ndahei vahe judıo yuvirecoı vahe upe, iyavei omondara poromboeteısa nde recua Israel pendar judıo yuvirecoı vahe upe” ehi oyerocuı.

33 José iyavei María ndoyembovıhai tēı yuvireco pītani rese Simeón yeroqui renduse.

34 Evocoyase Simeón osovasa ahe pītani iyepıreseve. Ipare aipo ehi ichi María upe:

—Esendu, co pītani reroyaēhısa pipe setá yande mu judıo ovıapıra mbahe tēı pipe yuvireco; ambuae rumo seroya pipe sovasapri yuvirecoıra. Ahe avei omboyecuarı mbahe ava upe. Amove rumo viroıroñoıra yuvireco.

35 Ipıpe sui ava pıhañemoñetasa icuasara curı. Iyavei co opacatu mbahe tasıra nde pıha pipe inungar quıse pucu osasara nde pıha vıña —ehı chupe.

<sup>36</sup> Aheve avei cuña cuacuami yaracua vahe secoi, ahe serer Ana, Fanuel rayri, Aser suindar. Ocuñataimiseve rumo omenda, iyavei secoi raimi tēi omer rese siete araviter rupive.

<sup>37</sup> Cūrítei secoi omer mano pare ochenta y cuatro araviter. Nosei eté tūparo pipe sui oico. Ēgüe ehi yande Yar mboetei pītu, ari rupi oyecuacusa pipe iyavei oyeruresa pipe avei oico no.

<sup>38</sup> Ahe evocoyase ahesa reseve avei ou pītani upe, “Aviye ndeu” ehi Tūpa upe. Ipape oñehe secocuer rese opacatu ava Jerusalén pendar osāro vahe güecua písiro āgua upe oico.

### *Jesús pītani reroyevi agüer Nazaret ve*

<sup>39</sup> Evocoyase opacatu Moisés porocuita mboaviyere, opa oyevi Galilea pendar güecua Nazaret ve yuvireco.

<sup>40</sup> Ahese pītani ocuacua catumi imbahecua-ecua irimi eté oico iyavei ipīrata catu irimi. Esepia, Tūpa osovasa ité sereco no.

### *Jesús chīhivahe tūparo pipe secoi*

<sup>41</sup> Iyesupa yuviraso araviter yacatu Jerusalén ve Pascua pieta repia yepi.

<sup>42</sup> Jesús doce araviter virecose, ahese vīraso iyesupa Jerusalén ve oyeupi pieta repia yuvireco. Esepia, ēgüe ehi eté judío recocuer pietase yuvireco yepi.

<sup>43</sup> Ahe pieta pare voi, oyevise yuvireco güecosave, ahese Jesús opītaño Jerusalén ve; ichi rumo iyavei tu José ndoicuai eté ipītase yuvireco.

<sup>44</sup> “Ouño revo ava pāhu rupi” ehi yuvireco chupe viña; aipo ehiño ité ñepei ari pipe yuvireco chupe. Oseca tēise rumo omu pāhu rupi, iyavei omboripar pāhu rupi avei no,

<sup>45</sup> ndoyosui eté yuvireco. Ahese oyevi iri tēi Jerusalén ve seca yuvireco.

<sup>46</sup> Imombosapīsa ari pipe oyosu ramo tūparo pipe yuvireco. Aheve oguapī ava Tūpa porocuita rese oporombohe vahe pāhuve oī; oyapīsaca iñehe rese iyavei oporandurandu ahe ava upe Tūpa Ñehengagüer rese oī.

<sup>47</sup> Evocoyase opacatu ava ndoyembovīhai tēi imbahecua vaisa rese yuvireco. Esepia, oporanduse mbahe rese yuvireco chupe, omboyevi tupri voi-voiño ité ñehesa.

<sup>48</sup> Oyosuse iyesupa, oyepīhamondīi yuvireco. Ahese ichi aipo ehi chupe:

—Che membri, ¿mahera vo ēgüe ere eico oreu? Nde recasa tēi opacatu rupi, ore mopīhañemoñeta atī uca eve —ehi.

<sup>49</sup> Evocoyase,

—¿Mahera vo che reca co coti rupi tēi peye peico? ¿Ndapeicuai vo che Ru rēta pipe aico vahe rā? —ehi osi upe.

<sup>50</sup> Iyesupa rumo ndosenducuai eté aipo oyeupe hesa yuvireco.

<sup>51</sup> Evocoyase oyevi Nazaret ve oso supi. Aheve omboyeroyāño ité oyesupa. Ichi niha opacatu co mbahe rese oyapīsacaño ité.

<sup>52</sup> Ahese Jesús ocuacua-cuacua iri, iyetei catu avei imbahecua catu iri avei oico no. Secoi tupri ai eté Tūpa upe iyavei ava eta upe avei no.

## 3

### *Juan Oporoāpiramo vahe secoi ivi iporupirēhisā rupi*

<sup>1</sup> Quince araviter pipe mborerecuar guasu Tiberio recose, Poncio Pilato evocoyase mborerecuar secoi Judea rupi, Herodes avei mborerecuar secoi Galilea ve, tivri Felipe evocoyase mborerecuar secoi Iturea ve iyavei Traconite ve, Lisantias avei mborerecuar secoi Abilinia ve.

<sup>2</sup> Anás iyavei Caifás ahe pahī rerecuar ivate catu vahe yuvirecoi. Ahese Tūpa, “Emombehu che ñehe ava upe cute” ehi Zacarías rahir Juan upe oico ivi iporupirēhisave.

<sup>3</sup> Juan evocoyase oso opacatu ïai Jordán ivi oico, supi aipo ehi ava upe: “Pemboasi pe angaipa, peyevi Tûpa upe, ahese opoãpiramora Tûpa pëu ñero ãgua pe angaipa rese” ehi.

<sup>4</sup> Co yaviye ité Tûpa ñehe mombehusar Isaías rembicuachiagüer pipendar aipo ehi vahe:

“Sendusa ivi iporupirêhisave ava sapucaisa aipo ehi vahe:

‘Pemoingatu yande Yar raperã, pemohivi tupri avei’ ehi.

<sup>5</sup> ‘Evocoyase opacatu ivisocuer opara imboapiposa chupe, opacatu ivitri ivate vahe iyavei ivitri mini opara imboyoyasa tupri no.

Acoi peri ipãri vahe, ahe imohivisapara; peri ipicucu ati vahe opara imboapiposa tupri chupe.

<sup>6</sup> Iyavei opacatu ava osendura ñehesa pñirosa resendar Tûpa remimbou yuvireco cute’ ehi vahe” ehi.

<sup>7</sup> Ava rehii yuvinosepa chupe ‘tayande ãpiramo’ oyapave yuvireco viña. Ahe rumo aipo ehi: “ïPe mboi mboetasa tã peico! ¿Ava vo, ‘Pesëra Tûpa ñemoirosa ou vaheã sui’ ehi tupri tã pëu?”

<sup>8</sup> Yipindar toyecua tupri rane yande Yar upe peyevisa pe angaipa mboasisa pipe. Iyavei ndapeyeroyai chira ‘ore Abraham suindar oroico’ pe hesa rese tã peñepisiro ãgua. Esepia, Tûpa oicatuño ité co ita sui Abraham suindar nungar tupri apo ãgua oyeupe nara yepi.

<sup>9</sup> Hacha niha imoingatusa voi eté opacatu ivira iha naporai vahe sapo rupi yasia ãgua yepi. Yasiapri evocoyase imondosapara tatave” ehi.

<sup>10</sup> —¿Mbahe pñha evocoyase oroyapora ore recocuer recuñaro ãgua oroico? —ehi ava rehii oporandu yuvireco chupe.

<sup>11</sup> —Pe pereco vahe ñuvirío pe camisa, ñepeï pemondo ava ndovirecoi vahe upe; iyavei pe pereco vahe tembiyu, pemboyahomi tã ambuae ava ndovirecoi vahe upe —ehi imboyevi ava upe.

<sup>12</sup> Yugüeru avei moviro ava sui guarepochi rerocuasar ‘tayande ãpiramo’ oyapave yuvireco. Ipare oporandu Juan upe mbahe rese yuvireco:

—Porombohesar, ¿mbahe vo ore oroyapora Tûpa rupi ore guata ãgua oroico? —ehi yuvireco chupe.

<sup>13</sup> Evocoyase aipo ehi ahe ava yuvirecoi vahe upe:

—Aní perocua catu iri guarepochi pëu imombehusa sui —ehi.

<sup>14</sup> Iyavei amove sundao oporandu mbahe rese yuvireco chupe:

—Ore no, ¿mbahe vo ore oroyapora? —ehi.

—Ndaperocuai chietera que mbahe ambuae ava sui, ndapeñehe-ñehe tã chira ava upe sembiapoëhi rese, iyavei peyembovihanora pe poraviqui repri rese —ehi sundao upe.

<sup>15</sup> Ava rumo, “¿Ndahei pñha co Poropñirosar sãrombri secoi?” ehi tã Juan upe yuvireco.

<sup>16</sup> Juan rumo aipo ehi opacatu ava upe: “Che opoãpiramo ï pipe tã; oura rumo ambuae che raquicuei, ahe pe ãpiramora Espiritu Santo tata nungar pipe. Ahe seco pñrata catu vahe secoi che sui. Sese cheu ndiyai eté ahe ipitaquisã yora ãgua ichui” ehi.

<sup>17</sup> “Ahe güeru trigo mbovevesa ihigüer sui ipeha ãgua. Sãhii evocoyase yapocatusa, ihigüer rumo imondosa tata apirêhi vahesave” ehi ava upe.

<sup>18</sup> Omombehu-mbehu vite ñehesa aviye vahe ava upe ‘toyemonguerêhi güecocuer recuñaro ãgua yuvireco’ oya.

<sup>19</sup> Ipare rumo Juan oñehe pñrata mborerecuar Herodes upe secocuerai rese. Esepia, vivri Felipe rembireco Herodías rese secoi, iyavei setá ambuae mbahe naporai vahe sembiapo.

<sup>20</sup> Sese Herodes oyapoño ambuae mbahe tã: seroyaëhisa pipe osoquenda ucaño Juan sereco.

<sup>21</sup> Yipindar rumo voquenda viteẽhiseve Juan oñapiramo setá ava oico, aheseve avei oñapiramo Jesús. Jesús yerure viteseve, aviyeteramo tẽi oyemboi tupri iva.

<sup>22</sup> Ipare Espiritu Santo ogüeyi ou iharive apिकासु nungar, iyavei oyeendu ñehesa iva sui aipo ehi vahe:

—Nde che Rahir ereico, che rembiaisu; sese aviha ité nde rese —ehi.

*Ava eta oyesu vahe Jesucristo yesu renondeve*

<sup>23</sup> Jesús virecose treinta araviter, ahese ramo omboipi oporombohe. Ahe icuapri vahe ité José rahir secose viña. José Elí rahir secoi,

<sup>24</sup> Elí evocoyase Matat rahir, ahe Matat evocoyase Leví rahir, Leví evocoyase Melqui rahir, ahe Melqui evocoyase Jana rahir, Jana evocoyase José rahir,

<sup>25</sup> ahe José Matatías rahir, Matatías evocoyase Amós rahir, ahe Amós evocoyase Nahúm rahir, Nahúm evocoyase Esli rahir, ahe Esli Nagai rahir,

<sup>26</sup> Nagai evocoyase Maat rahir, ahe Maat Matatías rahir, Matatías evocoyase Semei rahir, ahe Semei evocoyase Josec rahir, Josec evocoyase Judá rahir,

<sup>27</sup> ahe Judá Joanán rahir, Joanán evocoyase Resa rahir, ahe Resa evocoyase Zorobabel rahir, Zorobabel evocoyase Salatiel rahir, ahe Salatiel Neri rahir,

<sup>28</sup> Neri evocoyase Melqui rahir, ahe Melqui Adi rahir, Adi evocoyase Cosam rahir, Cosam evocoyase Elmadam rahir, Elmadam evocoyase Er rahir,

<sup>29</sup> ahe Er Jesús rahir, Jesús evocoyase Eliezer rahir, ahe Eliezer Jorim rahir, Jorim evocoyase Matat rahir,

<sup>30</sup> ahe Matat Leví rahir, Leví evocoyase Simeón rahir, ahe Simeón evocoyase Judá rahir, Judá evocoyase José rahir, ahe José Jonam rahir, Jonam evocoyase Eliaquim rahir,

<sup>31</sup> Eliaquim Melea rahir, ahe Melea Mena rahir, Mena evocoyase Matata rahir, ahe Matata evocoyase Natán rahir,

<sup>32</sup> Natán David rahir, ahe David evocoyase Isaí rahir, Isaí Obed rahir, ahe Obed evocoyase Booz rahir, Booz Sala rahir, ahe Sala evocoyase Naasón rahir,

<sup>33</sup> Naasón Aminadab rahir, ahe Aminadab evocoyase Admin rahir, Admin evocoyase Arni rahir, Arni evocoyase Esrom rahir, ahe Esrom evocoyase Fares rahir, Fares evocoyase Judá rahir,

<sup>34</sup> ahe Judá Jacob rahir, Jacob evocoyase Isaac rahir, ahe Isaac Abraham rahir, Abraham evocoyase Taré rahir, Taré evocoyase Nacor rahir,

<sup>35</sup> ahe Nacor Serug rahir, Serug evocoyase Ragau rahir, ahe Ragau evocoyase Peleg rahir, Peleg Heber rahir, ahe Heber evocoyase Sala rahir,

<sup>36</sup> Sala Cainán rahir, ahe Cainán evocoyase Arfaxad rahir, Arfaxad evocoyase Sem rahir, ahe Sem evocoyase Noé rahir, Noé evocoyase Lamec rahir,

<sup>37</sup> ahe Lamec Matusalén rahir, Matusalén evocoyase Enoc rahir, Enoc evocoyase Jared rahir, ahe Jared Mahalaleel rahir, Mahalaleel evocoyase Cainán rahir,

<sup>38</sup> ahe Cainán evocoyase Enós rahir, Enós evocoyase Set rahir, ahe Set Adán rahir, Adán evocoyase Tūpa rahir.

## 4

*Jesús recoãhasa*

<sup>1</sup> Jesús Espiritu Santo rese ité secoi. Ahe osẽ ïai Jordán sui oso. Ipare Espiritu viroguata ïvi iporupirẽhisa rupi.

<sup>2</sup> Aheve cuarenta ari secoise Carugar osecoãha. Ndocarui avei oico. Sese ndasiepoi eté.

<sup>3</sup> Carugar evocoyase aipo ehi chupe:

—Tūpa Rahir ité nde recose, co ita sui eyapo pan cūritei —ehi.

<sup>4</sup> Evocoyase Jesús omboeyvi chupe:

—Che Ru ñehe rumo icuachiapri pipe aipo ehi: ‘Ndahei chira pan suiño ava yuvirecovera’ ehi —ehi Caruguar upe.

<sup>5</sup> Ipare Caruguar viraso ivate vahesave. Aheve ñepei reseve opacatu ava-ava tēi mborerecuasa ivi pipendar omboyecua chupe.

<sup>6</sup> Ipare aipo ehi chupe:

—Che amondora opacatu ivi rupindar mborerecuar pīratasa iyavei mbahe porañete vahe nde povrive. Esepia niha, co opacatu cheu imboupri; iya ité amondo vaherã ava upe che remimbotar rupi.

<sup>7</sup> Acoi ereñenopihase cheu che mboetei ãgua, ahese opacatu co mbahe ereipisira nde mahera —ehi tēi Caruguar chupe.

<sup>8</sup> —Icuachiapri pipe rumo: ‘Emboetei nde Yar Tūpa, ahe güeraño tupri avei eremboyeroyara’ ehi —ehi Caruguar upe.

<sup>9</sup> Ipare Caruguar viraso oyeupi tecua guasu Jerusalén ve. Aheve oviroyeupi tūparo apiterve. Aheve Caruguar aipo ehi chupe:

—Tūpa Rahir ité nde recose, eviapi cohava sui.

<sup>10</sup> Esepia niha, icuachiapri pipe:

‘Tūpa oyocuaire güembiguai eta nde rãro ãgua.

<sup>11</sup> Ahe nde mopuhara yuvireco que ñepei ita nde momara rãgüer sui’ ehi —ehi Caruguar chupe.

<sup>12</sup> Evocoyase omboyevi Caruguar upe:

—¡Aní! Icuachiapri pipe niha aipo ehi avei: ‘Ndereseoãhai chira nde Yar Tūpa’ ehi —ehi chupe.

<sup>13</sup> Ahese Caruguar ndoicatu iri eté Jesús recoãha ãgua oico. Ipare oyepepiño raimi tēi oso ichui.

### *Jesús omboipi oporombohe Galilea rupi*

<sup>14</sup> Jesús, Espiritu Santo reco pīratasa pipe, oyevi oso Galilea ve. Ipare serãcua oguata opacatu tecua-tecuami rupi.

<sup>15</sup> Esepia, ahe oporombohe judío tūparo pipe oico. Ahese opacatu ava omboetei yuvireco.

### *Jesús oyevi Nazaret ve*

<sup>16</sup> Ichui Jesús oyevi Nazaret ve ocuacua agüerve. Aheve judío mbituhusa ari pipe oique tūparove inungar oyapo yepi. Ahese opūha ‘tayeroqui icuachiapri maranehi pipe’ oya.

<sup>17</sup> Evocoyase tūparo rese ñangarecuar pītiviisar omondo Tūpa ñehe mombehular Isaías rembicuachía chupe. Oyorase ahe cuachiar, oyerorqui icuachiapri aipo ehi vahe pipe ohã:

<sup>18</sup> —“Yar Espiritu secoi che rese.

Esepia niha, ahe ombou che cuaitarã cheu co ñehesa aviye vahe mombehu ãgua ava iparaisu vahe upe.

Che cuaita avei ava mbahe-mbahe tēivrive yuvirecoi vahe senose ãgua ichui, iyavei ava ndasesapisoi vahe ambosarecora; iyavei che cuaita ava mbahe-mbahe tēi rasícuer oiporara vahe sui senose ãgua,

<sup>19</sup> iyavei ‘cūritei Yar oyemoingatu oporovasasa mondo ãgua pēu’ he ãgua” ehi icuachiapri pipe

—ehi oyerorqui.

<sup>20</sup> Sese oyerorqui pare, oyapoapipa cuachiar imondo tūparo rese ñangarecuar pītiviisar upe. Ipare oguapi oĩ ava rembiepiave. Ahese opacatu tūparo pipendar omahe ati yuvireco sese.

<sup>21</sup> Evocoyase ahe oñehe aipo ehi:

—Cūritei yaviye co icuachiapri pipendar opacatu pe rovaque —ehi.

<sup>22</sup> Opacatu ava oñehe tupriño ité yuvireco sese. Ndoyembovihai tēi iñehe tupri renduse yuvireco. Oporandu-randu rumo yuvireco oyeupe:

—¿Ndahei vo acoi co José rahir tēi? —ehi yuvireco chupe.

<sup>23</sup> Ahe rumo aipo ehi ava upe:

—Pe aipo peyera cheu: ‘Oporombogüera vahe, eñeposano nde ae eico’ peyera. Ipare aipo peyera cheu: ‘Acoi orosendu vahe nde rembiapogüer Capernaum pīpe, ãgüe ere avei eyapo cohabe nde recua pīpe ité’ peyera cheu —ehi.

<sup>24</sup> —Supi eté, ndipoi eté niha que ñepe yepe Tūpa ñehe mombehusar oipisi tupri vahe güecua pīpe yuvireco yepi.

<sup>25</sup> Supi tupri ité Tūpa ñehe mombehusar Elías recose, iñehe rupi tupri ndoqui eté mbosapi araviter yemombitesa rupi oico. Sese oime tiavor opacatu Israel ivi rupi aracahe. Ahese setá etepri cuña imer mano vahecuer oime Israel recua rupi viña,

<sup>26</sup> Tūpa rumo nomondoi Elías cuña imer mano vahecuer Israel pendar upe ipitivi ãgua. ãgüe ehi rumo omondo cuña ndahei vahe Israel pendar ipitivi ãgua. Ahe cuña tecua Sarepta pendar, ahe Sarepta Sidón ipimindar.

<sup>27</sup> Iyavei setá ava oime Israel recua pīpendar imbaheasi vahe lepra rerecosar yuvireco evocoi Tūpa ñehe mombehusar Eliseo recose. Evocoi ava yuvirecoi vahe rumo ndipoi eté que ñepe ocuera vahe yuvireco; Naamán año rumo Eliseo opa uca ombogüera, ahe mbia Siria pendar ndahei vahe Israel pendar secoi —ehi ava upe.

<sup>28</sup> Ahese opacatu ava judío tūparo pīpendar oñemoiró iteanga yuvireco sese aipo mbahe renduse.

<sup>29</sup> Sese opa voi eté opūha Jesús reraso ãgua tecua pīpe sui ivitri ivi socuerve yuvireco, ahe iharive tecua yaposa. Ahe ichui oiti pota yuvireco viña.

<sup>30</sup> Jesús rumo ipāhu sui osē tupriño oso.

### *Jesús ombogüera mbia carugar vireco vahe oyese*

<sup>31</sup> Ichui Jesús oso Capernaum ve, ahe tecua Galilea rupindar. Aheve ombohe ava oico mbituhusa ari pīpe.

<sup>32</sup> Ipare opacatu ava, “¡Mara ehi rutei!” ehi tēi iporombohesa renduse yuvireco. Esepia niha, ahe oñehe güeco pīratasa pīpe.

<sup>33</sup> Aheve judío tūparo pīpe oime mbia vireco vahe carugar oyese, ahe oñehe pīrata Jesús upe:

<sup>34</sup> —¡Ore mañeco tēi eme eve! ¡Mahera ereyuño tēi cohabe oreu, nde, Jesús Nazaret pendar! ¿Ereyu vo ore mocañi ãgua tēi? Che orocua ité. Nde niha seco maranehi vahe ereico Tūpa suindar —ehi chupe.

<sup>35</sup> Evocoiyase,

—¡Quiriri, esē co mbia sui! —ehi oñehe pīrata carugar upe.

Ahese carugar omboviapi ahe mbia ava rovai, osē ocua ichui; nomomarai eté rumo.

<sup>36</sup> Opacatu ava oyembosiquiye, iyavei oporandu-randu tēi mbahe rese oyeupe yuvireco:

—¿Mara ehi vo aipo oñehe oico? ¡Esepia, co mbia opīratasa pīpe oyocuai carugar ava sui imose ãgua! —ehi yuvireco.

<sup>37</sup> Sese Jesús rerācua oyandu opacatu tecua-tecuami ivirindar yuvireco.

### *Jesús ombogüera Simón Pedro rebireco si*

<sup>38</sup> Evocoiyase Jesús osē judío tūparo pīpe sui oso, oique Simón Pedro rētave. Simón rebireco si sohi iteanga ou. Evocoiyase oñehe ahe pendar sese Jesús upe ‘tombogüerami tēi’ oyapave yuvireco.

<sup>39</sup> Evocoiyase Jesús oyeavi oso chupe sohi sui imbogüera ãgua. Ocuera pare voi ahe cuña oñarapuha; ohañeco ahe ava yuvirecoi vahe rese.

### *Jesús ombogüera setá ava imbaheasi vahe*

<sup>40</sup> Ari so ramomise opacatu ava imbaherasisa ambuae tēi vahe güeru Jesús upe yuvireco. Ahe evocoyase opo omondo iyacatu iharive ñepeipei imbogüera.

<sup>41</sup> Iyavei setá ava sui opa omose carugar. Evocoyase carugar osapucai tēi aipo ehi yuvireco:

—¡Nde acoi Tūpa Rahir ité ereico! —ehi.

Ahe rumo oñehe pīrata carugar upe, nomoñehe iri. Esepia niha, carugar oicua ité ahe Tūpa Rembiporavo seco rese yuvireco.

### *Jesús oporombohe judío tūparo rupi oico*

<sup>42</sup> Ahere ayihive cōhe ramomise, Jesús osē tecua pipe sui, oso ivi iporupirēhisave. Ava rumo oseca-secaño ité yuvireco; osupitiño ité secosave yuvireco. Oipota ahe oyesui ichoēhi āgua ité yuvireco vinā.

<sup>43</sup> Ahe rumo aipo ehi ava eta upe:

—Tamombehu rane catu ambuae tecuave avei ñehesa aviye vahe Tūpa mborerecuasa resendar ava upe. Esepia, aherā niha che mbousa —ehi.

<sup>44</sup> Ēgüe ehi Jesús uguata oporombohe Judea tūparo rupi oico.

## 5

### *Pira mboha ati agüer*

<sup>1</sup> Ñepeipei ari Jesús secoi ipa Genesaret popi rupi. Aheve ava rehii oyepota yuvireco chupe, oyere ati yuvireco sese. Esepia niha, ahe osendu pota ité Tūpa Ñehengagüer yuvireco.

<sup>2</sup> Aheve oime ñuvirío carite imbehi popive. Ahe ava pira mbohasar opa yuvínose evocoi carite pipe sui yuvireco. Ipare opira mbohasa oyosei yuvinoi.

<sup>3</sup> Evocoyase Jesús osepiase, oha Simón carite pipe iyavei aipo ehi chupe: “Tosiri catumi tēi chīhi coi coti iai popi sui” ehi. Ipare uguapi oĩ carite pipe. Aheve ombohe ava cute.

<sup>4</sup> Oñehe pare aipo ehi Simón upe:

—Yaso ipa tipī catu vahesave. Aheve erembohara pira —ehi.

<sup>5</sup> Simón rumo omboyevi chupe:

—Porombohesar, orosāha tēi niha pītu momba pira mboha oroico. Nde porocuita pipe rumo amondo irira pira mbohasa ive —ehi.

<sup>6</sup> Ēgüe ehise, pira rehii omondoromi ombohasa yuvireco.

<sup>7</sup> Ahese oyaiti yuvireco omboetasa evocoi ambuae carite pipe yuvirecoi vahe upe ‘toyugüerumi yande pītivii’ oyapave yuvireco chupe. Ahe yugüeru chupe. Ipare opa ñuvirío carite omboapipo tupri yuvireco; seni iri rumo omondo ipive.

<sup>8</sup> Co mbahe repiase, Simón Pedro oñenopiha oso sovai aipo ehi chupe:

—¡Eypepimi tēi che sui, che Yar! ¡Esepia, che yangaipa vahe tēi aico! —ehi.

<sup>9</sup> Esepia, Simón iyavei opacatu ava yuvirecoi vahe supi osiquiyé iteanga co pira rehii repiase yuvireco.

<sup>10</sup> Iyavei Simón mboetasa ambuae carite pipendar ahe Santiago, Juan Zebedeo rahir yuvirecoi. Jesús rumo aipo ehiño Simón upe:

—Eresiquiye eme; co pipe suive inungar pira eremboha, ēgüe ere aveira ava reca cheu nara —ehi.

<sup>11</sup> Evocoyase opa vínose carite ivi ātasave yuvireco, oseyapaño opacatu mbahe. Ipare yuviraso supi.

### *Jesús ombogüera ava lepra rerecosar*

<sup>12</sup> Ñepeipei ari Jesús secoise tecua pipe, aheve oime mbia lepra vireco vahe opacatu güetecuer rese. Jesús repiase, oñenopiha oyeaivi oso chupe. Ipare oporandu aipo ehi:

—Che Yar, ereipotase, iya nde che mbogüerami eve —ehi chupe.

13 Evocoyase, opocose sese,  
—Aipota. ¡Erecuerara cūrítei! —ehi chupe.

Aipo ihe ramoseve voi eté ocuera.

14 Ipare oyocuai aipo ehi chupe:

—Eremombehu eme nde cuerasa ambuae ava upe; esoño, eyemboyecua judío pahi upe. Ipare eicuavēhe nde porerecosa nde cuerasa resendar Moisés porocuita rupi. Ipipe sui toicua opacatu ava nde cuerasa yuvireco —ehi chupe.

15 Jesús rerācua rumo oyembouvicha catu-catu iri eté. Evocoyase setá ava oyemboya yuvireco sese iñehe rendu āgua ‘tayande mbogüerami tēi yande mbaherasisa sui’ oyapave yuvireco.

16 Ava rehíi sui rumo amove Jesús oyepetiño ahe aemi oyerure āgua yepi.

### *Jesús ombogüera ava ndoguatai vahe*

17 Ñepeí ari Jesús oporombohe oico. Yar Tūpa pīratasa vireco oyese ava mbogüera āgua. Aheve avei oguapí yuvinoi fariseo, Moisés porocuita rese oporombohe vahe avei ipiri yuvireco. Ahe yugüeru opacatu Galilea tecua-tecuami rupi sui yuvireco. Ivi Judea rupi sui, tecua Jerusalén sui avei yugüeru no.

18 Ahese ava ndoguatai vahe güeru supa pipe yuvireco. Viroique pota oi pipe sovai eté seroyi āgua yuvireco viña;

19 ndoicatui eté rumo seroique yuvireco ava rehíi pāhu rupi. Evocoyase viroyeupi yeupisa rupi ahe oi ipe vahe harive yuvireco. Aheve virocua teca ichui. Supi viroyi imbaheasi vahe supa pipe imondo yuvireco opacatu ava rembiepiave sovai.

20 Ahe oicuase co mbia yuvirecoi vahe oyese yeroyasa, ahese aipo ehi imbaheasi vahe upe:

—Che mboripar, che ñero nde angaipa rese ndeu —ehi.

21 Ichui oporombohe vahe Moisés porocuita rese iyavei fariseo ipihañemoñeta ati voi tēi yuvireco: “Co mbia oyemboivate ai tēi vahe Tūpa ñehe nungar pipe tēi; Tūpañi ité niha oicatu ava angaipa upe oñero āgua” ehi tēi oyeupe yuvireco.

22 Ahe rumo oicuaño ité ahe ava pihañemoñetasa. Evocoyase aipo ehi chupe:

—¡Mahera vo pepihañemoñeta rai tēi che rese!

23 ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pīha, anise: ‘Epūha, eguata’ hesa tie?

24 Tapeícua ru che, Ava Riquehír, areco ité mborerecuasa co ivi pipe ava angaipa upe che ñero āgua —ehi.

Evocoyase,

—Eñarapuha, esupi nde rupa, eso nde rētave —ehi imbaheasi vahe upe.

25 Ahese opūha voi ava rovaque, osupi vupagüer. Ipare osapucaí oso güētave Tūpa upe.

26 Ahese opacatu tupri ité ava, “¡Too! ¿Mara ehi rutei pīha co?” ehi tēi imboeteisave yuvireco. Iyavei osiquiyepave aipo ehi yuvireco:

—Co pipe yasepia mbahe ndayasepiai vahe ité —ehi.

### *Jesús oñehe Leví upe*

27 Ichui osēse Jesús, osepia mbia Roma ve nara guarepochi rerocuasar Leví serer vahe, ahe guarepochi rerocuasave chini. Sepiase,

—Erio che rupi —ehi chupe.

28 Evocoyase Leví opūha. Oseyapa oporaviquisa, oso supi.

29 Ipare Leví oyapo pieta guasu chupe nara güētave. Aheve iyemborisave setá imboetasa ava guarepochi rerocuasar iyavei ambuae ava ocaru yuvinoi ipiri.

30 Pieta repiasar fariseo yuvirecoi vahe rumo iyavei ipāhu pendar Moisés porocuita rese oporombohe vahe avei, ahe omboipi semimbohe upe oñehe mara aipo ehi yuvireco chupe:



—¡Mahera ru pecaru iyavei pecahu guarepochi rerocuasar rese iyavei ambuae ava yangaipa guasu vahe rese tēi avei no! —ehi.

<sup>31</sup> Jesús rumo aipo ehi chupe:

—Ava nimarai vahe ndosecai eté oporoposano vahe; imbaheasi vaheño rumo oseca yuvireco.

<sup>32</sup> Esepia, che ndayui ava seco catupri vahe reca; che rumo ayu ava yangaipa vahe reca Tūpa uve iyevi āgua yuvireco —ehi.

### *Yecuacusa rese ñehesa*

<sup>33</sup> Ipare ava oporandu yuvireco chupe:

—¿Mahera vo oyecuacu serai iyavei oyerure Juan Oporoãpiramo vahe rupindar yuvireco, fariseo rupindar avei no; nde remimbohe rumo yuvirocaruño ité, yuviroihuño avei no? —ehi.

<sup>34</sup> Ahe rumo omboyevi chupe aipo ehi:

—Ndiyai eté ichohopri mboyecuacu mendasave imer oicove viteseve ipāhuve.

<sup>35</sup> Oimera rumo ari imer reraso āgua ichui, ahese ramo oyecuacura yuvireco cute —ehi.

<sup>36</sup> Iyavei ambuae mbahe rese oporombohe imboyevi āgua:

—Ndiyai eté ava upe virocua vaheñā turucuar ipiasu vahe sui ambuae turucuar cuacuami vahe apete āgua. Esepia niha, ēgüe ehise evocoyase turucuar ipiasu vahe omomara; iyavei turucuar ipiasu vahe apirer naporai chira turucuar cuacua vahe rese —ehi—.

<sup>37</sup> Iyavei no, ndiyai eté ñoñasa uva ricuer piasu mbahe pিরer cuacua pipe no. Esepia niha, ēgüe ehise, uva ricuer piasu evocoyase opara ombopu mbahe pিরer cuacua viña, ēgüe ehira oyepiyerepa, mbahe pিরer avei evocoyase ocañi tēira viña.

<sup>38</sup> Uva ricuer piasu rumo yamondora mbahe pিরer piasu pipe.

<sup>39</sup> Iyavei ndipoi eté que ava oihu vahe uva ricuer ipiasu vahe yuvireco uva ricuer cuacua vahe yusei ai pare. Esepia niha, ava aipo, ‘Co uva ricuer cuacua vahe aviye catu vahe yepi’ ehi yuvireco —ehi ava upe.

## 6

### *Jesús remimbohe oipoho trigo mbituhusa ari pipe yuvireco*

<sup>1</sup> Ñepe mbituhusa ari pipe Jesús viroguata güemimbohe mbahe miti pāhu rupi. Semimbohe evocoyase oipoho-poho yuviraso trigo rāhi. Ipare oyequi opo pipe sāhi yuvireco igua.

<sup>2</sup> Evocoyase fariseo osepiase, aipo ehi yuvireco semimbohe eta upe:

—¡Mahera peporaviquiño tēi co mbituhusa ari pipe peico! —ehi.

<sup>3</sup> Jesús rumo omboyevi chupe:

—Peicua tēi niha icuachiapri arachendar mborerecuar guasu David rembiapogüer resendar ñehesa ondugüer reseve ndasiepoise yuvireco.

<sup>4</sup> Ahe niha oique ité Tūpa rēta pipe, opoco pan imboeteipri Tūpa upendar rese evocoi pahi upe güeraño ipotasa vahe ihu āgua yepi. Ahe rumo ohu, ondugüer tohu avei omondo —ehi.

<sup>5</sup> Iyavei aipo ehi chupe:

—Ava Riquehir mbituhusa ari rerecuar ité secoi —ehi fariseo upe.

### *Jesús ombogüera mbia ipo nomii vahe*

<sup>6</sup> Ambuae mbituhusa ari pipe, Jesús oique judío tūparo pipe oporombohe oico. Aheve mbia yasu coti ipo nomii vahe secoi.

<sup>7</sup> Moisés porocuita rese oporombohe vahe, fariseo avei omahengatu Jesús rese yuvireco ‘¿ombogüerara pñha co mbia mbituhusa ari pipe?’ oya; ‘yaiñhengapo angahu’ oyapave tēi yuvireco.

<sup>8</sup> Ahe rumo oicuaño ité ipihañemoñetasa oico. Ipare aipo ehi evocoi mbia ipo nomii vahe upe:

—Epūha cohave terehã ava pãhuve —ehi.

Ahe mbia evocoyase opūha, opita aheve ohã

<sup>9</sup> Ahese Jesús oporandu ahe ava upe:

—Aporandura mbahe rese pëu —ehi—. ¿Mbahe vo yaposara mbıtuhusa ari pipe yepi, mbahe tupri pīha, anise mbahe naporai vahe tie? ¿Yaipĩsiro pīha ava recocuer; yamocañi uca tēi tie? —ehi.

<sup>10</sup> Evocoyase omahengatu oyese ava oyere tupri vahe rese. Ipare aipo ehi ava ipo nomii vahe upe:

—Eichoho nde yiva —ehi.

Ahe mbia evocoyase oichoho oyiva; evocoyase ipo ocuera tupri ité.

<sup>11</sup> Evocoyase oñemoiro catuño ité yuvireco sese, iyavei oporandu-randu oyeupe yuvireco ‘¿mara yahera pīha imomara ãgua?’ oya.

### *Jesús oiporavo doce tupri güemimboherã*

<sup>12</sup> Ahe ari rupi Jesús oso ivitri ve, oyerure pĩtu momba tupri Vu upe oico.

<sup>13</sup> Cōhese, “Periό” ehi güemimbohe eta upe. Ipāhu sui oiporavo doce tupri, ahe chupe, “Apóstol” ehi.

<sup>14</sup> Co ahe yuvirecoi: Simón, ahe acoi Pedro avei serer; Andrés Simón rivri; Santiago, Juan, Felipe, iyavei Bartolomé;

<sup>15</sup> Mateo, Tomás, Santiago Alfeo rahir; Simón, ava güecua rese secatēhí vahe pāhu pendarer;

<sup>16</sup> Judas Santiago rivri; iyavei Judas Iscariote, ahe omondo vahe Jesús yamotarēhimbar uve.

### *Jesús ombohe ava rehii*

<sup>17</sup> Ipare Jesús ogüeyi ivitri sui yugüeru co doce güemimbohe reseve. Ipare opita ivi yoya tuprisave. Aheve ambuae semimbohe eta oyemboya ati yuvireco sese iyavei setá ava yuvirecoi opacatu tecua Judea rupindar, Jerusalén rupindar iyavei yemboyasa Tiro, Sidón cotindar, ahe oyemboya avei yuvireco sese. Ahe ava ēgüe ehi iñehe rendu potasave yuvireco ‘tayande mbogüerami tēi yande mbaherasisa sui’ oyapave yuvireco.

<sup>18</sup> Acoi espíritu naporai vahe remimombaraisu avei ocuera tupri yuvireco.

<sup>19</sup> Evocoyase opacatu ava opoco pota ité sese yuvireco. Esepia niha, ahe oprom-bogüera opacatu güeco pīratasa pipe oico.

### *Ava sorivete vahe iyavei ava ndoyembovihai vahe*

<sup>20</sup> Ipare omahe Jesús güemimbohe rese aipo ehi chupe:

“Perorivete catu pe iparaisu vahe. Esepia niha, Tūpa mborerecuasa pëu nara ité secoi.

<sup>21</sup> “Perorivete catu cūriteindar ndasiepoi vahe. Esepia niha, pehitarora peico curi.

“Perorivete catu pe acoi ava cūritei oyaseho vahe. Esepia niha, peviharetera coiye peico.

<sup>22</sup> “Perorivete catu pe acoi ava pe amotarēhise, pe mboyepipiñose avei oyesui yuvireco, iñehe-ñehe tēise yuvireco pëu pe amotarēhisave, iyavei acoi viroñrose pe rer mbahe tēi pipe che, Ava Riquehir, recocuer sui tēi yuvireco.

<sup>23</sup> Peyembovihaño iyavei perorivete catuñora ahe ari pipe peico. Esepia niha, ipare peipisira porerecosa tuvichá vahe ivave. Ēgüe ehi tupri avei evocoi ava ramoi araca-hendar mara-mara tēi Tūpa ñehe mombehusar sereco yuvireco” ehi.

<sup>24</sup> “¡Peparaisu catu rumo cūritei mbahe yar peico vahe! ¡Esepia niha, pemboaviye pe rorivetes peico!

<sup>25</sup> “¡Peparaisu catu acoi pe ihitaro vahe cūritei! ¡Esepia niha, ndaperiepoi chira peico coiye!

“¡Peparaísu catu acoi pevîha vahe pe pietase cûritei! ¡Esepia, peyasehora pe vîharêhisa pîpe peico coiye!

<sup>26</sup> “¡Peparaísu catu acoi peipîsi vahe pe mboeteisa opacatu co ivî pîpendar ava têi sui! ¡Esepia niha, êgüe ehi tuprî tamoi Tûpa ñehe mombehusar angahu têi vahe upe yuvîreco aracahe!” ehi.

### *Iyacatu yasaisu yande amotarêhimbar*

<sup>27</sup> “Pe che ñehe rese peyapîsaca vahe upe rumo aipo ahe: Pesaisu ava pe amotarêhimbar; peyapo tuprî mbahe aviye vahe ava nape ambotai vahe upe.

<sup>28</sup> Peporandu Tûpa porovasasa rese ava pëu îñehe-ñehe têi vahe upe nara; peyerure Tûpa upe pëu mbahe têi oyapo vahe recocuer rese.

<sup>29</sup> Acoi que pe amotarêhimbar pe rovapetese, co cotindar avei pemoporêhiñora chupe. Iyavei acoi que ava vîrocuaño têise pe yeasa pe sui, tovîraso avei pe yemondesa güemimbotar rupi” ehi.

<sup>30</sup> “Acoi oporanduse que pe mbahe rese yuvîreco pëu, pemondoño avei chupe. Iyavei acoi que ava vîrocuaño têise pe mbahe pe sui, ndapeporandui chira pëu imboyevi âgua rese.

<sup>31</sup> Acoi mbahe peipota vahe ambuae ava oyapo vaherã pëu, ahe tuprî avei peyapora chupe.

<sup>32</sup> “Acoi ava pe raisupar güeraño pesaisu catu têise, ndipoi eté mbahe aviye vahe ipîpe. Esepia niha, ava naporai vahe êgüe ehi yuvîreco yepi.

<sup>33</sup> Anise, acoi ava mbahe tuprî ai oyapo vahe pëu, chupe güeraño mbahe tuprî peyapose, ¿mbahe vo evocoyase oime aviye vahe ipîpe? Esepia niha, ava angaipa viyar avei êgüe ehi yuvîreco yepi.

<sup>34</sup> Acoi pemondoño têise mbahe ava upe ‘tomboyevi mbahe cheu’ pe hesave, ¿mbahe vo evocoyase oime aviye vahe ipîpe? Esepia niha, ava angaipa viyar êgüe ehi avei yuvîreco.

<sup>35</sup> Pe rumo pesaisu catura ava pe amotarêhisar, peyapoñora mbahe aviye vahe chupe. Iyavei pemondoño itera mbahe chupe, ‘Tasãroño rane mbahe cheu imboyevi âgua vichico’ ndapeyei chietera. Ahese oimera porerecosa aviye catu vahe pëu. Pe evocoyase Tûpa seco ivate catu vahe rahîr peicora. Esepia niha, ahe aviye etepri vahe ava ‘aviye ndeu’ ndehi vahe upe iyavei ava yangaipa guasu vahe upe avei.

<sup>36</sup> Pe peporoparaísuereco inungar pe Ru Tûpa oporoparaísuereco yepi” ehi.

### *Ndiyai ambuae ava seroïrosa*

<sup>37</sup> “Ndiyai, ‘Oyavi ité mbahe’ peye voiño têi ambuae ava upe. Evocoyase Tûpa, ‘Oyavi mbahe’ ndehi chira pëu. Pemocañi uca têi eme ambuae ava. Evocoyase Tûpa ndape mocañi têi chira. Peñeroño catu ambuae ava upe, ahese Tûpa îñero itera pëu.

<sup>38</sup> Pemondose mbahe ava upe, evocoyase Tûpa omondoño itera mbahe aviye vahe pëu inungar-ra omondo pe mbahe rîru pîpe pëu sâhambri tuprî aviye vahe viña. Êgüe ehira mbahe imondo pëu. Tûpa oicua tuprî itera pëu inungar pe mbahe pemondo ambuae ava upe” ehi.

<sup>39</sup> Ipare Jesús omombehu co ambuae porombohesa: “¿Oicatu pîha ñepi ndasesapîsoi vahe ambuae ndasesapîsoi vahe reroguata? ¡Aní eté! Esepia, oyoya voi oviapira que ivîcuar pîpe yuvîreco viña.

<sup>40</sup> Ñepi yepe niha ava oyembohe vahe ndahei eté ivate catu ombohesar sui. Acoi omomba vahe rumo oyembohesa ahe osupitira ombohesar” ehi.

<sup>41</sup> “¿Mahera ambuae ava rembiavîmi rese têi pemahe? Iya rumo peyese rane mbahe tuvîcha catu vahe pesepiara.

<sup>42</sup> Ndiyai pëu, ‘Che toropîtivîi mbahe nde rembiavi rese’ peye vaherã chupe. Esepia, pe peyavi guasu catu mbahe. ¡Pe Tûpa reroyasar angahu têi peico vahe! Penose uca rane

pe rembiavi tuvicha catu vahe peyesui, ahese ramo ambuae ava rembiavi tahimi vahe moingatu peicatura” ehi oporombohe.

*Ava recocuer icuasa sembiapo rese*

<sup>43-44</sup> “Ivira aviye vahe icuasa iha rese. Esepia, ivira aviye vahe, iha aviye avei; ivira naporai vahe, iha naporai avei no. Supi eté ndipohosai ivira sãchi ati vahe sui higuera ha, iyavei ndahipohosai uva, yu pãhu sui.

<sup>45</sup> Ègüe ehi avei ava upe. Ava aviye vahe oyapo mbahe tupri. Esepia, ahe vireco mbahe tupri opiha pipe yepi. Iyavei acoi ava ndaseco põrai vahe oyapo mbahe tõi. Esepia niha, ahe vireco mbahe tõi eté opiha pipe yepi. Esepia niha, pe piha pipe sui tõi osẽ pe ñehe ãgua” ehi.

*Ava oyemoviracua vahe iyavei ndoyemoviracuai vahe Jesús reroyasave*

<sup>46</sup> “¿Mahera vo, ‘Che Yar, che Yar’ peye tõi peico cheu; ipare ndapeyapoi eté mbahe che remimombehu?

<sup>47</sup> Amombehura rumo mbahe pẽu uma nungar tupri ité acoi ava ou vahe cheu che ñehe rese oyapisaca vahe, iyavei oyapo ité vahe mbahe che remimombehu:

<sup>48</sup> ahe inungar tupri ité acoi ava oyapo vahe güetara ita harive yepi. Yipindar rumo oyoho picucu rane ité ita harive imopuha ãgua. Yepe ahe oi upe oyepota tõi ivitu ai, amarusu reseve oinupa pĩrata tõi, nomboyerocuai eté rumo. Esepia niha, vireco ité oviracuasa.

<sup>49</sup> Acoi ava che ñehengagüer rese ndoyapisacai vahe rumo, ahe ndoyavii acoi ava oyapo vahe güetara ivi cuhi harive tõi, ndovirecoi eté oviracuasa. Ipare amar, ivitu ai reseve oinupa pĩratá, opaño omonduru; ocañi tõi eté evocoyase” ehi Jesús ava mbohe.

## 7

*Jesús ombogüera chñivahe sundao rereciar Roma iguar remimboacua*

<sup>1</sup> Jesús oñehepase ava upe oico, oso Capernaum ve.

<sup>2</sup> Ahe tecua pipe sundao rereciar ndahei vahe judío seci vireco vahe güemimboacua güembiaisu. Ahe imbaheasi guasu ité ou; omano pota ité.

<sup>3</sup> Jesús rerãcua anduse rumo, oyocuai moviro tõi omboripar judío imboeteipri chupe ñehe ãgua ‘toumi tõi che remimboacua mbogüera’ oyapave.

<sup>4</sup> Ahe judío evocoyase oyemboya Jesús rese yuvireco iyavei oporandu yuvireco chupe aipo ehi:

—Ore mboripar sundao rereciar oipota nde ereyapomi tẽira mbahe icatupri vahe chupe viña.

<sup>5</sup> Esepia niha, ore raisu iyavei ahe teieté oyapo uca tũparo oreu nara —ehi yuvireco chupe.

<sup>6</sup> Evocoyase oso ahe yuvirecoi vahe rupi. Virovise rumo sãta yuvireco, ahese sundao rereciar omondo ambuae omboripar chupe. Imboripar evocoyase omombehu ñehe aipo ehi vahe: “ ‘Che Yar, ereyemañecoi rene. Esepia niha, ndiyai eté che rãta pipe nde reique ãgua.

<sup>7</sup> Sese niha che teieté ndasoi nde reca. Nde ñehe pipe tõi rumo che remimboacua erembogüerara.

<sup>8</sup> Esepia, che avei niha areco che cuaita. Iyavei areco sundao che voya. Eso peve, ahese ñepeu upe, ahe evocoyase oso voi eté; ambuae upe: Erio, ahese, ou voiño ité cheu. Ipare, Ereyapora co mbahe, ahese che rembiguai upe, ahe evocoyase che reroyano voi’ ehi ore mboripar” ehi Jesús upe yuvireco.

<sup>9</sup> Aipo oyeupe hese Jesús, “¡Too!” ehi. Ipare aipo ehi vupindareta upe:

—Supi eté ndasepiai vahe ité co mbia che reroya tupri vahe nungar judío eta pãhuve —ehi.

<sup>10</sup> Yuviroyevipase sundao rerecuar mboripar sêtave yuvireco, aheve osepia evocoi semimboacua yuvireco ocuera tuprise.

*Jesús ombogüerayevi cuña imer mano vahecuer membri cuimbahe*

<sup>11</sup> Ipare voi Jesús oso tecua Naín ve, iyavei semimbohe yuvirasoño ité supi ava rehi reseve avei no.

<sup>12</sup> Virovise tecua oso, osepia tehögüer ava virocuase yuvireco ñoti ãgua. Ahe cuña imer mano vahecuer membri ñepe vahe ité viña. Tecua pipendar setá iteanga ava yuviraso supi.

<sup>13</sup> Cuña repiase rumo, oiparaisuereco. Ipare aipo ehi chupe:

—Ereyaseho eme —ehi.

<sup>14</sup> Evocoyase oyemboya oso, opoco tehögüer riru rese. Sese ovosii vahe evocoyase viropitaño yuvireco chupe. Ipare aipo ehi tehögüer upe:

—Mbia chñivahe, che aipo ahe ndeu: ¡Eñarapuha! —ehi.

<sup>15</sup> Evocoyase omano vahecuer oñarapuha oñ iyavei oñehe no. Ichui Jesús omondo ichi upe.

<sup>16</sup> Opacatu tupri ité ava oyembosiquiye sepiase yuvireco:

—Cũritei oyemboyecua Tũpa ñehe mombehusar seco ivate vahe yande pãhuve cute —ehi yuvireco.

Iyavei,

—Tũpa niha ou güecua pñivii ãgua oico —ehi avei yuvireco.

<sup>17</sup> Ipare co Jesús rerãcua yandusa opacatu Judea rupi, yivirindar rupi avei no.

*Juan Oporoãpiramo vahe omondo vupindar Jesús recocuer cua uca ãgua*

<sup>18</sup> Juan avei oyandu opacatu co mbahe oico. Esepia niha, supindareta omombehupa co mbahe yuvireco chupe.

<sup>19</sup> Evocoyase omondo ñuvirío vupindar Jesús upe mbahe rese porandu ãgua ‘¿nde ité vo Tũpa Rembiporavo aipo sãrombri ereico, anise oime tie ambuae orosãro vaheerã?’ oyapave.

<sup>20</sup> Evocoyase oyepota yuviraso Jesús upe aipo ehi yuvireco chupe:

—Juan Oporoãpiramo vahe ore mbou ndeu co mbahe rese porandu ãgua: ¿Nde ité vo Tũpa Rembiporavo ereico imombehupri ereyu vaheerã, anise ambuae pñha orosãroa oroico? —ehi yuvireco chupe.

<sup>21</sup> Ahe arí pipeve voi Jesús ombogüera setá ava imbaherasisa sui oico, ava carugar rerecosar sui avei no. Iyavei ava ndasesapisoi vahe setá ombogüera.

<sup>22</sup> Ahese ramo aipo ehi chupe cute:

—Peso, pemombehupa Juan upe mbahe pe rembiepia iyavei pesendu vahe: “Ndasapisoi vahe osareco tupri cũritei yuvireco, ipãri-pãri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa pñirosa resendar ñehesa” peyera chupe.

<sup>23</sup> ¡Oviharetera acoi ava oyeroyaño vahe che rese! —ehi Juan rupindar upe.

<sup>24</sup> Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porêhisave, capihiata ivitu ombova-mbova vahe nungar pñha?”

<sup>25</sup> Anise, ¿pesepia tie iturucuar porañete ai vahe iyemboeteise? Ëgüe ehi vahe rumo secoi mborerecuar guasu guapisave yepi.

<sup>26</sup> ¿‘Mara ehi secocuer’ peye vo chupe? ¿Tũpa ñehe mombehusar ité pñha? Ahe ité, iyavei evocoi niha ivate catu vahe Tũpa ñehe mombehusar sui.

<sup>27</sup> Ahe chupe ité Tũpa icuachiapri aracahendar pipe aipo ehi:

‘Amondora che ñehe mombehusar nde renondeve nde raperã moingatu ãgua’ ehi.

<sup>28</sup> Aracahe suive ndipoi eté ivate catu vahe Juan sui. Yepe ahe ivate catu vahe viña, Tũpa mborerecuasave rumo ava seco mbegüemi catu vahe ivate catu ichui.

<sup>29</sup> “Co iñehe renduse opacatu ava, opacatu guarepochi rerocuasar yuvirecoi vahe avei oñeapiramo uca vahecuer Juan upe yuvireco: ‘Supi eté Tũpa aviye vahe ité’ ehi eté yuvireco cute.

<sup>30</sup> Fariseo eta rumo iyavei Moisés porocuita rese oporombohe vahe ahe noñeapiramo uca potai vahe Juan upe yuvireco, ahe viroño Tũpa remimbotar oyeupendar yuvireco.

<sup>31</sup> “¿Mbahe rese pñha amboyoyara ava recocuer cūrteindar? ¿Mara ehi pñha secocuer?”

<sup>32</sup> Ahe inungar chñhivahe iguayĩ tẽi vahe ocar rupi. Ipare oñehe pucu-pucu omboripar upe yuvireco aipo ehi: ‘Oromoñehe tẽi mimbĩ pẽu, ndapepivoi eté rumo; iyavei orosapucai tẽi sapucaisa viharẽhisa resendar pẽu, ndapeyasehoi avei’ ehi.

<sup>33</sup> Esepia, ou Juan Oporoãpiramo vahe oico. Ahe ndohui vahe pan iyavei ndoihui vahe uva ricuer. Pe evocoyase, ‘Co mbia carugar vireco vahe’ peye tupri tẽi chupe no.

<sup>34</sup> Coiye che ayu, Ava Riquehir, acaru iyavei aihu tupri avei. Ipare, ‘Co mbia icaru guasu ai vahe secoi, iihu guasu ai vahe avei no’ peye cheu; ‘Ava angaipa viyar mboripar tẽi iyavei ava guarepochi rerocuasar mboripar tẽi’ peye avei cheu.

<sup>35</sup> Ava Tũpa mbahecuasa vireco vahe rumo icuasara sembiapo rese” ehi.

### *Fariseo Simón serer vahe rõtave Jesús secoi*

<sup>36</sup> Fariseo Simón serer vahe oñehe Jesús upe: “Terecarumi che piri” ehi. Jesús evocoyase oso sõtave uguapi oĩ mesave.

<sup>37</sup> Ahese cuña angaipa viyar evocoi tecua pendar secoi vahe oyandu ichose Simón rõtave icaru ãgua. Sese viroyepota aheve mbahe sñacua vahe siru pipe seraso sepĩrusu vahe chupe.

<sup>38</sup> Aheve oyasehó ite oñenopiha Jesús pive iyavei güesai pipe opa tupri omoaquĩ ipi. Ipare opaño omombiru oha aprĩ pipe ichui, iyavei oipirupite, oipiyere avei mbahe sñacua vahe ipi rese.

<sup>39</sup> Sepiase fariseo, ipihañemoñeta tẽi: “Co mbia Tũpa ñehe mombehusar itese, oicuaño itera co cuña opoco vahe oyese ndipihai vahe viña” ehi tẽi fariseo chupe.

<sup>40</sup> Evocoyase aipo ehi fariseo upe:

—Simón, amombehu potami mbahe ndeu —ehi.

—Aviye Porombohesar, emombehu ru cheu —ehi.

<sup>41</sup> Evocoyase Jesús aipo ehi chupe:

—Ñuvirio mbia oime virocua guarepochi mbia guarepochi mondosar sui yuvireco. Ñepe virocua guarepochi quiniento tupri mboraviqui repirã ichui. Ambuae evocoyase cincuenta rupive virocua.

<sup>42</sup> Ipare ndoicatu irise ité imboveyĩ ãgua yuvireco chupe, evocoi mbia guarepochi mondosar iñeroño chupe yuvireco —ehi—. Esãha, emombehu cheu, ¿uma evocoyase osaisu catura mbia guarepochi mondosar? —ehi fariseo upe.

<sup>43</sup> —Cheu ndoyavii guarepochi virocua catu vahe ichui —ehi Simón.

—Taa, supi eté aipo ere —ehi Simón upe.

<sup>44</sup> Evocoyase omahe cuña rese aipo ehi Simón upe:

—¡Emahe co cuña rese! Aiquesse acoi nde rëta pipe, nde nderembouimi eté i che pisei ãgua cheu; co cuña rumo güesai pipe oyosei che pi. Ipare omombiru oha aprĩ pipe ae no.

<sup>45</sup> Iyavei nde ndache rovarupitei eve; co cuña rumo, acoi nde rëta pipe che reique ramomiseve che pirupite voi eté.

<sup>46</sup> “Nde nderemondoi mbahe sñacua vahe che ãca rese; co cuña rumo opa tupri voi oipichi mbahe sñacua vahe che pi rese.

<sup>47</sup> Sese co cuña opa oipisi ñerosa oangaipa guasu rese. Esepia, che raisú iteanga. Acoi ava upe nañerosa tuprii vahe rumo, ahe ndoporoaisu tuprii avei” ehi.

<sup>48</sup> Ahese aipo ehi cuña upe:

—Oime nde angaipa upe ñerosa ndeu —ehi.

<sup>49</sup> Evocoyase ambuae ava ichohopri uguapi vahe yuvinoi aheve, ahe aipo ehi oyeupe yuvireco:

—¡Uma pñha co mbia iñero vahe ité angaipa upe! —ehi.

<sup>50</sup> Jesús rumo aipo ehiño cuña upe:

—Nde yeroyasa pipe ereipisi pñsirosa. Sese eso tupriño eico —ehi.

## 8

### *Cuña oipitivi vahe Jesús yuvireco*

<sup>1</sup> Ipare Jesús uguata opacatu tecua rupi, omombehu ñehesa aviye vahe Tupa mborerecuasa resendar oico. Doce vahe apóstol supive yuvirecoi.

<sup>2</sup> Cuña avei yuviraso supi, ahe ombogüera vahecuer carugar rerecosa sui imbaherasisa sui avei no. Ahe ipañuve avei María seci, Magdalena serer yoapisa vahe, ahe ichui osé vahecuer siete tupri carugar;

<sup>3</sup> iyavei Juana Cuza rembireco, ahe mbia Herodes mbahe rese ñangarecuar; Susana iyavei ambuae setá cuña oipitivi mbahe güembireco pipe yuvireco.

### *Yembohesa mbahe miti rese tecocuer mboyoyasa*

<sup>4</sup> Setá ava yuvinose tecua yacatu rupi pipe sui Jesús repia água yuvireco. Ipare oñemonuha guasuse yuvireco, ahese Jesús setá mbahe rese omboyoya-yoya oporombohe aipo ehi:

<sup>5</sup> “Ñepe mbia osé omaheti oico. Ahe otiapi-apiise mbahe rāhii oso, moviro oiti peri rupi. Ahe opa tēi oicambe yuvireco, iyavei vīrai opa tēi yuvirohu.

<sup>6</sup> Iyavei moviro tēi oiti ivi nayanai vahesave ita pāhuve. Sese cūritei sorī; opaño rumo ipiru. Esepia niha, ivi nañaquīi chupe.

<sup>7</sup> Iyavei ambuae oiti yu pāhuve. Ipare oyoya tupri sorī yuvireco; yu rumo opaño oyopi.

<sup>8</sup> Ambuae rumo oiti ivi aviye vahesave. Ipare sorise, iha vai eté yuvireco; ahe iha retacuer amove cien tupri ité ñepepei mbahe miti sui osé” ehi.

Aipo ohe pare, Jesús oñehe pīratá iteanga aipo ehi: “¡Acoi ava osenducua pota vahe che ñehe, toyapisacaño sese!” ehi ava rehii upe.

### *¿Mahera pñha co yembohesa imboyoyasa ambuae mbahe rese?*

<sup>9</sup> Ipare semimbohe eta oporandu yuvireco chupe: “¿Mara oyapave vo aipo co yembohesa?” ehi.

<sup>10</sup> Evocoyase omboyevi chupe: “Pēu Tupa oicua uca ité mbahe ndicuasai vahe omborerecuasa resendar; ambuae ava rumo ambohe tēi ambuae mbahe mboyoyasa pipe; yepe osepia mbahe viña ‘tomahecua eme iyavei yepe osenduño mbahe tosenducua eme yuvireco’ viya” ehi.

### *Jesús omombehu tupri yembohesa mbahe tisa resendar*

<sup>11</sup> “Co yembohesa resendar aipo oyapave aipo ehi: Mbahe rāhii ahe inungar Tupa Ñehengagüer;

<sup>12</sup> iyavei mbahe rāhii peri rupi seitipri, ahe inungar acoi ava osendu tēi vahe Tupa Ñehengagüer yuvireco oyapave. Ipare rumo ou vīrai chupe, ahe inungar carugar ou vahe chupe opaño oyaracua mocañi Tupa Ñehengagüer sui ‘toviroya eme iyavei toñepisiro eme yuvireco’ oyapave tēi.

<sup>13</sup> Acoi mbahe rāhii seitipri ita mahugüer rupi, ahe inungar acoi ava osendu tēi vahe Tupa Ñehengagüer yuvireco iyavei oipisi tupri oviharetosa pipe yuvireco viña no. Ahe

rumo inungar co mbahe miti ndovirecoi vahe guapo oviracua ãgua; viroya raimi tēi yuvireco. Oyepotase rumo mbahe tēi chupe, oyepepi voiño yuvireco ichui.

<sup>14</sup> Acoi mbahe rāhi seitipri yu pāhu rupi, ahe inungar acoi osendu tēi vahe. Ipare rumo oyemboyepepi uca mbegüeño ambuae mbahe rese opihañemoñetá iteangasa pipe tēi, ombahe eta rese iyavei güemimbotarai mbahe tēi potasa pipe avei. Ëgüe ehi ahe ava inungar mbahe miti ndihai vahe ité.

<sup>15</sup> Acoi mbahe rāhi seitipri rumo ivi aviye vahesave, ahe inungar ava vireco vahe opihañemoñetasa aviye vahe iyavei oyemoingatu voi Tūpa Ñehengagüer rese oyapisaca ãgua yepi; viroya tupri ité no; yuvirecoiño ité sese. Ëgüe ehise, oyapo mbahe aviye vahe yuvireco” ehi.

### *Yembohesa tataendi resendar*

<sup>16</sup> “Ndiyai eté ava upe guataendi omoendise omoha vahe que mbahe pipe, ‘Tamondo che rupavrive’ ndehi eté chupe; osupiño ivate imoi opacatu oi pipe yuviroique vahe resape ãgua.

<sup>17</sup> Esepia, ndipoi eté mbahe ñomipri, ndayasepiai vaheerã curi. Iyavei yaposa vahe imombehupirēhi, icuasaño itera curi.

<sup>18</sup> “Sese peyapisaca tupri co ñehesa rese. Esepia, acoi oyapisaca tupri vahe, chupe imondosa catura; acoi nomombitai vahe rumo mbahe güembieroya oyese, ichui serocuasaño itera” ehi oporombohe.

### *Jesús si, tivireta avei*

<sup>19</sup> Ichui Jesús si iyavei tivireta oyepota secosave yuviraso. Ndiyai eté rumo chupe yuviraso vaheerã yuvireco ava rehii sui.

<sup>20</sup> Oime rumo ambuae ava imombehugar chupe,

—Nde si, nde rivireta reseve nde repia pota tēi ocarve yuvireco —ehi chupe.

<sup>21</sup> Ahe rumo aipo ehi chupe:

—Acoi ava osendu vahe che Ru Ñehengagüer yuvireco, viroya tupri vahe avei, ahe che si, che rivri yuvirecoi —ehiño Jesús chupe.

### *Jesús omombituhu i ohitu vahe, ivitu ai reseve*

<sup>22</sup> Ñepe ari Jesús oha carite pipe güemimbohe eta reseve. Ipare aipo ehi:

—Yaso peve ipa rovai —ehi.

Evocoyase ahe yuviraso.

<sup>23</sup> Yuviroguata vitesave, oqueño Jesús ou. Ahese ipa pipe aviyeteramo tēi ivitu ai omboha guasu-guasú carite pipe i, omondo pota ité ipive viña.

<sup>24</sup> Evocoyase semimbohe yuviraso imomba aipo ehi chupe:

—¡Porombohesar! ¡Porombohesar! ¡Yande rerasora moco carite ipive! —ehi yuvireco.

Ahese omahe. Ipare oñehe pĩrata ivitu ai upe iyavei i ohitu vahe upe: “¡Pepituhu!” ehi. Aheseve voi opituhu tupri.

<sup>25</sup> Evocoyase aipo ehi güemimbohe eta upe:

—¿Mahera vo ndapeyeroyai che rese? —ehi.

Ahe rumo osiquiyeño, ndoyembovihaiño iyavei oporandu-randu tēi oyeupe yuvireco:

—¡Mara ehi vahe pĩha co mbia! Esepia niha, ivitu ai, para guasu avei omboyeroya —ehi tēi oyeupe yuvireco.

### *Mbia Gerasa iguar vireco vahe carugar oyese*

<sup>26</sup> Coiye oyepota yuviraso Gerasa ivi rese cute, ahe ambuae ipa coti ivi Galilea rovai.

<sup>27-29</sup> Aheve mbia tecua iguar carugar vireco vahe seci. Aracahe suive nani tupri ité seci iyavei ndopitai vahe ité oi pipe yepi; ãgüe ehi rumo ahe tehögüer ruvipa rupindar tēi seci. Setá rupi carugar ombohe ité sereco yepi. Yepe ava oipocuhacua-acua carena pipe sereco, ipi rupi avei no ‘toviraso iri eme carugar’ oyapave yuvireco chupe viña,



ahe rumo ombosando-sandoño ité iyavei caruguar omoñemi ucaño ava porêhisa rupi sereco. Evocoyase Jesús osêse carite pipe sui, osovañchi ahe mbia. Sepiase rumo, ahe mbia oñenopiha voi oso sovai oñehe pîrata chupe:

—¡Eyepepi che sui, Jesús, Tûpa seco ivate catu vahe Rahîr! ¡Che mombaraisui rene eve! —ehi. Esepia, Jesús opa oyocuai caruguar sereco ‘tosê ichui’ oyapave.

<sup>30</sup> —¿Mara vo nde rer? —ehi chupe.

—Che rer Legión —ehi.

Aipo ehi, esepia niha, setá etepri caruguar yuviroique yavîterve.

<sup>31-32</sup> Oimese rumo cuchi setá ocaru vahe ivîtri ruambesave, caruguar evocoyase oporandu chupe aipo ehi: “Toroiqueñomi tēi co cuchi avîterve” ehi yuvireco chupe ‘tayande mondo eme cañi tēisa apîrēhi vahe pipe’ oyapave viña. “Peiqueño sese” ehi caruguar upe.

<sup>33</sup> Ahese opa yuvînose mbia sui yuviroique cuchi avîterve cute. Aheseve voi cuchi opa yuvînoña yuvîraso ivîvate sui ipa pipe. Aheve ipîve opa tēi eté ocañi yuvireco.

<sup>34</sup> Cuchi rārosar osepiase ahe mbahe yuvireco, opa yuvînoña yuvîraso co mbahe mombehu tecua pipe ava upe, cove rupi avei no.

<sup>35</sup> Ipare setá ava yugüeru aipo mbahe oime vahecuer repia. Oyepotase rumo secosave yuvîraso, aheve osepiase ahe mbia caruguar rerecosarer oguapî oñ ñîpîimi, oyemonde tupri, yaracua tupri avei oico. Ahese oyembosiquiye tēi yuvireco.

<sup>36</sup> Acoi ava osepiase vahecuer, ahe opa mbahe omombehu yuvireco co mbia caruguar rerecosar cuera agüer.

<sup>37</sup> Ahese opacatu ava Gerasa pendar, yivîrindar avei Jesús upe, “Esîri cohava sui” ehi yuvireco. Esepia niha, osiquiyé iteanga yuvireco ichui. Evocoyase oha carite pipe. Ipare osoño.

<sup>38</sup> Yîpîndar rumo evocoi mbia caruguar vîreco vahecuer, “Tasomi tēi nde rupi” ehi viña. Ahe rumo, “Epitaño” ehi.

<sup>39</sup> —Eyevî nde rêtave, emombehupa opacatu mbahe Tûpa oyapo vahecuer nde rese —ehi.

Ahe mbia evocoyase oso opacatu tecua rupi, Jesús oyeupe mbahe apo agüer mombehu.

*Jesús ombogüera Jairo rayri iyavei cuña iturucuar rese opoco vahe*

<sup>40</sup> Oyevise Jesús ipa rovai oso, aheve ava rehî ovîharetosa pipe oipîsi tupri yuvireco. Esepia niha, ava opacatu ité osâro yuvireco.

<sup>41</sup> Ahese Jairo serer vahe oyepota oso Jesús upe, evocoi judío tûparo rese yangarecuar secoi vahe. Ahe mbia oñenopiha sovai oso, oporandu chupe ‘tosomi tēi che rêtave che rayri mbogüera’ oyapave.

<sup>42</sup> Esepia niha, vîreco guayri ñepeimi vahe ité, doce aravîter vîreco vahe. Ahe omano potami eté ou.

Osose Jairo rêtave, aheve perî rupi ava rehî yuvîrasoño supî; oyembotî tupri ité yuvireco.

<sup>43</sup> Ahe ipâhu rupi oime cuña doce aravîter rupi suvî yepîyere-yere vahe. Opa-opa tēi omondo ombahe ocuera âgua repîrâ yepî; ndocueraî eté rumo.

<sup>44</sup> Ahe cuña evocoyase oyemboya oso saquicuei cotî opoco iturucuar popî rese. Ipare ahe pipeve voi opîtuhu suvî ichui.

<sup>45</sup> Evocoyase Jesús oporandu:

—¿Ava vo opoco che turucuar rese? —ehi.

Opacatu ava aipo ehi yuvireco: “Aní eté” ehi. Pedro evocoyase aipo ehi chupe:

—Porombohesar, ava rehî mo oyemboya nde rese iyavei nde moañi-añi yuvireco opacatu rupi —ehi.

<sup>46</sup> —Che rumo aicua oime ava opoco vahe che turucuar rese. Esepia, ayandu che pĩratasa osẽse che sui —ehi Pedro upe.

<sup>47</sup> Ahe cuña ndoicatui oñemi. Sese orĩrii oñenopiha sovai. Oyemombehu chupe opacatu ava rovaque: “Che apoco nde turucuar rese. Esepia, ‘Acuera tuprira apocose iturucuar rese’ ahe ndeu” ehi.

<sup>48</sup> Ahese aipo ehi cuña upe:

—Che rayri, erecuera tupri ité. Esepia niha, che rese ereyeroya ité. Sese eso tupriño —ehi cuña upe.

<sup>49</sup> Jesús ñehe viteseve, ahese oyepota aheve mbia Jairo rēta sui aipo ehi Jairo upe oso:

—Omano nde rayri cute. Eremañeco tēi iri rene Porombohesar —ehiño Jairo upe.

<sup>50</sup> Evocoyase ñehe renduse aipo ehi Jairo upe:

—Aní eresiquiye; nde che rese yeroyasa pipe ité nde rayri ocuerayevira —ehi.

<sup>51</sup> Oyepotase Jairo rētave oso, aheve ndomoingue uca potai eté ava oyeupi. Pedro, Santiago, Juan iyavei cuñatai yesupa upeño oipota seique água.

<sup>52</sup> Aheseve opacatu ava oyaseho ati, ndoyembovihai tēi sese yuvireco. Jesús rumo aipo ehi chupe:

—Peyaseho eme. Co cuñatai nomanoi, oque tēi ou —ehi.

<sup>53</sup> Ava rumo opuca ete-eteño seroyaẽhisave yuvireco. Esepia niha, ahe oicua ité imanose yuvireco viña.

<sup>54</sup> Evocoyase oipopisi cuñatai. Ipare aipo ehi chupe:

—¡Cuñatai, eñarapuha! —ehi.

<sup>55</sup> Ahe evocoyase oñarapuha voi eté ocuerayevi. Ipare Jesús, “Pembocarú” ehi iyésupa upe.

<sup>56</sup> Iyesupa evocoyase, “¿Mara ehi rutei pĩha co?” ehi tēi yuvireco chupe. Jesús rumo omombehu chupe: “Ndapemombehui chietera que ñepeí ava upe” ehi.

## 9

### *Jesús doce güemimbohe omondo Vu Tũpa mborerecuasa resendar mombehu água*

<sup>1</sup> Jesús opa omonuha güemimbohe doce vahe oyeupe. Ipare omondo opĩratasa opacatu upe caruguar ambuae-ae tēi vahe imboyepepi água ava sui iyavei ava mbogüera água imbaherasisa sui.

<sup>2</sup> Opa omondo Vu Tũpa mborerecuasa resendar mombehu água, ava imbaheasi vahe mbogüera água avei.

<sup>3</sup> Yipĩndar rumo aipo ehi chupe:

—Ndaperasoi chira mbahe pe guatasa rupi: que mbococa, mbahe riru, tembihu, que guarepochi avei no. Perasora rumo ñepeí güeraño pe turucuar; ndahei chira ñuvirío perasó.

<sup>4</sup> Pepitami ranera ñepeí oi pipe güeraño tecua yacatu peico.

<sup>5</sup> Acoi ava ndape moingue uca potaise güeta pipe yuvireco, peyepepiñora ichui iyavei peipipetera pe pi sui ivi cuhi ‘toicua Tũpa ñemoirosa oyeupendar yuvireco’ pe hesave —ehi güemimbohe eta mondo.

<sup>6</sup> Evocoyase opa yuvinose yuviraso, iyavei oñemosai opacatu tecua rupi omombehu Tũpa Ñehengagüer pĩsirosa resendar yuvireco iyavei ombogüera-güera ité ava imbaherasisa sui opacatu oguatasa rupi yuvireco.

### *Herodes, “¿Mara ehi pĩha?” ehi Jesús upe*

<sup>7</sup> Co mborerecuar guasu Herodes oyandu opacatu mbahe Jesús rembiapo. Evocoyase, “¿Mara ahera pĩha?” ehi tēi. Esepia niha, aipo, “Juan ocuerayevi” ehi yuvireco chupe.

<sup>8</sup> Ambuae aipo ehi: “Tūpa ñehe mombehusar Elías, ahe tēi oñemoporēhi iri” ehi yuvireco. Ambuae aipo ehi: “Que ñepei Tūpa ñehe mombehusar aracahendar revo, ahe tēi ocuerayevī” ehi yuvireco viña.

<sup>9</sup> Herodes rumo aipo ehi:

—Che niha ayasia uca Juan ãca —ehi—. ¿Uma rerãcua pīha evocoyase ayandu? —ehi tēi. Sese Herodes osepia pota ité Jesús.

### *Jesús oyopoi cinco mil cuimbahe*

<sup>10</sup> Apóstol oyevipase Jesús upe, ahese opa tupri mbahe güembiapogüer omombehu yuvireco. Ahese opa viroyepipi ava rehii sui, viraso ivi iporupirēhisave tecua Betsaida cotive.

<sup>11</sup> Ahe ava rehii rumo oyanduse yuvireco, yuvirasoño saquicuei. Evocoyase, “Perioño” ehi chupe. Ipare oñehe Vu Tūpa mborerecuasa rese ava upe iyavei ombogüerapa ava imbaherasisa sui.

<sup>12</sup> Caharuse co doce semimbohe oyemboya yuvireco sese aipo ehi chupe:

—¿Ndiyai vo eremondopa ava, topituhu yuvireco iyavei toseca mbahe güemihura tecua-tecuami cōi vahesa rupi? Esepia niha, cohava ndipoi eté mbahe —ehi yuvireco chupe.

<sup>13</sup> Ahe rumo aipo ehi güemimbohe eta upe:

—Pe pemondora mbahe semihura yuvireco —ehi.

Semimbohe aipo ehi yuvireco chupe:

—Poyandepomi tēi rumo pan orovireco, ñuviriomi tēi avei pira, toroso ayase co ava opacatu remihura rerocua —ehi yuvireco chupe.

<sup>14</sup> Esepia niha, cuimbahe retacuer cinco mil tupri. Jesús rumo aipo ehi güemimbohe eta upe:

—Pemboyaho cincuenta rupi-rupi imboguapi —ehiño.

<sup>15</sup> Ëgüe ehi semimbohe yuvireco chupe. Ipare oguapi opacatu ava yuvireco.

<sup>16</sup> Evocoyase oipisi poyandepo pan iyavei ñuvirío pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehii upe imondo ãgua yuvireco.

<sup>17</sup> Evocoyase opacatu ava ocaru vahe ihitaropa tēi yuvireco. Ipare semimbohe omboapipopa doce tupri iruova sembihu rumbirer yuvireco.

### *Pedro, “Jesús, Tūpa Rembiporavo Poropĩsirosar seci” ehi*

<sup>18</sup> Ñepei ari pipe Jesús oyerogui ahe ae güemimbohe pãhuve. Ahese oporandu güemimbohe upe:

—¿Mara ehi vo ava oñehe yuvireco che rese? —ehi.

<sup>19</sup> —Amove ava, “Juan Oporoãpiramo vahe” ehi yuvireco ndeu; ambuae, “Elías” ehi yuvireco ndeu, iyavei ambuae, “Aviyeteramo que ambuae Tūpa ñehe mombehusar aracahendar ocuerayevī” ehi yuvireco ndeu —ehi.

<sup>20</sup> Evocoyase oporandu güemimbohe upe:

—Pe no, ¿“Ava co seci” peye ru pe cheu no? —ehi.

—Nde niha Tūpa Rembiporavo Poropĩsirosar ereico —ehi Pedro imboyevi chupe.

### *Jesús omombehu omano ãgua*

<sup>21</sup> Ahe rumo aipo ehi güemimbohe eta upe: “Pemombehui rene Tūpa Rembiporavo che recosa ava upe” ehi.

<sup>22</sup> Iyavei aipo ehi chupe:

—Che, Ava Riquehir, che paraisu itera, iyavei opacatu judío rerecuareta, pahi rerecuar ivate catu vahe iyavei Moisés porocuaite rese oporombohe vahe remiamotarēhi aicora. Ahe avei che yuca uca yuvireco; mbosapi ari rupi rumo acuerayevira —ehi.

<sup>23</sup> Ipare aipo ehi opacatu upe:

—Acoi oguata pota vahe che rupi, topoi mbahe güemimbotar tēi aposa sui iyavei inungar-ra curusu rese ovosira viña, toyemoingatu voi che recocuer rese oparaisu āgua ari yacatu rupi iyavei toguata tupri che rupi.

<sup>24</sup> Esepia, acoi ava güetecuer tēi raisupar ocañi tēi itera; acoi ava omocañi tēi vahe rumo güetecuer che recocuer rese, ahe oñepisirora.

<sup>25</sup> Esepia, ¿aviye ai angahu pñha ava upe opacatu mbahe co ivi pipendar pisi āgua tēi, ahe ae tēi omocañise güecocuer yuvireco viña?

<sup>26</sup> Esepia, acoi ava yuvinochi ai vahe che sui iyavei che ñehengagüer sui avei no, che avei, Ava Riquehir, ēgüe ahera ichui acoi ayevise che reco pīratasa pipe, che Ru reco pīrata porañetesa pipe avei sembiguai rehi iva pendar maranehi reseve curi.

<sup>27</sup> Supi eté, oimera amove cohava ava nomano vitei chivaherã, osepia rane itera ouse Tūpa mborerecuasa yuvireco curi —ehi.

### *Jesús ñecuñaaro agüer*

<sup>28</sup> Ocho ari pare Jesús oyeupi ivitri rese oso oyerure āgua. Pedro, Santiago iyavei Juan ahe viraso oyeupi.

<sup>29</sup> Oyerure vitesese, oñecuñaaro sepiaca. Iturucuar evocoyase sendi, morochí eteanga.

<sup>30</sup> Ahese ñuvirío ava oyemboyecua yivii imoñeta yuvinocha. Evocoi ava yuvirecoi vahe ahe Moisés, Elías avei.

<sup>31</sup> Oyere tupri sendigüer iporañetesa yuvireco sese, iyavei co ñuvirío mbia oñehe imano āgua rese yuvireco chupe: “Nde niha ereyemomborarara nde mano āgua Jerusalén pipe eico” ehi yuvireco chupe.

<sup>32</sup> Yepe Pedro, ondugüer reseve sopesií eteanga yuvireco viña. Aviyeteramo tēi opa sopesii yuvireco ichui. Ahese osepia Jesús porañetesa yuvireco iyavei co ñuvirío mbia yuvinocha vahe yivii no.

<sup>33</sup> Evocoi mbia oyepepise ichui yuvireco, ahese Pedro aipo ehi chupe:

—Ore mbohesar, javiye ai eté cohava yaico! Toroyapo mbosapi teyupami: ñepeí ndeu nara, ambuae Moisés upe, ambuae evocoyase Elías upe nara —ehi.

Pedro rumo ndoicuai eté aipo ohesa.

<sup>34</sup> Iyavei iñehe vitesese, aviyeteramo tēi iporēhi iva quiha, oyopipa tupri ité. Evocoyase osiquiye tēi yuvireco.

<sup>35</sup> Ipãhuve oyeendu ñehesa aipo ehi vahe: “Co che Rahir, che Rembiporavo ité; peyapisaca catu iñehe rese” ehi.

<sup>36</sup> Opase osendu co ñehesa yuvireco, ahese osepia Jesús, ahe ae ihãise yuvireco. Semimbohe rumo oyeupe tēi ovireco yuvireco; ndomombehu vitei eté ava upe mbahe osepia vahecuer yuvireco.

### *Jesús ombogüera chñivahe caruguar rerecosar*

<sup>37</sup> Ahere ayihive, ogüeyise ivitri sui yuvireco, setá ava oyugüeru Jesús rovaichi yuvireco.

<sup>38</sup> Ahese mbia ava pãhuve aipo ehi pīrata voi eté:

—Porombohesar, ereyapomira mbahe icatupri vahe cheu viña. Esepia, che rahir ñepeimí vahe ité;

<sup>39</sup> caruguar rumo opoco sese, omoase pucu-pucu uca yepi iyavei omoeõha-õha sereco iyavei iyuru rupi tiyui yusu-yusu. Mara-mara tēi vireco iyavei ndopoi potai eté ichui.

<sup>40</sup> Amombehu tēi niha nde remimbohe upe ‘tomboyepemi tēi caruguar ichui’ che yapave viña; nomboyepemi eté rumo ichui yuvireco —ehi.

<sup>41</sup> Ahe omboyevi:

—¡Too, ndapeyeroya tupri vitei eté che rese, co coti tēi vite pe pihañemoñetasa! ¿Mbovi rupi rutei vo aico vitera pe pãhuve che ñemosasa pipe? Eru nde rahir cohava cheu —ehi ahe mbia upe.

<sup>42</sup> Ch̄hivahe oyemboyase rumo sese, caruguar ombov̄iapi voi imondo iv̄ive, imoeōha iri. Jesús rumo oñehe p̄irata caruguar upe imose āgua ch̄hivahe sui. Ahese ch̄hivahe ocuera tupr̄i ité. Ipare omboyev̄i tu upe.

<sup>43</sup> Ahese opacatu ava, “¡Mara ehi rutei!” ehi tēi yuv̄ireco Tūpa p̄iratasa rembiapo av̄iye vahe repiase.

*Jesús omombehu iri omano āgua*

Opacatu ava ndoyembov̄ihai v̄iteseve yuv̄ireco, ahese aipo ehi güemimbohe upe:

<sup>44</sup> —Pesendu tupr̄i che ñehe; peresarai eme ichui: che, Ava Riqueh̄ir, imondopr̄i aicora che amotarēhimbar pov̄rive —ehi.

<sup>45</sup> Semimbohe rumo ndosenducuai eté oyeupe ñehesa yuv̄ireco. Esepia niha, Tūpa ndoipotai eté senducua āgua chupe; osiquiye chupe oporandu āgua yuv̄ireco yepi.

*¿Ava vo seco ivate catu vahe?*

<sup>46</sup> Coiye semimbohe eta omboip̄i oyecop̄i-cop̄i yuv̄ireco ‘¿ava ité p̄iha ivate catu vahe rã curi?’ oyapave.

<sup>47</sup> Jesús rumo oicuaño ip̄ihañemoñetasa yuv̄ireco. Evocoyase oip̄isi ch̄hivahemi seru oip̄ive imoha.

<sup>48</sup> Ipare aipo ehi güemimbohe eta upe:

—Acoi ava oip̄isi vahe co ch̄hivahemi nungar che rer pipe sereco, che ité che p̄isi yuv̄ireco; iyavei acoi ava che p̄isi vahe, oip̄isi aveira che mbousar. Esepia, acoi ava seco mbegüemi catu vahe pe p̄ahu pendar, ahe av̄iye catu vahe —ehi.

*Acoi yande mboyoyasar, ahe ndahei yande amotarēhisar*

<sup>49</sup> Evocoyase Juan aipo ehi chupe:

—Ore mbohesar, orosepia niha mbia ombogüera vahe caruguar p̄iratasa sui ava nde rer pipe oico; ore rumo ndoroipotai chupe evocoiya seco āgua. Esepia niha, ndahei yande rupindar secoi —ehi.

<sup>50</sup> Jesús rumo,

—¡Aní ndapeipotai chupe! —ehi—. Esepia niha, evocoi nungar ava ndahei yande amotarēhisar; ahe rumo yande mboyoyasar —ehi güemimbohe eta upe.

*Jesús oñehengata Santiago upe, Juan upe avei*

<sup>51</sup> Virovise rumo ar̄i ivave Jesús so āgua, ahese ahe aipo ehi: “Yaso ru Jerusalén ve cūr̄itei” ehi.

<sup>52</sup> Evocoyase omondo ava güenonera. Ahe yuv̄iraso tecua Samaria iv̄i rupi ip̄ituhu āgua moingatu viña;

<sup>53</sup> Samaria iguar rumo nomoingue potai eté güētave yuv̄ireco. Esepia, oicua Jerusalén ve ichose yuv̄ireco.

<sup>54</sup> Co mbahe naporai vahe repiase rumo, semimbohe Santiago iyavei Juan oporandu yuv̄ireco chupe:

—Ore Yar, toromboumi tata iva sui co ava mocañi āgua —ehi yuv̄ireco chupe viña.

<sup>55</sup> “¡Aní!” ehi oyemboyere chupe.

<sup>56</sup> Ipare yuv̄iraso ambuae tecuave.

*Oguata pota vahe Jesús rupi*

<sup>57</sup> Yuv̄irasose per̄i rupi aipo ehi mbia Jesús upe:

—Che Yar, che nde rupi aso pota opacatu nde guatasa rupi —ehi.

<sup>58</sup> Ahe rumo aipo ehi:

—Aguara vireco güētara, v̄irai avei vireco guaiti; che rumo, Ava Riqueh̄ir, ndarecoi que che rēta che p̄ituhu āgua —ehi chupe.

<sup>59</sup> Ipare ambuae upe aipo ehi:

—Erio che rupi —ehi.

—Che Yar, che ru manose voi, ñoti pare aguatara nde rupi —ehi.

<sup>60</sup> —Aní —ehi—. Acoi omano vahe nungar ahe ae toñeñetiño yuvireco; nde rumo eso, emombehuño ñehesa Tūpa mborerecuasa resendar ava upe —ehi.

<sup>61</sup> Evocoiyase ambuae aipo ehi chupe no:

—Che Yar, che aguata pota pota nde rupi; yipindar rumo aso ranera che rētave mbahe moingatu che so āgua —ehi.

<sup>62</sup> —¡Aní! —ehi ahe mbia upe—. Esepia, inungar acoi oipisi vahe ivi mboyeresa imohivi tupri āgua, omahese rumo guaquicuei coti, evocoi nungar naporai Tūpa mborerecuasave yuviroique vaherā —ehi.

## 10

### *Jesús oyocuai setenta y dos tupri güemimbohe*

<sup>1</sup> Ipare yande Yar oiporavo setenta y dos ava ñepeipei tecua rupi ñuvirío-río güenonera.

<sup>2</sup> Yipindar rumo aipo ehi: “Supi eté mbahe imonuhapirā setá iteanga; sese oporaviqui vahe rumo moviromi tēi. Sese peporandu mbahe miti Yar upe, tombou ava imonuha āgua” ehi.

<sup>3</sup> “Peso, opomondo ovesami nungar ava mbahe mimba oñaro vahe nungar pāhuve.

<sup>4</sup> Peraso rene mbahe riru iyavei guarepochi siru reseve. Ndapemondugüei chiveira pe pitaqui; iyavei aní pepita ‘avirave’ apo ava upe peri rupi.

<sup>5</sup> Acoi peiquese que oi pipe, yipindar rumo peyapo ranera: ‘Avirave. Tūpa tape rovasa’ peyera.

<sup>6</sup> Acoi aheve oimese ava aviye vahe, ahe oipisira Tūpa porovasasa; anise evocoiyase ndipoi chira porovasasa chupe nara.

<sup>7</sup> Acoi pe pisise, aheve ité pepitañora; pecarura iyavei peihura ahe sembiereco. Esepia, ava poraviquise imboepisa chupe. Sese ndapeguatai chira ambuae ava rēta rupi-rupi tēi. Ñepeipei oi pipe güeraño pepitañora.

<sup>8</sup> Acoi que tecuave peyepotase, ahe pendar pe repia potañose yuvireco, acoi ahe ombouse mbahe yuvireco tapehu, pehuñora ichui.

<sup>9</sup> Ahe pendar imbaheasi vahe evocoiyase pembogüerara, iyavei aipo peyera chupe: ‘Tūpa mborerecuasa namombriimi pe sui’ peyera.

<sup>10</sup> Acoi peyepotase rumo que tecuave, ahe tecua pendar ndape repia potaise yuvireco, peseñora ocar rupi aipo peyera:

<sup>11</sup> ‘¡Co pe recua pipendar ivi chimborer oya vahe ore pi rese oroipipete oreyesui, peicua catu, ore hesa pipe. Peicua tupri rumo Tūpa mborerecuasa namombriimi pe sui’ peyera chupe.

<sup>12</sup> Supi eté acoi ari cañi oyepotase, oimera Tūpa ñemoirosa ahe tecua pendar upe ivate catu vahe ava tecua Sodoma pendar sui” ehi güemimbohe eta upe.

### *Opacatu tecua ndiporeroyai vahe*

<sup>13</sup> “¡Peparaisu ava tecua Corazín pendar, pe avei peparaisu tecua Betsaida pendar! Esepia, acoi poromondiisa pe pāhuve yapopri yaposara yipive tecua Tiro, Sidón ve viña, ahe tecua pendar aracaheve anga omondera turucuar viharēhisa resendar, tanimbu avei omondora oāca rese oangaipa mboasisa pipe yuvireco viña no.

<sup>14</sup> Pe rumo pepisira ivate catu vahe Tūpa ñemoirosa ava Tiro, Sidón pendar sui ari cañi pipe coiye.

<sup>15</sup> Pe avei no tecua Capernaum pendar, ipemoha co ivave pe reco āgua viña! ¡Pe mombosapara rumo ivicuar ipicucu catu vahesave!

<sup>16</sup> “Acoi ava oyapisaca vahe pe ñehese rese yuvireco, ahe evocoiyase oyapisaca avei che ñehese rese. Iyavei acoi ava pe mboyepipiño vahe oyesui, ahe evocoiyase che avei

che mboyepepi oyesui yuvireco. Acoi ava rumo che mboyepepiño vahe oyesui, ahe evocoiyase che mbousar avei omboyepepiño oyesui” ehi güemimbohe upe.

### *Oyevipa iri ava setenta y dos vahe*

<sup>17</sup> Oyevipase ava setenta y dos vahe, oviharetessave aipo ehi yuvireco chupe:

—¿Ore Yar, caruguar avei eté niha ore mboyeroya etepri yuvireco nde rer pipe! —ehi.

<sup>18</sup> Evocoiyase aipo ehi güemimbohe eta upe:

—Taa, asepia ité niha caruguar rerecuar ovipise ìva sui overa vahe nungar.

<sup>19</sup> Che niha amondo pīratasa pēu peguata vaheṛã mboi iyavei mbahe rumbiquiape hari rupi opacatu pe amotarēhisar pīratasa reroyi āgua, que mbahe pe momaraēhi āgua avei.

<sup>20</sup> Peyemboviharetei rene caruguareta pe mboyeroysa. Iya rumo peyembovīha pe rer ìva pendar icuachiapri rese —ehi güemimbohe eta upe.

### *Jesús oviharete*

<sup>21</sup> Ahe pipeve voi Jesús, Espiritu Santo rese, vorivetesa pipe aipo ehi: “Che Ru, che oromboetei. Nde niha ìva Yar, ìvī Yar avei no. Esepia niha, ereñomi co mbahe ava oyesui tēi mbahe oicua vahe sui iyavei co ìvī pipendar ava imbahecua vai vahe sui avei no. Eremboyecua rumo co mbahe ava ndoyembohe tuprii vahe upe nde rese oyeroyase. Ahe niha ereipota ité, che Ru” ehi.

<sup>22</sup> “Opacatu mbahe che Ru ombou cheu. Iyavei ndipoi ava che cua vahe tahir che recose; che Ru güeraño ité rumo che cua. Ndipoi avei che Ru oicua tupri vahe yuvireco no; che güeraño ité aicua. Iyavei acoi que ava upe aicua uca potase, aicua uca tupri aveira” ehi ava eta upe.

<sup>23</sup> Evocoiyase omahe güemimbohe eta rese, chupe güeraño aipo ehi: “Perorivete catu co mbahe pesepia vahe rese.

<sup>24</sup> Esepia niha, setá etepri ava Tūpa ñehe mombehusar yuvirecoi vahe iyavei mborerecuar guasu eta aracahendar osepiā pota tēi mbahe pe rembiepia; ndosepiā eté rumo yuvireco. Osendu pota tēi co pe remiendu yuvireco; ahe rumo ndosendui avei yuvireco” ehi güemimbohe upe.

### *Jesús porombohesa Samaria iguar recocuer sui*

<sup>25</sup> Iyavei no Tūpa porocuaita rese oporombohe vahe oso Jesús upe secoña āgua, mbahe rese oporandu:

—Porombohesar, ¿mara ahera vo vichico teco apirēhi vahe rereco āgua? —ehi chupe.

<sup>26</sup> Ahe omboyevi:

—¿Mara ehi vo Moisés porocuaita icuachiapri pipe? ¿Mara ehi vo ereyeroquise ipipe? —ehi oporombohe vahe upe.

<sup>27</sup> Evocoiyase oporombohe vahe omboyevi:

—“Eresaisura nde Yar Tūpa opacatu nde pihá pipe, opacatu nde recocuer pipe, opacatu nde pīratasa pipe, opacatu nde yapisacasa pipe avei; iyavei eresaisura ava nde cotindar nde yeaisu nungar” ehi Moisés porocuaita —ehi chupe.

<sup>28</sup> —Supi eté —ehi—. Eremboyevi tupri ndeyeupe porandusa cheu. Eremboaviyese evocoi, ahese ererecora tecovesa apirēhi vahe —ehi co mbīa upe.

<sup>29</sup> Co mbīa rumo oyeepi pota. Sese aipo ehi chupe:

—¿Ava vo aipo che cotindar secoi? —ehi.

<sup>30</sup> Evocoiyase omboyevi chupe:

—Oime mbīa Jerusalén sui oso vahe Jericó ve. Ahe peri rupi yuvīnose ava ndipihai vahe yuvireco chupe. Ahe vīrocuapa imbahe yuvireco ichui, iturucuar opacatu reseve; iyavei yuvīrocuā-rocuā yuvireco sese. Ipare oyuca seni seya peri rupi yuvīraso.

<sup>31</sup> Ahese judío pahi ou ahe peri rupi. Evocoi mbīa repiase rumo, co coti rupi oñacuasaño oso.

<sup>32</sup> Ëgüe ehi tupri avei ambuae mbia pahi p̄tivisar levita, osepiase, oñacuasa tupriño avei oso no.

<sup>33</sup> Ipare rumo mbia sepia potapirēhi Samaria iguar oso ahe peri rupi avei. Ahe osepiase, oiparaisuereco.

<sup>34</sup> Evocoyase ahe mbia oyemboya oso sese oiposano yapichasa mbahe quira pipe, uva ricuer sai vahe pipe, oicuhacua avei turucuar pipe chupe. Ipare osupi güeimba harive oaprive, viraso ava quesave. Aheve ihañeco sese.

<sup>35</sup> Ahere ayihive Samaria iguar osose, omondo guarepochi ahe pendar oi yar upe. Ipare aipo ehi chupe: “Esãro tuprimi tēi co ava cheu. Acoi ndehañeco catuse sese, amboepi catu irira che yevise ndeu” ehi sēta vahe upe.

<sup>36</sup> Indó, ¿uma vo co evocoyase mbosapi yuvirecoi vahe oyemboava acoi ava ndipihai vahe remimombaraisu upe? —ehi.

<sup>37</sup> Evocoyase ahe mbia aipo ehi:

—Acoi mbia oiparaisuereco vahe iparaisu vahecuer —ehi.

—Supi eté —ehi chupe—. Eyapo tupri avei nde co nungar eico —ehi Jesús co Moisés porocuita rese oporombohe vahe upe.

*Jesús oso Marta iyavei María rētave*

<sup>38</sup> Ipare Jesús güemimbohe eta reseve oguata vite oyepota cuña recosave yuviraso, ahe cuña rer Marta. Ahe omoingue tupri güēta pipe.

<sup>39</sup> Icupihir evocoyase María serer. Ahe oguapi Jesús pive iñehe rendu oĩ.

<sup>40</sup> Marta rumo oyembopihaviracua opacatu mbahe rese oico. Ipare oyemboya oso Jesús rese opihaviracuasa pipe aipo ehi chupe:

—Che Yar, ¿aviye ai vo evocoi che cupihir chini tēi nde piri che poraviqui vitesese? Emombehu chupe, tou, tache p̄tivil rane —ehi chupe.

<sup>41</sup> Omboyevi rumo Marta aipo ehi:

—Marta, Marta, ¿mahera vo ereyemañeco etepri tēi setá mbahe apo ãgua eico?

<sup>42</sup> Iya rumo ñepe mbahe yaposa. Co nde cupihir oiporavo ahe mbahe aviye catu vahe oyeupe che ñehe renduse; ndipoi chietera que ava vīrocua vaherã ichui —ehi Jesús Marta upe.

## 11

*Jesús ombohe güemimbohe eta yerure ãgua rese*

<sup>1</sup> Ñepe arí Jesús oyerure. Iyerure pare semimbohe aipo ehi chupe:

—Ore Yar, ore mbohemi tēi ore yerure ãgua rese eve inungar Juan ombohe güemimbohe eta sereco yepi —ehi chupe.

<sup>2</sup> —Aviye —ehi—. Peyeroquise, aipo peyera:

‘Ore Ru Tūpa, ivave ereico vahe, imboeteipri nde rer tasecoi.

Tou nde mborerecuasa oreu.

Tayaposa nde remimbotar co ivi pipe, iva pendar nungar.

<sup>3</sup> Embou ore rembihi arí yacatundar oreu.

<sup>4</sup> Iyavei ndeñero ore angaipa rese oreu.

Esepia niha, ore oreñero opacatu ore amotarēhimbar upe.

Ore mboangaipa ucai rene eve, ore renose catu mbahe tēi sui eve’ peyera —ehi

<sup>5</sup> Iyavei aipo ehi no:

—Inungar co perecora pe mboripar viña. Ipare pesora ahe sētave p̄tū mbiter rupi aipo peyera chupe: ‘Che mboripar, emboumi tēi mbosapi pan cheu tamboyevire ndeu.

<sup>6</sup> Esepia, ambuae che mboripar oyepota ou che rētave; ndarecoi eté rumo mbahe amondomi vaherã chupe’ peyera chupe.

<sup>7</sup> Ipare ahe, ‘Che mañeco tēi rene eve. Esepia, opa ayoquenda, iyavei co che rahir opa aropituhu seru. Sese ndiyai apūha mbahe mondo ndeu’ ehiñora pēu viña.



<sup>8</sup> Supi eté, yepe nopuhai chietera mbahe mondo pëu pe mboripar secose viña, opũhaño itera rumo 'tache mañeco iri eme' oyapave. Ipape omondoño itera opacatu mbahe pe porandusa pëu.

<sup>9</sup> Sese aipo ahe pëu: Peporandura mbahe rese Tũpa upe, ahese omboura pëu; peseca ahe mbahe, ahese peyosura; inungar pemota oquenda, ěgũe peyera peyeroquisa pipe Tũpa upe, ahese imboisara mbahe mbou ãgua pëu.

<sup>10</sup> Esepia, acoi oporandu vahe mbahe rese, ahe mbahe oipisira; acoi mbahe oseca vahe, iyosura, iyavei acoi oyeroyasa pipe omota vahe oquenda Tũpa upe, chupe imboisara.

<sup>11</sup> "Oimese tahi vahe pe pãhuve, tahir oporanduse pira rese vu upe, ¿omondora pĩha mboi tẽi guahir upe viña?"

<sup>12</sup> anise, ¿omondora pĩha oporanduse mbahe rupiha rese, mbahe rumbiquiãpe tẽi chupe viña?"

<sup>13</sup> ¡Aní! Esepia, pe yepe ava ndaseco põrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru íva pendar omondo catura Espiritu Santo acoi ava oyeupe porandusar upe!" ehi güemimbohe eta upe.

*"Jesús vireco carugar pĩratasa oyese" ehi tupri tẽi ava yuvireco*

<sup>14</sup> Ambuae ari pipe, Jesús osepiã mbia carugar nomoñehengatui vahe. Evocoyase omose carugar ichui. Aheseve voi iñehengatu. Ipape ava rehii sepiase, ndoyembovihai tẽi yuvireco.

<sup>15</sup> Amove rumo ava aipo ehi tẽi yuvireco: "Beelzebú, carugar rereciar pĩratasa pipe revo omboyepipi carugar oico" ehi tẽi yuvireco chupe.

<sup>16</sup> Ambuae ava secoãhasa pipe oporandu yuvireco chupe: "Eyapo ru mbahe nde rembiapo íva pendar nde recocuer cua ãgua" ehi tẽi.

<sup>17</sup> Ahe rumo oicuaño ipihañemoñetasa. Evocoyase aipo ehi chupe:

"Que mborereciar guasu povri pendar ovava-vavase oyeupe oyeamotarẽhisave yuvireco, ahese evocoi mborereciar pĩratasa ocañi tẽira. Iyavei ava omu rese ae oyeamotarẽhi vahe, oyemocañi aveira yuvireco no.

<sup>18</sup> ěgũe ehi avei niha carugar. Esepia, sereciar omboyepipise opovri pendar, ovavara oyeupe yuvireco viña. Ahese oyemocañi tẽira yuvireco. Co ñehesa aipo ahe pëu. Esepia pe, 'Beelzebú pĩratasa pipe tẽi opa omose carugar ava sui oico' peye tẽi cheu.

<sup>19</sup> ěgũe ahese rumo viña, ¿ava pĩratasa pipe ru evocoyase pe voya omboyepipi carugar ava sui? Pe voya ae omboyecuarã pe ñehe pe rembiavi yuvireco pëu.

<sup>20</sup> Che rumo Tũpa pĩratasa pipe carugar amboyepipi ava sui. Sese cũritei Tũpa mborerecuasa oyepota ité pëu.

<sup>21</sup> "Inungar oime ava ipĩrata etepri vahe, iyavei vireco oyeroyasa. Ipipe osãro güeta opacatu mbahe ipipendar avei icañiẽhi ãgua.

<sup>22</sup> Acoi ouse rumo ambuae ipĩrata catu vahe chupe, ahe osecoreroyise, opa vırocua iyeroyasa ichui. Evocoyase güembierocua ahe opa vıraso oyeupe.

<sup>23</sup> "Acoi ava ndache mboyoyai vahe, ahe che amotarẽhimbar yuvirecoi; iyavei acoi ava ndosecai vahe ava cheu, ahe omosai tẽi yuvireco che sui" ehi.

*Carugar oyevi iri güeco agüerve*

<sup>24</sup> "Acoi osẽse carugar ava sui, uguata tẽi ivi ipiru vahe rupi opituhu ãgua reca. Ipape rumo ndoyosuisse, ipihañemoñeta oyeupe, 'Ayevi irira che reco agüerve vicho' ehi.

<sup>25</sup> Aheve oyevise, osepiã iri secocuer inungar oi sahuvapri tupri.

<sup>26</sup> Sepiase, oso siete carugar naporai catu vahe reca. Ichui güeruse, oyoya guasu yuviroique co mbia pĩha pipe. Sese mbahe tẽi catu ité secocuer yipindar güeco agüer sui" ehi Jesús ava rehii upe.

*Tũpa Ñehengagüer vıroya vahe sovasapri secoira*

<sup>27</sup> Oñehe vitesese aipo mbahe rese, cuña ava rehi pãhu pendar oñehe pĩrata aipo ehi:  
—¡Evocoi mbia sui ereha vahe iyavei nde mboacua vahe, ahe sovasapri tasecoi! —ehi chupe.

<sup>28</sup> Ahe rumo aipo ehi:

—¡Acoi osendu vahe ité che Ru Tũpa Ñehengagüer iyavei viroya vahe ité, ahe sovasapri secoira che Ru Tũpa rovaque! —ehi ahe cuña upe.

*Ava eta ndaseco põrai vahe oporandu poromondiisa rese yuvireco*

<sup>29</sup> Ava rehi oyere ati vitesese Jesús rese yuvireco, ahe aipo ehi: “Pe cũriteindar ava ndaseco põrai vahe, peporandu tẽi poromondiisa che recocuer cua ãgua rese. Che rumo namboyecuai chira ambuae poromondiisa pẽu. Jonás recocuer rese gũeraño opomomahenduhara.

<sup>30</sup> Inungar Jonás poromondiisa secoi ava Nínive pendar upe, ãgüe ehi aveira niha Ava Riquehir reco pipe oimera poromondiisa ava cũriteindar upe.

<sup>31</sup> Acoi ari cañi pipe cuña mborerecuar guasu irohi coti secua vahe porandusave omombehura co ava cũriteindar cañipa ãgua. Esepia, ahe ou amombri ivi sui Salomón mbahecuasa rendu ãgua; cũritei rumo oime ivate catu vahe cohava Salomón sui.

<sup>32</sup> Iyavei ari cañi pipe ava tecua Nínive pendar porandusave omombehura ava cũriteindar cañipa ãgua. Esepia niha, omboasise oangaipa, oyevi Tũpa upe yuvireco Jonás omombehuse Tũpa Ñehengagüer chupe; cũritei rumo oime ivate catu vahe Jonás sui pe pãhuve” ehi.

*Tesapesa yande retecuer resendar*

<sup>33</sup> “Ndayañomi chira tataendi que imoendi imoi; ndayamondo chiaveira que mbahevrive. Iyacatu rumo yamondora ivate tataendi rendave ‘tosesape opacatu ava oique vahe oi pipe’ yande yapave.

<sup>34</sup> Iyavei pe resa inungar tataendi pe retecuer upe. Esepia, aviyese pe resa, opacatu pe retecuer upe osesape. Acoi imarase rumo, pe retecuer pĩtumimbi vahe nungar tẽi.

<sup>35</sup> Sese peicua catu co poroesapesa pereco vahe, tape rereco eme pĩtumimbi vahe nungar.

<sup>36</sup> Co supi eté vahe osesape tuprise opacatu pe pihave, ndipoise que pĩtumimbisa nungar mbahe ipipe, evocoyase ahe inungar tataendi osesape vahe opacatu pe recocuer pipe. Ahese ndipoi que pĩtu vahe pẽu” ehi.

*Jesús omombehu fariseo iyavei Moisés porocuaita rese oporombohe vahe recocuerai*

<sup>37</sup> Opase oñehe Jesús, fariseo viraso gũetave imbocarú. Oiquese sètave oso, oguapi mesave oĩ.

<sup>38</sup> Ocaru renondeve ndoyepoise rumo, ahese fariseo ndoyembovihal tẽi nomboaviyeise judío porocuaita.

<sup>39</sup> Ahe rumo aipo ehi fariseo upe:

—Inungar igua riru iyavei tembihu riru icupe rupi tẽi yoseipri, ipipe rumo iquiha opitaño ité, ãgüe ehi tupri avei pe recocuer pe monda raisave mbahe-mbahe tẽi pe reco pipe.

<sup>40</sup> ¡Pe ndayaracuai vahe peico! ¿Ndapeicuai vo pe rete aposar, pe piha aposar avei?

<sup>41</sup> Sese pemondo porerecosa ava iparaisu vahe upe pe recatẽhiẽhisa pipe. Evocoyase ipipe sui opacatu imoatirombri peicora.

<sup>42</sup> “¡Peparaisu pe fariseo! Esepia, yepe pe remiti sui pemondo peyacatu ñepeipei diez vahe sui Tũpa upe viña, pe rumo ndaperoyai teco ivisa iyavei peseyaño tẽi Tũpa poroaisusa. Iyacatu rumo peyapora evocoi mbahe pe porerecosa sui pe poiẽhisa pipe viña.

<sup>43</sup> “¡Peparaisu pe fariseo! Esepia, peipota pe renda porañete catu vahe pe guapi ãgua tũparo pipe, iyavei peipota pẽu opacatu ‘avirave’ oyapora ava pe mboeteisave ocar rupi yuvireco.

<sup>44</sup> “¡Peparaisu! Esepia, pe recocuerai inungar tehõgüer ruvipa icuaẽhise ava oguata ihari rupi yuvireco” ehi chupe.

<sup>45</sup> Evocoyase Moisés porocuita rese oporombohe vahe,  
—Porombohesar —ehi—, aipo eremombehu vahe pipe niha ava ore amotarẽhiño yuvireco —ehi.

<sup>46</sup> Ahe rumo aipo ehi:

—¡Peparaisu avei pe Moisés porocuita rese oporombohe vahe! Esepia, pemondo porocuita yavai vahe ava upe; pe rumo evocoyase ndapeipitiviimi eté ahe ava imboaviye ãgua rese yuvireco.

<sup>47</sup> “¡Peparaisu! Esepia, pemoiñgatu Tũpa ñehe mombehusar ruvipagüer peico Tũpa mboeteisa angahu pipe tẽi. Pe ramoi teieté rumo oyuca yuvireco.

<sup>48</sup> Evocoyase pemboyecua co pe ramoi eta pihañemoñeta agüer secocuer moña pipe peico. Esepia, ahe oyuca Tũpa ñehe mombehusar yuvireco. Pe evocoyase cũritei pemoiñgatu vite suvipagüer peico.

<sup>49</sup> “Sese Tũpa ombahecuasa pipe aipo ehi: ‘Amondora che ñehe mombehusar, apóstol avei ndiporeroyai vahe upe. Ahe ipãhu pendar oyucara yuvireco. Iyavei ambuae mara-mara tẽi virecora yuvireco’ ehi.

<sup>50</sup> Esepia, ava ndiporeroyai vahe cũriteindar upe ité omondora oñemoirosa opacatu oñehe mombehusar yucagüer rese aracahe suive, cũriteindar avei oyucase yuvireco.

<sup>51</sup> Abel yuca agüer suive oyepotara Zacarías yuca agüerve oso. Ahe oyuca tũparo marañehi rocar mbahe reropovêhesa rovai. Supi eté aipo ahe pẽu: Tũpa opara omondo oñemoirosa ahe yuca agüer rese ava ndiporeroyai vahe cũriteindar upe curi.

<sup>52</sup> “¡Peparaisu pe Moisés porocuita rese oporombohe tẽi vahe! Esepia, pe mbahecuasa aviye soquendapri pereco ava sui. Pe niha ndaperoyai, iyavei ambuae ava upe ndapeipotai seroya ãgua” ehi chupe.

<sup>53</sup> Ipare Jesús osẽ oso ichui. Ahese Moisés porocuita rese oporombohe vahe iyavei fariseo eta oñemoiró iteanga yuvireco sese. Ahe omañeco tẽi, oporandu-randu mbahe rese yuvireco chupe,

<sup>54</sup> osecõãha-ãha tẽi mbahe pipe ‘toyavi angahu oñehe yandeu’ ohesa pipe yuvireco.

## 12

### *Fariseo recocuer rese Jesús oñehe*

<sup>1</sup> Ahe pipeve avei ava oñemonuha atí iteanga oyemboti tupri oyemombo guasu-guasú yuvireco. Yipindar Jesús güemimbohe upe rane omboipi oñehe: “Peñearo tupri fariseo pan mboapeposa nungar sui. Esepia, ahe ndoyavi supi tupri vahe viña; ndahei eté rumo.

<sup>2</sup> Esepia, yaposa vahe imombehupirẽhi cũritei icuasaño itera curi. Iyavei mbahe ñomipri icuasaño aveira no.

<sup>3</sup> Supi eté opacatu mbahe pemombehu vahe pĩtumimbisave, ahe sendusa tupri ara ari pipe coiye; iyavei acoi mbahe pemombehu vahe peyeupeñomi ‘tosendu eme ambuae ava’ pe hesa pipe, serosapucaisara oi harive opacatu ava rovaque” ehi.

### *¿Uma sui pĩha siquiyesara?*

<sup>4</sup> “Iyavei aipo ahe pẽu, che mboripareta: ndapesiquiyei chira acoi ava pe yuca potasar sui. Esepia, ipare ndoicatu iri ambuae mbahe apo ãgua pẽu.

<sup>5</sup> Che rumo amombehura pẽu uma sui pesiquiyera: acoi oicatu vahe omborerecuasa pipe pe yuca pare pemondo tata guasuve. Ahe ichui eté pesiquiyera.

6 “Pe pemondo poyandepo v̄irai ñuvirío guarepochi rupivemi t̄ei yepi. T̄upa rumo ndasesarai eté que ñepei sui.

7 T̄upa niha oicua ñepei-pe yande ha retacuer. Sese, pesiquiye eme; pe niha ivate catu vahe ité peico opacatu v̄irai sui” ehi.

*“Che aroya ité Jesucristo” ehi vahe opacatu ava rovaque*

8 “Acoi ava ‘che aroya Jesús’ ehi vahe opacatu ava rovaque, che avei, Ava Riqueh̄ir, ‘Co che reroyasar secoi’ aipo ahera che Ru upe sembiguai rovaque.

9 Acoi ava ‘che ndaroyai Jesús’ ehi vahe rumo cheu opacatu ava rovaque, che avei evocoyase, ‘Co ndahei che reroyasar secoi’ ahe aveira che Ru T̄upa upe sembiguai rovaque” ehi.

10 “Iyavei opacatu oñehe-ñehe t̄ei vahe che, Ava Riqueh̄ir, rese, ahe chupe oimeño ñeroisa. Acoi que ava iñehe-ñehe t̄ei vahe rumo Espiritu Santo amotar̄eh̄isave, ahe chupe ndipoi chietera ñeroisa” ehi.

11 “Acoi pe amotar̄eh̄isar che recocuer sui t̄ei pe rerasose porandusave pe recoãha ãgua yuvireco, anise mborerecuar mbahe moingatusar rovai, que ambuae mborerecuareta upe avei no, ‘¿Mbahe p̄iha amombehura?’ ndapeyei chira.

12 Esepia niha, ahe p̄ipeve voi Espiritu Santo pe mbohera aviyeteramo t̄ei mbahe mombehu ãgua rese” ehi güemimbohe eta upe.

*Ñearosa mbahe pota raisa sui*

13 Ñepei mb̄ia ava reh̄i p̄ahu pendar aipo ehi Jesús upe:

—Porombohesar, emombehumi che r̄iqueh̄ir upe, tomboyahomi t̄ei mbahe che mombahesa cheu —ehi.

14 Ahe rumo omboyev̄i chupe:

—Che mbor̄ipar, che ndachecuitai mbahe moingatu ãgua, mbahe mboyaho-yaho ãgua avei —ehi ahe mb̄ia upe.

15 Ipare aipo ehi:

—Peñearo tupri opacatu mbahe pota raisa sui. Esepia niha, ndahei mbahe rereco at̄i ãgua pe recocuer —ehi.

16 Ipare omboyoya ambuae mbahe rese imbohe: “Oime mb̄ia mbahe yar, iha tupri ai eté semiti.

17 Ahese ipihañemoñeta oico oyeupe: ‘¿Mara ahera p̄iha che rembipoho rereco?’ ehi t̄ei. ‘Ndareco iri eté yapocatu ãgua’ ehi.

18 Ipare ipihañemoñeta cute: ‘Aicua mbahe che rembiaporã. Opara aroȳi tembihu r̄eta. Ichui ayapo irira ambuae tuvichá catu vahe. Aheve ayapocatura che remiti r̄ah̄i opacatu mbahe areco vahe avei no.

19 Evocoyase aipo ahera cheyeupe: Che mbor̄ipar, oime setá mbahe cheu araviter momba-momba ãgua; sese c̄uritei ap̄ituhura vichico, acarura, acahura iyavei ayemboviharetera no, ahera’ ehi.

20 T̄upa rumo aipo ehira chupe: ‘Mb̄ia, nandearacuai eté eico, co p̄itu p̄ipeve voi eté eremanora. Co mbahe nde rembiapocatu, ¿ava mahera p̄iha evocoyase?’ ehira chupe.

21 Ëgüe ehi eté niha que ava oyeupeñomi t̄ei mbahe omonuha at̄i vahe, iparaisu rumo T̄upa rovaque” ehi ahe mb̄ia upe.

*T̄upa osãro opacatu guah̄ir*

22 Ipare aipo ehi Jesús güemimbohe upe: “Co amombehura p̄eu: Ndapeyemomahenduha guasu ai chira pe remihura rese pe recove ãgua, pe turucuarã rese t̄ei avei no.

23 Yande recovesa rumo av̄iye catu vahe tembihu sui; yande retecuer avei av̄iye catu turucuar sui no.

<sup>24</sup> Pesepia v̄irai: nomaheti vahe, nomonuhai vahe avei, ndovirecoi vahe avei mbahe r̄ahi r̄eta yuvireco. Tūpa rumo omoime mbahe itohu. ¡Pe rumo ivate catu vahe ité peico v̄irai sui!

<sup>25</sup> Ndipoi eté que ñepepe pe p̄ahu pendar oicatu vahe op̄ihañemoñetá iteangasa p̄ipe t̄ei güecocuer mbosasaviño ãgua.

<sup>26</sup> Supi eté ndapeicatuise yapo, ndiyai peyemomahenduha guasu ai mbahe rese.

<sup>27</sup> “Pemahecua ru mbahe potri caha p̄ipendar rese: ndoporaviqui eté iyavei ndoipiai oturucuarã. Iyavei no yepe mborerecuar guasu Salomón v̄ireco setá mbahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese.

<sup>28</sup> Tūpa niha omboporañete raimi t̄ei mbahe potri caha p̄ipendar. Ichui sapisapaño horno p̄ipe. ¡Ahe rumo omondo catura turucuar p̄eu, pe ava nimbahe reroya tupri vahe!

<sup>29</sup> Sese, ‘¿Mbahe p̄iha yahura, mbahe p̄iha yamondera?’ ndapepei chira pe yemomahenduha guasu aisa p̄ipe.

<sup>30</sup> Esepia, ava Tūpa reroyasar̄ehi co ivi p̄ipendar aipo nungar mbahe reseño t̄ei ipihañemoñeta yuvireco yepi. Pe Ru Tūpa rumo oicua ité p̄eu mbahe ipane vahe.

<sup>31</sup> Av̄iye catu rumo pesecara pe Yar Tūpa povr̄ive pe reco ãgua, ahese omboura que mbahe ipane vahe p̄eu” ehi.

#### *Ivave mbahe eta oime vahe yandeu*

<sup>32</sup> “Aní pesiquiye, che ovesa nungar, yepe pe moviromi t̄ei peico viña, pe Ru rumo oporoaisusa p̄ipe oipota opovr̄ive pe rereco ãgua.

<sup>33</sup> Pemondopa mbahe pereco vahe ava oipota vahe upe. Ipare pemondo sepri avei iparaisu vahe upe. Ahe yapocatusa ivave mbahe r̄iru ndituyui vahe nungar p̄ipe. Aheve ava imonda rai vahe ndoiquei chira ñomi ãgua pe sui iyavei mbahe raso nomomarai chiaveira.

<sup>34</sup> Esepia, pe mbahe pe rembiereco setá catu vahesa rupi-rupi pe p̄ihañemoñeta yepi” ehi.

#### *Peyemoingatu Tūpa Rah̄ir yevi ãgua*

<sup>35</sup> “Peyemoingatu tupri che yevi ãgua. Inungar tataendi ndogüei vahe, pemboyecua tupriño ité che recocuer pe recocuer p̄ipe ava upe.

<sup>36</sup> Peico imboacuapri güerecuar os̄aro vahe nungar mendasa sui iyevise, oquenda imotase, omboi voi vahe yuvireco chupe.

<sup>37</sup> Av̄iye itera serecuar upe osepiase iyemoingatu voi; evocoyase serecuar ae niha ihañecora sese, omboguap̄ira mesave imbocarú.

<sup>38</sup> Yepe serecuar oyepotara p̄itu mbiter ou viña, anise añihiveive, ahe rumo os̄aroño itera chupe imboi ãgua yuvireco. Evocoyase serecuar av̄iye ai itera chupe.

<sup>39</sup> Peyapisaca tupri co rese: acoi oi yar oicuae mbahe hora imonda vahe yepota ãgua, ahese op̄itara imonda vahe r̄aro güeta p̄ipe sui mbahe renosēehi ãgua.

<sup>40</sup> Êgüe peye aveira peyemoingatu che yevi ãgua. Esepia niha, che, Ava Riqueh̄ir, aporoesap̄iha t̄eira vitu curi” ehi Jesús v̄iroyasareta upe.

#### *Mbiguai omboav̄iye vahe ocuaita iyavei nomboav̄iyei vahe*

<sup>41</sup> Evocoyase Pedro oporandu Jesús upe aipo ehi:

—Che Yar, ¿oreuñomi p̄iha eremombehu co porombohesa eremboyoya vahe ambuae mbahe rese, opacatu upe tie? —ehi.

<sup>42</sup> Evocoyase ombov̄evi Pedro upe aipo ehi: “Acoi ava mbahe rese ñangarecuar omboav̄iye tupri vahe ocuaita, yaracua vahe avei, ahe chupe serecuar oseya icuaitarã güeta p̄ipendar rese hañeco ãgua ‘tembihi tomondo che r̄eta p̄ipendar upe che porocuaita rupi’ ohesave.

<sup>43</sup> Acoi omboav̄iyese ocuaita, ahese ov̄iharetera güerecuar yevise.

<sup>44</sup> Supi eté niha, serecuar oyocuaira opacatu ombahe rese hañeco ãgua.

<sup>45</sup> Ahe mbiguai rumo ‘ndoyepota vitei chira revo che rerecuar’ oya omboetasa cuimbahe iyavei cuña omboipi mara-mara tēi sereco iyavei ocaru, oihu tēi osavaipo-ipoño avei oico.

<sup>46</sup> Ipare rumo serecuar oyepotara imahemohaēhiseve; ahese omombaraisu catura inupa sereco, inungar acoi ndiporeroyai vahe rerecosa yepi” ehi.

<sup>47</sup> “Acoi mbiguai oicua tēise mbahe güerecuar remimbotar, noyemoingatuise rumo iyavei ndoviroyaise oico, ahe evocoyase serecuar oinupara.

<sup>48</sup> Acoi mbiguai nomboaviyei vahe ocuaita icua tupriēhisa pipe, nañemoirosa rutei chira chupe. Esepia niha, acoi imondosa catu vahe icuaitarã, porandusa catura chupe. Acoi oyeroya catu vahe, oporandu catu aveira sese” ehi.

### *Jesús reroyasa pipe sui oimera yeamotarēhisa*

<sup>49</sup> “Che ayu tata nungar yavai vahe reru ãgua co ivi pipendar upe ‘joyandu tarahu yuvireco cute viña!’ viya.

<sup>50</sup> Aique ranera rumo mbahe tēi che recoãhasa pipe, jēgüe ahera che paraisú itera imboaviye ãgua!

<sup>51</sup> ‘Mbahe tupri ai revo güeru co ivi pipe’ ndapeyei chira cheu. Ëgüe ehi rumo che ayu che sui ava yeamotarēhi ãgua.

<sup>52</sup> Esepia niha, co pipe suive ité que poyandepo tupri revo oñemu yuvirecoi vahe amove oyeamotarēhira yuvireco che recocuer sui: mbosapi oyamotarēhira ñuvirío vahe, ñuvirío vahe evocoyase oyamotarēhira mbosapi vahe yuvireco.

<sup>53</sup> Que ava oyamotarēhira guahir, anise tahir evocoyase oyamotarēhira vu; cuña oyamotarēhira omembri, imembri evocoyase oyamotarēhira osi; sovayar oyamotarēhira vovayar” ehi güemimbohe upe.

### *Iva pendar poromondiisa mboyecuasa*

<sup>54</sup> Ipare Jesús aipo ehi ava rehi upe: “Pe pesepiase mbahe pĩtu ari sosa coti sui opũhase, ahese, ‘Oquira’ peye. Ëgüe ehi eté oqui.

<sup>55</sup> Iyavei acoi ivitu oipeyuse irohi coti sui, ahese, ‘Sacú iteangara’ peye. Ipare Ëgüe ehi eté.

<sup>56</sup> ¡Pe Tũpa reroyasar angahu tēi peico vahe! Pe niha peicua mbahe iva rese oyecua vahe tēi iyavei ivi rese mbahe oyecua vahe tēi mombehu, ¡mahera ru ndapeicuai peyeupe mbahe cūrítei oime vaherã mombehu peico!” ehi.

### *Peñero pe amotarēhimbar upe*

<sup>57</sup> “¿Mahera napesãha ranei pe ae ité co mbahe supi eté vahe?

<sup>58</sup> Acoi que ava nde amotarēhisar nde soho ucase nde mondo ãgua mborerecuar rovai, emoingatu tupri voi mbahe eico chupe tenondeve nde rerasoēhi ãgua sovai; anise, mborerecuar nde mondora ava naporai vahe rarõsar upe. Ahe evocoyase nde roquendara.

<sup>59</sup> Supi eté nderesēi chietera acoi eremboepipase voi eté eresēra ichui” ehi ava rehi upe.

## 13

### *Aviye catu ité yañecuñaro*

<sup>1</sup> Ahe pipeve avei yuviraso ava Jesús repia. Ahese omombehu Pilato mbia Galilea pendar yuca uca agüer: Ahe mbia viropovēhese mbahe mimba yucapri yuvireco chupe. Ahe suvi oyeseha mbahe mimba ruvi rese.

<sup>2</sup> Ipare Jesús aipo ehi chupe: “Pemoha co pe: Mbahe tēi oime vahe evocoi mbia Galilea pendar upe, yangaipa guasu catu rese ambuae güecua pendar sui Ëgüe ehi mbahe chupe viña.

<sup>3</sup> ¡Aní rumo! Acoi ndapemboasiise pe angaipa Tūpa upe pe yevi ãgua, pe avei opara pecañi tēi.

<sup>4</sup> Peroya avei acoi ava dieciocho tupri yuvirecoi vahe omanopase Siloé torre oviapise iharive, ‘Ahe yangaipa catu yuvireco ambuae ava Jerusalén pipendar sui’ peye viña no.

<sup>5</sup> Aní rumo; acoi ndapemboasiise pe angaipa Tūpa upe peyevi ãgua, pe avei opara pecañi tēi” ehi.

*Yembohesa ivira higuera ndihai vahe resendar*

<sup>6</sup> Evocoyase Jesús omombehu mbahe omboyoya oporombohe ambuae mbahe rese aipo ehi: “Oime mbia vireco vahe ivira higuera oco pipe. Setá ari ahe oso sepia ‘¿iha pñha?’ oyapave. Ndosecai eté rumo iha sese.

<sup>7</sup> Ahese aipo ehi mbia oco rãrosar upe: ‘Esendu, che ayu pñhi tēi higuera ha reca mbosapi araviter rupi. Ndasepiai eté rumo que ñepe iha sese yepi’ ehi. ‘Eyasiapa; ndiyai ihai tupri tēi cohavē’ ehi.

<sup>8</sup> Ico rarõsar rumo omboyevi chupe aipo ehi: ‘Che rerecuar, ãgüe tehiño vite tēi rane co araviter; amonguhira ivi chupe. Ipape amondora ivi sũ vahe mbahe repochi resendar sese.

<sup>9</sup> Ahese revo ambuae araviter ihara cute; anise ité rumo, ereyasia ucaño itera’ ehi ico rãrosar güerecuar upe” ehi Jesús ava mbohe.

*Jesús ombogüera cuña oyecuhapami vahe mbõtuhusa ari pipe*

<sup>10</sup> Ñepe mbõtuhusa ari pipe Jesús oporombohe judío tũparo pipe.

<sup>11</sup> Aheve oime cuña imbaheasi vahe, dieciocho araviter rupi ahe mbaherasisa vireco, carugar tēi omboyepami uca sereco. Sese ndoicatui opũha tupri oguata.

<sup>12</sup> Osepia rumo Jesús, “Erio” ehi chupe.

—Cuña, cūrítei nanembaheasi iri eico cute —ehi.

<sup>13</sup> Evocoyase omondose opo sese, aheseve voi cuña oyemohivi. Ipape omboetei Tūpa oico.

<sup>14</sup> Judío tũparo rerecuar rumo oñemoiro ahe cuña mbogüerasa rese mbõtuhusa ari pipe. Sese aipo ehi ava eta upe:

—Oime niha seis ari mboraviqui ãgua; ahe ari pipe peyura peposano ãgua, ndahei chira mbõtuhusa ari pipe —ehi.

<sup>15</sup> Evocoyase ahe mbia upe omboyevi aipo ehi:

—Pe Tūpa reroyasar angahu tēi peico vahe, ¿nombohui vo pe pãhu pendar acoi güeimba tiví iyavei guaricu mbõtuhusa ari pipe yuvireco yepi no?

<sup>16</sup> Co rumo cuña, Abraham suindar Carugar omombaheasi vahe dieciocho araviter suive sereco, ¿ndiyai eté pñha evocoyase imbogüerasa mbõtuhusa ari pipe? —ehi tũparo pendar rerecuar upe.

<sup>17</sup> Aipo ehise, opacatu yamotarēhisar yuvinochi tēi yuvireco ichui. Ambuae ava rumo oyemboviahño opacatu Jesús rembiapo osepiase yuvireco.

*Yembohesa mostaza rãhi suindar*

<sup>18</sup> Evocoyase Jesús aipo ehi avei: “¿Mbahe nungar pñha Tūpa povri pendar, iyavei mbahe rese vo amboyoyara?

<sup>19</sup> Oyoya tupri ité mostaza rãhi rese, inungar acoi mbia oñoti vahe oco pipe. Ichui ocuacua, tuvichá iteanga. Ahe sãca rese vñrai rehí oyapo guaitirã” ehi oporombohe.

*Yembohesa pan mboapeposa sui*

<sup>20</sup> Evocoyase Jesús aipo ehi iri: “¿Mbahe rese pñha amboyoyara Tūpa povri pendar?

<sup>21</sup> Oyoya tupri co pan mboapeposa rese, acoi cuña omboyeseha tupri vahe mbosapi sãhambri trigo cuhi rese opacatu imboapepo ãgua yepi” ehi oporombohe.

*Jesús peri icãhimi vahe nungar*

<sup>22</sup> Ipape Jesús osoño Jerusalén ve, opita-pita tecua yacatu rupi oporombohe oico.

<sup>23</sup> Ahe supi ichose, ñepeí mbia oporandu chupe aipo ehi:

—Che Yar, ¿supi eté pñha moviromi tēi ava oñepisirora yuvireco? —ehi.

Ahe evocoyase omboyeví chupe:

<sup>24</sup> —Peyemoviracua tupri catu peique água oquendipi cāhimi rupi. Esepia niha, supi eté setá ava osāha tēira yuviroique vaheṛā ahe oquenda rupi yuvireco viña, ndoyuviroique catui chira rumo yuvireco.

<sup>25</sup> Supi eté ahe inungar oi yar ouse oquenda mboya viña. Amove ava evocoyase ocarve yuvirecoi vite vahe omota tēira oquenda, ‘Ore yar, emboimi tēi oreu’ ehi tēira yuvireco. Ahe rumo aipo ehiñora chupe: ‘Aní, ndopocuai vahe rumo pe’ ehiñora chupe.

<sup>26</sup> Evocoyase ahe aipo ehi tēira yuvireco: ‘Ore niha orocarua vahe, oroihu vahe nde piri, iyavei ore mbohe ore rocar rupi eve yepi’ ehi tēira yuvireco chupe.

<sup>27</sup> Ahe rumo aipo ehira: ‘Ñepeí reseve niha acoi, Ndopocuai vahe, ahe pēu. ¡Pesiri che sui, pe opacatu mbahe-mbahe tēi aposar!’ ehiñora chupe.

<sup>28</sup> Pe rumo imomboprira pe recocuer Tūpa povri sui, sese peyaseho tēira, peymoaitere tēira peico pesepiase Abraham, Isaac, Jacob iyavei opacatu Tūpa ñehe mombehusareta yuvirecoise Tūpa povrive ivave.

<sup>29</sup> Iyavei ava yugüerura añihivei coti sui, caharu coti sui, norte coti sui iyavei irohi coti sui, ahe evocoyase yuviroguapira ocaru Tūpa mborerecuasave ipiri yuvireco.

<sup>30</sup> Supi eté amove ava ndoyavi ipa tēi vahe seique água ivave Tūpa piri viña, ahe ranengatu rumo yuviroiqueño itera ipipe iyavei amove ava tenonde catu vahe ndoyavi ahe rane oique vaheṛā ivave viña. Ahe rumo ipa tēi yuviroiquera —ehi Jesús ava rehi upe.

### *Jesús oyaseho Jerusalén pendar rese*

<sup>31</sup> Ahe ari pipe oyepota moviro fariseo aipo ehi tēi Jesús upe yuvireco:

—Eyepepiño ave sui. Esepia, Herodes niha nde yuca pota oico —ehi tēi yuvireco chupe.

<sup>32</sup> Ahe rumo,

—Peso, tapemombehu aipo mbia aguara nungar tēi upe: ‘Esepia, co pipe iyavei ayihive amboyepepiñora ava sui carugareta vichico, ambogüerañora ava imbahehasisa sui, curi ayihive evocoyase amombara che cuaita’ peyera.

<sup>33</sup> Che rumo aporaviquiño itera co pipe, ayihive iyavei curi ayihive vichico. Ipare asora Jerusalén ve. Esepia niha, ndiyai Tūpa ñehe mombehusar omano co coti tēi Jerusalén sui yuvireco —ehi.

<sup>34</sup> “¡Too rutei pe Jerusalén pendar, peyuca vahe Tūpa ñehe mombehusar, iyavei ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrive, ēgüe ahe pota tēi pe rereco viña, pe rumo ndapeipotai eté!

<sup>35</sup> Sese seyapirā tēi peicora. Iyavei ndache repiai chiaveira peye acoi, ‘Imboeteipri Yar remimbou tasecoi’ peyese voi che repia irira peye” ehi Jerusalén pendar upe.

## 14

### *Jesús ombogüera mbia iruru sui*

<sup>1</sup> Ñepeí mbituhusa ari pipe Jesús oso ocaru mborerecuar fariseo rētave. Aheve ambuae fariseo eta oiviro yuvireco.

<sup>2</sup> Aheve avei mbia iruru vahe secoi.

<sup>3</sup> Evocoyase Jesús oporandu Moisés porocuita rese oporombohe vahe upe iyavei fariseo eta upe avei aipo ehi:

—¿Ipotasa vo mbituhusa ari pipe imbaheasi vahe mbogüera água; aní tie? —ehi.

<sup>4</sup> Ahe rumo noñeheiño yuvireco chupe. Aheve ahe opoco imbaheasi vahe rese, ombogüera. Ipare, “Eso tupriño” ehi chupe.

<sup>5</sup> Fariseo eta upe evocoyase aipo ehi:



—¿Ava pñha pe pñhu pendar novinose voi chira güeimba guaricu, anise tñvi ovñapise ñvicuar pñpe mbituhusa arñ pñpe viña? —ehi.

<sup>6</sup> Ahese nomboyevñ catui eté ññehe yuvñreco chupe.

*Jesús ombohe mendasave ichohopñi yuvñreco*

<sup>7</sup> Ava ichohopñi oiporavo-ravo güenara imboyeroyapñi catu vahe mesave oyeupe nara yuvñreco. Ahe sepiase aipo ehi Jesús imboaracua:

<sup>8</sup> —Acoi que yande soho ucase mendasa pietasave yuvñreco, ndayaguapñi chira ava imboeteipñi catu vahe renda harñve. Esepia, avñyeteramo que ambuae ava ichohopñi oyepotara yande sui imboeteipñi catu vahe yuvñreco.

<sup>9</sup> Ipare yande soho ucasar aipo ehira yandeu: ‘Epñha evocoi sui, co mbñia toguapñi eipeve’ ehira yandeu. Evocoyase yande yachñ tñira yaso ipami tñi yaguapñi.

<sup>10</sup> Yande soho ucase rumo yuvñreco, yaguapñira evocoyase ipa; yande soho ucasar ouse, aipo ehira yandeu: ‘Mborñ, erio cohava tenda imboeteipñi catu vahesave ore pñri’ ehira. Ñgñe yahera imboeteipñi yaico acoi ava yuvñroguapñi vahe rovaque yande pñri.

<sup>11</sup> Esepia niha, acoi ava oyemboivante ai vahe opara seco reroyñsa; acoi ava seco mbegñe vahe rumo, ahe seco mboivante catusara curñ —ehi.

<sup>12</sup> Ipare aipo ehi avei ichohosar upe:

—Ereyapo potase pieta, ndereichoho ucai chira nde mborñpar, que nde rivñri, que nde mu iyavei que nde rñta cotñndar imbahe eta vahe. Esepia niha, ahe omboyevñira ndeu, nde soho ucara oyepñri yuvñreco; ñgñe ehira evocoyase mbahe imboyevñpa yuvñreco ndeu.

<sup>13</sup> Ereyapose rumo pieta, ereichoho ucara ava iparñisu vahe, ava ipo ichutu vahe, anise ipñi chutu vahe, ipñri-pñri vahe, ndasesapñsoi vahe avei.

<sup>14</sup> Esepia niha, ahe ndoicatui mbahe mboyevñ yuvñreco ndeu. Opase rumo ocuerayevñi ava seco catupñri vahe yuvñreco, ahese erevñharetera eico. Esepia, ereipñsira mbahe avñye vahe Tñpa suñndar —ehi.

*Jesús oporombohe carusa rese*

<sup>15</sup> Ññehe renduse rumo, ññepi mbñia yuvñroguapñi vahe mesave, ahe aipo ehi Jesús upe:

—¿Sovasapñi catu ava Tñpa pñri ocaru vahe imborerrecuasave! —ehi.

<sup>16</sup> Evocoyase aipo ehi ahe mbñia upe:

—Oime mbñia oyapo vahe carusa guasu, oichoho uca ava setá oyepñri.

<sup>17</sup> Ipare oyepotase arñ caru ñgua, ahese aipo ehi güembiguai mondo: ‘Toyugñerupa che pñri ichohopñi. Esepia niha, mbahe opa oingatu cute’ ehi.

<sup>18</sup> Opacatu rumo ava, ‘Eñemosañomi tñi cheu’ ehi pñve yuvñreco. Yipñndar mbñia aipo ehi: ‘Che rumo arocua ñvi; iya ité aso sepia. Sese eñemosañi cheu’ ehi chupe.

<sup>19</sup> Ambuae mbñia aipo ehi: ‘Che arocua ramo diez tupñi tñvi, ahe asñha ranera. Sese eñemosañi cheu’ ehi chupe.

<sup>20</sup> Ambuae aipo ehi no: ‘Che amenda ramomi vichico. Sese tñi ndasoi chira’ ehi.

<sup>21</sup> Oyevisse mbiguai, opa tupñi omombehu mbahe güerecuar upe. Ahese serecuar aipo ehi oñemoñrosa pñpe güembiguai upe: ‘Eso voi evocoyase opacatu ocar rupñi. Supñi sui eru ava iparñisumi vahe, que ava ipo chutu vahe, anise ipñi chutu vahe, que ndasesapñsoi vahe, anise que ava ipñri-pñri vahe avei no’ ehi.

<sup>22</sup> Coiye ava reru pare aipo ehi mbiguai güerecuar upe: ‘Che rerecuar, aroya ité nde che cuaita; ipane vite rumo ava’ ehi.

<sup>23</sup> Evocoyase aipo ehi güembiguai upe: ‘Eguata iri ambuae perñ tecua ñvirñndar rupñi avei toyugñerumi che rñtave yuvñreco che pñri, tomboapñpopa ité che rñta yuvñreco’ ehi.

<sup>24</sup> ‘Esepia niha, acoi yipñndar ava aichoho uca vahe ndipoi chietera que ññepi ocaru vaherñ che pñri’ ehi güembiguai upe —ehi Jesús ahe mbñia mbohe.

*Yavai Cristo rupñi guata ñgua*

<sup>25</sup> Ava rehi Jesús raquicuei uguata yuvireco. Sese ahe oyemboyere aipo ehi ava upe:

<sup>26</sup> “Acoi oimese que ava oipota vahe che rupi uguata água, tache raisu catu que ambuae ava sui, que oyesupa, osi, güembireco, guahireta, vivireta iyavei güeindireta sui, oyesui avei. Ëgüe ndehise, evocoyase ndiyai chupe che remimbohe seco água.

<sup>27</sup> Iyavei que ava noñemosañoi vahe mbahe-mbahe tēi upe oiporarase ari yacatu rupi inungar-ra ocurusu rese ovosi vahe viña che rupi uguata água, ahe chupe ndiyai che remimbohe seco água” ehi.

<sup>28</sup> “Que ava pe pāhu pendar omopuha potase oi, ¿ndoyapisaca ranei chira ‘¿amomba angara pñha?’ oyapave?”

<sup>29</sup> Esepia niha, omondose oi renara yipindar. Ipare rumo nomboaviye catuise, ahese opacatu ava sepiase viroñra

<sup>30</sup> aipo ehira yuvireco: ‘Aye evocoi mbia omopuha pota tēi oi viña, ndoicatu eté rumo imboaviye’ ehira yuvireco chupe.

<sup>31</sup> Iyavei que mborerecuar guasu diez mil sundao vireco vahe oyeepi potase ambuae mborerecuar veinte mil ava vireco vahe sui, oyapisaca ranera yipindar icua tupri água ‘¿yaicatura pñha setá catu vahe rese yavava?’ ohesave.

<sup>32</sup> Esepia, ndoicatuise, evocoyase ambuae mborerecuar guasu amombri vite secoise, omondora mbahe mombehúsar mbahe tupri rese porandu água chupe.

<sup>33</sup> Ëgüe ehi avei pe recocuer ndapeseya potaise pe mbahe opacatu, Ëgüe ehi vahe ndahei eté che remimbohe” ehi.

#### *Yande recocuer inungar yucri*

<sup>34</sup> “Yucri aviye vahe ité yandeu; nasehe irise rumo, ndayaicatu chietera imoehe iri água.

<sup>35</sup> Naporai eté ivi upe nara; ndiyai avei ivi mbahe repochi resendar rese oyeseha vajerã. Evocoyase ahe imombopri tēi vajerã. Sese aipo ahe acoi ava oyapisaca pota vahe, toyapisacaño” ehi.

## 15

### *Porombohesa ovesa ocañi tēi vahe resendar*

<sup>1</sup> Opacatu ava sui guarepochi rerocuasar yuvirecoi vahe iyavei ava eta yangaipa guasu vahe, oyemboya Jesús rese ñehe rendu água yuvireco.

<sup>2</sup> Sese fariseo yuvirecoi vahe iyavei Moisés porocuita rese oporombohe vahe yuvireco, ahe oviroñro tēi yuvireco aipo ehi:

—Co mbia ombori pota rai ava yangaipa guasu vahe tēi oico yepi, ocaru avei ipāhuve no —ehi.

<sup>3</sup> Evocoyase Jesús omombehu ovesa resendar yembohesa:

<sup>4</sup> “Que ñepe pe pāhuve virecose cien ovesa güeimba, ipare co ocañira ñepe ichui viña, oseya ranera evocoyase evocoi noventa y nueve tēi aviye vahesave seco água. Ipare oyevira ocañi vahe reca oso, oyosu rane itera viña.

<sup>5</sup> Oyosuse, osupira oachihive vorivetesa pipe.

<sup>6</sup> Ipare oyepotase güetave, omonuhara omboripareta, ocotindareta avei no. Ipare aipo ehira chupe: ‘Yayembovihara che piri. Esepia niha, ayosu ité ovesa ocañi vahecuer cute’ ehira.

<sup>7</sup> Supi eté Ëgüe ehi aveira oime torivetesa guasu catu ivave acoi ñepe ava yangaipa guasu vahe oñecuñarose güecocuerai sui noventa y nueve yuvirecoi tupri vahe sui yuvireco” ehi.

### *Yembohesa guarepochi ocañi vahe resendar*

<sup>8</sup> “Acoi que cuña omocañise ñepe guarepochi diez tupri vireco vahe sui, omoendira tataendi. Ipare osahuvara oi, oseca mbegüera, oyosu rane itera.

<sup>9</sup> Evocoyase oyosuse, omonuhara omboripareta, ocotindareta avei no chupe aipo ehira: ‘Yayembovihara che piri. Esepia niha, ayosu guarepochi che sui ocañi vahecuer cute’ ehira.

<sup>10</sup> Supi eté ãgüe ehi aveira oime torivetesá Tũpa rembiguai ìva pendar rehi upe que ñepeì ava yangaipa guasu vahe oñecuñarose güecocueraì sui” ehi.

*Yembohesa mbia rahir ocañi vahe resendar*

<sup>11</sup> Aipo ehi avei oporombohe: “Oime mbia vireco vahe ñuvirío guahir.

<sup>12</sup> Chihivahe catu vahe aipo ehi oyesupa upe: ‘Che ru, embou mbahe che mombahesa cheu’ ehi. Iyesupa evocoyase omboyaho ombahe imondo chupe.

<sup>13</sup> Ipare coiyé catumi, omonuhapa opacatu ombahe. Ichui oso amombri ambuae tecuave. Aheve oguarepochi oiporupa tẽi ombahe pota raisa pipe.

<sup>14</sup> Acoi oiporupa tẽise rumo opacatu ombahe, ahesé oime tiavor ahe ìvi rupi. Ahe evocoyase ndasiépoi tẽi oico.

<sup>15</sup> Evocoyase oso mboraviqui reca mbia piri aheve. Ahe mbia evocoyase omondo ocove güeimba cuchi rãro ãgua.

<sup>16</sup> Aheve oyemohitaro pota tẽi cuchi rembihu pipe oico viña. Ndipoi eté rumo omondo vahe chupe.

<sup>17</sup> Evocoyase oyemomahenduha tẽi güeta pendar oporaviqui vahe rese: ‘¡Che ru rõtave oporaviqui vahe rumo co omoumbire guasu-guasú tẽi güembihu yuvireco! ¡Che rumo che yuca pota tẽi che rìeporẽhi che rereco cohavé!

<sup>18</sup> Sese ayevira che ru rõtave. Aipo ahera chupe: Ayemboangaipa Tũpa rese, nde rese avei no.

<sup>19</sup> Ahesé che ndahe iri chira nde rahir nungar aico; iyacatu revo ndeu, oporaviqui vahe nungar tẽi che rerecoñora eve, ahera’ ehi.

<sup>20</sup> Evocoyase oyevì iri oso vu rõtave cute.

“Amombri vitemi tahir recosé rumo iparaisu catu chupe, oña voi oso guahir rovaichi, oyaco osovaupite avei.

<sup>21</sup> Ahesé tahir aipo ehi chupe: ‘Che ru, ayemboangaipa Tũpa rese, nde rese avei; ndiya iri nde rahir che reco ãgua’ ehi.

<sup>22</sup> Tu rumo aipo ehi güembiguai upe: ‘Peso, taperumi avìye catu vahe turucuar pemboyemonde, pemonde avei cuã penda sese, pitaqui avei.

<sup>23</sup> Iyavei guaca iquirá catu vahe peyuca. ¡Yayapora pieta guasu!’ ehi.

<sup>24</sup> ‘Esepia, co che rahir avìye omano vahe secoi viña, cũritei rumo oyevì iri cheu’ ehi. ãgüe ehi opacatu sorivete yuvireco pieta apo.

<sup>25</sup> “Tahir cuacua catu vahe rumo ocove vîte secoi. Oyevise ou güeta rerovicave, osendu voi ipieta guasu vahe yuvireco.

<sup>26</sup> Evocoyase oporandu mbiguai upe mbahe oime vahe rese.

<sup>27</sup> ‘Nde rivri mo co oyevì tupri iri ou. Sese nde ru oyuca uca guaca iquirá vahe iyevisa resendar’ ehiño.

<sup>28</sup> Evocoyase tiqehir oñemoirosa pipe, ndoiqú potai oyesupa uve oi pipe; tu rumo osẽño ité ocarve ‘ique’ oya chupe.

<sup>29</sup> Evocoyase tahir omboyevì chupe aipo ehi: ‘Che niha setá araviter rupi oropitivi vichico nde mboyeroyasave viña, nderemboumi eté rumo que mbahe cheu, que mbahe mimba angara viña che mboripar rese ore pieta ãgua’ ehi vu upe.

<sup>30</sup> ‘Indó, cũritei oyepota ndeu nde rahir, omocañi tẽi vahe nde guarepochi cuña ndipihai vahe rese tẽi. Ahe eremboetei catú che sui; ereyuca uca rutei guaca iquirá vahe chupe’ ehi.

<sup>31</sup> “Evocoyase tu: ‘Eyapisacaño, che rahir, nde niha nderesirri vahe che sui. Opacatu che areco vahe rumo nde mbahe ité yepi.

<sup>32</sup> Cũritei rumo iyacatu ité yande rorivetesave yayapora pieta. Esepia, co nde rivri ocañi tēi vahecuer rese yamahe iri' ehi guahir upe" ehi Jesús ava eta mbohe.

## 16

### *Mbahe yar mbahe rese ñangarecuar ndoyemboaracuai vahe resendar yembohesa*

<sup>1</sup> Jesús aipo ehi avei güemimbohe eta upe: "Oime mbia imbahe eta vahe. Ahe vireco mbia ombahe eta rese ñangarecuar. Ahe chupe ava yugüeru mbahe mocañi tēi agüer mombehu.

<sup>2</sup> Evocoyase serecuar ñepeí opĩivĩisar omondo seca, ahe güeruse, '¿Mbahe vo aipo ereyapo eico; ayandu cũritei nde rerãcua? Emoingatupa tupri voiño nde poraviquisa resendar cheu' ehi, 'Nandehañeco iri chira cohava mbahe rese cheu' ehi, 'Nandehañeco iri chira cohava mbahe rese cheu' ehi chupe.

<sup>3</sup> Evocoyase mbahe rese ñangarecuar: '¿Mara ahera pĩha co evocoyase vichico imombopri che recose che poraviquisa sui? Ndareco iri rumo pĩratasa cheyese ivi rese che poraviqui ãgua. Achĩ eteanga aveira rumo mbahe rese che porandu ãgua' ehi tēi.

<sup>4</sup> 'Aicua rumo cute mara ahera vichico: che poraviquisa sui opa che momboise, oimera che pisi tupri vaheã oyepiri' ehi.

<sup>5</sup> Evocoyase oñehe ñepeí-peí güerecuar sui mbahe vinose tēi vahe rese chupe. Yipindar vahe upe oporandu: '¿Mbovi mbahe erenose tēi yande rerecuar sui?' ehi.

<sup>6</sup> 'Cien tupri chereve aceite siru tuvichagüe vahe rese' ehi. Evocoyase, 'Eguapi ru, co oime cuachiar sesendar nde yecuachía agüer. Emondoro, eyapo iri ambuae cincuenta rupindar año' ehi chupe.

<sup>7</sup> Ichui ambuae mbahe vinose tēi vahe upe oporandu no: '¿Mbovi mbahe vo erenose tēi yande rerecuar sui?' 'Cuatro ciento quintar rupindar' ehi. Evocoyase, 'Co oime cuachiar sesendar. Yaicuachiara rumo tresciento veinte quintar rupindar' ehi.

<sup>8</sup> Evocoyase serecuar oyanduse, 'Too, oicua ité mbahe apo' ehi ombopasa rese ombahe rese ñangarecuarer ndipihai vahe upe. Esepia, ahe oyemoingatu voi oyeupe mbahe moingatu ãgua. Supi eté ava ndoicuai vahe Tũpa oicua catu mbahe moingatu ãgua oyeupe Tũpa reroyasar sui.

<sup>9</sup> "Sese che aipo ahe pēu: peiporu pe guarepochi pereco vahe co ivi pipe pe mboripar reime ãgua. Ichui opa tēise pe guarepochi, oimera pe pisi vaheã teco apirēhisave.

<sup>10</sup> "Acoi ava mbahe tupri chíhi oyapo vahe, ahe oyapo tupri catura mbahe tuvichá vahe. Iyavei acoi ēgüe ndehi vahe chíhi vahe rese, ēgüe ndehi chiaveira mbahe tuvichá vahe rese.

<sup>11</sup> Evocoyase ndapemboaviyeise co ivi pipendar pe cuaita guarepochi rese, ahese ndaperecoi chira ivave mbahe rese hañeco ãgua.

<sup>12</sup> Iyavei acoi ndapemboaviye tupriise pe cuaita ambuae ava mbahe rãro pipe, ¿ava pĩha evocoyase omondoro pe mbahe ité pēu viña?

<sup>13</sup> "Iyavei ndipoi chietera ñepeí mbiguai omboyeroya vahe ñuvirío güerecuar. Esepia, ñepeí osaisu catura imboyeroya pipe, ambuae evocoyase ndoyambotai chira imboyeroya potaēhisa pipe. Égüe peye avei ndapeicatui Tũpa mboyeroya guarepochi pota raisa pipe" ehi güemimbohe eta upe.

<sup>14</sup> Aipo ñehesa renduse, fariseo yuvirecoi vahe oguarepochi raisusa pipe oviroĩro yuvireco.

<sup>15</sup> Evocoyase aipo ehi fariseo eta upe: "Pe co ava rembiepiave pe recocuer aviye angahu pe reco viña. Tũpa rumo oicua opacatu pe pihañemoñetasa. Esepia, yepe ava rovaque ndoyavii aviye ai vahe pe recocuer viña, Tũpa uve rumo mbahe tēi eté" ehi.

### *Mborocuita iyavei Tũpa mborerecuasa rese ñehesa*

16 “Yipisuive Moisés porocuita iyavei Tūpa ñehe mombehúsar porombohesa Juan recosa rupive opa. Ichuive tupri ité rumo imombehúsar ñehesa aviye vahe Tūpa mborerecuasa resendar, sese ava iquerēhi catu cūritei aheve yuviroique vaherā.

17 “Yavai catura que ñepe Tūpa porocuita mboaviyeēhi āgua co iva, ivi opa vaherā sui” ehi.

*Jesús oporombohe mendasa sui poiēhi āgua*

18 “Acoi opoi vahe güembireco sui, omendase ambuae cuña rese, ahe oyemboaguasa tēi vahe. Iyavei acoi omendase cuña omenda vahecuer rese tēi, oyemboaguasa tēi vahe avei” ehi Jesús.

*Ava mbahe yar iyavei Lázaro*

19 “Iyavei oime mbia mbahe yar, ahe oyemonde turucuar aviye vahe pipe oyemboetei eteanga, iyavei ari yacatu oyapo pieta opacatu mbahe rese oyemboetei aisa pipe.

20 Oime avei mbia iparaisu ité vahe Lázaro serer vahe. Ahe mbia icaracha ati vahe imboguapisa ivive imoi mbahe yar roquendipive.

21 Co mbia iparaisu catu vahe aipo ehi oyeupe, ‘Tomboumi tēi que güembihu rahicuer oviapi vahe mesa sui’ ehi mbahe yar upe viña. Aheve mbahe yar reimba cave oyemboya sese, icaracha osere yuvireco.

22 Omanose co mbia iparaisu vahe, ahese Tūpa rembiguai eta oviraso yuvireco Abraham piri ivave. Mbahe yar avei omano, opa oñoti yuvireco.

23 “Ahese oso Tūpa ñemoirosave. Aheve oparaisuse, omahe ivate coti, osepia amombri arachendar Abraham Lázaro reseve.

24 Evocoyase osapucái pĩrata: ‘¡Che ramoi Abraham, che paraisuerecomi tēi eve! Emboumi tēi Lázaro che āpecu morohisa āgua ive ocuā pipe. Esepia, che paraisu etepri co tata pĩratagüer pipe vitu’ ehi.

25 Evocoyase Abraham omboyevi aipo ehi chupe: ‘Che rumino, ndemahenduha eipeve nde reco agüer rese nipaneise mbahe ndeu nde recove pipe. Lázaro rumo iparaisumi tēi oico’ ehi. ‘Cūritei rumo Lázaro oviharete oico cohava, nde evocoyase nde paraisu eipeve eico.

26 Iyavei oime co ivicuar ipicucu vahe rasaēhi āgua oreu iyavei pēu no’ ehi.

27 “Ahe mbia aipo ehi: ‘Che ramoi Abraham, emondomi tēi Lázaro

28 che rivri poyandepo vahe upe, chupe iñehe āgua. Ahe tosecuñaro güecocuer yugüeruēhi āgua co tecocuer mbahe tēisave’ ehi.

29 Abraham rumo, ‘Vireco niha Moisés porocuita iyavei Tūpa ñehe mombehúsar rembicuachiagüer yuvireco. ¡Ahe toviroya yuvireco!’ ehiño chupe.

30 Evocoyase, ‘Taa, che ramoi Abraham, que omano vahecuer pāhu pendar rumo yuvirasose chupe, ahe evocoyase omoingatura güecocuer yuvireco viña’ ehi.

31 Abraham rumo aipo ehi chupe: ‘Acoi ndoyapisaca potaise Moisés porocuita rese iyavei ambuae Tūpa ñehe mombehúsar remimombehu rese no, ndoviroyai chiaveira que ava omano vahecuer ocuerayevise yuvireco’ ehi Abraham ava mbahe yar upe” ehi.

## 17

*Iparaisu itera ava oporomboangaipa uca vahe*

1 Jesús aipo ehi güemimbohe eta upe: “Oimeño itera poroãtoisa che reroyasar reiti āgua. ¡Ahe imboangaipa ucasar rumo iparaisu itera!

2 Iyacatu evocoi nungar ava ñapichisa ita mbahe mbocuhisa iyesho rese para guasu pipe imombo āgua chíhivahemi nungar mboangaipa uca rāgüer sui.

3 ¡Sese peñearo tupri!

“Acoi nde mboetasa Tūpa reroyasar oyemboangaipase, pemboaracuara. Omboasi pare oyevisse güecocuer tupri pipe, ahese peñerora chupe.

<sup>4</sup>Supi eté acoi que ambuae ava pe amotarēhi viteso rumo siete yupagüer ñepei ari pipe, acoi ouse pēu siete yupagüer avei, ‘Ēgüe ndahe iri chira’ ehise, peñero chupe” ehi Jesús güemimbohe upe.

*Yayeroyase Tūpa rese oime pīratasa*

<sup>5</sup>Co doce tupri apóstol aipo ehi chupe:

—Emboumi oreu Tūpa rese ore yeroya catu āgua —ehi yuvireco chupe.

<sup>6</sup>Evocoyase yande Yar omboyevī chupe:

—Supi eté, Tūpa rese pe yeroyasa, yepe ndoyavī chira mostaza rāhīi tahīmi vahe viña, co ivira tuvicha vahe upe rumo, ‘Eyeapoho ave sui. Eso eñeñeti para guasu aviterve’ peyese Tūpa rese pe yeroyasa pipe, ahe evocoyase pe mboyeroya itera —ehi.

*Ambuae ava rese hañecosar cuaita*

<sup>7</sup>“Inungar que pe pāhu pendar virecora güembiguai oporaviqui vahe ivi mboyere cove, anise que guaca rāro yuvī rupi viña; ichui iyevise, ¿‘Eique, eguapī terocarū’ ehira pīha sereciar chupe?

<sup>8</sup>Aní eté, ahe rumo aipo ehiñora chupe: ‘Emoingatu voi mbahe che tohu, che toihurā avei. Ipare nde erecarura, ereihura’ ehira chupe.

<sup>9</sup>‘Avīye ndeu’ ndehi chietera icuai pare chupe.

<sup>10</sup>Ēgüe peye avei mbiguai nungar pe opacatu Tūpa pe cuaitarā ombou vahe mboaviyere, ‘Yande niha mbiguai tēi yaico. Esepia, yande cuaita mboaviyesar tēi yaico’ peyeñora” ehi.

*Jesús ombogüera diez tupri ava lepra pipe imbaheasi vahe*

<sup>11</sup>Osose Jesús Jerusalén ve, oguata ivi Samaria iyavei ivi Galilea rupi.

<sup>12</sup>Oyepotase tecuamive oso, ahese yuvinose diez ava lepra pipe imbaheasi vahe yuvireco chupe. Amombrive rumo opitaño yuvireco ichui.

<sup>13</sup>Osapucaí yuvireco chupe aipo ehi:

—¡Jesús, Porombohesar, ore paraisuerecomi tēi eve! —ehi.

<sup>14</sup>Sepiase aipo ehi lepra vireco vahe upe:

—Peyevī, peso, tapeyemboyecua pahi eta yuvirecoi vahe upe —ehi.

Oyevise rumo yuviraso, opa ocuera tupri ombaherasisa sui yuvireco.

<sup>15-16</sup>Evocoyase ñepei ipāhu pendar, Samaria pendar, osepia ocuerasa, oyevī chupe osapucaí pīrata Tūpa upe imboetisave. Oñenopiha oso sovai, oyaivī, “Avīye ndeu” ehi Jesús upe.

<sup>17</sup>Evocoyase ahe aipo ehi:

—¿Ndahei vo acoi diez tupri opa ocuera ombaherasisa sui yuvireco? ¿Aique que ru ambuae nueve yuvirecoi vahe?

<sup>18</sup>¡Co mbīa ambuae ivi pendar güeraño rumo oyevī ‘avīye ndeu’ ohesave Tūpa uve! —ehi.

<sup>19</sup>Evocoyase aipo ehi ahe mbīa upe:

—Eñarapuha, eso tupriño. Nde poreroyasa pipe niha erecuera eico —ehi Jesús chupe.

*Tūpa mborerecuasa yande pāhuve secoi*

<sup>20</sup>Ñepei ari pipe fariseo eta, “¿Marase vo aipo oura Tūpa omborerecuasa pipe mbahe moingatu āgua?” ehi Jesús upe yuvireco. Ahe omboyevī chupe:

—Tūpa mborerecuasa ndahei acoi yasepia vahe.

<sup>21</sup>‘Co secoi, aheve secoi’ ndapeyei chira chupe. Esepia, ahe oicove ité pe pāhuve —ehi fariseo eta upe.

<sup>22</sup>Ipare aipo ehi güemimbohe eta upe:

—Oimera ari pe peipota tēira aico vaherā pe piri que ñepei ari rupi che, Ava Riquehir, che recosa pipe; ndache repiai chira rumo peye.

<sup>23</sup> Iyavei ava, ‘Co secoi, aheve aipo secoi’ ehi tẽira yuvireco cheu. Ndapesaquicue moñai chira rumo.

<sup>24</sup> Esepia, inungar acoi overa vahe osesape guasu iva rese ocua yepi, ãgũe ahera che, Ava Riquehir, vitu ari osupitise che yevi ãgua curi.

<sup>25</sup> Yipindar rumo co ivi pipe che paraisu ranera ava cũriteindar mara-mara tẽi che rerecose yuvireco che repia potaẽhisave.

<sup>26</sup> Inungar ava Noé recose yuvirecoi aracahe, ãgũe ehi tupri aveira che, Ava Riquehir, yevi ãgua renonde.

<sup>27</sup> Esepia, ocaru, oihu, omendaño avei yuvireco. Oyepotase rumo ari ipapapri amarusu viapi ãgua, ahese Noé yuviroique arca pipe. Ambuae ava rumo opa ocañi tẽi yuvireco.

<sup>28</sup> ãgũe ehi avei aracahe Lot recose, ava ocaru tẽi, oihu tẽi, virocua tẽi mbahe omahera yuvireco iyavei mbahe mondosar tẽi, mbahe tĩsar tẽi, oi aposar tẽi avei yuvirecoi oyapisacaẽhisa pipe.

<sup>29</sup> Osẽse rumo Lot tecua Sodoma sui, aviyeteramo tẽi oviapi tata amar nungar iva sui. Opa tupri oyuca ava rehii aracahe.

<sup>30</sup> ãgũe ahe aveira aviyeteramo tẽi che, Ava Riquehir, ayemboyecuar curi.

<sup>31</sup> “Ahe ari pipe acoi ava gũeta harive secoi vahe, ahe toique iri eme gũeta pipe ombahe renose. Iyavei ava que rupi tẽi secoi vahe, toyevi iri eme gũetave.

<sup>32</sup> Sese peyemomahenduha co aracahendar Lot rembireco rese.

<sup>33</sup> Opacatu güecocuer osaisu vahe, ahe ocañi tẽira. Iyavei setecuer tẽi ocañi vahe, ahe rumo oñepisirora” ehi.

<sup>34</sup> “Ahe pĩtu pipe oimera que ñuvirio ava vupave yuviroque vahe yugüeru: ñepi acoi che reroyasar serasosara, ambuae rumo opitara.

<sup>35</sup> Ahese avei ñuvirio cuña ohichora yuvireco: ñepi serasosara, indugüer rumo opitara.

<sup>36</sup> ãgũe ehi aveira ñuvirio ava amombri güecua sui yuvirecoi vahe: ñepi serasosara, indugüer rumo opitara” ehi.

<sup>37</sup> Aipo ñehesa renduse, oporandu yuvireco chupe:

—Ore Yar, ¿que vo aipo ãgũe ehira mbahe curi? —ehi.

Ahe evocoyase,

—Mbahe rehögüer reimesave uruvu oñemonuha atira yuvireco —ehi güemimbohe eta upe.

## 18

*Jesús omboyoya yeruresa cuña imer mano vahecuer iyavei mborerecuar mbahe moingatusar recocuer rese*

<sup>1</sup> Jesús omboyoya ambuae ava recocuer sui querẽhisa pipe yerureño ãgua ari yacatu rupi

<sup>2</sup> aipo ehi: “Ñepi tecuave oime mbia mborerecuar mbahe moingatusar ndosiquiyei vahe Tũpa sui, ambuae ava sui avei.

<sup>3</sup> Ahe tecuave avei oime cuña imer mano vahecuer. Ahe oso co mborerecuar rõtave, ‘Oime ava oyapo mbahe tẽi eté cheu, tomboepi cheu’ ehi chupe.

<sup>4</sup> Yipindar rumo noipitivi potai. Coiye catu rumo cuña ombopihavĩracua tẽise, ipihañemoñeta iri: ‘Yepe che ndasiquiyei vahe Tũpa sui, ava sui avei ndasiquiyei vahe ité,

<sup>5</sup> amoingatuñora rumo mbahe co cuña che mañeco tẽisar upe. Ayapoñora semimbotar cheu iyu pihiehi ãgua’ ehi opihañemoñetasave” ehi.

<sup>6</sup> Ipare yande Yar aipo ehi: “Peyapisaca aipo mborerecuar naporai vahe ñehe rese.

<sup>7</sup> Tũpa avei niha omoingatura mbahe güembiporavo oyeupe yeruresar ari, pĩtu rupindar upe yepi. Nosaro tẽi chiranera opĩtivii ãgua yuvireco.

<sup>8</sup> Supi eté Tũpa omoingatu voira mbahe aviye vahe yande porandusa pipe yandeu. Co rumo che, Ava Riquehĩr, ayevisẽ co ivi pipe vitu, oimera ava moviromi tẽi oyeroya vite vahe che rese yuvireco” ehi Jesús.

*Yembohesa fariseo sui iyavei guarepochi rerocuasar sui*

<sup>9</sup> Ichui Jesús oporombohe iri ambuae ava recocuer rese. Esepia, oime amove ava aviye ai angahu secoi oyeupe viña, iharive rumo viroĩro ambuae ava.

<sup>10</sup> “Ñuvirio ava yuviraso tũparove oyerocuĩ. Ñepeĩ ava fariseo, ambuae evocoyase ava sui guarepochi rerocuasar.

<sup>11</sup> Evocoyase fariseo oso tenonde ava rembiepiave oyerocuĩ aipo ehi: ‘Tũpa, aviye ndeu, che ndahei ambuae ava nungar che recocuer; ndachemondai vahe, ndachereco rai vahe, ndacheaguasa-guasa tẽi vahe. Iyavei ndahei eté che recocuer co mbia ava sui guarepochi rerocuasar nungar tẽi aico no.

<sup>12</sup> Iyavei ñuvirio yupagüer ñepeĩ semana pipe ayecuacu ité nde recocuer rese, iyavei ñepeĩ-peĩ cien guarepochi che poraviqui reprimi aipisi vahe sui amboyaho diez che porerecosa ndeu’ ehi.

<sup>13</sup> Ava sui guarepochi rerocuasar rumo opitaño amombri ichui. Aheve nomahei iva rese oyerocuĩ ãgua oangaipa mboasisa pipe. Oyepochihanupa-nupa aipo ehi: ‘¡Tũpa, che paraisuerecomi eve, che angaipa viyar aico!’ ehi oyerocuĩ” ehi.

<sup>14</sup> “Sese aipo ahe pẽu: co mbia ava sui guarepochi rerocuasar opa oipisi ñerosa Tũpa suindar güetave oso. Fariseo rumo aní eté. Esepia niha, opacatu acoi oyemboivate ai vahe, opara seco reroyisa. Acoi ava seco mbegüe vahe rumo seco mboivate catusara curi” ehi.

*Jesús osovasa chĩhivahe eta*

<sup>15</sup> Iyavei chĩhivahe güeru Jesús uve yuvireco sovasapirã. Evocoyase semimbohe osepiase yuvireco, “¿Mahera vo peruño tẽi chĩhivahe?” ehi opihaviracuasa pipe serusar upe yuvireco.

<sup>16</sup> Jesús rumo aipo ehi:

—¡Mahera ndapeipotai iyu ãgua! Toyugüeruño chĩhivahe cheu. Esepia, co chĩhivahe nungar ava yuviroiquera che Ru Tũpa povrive.

<sup>17</sup> Supi eté acoi ndoipisii vahe che Ru Tũpa mborerecuasa chĩhivahe nungar yuvireco, ahe evocoyase ndoyuviroiquei chietera ipipe —ehi.

*Ñepeĩ mbia mborerecuar imbahe eta vahe omoñeta Jesús*

<sup>18</sup> Ñepeĩ mbia mborerecuar oporandu Jesús upe:

—Porombohesar aviye vahe, ¿mbahe vo ayapora tecovesa apirẽhi vahe rereco ãgua? —ehi.

<sup>19</sup> Jesús evocoyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepeĩ aviye vahe ité, ahe Tũpa secoi.

<sup>20</sup> Ereicua niha co porocuita aipo ehi vahe: ‘Nandeaguasai chira, ndereporoyucaĩ chira, nandemondai chira, nanderemirai chira ambuae ava rese, eremboyeroyara nde ru, nde si avei’ ehi vahe —ehi chupe.

<sup>21</sup> Ahe mbia rumo,

—Che aipo nungar opacatu amboaviye ité che chĩhivahemi suive —ehiño chupe

<sup>22</sup> Aipo ihese rumo,

—Ipane vite mbahe ndeu —ehi—. Emondopa rane nde mbahe, ahe seprimi evocoyase eremondora ava iparaisu vahe upe. Ichui ererecora mbahe aviye vahe ivave cute. Ipare ereguatara che rupi —ehi chupe.



<sup>23</sup> Aipo oyeupe hese rumo, ahe mbia ndoyembovihai tēi. Esepia niha, mbahe yar ité secói.

<sup>24</sup> Sese omahe aipo ehi:

—¡Yavai eté rumo ava mbahe yar reique ãgua che Ru Tũpa mborerecuasave! —ehi—.

<sup>25</sup> Yavai rai camello upe yucuar rupi seique ãgua; ava imbahe eta vahe upe rumo yavai catu che Ru mborerecuasave seique ãgua —ehi.

<sup>26</sup> —¿Ava angahu pĩha evocoyase oñepisirora yuvireco viña? —ehi sendusar chupe.

<sup>27</sup> Evocoyase ahe chupe aipo ehi:

—Ava tēi upe mbahe yavai eté, Tũpa upe rumo ndayavaimi eté —ehi.

<sup>28</sup> Evocoyase Pedro aipo ehi:

—Che Yar, ore rumo opa oroseya ore mbahe nde rupi ore guata ãgua —ehi chupe.

<sup>29</sup> Evocoyase aipo ehi güemimbohe upe:

—Supi eté acoi oseya vahe que güëta, güembireco, viquehĩr, vıvri, oyesupa, que guahĩr Tũpa mborerecuasa rese,

<sup>30</sup> ahe setá iteanga catu oipisira mbahe aviye catu vahe co ivi pipe oseya vahe sui. Ipare rumo tecua ambuaeve oipisi aveira tecovesa apirēhi vahe curi —ehi.

### *Jesús omombehu iri omano ãgua*

<sup>31</sup> Evocoyase yande Yar opa vıraso co cotimi doce güemimbohe. Aheve aipo ehi: “Cũritei yasora tecua Jerusalén ve yaico, aheve omboavıyera co Tũpa ñehe mombehusar rembicuachiagüer co che, Ava Riquehĩr, resendar ñehesa.

<sup>32</sup> Che imondopri aicora ndahei vahe yande mu upe mara-mara tēi che rereco ãgua. Che roeroĩro-ĩrora iyavei ondivi-ndivira yuvireco che rese” ehi.

<sup>33</sup> “Iyavei che nupa-nupara. Ipare che yucara yuvireco. Imombosapisa ari pipe rumo acuerayevira omano vahe pãhu sui” ehi.

<sup>34</sup> Semimbohe rumo ndosenducuai eté ñehe yuvireco. Esepia niha, yavai eté senducua ãgua yuvireco chupe.

### *Jesús ombogüera ñepei mbia ndasesapısoi vahe*

<sup>35</sup> Evocoyase Jesús ovırovıse tecua Jericó oso, aheve mbia ndasesapısoi vahe oguapı oĩ peri popıve porerecosa oyeupe mondo ãgua rese.

<sup>36</sup> Osenduse ahe ndasesapısoi vahe ava rehıi piambu, ahese, “¿Mbahe vo pēu?” ehi ava upe.

<sup>37</sup> Ahe evocoyase, “Jesús, Nazaret pendar, ocuara co rupi” ehi yuvireco chupe.

<sup>38</sup> Evocoyase ahe güendapeve oñehe pĩrata:

—¡Jesús, David suindar, che paraisuerecomi tēi eve! —ehi chupe.

<sup>39</sup> Evocoyase ava tenonde oguata vahe oyaca-yacaño, “Quiriri” ehi yuvireco chupe. Ahe rumo,

—¡David suindar, che paraisuerecomi tēi eve! —ehi pĩrataño ité chupe.

<sup>40</sup> Evocoyase Jesús opıtase aheve, oyocuai ava seru ãgua. Ovırovıse seru yuvireco, aipo ehi ndasesapısoi vahe upe:

<sup>41</sup> —¿Mbahe vo ereipota ayapo vaherã ndeu? —ehi.

—Che Yar, che mbosarecomi tēira eve viña —ehi chupe.

<sup>42</sup> —¡Esareco, erecuera niha! Esepia, ereyeroya ité che rese —ehi chupe.

<sup>43</sup> Ahe ramoseve ndasesapısoi vahe, osareco tupri ité; osoño ité Jesús rupi imboeteisave. Opacatu ava osepia vahe avei omboetei Tũpa yuvireco.

## 19

### *Zaqueo osepia pota Jesús*

<sup>1</sup> Ichui Jesús oique tecua Jericó pipe oguata oico.

<sup>2</sup> Aheve mbia mbahe yar Zaqueo serer vahe seci. Ahe ava sui guarepochi rerocuar rerecuar.

<sup>3</sup> Osepia pota tēi Jesús ‘taicua ité’ oya viña. Ndoicatui rumo opucuehise ava rehī pāhuve sepiā āgua.

<sup>4</sup> Evocoyase ahe oña tenonde oso ‘tasepia ité’ oyapave, oyeupi ivira rese ivate oñ senonera.

<sup>5</sup> Evocoyase oyepotase, omahe Zaqueo rese ivate chinise, aipo ehi chupe:

—Zaqueo, egüeyi poyava. Esepia, asora nde rētave nde piri —ehi.

<sup>6</sup> Aipo oyeupe he ramoseve, Zaqueo ogüeyi voi vorivetesa pipe oipisi.

<sup>7</sup> Sepiase rumo opacatu ava, “Yangaipa guasu vahe rētave tēi oso” ehi yuvireco chupe.

<sup>8</sup> Evocoyase Zaqueo opūha aipo ehi chupe:

—Che Yar, esendu rane, amboyaho tupri che mbahe eta ava iparaisu vahe upe; mbahe añomi vahecuer avei, ayapirasa catu-catura irungatu rupi imboyevi āgua —ehi chupe.

<sup>9</sup> —Co pipe Tūpa oipisiro ité co mbia. Esepia, ahe niha Abraham suindar avei seci.

<sup>10</sup> Esepia, che, Ava Riquehir, ayu co ivi pipe ava ocañi tēi vahe pisiro āgua —ehi Jesús Zaqueo upe.

### *Guarepochi sui yembohesa*

<sup>11</sup> Aipo ñehesa rendu viteseve, Jesús oporombohe ambuae tecocuer resendar rese. Esepia, virovi Jerusalén, “Oyepota voi etera revo Tūpa mborerecuasa” ehi ava yuvireco viña.

<sup>12</sup> Ahe rumo aipo ehi ava upe imbohe: “Oime mbia imboyeroyapri, ahe senoipri oso vahe rā amombri oivi pendareta rerecuarā oyevisē.

<sup>13</sup> Oso āgua renonde oichohopa uca diez tupri güembigui. Ahese opa omondo ñepepepe upe guarepochi sepirusu vahe, aipo ehi chupe: ‘Pepraviqui co guarepochi rese imboeta āgua che yevise nara’ ehi. Ipare oso.

<sup>14</sup> Setá ava rumo secua pendar saquicuei tēi viroiro yuvireco. Sese omondo moviro ava ‘tomombehu: Ore rumo ndoroipotai ore rerecuarā seci āgua, tehi yuvireco’ oya viña.

<sup>15</sup> “Ahe rumo mborerecuar guasu güecosa pipe oyevi ou cute. Opa uca oichoho oguarepochi pisisarer ‘¿mbovi-mbovi piha oipisi oyacatu yuvireco?’ oya.

<sup>16</sup> Evocoyase yipindar mbia guarepochi oipisi vahe ou voi chupe, ‘Che rerecuar, nde guarepochi oyemboeta diez rupi cheu’ ehi.

<sup>17</sup> Evocoyase mborerecuar guasu omboyevi chupe: ‘Mbiguai aviyē vahe ereico, nde cuaita co nde poraviquisa chihimi vahe eremboaviye ité. Sese ereicora diez tecua guasu pendar rese hañeco āgua’ ehi chupe.

<sup>18</sup> Ipare voi ambuae ou chupe, ‘Che rerecuar, nde guarepochi oyemboeta cinco rupi cheu’ ehi chupe.

<sup>19</sup> Aipo ehi tupri avei ahe chupe: ‘Nde evocoyase ereicora cinco tecua pendar rese hañeco āgua’ ehi.

<sup>20</sup> “Ipare voi ambuae ou chupe, ‘Che rerecuar, ndo co nde guarepochi aipoqueño turucuar mi pipe sereco.

<sup>21</sup> Esepia, che asiquiye nde sui. Nderecatēhi mete ai vahe mbahe rese. Ambuae ava poraviqui sui tēi iyavei acoi ndahei vahe mbahe nde remiti, ichui tēi avei ereipisi mbahe ndeyeupe nara yepi’ ehi chupe.

<sup>22</sup> Evocoyase mborerecuar guasu aipo ehi chupe: ‘Nde mbiguai ndaseco pōrai vahe ereico. Nde ñehe sui aicuara nde recocuer. Ereicuse egüe che hesa viña,

<sup>23</sup> evocoyase, ¿mahera ru ndereyapocatu che guarepochi guarepochi apocatusave che yevise voi senose āgua cheu imboyevi catumi āgua viña?’ ehi.

<sup>24</sup> Evocoyase, ‘Perocua guarepochi ichui. Pemonдора acoi diez rupi guarepochi omboeta vahe upe’ ehi vupindar upe.

<sup>25</sup> Supindar rumo aipo ehi: ‘Ore rerecuar, ovireco rumo evocoi diez tupri avei iharive guarepochi’ ehi tēi yuvireco chupe.

<sup>26</sup> Evocoyase mborerecuar, ‘Co rumo supi eté vahe: acoi ovireco vahe, imondosara setá catu chupe; acoi ndovirecoi vahe setá mbahe, ichui serocuasara’ ehi.

<sup>27</sup> ‘Acoi ava che amotarēhimbar, ndache potai vahe mborerecuarã yuvireco, ahe opara peru cohava che rovai yucapa āgua’ ehi” ehi Jesús ava eta upe.

### *Jesús oique Jerusalén pipe*

<sup>28</sup> Jesús aipo ohe pare, oguata vite oso Jerusalén coti.

<sup>29</sup> Evocoyase coiye catu tecua Betfagé iyavei Betania rerovicave, ivitri Olivo ĩpimi, aheve omondo ñuvirío güemimbohe

<sup>30</sup> aipo ehi chupe:

—Peso co tecuamive, yande rovaindarve. Peyepotase aheve, pesepiara guaricu ñapichimbri imoha ava ndoyeupi vitei vahe yuvireco sese. Ahe peyorañora seru.

<sup>31</sup> Acoi, ‘¿Mahera vo peyora?’ ehise que ava pēu, ‘Yar oiporu pota’ peyeñora chupe —ehi güemimbohe upe.

<sup>32</sup> Evocoyase semimbohe yuviraso, semimombehu rupi tupri ité osepia mbahe yuvireco.

<sup>33</sup> Evocoyase oyorase guaricu,

—¿Mahera vo peyora ore reimba? —ehi iyar yuvireco.

<sup>34</sup> —Yar oiporu pota —ehiño yuvireco chupe.

<sup>35</sup> Ipare viraso Jesús upe yuvireco, oicupeao oyeaosa pipe guaricu yuvireco chupe. Ipare omboyeupi sese oso āgua.

<sup>36</sup> Oyeupise oso guaricu harive, oipipira ava oturucuar peri rupi senonera imboetei guasusave yuvireco.

<sup>37</sup> Ovirovise ivitri Olivo sui ogüeyi āgua oso, opacatu ava seroyasar supi oguata vahe omboipi osapucal yuvireco vorivetesave mbahe poromondiisa sembiapogüer rese Tūpa upe

<sup>38</sup> aipo ehi yuvireco:

—¡Sovasapri secoi mborerecuar guasu ou vahe yande Yar rer pipe! ¡Mbahe tupri toime ivave iyavei imboeteipri Tūpa tasecoi! —ehi.

<sup>39</sup> Evocoyase amove fariseo yuvirecoi vahe supi aipo ehi chupe:

—Porombohesar, eñehe nde rupi oguata vahe upe imonguiriri āgua —ehi tēi yuvireco.

<sup>40</sup> Evocoyase aipo ehi:

—Supi eté amombehu pēu: co ava iquiririse yuvireco, ita rumo evocoyase osapucal pīratara che mboeteisave —ehi.

<sup>41</sup> Oyepota senimise tecua Jerusalén ve, ahe tecua repiase, oyaseho sese

<sup>42</sup> aipo ehi: “¡Pesenducara tarahu co co ari pipe teco tupriisa amondo pota vahe pēu viña, cūrítei rumo ocañi tupriño pe sui, ndapeicatui eté sepia!” ehi oyaseho.

<sup>43</sup> “Oimera rumo ari imombehupri naporai vahe pēu curi. Pe amotarēhimbar oñachi irira pe recua. Ipare oyere tupriira yuvireco pe rese pēu ovava āgua.

<sup>44</sup> Iyavei yuviroiquera pe recua pipe, opara pe rēta omonduru yuvireco, pe yuca aveira yuvireco. Ndipoi chietera ita que ñepeí oya vahe ambuae rese. Esepia, ndapeicuai eté Tūpa ouse pēu pe pīsiro āgua” ehi Jerusalén pendar rese oyaseho.

### *Jesús omombopa ava mbahe rerecosar tūparo pipe sui*

<sup>45</sup> Ichui Jesús oique judío tūparo guasu pipe. Aheve omboipi ava mbahe mondosar ombopa tupri ocarve oico

<sup>46</sup> aipo ehi:

—Icuachiapri aracahendar pipe aipo ehi: ‘Che rēta yeruresa rētarã’ ehi. Pe rumo, imonda rai vahe rēta nungar tēi pereco —ehi.

<sup>47</sup> Ichui ahe tūparo guasu pipe ari yacatu oporombohe oico. Aheve avei rumo pahi eta rerecuar yuvirecoi vahe, Moisés porocuita rese oporombohe vahe iyavei tecua rerecuar guasu yuvirecoi vahe, ‘¿Mara yahera pīha yuca uca āgua viña?’ ehi yuvirecoi chupe.

<sup>48</sup> Ndoicatui rumo yuvireco. Esepia, ava rehii oyapisaca iporombohesa rese yuvireco.

## 20

### *Jesús mborerecuasa*

<sup>1</sup> Ñepepe ari Jesús judío tūparo guasu pipe güecose, ombohe ava eta, omombehu ñehesa pīsirosa resendar oico. Ahese yugüeru pahi eta rerecuar guasu yuvireco iyavei Moisés porocuita rese oporombohe vahe, ava rerecuar guasu yuvirecoi vahe avei

<sup>2</sup> aipo ehi:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã? —ehi ahe ava yuvirecoi chupe.

<sup>3</sup> Ahe omboyevi chupe:

—Che avei aporandura mbahe rese pēu. Pemboyevira cheu —ehi—.

<sup>4</sup> ¿Ava vo Juan ombou ava āpiramo āgua: Tūpa pīha, ava tēi tie? —ehi ahe ava yuvirecoi vahe upe.

<sup>5</sup> Ahese, “¿Mara yahera pīha?” ehi-ehi tēi oyeupe yuvireco. “ ‘Tūpa’ yahese chupe, ‘¿Mahera ru ndaperoyai?’ ehira yandeu.

<sup>6</sup> Anise, ‘Ava tēi remimbou’ yahese chupe, opacatu seroyasar evocoyase yande api-apira ita pipe yuvireco. Esepia, ava, ‘Juan omombehu vahe ñehesa Tūpa suindar’ ehi eté yuvireco chupe” ehi tēi oyeupe yuvireco.

<sup>7</sup> Evocoyase ahe ava, “Ndoroicuai rumo Juan mbousar, que sui oporoāpiramo oico” ehiño yuvireco chupe.

<sup>8</sup> Sese aipo ehi ahe ava upe:

—Sese che avei, ‘Ahe iporocuita pipe co mbahe ayapo’ ndahei chietera pēu —ehi mborerecuar guasu upe.

### *Ava mbahe tēi oporaviqui vahe recocuer sui yembohesa*

<sup>9</sup> Ipare Jesús oñehe ava eta upe ambuae ava recocuer rese aipo ehi: “Oime mbia oñoti vahe uva oivi pipe. Ipare oseya oivi ava oporaviqui vahe upe iporu āgua. Ichui oso pucu que amombri vahesa rupi.

<sup>10</sup> Evocoyase oyepotase ari uva pohosa, ahese omondo ñepepe güembigui oporaviqui vahe upe imboporandu ‘tomboumi uva pohopri cheundar cheu cute’ oyapave viña. Ahe rumo oinupa-nupaño imboyevi tupri tēi yuvireco serecuar upe.

<sup>11</sup> Ipare ambuae güembigui omondo iri no. Ahe oinupa-nupaño, iñehe mara-mara tēi avei ipogüer tēi imboyevi imondo yuvireco.

<sup>12</sup> Ichui omondo iri tēi imombosapisa rese ambuae güembigui no. Ahe oyapicha-pichaño imosē imondo yuvireco.

<sup>13</sup> “Coie miti yar aipo ehi: ‘¿Mara ahera pīha? Amondora revo che rahir, che rembiaisu. Ahe tie revo, osepiase, omboyeroyara yuvireco’ ehi.

<sup>14</sup> Evocoyase ahe ava tahir repiase, ‘Co aipo oipisira vu mbahe. Yayucaño. Yandeu nara pāve topita co ivi’ ehi oyeupe yuvireco.

<sup>15</sup> Evocoyase ovinose miti pāhu sui, oyuca ité yuvireco.

“¿Mbahe vo evocoyase oyapora ivi yar ahe ava naporai vahe upe?

<sup>16</sup> Oura evocoyase ahe ava mocañipa āgua, omondora ambuae ava upe oivi rese oporaviqui vahe rã” ehi.

Aipo renduse,

—¡Egüe tehi eme! —ehi ava yuvireco chupe.

<sup>17</sup> Omahaese rumo ahe ava rese aipo ehi:

—¿Mara oya vo co aipo ehi icuachiapri aracahendar pipe?:

‘Co ita oi aposar opaño omombo yuvireco, ahe ita rumo aviye catu vahe oi moviracua tupri água’ ehi.

<sup>18</sup> Acoi que oviapi vahe evocoi ita harive, opa tēira ahe ae oyemomara. Iyavei oviapise que ava harive, opa tupri aveira omocañi —ehi Jesús judío rerecuareta upe.

<sup>19</sup> Pahi eta rerecuar guasu iyavei oporombohe vahe Moisés porocuita rese, ñehe viteseve, oipisi pota tēi Jesús yuvireco. Esepia, osenducua ité oyesendar iporombohesa yuvireco. Osiquiyeño rumo ava rehi sui yuvireco.

### *Judío rerecuar osecoña iri tēi Jesús guarepochi rese yuvireco*

<sup>20</sup> Ahe judío rerecuar evocoyase omondo ava ndaseco asimi angahu vahe iviro, chupe ñehe água ‘toyavi angahu oñehe’ oya viraso vaherã mborerecuar Pilato rovai.

<sup>21</sup> Ahe evocoyase,

—Porombohesar, ore oroicua nde ñehe iyavei nde porombohesa supi eté vahe. Iyavei nderemboyoavirati vahe nde ñehe yepi. Nde rumo ereporombohe mbahe supi tupri vahe Tūpa recocuer rese.

<sup>22</sup> ¿Aviyera pñha yamondo guarepochi Roma pendar mborerecuar ivate catu vahe upe viña? ¿Aní tie? —ehi yuvireco chupe.

<sup>23</sup> Opa rumo oicua ñehe porombopasa tēi. Sese,

<sup>24</sup> —Pemboyecua ru ñepe guarepochi cheu. ¿Ava rahanga vo vireco; ava rer icuachiapri vo co sese? —ehi ahe ava upe.

—Roma pendar mborerecuar guasu —ehiño yuvireco chupe.

<sup>25</sup> —Taa, pemondo ru mborerecuar uve chupendar, iyavei Tūpa upendar pemondoño ité Tūpa upe —ehi ahe ava upe.

<sup>26</sup> Ndoyavi uca catui eté ñehe ava rovaque ipisi água yuvireco. Ahe rumo oyeupe imboyeve, iquiriripa tupriño oyepihamondiisa pipe yuvireco.

### *Porandusa cuerayevisa rese*

<sup>27</sup> Ipare saduceo, ahe “ndipoi eté cuerayevisa” ehi vahe, yugüeru Jesús upe. Oporandu tēi angahu yuvireco chupe:

<sup>28</sup> —Porombohesar, Moisés niha osey güembicuachiagüer yandeu aipo ehi: ‘Que cuimbahe omenda vahe omanose guahiēhiseve, tivri evocoyase omendara sembirecocuer rese. Ahe viquehir omano vahecuer upe nara tahira oico’ ehi.

<sup>29</sup> Evocoyase oime siete tupri oyesuindar pãve yuvirecoi vahe. Yipindar vahe omenda. Ipare omanoño guahiēhiseve.

<sup>30</sup> Ichui tivri omenda sese. Ahe omanoño avei guahiēhiseve.

<sup>31</sup> Ipare imombosapisa tivri omenda iri tēi sese. Ëgüe ehi tupriño avei chupe. Ambuae ichuindar ëgüe ehi tupri avei omanopa yuvireco guahiēhiseve.

<sup>32</sup> Coiye cuña avei omano cute.

<sup>33</sup> Evocoyase opase ocuerayevi yuvireco, ¿uma rembireco itera pñha omendase opacatu siete yuvirecoi vahe rese? —ehi saduceo yuvireco chupe.

<sup>34</sup> Ahe rumo omboyeve chupe:

—Co ivi pipe cuimbahe iyavei cuña omenda vahe yuvireco yepi.

<sup>35</sup> Ocuerayevi pare oicatu vahe ivave yuviroique vaherã, chupe ndipo iri chira mendasa.

<sup>36</sup> Iyavei nomanoi chietera aheve. Esepia, yuvirecoira Tūpa rahir, Tūpa rembiguai eta iva pendar nungar yuvireco.

<sup>37</sup> Moisés rembicuachía agüer pïpe niha caha pãhu sendi vahe resendar oicua uca cuerayevisa yandeu. Aheve aipo ehi: “Ahe niha yande ramoï aracahendar Abraham, Isaac, Jacob Tũpa” ehi.

<sup>38</sup> ¡Tũpa ndahei omano vahe Tũpa! ¡Ahe rumo oicove vahe ité Tũpa secoi! Esepia, chupe opacatu yuvirecove vahe —ehi saduceo upe.

<sup>39</sup> Evocoiyase moviro Moisés porocuita rese oporombohe vahe aipo ehi: —Supi eté aipo ere, Porombohesar —ehi yuvireco chupe.

<sup>40</sup> Sese niquerẽhi iri eté mbahe rese oporandu ãgua yuvireco chupe.

*¿Ava suindar pĩha Poropĩsirosar?*

<sup>41</sup> Evocoiyase Jesús aipo ehi ahe ava upe:

—¿Mahera ru, “Poropĩsirosar David suindar ité” ehi yuvireco?

<sup>42</sup> David teieté niha aipo ehi güembicuachía pïpe:

‘Yar aipo ehi che Yar upe:

Eguapï che acato coti

<sup>43</sup> acoi che amondose voi eté nde amotarẽhimbar ñenopiha ãgua nde povrive yuvireco’ ehi David aracahe.

<sup>44</sup> ¿Mahera ru, “Poropĩsirosar David suindar secoira” peye? David teieté, “Che Yar” ehise chupe —ehi Jesús ahe ava upe.

*Jesús oicua uca Moisés porocuita rese oporombohe vahe recocuerai*

<sup>45</sup> Opacatu ava oñehe rendu viteseve, Jesús aipo ehi güemimbohe upe:

<sup>46</sup> “Peicua catu co Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo ãgua ocar rupi omboeteisa pïpe yuvireco. Oseca avei tenda porañete catu vahe güenara otũparo pïpe, carusave avei oseca tenda aviyee catu vahe yuvireco.

<sup>47</sup> Iyavei vïrocua-rocuano tẽi cuña imer mano vahecuer rẽta ichui. Oarondaguã tẽi avei oyerocuï pucu-pucu yuvireco. Ahe rumo oipisira Tũpa ñemoïrosa ipĩrata catu vahe yuvireco curi” ehi güemimbohe eta upe.

## 21

*Cuña imer mano vahecuer iparaisu vahe porerecosa*

<sup>1</sup> Ipare Jesús osepia ava imbahe eta vahe omondose oporerecosa guarepochi rïru pïpe yuvireco.

<sup>2</sup> Aheve avei cuña imer mano vahecuer iparaisu vahe, omondo ñuviriomi guarepochi oporerecosa.

<sup>3</sup> Evocoiyase Jesús aipo ehi:

—Supi eté co cuña iparaisu vahe omondo catu oporerecosa opacatu mbahe yar sui.

<sup>4</sup> Esepia, ava imbahe eta vahe, oguarepochi rumbïrer tẽi omondo oporerecosa Tũpa upe yuvireco. Co cuña rumo oparaisusa pïpe virecomi vahe guarepochi oyeupe, opacatu ité omondo oporereco ãgua Tũpa upe —ehi.

*Jesús omombehu tũparo guasu monduru ãgua*

<sup>5</sup> Evocoiyase amove semimbohe oñehe yuvireco tũparo guasu recocuer rese: “Co tũparo niha icatupri vahe, ita mopuhapri, porerecosa sui opacatu mbahe icatupri ipipe” ehi yuvireco. Jesús rumo aipo ehi:

<sup>6</sup> —Oimera ari opacatu co mbahe cũritei pesepia vahe pïpe ndipoi chietera que ñepeï ita oyeha vite vahe; opacatu ité imondurusara curi —ehi güemimbohe eta upe.

*Cañi renonde sepiasara setá mbahe poromondiisa ìva rese*

<sup>7</sup> Evocoiyase semimbohe eta oporandu yuvireco chupe:

—Ore mbohesar, ¿mbahese vo aipo mbahe yaviyera? ¿Mbahe poromondiisa rese rane vo icuasara curi? —ehi yuvireco.

<sup>8</sup> Evocoyase aipo ehi güemimbohe eta upe: “Peicua catu, peyembopa ucai rene catu. Esepia, setá ava yugüerura, ‘Che niha Poropĩsĩrosar aico, cūritei osupiti ari imombehupri yandeu’ ehi tẽira yuvireco. Ndaperoyai chira rumo ava aipo ehi vahe.

<sup>9</sup> Acoi peyanduse vavasa iyavei tecua pipendar oyeupe vavase, ndapeyembosiquiyei chira rumo serãcua anduse ichui. Evocoi nungar rane ité niha oimera. Ndehi vitei chira rumo ari cañi” ehi.

<sup>10</sup> “Ñepei ivi pipendar ovavara ambuae ivi pipendar rese oyeupe yuvireco.

<sup>11</sup> Ahese avei oimera ivi rirĩi tuvichá vahe, tiavor, mbaherasisa opacatu-catu tẽi tecua rupi. Iyavei pesepiara iva rese mbahe pe mbosiquiye vahe, poromondiisa tuvichá vahe avei curi.

<sup>12</sup> “Co mbahe-mbahe tẽi reime renondeve rumo pe pisira yuvireco che recocuer sui mara-mara tẽi pe rereco ãgua. Pe reraso aveira pẽu porandu ãgua tũparove, pe roquenda aveira, iyavei pe rerasora mborerecuar rovai, mborerecuar ivate catu vahe rovai avei yuvireco che recocuer sui tẽi.

<sup>13</sup> Ipipe pemombehura che recocuer chupe yuvireco.

<sup>14</sup> ‘Aipo ahera añehe’ ndapeyei chira pepihañemoñeta rereco pe yeepi ãgua.

<sup>15</sup> Esepia, che amondora che mbahecuaasa pe ñehe ãgua. Ndoicatui chietera evocoyase pe amotarẽhimbar imboyevi yuvireco pẽu.

<sup>16</sup> Pe amotarẽhira rumo pe yesupa, pe mu, pe rivri, pe riquehir, pe mboripar avei. Iyavei oyucara amove pe pãhu pendar yuvireco.

<sup>17</sup> Opacatu ava ndape ambotai chira che recocuer sui tẽi yuvireco.

<sup>18</sup> Nocañi chietera rumo que ñepei pe ha pe ãca sui.

<sup>19</sup> ¡Peyemoviracua evocoi nungar mbahe upe pe ñepisiro ãgua!

<sup>20</sup> “Iyavei pesepiase ava Jerusalén rese sundao oyere tuprise, peicuara evocoyase mbahe-mbahe tẽi reime ãgua yuvireco chupe.

<sup>21</sup> Evocoyase Judea ve yuvirecoi vahe toñemipa poyava voi ivitri rese yuvireco ichui; tecua Jerusalén pipe yuvirecoi vahe, ahe toyuvinose poyava avei ichui. Iyavei acoi que rupi yuvirecoi vahe, ahe toyevi iri eme yuvireco.

<sup>22</sup> Esepia, ahe ari oimera Tũpa ñemoirosa. Ahe omboaviyera icuachiapri aracahendar pipe imombehupri.

<sup>23</sup> ¡Iparaisu itera ahe ari pipe cuña ipuruha vahe, imembi pĩtani vahe avei! Esepia, oimera tecoasisa co ivi pipendar upe, ñemoirosa tuvichá vahe ahe ava recocuer rese.

<sup>24</sup> Iyavei quise pucu pipe setá ava omanora yuvireco iyavei ambuae setá ava ipisipri serasosara ambuae ivi rese amombrisave. Iyavei ambuae ivi pipendar ava ndahei vahe judío yuvirecoi vahe oiporu itera tecua Jerusalén acoi osupitise voi eté ari imombehupri yuvireco chupe” ehi.

### *Ava Riquehir yevisa*

<sup>25</sup> “Iva rese iporẽhira poromondiisa, ari rese, yasi rese, yasitata rese; iyavei ivi pipe, opacatú tecua rupi ava ndayaracua iri chira yuvireco. Oyembosiquiye guasu-guasú tẽi aveira yuvireco para guasu riapugüer renduse.

<sup>26</sup> Ahese ava setá yaracua cañi tẽira osiquiyepave yuvireco opihañemoñeta guasu aise co ivi pipe mbahe oime vaherã sui. Ahese avei iva resendar opacatu mbahe orirĩira.

<sup>27</sup> Ahese ramo opacatu ava che, Ava Riquehir, che repiara yuvireco, agüeyise iva quiha rese che pĩratasa rendigüer porañetesa pipe.

<sup>28</sup> Omboipise evocoi nungar mbahe, peyemonguerẽhi catura, peyemopoase pe querẽhisa pipe. Esepia, pe renosesa pihavira mbahe tẽi sui” ehi.

<sup>29</sup> Iyavei oporombohe ambuae mbahe rese: “Peicua tupri higuera ivira recocuer, anise que ambuae ivira avei.

<sup>30</sup> Co ivira soqui ramose, yaicua cõimi ari sacú vahe yepota ãgua yandeu yepi.

<sup>31</sup> Na ehi aveira pẽu che ñehe rupi tupri mbahe pesepiase. Sese peicuara Tũpa mborerecuasa cõimi eté secoise.

<sup>32</sup> “Supi eté yuvirecove vitera ava osepia vahe co mbahe opase yaviye.

<sup>33</sup> Iva, ivi opara ocañi, che ñhengagüer rumo imboaviyesa rane itera” ehi güemimbohe upe.

<sup>34</sup> “Peicua catu, aní pemboavai etepri pe mbahe reroya ãgua mbahe tẽi aposa pipe, pe caguar tẽisa pipe, co ivi pipendar tecocuer rese pe pihañemoñeta tẽisa pipe avei. Evocoyase topoesapiha eme

<sup>35</sup> inungar ivonde oviapi vahe ahe ari pipe. Esepia, opacatu ava eta upe oimera evocoinungar mbahe.

<sup>36</sup> Sese peyemoingatu, peyeroqui ari rupi co mbahe tẽi sui pe yepepi ãgua, pe yemboycua tupri ãgua che, Ava Riquehir, rovai” ehi güemimbohe eta upe.

<sup>37</sup> Ëgüe ehi Jesús oporombohe ari rupi tũparo guasu pipe. Pĩtu pipe evocoyase opita ivitri Olivo rese.

<sup>38</sup> Iyavei opacatu ava yuviraso añihiveive tũparo guasu pipe iñehe rendu ãgua yepi.

## 22

### *Yemomborandusa Jesús yuca ãgua*

<sup>1</sup> Ovirovise Pascua pieta pan ndayapepoi vahe hu ãgua,

<sup>2</sup> ahese pahi rerecuareta, Moisés porocuita rese oporombohe vahe avei ava sui osiquiyepave, oseca-seca tẽi Jesús yuca ãgua yuvireco.

<sup>3</sup> Evocoyase Carugar oi que Judas piha pipe, ahe acoi doce tupri semimbohe pãhu pendar Iscariote serer vahe.

<sup>4</sup> Ahe oso pahi eta rereciar yuvirecoi vahe upe, tũparo rãrosar yuvirecoi vahe upe avei imoñeta ãgua, “Tamondo Jesús pe povrive” ehi.

<sup>5</sup> Ahe evocoyase oyemboviharere yuvireco. “Yamondo guarepochi chupe” ehi voi eté yuvireco.

<sup>6</sup> Judas evocoyase, “Aviye” ehi. Oseca voi ava porẽhiseve Jesús mondo ãgua yamotarẽhimbar upe.

### *Yande Yar caru agüer ipa vahe*

<sup>7</sup> Oyepota ari yipindar vahe pan ndayapepoi vahe hu ãgua. Ahe pipeve avei ovesa Pascua pieta resendar yucapri seropovẽhesa yepi.

<sup>8</sup> Evocoyase Jesús omondo güemimbohe Pedro, Juan reseve aipo ehi:

—Peso, tapemoingatu yande caru ãgua Pascua pieta resendar —ehi.

<sup>9</sup> Semimbohe rumo,

—¿Que vo ereipota oromoingatura? —ehi yuvireco chupe.

<sup>10</sup> Evocoyase aipo ehi:

—Peyepotase tecua pipe, aheve pesepiara mbia vireco vahe cambuchi pipe i. Pesora sètave supi.

<sup>11</sup> Aipo peyera peñehe oi yar upe: “Ore mbohesar oporandu: ‘¿Uma oi pipe vo Pascua pieta resendar orohura che remimbohe rese?’ ehi” peyera.

<sup>12</sup> Evocoyase ahe omboycuara oi guasu, ivatendar pẽu. Aheve pemoingatura yande caru ãgua —ehi güemimbohe upe.

<sup>13</sup> Ipare ahe yuviraso, semimombehu rupi tupri ité osepia mbahe. Aheve omoingatu carusa Pascua pieta resendar yuvireco.

<sup>14</sup> Osupitise icaru ãgua apóstol reseve yuviroguapi mesave.

<sup>15</sup> Evocoyase aipo ehi:

—¿Cueseve tẽi eté niha aipota acarú vahe rã pe piri Pascua pieta resendar rese che mano ãgua renonde!



16 Esepia niha, ndayapo iri chira pieta Pascua resendar acoi yaviyese voi eté Tūpa mborerecuasa pīpe —ehi.

17 Evocoyase oipisi igua riru, “Aviye ndeu” ehi Vu upe, iyavei aipo ehi:

—Co amondora pēu, perova-rova peyacatu.

18 Esepia, co pīpe suive ndaihu iri chira uva ricuer acoi ouse voi Tūpa mborerecuasa —ehi.

19 Ipare oipisi pan, “Aviye ndeu” ehi Vu upe. Aipo ohe pare ombohi-mbohi imondo güemimbohe upe.

—Co che rete, omboyecua imondopirã pe recocuer rese. Na peyera pe mahenduhasa pīpe che rese yepi —ehi.

20 Ēgüe ehi avei carusa pare yapo igua riru rese aipo ehi:

—Co igua riru pīpendar omboyecua che Ru remimbotar ipiasu vahe pēu nara, ahe che ruvi ipiyerepirã pe recocuer rese nara.

21 Cūrītei rumo oime mbia mesave yande piri che mondo vaherã che amotarēhimbar upe.

22 Supi eté imboaviyesa itera che, Ava Riquehir, rese ñehesa yipive imombehupri. ¡Iparaisu catura rumo acoi mbia che mondosar! —ehi.

23 Evocoyase aipo ehise, semimbohe oporandu-randu tēi oyeupe: “¿Ava pīha ěgüe ehi?” ehi tēi yuvireco.

*¿Ava vo ivate catu vahe?*

24 Ipare voi semimbohe oñemoñeta guasu yuvireco oyese, ipihañemoñeta ‘aviyeteramo che imboeteipri catu vahe aicora oporocuaise Jesús’ ohesave yuvireco.

25 Evocoyase Jesús aipo ehi: “Ava mborerecuar co ivi pīpendar oyocuai pīrata ava yuvireco yepi. Ahe chupe rumo, ‘Mbahe tupri aposar’ ehi yuvireco.

26 Pe rumo ěgüe ndapeyei chira. Acoi oyemboivate pota vahe, toyemochihivaheño güeco mbegüesa pīpe. Acoi ava cuaisar, tihañeco catu ambuae ava rese.

27 ¿Uma pīha ivate catu vahe: co mesave oguapi vahe ocaru yuvireco? ¿Sese ihañeco vahe tie? Acoi mesave oguapi vahe niha. Che rumo co aico pe pāhuve inungar pe rese ihañeco vahe.

28 “Pe rumo peico vahe che rupi yepi opacatú che recoãhasa pīpe.

29 Sese che amondo pēu pe mborerecuasa inungar che Ru ombou cheu che mborerecuã ãgua.

30 Esepia, pecarura iyavei peihura che mborerecuasave che piri. Iyavei peguapira opacatu judío recocuer rese porandu ãgua” ehi güemimbohe upe.

*Jesús, “‘Ndaicuai vahe evocoi mbia’ erera cheu” ehi Pedro upe*

31 Aipo ehi avei yande Yar:

—Simón, Simón, esendu: Caruguar oporandu pe recoãha ãgua rese.

32 Che rumo ayeroqui nde rese nde yeroyasa paneñhi ãgua. Ereyevise cheu, emonguerēhi catu ambuae nde rivireta imoviracua uca ãgua yuvireco oyese —ehi Pedro upe.

33 —Che Yar, che rumo ayemoingatu voi eté nde rupi che so ãgua nde roquendasave iyavei che mano ãgua nde rupi —ehi Pedro chupe.

34 —Pedro, supi eté amombehu ndeu: co pīpe, tacura ñehē renondeve, nde, “Ndaicuai eté evocoi mbia” erera mbosapi oyupagüer rupi cheu —ehi.

*Virovi ité Jesús recoãha ãgua*

35 Evocoyase Jesús oporandu güemimbohe eta upe:

—Opomondose acoi mbahe riru porēhi, guarepochi riru porēhi, ambuae pe pitaqui ndugüer rerasoēhise, ¿ipane vo acoi mbahe ahese pēu? —ehi.

—Aní eté —ehi yuvireco chupe.

<sup>36</sup> Evocoiyase,

—Cūritei, acoi mbahe riru vireco vahe, tovirecoveño, guarepochi riru vireco vahe, tovirecoveño avei; acoi ndovirecoi vahe quise pucu, tomondo oyeaosa quise repirã.

<sup>37</sup> Supi eté amombehu pëu: iyacatu ité imboaviye tupri água co che rese ñehesa imombehupri aipo ehi vahe: ‘Ava vireco ndaseco pōrai vahe nungar yuvireco’ ehi vahe. Supi eté yaviyera co icuachiapirer che resendar —ehi.

<sup>38</sup> Evocoiyase semimbohe aipo ehi yuvireco:

—Ore Yar, cohave oime ñuvirío quise pucu —ehi.

—Ahe güeraño ité aviye —ehi güemimbohe eta upe.

### *Jesús oyerogui Getsemaní ve*

<sup>39</sup> Ipare Jesús osë oso ivitri Olivo ve. Ahe ivitrive oso yepi, aheve semimbohe yuviraso yuvireco supi.

<sup>40</sup> Oyepotase aheve yuvireco, Jesús aipo ehi güemimbohe upe:

—Peyeroqui angaipa pe yapoëhi água —ehi.

<sup>41</sup> Ipare oyepepi güemimbohe sui, inungar ita imombosa vahe amombrimi, aheve oñenopiha, oyerogui

<sup>42</sup> aipo ehi: “Che Ru, ereipotase, che renose eve co mbahe tēi sui; tayapo eme che remimbotar tēi, nde remimbotar rupira rumo” ehi.

<sup>43</sup> Evocoiyase oyemboyecua Tūpa rembiguai chupe, seco momirata água.

<sup>44</sup> Mbahe-mbahe tēi porarasa pipe oyerogui catu. Aheve sacuvor inungar tuvī osë ichui otiqui ivive.

<sup>45</sup> Oñarapuhase oyeroguisa sui, oyevei oso güemimbohe uve. Ahe rumo opaño yuviroque yuvirocua oviharēhisa pipe.

<sup>46</sup> Evocoiyase,

—¡Mahera opaño peque! Peñarapuha, peyeroqui catu pe viapiēhi água mbahe tēi pipe —ehi güemimbohe upe.

### *Jesús oipisi yuvireco*

<sup>47</sup> Jesús ñehe viteseve, oyepota ati ava yuvireco chupe. Judas doce semimbohe pāhu pendar tenonde secoi. Ahe oyemboya oso sese sovaupite água.

<sup>48</sup> Evocoiyase aipo ehi Judas upe:

—Judas, ¿mahera vo che, Ava Riquehir, rovaupitesa pipe che mondo eve che amotarēhimbar upe? —ehi.

<sup>49</sup> Semimbohe eta rumo, mbahe-mbahe tēi repiase, oporandu yuvireco:

—Ore Yar, ¿yavavara yande quise pucu pipe? —ehi yuvireco chupe.

<sup>50</sup> Ñepe rumo supindar, pahi rerecuar ivate catu vahe rembiguai nambi yasu cotindar oyasia.

<sup>51</sup> Ahe rumo,

—Teheni, evocoi rupive —ehi güemimbohe eta upe.

Ipare opoco inambi rese ombogüera voi.

<sup>52</sup> Ichui aipo ehi güecasar opacatu pahi eta rerecuar upe, tūparo rārosar upe, tecua pipendar rerecuar upe avei:

—¿Quise pucu, ivira reseve-seve rutei co peyu che ropeña, imonda rai vahe nungar che rereco peye?

<sup>53</sup> Aicose tūparo pipe pe pāhuve ari yacatu rupi, na ndapeyapoi eté co nungar cheu. Aviyeño rumo, oyepota ité niha pëu imombehupri Carugar pīratasa pipe mbahe-mbahe tēi apo água —ehi.

### *Pedro, “Ndaicuai vahe evocoi mbia” ehi Jesús upe*

<sup>54</sup> Evocoiyase Jesús oipisi yuvireco, oviraso pahi eta rerecuar ivate catu vahe rētave yuvireco. Pedro rumo amombrī rupive tēi osaquicue moñaño oso.

<sup>55</sup> Aheve ñachimbrí pipe oyatapi yuvireco, oyere tupri tata rese oyephe yuvinoi. Aheve avei Pedro ipãhuve chini.

<sup>56</sup> Evocoyase cuña mbiguai, osepiase Pedro, omahe tupri iri sese aipo ehi:  
—Co ava avei niha acoi Jesús rupindar —ehi.

<sup>57</sup> Ahe rumo aipo ehiño:

—Cuña, ndaicuai vahe ité ahe mbia —ehi.

<sup>58</sup> Iparemi tēi ambuae osepiase aipo ehi chupe no:

—Nde ité niha acoi supindar ereico —ehi.

—Aní mbia, aipo ere tēi, ndahei eté rumo che supindar aico —ehi.

<sup>59</sup> Ñepe hora paremi tēi, ambuae aipo ehi chupe:

—Supi eté rumo co ité supi secoi vahe. Esepia, Galilea iguar ité niha —ehi.

<sup>60</sup> Sese aipo ehi:

—¿Mbahe vo catu aipo nde ñehesa? Ndasenducuai eté —ehi.

Aipo ihe vitesese, oñehe tacura.

<sup>61</sup> Evocoyase yande Yar oyemboyere sese. Ahe ramoseve oyemomahenduha: “Co pipe tacura ñehe renondeve, ‘Ndaicuai vahe’ erera mbosapi oyupagüer rupi cheu” ihe agüer rese.

<sup>62</sup> Ahese osē, oyasehó iteanga oso.

### *Sãrosar mara-mara tēi Jesús vireco yuvireco*

<sup>63</sup> Evocoyase ava Jesús rãrosar iguayí tēi yuvirocua-rocua yuvireco sese.

<sup>64</sup> Osesacua yuvireco. Ipare oporandu yuvireco chupe:

—¡Eicua ité ru, ava evocoi ocua nde rese! —ehi yuvireco chupe.

<sup>65</sup> Iyavei setá mbahe rese oñehe-ñehe tēi yuvireco chupe.

### *Jesús serasosa ava ñemonuhasa ivate catu vahesave*

<sup>66</sup> Ahe ari pipe, cõhese, oñemonuha ava judío rerecuar, pahi eta rerecuar iyavei opacatu Moisés porocuaíta rese oporombohe vahe yuvireco Jesús reraso uca água ava ñemonuhasa ivate catu vahesave, oporandu mbahe rese yuvireco chupe:

<sup>67</sup> —¿Supi eté vo nde Poropĩsirosar ereico? Emombehu ru oreu —ehi yuvireco chupe.

—Amombehuse rumo pẽu, ndache reroyai chietera peye —ehi judío rerecuar upe—.

<sup>68</sup> Inungar che aporanduse mbahe rese pẽu, pe avei ndapemboyevii chietera cheu viña no.

<sup>69</sup> Co pipe suive rumo che, Ava Riquehir, aguapira Tũpa mbahe mboavaisarẽhi acato coti —ehi.

<sup>70</sup> Ichui opacatu ava oporandu yuvireco chupe:

—Evocoyase, ¿nde ité ereico Tũpa Rahir? —ehi.

—Supi eté niha aipo aipo peye cheu —ehi mborerecualeta upe.

<sup>71</sup> Evocoyase ahe aipo ehi yuvireco:

—¡Indó! ¿Ava iri vo evocoyase mbahe omombehura yandeu? Yasendu niha iñehe ité cute —ehi mborerecuar oyeupe yuvireco.

## 23

### *Jesús serasosa mborerecuar Pilato rovai*

<sup>1</sup> Evocoyase opacatu ava opũha yuvireco Jesús reraso água mborerecuar Pilato rovai.

<sup>2</sup> Aheve oiñhengapo aipo ehi yuvireco:

—Orosepia co mbia oipihañemoñeta rerova ati uca ava yande recua rupindar aipo ehi: “Pemondoi rene Roma pendar mborerecuar ivate catu vahe upe guarepochi” ehi. Iyavei, “Che Poropĩsirosar mborerecuar ivate catu vahe aico” ehi oico —ehi yuvireco Pilato upe.

<sup>3</sup> Evocoyase Pilato oporandu chupe:

—¿Nde ité vo judío rerecuar ivate catu vahe? —ehi.

—Nde niha aipo, “Ahe ereico” ere cheu —ehi imboyeví Pilato upe.

<sup>4</sup> Evocoyase Pilato aipo ehi pahi eta rerecuar upe opacatu ava upe avei:

—Che rumo namohai eté co mbia que mbahe oyapo vahe —ehi

<sup>5</sup> Ahe ava eta rumo,

—Supi eté opacatu ava oipihañemoñeta mboyeaviratí uca opacatu tecua rupindar. Yipindar omboipi Galilea rupi oico. Cūritei co Judea ve ãgüe ehiño ité —ehi ava eta Pilato upe yuvireco.

### *Jesús imondosa mborerecuar Herodes rovai*

<sup>6</sup> Pilato osenduse aipo ñehesa oporandu, “¿Supi eté pñha co mbia Galilea iguar?” ehi.

<sup>7</sup> “Ahe pendar ité” ehise yuvireco chupe, ahese omondo Herodes upe, ahe acoi mborerecuar Galilea rupindar. Ahese avei secoi Jerusalén ve.

<sup>8</sup> Herodes sorivete Jesús repiase. Esepia, setá ari osepia pota tñi serãcua anduse yepi. Evocoyase oipota ité poromondiisa oyapo vahe ãgüe oyeovaque viña.

<sup>9</sup> Sese oporandu ati mbahe rese chupe. Nomboyeví eté rumo Herodes upe.

<sup>10</sup> Aheve opacatú pahi eta rerecuar iyavei Moisés porocuita rese oporombohe vahe eta seroñrosave oñemoñeta-ñeta tñi sese Herodes rovaque yuvireco.

<sup>11</sup> Evocoyase Herodes osundao eta reseve ñehhe mara-mara tñi Jesús upe sese oguayí tñisa pipe yuvireco. Omboyemunde avei turucuar iporañete vahe pipe yuvireco. ãgüe ehi imboyeví Herodes Pilato upe.

<sup>12</sup> Ahe ari pipe suive oyembori Pilato Herodes rese. Ndoyeambotai vahe tie yipindar yuvireco viña.

### *“¡Tayaticasa!” ehi Jesús upe yuvireco*

<sup>13</sup> Evocoyase Pilato opa uca omonuha opacatu pahi eta rerecuar, judío rerecuareta, opacatu ava eta avei.

<sup>14</sup> Ipare aipo ehi chupe:

—Pe niha peru co mbia cohava cheu, ‘Omañeco tñi ava secua rupi’ peye. Che rumo aporandu tñi pe rovaque mbahe rese chupe. Ndipoi eté rumo mbahe sembiapo naporai vahe pe remimombehu rupi.

<sup>15</sup> Herodes avei, ‘Ndipoi mbahe sembiapo naporai vahe imano ãgua’ ehi. Sese omboyevíño Jesús imbou cheu.

<sup>16</sup> Ainupa uca rumo. Ipare amoseñora —ehi Pilato.

<sup>17</sup> Pascua pieta pipe iya ité Pilato ava upe ñepe soquendapri mose ãgua.

<sup>18</sup> Opacatú guasu rumo ava oñehhe pñrata yuvireco aipo ehi:

—¡Co topitaño oreu! ¡Barrabás emoseño! —ehi ava eta Pilato upe.

<sup>19</sup> Co mbia Barrabás tecua pipe mbahe tñi mopuhasa sui iyavei oporapichisa sui oyeoquenda uca vahe.

<sup>20</sup> Pilato rumo omose pota Jesús viña. Sese oporandu iri ava upe imose ãgua.

<sup>21</sup> Ahe rumo osapucaí pñrata catu yuvireco:

—¡Aní, tayaticasa! ¡Tayaticasa curusu rese! —ehi ati-atiño yuvireco.

<sup>22</sup> Imombosapisa rese Pilato oñehhe iri:

—¿Mbahe ité vo oyapo naporai vahe? Ndipoi eté niha que mbahe sembiapo yuca ãgua, ainupa uca tñira rumo. Ipare amoseñora —ehi.

<sup>23-24</sup> Ava rehí rumo osapucaí pñratá catu yuvireco, “Tayaticasa ité” ehi-ehiño yuvireco. Sese chupe, “Tayaposa evocoyase semimbotar yuvireco” ehiño Pilato ava eta upe.

<sup>25</sup> ãgüe ehi imose co mbia Barrabás, acoi soquendapri mbahe-mbahe tñi mopuhasa sui, iporapichisa sui avei ava remimbotar rupi. Ipare omondo Jesús sãrosar upe ava remimbotar apo ãgua sese.

*Jesús yaticasa curusu rese*

<sup>26</sup> Oime mbia Simón serer vahe Cirene iguar ou vahe que co coti rupi sui. Ovirasose Jesús yuvireco yatica ãguave, ahe mbia upe, “Nde terevosii curusu rese Jesús raquicuei” ehi voiño tēi yuvireco.

<sup>27</sup> Ava rehii yuviraso saquicuei. Cuña avei setá oyaseho oviharēhisave yuvireco sese.

<sup>28</sup> Omahese rumo cuña rese aipo ehiño chupe:

—Cuña Jerusalén iguar, peyasehoi rene che rese. Peyese ae peyaseho, pe membri rese avei.

<sup>29</sup> Esepia, oura ari naporai vahe. Ahese aipo peye tēira: ‘Aviye catu acoi cuña nimembii vahe iyavei ndoicuai vahe imocambu omembri’ peye tēira.

<sup>30</sup> Ahese avei ava ivitri uve aipo ehira yuvireco: ‘¡Toviapi ore harive!’ ehira osiquiyepave. Iyavei ivivate vahe upe: ‘¡Tore mi!’ ehi tēira yuvireco.

<sup>31</sup> Esepia, ēgüe ehise ivira yivive vitesse, ¿mara ehira vo catu oipise? —ehi cuña eta upe.

<sup>32</sup> Iyavei viraso ñuvirío mbia ndaseco pōrai vahe supive yaticapirã yuvireco.

<sup>33</sup> Oyepotase Ava Ñca Cangüer serer vahesave, aheve oyatica curusu rese yuvireco. Iyavei oyatica ñuvirío mbia, ñepe mbahe rese ipocosa coti, ambuae evocoyase mbahe rese ipocoēhisa coti.

<sup>34</sup> Ahese Jesús aipo ehi:

—Che Ru, ndeñero co ava upe sembiapo rai rese. Esepia, ndoicuai co mbahe güembiapo yuvireco —ehi.

Sundao evocoyase iguayíño Jesús turucuar rese oyeupe imboyaho-yaho ãgua yuvireco.

<sup>35</sup> Ava rehii osepia yuvireco; mborerecuareta avei seroĩrosave aipo ehi yuvireco chupe:

—Oipĩsiro ambuae ava, toñepisiro ru ahe ae ité cute Tūpa Rembiporavo Poropĩsirosar güecosa pipe —ehi yuvireco.

<sup>36</sup> Iyavei sundao seroĩropare omondo vinagre itoihu yuvireco,

<sup>37</sup> iyavei aipo ehi yuvireco chupe:

—¡Nde niha aipo ava judío eta rerecuar guasu ereico! ¡Eñepisiro ru nde ae ité! —ehi sundao eta yuvireco chupe.

<sup>38</sup> Curusu rese ñaca harive icuachiapri aipo ehi oĩ: “Co judío rerecuar guasu” ehi.

<sup>39</sup> Evocoyase ndaseco pōrai vahe yaticapri iñehe mara tēi chupe aipo ehi:

—¡Nde Poropĩsirosar ereicose, eñepisiro ru nde ae, ore avei ru ore pĩsiro eve! —ehi chupe.

<sup>40</sup> Ambuae evocoyase aipo ehi voi ondugüer uve:

—¿Nderesiquiyeimi rutei vo Tūpa sui? Nde avei niha ocañi tēi vaheñã.

<sup>41</sup> Yande rumo co yande rembiapo sui tēi mara-mara tēi yande rereco yuvireco; co mbia rumo mbahe sembiapoēhi pipe sui tēi na ehi serecosa —ehi ondugüer upe.

<sup>42</sup> Evocoyase aipo ehi iri:

—Jesús, che paraísuerecomi tēi eve nde eremboipise nde mborerecuasa —ehi.

<sup>43</sup> Evocoyase omboyevi chupe:

—Supi eté co pipe ereicora tecua apirēhi vahesave che rupi —ehi Jesús ahe mbia upe.

*Jesús mano agüer*

<sup>44</sup> Osupitise rumo mbiter ari, opa tupri pĩtu ivi rupi; las tres pipe rumo opa icatu.

<sup>45</sup> Ari avei ogüe tupri, turucuar guasu tūparo asiasa avei mbiter rupi tupri ovo.

<sup>46</sup> Evocoyase Jesús oñehe pĩrata:

—¡Che Ru, amondo che espíritu ndeu! —ehi.

Aipo ohe pare voi omano.

<sup>47</sup> Evocoyase Roma iguar sundao rerecuar osepiase co mbahe poromondiisa Tũpa mboeteisa pipe aipo ehi:

—Supi eté co mbia ndaseco marai vahe —ehi.

<sup>48</sup> Iyavei opacatu ava supindar yuvirecoi vahe osepiase co nungar mbahe, oyepochiha nupa-nupa tẽi oyepihamondiisa pipe yuvireco.

<sup>49</sup> Opacatu avei ava oicua vahe Jesús, ipãhuve cuña Galilea sui yugüeru vahe, osepiãño tẽi amombrive co nungar mbahe yuvireco.

### *Jesús apocatu agüer tuvipa pipe*

<sup>50-51</sup> Oime mbia aviye etepri vahe, ahe serer José, tecua Arimatea pendar. Ahe tecua ivi Judea pipendar, judío rerecuar ñemonuhasa ivate catu vahe pendar secoi. Ahe mbia viroya vahe ité Tũpa ombou vaheã omborerecuasa pipe mbahe moingatu ãgua. Sese ndahei ipihañemoñeta rupi co mborerecuar oyapo vahe mbahe Jesús upe yuvireco.

<sup>52</sup> Evocoyase ahe oso Pilato rêtave oporandu ãgua Jesús rehögüer rese.

<sup>53</sup> Curusu sui seroyi pare voi, oimama turucuar secose vahe pipe, ipoyava imondo tuvipa pipe ita guasu yohopri ndiporusa vitei vaheve yuvireco.

<sup>54</sup> Esepia, ahe ari omoingatu mbahe mbituhusa ari upe nara, ahe mbituhusa rumo osupiti pota ité.

<sup>55</sup> Cuña yugüeru vahe Jesús rupi Galilea sui, yuvirasoño ité suvipave, osepia sehögüer apocatuse yuvireco.

<sup>56</sup> Oyevise güêtave yuvireco omoingatu mbahe sãacua vahe tehögüer resendar ipichi ãgua.

## 24

### *Jesús ocuerayevi*

Ahe cuña opituhu mbituhusa ari pipe judío porocuita reroyasave yuvireco. <sup>1</sup> Cõhe ramomise domingo pipe, oyevi yuviraso tuvipave mbahe sãacua vahe reseve.

<sup>2</sup> Oyepotase yuvireco tuvipave, osepia soquendasa ita guasu ndipo irise güendagüerve.

<sup>3</sup> Evocoyase yuviroique voi tuvipa pipe. Ndoyosui rumo yande Yar rehögüer yuvireco.

<sup>4</sup> Ndoyembovihai tẽi; ndoicatu iri. Ahese aviyeteramo tẽi osepia ñuvirío mbia iturucuar sendi vahe oipive yuvireco.

<sup>5</sup> Opaño ñaca iviso ivi coti yuvireco osiquiyepave. Evocoyase co mbia aipo ehi yuvireco chupe:

—¡Mahera peseca tuvipa pãhu rupi ava oicove vahe!

<sup>6</sup> Ndipoi mo cohave; ocuerayevi mo ahe. Peyemomahenduha iñehengagüer ivi Galilea rupi omombehu vahecuer rese,

<sup>7</sup> “Che, Ava Riquehir, imondoprira ava angaipa viyar povrive, iyavei che aticara curusu rese yuvireco. Mbosapi ari pare rumo acuerayevira” ehi acoi —ehi cuña upe yuvireco.

<sup>8</sup> Evocoyase cuña oyemomahenduha voi Jesús ñehengagüer rese yuvireco.

<sup>9</sup> Oyevise tuvipa sui yuvireco, omombehu opacatu co once apóstol yuvirecoi vahe upe, opacatu ambuae upe avei.

<sup>10</sup> Co omombehu vahe Jesús resendar ñehesa yuvireco apóstol eta uve, ahe: María Magdalena, Juana, Santiago si María iyavei ambuae cuña eta no.

<sup>11</sup> Apóstol upe rumo oyeupe mombehuse aviye aipo ehi tẽi vahe; ndoviroyai eté yuvireco.

<sup>12</sup> Pedro rumo yandu ramoseve voi, osẽ, oña oso tuvipave. Omahese tuvipa pipe, turucuar güeraño osepia co cotimi tuisse. Evocoyase oyepihamondi tẽi ‘¿mara ehi rutei pãha?’ oya oyevi oive oso.

### *Jesús oyemboyecua ñuvirío güemimbohe upe tecua Emaús piar rupi*

13 Ahe ari pipeve caharuse, ñuvirío semimbohe yuviraso tecua Emaús ve. Ahe once kilómetro tecua Jerusalén sui.

14 Ahe peri rupi oñemoñeta yuviraso opacatu co mbahe oime vahecuer rese.

15 Oñemoñeta viteseve, Jesús teieté oyemboya sese, uguata supi.

16 Yepe osepia tēi, ahe rumo ndoyepiacua ucai eté chupe.

17 Evocoyase Jesús oporandu chupe:

—¿Mbahe rese vo pe ñehe etepri pe guatasa rupi peico? —ehi.

Aipo hese, opita, ndovihai yuvinoha.

18 Ipāhu pendar Cleofas serer vahe omboyeve chupe:

—Nde güeraño revo Jerusalén ve ereico vahe ndereicuai mbahe oime vahe tecua pipe —ehi.

19 Evocoyase,

—¿Mbahe vo oime yandeu? —ehi.

—Jesús mo Nazaret pendar, ahe Tūpa ñehe mombehusar seco pĩrata vahe opacatu mbahe apo āgua, mbahe mombehu āgua avei Tūpa rovaque iyavei opacatu ava rovaque.

20 Omondo pahĩ rerecuar iyavei yande rerecuareta yamotarēhisave yuca uca āgua curusu rese yuvireco.

21 Ore rumo oroyeroya ité sese. “Ahe yande pĩsirora yande amotarēhimbar sui” orohe chupe viña. Cũritei rumo opa mbosapi ari yucare.

22 Ore pāhu pendar cuña ndore mbovihai eté oyeveise suvipa sui yuvireco. Esepia, yipindar yuvirasose añihiveive tuvipave,

23 ndoyosui eté sehögüer yuvireco. Ahese aipo osepia Tūpa rembiguai aipo ehi vahe yuvireco chupe: “Jesús mo oicove cũritei” ehi. Ahe evocoyase yugüeru imombehu oreu.

24 Iyavei ambuae ore ndugüer yuvirasose tuvipave cuña remimombehu rupi tupri avei. Ndosepiai eté rumo Jesús yuvireco —ehi Cleofas chupe tupri ité.

25 Evocoyase aipo ehi ahe ñuvirío mbia upe:

—¡Ndapeicuai eté rumo pe piha pipe seroya tupri āgua opacatu Tūpa ñehe mombehusar remimombehugüer!

26 ¿Ndapeicuai vo Poropĩsirosar iparaisu rane itera mbahe-mbahe tēi virecosa pipe güecua porañetesave güeique āgua renondeve? —ehi.

27 Ipare opa omombehu icuachiapri Moisés cuachiar pipendar iyavei opacatu Tūpa ñehe mombehusar cuachiar pipendar oyese ñehe agüer.

28 Oyepotase ahe tecuave yuviraso, Jesús rumo aviye uguataño vite vaherã senonde.

29 Co mbia rumo oñehe yuvireco chupe:

—Epitaño ore piri, caharu etepri. Pĩtura moco ndeu —ehi yuvireco chupe.

Evocoyase oique, opitaño ipiri yuvireco.

30 Oguapise yuvinoi mesave, oipisi pan, “Aviye ndeu” ehi Tūpa upe. Ipare ombohi co ñuvirío mbia upe imondo.

31 Ahese voi semimbohe omahecua ramo yuvireco sese, ahe rumo cũriteimi ndoyemboyecua iri sovai chupe.

32 Evocoyase aipo ehi oyeupe yuvireco:

—Yande mbopihañemoñeta pĩratami eté peri rupi oñehese yandeu co tecocuer icuachiapri rese —ehi yuvireco.

33 Ipare ndopita pucu iri; oyeveño voi yuviraso tecua Jerusalén ve. Aheve osepia once tupri vahe apóstol, omboetasa avei.

34 Ahese oñemonuha vahe aipo ehi yuvireco:

—Supi eté rumo yande Yar ocuerayevi. Esepia, oyemboyecua ité Simón upe —ehi.

35 Evocoyase ahe avei omombehu, “Oreu avei oyemboyecua oroguatase peri rupi. Ombohise pan ore piri, ahese ramo oroicua” ehi yuvireco omboetasa upe.

*Jesús oyemboyecua güemimbohe eta upe*

<sup>36</sup> Ahe oñehe vitesese yuvireco co tecocuer rese, ahesé Jesús oyemboyecua chupe aipo ehi:

—Avirave, mbahe tupri pipe tapeico —ehi güemimbohe eta upe.

<sup>37</sup> Ahe rumo oyembosiquiye guasu yuvireco ‘hãgüer revo’ oyapave.

<sup>38</sup> —¡Mahera pesiquiye! ¡Mahera pereco vite pe poreroyaẽhisa pe piha pipe!

<sup>39</sup> Pemahe che po rese, che pi rese avei. Che ité niha co aico. Pepoco ru che rese. Tache reroya ru peye. Esepia, ava hã ndovirecoi voho iyavei ocangüer; che rumo areco ité —ehi güemimbohe eta upe.

<sup>40</sup> Aipo ohe vitesese omboyecuapa opo, opi avei chupe.

<sup>41</sup> Ahe rumo vorivetesá pipe iyavei oyepihambosiquiye vitesa sui ndoviroya tupri vitei eté yuvireco. Evocoyase aipo ehi:

—¿Perecomi vo mbahe yande caru ãgua? —ehi güemimbohe upe.

<sup>42</sup> Evocoyase omondo pira apiremi oyi vahe yuvireco chupe.

<sup>43</sup> Ipare oipisi, ohu opacatu güemimbohe rovaque.

<sup>44</sup> Ipare aipo ehi:

—Co rese acoi ãnehe vichico cuese pe rese aico vitesé che mano renondeve. Yaviye ranera opacatu ñehesa che resendar Moisés porocuita cuachiapri pipe, iyavei Tũpa ñehe mombehusar yuvirecoi vahe rembicuachiagüer pipe, Salmo pipe avei —ehi.

<sup>45</sup> Ëgüe ehi evocoyase opacatu osenducua uca aracahendar icuachiapirer güemimbohe upe

<sup>46</sup> aipo ehi:

—Co icuachiasa Poropĩsĩrosar iparaisura omano ãgua. Ipare mbosapi ari pare ocuer-ayevira.

<sup>47</sup> Jerusalén sui tupri opacatu ivi yacatu rupi imombehusara serer pipe, “Pemboasi pe angaipa, peyevi Tũpa upe pẽu ñeroi ãgua” hesara.

<sup>48</sup> Pe niha peico opacatu co nungar mbahe repiasar imombehu ãgua.

<sup>49</sup> Che amboura che Ru remimombehu pe harive. Pepitañora rumo cohavé tecua Jerusalén ve acoi peipisise voi pĩratasa iva suindar —ehi güemimbohe eta upe.

### *Ivave Jesús so agüer*

<sup>50</sup> Evocoyase Jesús yuvinose tecua sui yuviraso tecua Betania popive. Aheve ñuvirío opo omopuha, osovasa mbahe tupri reime ãgua chupe.

<sup>51</sup> Ipare oyepipi güemimbohe sui. Ahe ramoseve serasosa ivave.

<sup>52</sup> Semimbohe evocoyase osapucaí imboeteisave. Ipare oyevi Jerusalén ve vorivetesá pipe yuvireco.

<sup>53</sup> Iyavei ahe ari yacatu rupi yuviraso tũparo guasu pipe osapucaí Tũpa mboeteisave yuvireco yepi. Aipo rupive.



## JUAN REMBICUACHIA JESUS RECOCUER RESENDAR SAN JUAN

### *Tũpa Ñehe oyeapo ava*

<sup>1-2</sup> Jesús yipisuiवे ité Tũpa Ñehe secoi. Ahe oicove mbahe apoẽhi viteseve Tũpa rese. Esepia, ahe niha Tũpa secoi.

<sup>3</sup> Ipipe avei Tũpa opacatu mbahe oime vahe oyapo; ndipoi eté mbahe sembiapoẽhi.

<sup>4</sup> Jesús niha vireco tecovesa apirẽhi vahe oyese. Ahe tecovesa tesapesa nungar secoi opacatu ava upe.

<sup>5</sup> Ahe tesapesa omboyecua tecocuer supi eté vahe pĩtumimbi nungar mbahe naporai vahe aposar pãhuve. Ahe mbahe tẽi aposar rumo ndoicatu eté secopi yuvireco.

<sup>6</sup> Oime mbia Tũpa remimbou. Ahe Juan serer vahe.

<sup>7</sup> Ahe rumo ou co tesapesa cua uca ãgua 'toviroya opacatu ava yuvireco' ohesave.

<sup>8</sup> Ahe rumo ndahei eté tesapesa; imombehugar tẽi rumo secoi.

<sup>9</sup> Co tesapesa supi eté vahe osesape opacatu ava. Ahe ou ité co ivi pipe.

<sup>10</sup> Yepe tie ipipe yapopri opacatu ava viña, sembiapo rumo ndoicuai co ivi pipe secoise yuvireco.

<sup>11</sup> Supi eté ouse güecuave, secua pendar ae rumo ndoipisi yuvireco.

<sup>12</sup> Opacatu rumo acoi oipisi vahe seroyasave yuvireco, ahe chupe omondo ñecuñarosa Tũpa rahir seco ãgua yuvireco.

<sup>13</sup> Ndahei rumo co ivi pipendar rahir nungar que oha vahe ambuae ava remimbotar pipe tẽi. Ahe rumo Tũpa rahir ité yuvirecoi.

<sup>14</sup> Ipare ahe Tũpa Ñehe, oyeapo ava, oicove yande pãhuve co ivi pipe oporoaisusave mbahe supi eté vahe aposa pipe. Iyavei orosepia ité seco porañetesá. Co seco porañetesá oipisi vahe Vu sui Tahir ñepe vahe güeco pipe.

<sup>15</sup> Juan niha oñehe sese ava upe aipo ehi: "Co uve niha acoi aipo ahe vahe cuese: 'Acoi ou vaheã che raquicuei, ahe ivate catu vahe che sui. Esepia, yipive ité secoi che yesuẽhi viteseve' ahe" ehi.

<sup>16</sup> Esepia, opacatu ité yaipisiño iporovasasa tuvichá vahe ombouño vahe ité yandeu ari yacatu rupi yepi.

<sup>17</sup> Mborocuita yaipisi Moisés sui; porovasasa rumo iyavei mbahe supi eté vahe, ahe güeru Jesucristo yandeu.

<sup>18</sup> Ndipoi eté ava osepia vahe Tũpa; Tahir ñepe vahe, secoi vahe ité ipiri, ahe oicua uca yandeu.

### *Juan Oporoãpiramo vahe oñehe Jesucristo rese*

<sup>19</sup> Judío rerecuar guasu tecua Jerusalén pendar oyocuai pahi eta iyavei ipĩtiviisareta imondo Juan uve '¿Ava vo nde? tehi yuvireco chupe' oyapave icua ãgua.

<sup>20</sup> Ahe rumo oyemombehu ité aipo ehi:

—Che ndahei eté Poropĩsirosar aico —ehi.

<sup>21</sup> Evocoyase oporandu iri yuvireco:

—¿Ava ité vo nde? ¿Nde tie Elías ereico? —ehi.

—Ndahei eté che ahe aico —ehi.

Evocoyase,

—¿Nde tie acoi Tũpa ñehe mombehugar ou vaheã? —ehi yuvireco chupe.

—Aní eté —ehi.

<sup>22</sup> —¿Ava rutei vo evocoyase nde? ¡Emombehu oreu ore oromombehu vaheã ore mbousar uve! ¿Mbahe ité vo eremombehura ndeyesuindar oreu? —ehi yuvireco chupe.

23 —Che aico oñehe vahe ivi iporupirêhisa rupi aipo ahe: ‘Pemoingatu pe recocuer yande Yar yepotase nara’ ahe pëu. Ahe inungar acoi Tũpa ñehe mombehusar Isaías aipo ehi vahe aracahe —ehi.

24 Ahe yuviraso vahe chupe, fariseo remimondo yuvirecoi,

25 oporandu yuvireco chupe:

—Evocoyase ndahei niha aipo nde Poropĩsirosar, ndahei avei Elías, ndahei eté Tũpa ñehe mombehusar imombehupri ereico. ¿Mahera ru evocoyase ereporoãpiramo? —ehi yuvireco chupe.

26 Evocoyase fariseo upe aipo ehi:

—Che rumo i pipe aporoãpiramo; oime rumo mbia pe pãhuve ndapeicuai vahe.

27 Ahe co ivi pipe ou vaheerã che raquicuei. Che rumo ndahei eté seco catupri vahe aico ipitaquisã yora ãgua —ehi.

28 Co opacatu mbahe yaposa tecua Betania ve, iai Jordán rovai añihivei coti. Aheve Juan oporoãpiramo yepi.

### *Tũpa remimbou Ovesa nungar opacatu ava angaipa repirã*

29 Ahere ayihive Juan osepia Jesús oyemboyase oyese aipo ehi: “¡Pesepia, co Tũpa remimbou Ovesa nungar seropovêhepirã opacatu ava angaipa mocañi ãgua!

30 Añehese sese aipo ahe: ‘Che raquicuei oura mbia ivate catu vahe che sui. Esepia, yipive vahe ité che sui’ ahe acoi cuese.

31 Che rumo yipindar ndaicuai ahe yande remiaro ou vaheerã. Sese niha aporoãpiramo i pipe vichico imboyecua ãgua che mu judío yuvirecoi vahe upe” ehi.

32 “Che asepia Espiritu Santo ogüeyise iva sui inungar apicasu, opita tupri iharive” ehi.

33 “Yipindar rumo ndaicuai eté. Tũpa che cuai vahe rumo che poroãpiramo ãgua i pipe, aipo ehi cheu: ‘Acoi eresepiase Espiritu Santo ogüeyise, opitase mbia harive, ahe mbia oporoãpiramora Espiritu Santo pipe’ ehi.

34 Che niha asepia ité. Sese, ‘Co Tũpa Rahir ité secoi’ ahe pëu” ehi.

### *Yipindar vahe Jesús remimbohe*

35 Ahere ayihive Juan secoi aheve avei ore ñuvirío mbia oroico vahe reseve.

36 Jesús ore cuãse, Juan aipo ehi oreu:

—¡Pesepia, ndo co mbia Tũpa remimbou Ovesa nungar seropovêhepirã! —ehi oreu.

37 Aipo ihe ramoseve, oroguata voi eté supi.

38 Evocoyase omahe guaquicuei coti. Ore repiase, oporandu oreu:

—¿Mbahe vo pesecami peico? —ehi oreu.

Ore evocoyase,

—Porombohesar, ¿que vo nde recosa? —orohe chupe.

39 —Yaso, tapesepia ru —ehi oreu.

Evocoyase oroso, oroyepota las cuatro pipe secosave. Aheve ore pĩtu ité ipiri.

40 Simón Pedro rivri, Andrés, ahe che ndugüer ahese.

41 Ahe rane aipo oseca viquehir Simón aipo ehi chupe:

—Orosepia ité Poropĩsirosar —ehi (‘Cristo’ oyapave).

42 Ipare voi, viraso Simón Jesús uve. Osepia, Jesús aipo ehi chupe:

—Nde Simón, Juan rahir, ndererguã rumo Cefas —ehi (‘Pedro’ oyapave).

### *Jesús oñehe Felipe upe, Natanael upe avei oyeupi iguata ãgua*

43 Ahere ayihive voi Jesús ipihañemoñeta oso ãgua ivi Galilea rupi. Aheve osepia Felipe, aipo ehi chupe:

—Erio che rupi —ehi.

44 “Aviye” ehi Felipe, ahe Pedro iyavei Andrés recua Betsaida pendar secoi.

45 Ipare oso Natanael reca, aipo ehi chupe:

—Orosepia Poropĩsĩrosar, sesendar acoi Moisés oicuachía cuachiar porocuaita re-sendar pĩpe aracahe, oicuachía avei sesendar Tũpa ñehe mombehusareta yuvireco. Ahe Jesús, José rahĩr, tecua Nazaret pendar —ehi.

<sup>46</sup> Natanael rumo aipo ehi:

—¿Oime pĩha yuvĩnose vahe ava aviye vahe Nazaret pendar? —ehi.

—Yaso, teresepia ru —ehi Natanael upe.

<sup>47</sup> Acoi oyepota senise Natanael ou, Jesús sepiase, aipo ehi voi chupe:

—Co mbia secoi judío ete ité, ndoporombopai vahe —ehi.

<sup>48</sup> —¿Mara ere che cua eve? —ehi Natanael chupe.

—Che oroepia yĩpĩve Felipe nde reca renondeve ivĩra higuervĩve ereicose —ehi Natanael upe.

<sup>49</sup> —Porombohesar, ĩnde niha Tũpa Rahĩr ereico, Israel ĩguar rereciar guasu! —ehi Natanael chupe.

<sup>50</sup> —¿Che reroya voi eté acoi, “Oroepia ivĩravĩve” che he sui tẽi eve! Eresepiara rumo co mbahe sui aviye catu vahe —ehi.

<sup>51</sup> Iyavei aipo ehi opacatu upe:

—Supi eté pesepiara ĩva oyemboi tuprise iyavei Tũpa rembiguai eta ĩgũeyĩse che, Ava Rĩquehĩr, upe, iyevisẽ avei ivave yuvireco —ehi.

## 2

### *Mendasa tecua Caná ve*

<sup>1</sup> ĩpare imombosapĩsa arĩ pĩpe, oime mendasa tecua Caná ve, Galilea ivĩ rupi. Jesús si avei secoi aheve,

<sup>2</sup> iyavei Jesús ore semimbohe oroico vahe reseve ore soho avei yuvireco aheve.

<sup>3</sup> Ĕgũe ehi rumo opa tẽi uva rĩcuer. Evocoyase Jesús si,

—Ndipo iri uva rĩcuer —ehi chupe.

<sup>4</sup> —Cuña, ¿mahera vo aipo ere cheu? Che remimbotar rumo arĩ ndoyepota vitei cheu —ehi osi upe.

<sup>5</sup> ĩchi rumo aipo ehi ava ĩgua rese ihañeco vahe upe:

—Peyapo opacatu semimbotar pe cuaise —ehi.

<sup>6</sup> Aheve oime seis cambuchi guasu ita cuhi apopri, ñepei-pei cambuchi pĩpe oique cincuenta litro, amove oique setenta litro ĩ ipĩpe. Ahe judío oĩporu pietase oyepoi ĩgua yuvireco Tũpa porocuaita mboaviye ĩgua yepi.

<sup>7</sup> Evocoyase ahe ava ĩgua rese ihañeco vahe upe aipo ehi:

—Pemboapĩpopa co cambuchi ĩ pĩpe —ehi.

Omboapĩpopa tupri yuvireco.

<sup>8</sup> Evocoyase aipo ehi ava ihañeco vahe upe:

—Penosemi chĩhi, peraso pieta rese hañecosar uve —ehi.

Ĕgũe ehi eté yuvireco.

<sup>9</sup> ĩhañeco vahe pieta rese osãha ĩ oyeapo vahe uva rĩcuer. Ndoicuai eté que sui osẽ ahe uva rĩcuer; ĩgua rese ihañeco vahe gũeraño tupri oicua yuvireco. Evocoyase pieta rese hañecosar oñehe cuimbahe omenda vahe upe

<sup>10</sup> aipo ehi chupe:

—Opacatu ava omondo uva rĩcuer aviye catu vahe yĩpĩndar. ĩpare acoi ava hĩtaropase yuvireco, omondo ndasepii vahe. Nde rumo ereyapocatupaño aviye catu vahe, ahe cũritei ramo erenose —ehi.

<sup>11</sup> Co yĩpĩndar vahe poromondiisa Jesús oyapo vahe aheve. ĩpĩpe omboyecua gũeco pĩratasa. Sese semimbohe vĩroya ité yuvireco.

<sup>12</sup> ĩpare oso tecua Capernaum ve, ĩchi avei, tivri reseve supive, iyavei ore semimbohe eta oroso supi. Aheve oroico movĩro arĩ tẽi.

*Jesús omombopa ava mbahe rerecosar tũparó pipe sui*

<sup>13</sup> Ipare judío upendar Pascua pieta yepota senise, Jesús oso Jerusalén ve.

<sup>14</sup> Aheve osepia tũparó guasu pipe corero ivipi rupi guarepochi rese mbahe mimba eta mondosar; guaca, ovesa iyavei apicasu. Aheve avei mbia guarepochi recuñarosar yuvinoi.

<sup>15</sup> Co mbahe repiase rumo, Jesús oyapo tucumbo omombopa tupri tũparó sui opacatu ava imbahe reseve-seve, seimba ovesa, seimba guaca avei. Guarepochi recuñarosar sui otiapi-apii iguarepochi ivi rupi, iyavei imesa opa omombo.

<sup>16</sup> Apicasu mondosareta uve aipo ehi:

—¡Penosepa co mbahe cũritei ave sui! —ehi—. ¡Aní che Ru rēta mbahe mondosea tēi pereco! —ehi.

<sup>17</sup> Aipo hese, ore oroyemomahenduha ñehesa icuachiapri aracahendar aipo ehi vahe rese: “Nde rēta rese che recatēhisa sui che moçañira” ehi vahe.

<sup>18</sup> Evocoyase judío mborerecuar yuvirecoi vahe oporandu yuvireco chupe:

—¿Mbahe vo ereyapora nde mborerecuasa moporēhi āgua oreu cũritei? —ehi yuvireco chupe.

<sup>19</sup> Evocoyase,

—Pemondurupa co tũparó, che evocoyase mbosapi ari rupive amopuha irira —ehi judío eta upe.

<sup>20</sup> Aipo hese, mborerecuar aipo ehi yuvireco chupe:

—Co tũparó rumo imopuhasa cuarenta y seis araviter rupi, ¿ereicatura pñha aipo nde imopuha iri mbosapi ari rupive? —ehi yuvireco chupe.

<sup>21</sup> Oñehese Jesús tũparó rese, güete upe tēi rumo aipo ehi.

<sup>22</sup> Ocueraevise rumo manosa sui, ore oroyemomahenduha ñehese agüer rese. Sese oroviroya sesendar ñehesa icuachiapri pipe iyavei semimombehüer.

*Jesús oicua opacatu ava recocuer*

<sup>23</sup> Jesús secoi vitese Jerusalén ve Pascua pieta pipe, setá ité ava viroya osepia seporomondiisa sembiapo yuvireco.

<sup>24</sup> Ndoyeroyai eté rumo ahe ava eta rese. Esepia, opacatu ité ava recocuer oicua.

<sup>25</sup> Ndipoi eté que ambuae ava pihañemoñeta mombehu āgua chupe. Esepia, ahe ité opa oicua.

### 3

*Nicodemo omoñeta Jesús*

<sup>1</sup> Oime mbia fariseo, Nicodemo serer vahe, ahe mbia mborerecuar judío pñhüve secoi vahe.

<sup>2</sup> Ahe oso Jesús pñri pñtu pipe, aipo ehi chupe:

—Porombohesar, oroicua ité Tũpa nde mbose ore mbohe āgua —ehi—. Esepia, ndipoi eté que ava oicatu vahe evocoi nungar poromondiisa apo Tũpa oyese secoñhise —ehi.

<sup>3</sup> Evocoyase,

—Supi eté aipo ahe ndeu: acoi ava ndoyesu pñasu iri vahe, ndoiquei chietera Tũpa mborerecuasave —ehi Jesús chupe.

<sup>4</sup> Oporandu rumo aipo ehi:

—¿Mara ehira vo aipo ava oyese pñasu iri ocuacua pipe viña? —ehi—. ¿Oicatu irira pñha osi aviterve oique oyese iri āgua? —ehi Jesús upe.

<sup>5</sup> Jesús omboyeví chupe:

—Supi eté aipo ahe ndeu: acoi ava i pipe iyavei Espiritu pipe ndoyesui vahe, evocoi nungar ndoyuviroiquei chira Tũpa mborerecuasave.

<sup>6</sup> Acoi oyese vahe co ivi pipendar oyeseupa sui, inungar tupri avei ahe; Espiritu pipe oyese vahe rumo, ahe espíritu.

<sup>7</sup> Ereyepihamondii rene, ‘Peyesu piasu irira’ ahese ndeu.

<sup>8</sup> Co rumo inungar ivitu oipeyu vahe güemimbotar rupi. Yepe sendusa siapu, ndicuasai rumo que sui turi, que oso no. Ëgüe ehi avei ava oyesu vahe Espiritu pipe —ehi Jesús chupe.

<sup>9</sup> —¿Mara ehi pīha aipo evocoyase? —ehi Jesús upe.

<sup>10</sup> —¡Nde niha porombohesar ivate vahe Israel pendar ereico, nderesenducuai eté rumo co nungar mbahe! —ehi chupe—.

<sup>11</sup> Supi eté aipo ahe ndeu: ore oromombehu mbahe oroicua vahe, orosepia vahe ité. Pe rumo ndaperoyai eté ore remimombehu.

<sup>12</sup> Añehe tēi niha mbahe co ivi pipendar rese pēu; ndache reroyai eté rumo peye. Tahetru revo mbahe iva pendar amombehuse pēu ndaperoyai chietera viña —ehi.

<sup>13</sup> “Esepia, ndipoi eté ambuae ava ivave oyeupi vahe; che güeraño, Ava Riquehir, iva sui agüeyi vahe pēu.

<sup>14</sup> Inungar Moisés osupi ivate mboi rahanga ivi iporupirēhisa rupi aracahe. Ëgüe ehi aveira che, Ava Riquehir, rerecosa ivate che rupira yuvireco

<sup>15</sup> opacatu ava che reroyasar tecovesa apirēhi rereco āgua yuvireco” ehi Jesús Nicodemo upe.

### *Tūpa poroaisusa ava upe nara*

<sup>16</sup> “Supi eté Tūpa osaisú iteanga opacatu ava. Sese ombou Guahir ñepepe vahe ‘tocañi tēi eme che Rahir reroyasar yuvireco’ oya, ‘tovireco tecovesa apirēhi vahe’ ohesave.

<sup>17</sup> Esepia, nomboui Tūpa Guahir co ivi pipe ava mocañi tēi āgua; ahe rumo ombou ava pīsiro āgua.

<sup>18</sup> “Ava viroya vahe Tūpa Rahir, ndahei eté ocañi tēi vaheerā; acoi ava ndoviroyai vahe rumo, oipisi itera cañisa yuvireco Tūpa Rahir ñepepe vahe reroaēhisa pipe.

<sup>19</sup> Ëgüe ehi etera chupe yuvireco. Esepia, tesapesa supi eté vahe ou co ivi pipe, ahe ava rumo oipota catu mbahe Carugar suindar pītumimbi vahesave güeco āgua yuvireco.

<sup>20</sup> Supi eté acoi opacatu ava oyapo vahe angaipa, ndosepia potai tesapesa, iyavei ndoyemboyai tesapesa rese yuvireco oangaipa mboyecua potaēhisave.

<sup>21</sup> Acoi ava yuvirecoi vahe rumo mbahe supi eté vahe aposa pipe, oyemboya tesapesa rese yuvireco mbahe Tūpa remimbotar oyapo vahe cua uca āgua opacatu ambuae ava upe —ehi.

### *Juan Oporoāpiramo vahe oñehe iri Jesús rese*

<sup>22</sup> Ipare Jesús oso güemimbohe eta rese ambuae tecua rupi-rupi ivi Judea ve. Aheve secoi pucu raimi oporoāpiramo.

<sup>23</sup> Iyavei Juan oporoāpiramo vite Enón ve, Salim rerovicave. Esepia, aheve tuvichá i oime. Aheve ava yugüeru oñeapiramo uca āgua.

<sup>24</sup> Co rumo mbahe yaposa Juan roquendaēhi viteseve.

<sup>25</sup> Evocoyase Juan remimbohe omboipi ambuae omu judío rese oyeecopi-copi vaheerā i pipe ñeapiramosa resendar sui tēi yuvireco.

<sup>26</sup> Sese yuviraso Juan uve aipo ehi:

—Ore mbohesar, acoi secoi vahe nde rese iai Jordán rovai, sese acoi ereñehe oreu, cūrítei ahe oporoāpiramoño tēi iyavei opacatu yuviraso supi —ehi semimbohe yuvireco chupe.

<sup>27</sup> Evocoyase aipo ehi güemimbohe upe:

—Ava ndoicatu mbahe apo Tūpa nombouise chupe.

<sup>28</sup> Pesendu tupri ité che ñehe cuese: “Che ndahei Poropīsīrosar aico, che rumo senonde imboupri tēi aico” ahese pēu.

<sup>29</sup> Esepia, acoi mendasa oimese, vireco vahe güembirecovi ahe imevi, osenduse rumo imboripar iñehe yivi ohã, oyemboviharere sese. Ëgüe ahe avei che cüritei, ayemboviharere Jesús rese.

<sup>30</sup> Ahe niha seco ivate catu-catuño itera ari rupi oico; che rumo ivi coti catu aicora ichui —ehi Juan güemimbohe upe.

### *Iva suindar ou vahe*

<sup>31</sup> Iva suindar ou vahe ivate catu ité opacatu sui. Co ivi pipe oyesu vahe rumo co ivi pipendar ité. Sese niha mbahe ivi pipendar rese tēi oñehe. Acoi ou vahe rumo i va sui, ivate catu ité opacatu sui.

<sup>32</sup> Iyavei mbahe güembiepia osendu vahe reseño ité oñehe. Ndipoi eté rumo semi-mombehu viroya vahe yuvireco.

<sup>33</sup> Acoi ava viroya vahe rumo iñehe, “Supi tupri ité Tūpa omombehu mbahe” ehi.

<sup>34</sup> Co Tūpa remimbou niha omombehu Tūpa ñehe. Esepia, Tūpa omondo ité oEspíritu sese.

<sup>35</sup> Tūpa osaisu Guahir iyavei opacatu mbahe omondo ipove.

<sup>36</sup> Opacatu ava viroya vahe Tūpa Rahir, vireco ité tecovesa apirēhi; acoi ndoviroyai vahe rumo, ndovirecoi chietera co tecovesa. Ahe rumo oipisira Tūpa ñemoirosa ipirata vahe ité yuvireco.

## 4

### *Jesús oñehe Samaria pendar cuña upe*

<sup>1</sup> Fariseo eta oyandu yuvireco Jesús vireco catuse ava oyeupi oguata vahe iyavei oporoãpiramo catuse avei Juan sui

<sup>2</sup> (ndahei eté rumo Jesús oporoãpiramo; semimbohe tēi rumo ëgüe ehi yuvireco).

<sup>3-4</sup> Jesús oicuase aipo nungar, osē Judea sui, oyevi iri ivi Samaria rupi, Galilea ve yuviraso.

<sup>5</sup> Aheve Samaria ivi rese oyepota tecua Sicar serer vaheve yuvireco. Ahe tecua rerovicave oime ivi Jacob omondo vahecuer guahir José upe aracahe.

<sup>6</sup> Aheve oime ivicuar, chupe, “Jacob iguagüer” ehi yuvireco. Ahe igua rembe rese Jesús uguapi mbiter ari potase ocueraise oĩ.

<sup>7-8</sup> Semimbohe eta rumo opacatu yuviraso tecuave mbahe tembihu rerocua. Aheseve cuña, Samaria pendar, oyepota iguave i renose. Ahese Jesús aipo ehi chupe:

—Emboumi chñhi nde i taihu —ehi.

<sup>9</sup> Cuña, Samaria pendar, rumo omboyevi chupe:

—¿Mahera vo, “Embou i taihu” ere cheu? Nde rumo judío; che cuña coha pendar aico —ehi chupe. (Esepia, judío noñehei vahe ité ava Samaria pendar upe yuvireco yepi.)

<sup>10</sup> Evocoyase omboyevi cuña upe:

—Ereicuase Tūpa porerecosa ndeundar viña iyavei ereicuase ahe ava ndeu i rese oporandu vahe, nde evocoyase ereporandura sese chupe. Ahe evocoyase omondora i ndopai vahe ndeu viña —ehi cuña upe.

<sup>11</sup> —Ndererecoi rumo i renose ãgua. Esepia, co igua ipicucú ité. ¿Que sui vo aipo evocoyase eremboura i ndopai vahe cheu viña? —ehi cuña chupe—.

<sup>12</sup> Esepia, co igua ore ramoi Jacob oseya oreu. Cohave suiño ité niha ahe oihu, tahir avei oihu yuvireco ichui iyavei opacatu seimba. ¿Nde pñha ivate catu ereico ichui? —ehi cuña chupe.

<sup>13</sup> —Opacatu ava oihu vahe co i, ihuseiño itera yepi, —ehi cuña upe—.

<sup>14</sup> Acoi ava oihu vahe rumo i che remimondo, ndihusei iri chietera. Esepia, che amondo vahe i ndopai vahrã ité. Ahe omboura tecovesa ndopai vahe ava upe —ehi cuña upe.

15 —Nde ava, emboumi ahe i taihu che husei iriēhi āgua, tanose iri eme i cohave sui —ehi.

16 —Eso rane nde mer reca, seseve peyu cohave —ehi cuña upe.

17 —Ndarecoi rumo che mer —ehiño cuña chupe.

—Supi eté aipo ere, ndererecoi eté nde mer.

18 Esepia, cinco tupri erereco nde mer iyavei cūritei erereco vahe nde resendar tēi. Supi eté aipo ere: “Ndarecoi che mer” ere cheu —ehi cuña upe.

19 —Nde ava aviye moco Tūpa ñehe mombehusar ereico cheu —ehi—.

20 Ore ramoi eta omboetei Tūpa co ivitri rese yuvireco. Pe rumo, judío peico vahe, “Jerusalén ve yamboeteira Tūpa yepi” peye —ehi.

21 —Che reroya eve cuña, vırovi ari pēu peso iriēhi āgua Tūpa mboetei co ivitri rese iyavei Jerusalén ve.

22 Pe Samaria pendar peico vahe pemboetei tēi pe rembiguaēhi. Ore rumo oroicua oromboetei vahe. Esepia, ñepisirosa ou judío sui.

23 Oyepota rumo ari cute, ahe ité co cūritei co pipe suive supi eté Tūpa omboetei vahe, Tūpa Espiritu pipe omboeteira yuvireco. Supi eté Tūpa, “Ēgüe tehi che mboetei yuvireco” ehi.

24 Esepia, Tūpa niha Espiritu secoi. Sese acoi omboetei vahe oyapora Espiritu pipe supi tupri vahe ité yuvireco —ehi cuña upe.

25 Cuña evocoyase aipo ehi chupe:

—Che aicua Poropisrosar yu āgua (ahe ‘Cristo’). Acoi ahe ouse, omombehu tuprira opacatu mbahe yandeu —ehi cuña chupe.

26 —Che niha ahe aico añehe vahe ndeu —ehi cuña upe.

27 Aheseve semimbohe eta oyevi yuvireco, nombovihaiPRI güemimbohe cuña rese oñemoñetase. Ndipoi eté rumo que “¿mbahe rese vo peñemoñeta?” ehi vahe, que “¿mahera vo ereñehe co cuña upe?” ehi vahe yuvireco chupe.

28 Ahese cuña oseya tupriño ocambuchi, oso güecuave aipo ehi ava eta upe:

29 —Perio, tapesepia pe ava omombehupa tupri vahe che recocuer cheu. ¿Ndahei pīha ahe Poropisrosar? —ehi omu eta upe.

30 Evocoyase ava rehi yuvınose tecua sui, yuvıraso Jesús recosave sepia.

31 Ava yepotaēhi vıteseve, semimbohe eta,

—Ore mbohesar, ecarumi —ehi tēi yuvireco chupe.

32 —Oimera rumo ambuae mbahe cheu che movıracua āgua. Ahe ndapeicuai vahe —ehi güemimbohe eta upe.

33 Semimbohe aipo hese oporandu-randu tēi oyeupe yuvireco:

—¿Oime pīha que ava güeru vahe mbahe semihura? —ehi tēi yuvireco.

34 Güemimbohe upe rumo aipo ehi:

—Che movıracuasa rumo che mbousar porocuita, ahe ayapora iyavei amboaviye rane itera iporavıqui —ehi—.

35 Esepia, pe aipo peye: ‘İpane vıte irungatu yasi mbahe miti ha monuha āgua’ peye yepi; che rumo aipo ahe pēu: pemahe pe ivıřindar ava eta rese. Opa ité opıha omoingatu yuvireco, ahe inungar mbahe miti ha yaviye vahe.

36 Acoi oporavıqui vahe Tūpa upe ava hā pısi āgua rese, ahe oipısira sepri yuvireco iyavei semimonuha tecovesa ndopai vaheve nara ité yuvirecoira. Evocoyase ava upe oñehe vahe iyavei oipısi vahe ava hā ivave nara, oyoya guasu ovıharetera ipıspri rese yuvireco.

37 Supi eté co ñehesa aipo ehi vahe: ‘Ñepeı eté omaheti vahe; imonuhasar rumo ambuae ité’ ehi.

<sup>38</sup> Che opocuai ava hã pisi ãgua ambuae ava poraviquisave; yipindar rumo ambuae oporaviquí ité yuvireco sese. Pe evocoyase peique iporaviquí agüer rupi —ehi güemimbohe eta upe.

<sup>39</sup> Setá ava tecua Sicar pendar Samaria pipe viroya cuña ñehe sui yuvireco, “Opacatu mbahe che rembiapo omombehu cheu” ihesa sui.

<sup>40</sup> Evocoyase ava rehii Samaria pendar yuviraso chupe ‘epitami ore piri’ oya. Evocoyase opita ipiri ñuvirío ari rupi.

<sup>41</sup> Setá catu iri ava viroya yuvireco ñehe ité renduse.

<sup>42</sup> Evocoyase ava eta aipo ehi cuña upe yuvireco:

—Cūrítei oroviroya ité cute, ndahei nde ñehe suiño oroviroya. Esepia, ore ité orosendu ñehe cute, orocua avei ahe supi eté opacatu ava p̄sirosar ou vahe —ehi ava eta cuña upe yuvireco.

### *Jesús ombogüera mborerecuar rahir*

<sup>43</sup> Ñuvirío ari pare, Jesús osẽ ivi Samaria sui, osoño ivi Galilea ve.

<sup>44</sup> Ahe ae ité aipo ehi: “Tũpa ñehe mombehusar ndasaisusai ivi rese yuvireco yepi” ehi.

<sup>45</sup> Oyepotase oivi Galilea ve, ahe pendar ava oipisi tupri yuvireco. Esepia, setá osepia opacatu mbahe sembiapo Pascua pietase Jerusalén ve.

<sup>46</sup> Evocoyase oyevi iri tecua Caná ve Galilea ivi rese, aheve acoi i tẽi oyapo uva ricuer. Tecua Capernaum ve oime mbia mborerecuar guasu ivirindar. Ahe viresco guahir imbaheasi vahe.

<sup>47</sup> Oyanduse co mbia mborerecuar Jesús yepota Judea sui ivi Galilea ve, ahe ramoseve oso voi seca ‘toso che rêtave, tombogüeramí che rahir omano pota vahe cheu’ oya.

<sup>48</sup> Evocoyase aipo ehi ahe mborerecuar upe:

—Pe ndache reroyai eté peye ndapesepiaise mbahe poromondiisa che rembiapo —ehi.

<sup>49</sup> —Che Yar, eyu poyavañomi tẽi che rahir mano v̄itehiseve —ehi mborerecuar chupe.

<sup>50</sup> —Eyevi nde rêtave; nde rahir oicove —ehi mborerecuar upe.

Ahese viroya voi oyeupe ñehesa. Sese oyevi voi eté güêtave.

<sup>51</sup> Amombri seco v̄iteseve, yuvinoña voi sovañchi sembiguai imombehu:

—jNde rahir oicove! —ehi yuvireco chupe.

<sup>52</sup> Evocoyase oporandu: “¿Mbahe hora pipe tupri ocuera?” ehi.

—Irapipe caharuse, la una pipe, ndasohi iri —ehi yuvireco chupe.

<sup>53</sup> Ahese mborerecuar ipihañemoñeta: “Ahe hora pipe tupri niha Jesús aipo ehi cheu: ‘Nde rahir oicove’ ehi” ehi. Evocoyase ahe iyavei opacatu imu eta viroya Jesús yuvireco.

<sup>54</sup> Co imoñuviriosa poromondiisa oyapo Jesús güecocuer cua uca ãgua ivi Judea sui oyevisẽ Galilea ve.

## 5

### *Jesús ombogüera ava ndoguatai vahe tecua Betzata pendar*

<sup>1</sup> Ipare oime judío pieta guasu Jerusalén ve, aheve Jesús oso.

<sup>2</sup> Ahe tecua roquendipi, Ovesa serer vahe coti, oime ivicuar i viresco vahe, serer hebreo ñehe pipe Betzata. Ahe sese oyere tupri poyandepo oquendipi yapayere vahe pãve.

<sup>3</sup> Aheve ava eta imbaheasi vahe oñeno yugüeru ivi rupi: ndasesapisoi vahe, ndoguatai vahe, ndipindugüei vahe avei i ñemomiisa osãro yuvireco yepi.

<sup>4</sup> Esepia, amove tẽi Tũpa rembiguai ogüeyi ahe ivicuarve i momii ãgua, “Acoi ahe rane ocui vahe i ñemomiiseve ive, ocuera voi eté ombaherasisa sui” ehi yuvireco chupe.

<sup>5</sup> Aheve oime mbia ombaherasisa viresco vahe treinta y ocho araviter rupi.

<sup>6</sup> Osepiaise Jesús, oicua voi eté viresco pucuse ombaherasisa. Evocoyase oporandu chupe:



—¿Ereipota vo nde cuera ãgua? —ehi chupe.

<sup>7</sup> Imbaheasi vahe omboyevi:

—Nde mbia, ndipoi eté que ava che mongui vaheã i pipe i ñemomiise. Asãha tẽi ‘tacui’ viya. Ambuae rane-raneño rumo yuvirocui che sui yepi —ehi.

<sup>8</sup> Evocoyase,

—Epũha, esupi nde rupa, eguata —ehi imbaheasi vahe upe.

<sup>9</sup> Ahe ramoseve ahe mbia ocuera tupri, osupi vupa, oguata voi oico. Mbituhusa ari pipe tupri rumo ãgũe ehi.

<sup>10</sup> Evocoyase judío aipo ehi ocuera vahecuer upe yuvireco:

—Co pipe rumo mbituhusa ari, nande cuaitai nde rupa rese ndevosiã ãgua —ehi yuvireco chupe.

<sup>11</sup> Ahe mbia evocoyase,

—Che mbogüerasar rumo aipo ehi cheu: ‘Esupi nde rupa, eguata’ ehi cheu —ehi judío eta upe.

<sup>12</sup> —¿Uma vo aipo ehi ndeu? —ehi judío yuvireco chupe.

<sup>13</sup> Ahe mbia rumo ndoicua iri ombogüerasar. Sese ndoicatui imboyevi ãgua. Esepia, Jesús aviyeteramo tẽi ndoyecua iri ava rehii pãhuve.

<sup>14</sup> Coiye rumo Jesús osepia iri tũparove ahe mbia, aipo ehi chupe:

—Ereicua co nde cuerasa cũritei, aní ereyemboangaipa iri mbahe tẽi catu reime iri ãgua ndeu —ehi chupe.

<sup>15</sup> Ahe mbia evocoyase oso voi eté judío eta rerecuar upe ‘Jesús che mbogüera’ oya.

<sup>16</sup> Sese judío osaquicue moña iyavei oyuca pota yuvireco mbituhusa ari pipe iporombogüera rese tẽi.

<sup>17</sup> Ahe rumo aipo ehi:

—Che Ru niha oporaviquiño ité co ari rupi iyavei che aporaviquiño avei —ehiño judío upe.

<sup>18</sup> Aipo hese, judío, “Yayuca ité” ehi. “Esepia, ndahei mbituhusa ari güeraño nomboyeroyai, ahe rumo oyeapo Tũpa nungar, Tũpa uve ‘che Ru’ ohe angahu tẽisa pipe” ehi yuvireco chupe.

### *Tũpa Rahir mborerecuasa*

<sup>19</sup> Evocoyase Jesús aipo ehi judío upe: “Supi eté aipo ahe: Tũpa Rahir ndoicatui eté mbahe apo oyesui tẽi, Vu rembiapo mbahe oicua; aheño tupri avei oyapo yepi.

<sup>20</sup> Esepia, Tu Guahir raisupave omboyecua opacatu mbahe güembiapo chupe iyavei omboyecuaño vite itera mbahe poromondiãsa tuvicha catu vahe sembiaporã, ‘¡Mara ehi rutei co!’ pehe tẽi ãgua chupe.

<sup>21</sup> Esepia, che Ru ombogüerayevi omano vahe iyavei omondo tecovesa chupe. ãgũe ehi avei Tahir omondo tecovesa ava upe güemimbotar rupi.

<sup>22</sup> Iyavei Tu nomondo iri ava upe sembiapo reperi. Esepia, ombou Guahir upe opacatu pĩratasa ava upe sembiapo reperi mondo ãgua.

<sup>23</sup> ãgũe ehi Guahir upe opacatu ava imboetei ãgua yuvireco inungar Tu imboeteipri. Acoi ava Tahir nomboetei vahe, Tu imbousar avei nomboetei yuvireco.

<sup>24</sup> “Supi eté aipo ahe pẽu: acoi oyapisaca vahe che ñehe rese, viroya vahe avei che mbousar, ahe virecora tecovesa apirẽhi vahe; ndahei chietera imocañipri. Esepia, osẽ manosa sui oipisi tecovesa.

<sup>25</sup> Supi eté aicua uca pẽu: oura ari imombeupri, cũritei eté co ari oyepota, ava eta omano vahecuer osendura Tũpa Rahir ñehe. Acoi osendu vahe, oicoveño itera.

<sup>26</sup> Esepia, Tu vireco tecovesa oyese. ãgũe ehi avei Guahir upe imondo tecovesa rereco ãgua.

<sup>27</sup> Ombou avei imborerecua ãgua chupe ava recocuer rese iporandu ãgua. Esepia, ahe Ava Riquehir secói.

<sup>28</sup> Peyepihamondíi rene aipo che hesa sui. Esepia, oyepotara arí imombehuprí, ahese opacatu ava omano vahecuer osendura ñehe.

<sup>29</sup> Ahese yuvinosera vuvipa sui. Oyapo vahe mbahe tuprí, ocuerayevira yuvireco tecovesa apirẽhi rereco ãgua; acoi oyapo vahe rumo mbahe naporai vahe, ocuerayevira yuvireco Tũpa ñemoirosa pisi ãgua” ehi Jesús judío rerecuar upe.

### *Jesús omboyecua tuprí omborerecuasa*

<sup>30</sup> “Che ndaicutui mbahe apo cheyesui tẽi. Che, ‘Pe peyaví vahe mbahe, peipisira che Ru ñemoirosa’ ahe ava ndaseco põrai vahe upe che cuaita rupi iyavei che amombehu vahe supi tuprí ité. Esepia, che ndaipotai che remimbotar tẽi mbahe apo ãgua. Che Ru, che mbousar remimbotar rumo ayapo.

<sup>31</sup> Que cheyese ae tẽi añehese, ahese ndache reroyai chira peye viña.

<sup>32</sup> Oime rumo ambuae che mombehugar. Ahe supi eté che mombehu pe seroya ãgua; ahe Juan.

<sup>33</sup> Pe niha, pemondo ava chupe imboporandu mbahe rese. Ahe semimombehu niha supi tuprí vahe ité.

<sup>34</sup> Yepe ahe supi eté viña, che rumo ndayeroyai ava tẽi che mombehusa rese. Che rumo aipota peñepisiro ãgua. Sese aipo ahe pẽu.

<sup>35</sup> Juan niha inungar tataendi, ãgüe ehi omboyecua mbahe supi eté vahe. Sese pe peyembovaha raimi tẽi iporombohesa tesapesa nungar pipe peico.

<sup>36</sup> Che rumo areco che yecua ucasar aviye catu vahe Juan sui. Ahe niha co mbahe ayapo vahe yepi. Ahe sese che Ru che cuai yapo ãgua. Co mbahe ayapo vahe, ahe ité omboyecua che Ru Tũpa che mbousar.

<sup>37</sup> Iyavei che Ru avei eté che cua ucasar. Ahe ñehe rumo ndapesendui vahe ité, iyavei ahe ndapesepiai eté.

<sup>38</sup> Ñehengagüer icuachiaprí avei ndoiquei eté pe rese. Ipipe niha ndache reroyai eté peye che Ru che mbose.

<sup>39</sup> Pe peicua tuprí pota icuachiaprí ‘icuapa tuprí pipe revo tecovesa apirẽhi yarecora’ peye viña. Co rumo cuachiar che mombehu vahe:

<sup>40</sup> pe rumo ndapeyu potai eté cheu co tecovesa apirẽhi rereco ãgua.

<sup>41</sup> “Ndaipisii eté ava che mboeteisa tẽi.

<sup>42</sup> Iyavei opocua Tũpa ndapesaisuisse.

<sup>43</sup> Che niha ayu che Ru rer pipe. Pe rumo ndache reroyai eté peye. Ouse rumo que ambuae ava oyesui tẽi oñehe vahe, evocoi nungar tẽi peroyara.

<sup>44</sup> Ndapeicutui eté che reroya ãgua peye. Esepia, pe ae tẽi peyemboetei; ndapesecai eté Tũpa ñepeí vahe suindar yemboeteisa.

<sup>45</sup> Ndapepíhañemoñetai chira che pe recocuer mombehu ãgua rese che Ru rovai. Moisés peroya vahe ité niha oicuachía pe Tũpa reroyaẽhisa chupe imombehu ãgua.

<sup>46</sup> Peroyase rumo Moisés ñehe viña, che avei che reroyara peye viña. Esepia, Moisés niha oicuachía che resendar ñehesa.

<sup>47</sup> Ndaperoyaise ahe sembicuachía, evocoyase ndapeicutui chietera che remimombehu reroya ãgua” ehi Jesús oamotarẽhimbar upe.

## 6

### *Jesús oyopoi cinco mil ava*

<sup>1-4</sup> Ipare Pascua pieta ípimi aipo Jesús osasa ípa Galilea serer vahe oso, ahe serer avei Tiberias. Ava rehí avei yuviraso saquicuei. Esepia, osepia ité yuvireco oyapose

mbahe poromondiisa guasu imbaheasi vahe mbogüerese. Oyepotase ivi rese yuviraso, evocoiyase oyeupi ivitri rese. Aheve oguapi opacatu güemimbohe eta reseve yuvinoi.

<sup>5-6</sup> Omahese ava rehii oyeupindar rese, ahease aipo ehi Felipe upe:

—¿Que vo yarocuara mbahe tembihu co opacatu ava upe nara? —ehi secoãhasave.

Ahe rumo oicua ité mbahe güembiaporã.

<sup>7</sup> Evocoiyase Felipe omboyevi chupe:

—Dosciento denario pan ndosupitii chietera que chñhi-chñhimi ava retacuer viña —ehi.

<sup>8</sup> Aipo hese, ñepe semimbohe pâhu pendar, Simón Pedro rivri, Andrés aipo ehi chupe:

<sup>9</sup> —Co chñhivahe vireco cinco pan, iyavei ñuvirío pira, ¿iyacatura vo co ava retacuer? —ehi.

<sup>10</sup> Evocoiyase aipo ehi:

—Pemombehu opacatu upe toguapi yuvireco —ehi güemimbohe upe.

Capihi reimesave opa omboguapi yuvireco cinco mil ava.

<sup>11</sup> Evocoiyase oipisi cinco vahe pan, “Aviye ndeu” ohe pare Vu Tüpa upe, opa ombohimbóhi imondo ava rehii upe. Ëgüe ehi avei pira upe, imondopa semimbotar rupi-rupi yuvireco.

<sup>12</sup> Opase ava ihitaro,

—Pemonuhapa sumbirer iyemombucaëhi água —ehi güemimbohe upe.

<sup>13</sup> Evocoiyase omonuha doce iruova sumbirer yuvireco pan cincomi vahe sui.

<sup>14</sup> Evocoiyase ava eta co poromondiisa guasu Jesús rembiapo repiase, aipo ehi yuvireco:

—Supi eté co uve revo acoi: “Oura Tüpa ñehe mombehusar ivi pipe” ehi icuachiapri arachendar pipe —ehi yuvireco.

<sup>15</sup> Jesús rumo oicuae ava opĩratasa pipe tēi güeraso pota água mborerecuar guasu vireco água oyeupe nara yuvireco, ahease oyeupi iri oso ivate catu. Aheve ahe ae güeco água.

### *Jesús oguata i hari rupi*

<sup>16</sup> Pĩtu ramose ogüeyi yuviraso Jesús remimbohe ipave,

<sup>17</sup> yuviroha carite pipe sasa água yuvireco tecua Capernaum ve yuviraso. Ahease pĩtu ité. Jesús rumo ndoyevi vitei eté.

<sup>18</sup> Ahease oipeyu pĩrata ivitu, i avei ohitu pĩrata.

<sup>19</sup> Yuviraso pucumi tēi cinco, anise seis kilómetro rupi. Ahease osepia Jesús yuvireco osupiti senise carite. Ahe i hari rupi oguata oso chupe. Evocoiyase osiquiye ité yuvireco ichui.

<sup>20</sup> Ahe rumo aipo ehi güemimbohe upe:

—¡Che Jesús aico, pesiquiyei rene! —ehi.

<sup>21</sup> Evocoiyase sorivete yuvireco carite pipe seroha. Iparemi tēi oyepota yuviraso oyuvirasosave.

### *Ava eta oseca Jesús*

<sup>22</sup> Ahere ayihive ava rehii opita vahe sovai yuvireco, “Semimbohe año rumo yuviraso ñepe vahe carite pipe. Jesús rumo ndosoi eté güemimbohe rupi” ehi tēi yuvireco.

<sup>23</sup> Aheve rumo ambuae carite viroyepota seru yuvireco tecua Tiberias pendar, acoi Jesús ava remihura pan reroyeroqui agüer rerovicave.

<sup>24</sup> Evocoiyase ava rehii oicuae Jesús semimbohe reseve iporēhise yuvireco, yuviroha yuviraso água co ambuae carite pipe tecua Capernaum ve seca.

### *Jesús, pan nungar, tecovesa apirēhi vahe secoi*

<sup>25</sup> Oyepotase ava rehii ipa rovai, aheve osepia Jesús yuvireco.

—Ore mbohesar, ¿marase vo ereyepota cohave? —ehi yuvireco chupe.

<sup>26</sup> Evocoiyase aipo ehi chupe:

—Supi eté aipo ahe pëu. Pe rumo che reca peye che pe mbocarusa rese tēi,, ndahei co che poromondiisa reroyasave ité peico pota che rupi.

<sup>27</sup> Peporaviqui eme catu tembihu ndasecosei vahe rese; iyacatu rumo peporaviqui tembihu secose vahe rese omondo vahe tecovesa apirēhi. Co tembihu che, Ava Riquehir, amondora pëu. Esepia, che Ru Tūpa omboyecua ité che ichuindar aicose —ehi.

<sup>28</sup> Aipo hese,

—¿Mbahe mboraviqui vo oroyapora Tūpa upe? —ehi yuvireco.

<sup>29</sup> —Tūpa oipota pe che reroyara peye che semimbou che recose —ehi ava eta upe.

<sup>30</sup> Evocoyase,

—¿Mbahe poromondiisa vo eremboyecua irimira oreu orosepia vaherã nde reroya tupri catu ãgua?

<sup>31</sup> Esepia, aracahe ore ramoi eta yuvirohu ivi iporupirēhisa rupi. Icuachiapri araca-hendar pipe omombehu: ‘Omondo pan ìva pendar semihura’ ehi —ehi ava eta yuvireco chupe.

<sup>32</sup> —Supi eté amombehu pëu: ndahei Moisés omondo pan ìva pendar chupe, che Ru rumo omondo chupe. Cūritei che Ru ombou pëu pan supi eté vahe ìva sui.

<sup>33</sup> Esepia, co pan ombou vahe Tūpa ìva suindar ité. Ahe omondora tecovesa ivi pipendar upe —ehi ava eta upe.

<sup>34</sup> Evocoyase,

—Ore mbohesar, embouño catu co pipe suive aipo pan oreu —ehi yuvireco chupe.

<sup>35</sup> —Che ité ahe pan aico tecovesa mondo ãgua. Acoi ou vahe cheu ndiyumbiasi iri chietera iyavei acoi che reroya vahe ndihusei chiaveira.

<sup>36</sup> Aipo ahe niha acoi pëu. Yepe pe che repia peye viña, pe rumo ndache reroyai eté peye.

<sup>37</sup> Opacatu ombou vahe ava che Ru cheu, cheu ité yugüerura; acoi yugüeru vahe cheu, aipisira; ndamombou chietera cheyesui.

<sup>38</sup> Esepia, ndayui ìva sui mbahe che remimbotar apo ãgua tēi; ayu rumo che mbousar porocuita apo ãgua.

<sup>39</sup> Che Ru che mbousar ndoipotai que ñepeï ava ombou vahe cheu amocañira. Ahe semimbotar rumo che ambogüerayevira ahe ari ipa vahe pipe.

<sup>40</sup> Che Ru oipota avei opacatu ava oyeroya vaherã che, Tūpa Rahir, che recosa rese. Ipipe vireco aveira tecovesa apirēhi vahe yuvireco. Supi eté ambogüerayevira ari ipa vahe pipe curi —ehi ava eta upe.

<sup>41</sup> Evocoyase judío eta oñehe-ñehe tēi sese yuvireco, “Che pan aico, agüeyi vahe ìva sui” ihesa rese

<sup>42</sup> aipo ehi:

—Co niha acoi Jesús, José rahir. Yande yaicua ité tu, ichi avei. ¿Mahera ru, “Che agüeyi vahe ìva sui” ehi no? —ehi yuvireco chupe.

<sup>43</sup> Evocoyase judío eta upe aipo ehi:

—Pepoiño che reroïrosa sui.

<sup>44</sup> Ndipoi chietera que oicatu vahe ou cheu, nomonguerēhise che Ru che mbousar; omonguerēhi vahe rumo oicatu yugüeru cheu. Ahe ambogüerayevira ari ipa vahe pipe.

<sup>45</sup> Tūpa ñehe mombehusar cuachiar pipe aipo ehi: ‘Tūpa pe mbohera opacatu’ ehi. Sese acoi osendu vahe che Ru ñehe, oyembohe vahe avei sese, evocoi nungar yugüerura cheu.

<sup>46</sup> “Ndipoi eté que ñepeï ava osepia vahe che Ru; acoi ichui ou vaheño ité, ahe güeraño tupri ité osepia.

<sup>47</sup> Supi eté aipo ahe pëu: acoi che reroya vahe vireco tecovesa apirēhi.

<sup>48</sup> Che pan nungar aico amondo vahe tecovesa.

<sup>49</sup> Aracahe pe ramoi eta niha yuvirohu ité tembihu maná serer vahe ivi iporupirēhisa rupi. Ahe rumo opa iriño ité omano yuvireco.

<sup>50</sup> Che rumo añehe pan ìva sui ogüeyi vahe rese, acoi ava ohu vahe, nomanoi chietera.

<sup>51</sup> Ahe pan oicove vahe niha che aico ìva sui ogüeyi vahe; acoi ohu vahe co pan, oicovera apirêhi vahe ité. Co pan amondo vahe ité, ahe che rete ité. Ahe amondora ava recocuer rese” ehi judío eta upe.

<sup>52</sup> Aipo hese, judío rerecuar oyeecopi-copi yuvireco aipo ehi:

—¿Mara ehira vo aipo co imbou tēi güete yande tohu viña? —ehi yuvireco.

<sup>53</sup> —Supi eté aipo ahe pēu: ndapehuisse Ava Riquehir rete, ndapehuisse avei suvi, ndaperecoi chietera tecovesa.

<sup>54</sup> Acoi ohu vahe che rete, oihu vahe avei che ruvi, vireco tecovesa apirêhi iyavei che ambogüerayevira ari ipa vahe pipe.

<sup>55</sup> Esepia, che rete supi eté vahe tembihu; che ruvi supi eté vahe avei igua.

<sup>56</sup> Acoi ohu vahe che rete, oihu vahe avei che ruvi, secoi che rese, che avei aico sese.

<sup>57</sup> Che Ru, che mbousar, vireco tecovesa. Ichui che aicove; ãgüe ehi aveira che husar che sui yuvirecovera.

<sup>58</sup> Añehe pan ìva sui ogüeyi vahe rese. Co pan ndahei maná pe ramoi eta yuvirohu vahe nungar. Esepia, yande ramoi opaño ité omano yuvireco. Acoi ohu vahe rumo co che rete, oicovera apirêhi vahe ité —ehi ava eta upe.

<sup>59</sup> Jesús oporombohe co mbahe rese judío ñemonuhasave tecua Capernaum ve.

### *Ñehesa tecove apirêhisa resendar*

<sup>60</sup> Osenduse co yembohesa, setá Jesús rupi oguata vahe aipo ehi oyeupe yuvireco:

—Aipo semimombehu yavai eté seroya ãgua; ¿ava vo viroya tēira viña? —ehi yuvireco.

<sup>61</sup> Jesús rumo oicua voi eté ñehe-ñehe tēise co mbahe rese yuvireco, evocoyase oporandu:

—¿Pemboasiño tie che ñehe?

<sup>62</sup> ¿Mara peyera pīha che repiase peye che, Ava Riquehir, ayeupise che reco agüerve vicho viña?

<sup>63</sup> Espiritu ité niha omondo tecovesa; yande retecuer rumo ãgüe ehi tēi vahe. Co amombehu vahe pēu ahe espíritu iyavei tecovesa.

<sup>64</sup> Oime vite rumo amove pe pãhuve ndache reroyai vahe —ehi ava rehī upe.

Esepia, Jesús oicua ité yipisuive uma ndoviroyai chira, oicua avei uma ava omondora yamotarêhimbar upe

<sup>65</sup> aipo ehi:

—Sese niha acoi aipo ahe pēu: “Ndipoi chietera que ava ou vahe ité che Ru nomonguerêhise imbou” ahe —ehi.

<sup>66</sup> Ichuive tupri Jesús rupi oguata vahe setá oseya yuvireco; ndoguata iri eté yuvireco supi.

<sup>67</sup> Evocoyase oporandu doce tupri vahe güemimbohe upe:

—¿Pe avei vo che reyapa pota peye? —ehi.

<sup>68</sup> Simón Pedro rumo omboyevi chupe:

—Che Yar, ¿ava upe vo oroso irira? Nde güeraño ité niha erereco ñehesa tecovesa apirêhi vahe.

<sup>69</sup> Ore nde reroyasar ité oroico iyavei oroicua nde ndaseco marai vahe, Tūpa supi eté vahe remimbou ereico —ehi Pedro chupe.

<sup>70</sup> —Che niha opoporavo doce peico vahe, ñepeī rumo pe pãhu pendar caruguar ité —ehi Simón upe.

<sup>71</sup> Jesús oñehe Simón Iscariote rahir, Judas, rese. Yepe doce semimbohe pãhu pendar viña, ahe rumo omondora ava yamotarêhimbar upe.

## 7

*Jesús ndoviroyai tivri yuvireco*

<sup>1</sup> Ipare Jesús oguata ivi Galilea rupi. Ndoico potai eté ivi Judea rese. Esepia, aheve ava judío eta oseca ité ‘yayuca’ oya yuvireco.

<sup>2-3</sup> Virovise judío pieta guasu teyupa apo água yuvireco, ahese tivri aipo ehi yuvireco chupe:

—Erepita eme cohave. Eso ivi Judea ve; ahe pendar nde rupi oguata vahe avei tosepia poromondiisa nde rembiapo yuvireco.

<sup>4</sup> Esepia, acoi oyapo pota vahe mbahe, noñomi eté mbahe güembiapo. Nde ereyapo ité mbahe poromondiisa. Sese iya eremboyecua opacatu ava upe —ehi tivri yuvireco chupe.

<sup>5</sup> Seroyaëhisave tēi avei tivri aipo ehi yuvireco chupe.

<sup>6</sup> Evocoyase vivri upe aipo ehi:

—Ndehi vitei rumo ari che so água. Pe guata água rumo opacatu ariño tēi aviye.

<sup>7</sup> Esepia, pe ndape amotarēhi eté ava co ivi pipendar; che rumo che amotarēhi ité yuvireco. Esepia, che amboyecua ité mbahe sembiapo naporai vahe chupe.

<sup>8</sup> Pesoño pe pieta repia; che rumo ndaso vitei chira. Esepia, ndosupiti vitei ari cheundar —ehi vivri upe.

<sup>9</sup> Evocoyase Jesús opitaño Galilea ve.

### *Jesús oso omu judío eta pietasave*

<sup>10</sup> Vivireta so pare, Jesús avei oso pietasave. Ndoymboyecuai eté rumo ava upe.

<sup>11</sup> Judío eta oseca tēi yuvireco pietasave aipo ehi:

—¿Que pñha acoi mbia? —ehi tēi yuvireco.

<sup>12</sup> Ava rehii pñhuve setá iteanga oñhe yuvireco sese. Amove aipo ehi yuvireco: “Ahe mbia aviye vahe”; ambuae rumo aipo ehi: “Ndahei aviye vahe; ahe rumo ombopa tēi vahe ava” ehi yuvireco.

<sup>13</sup> Nomboyecuai eté rumo oñhe yuvireco sese güereciar sui osiquiyepave.

<sup>14</sup> Pieta mbiterse, Jesús aviyeteramo tēi oi que ava pñhuve tūparo pipe ava mbohe.

<sup>15</sup> Judío eta rereciar evocoyase,

—¡Too, mara ehi rutei! —ehi tēi—. ¿Mara ehi vo co mbahecuá iteanga? ¡Ndoymbohei vahe niha yande yeroquisave! —ehi tēi yuvireco.

<sup>16</sup> Judío rereciar upe rumo aipo ehi:

—Che porombohesa ndahei cheyesuindar tēi, ahe rumo che mbousar suindar —ehi—.

<sup>17</sup> Que ñepi pe pñhu pendar oyapo potase Tūpa remimbotar, oicua che porombohesa ndahei vahe che suindar, ahe Tūpa suindar ité.

<sup>18</sup> Esepia, acoi ava oñhe vahe oyesui tēi, ahe ‘tache mboetei ava yuvireco’ ohesave tēi ãgüe ehi. Co ava rumo “tomboetei che mbousar” ehi vahe, ahe supi eté vahe; ndipoi eté porombopasa iporombohesa pipe.

<sup>19</sup> “Moisés niha omondo tēi mborocuita pñu. Que ñepi pe pñhu pendar rumo ndipoi eté omboyero vahe. ¿Mahera ru che yuca pota peye?” ehi.

<sup>20</sup> —¡Nde erereco carugar ndeyese! ¿Ava vo nde yuca pota? —ehiño ava eta yuvireco chupe.

<sup>21</sup> Aipo ehi ava upe:

—Cuese acoi ayapose mbahe mbítuhusa ari pipe, ahese, “¡Too, mahera ãgüe ehi!” peyeño acoi cheu.

<sup>22</sup> Pe avei rumo amove peporaviqui mbítuhusa ari pipe peporombocircuncidase porocuita Moisés omondo vahe rero yasave. (Ahe circuncisión rumo ndahei Moisés suindar, ahe rumo yipive vahe pe ramo suindar ité.)

<sup>23</sup> Oyepotase rumo chñhivahe mbocircuncida água mbítuhusa ari pipe tupri pñu, peyapoño rane ité mborocuita mboaviye água. ¿Mahera ru cheuño pemboasi ñepi mbia mbítuhusa ari pipe ambogüera tupri vahe rese?

24 “Oyavi evocoi” peye voi rene catu ava upe; peicua tupri rane ‘¿supi eté p̄iha?’ pe yapave —ehi Jesús ava eta upe.

*Jesús oñehe güecocuer Tūpa suindar rese*

25 Evocoiyase amove Jerusalén pendar mb̄ia aipo ehi oyeupe yuvireco:

—¿Ndahei vo acoi co oseca t̄ei yuca ãgua yuvireco? —ehi—.

26 Ahe ité co niha co ava p̄ahuve oñehe oico, ndipoi eté que mara ehi vahe yuvireco chupe. ¿Omoha p̄iha mborerecuar co mb̄ia Porop̄is̄irosar seco ãgua yuvireco?

27 Yande rumo yaicua que sui turi. Acoi ouse rumo Porop̄is̄irosar ité coiye, ndipoi chietera que ava oicua vahe iyusa —ehi yuvireco.

28 Evocoiyase aipo renduse oporombohe v̄iteseve t̄ūparove, oñehe p̄irata aipo ehi:

—¡Pe niha aipo, “Oroicua vahe” peye; “Oroicua avei iyusa” peye cheu! Ndayui rumo che remimbotar sui t̄ei. Oime rumo che mbousar, ahe seroyapri ité. Ahe pe ndapeicuai vahe.

29 Che rumo aicua ité. Esepia, che ichui ayu iyavei ahe ité che mbou p̄eu —ehi.

30 Aipo ihese, oip̄isi pota yuvireco soquenda ãgua viña. Aní eté rumo. Esepia, ndoyepota v̄itei ihari chupe.

31 Setá iteanga rumo ava v̄iroya iyavei aipo ehi yuvireco:

—Ouse Porop̄is̄irosar, ¿oyapo catura p̄iha mbahe poromondiisa co mb̄ia sui? —ehi yuvireco.

*Fariseo oyocuai sundao t̄ūparo r̄ārosareta Jesús p̄isi ãgua*

32 Fariseo eta osendu ava ñehesa Jesús resendar yuvireco. Ahe ité iyavei pahi eta rerecuar omondo sundao t̄ūparo r̄ārosar Jesús p̄isi ãgua yuvireco.

33 Jesús rumo aipo ehi:

—Aicove v̄itemira pe rese ch̄ihi rupive. Ipare voi ayev̄ira che mbousar p̄iri vicho —ehi—.

34 Che reca t̄eira peye, ndapeicatui chietera rumo che reca. Esepia, ndapeicatui chaveira peso vahe r̄ã che recosave —ehi ava eta upe.

35 Evocoiyase judío oporandu-randu oyeupe yuvireco:

—¿Que p̄iha aipo osora yande sui seca iriēhi ãgua? ¿Osora tie que amombri yande mu oñemosai vahe p̄ahu rupi ambuae ava ndahei vahe yande mu mbohe ãgua?

36 ¿Mara oya p̄iha evocoiyase aipo, ‘Che reca t̄eira peye, ndapeicatui chietera rumo che reca. Esepia, ndapeicatui chaveira peso vahe r̄ã che recosave’ ehi yandeu? —ehi-ehi t̄ei oyeupe yuvireco.

*Esp̄ritu iai ndopai vahe nungar*

37 Pieta ipa, ahe imboeteisa catu vahe, ahe ari pipe Jesús oñehe p̄irata ohã aipo ehi:

—Acoi que ava ihusei vahe, toyugüeru cheu. Che evocoiyase tamboihu —ehi—.

38 Esepia, inungar aipo ehi vahe icuachiapri pipe, che reroyasar p̄iha sui os̄era iai ndopai vahe nungar —ehi.

39 ‘Che reroyasar oip̄is̄ira Esp̄ritu curi’ ohesave aipo ehi. Esp̄ritu rumo ndou v̄itei ahese. Esepia, Jesús ahese ndoyev̄i v̄itei avei güecosa porañetesave.

*Ava reh̄i oyemboyaho Jesús recocuer sui yuvireco*

40 Osenduse ava reh̄i aipo nungar, amove aipo ehi:

—Supi eté co mb̄ia Tūpa ñehe mombehusar imombehupri ou vahe —ehi yuvireco chupe.

41 Ambuae aipo ehi:

—Co Porop̄is̄irosar ité —ehi yuvireco.

Ambuae rumo aipo ehi yuvireco:

—¿Mahera aipo Galilea sui t̄ei oura Porop̄is̄irosar viña? —ehi—.

<sup>42</sup> Icuachiapri pipe rumo aipo ehi Poropĩsĩrosar oyesura mborerecuar guasu David sui iyavei ahera Belén pendar, David recua pendar itera —ehi.

<sup>43</sup> Evocoyase ava oyemboyaho-yaho yuvireco Jesús recocuer sui tēi.

<sup>44</sup> Amove ava viraso pota tēi yuvireco soquenda; ndipoi eté rumo ěgüe ehi vahe yuvireco chupe.

### *Judío rerecuar ndoviroyai Jesús yuvireco*

<sup>45</sup> Sundao tũparo rãrosar oyevĩ yuvireco Jesús recosa sui. Fariseo eta iyavei pahi eta rerecuar evocoyase oporandu yuvireco chupe aipo ehi:

—¿Mahera vo ndaperui! —ehi yuvireco chupe.

<sup>46</sup> Sundao tũparo rãrosar evocoyase aipo ehi:

—¿Ndipoi eté que ava oñehe vahe ahe mbia nungar! —ehiño yuvireco.

<sup>47</sup> Fariseo eta iyavei mborerecuareta evocoyase aipo ehi yuvireco:

—¿Pe avei eté rumo peyembopa uca chupe? —ehi—.

<sup>48</sup> Ndipoi eté niha ore mboetasa mborerecuar iyavei fariseo viroya vahe yuvireco.

<sup>49</sup> Co ava rehĩ tēi ěgüe ehi yuvireco. Ahe rumo ndoicuai vahe Tũpa porocuita yuvireco, sese iñemoirosavrive ité yuvirecoi —ehi sundao tũparo rãrosar upe yuvireco.

<sup>50</sup> Evocoyase Nicodemo, acoi oso vahe pĩtu pipe Jesús pĩri, ahe avei eté fariseo pãhuve secoi, ahe aipo ehi:

<sup>51</sup> —Yandeundar porocuita mboaviye ěgua ndiyai, “Ereyavĩ mbahe” yahe voiño tēi que ava mbahe sembiapocuaēhi vitesese —ehi.

<sup>52</sup> Evocoyase omboyevĩ yuvireco:

—¿Nde avei tie ereico Galilea pendar? Eyembohe tupri icuachiapri pipe. Ipĩpe eresepiara ndipoi eté que ñepeĩ ou vahe Galilea sui Tũpa ñehe mombehusar —ehi mborerecuareta Nicodemo upe yuvireco.

### *Cuñã oyemboaguasa tēi vahe resendar*

<sup>53</sup> Ipare opa yuviraso ñepeĩ-peĩ güēta rupi.

## 8

<sup>1</sup> Jesús rumo oso ivĩtri Olivo ve.

<sup>2</sup> Ahere ayihive cõhese, oyevĩ tũparove. Ahese opacatu ava oyemboya yuvireco sese. Ahe evocoyase oguapĩ oĩ oporombohe.

<sup>3</sup> Evocoyase Moisés porocuita rese oporombohe vahe, fariseo eta avei güeru Jesús upe cuñã oyemboaguasa tēi vahe yuvireco ava rehĩ rovai,

<sup>4</sup> aipo ehi yuvireco chupe:

—Poroombohesar, co cuñã iyemboaguasase cuimbahe rese osesapiha ñepeĩ ava.

<sup>5</sup> Moisés porocuita rumo ore cuai co nungar cuñã yuca ěgua ita pipe. ¿Mara ere vo catu nde co nungar upe? —ehi fariseo eta yuvireco chupe.

<sup>6</sup> Ahe rumo secoãhasave tēi aipo ehi yuvireco ‘toyavĩ angahu oñehe yandeu’ oya tēi. Ahe rumo oyaivĩ, ombahecuachía ocuã pipe ivĩ rese.

<sup>7</sup> Evocoyase oporandu vitesese ava yuvireco, opũha aipo ehi:

—Que ñepeĩ pe pãhu pendar ndoyemboangaipai vahe, ahe rane toyapi ita pipe —ehi.

<sup>8</sup> Oyaivĩ iri, ombahecuachía ivĩ rese.

<sup>9</sup> Osenduse rumo judío rerecuareta, omboĩpi ñepeĩ-peĩ yuvĩnose yuvireco, cuacua catu vahe sui rane yuvĩnose. Opacatu yuvĩnosepase, Jesús güerañomi cuñã rese opita yuvireco.

<sup>10</sup> Evocoyase opũhase, ahese aipo ehi chupe:

—Cuñã, ¿que que ru ava? ¿Ndipoi eté que ñepeĩ opita vahe nde mocañi ěgua? —ehi

<sup>11</sup> —Aní eté, che Yar, ndipoi eté —ehi.

Evocoyase aipo ehi chupe:



—Che avei ndoromocañi tēi potai. Sese cūritei eso, ereyapo iri eme angaipa —ehi cuña upe.

*Jesús tesapesa ava upe secoi*

<sup>12</sup> Jesús oñehe iri ava eta upe aipo ehi:

—Che aico tesapesa ava eta upe. Acoi che rupi secoi vahe virecora tesapesa omondo vahe tecovesa apirēhi vahe iyavei ndaseco iri chietera pītumimbisa nungar mbahe-mbahe tēi vahe pipe —ehi.

<sup>13</sup> Evocoyase fariseo eta aipo ehi yuvireco:

—Nde ereñehe ndeyese ae tēi. Sese nde ñehesa ndaseroyaprii eté —ehi yuvireco chupe.

<sup>14</sup> —Che ñehe rumo supi vahe ité. Yepe cheyese ae añehe viña, che rumo aicua que sui ayu, que asora no. Pe rumo ndapeicuai eté.

<sup>15</sup> Pe peseca ava rembiapo cua tupri ãgua ava tēi pihañemoñeta rupi. Che rumo ndayui evocoi nungar mbahe apo.

<sup>16</sup> Asecase ava rembiapo cua tupri ãgua, ahe supi tupri vahe ité. Esepia, ndahei che ae tēi ãgüe ahe, che Ru, che mbousar rumo secoi che rese.

<sup>17</sup> Porocuita pēu icuachiapri pipe aipo ehi: “Que oimese ñuvirío ava oyoya tupri omombehu vahe mbahe, ahese voi seroyasara” ehi.

<sup>18</sup> Supi eté che ae ité niha añehe cheyese viña, che Ru, che mbousar, reseve rumo oyoya tupri oroñehe —ehi.

<sup>19</sup> Aipo ihese, oporandu yuvireco chupe:

—¿Que vo aipo nde Ru? —ehi yuvireco.

—Pe ndache cuai eté peye, che Ru avei ndapeicuai. Che cuase rumo peye viña, che Ru avei peicuara viña —ehi fariseo eta upe.

<sup>20</sup> Jesús aipo ehi tūparo pipe, guarepochi monuhapri riru ipive oporombohe ohã. Ndipoi eté rumo ahese osoquenda vaherã. Esepia, ndoyepota vitei eté ahese ihari chupe.

*Jesús, “Che sosave pe ndapeicatui chira peso” ehi*

<sup>21</sup> Jesús aipo ehi iri:

—Che asose, che reca tēira peye. Pe rumo opara pemento pe angaipa reseve. Che sosave ndapeicatui chietera peso vaherã —ehi.

<sup>22</sup> Aipo ihese, judío eta aipo ehi yuvireco:

—¿Oyeyucara pīha ahe ae; ayeve pīha aipo ehi yandeu? —ehiño yuvireco chupe.

<sup>23</sup> —Pe rumo ivi pendar peico; che rumo ivatendar ité aico. Iyavei pe co ivi pipendar tēi avei peico; che rumo ndahei eté co ivi pipendar aico.

<sup>24</sup> Sese niha acoi aipo ahe pēu: “Pemanopaño itera pe angaipa reseve” ahe. Esepia, ndache reroyaise peye, pe angaipa reseve ité pemañoñora —ehi fariseo eta upe.

<sup>25</sup> Aipo ihese,

—¿Ava ité vo nde ereico? —ehiño yuvireco chupe.

—Yipisuive niha acoi amombehu vichico pēu.

<sup>26</sup> Setá iteanga areco che ñehe ãgua pēu mbahe pe rembiavi rese. Che mbousar niha supi eté vahe. Ahe iñehe asendu vahe, amombehu opacatu ava upe —ehi fariseo eta upe.

<sup>27</sup> Ahe rumo ndosenducuai eté Vu rese iñehese yuvireco.

<sup>28</sup> Sese aipo ehi fariseo upe:

—Pesupise rumo Ava Riquehir ivira rese, ahese voi peicuara che recocuer, ahese avei peicuara cheyesui tēi mbahe ndayapoise; che rumo amombehu che Ru che mbohesa güeraño.

<sup>29</sup> Che mbousar niha che rupive ité secoi; ndache reyai eté. Esepia, ayapoño ité mbahe semimbotar yepi —ehi ava eta upe.

<sup>30</sup> Aipo ihese, setá iteanga ava viroya yuvireco.

*Ava Tūpa rahir ité yuvirecoi vahe iyavei ava angaipa pipe tēi yuvirecoi vahe*

<sup>31</sup> Evocoyase Jesús aipo ehi judío eta vıroyasar upe:

—Peico tuprıse che ñehe rupi, peicora che remimbohe supi eté vahe.

<sup>32</sup> Peicua aveira mbahe supi eté vahe. Ahe evocoyase pe renosera mbiguai nungar pe recosa sui —ehi.

<sup>33</sup> Judío evocoyase aipo ehi:

—Ore rumo Abraham suindar ité oroico, ndoroicoi vahe ité que ava rembiguai tēi. ¿Mahera ru aipo nde, “Pesēra mbiguai nungar pe recosa sui” ere oreu? —ehiño judío eta yuvıreco chupe.

<sup>34</sup> Evocoyase aipo ehi:

—Supi eté aipo ahe pēu: acoi opacatu ava oyemboangaipa vahe, inungar mbiguai tēi, ēgüe ehi oangaipa rereco yuvıreco.

<sup>35</sup> Mbiguai tēi ndahei güerecuar rēta pıpe nara ité; tahır rumo opıtaño itera güēta pıpe nara.

<sup>36</sup> Sese Tahır pe renosese mbiguai tēi pe recosa sui, supi eté ndapeico iri mbiguai nungar.

<sup>37</sup> Aicua niha Abraham suindar pe recosa. Pe rumo che yuca potaño peye. Esepia, ndaperoyai eté che ñehe.

<sup>38</sup> Che niha amombehu che Ru mbahe omboyecua vahe cheu, pe avei peyapo mbahe pe yesupa remimombehu —ehi judío eta upe.

<sup>39</sup> —¡Ore yesupa rumo Abraham! —ehi judío eta yuvıreco chupe.

—Abraham suindar ité peicose, peyapora mbahe sembiapo nungar viña.

<sup>40</sup> Che rumo, “Tūpa che mbohe mbahe supi eté vahe rese” ahe tēi pēu. Pe evocoyase che yuca potaño ité peye. ¡Abraham rumo ndoyapoi eté co nungar mbahe!

<sup>41</sup> Esepia, pe peyapo mbahe peyesupa rembiapo tēi eté —ehi.

Evocoyase ava aipo ehi yuvıreco:

—¡Ndahei rumo ore oyesu tēi vahe oroico; ore rumo orovıreco ñepeño ité ore yesupa, ahe Tūpa! —ehiño yuvıreco.

<sup>42</sup> Evocoyase aipo ehi co judío eta upe:

—Tūpa ité pe yesupase rumo, che raisura peye viña. Esepia, che ayu Tūpa sui. Sese cūrıteı cohava aico. Ndahei cheyesui tēi ayu, Tūpa rumo che mbou.

<sup>43</sup> ¿Mahera pıha ndapesenducua catui eté mbahe che remimombehu? Esepia, ndapeyapısaca potai eté che ñehe rese.

<sup>44</sup> Peyesupa niha Caruguar ité, sese niha pe ahe tuprı avei peico. Peyapo pota mbahe semimbotar tēi. Esepia, Caruguar yıpısuive ité oporoyuca serai vahe. Ndoypoi vahe ité mbahe supi tuprı vahe, noñehei avei mbahe supi eté vahe rese. Semirasa iñehe ité. Esepia, semirañete ai vahe ité; ahe ité niha yıpındar semira tēi vahe.

<sup>45</sup> Che rumo añehese mbahe supi tuprı vahe rese, ndache reroyai eté peye.

<sup>46</sup> ¿Ava pıha pe pāhu pendar oicua mbahe che rembiavi? ¡Anı eté! Che añehe mbahe supi eté vahe rese pēu, ¿mahera ru evocoyase ndache reroyai eté peye?

<sup>47</sup> Acoi ava Tūpa suindar, ahe osendu pota rai iñehe; pe rumo ndahei eté Tūpa suindar peico. Sese ndapesendu potai eté iñehe —ehi Jesús judío eta upe.

### *Poropırosar yıpıve catu vahe Abraham sui*

<sup>48</sup> Evocoyase judío eta aipo ehi Jesús upe yuvıreco:

—Supi eté, ore oroicua nde Samaria iguar tēi ereico, caruguar ité erereco ndeyese —ehi yuvıreco chupe.

<sup>49</sup> —Che ndarecoi eté caruguar cheyese. Che rumo che Ru amboetei; pe rumo ndache mboetei eté peye.

<sup>50</sup> Iyavei che ndasecai ava che mboetei āgua. Oime rumo ñepeı oipota vahe. Ahe niha omondora ava rembiapo reprı chupe.

<sup>51</sup> Supi eté aipo ahe pëu: acoi omboyeroya vahe che ñehe, nomanoi chietera yuvireco —ehi judío eta upe.

<sup>52</sup> Evocoyase judío omboyeve yuvireco chupe aipo ehi:

—Cūrítei oroicua ité cute nde ererocese caruguar ndeyese. Esepia, Abraham iyavei opacatu Tūpa ñehe mombehusar omanopa ité yuvireco. ¿Mahera ru aipo nde, ‘Acoi che ñehe reroyasar nomanoi chietera’ ere?

<sup>53</sup> ¿Nde tie ivate catu ereico ore ramoi Abraham sui? Esepia, ahe omano ité iyavei ambuae Tūpa ñehe mombehusar omanopa ité yuvireco. ¡Mbahe angahu vo co evocoyase eremoha ndeyese! —ehi yuvireco chupe.

<sup>54</sup> —Che ae tēi ayemboeteise mbahe che rembiapo pipe, ahese ndahei chira supi vahe viña. Che Ru rumo che mboetei, chupe ité: “Ore Tūpa” peye.

<sup>55</sup> Pe rumo ndapeicuai eté. Che rumo aicua. “Ndaicuai” ahese, evocoyase semirañete ai vahe aicora viña inungar pe peico. Che rumo supi eté aicua. Sese niha amboyeroya iñehe.

<sup>56</sup> Esepia, pe ramoi Abraham oyemboviha ‘asepiara ihari oyepotase’ oya cheu. Osepia ité niha. Sese oviharete ité —ehi judío eta upe.

<sup>57</sup> Evocoyase judío eta:

—¿Mara erera vo aipo Abraham repia ndererecomi viteise cincuenta araviter? —ehiño yuvireco chupe.

<sup>58</sup> —Supi eté aipo ahe pëu: che aicove vahe Abraham yesuēhi vitesese —ehi.

<sup>59</sup> Aipo ihese, oipisipa ita yuvireco yapi āgua. Ahe rumo ahe ramoseve oñemi ava eta pāhuve, osēño ité oso tūparo sui.

## 9

### *Jesús ombogüera mbia ohasa suive ndasesapisoi vahe*

<sup>1</sup> Jesús oguatase ocar rupi, osepia mbia ohasa suive ndasesapisoi vahe.

<sup>2</sup> Ore semimbohe oroico vahe, oroporandu chupe:

—Ore mbohesar, ¿mahera pñha co mbia ndasesapisoi eté oha? ¿Oyesupa angaipa sui pñha? ¿Oangaipa sui ae tie? —orohe chupe.

<sup>3</sup> —Ndahei eté oangaipa sui, ndahei avei oyesupa angaipa sui; co rumo ēgüe ehi Tūpa mbahe sese mboyecua āgua.

<sup>4</sup> Sese oime vitesese ari yandeu che mbousar poraviquisa apo āgua, iya ité ahe yayapo. Esepia, pñtura, ahese ndayaicatui chietera mbahe apo.

<sup>5</sup> Co ivi pipe che recove vitesese rumo, che aico ava upe tesapesa nungar —ehi oreu.

<sup>6</sup> Aipo ohe pare, ondivi ivive, güendi pipe omoaqui vahe ivi omondo ndasesapisoi vahe resa rese.

<sup>7</sup> Ipare aipo ehi chupe:

—Eso, tereyovai igua Siloé serer vahe pipe —ehi (ahe serer ‘imondopri’ oya aipo ehi). Ndasesapisoi vahe evocoyase oso, oyovai. Oyevise ichui, omahe tupri ité.

<sup>8</sup> Evocoyase sēta ivirindar iyavei ava oicua vahe sesapisoēhise oporanduse guarepochi rese aipo ehi yuvireco:

—¿Ndahei vo acoi co oguapi oñ guarepochi rese oporandu yepi? —ehi yuvireco.

<sup>9</sup> Amove ambuae ava aipo ehi:

—Taa, ahe ité —ehi.

Ambuae rumo aipo ehi yuvireco:

—Ndahei ahe. Aviye tupri ité rumo ahe —ehi.

Ahe mbia rumo aipo ehi:

—Taa, che ité niha ahe aico —ehi.

<sup>10</sup> Evocoyase oporandu yuvireco chupe:

—¿Mara ere vo co esareco? —ehi.

11 —Acoi mbia, Jesús serer vahe, ahe omoaquimi güendi pipe ivi, oipichi che resa rese aipo ehi cheu: ‘Eso igua Siloé ve, eyovai’ ehi. Evocoyase aso, ayovaise, ahese amahe tupri ité —ehi.

12 —¿Que vo ahe mbia? —ehi yuvireco chupe.

—Ndaicuai, ¿que vo catu? —ehiño ava güeta cotindar uve.

*Fariseo oporandu ndasesapisoi vahe cuera agüer rese yuvireco*

13-14 Mbituhusa ari pipe aipo Jesús omoaquimi güendi pipe ivi ndasesapisoi vahe mbogüera água. Sese viraso ndasesapisoi vahecuer fariseo eta rovai yuvireco.

15 Fariseo oporandu iri yuvireco co mbia upe: “¿Mara ere ité vo co esareco?” ehi. Ahe mbia aipo ehi:

—Omondo ivi güendi pipe omoaqui vahe che resa rese. Ichui ayovai. Ipare voi asareco —ehi.

16 Evocoyase ambuae aipo ehi yuvireco chupe:

—Aipo mbia ndahei eté revo Tüpa suindar. Esepia niha, nomboetei eté mbituhusa ari —ehi yuvireco.

Ambuae evocoyase aipo ehi yuvireco:

—¿Mara ehira aipo poromondisa apo ava yangaipa vahe viña? —ehiño yuvireco.

Oyeavirati tēi ipihañemoñetasa.

17 Sese oporandu iri ndasesapisoi vahecuer upe yuvireco aipo ehi:

—Nde no, ¿mara ehi nde pihañemoñeta co mbia rese? —ehi.

Ahe evocoyase aipo ehi:

—Che amoha ité Tüpa ñehe mombehusar secose —ehi.

18 Ahe fariseo rumo ndovroyai eté icuerasa yuvireco, oichoho uca rane ité iyesupa yuvireco.

19 Chupe oporandu aipo ehi:

—¿Pe rahir ité vo co? ¿Ndasesapisoi oha? ¿Mara ehi vo co cūritei osareco no? —ehi iyesupa upe yuvireco.

20 —Ore rahir ité niha co, ndasesapisoi oha.

21 ¿Mara ehi vo catu co cūritei osareco? iyavei ¿ava vo catu ombogüera? ¡Ndorocuai eté! Peporandu chupe. Ocuacua niha; ahe ae oicua uca pēu —ehiño iyesupa yuvireco fariseo upe.

22 Iyesupa rumo osiquiyepave tēi aipo ehiño yuvireco. Esepia, fariseo opa ité oye-moingatú yuvireco ava “Jesús Poropisrosar secoi” ehi vahe oñemonuhasa sui ñepeí reseve imombo água.

23 Sese niha iyesupa aipo ehiño yuvireco: “Peporandu chupe. Ocuacua niha” ehiño.

24 Evocoyase fariseo güeru uca iri acoi mbia imbogüerapri yuvireco, aipo ehi yuvireco chupe:

—Emombehuño oreu Tüpa rovaque mbahe supi tupri vahe. Esepia, ore oroicua ité evocoi mbia angaipa viyar seco rese —ehi.

25 Ahe evocoyase omboyeví chupe:

—Che ndaicuai eté angaipa viyar tie revo. Co güeraño catu che aicua: che ndachere-sapisoi vahecuer aico; cūritei rumo asareco —ehi.

26 Evocoyase oporandu iri yuvireco chupe:

—¿Mbahe vo oyapo ndeu? ¿Mara ehi vo nde mbosareco? —ehi yuvireco chupe.

27 —Amombehu niha acoi pēu. Pe rumo ndache reroyai eté peye. ¿Mahera vo peipota amombehu vite vaheñã pēu? ¿Pe avei tie peguata pota supi? —ehi fariseo eta upe.

28 Ahese oñehe rai tēi yuvireco chupe:

—Nde ahe mbia rupindar tēi ereico. Ore rumo yande ramoí aracahendar Moisés rupi oroguata vahe.

<sup>29</sup> Esepia, oroicua ité Tūpa oñehese Moisés upe. Aipo mbia rumo ndoroicuai eté que sui osẽ —ehi yuvireco chupe.

<sup>30</sup> —¡Mara peye rutei pe ndapeicuai que suindar ahe! Che rumo che mbosareco.

<sup>31</sup> Supi eté, yaicua Tūpa ndosendui eté ava angaipa viyar ñehe; ava omboeteisar iyavei viroyasar ñehe güeraño ité niha osendu.

<sup>32</sup> Esepia, ndipoi eté que avaño tẽi ava oyesu sui ndasesapisoi vahe ombogüera vahe.

<sup>33</sup> Ahe rumo ndaheise Tūpa suindar ou vahe viña, ndoicatui chietera revo mbahe apo viña —ehi fariseo eta upe.

<sup>34</sup> Evocoyase fariseo eta aipo ehi yuvireco chupe:

—¿Nde co oangaipa reseve oha vahe tẽi, ore mbohe pota mbahe rese eve? —ehi.

Ipape omose ñepei reseve oñemonuhasa sui yuvireco.

### *Jesús reroyasarẽhi ndasesapisoi vahe nungar tẽi*

<sup>35</sup> Jesús oicua ndasesapisoi vahecuer mombosa. Vupitise aipo ehi chupe:

—¿Ereyeroya nde Ava Riquehir rese? —ehi.

<sup>36</sup> Mbia evocoyase aipo ehi chupe:

—Che mbohesar, emombehumi cheu; tayeroya catu ru sese —ehi.

<sup>37</sup> —Eremahe niha co sese; che ité ahe aico —ehi ndasesapisoi vahecuer upe.

<sup>38</sup> Evocoyase mbia oñenopiha sovai:

—Oroviroya, che Yar —ehi chupe.

<sup>39</sup> Ichui aipo ehi:

—Che ayu co ivi pipe mbahe supi tupri vahe apo água; ava ndasesapisoi vahe nungar upe mbahe supi eté vahe che Ru suindar mboyecua água iyavei ava oicua tẽi vahe mbahe Tūpa suindar mboesapisoẽhi iri água —ehi.

<sup>40</sup> Evocoyase ambuae fariseo eta yuvirecoi vahe cõimi ichui osenduse aipo ñehesa, oporandu yuvireco chupe:

—¿Ore avei tie ndasesapisoi vahe nungar oroico? —ehi.

<sup>41</sup> Evocoyase omboyevi ahe fariseo upe:

—Peicose ndasesapisoi vahe nungar viña, “Peyavi mbahe” ndehi chietera Tūpa pe angaipa rese pẽu viña. Pe rumo, “Ore oroicua tupri Tūpa suindar mbahe” peye tẽi. Sese Tūpa, “Peyavi mbahe” ehi eté pẽu —ehi Jesús fariseo eta upe.

## 10

### *Jesús ovesa rãrosar nungar*

<sup>1</sup> “Supi eté aipo ahe pẽu: acoi ava co coti rupi tẽi yuviroique vahe ovesa rẽta pipe, ahe imonda rai vahe tẽi yuvirecoi.

<sup>2</sup> Oique vahe rumo oquendipi rupi eté, ahe sãrosar ité secoi.

<sup>3</sup> Oquendipi rãrosar omboi chupe. Evocoyase ovesa rãrosar oñehe serer rupi güeimba ovesa upe senose água sẽta sui. Ahe evocoyase oicua iñehe yuvireco.

<sup>4</sup> Güeimba ovesa renose pare oguata senonde; seimba ovesa evocoyase oguata saquicuerive. Esepia, oicua ité iñehe yuvireco.

<sup>5</sup> Ndoguatai eté rumo oyarẽhi rupi yuvireco; yuvinoña-noñaño ichui. Esepia, ndoicuai eté iñehe” ehi

<sup>6</sup> omboyoya güecocuer ovesa rãrosar rese. Ava rumo ndosenducuai eté yuvireco.

### *Jesús ava rãrosar aviye vahe*

<sup>7</sup> Evocoyase Jesús aipo ehi iri: “Supi eté, aipo ahe pẽu: che año ité oquendipi nungar aico ovesa upe.

<sup>8</sup> Opacatu ava yugüeru vahe che renonde, imonda rai vahe nungar tẽi yuvirecoi. Ava cheundar rumo ndoviroyai eté yuvireco.

<sup>9</sup> Che rumo oquenda nungar aico. Acoi oi que vahe che rupi, ahera ipĩsĩropĩrã yuvirecoi. Iyavei inungar acoi ovesa oi que vahe güeta pipe, ichui osẽ capihi reca ãgua igua yepi, ãgüe ehira che reroyasar yuvireco.

<sup>10</sup> “Imonda rai vahe rumo omonda ãgua tẽi ou, oporoyuca ãgua, mbahe mocañi ãgua tẽi avei. Che rumo ayu ‘tovireco ava tecovesa ndopai vahe rã ité yuvireco’ viya.

<sup>11</sup> Che ité ava rãrosar aviye vahe aico. Sese ayemoingatu tupri che recocuer mondo ãgua ava cheundar repirã;

<sup>12</sup> acoi guarepochi repirã tẽi oporaviqui vahe rumo, osepiase mahembiar oñaro ai vahe, oseyapaño güemiaro, oña oso. Esepia niha, ovesa ndahei eté seimba, ndahei avei eté ahe sãrosar ité secoi. Evocoyase mahembiar oñaro ai vahe omondi-mondi eté ipisi ãgua.

<sup>13</sup> Evocoi mbia oñaño. Esepia, guarepochi repirã tẽi oporaviqui. Sese niha ndosaisui eté güemiaro ovesa.

<sup>14-15</sup> “Che rumo ava rãrosar aviye vahe ité aico; che Ru che cua ité. Che evocoyase aicua avei che Ru. Sese che avei aicua che reimba ovesa eta. Ahe avei che cua yuvireco. Che niha amondo che recocuer sepirã yuvireco.

<sup>16</sup> Areco avei ambuae ité che reimba ovesa. Ahe avei aru pota che mboyeroya vahe rã yuvireco. Ahese ñepei reseve guasu che remiaro yuvirecoira.

<sup>17</sup> “Che Ru niha che raisu ité. Esepia, amondo itera che recocuer manosave. Ipare rumo acuerayevira.

<sup>18</sup> Ndoicatui chira ava ahe ae tẽi che yuca ãgua; che teieté rumo amondora che recocuer che remimbotar rupi eté. Che areco ité pĩratasa imondo ãgua, che cuerayevi iri ãgua avei. Sese ité niha che Ru che cuai” ehi güemimbohe eta upe.

<sup>19</sup> Osenduse judío eta aipo nungar ñehesa, opa ipihañemoñeta yoavirati yuvireco.

<sup>20</sup> Setá iteanga ipãhu pendar aipo ehi:

—¿Mahera vo co pemboyeroya? Vireco ité carugar oyese, ndayaracuai eté —ehi yuvireco chupe.

<sup>21</sup> Ambuae rumo aipo ehi yuvireco:

—Ndipoi eté rumo que ava na ehi vahe oñehe carugar rerecosar. ¿Omboesapiso tie carugar rerecosar ava? —ehi amove judío yuvireco Jesús upe.

### *Judío rerecuar ndoyambotai Jesús yuvireco*

<sup>22</sup> Ari sõhisa vahe pipe tecua Jerusalén ve tũparo rovasagüer pieta oyepota.

<sup>23</sup> Ahese Jesús oguata oico tũparo Salomón oyapo vahecuer rocupe ivi rupi.

<sup>24</sup> Evocoyase judío rerecuareta oyere tupri yuvireco sese aipo ehi yuvireco chupe:

—¿Marase rutei vo eremombehu tupri Poropĩsĩrosar nde recosa oreu? Emombehu tupri catu ñepei reseve oreu —ehi yuvireco chupe.

<sup>25</sup> —Amombehu niha acoi pẽu, ndache reroyai eté rumo peye. Mbahe ayapo vahe che Ru mborerecuasa pipe omboyecua ité Poropĩsĩrosar che recosa;

<sup>26</sup> pe rumo ndache reroyai eté peye. Esepia, pe ndahei eté che remiaro ovesa peico.

<sup>27</sup> Che remiaro ovesa rumo oicua che ñehe. Che avei aicua ahe yuvireco. Ahe evocoyase che rupi oguata yuvireco.

<sup>28</sup> Amondo avei tecovesa apirẽhi yuvireco chupe icañiẽhi ãgua; ndipoi chietera que ava virocua iri vahe rã che sui.

<sup>29</sup> Che Ru niha ombou cheu. Esepia, ahe ipĩrata catu opacatu ava sui. Ndipoi chietera que ñepei ava oicatu vahe serocua che Ru sui.

<sup>30</sup> Che Ru iyavei che oroico ñepeiño ité —ehi judío rerecuareta upe.

<sup>31</sup> Aipo ihese, judío rerecuareta osupipa iri ita yuvireco yapi ãgua.

<sup>32</sup> Ahe chupe rumo aipo ehi:

—Setá mbahe poromondiisa aviye vahe pe rovaque ayapo che Ru pĩratasa pipe. ¿Uma che rembiapo aviye vahe sui che api-api pota peye ita pipe? —ehi judío rerecuareta upe.

<sup>33</sup> Judío rerecuareta omboyevi yuvireco chupe:

—Nande api-apisai chira ita pipe que mbahe nde rembiapo aviye vahe rese. Co rese rumo ãgüe orohera ndeu. Esepia, nde ereñehe rai tẽi Tũpa rese. Nde moco ava tẽi ereico. Nde rumo ereyeapo Tũpa ndeyeupe ae —ehi yuvireco chupe.

<sup>34</sup> Evocoyase aipo ehi ahe ava upe:

—Pẽundar mborocuaita icuachiapri pipe niha aipo ehi: ‘Che aipo ahe pẽu: pe tũpa pãve ité peico’ ehi.

<sup>35</sup> Yaicua niha icuachiapri pipendar ndiyai yayamotarẽhi. Esepia, Tũpa aipo ehi: ‘Pe tũpa pãve ité peico’ ehi evocoi ava oñehe pĩsĩsar upe.

<sup>36</sup> Che niha che Ru Rembiporavo aico. Ahe che mbou co ivi pipe. ¿Mahera ru evocoyase, ‘Nde ereñehe rai tẽi Tũpa rese’ peye cheu, ‘Che Tũpa Rahir aico’ ahese pẽu?

<sup>37</sup> Esepia, acoi ndayapaise mbahe che Ru remimbotar, ahese ndache reroyai chietera peye viña.

<sup>38</sup> Yepe ndache reroyai chira che recocuer rese peye viña, mbahe ayapose rumo ahe tẽi peroyara. Sese tapeicua ñepi reseve che Ru secoise che rese iyavei che sese che recosa —ehi oamotarẽhimbareta upe.

<sup>39</sup> Osoquenda pota iri yuvireco viña; Jesús rumo osoño ipãhu sui.

<sup>40</sup> Oyevi iai Jordán rovai. Aheve acoi Juan yipindar oporoãpiramo. Aheve opita.

<sup>41</sup> Ava rehii yuviraso sepia, aipo ehi yuvireco:

—Yepe Juan ndoyapoi mbahe poromondĩsa viña. Opacatu mbahe omombehu vahe rumo co mbia resendar supi eté —ehi yuvireco.

<sup>42</sup> Setá iteanga ava Jesús viroya yuvireco aheve.

## 11

### *Lázaro mano agũer*

<sup>1</sup> Oime ava imbaheasi vahe serer Lázaro, tecua Betania pendar. Güeindri Marta iyavei María reseve yuvirecoi aheve.

<sup>2</sup> Ahe María, oipiyere vahe mbahe sãacua vahe yande Yar pi rese. Ipare oiquiti oha pipe.

<sup>3</sup> Ahe seindri omondo oñehe Jesús upe yuvireco aipo ehi:

—Ore Yar, nde mboripar, nde rembiaisu, imbaheasi ou —ehi.

<sup>4</sup> Ahe osenduse aipo ehi:

—Co mbaherasisa rumo ndahei ahe imano ãgua ité. Ëgüe ehi rumo Tũpa reco porañetesa mboyecua ãgua iyavei Tahir reco porañetesa mboyecua ãgua avei —ehi.

<sup>5</sup> Yepe osaisú iteanga Marta icupihir reseve iyavei iquivri Lázaro viña,

<sup>6</sup> oyanduse rumo Lázaro mbaherasisa, opita viteño ité ñuvirio ari güecosave.

<sup>7</sup> Ipare omombehu ore supi oroico vahe upe:

—Yayevi iri ivi Judea rupi —ehi.

<sup>8</sup> Ore rumo aipo orohe chupe:

—Ore mbohesar, cuesemi tẽi acoi judío rerecuareta ahe pendar nde yuca pota ita pipe yuvireco; ¿cũritei co ereso pota iri aheve? —orohe chupe.

<sup>9</sup> Oreu rumo aipo ehi:

—Ñepi ari niha vireco doce hora. Supi eté acoi oguata vahe ari pipe ndoyepiapi eté. Esepia, osepia ité co ivi resapesa;

<sup>10</sup> acoi oguata vahe rumo pĩtu pipe, oyepiapi eté. Esepia, ipane tesapesa chupe —ehi oreu.

<sup>11</sup> Ipare aipo ehi:

—Yande mboripar Lázaro oque tẽi. Che rumo amomahera —ehi.

<sup>12</sup> Evocoyase ore aipo orohe chupe:

—Ore Yar, oque tẽise, ocuerara —orohe.

<sup>13</sup> ‘Omano ité’ oyapave tēi aipo ehi. Ore rumo orepīhañemoñeta: “Oque tēi revo” orohe chupe viña.

<sup>14</sup> Ipare rumo omombehu tupri ité aipo ehi oreu:

—Lázaro omano ité.

<sup>15</sup> Aviharete che ndaicoise aheve. Esepia, ãgüe ehise ité avīye catura pēu pe che reroya ãgua. Yaso ru catu sepia —ehi oreu.

<sup>16</sup> Evocoyase Tomás, Gemelo serosa vahe, aipo ehi ore imboetasa oroico vahe upe:

—Yaso avei ru yande yamano vahe rã supi —ehi.

### *Jesús cuerayevisa secoi iyavei tecovesa*

<sup>17-18</sup> Betania namombriimi Jerusalén sui, tres kilómetro tupri. Evocoyase ore oroyepota senise ahe tecuave, orosendu “cūritei irungatu ari opa Lázaro tñre” ehi vahe.

<sup>19</sup> Setá judío yuviraso Marta iyavei María piri iquivri mano agüer sui imboviha ãgua.

<sup>20</sup> Oicuae Marta Jesús yepota seni, oso voi eté sapeve; María rumo opitaño oi pipe.

<sup>21</sup> Evocoyase Marta aipo ehi voi chupe:

—Che Yar, ehi cohove ereicose, nomanoi chietera revo ore quivri viña.

<sup>22</sup> Che rumo aicua Tūpa omboura opacatu nde porandusa ndeu —ehi Marta chupe.

<sup>23</sup> —Nde quivri rumo ocuerayevi irira —ehi Marta upe.

<sup>24</sup> —Supi eté aicua niha ocuerayevira opacatu omano vahecuer reseve ari ipa vahe pipe —ehi Marta.

<sup>25</sup> —Che niha cuerayevisa aico iyavei tecovesa. Acoi ava che reroya vahe, yepe omano tñira viña, oicoveño itera rumo.

<sup>26</sup> Acoi che reroya vahe güecoveseve, nomanoi chietera. ¿Eeroya aipo che hesa? —ehi Marta upe.

<sup>27</sup> —Oroviroya ité, che Yar. Nde niha Poropñirosar ereico Tūpa Rahir, ore remiaro ereyu vahe rã co ivi pipe oreu nara —ehi Marta Jesús upe.

### *Jesús oyaseho Lázaro ruvipa rovai*

<sup>28</sup> Aipo ohe pare, Marta oso ocupihir María reca, chupeñomi aipo ehi:

—Porombohesar oicove cohove, “Tou” ehi ndeu —ehi chupe.

<sup>29</sup> Evocoyase María oso voi eté sepia.

<sup>30</sup> Jesús rumo ndoi que vitei eté tecua pipe; Marta rese oyoepiasave viteño ité secoi.

<sup>31</sup> Osepiase María sē poyava, judío eta sētave yuvirecoi vahe imbovihasar yuviraso voi saquicuerive, “Oquivri ruvipave revo osora oyaseho” ehi yuvireco viña.

<sup>32</sup> Evocoyase María oyepotase chupe, oñenopiha sovai aipo ehi:

—Che Yar, ehi revo ereicoveño itese cohove, che quivri nomanoi chietera viña —ehi María chupe.

<sup>33</sup> Osepiase María yaseho iyavei judío eta yuviraso vahe supi, opiha pipe oyandu ité oviharēhisa.

<sup>34</sup> Evocoyase oporandu:

—¿Que vo peñoti? —ehi chupe.

Ahe aipo ehi yuvireco chupe:

—Ore Yar, erio, teresepia —ehi.

<sup>35</sup> Ahese Jesús oyaseho.

<sup>36</sup> Judío evocoyase aipo ehi yuvireco:

—¡Esepia, osaisu ité! —ehi oyeupe yuvireco.

<sup>37</sup> Ambuae rumo ipãhu pendar aipo ehi yuvireco:

—Co mbia omomahe vahe acoi mbia ndasesapisoi vahe, ¿ndoicatui chira pñha Lázaro manoēhi ãgua mbahe apo cuese rahe viña? —ehi yuvireco.

### *Lázaro mbogüerayevi agüer*

<sup>38</sup> Jesús oyemboya suvipave oviharēhisa pipe; ahe suvipa ita hopri, sovapisa ita avei.



39 —Perocua sovapisa ita ichui —ehi.

Marta, omano vahe reindri, rumo aipo ehi:

—Che Yar, iné ité revo. Esepia, opa niha irungatu ari imanore —ehi.

40 —¿“Che reroyase eve, Tūpa pīratasa eresepiara” ndahei vo acoi ndeu? —ehi Marta upe.

41 Aipo ihe pare, virocua ita yuvireco ichui. Evocoyase omahe iva rese aipo ehi:

—Che Ru, “Aviye ndeu” ahe ndeu. Esepia, eresendu che ñehe.

42 Che aicua nde eresenduño ité che ñehe yepi, che rumo aipo ahe co ava eta rembiepiave ‘toviroya avei nde che mbousa co ivi pīpe yuvireco’ che yapave —ehi.

43 Aipo ohe pare, oñehe pīrata aipo ehi:

—¡Lázaro, esē eipeve sui! —ehi.

44 Omano vahe evocoyase osē voi opacatu turucuar omamasa reseve. Jesús evocoyase aipo ehi ava upe:

—Peyorapa imamasa ichui, toguata —ehi.

### *Judío rerecuareta oyemomborandu Jesús pisi āgua yuvireco*

45 Osepiase co poromondiisa, judío eta yuviraso vahe María rupi setá ité Jesús viroya yuvireco.

46 Ipāhu pendar rumo moviro yuviraso voi ava fariseo rerecuareta uve sembiapo mombehu āgua.

47 Evocoyase fariseo rerecuareta iyavei pahi rerecuareta oñemonuha guasu yuvireco aipo ehi:

—¿Mara yahera vo sereco? Co mbia setá ité oyapo poromondiisa oico.

48 Ndayayapoise mbahe chupe, opacatu tiēte ava viroyara yuvireco viña iyavei aviyeteramo mborerecuar Roma iguar yanduse, yugüerura yande tūparo mondurupa iyavei omocañi tēi uca aveira yande recua yande sui —ehi oyeupe yuvireco.

49 Ñepe rumo mbia ipāhu pendar Caifás serer vahe, ahe ité pahi eta rerecuar ivate catu vahe ahe araviter pīpe, aipo ehi ava upe:

—Pe ndapeicuai eté mbahe,

50 ndapesenducuai avei co tecocuer; aviye catura ñepe mbia omanose yande recocuer rese, ndahei que opacatu yande mocañi tēi āgua —ehi omboetasa eta upe.

51 Ahe rumo ndahei oyesui tēi aipo ehi; Tūpa ité aipo ombohe uca. Esepia, ahe ité mborerecuar guasu chini ahese. Sese aipo ehi: “Jesús omanora yande recocuer rese” ehi.

52 Iyavei ndahei chira ahe ava reseño, omanora opacatu ava Tūpa Rahir oñemosai tēi vahe ñepe reseve imonuha āgua.

53 Ēgüe ehi ahe ari pīpeve judío eta rerecuar oyemoingatupa voi yuca āgua yuvireco.

54 Sese ndoguata iri ava judío eta pāhu rupi. Ahe rumo osē ivi Judea sui, oso ivi iporupirēhi vahe rerovicave, tecua Efraín ve. Aheve opacatu oropita supi.

55 Virovise judío Pascua pieta apo āgua, setá iteanga ava ambuae tecua rupindar yuviraso tecua Jerusalén ve oyeecocuer moatiro ahe pieta mboetei āgua renondeve.

56 Oseca tēi Jesús yuvireco. Ipare tūparove yuviroique, oporandu-randu oyeupe yuvireco:

—¿Mara peye pe, oura pīha pieta repia, aní chira tie? —ehi-ehi oyeupe yuvireco.

57 Yipive rumo fariseo rerecuar iyavei pahi rerecuar oyocuai ava, “Pesepiase Jesús, pemombehu voi oreu ipisi āgua” ehi yuvireco chupe.

## 12

### *Ñepe cuña omondo Jesús rese mbahe siacua vahe*

1 Seis ari ipane vitese Pascua pieta āgua, Jesús oso tecua Betania ve, aheve acoi Lázaro ombogüerayevi.

<sup>2</sup> Eipeve ocaru yuvireco Jesús mboeteisave. Marta ihañeco sese; Lázaro evocoyase ocaru yuvinoi mesave ipiri.

<sup>3</sup> Evocoyase María güeru medio litro mbahe sñacua vahe nardo, sepí iteanga vahe. Omondo ipi rese. Ipare oiquiti ohavapri pïpe ichui. Sñacúa iteanga evocoyase opacatu oi pïpe.

<sup>4</sup> Evocoyase ore mboetasa Judas Iscariote, ahe acoi omondo vaherã ava yamotarêhimbar uve, aipo ehi:

<sup>5</sup> —¿Mahera vo ndimondosai co mbahe sñacua vahe tresciento denario rupi ava iparaisu vahe pïtivii ãgua? —ehi.

<sup>6</sup> Judas rumo ndahei ava iparaisu vahe raisupave aipo ehi. Ahe rumo imonda rai vahe tēi. Setá rupi guarepochi vïrocua güembiporugã tēi.

<sup>7</sup> Evocoyase Jesús aipo ehi:

—Toyapoño cheu. Esepia, ahe che mano ãgua renonde êgüe ehi cheu.

<sup>8</sup> Yuvirecoveño itera ava iparaisu vahe pe pãhuve yepi; che rumo ndaico pucu iri chira pe pãhuve —ehi Judas upe.

### *Pahi rereciar oyamotarêhi Lázaro yuvireco*

<sup>9</sup> Setá iteanga ava judío oyandu yuvireco Jesús rerãcua Betania ve secoise. Sese yuviraso aheve; ndahei Jesús repia güeraño yuviraso, êgüe ehi rumo imbogüerayevipri Lázaro repia avei.

<sup>10</sup> Evocoyase pahi rereciar, “Yayuca avei Lázaro” ehi yuvireco oyeupe.

<sup>11</sup> Esepia, ahe ichui tēi niha setá iteanga judío oyepepi pahi rereciar sui Jesús reroya ãgua yuvireco.

### *Jesús oique Jerusalén pïpe*

<sup>12</sup> Ava rehii yuviraso tecua Jerusalén ve Pascua pieta repia yuvireco. Ahere ayihive voi oicua Jesús yepota ãgua ahe tecuave yuvireco.

<sup>13</sup> Ahese oyasia pindo yuvireco. Oyacatu vïraso Jesús rovañchi ãgua, osapucaí yuvireco chupe:

—¡Imboeteipri, sovasapri secoi ou vahe yande Yar Tūpa rer pïpe! ¡Tūpa tosovasa Israel rereciar guasu! —ehi yuvireco.

<sup>14</sup> Yipïndar rumo opa Jesús oseca uca guaricumi. Ipare oyeupi sese icuachiapri aracahendar rupi tupri ité aipo ehi vahe:

<sup>15</sup> “Pesiquiyei rene, Sión pendar; pesepia, pe rereciar guasu guaricumi harive ou pēu” ehi.

<sup>16</sup> Yipïndar, ore semimbohe eta, ndorosenducuai eté co aracahendar imombehupri. Ipare rumo oyevise güecosa porañetesave, ahese oremahenduha aracahendar sesendar icuachiapri rese, “Supi eté omombehu” orohe tēi sepiase.

<sup>17</sup> Acoi ava yuvirecoi vahe Jesús rupi, Lázaro mbogüerayevisa osepi vahecuer, ahe opa omombehu-mbehu ambuae ava upe yuvireco.

<sup>18</sup> Sese ava eta yuvinose voi sovañchi ipisi ãgua. Esepia, oicua ité ahe mbahe poromondiisa guasu yapose yuvireco.

<sup>19</sup> Evocoyase fariseo rereciareta aipo ehi oyeupe yuvireco:

—Indó, peicua niha ndayaicatu iri eté mbahe apo chupe cute. Pesepia ru, ¡opacatu guasu ité ava oguata cūrtei yuvireco supi! —ehi yuvireco.

### *Oime griego oseca vahe Jesús yuvireco*

<sup>20</sup> Griego oime ava rehii pãhuve yuviraso vahe pieta repia Tūpa mboetei ãgua tecua Jerusalén ve.

<sup>21</sup> Ahe oyemboya Felipe, Betsaida pendar rese, ahe tecua Galilea pïpendar. Ipare aipo ehi yuvireco chupe:

—Nde mbia, orosepia potami aipo Jesús —ehi.

<sup>22</sup> Felipe evocoyase oso imombehu Andrés upe; ichui yuvirasó ñuvirío voi Jesús upe imombehu.

<sup>23</sup> Evocoyase chupe aipo ehi:

—Oyepota ari cheundar che, Ava Riquehír, che yeví iri água che recua porañetesave.

<sup>24</sup> Supi eté aipo ahe pëu: inungar acoi trigo rãhíi nañotisaise, ahese ndihai chietera; ñotise rumo, ahese iha vaira.

<sup>25</sup> Acoi ava osaisuse rumo güecocuer tēi, ocañi tēira; acoi ndosaisui vahe rumo güecocuer co ivi pīendar tēi che recocuer rese, evocoi nungar virecora tecovesa apirēhi.

<sup>26</sup> Acoi ava che mboyeroya pota vahe, toguata che rupi yuvireco. Esepia, acoi che mboyeroyasar yuvirecoi vahe, ahe avei yuvirecoira che piri ivave. Che Ru Tūpa evocoyase omboeteira ahe sereco —ehi chupe.

### *Jesús omombehu omano água*

<sup>27</sup> “¡Cūritei ayandu ité mbahe-mbahe tēi oime vaherã cheu! ‘¿Mara ahera pīha?’ ahe tēi. ¿Aipo ahera: ‘Che Ru, che pīsiro eve cūritei cheu oime vaherã mbahe tēi sui’ ahera viña? ¡Che rumo aicua evocoi nungarã ité ayu!

<sup>28</sup> Che Ru, emboyecua nde pīratasa nde rer porañetesa mboetei água” ehi oyeroqui.

Ichui oyeendu íva sui ñehesa aipo ehi vahe: “Ēgüe ahe niha amboyecua che pīratasa vichico, Ēgüe ahe iri aveira” ehi.

<sup>29</sup> Aheve ava yuvirecoi vahe, “Osunu revo” ehi yuvireco viña; ambuae ava,

—Tūpa rembiguai revo oñehe Jesús upe —ehi yuvireco.

<sup>30</sup> Evocoyase aipo ehi ava eta upe:

—Ndahei cheundar ñehesa pesendu, ahe rumo pēundar.

<sup>31</sup> Cūritei oimera ñemoirosa co ivi pīendar ndache reroyai vahe upe, cūritei avei imombosara Carugar co ivi pīendar imborerecuasa sui.

<sup>32</sup> Acoi che rupise ivate, opacatu ava arura cheyeupi —ehi.

<sup>33</sup> Aipo ñehesa pīpe omboyecua tupri ité mara ehira omano.

<sup>34</sup> Aipo ihese ava eta aipo ehi:

—Ore rumo orosendu mborocuaíta icuachiapri pīpe aipo ehi vahe: “Poropīsīrosar apirēhi vaherã ité” ehi. ¿Mahera ru aipo nde: “Ava Riquehír osupira ivate yuvireco” ere no? ¿Uma ru aipo Ava Riquehír, ambuae tie? —ehi ava eta yuvireco chupe.

<sup>35</sup> Evocoyase aipo ehi ava upe:

—Pe pereco vitemira chíhi rupive tesapesa pe pãhuve. Peguata catu supi seime viteseve. Aviyeteramo pe resapiha tēira pītumimbi vahe. Esepia, acoi oguata vahe pītumimbisa rupi, ndoicuai que güecosa.

<sup>36</sup> Peroya co tesapesa cūritei pereco viteseve, ipipe ité pe reco água —ehi.

Aipo ohe pare, Jesús osē ava rehíi pãhu sui; ndoyemboyecua iri chupe.

### *Setá judío rerecuar ndoviroya vitei eté Jesús yuvireco*

<sup>37</sup> Yepe Jesús setá iteanga oyapo mbahe poromondíisa judío rerecuar rovaque viña, ahe rumo ndoviroyai eté yuvireco.

<sup>38</sup> Esepia, imboavíyesa rane itera Tūpa ñehe mombehusar Isaías rembicuachiagüer aipo ehi vahe:

“Che Yar, ava ndoviroyai yande ñehe yuvireco iyavei ndoviroyai nde pīratasa eremboye-cuase chupe” ehi.

<sup>39</sup> Co rese avei ava ndoicatui eté senducua yuvireco. Inungar oicuachía Isaías aipo ehi:

<sup>40</sup> “Tūpa nomboesapisoí ava iyavei nombopíhañemoñeta tupri iri mbahe rese yuvireco. Sese ndosepiacuái eté mbahe, ndosenducuai avei mbahe, ndoyeví catui yuvireco chupe ombogüera água” ehi.

<sup>41</sup> Isaías aipo ehi. Esepia, osepia ité Jesús reco porañetesa. Evocoyase ahe oñehe sese.

<sup>42</sup> Setá ité rumo judío viroya yuvireco, seco ivate vahe avei. Ahe rumo nomboyecuai eté seroyasa yuvireco fariseo rerecuar sui osiquiyepave ‘aviyeteramo yande mombora ñemonuhasa sui ñepei reseve yuvireco’ oya.

<sup>43</sup> Esepia, ahe oipota catu ava tēi suindar yemboeteisa Tūpa suindar yemboeteisa sui yuvirecō.

### *Jesús ñehe reroyasa rese porandusara*

<sup>44</sup> Yipindar rumo, Jesús oñehe vitesa ava rehii upe, oñehe pĩrata aipo ehi: “Acoi che reroya vahe ava, ndahei che güeraño che reroya, ahe rumo che Ru avei, che mbousar, viroya yuvireco.

<sup>45</sup> Iyavei acoi che repia vahe, che mbousar avei osepia.

<sup>46</sup> Che tesapesa aico. Ayu co ivi pipe ava che reroyasar pĩtumimbisave yuvirecoiēhi āgua.

<sup>47</sup> Acoi osendu vahe che ñehe, nomoinguei vahe rumo oyese, ndahei che amocañira. Esepia, ndayui ava co ivi pipendar mocañi āgua, che rumo ayu ipĩsiro āgua.

<sup>48</sup> Acoi ava che reroĩro vahe, ndoviroyai vahe avei che ñehe, oime rumo imocañi āgua: Co che ñehesa supi eté vahe reroyaēhisa pipe oyemocañi ucara ari ipa vahe pipe.

<sup>49</sup> Esepia, che ñañehei eté cheyesui tēi; che Ru, che mbousar rumo che cuai che ñehe āgua, che porombohe āgua avei.

<sup>50</sup> Che aicua co cheundar porocuaita güeru tecovesa apirēhi ava upe. Sese niha amombehu che Ru che cuaisa” ehi Jesús ava rehii upe.

## 13

### *Jesús oyosei güemimbohe pi*

<sup>1</sup> Pascua pieta renonde Jesús oicua ité ohari yepota co ivi reya āgua oso vaherã Vu piri. Ahe osaisu vahe ité ava oyeupendar co ivi pipe yepi. Ēgüe ehi saisu ari ipa vahe rupi.

<sup>2-4</sup> Carugar oi que ité Simón rahir, Judas Iscariote, piha pipe imondo āgua yamotarēhimbar uve. Jesús rumo oicua ité Vu Tūpa sui ousa, oicua avei oyevi iri āgua Vu Tūpa piri iyavei Tu omondo opacatu omborerecuasa chupe. Sese ocaruse güemimbohe eta reseve, mesa sui opūha, osequi oturucuar yohasa. Ipare omonde ambuae turucuar vumbicuasa rese.

<sup>5</sup> Evocoyase omondo i yepoisa riru pipe, oyosei güemimbohe pi, omombiru turucuar vumbicuasa rese vireco vahe pipe oico.

<sup>6</sup> Ichui Simón Pedro pi oyosei potase, ahe aipo ehi chupe:

—Che Yar, ¿nde co ereyoseira che pi? —ehi chupe.

<sup>7</sup> —Nde rumo nderesenducuai mbahe che rembiapo cūritei. Ipare rumo eresenducua —ehi Pedro upe.

<sup>8</sup> Pedro rumo aipo ehi chupe:

—¿Che pi rumo ndereyosei chietera! —ehi.

—Ndayoseise rumo nde pi, ndahei chietera evocoyase che rupindar ereico —ehi Pedro upe.

<sup>9</sup> Pedro evocoyase aipo ehi:

—¿Che Yar, aní catu che pi año ereyosei; eyosei che po, che rova avei! —ehi chupe.

<sup>10</sup> —Acoi oyasupa ramo vahe rumo, ahe ndiquihai eté. Sese ndiyai oyasu iri. Ipi güeraño rumo iya yoseisa. Ēgüe peye ndipoi eté mbahe pe rese; ndaopacatui rumo ēgüe peye —ehi.

<sup>11</sup> Ahe aipo ehi: “Ndaopacatui rumo ēgüe peye” ehi. Esepia, oicua ité uma omondora yamotarēhimbar upe.

<sup>12</sup> Güemimbohe pi sei pare, omonde iri oturucuar yohasa, oguapi mesave aipo ehi:

—¿Peicua vo co mbahe ayapo vahe pēu? —ehi—.

13 Pe niha, “Ore mbohesar, ore Yar” peye cheu. Supi eté niha. Esepia, ahe ité che aico.

14 Yepe supi eté, che pe mbohesar, pe Yar avei aico viña, ayosei rumo pe pi. Sese pe avei ñepei-peí peyacatu peyosei aveira pe pi.

15 Che niha ‘na tehi avei yuvireco’ viya opombohe pe rereco, ãgüe ahe pëu.

16 Supi eté aipo ahe pëu: ava mbiguai tã, ahe ndahei ivate catu güerecuar sui; ãgüe ehi avei imboupri ndahei ivate catu secoi ombousar sui.

17 Pesenducuaase co nungar mbahe, peyapo tuprise, ahese peviharete catura peico — ehi.

18 “Che nañehi opacatu pe rese, che rumo aicua uma yuvirecoi vahe che rembiporavo. Icuachiapri rumo yaviyera: ‘Acoi ocaru vahe che piri, oyemboyere che amotarëhi’ ehi vahe.

19 Senondeve amombehu pëu. Evocoyase ãgüe ehise ité cheu, che reroyara peye che ité niha aipo ahe vahe vichico.

20 Supi eté aipo ahe pëu: acoi che remimondo oipisi tupri vahe, ahe che pisi tupri avei; acoi ava che pisi vahe, oipisi tupri avei che Ru yuvireco” ehi.

*Jesús omombehu: “Ñepei pe pãhu pendar che mondora che amotarëhimbar upe” ehi*

21 Aipo ohe pare, Jesús ndoyembovihai eté iyavei mbahe oime vaheã omboyecua tupri ité,

—Supi eté aipo ahe pëu: ñepei pe pãhu pendar che mondora che amotarëhimbar upe —ehi.

22 Evocoyase ore oromahe-mahe tã oreyses, “¿Ava upe pãha aipo ehi?” orohe tã oreyeupe.

23 Che sembiaisu catu yípive acarú vïte.

24 Ipare Pedro oyaiti-iti ‘¿Ava upe vo aipo ere? tehi chupe’ oyapave cheu.

25 Evocoyase che asiri catu irimi yípive, aporandu chupe:

—Che Yar, ¿ava ité vo? —ahe.

26 Ahe aipo ehi cheu:

—Cũritei amoaquira pan rahicuer imondo tohu, ahe ité che mondora —ehi cheu.

Aipo ohe pare omoaquí pan rahicuer imondo Simón Iscariote rahir; Judas, upe.

27 Judas oipisise pan, oguapí voi eté Caruguar sese. Evocoyase aipo ehi Judas upe:

—Evocoi ereyapo pota vahe, eyapo voiño ité ru —ehi chupe.

28 Que ñepei rumo mesave orocarú vahe, ndorosenducuai eté aipo ihesa.

29 Esepia, Judas guarepochi riru rãrosar secoi yepi. Sese amove ore pãhu pendar ipihañemoñeta: “‘Tererocua mbahe pietase nara’ anise, ‘emondo mbahe ava iparaisu vahe upe nara’ aipo oya revo omose imondo” ehi yuvireco chupe viña.

30 Pan pisi pare, Judas osẽ voi eté oso pítuse.

*Porocuita ipiasu vahe*

31 Judas sã pare, Jesús aipo ehi:

—Cũritei oyecua che, Ava Riquehir, reco porañetesa. Che Ru Tũpa reco porañetesa avei oyecua che rese.

32 Acoi amboyecuase che Ru Tũpa reco porañetesa, ahe avei omboyecua che reco porañetesa, ãgüe ehira imboyecua pihavi.

33 Che rahireta, che rembiaisu, ndaico pucu iri chira pe rese. Che reca tãira peye; inungar acoi judío rerecuar upe aipo ahe: “Ndiyai chietera peso che sosave” ahe.

34 Sese co amondo porocuita ipiasu vahe pëu ñepei-peí peyeaisu ãgua inungar che opoaisu.

35 Peyeaïuse ñepei-peí, opacatu tupri ité ava oicua yuvireco che remimbohe supi eté pe recosa —ehi.

*Jesús, “‘Ndaicuai eté co mbia’ erera cheu” ehi Pedro upe*

<sup>36</sup> Pedro oporandu Jesús upe:

—Che Yar, ¿que vo aipo eresora? —ehi chupe.

Ahese omboyeví Pedro upe:

—Cũritei ndiyai peso vaherã che sosave che rupi; pesorera rumo che rupi curi —ehi.

<sup>37</sup> —Che Yar, ¿mahera ru cũritei voi ndiyai nde rupi che so ãgua? ¡Ayemoingatu ité amano vaherã nde rese! —ehi Pedro chupe.

<sup>38</sup> —¿Supi eté pĩha ereyemoingatu ité che rese nde mano ãgua? Nde rumo cõhe potase tacura ñehe renondeve, mbosapí oyupagüer rupi, “Ndaicuai eté co mbia” erera cheu —ehi Pedro upe.

## 14

### *Jesús, Tũpa raper yandeu*

<sup>1</sup> Ipore Jesús aipo ehi opacatu oreu: “Pepĩhañemoñeta atĩ rene; peyeroya Tũpa rese, che rese avei peyeroya.

<sup>2</sup> Esepia, che Ru rõtave setá oime pe reco ãgua; ãgüe ndehise rumo, namombehui chira aipo pẽu viña. Sese che asora pe recuarã moingatu.

<sup>3</sup> Imoingatu pare ayevira pe reca che recosave pe reraso ãgua cheyepiri.

<sup>4</sup> Pe peicua que vo asora iyavei peicua mara peyera pe yepota ãgua che recosave” ehi oreu.

<sup>5</sup> Tomás rumo aipo ehi chupe:

—Che Yar, ndoroicuai rumo que vo eresora. ¿Mara orohera vo aipo icua ore so ãgua? —ehi.

<sup>6</sup> —Che niha peri aico supi eté vahe iyavei tecovesa. Che rupi güeraño ité peyepotara che Ru upe —ehi—.

<sup>7</sup> Pe peicua tuprise ité che recocuer viña, peicua aveira che Ru viña no. Cũritei suive rumo peicua, pesepia avei cute —ehi oreu.

<sup>8</sup> Evocoyase Felipe aipo ehi chupe:

—Che Yar, torosepia ité ru aipo nde Ru. Ahese aviyera oreu —ehi.

<sup>9</sup> —Felipe, setá arĩ aico pe rese, ¿ndapeicua vitei eté vo che recocuer? Acoi ava che repia vahe, ahe osepia ité che Ru; ¿mahera ru evocoyase, “Torosepia rane ité nde Ru” ere vite cheu no?

<sup>10</sup> ¿Ndache reroyai vo peye che Ru rese ité aicose, che rese avei che Ru secoise? Opacatu mbahe amombehu vahe pẽu, ndahei cheyesui tẽi amombehu. Che Ru secoi vahe che rese, ahe ité oyapo güemimbotar che recocuer rese —ehi—.

<sup>11</sup> Che reroya peye che Ru rese che recose, ahe avei secoise che rese. Anise, che reroyañomi tẽi catu peye mbahe che rembiapo rese —ehi—.

<sup>12</sup> Supi eté aipo ahe pẽu: acoi ava che reroya vahe, ahe avei oyapora mbahe che rembiapo nungar, tuvicha catura rumo. Esepia, che asora che Ru piri —ehi—.

<sup>13</sup> Acoi peporanduse que mbahe rese che rer pipe, che amondoño itera pẽu. Ipĩpe che amboyecuarã che Ru reco pĩratasa.

<sup>14</sup> Che ayapora que mbahe che rer pipe pe porandusa —ehi oreu.

### *Jesús, “Che amboura Espíritu Santo pẽu” ehi viroyasar upe*

<sup>15</sup> “Che raisuse ité peye, pemboyeroya catu che porocuita.

<sup>16</sup> Che aporandura che Ru upe ombou vaherã Espíritu supi eté vahe pe pĩtivĩ ãgua, ahe secoi vaherã ité pe rese.

<sup>17</sup> Ava Tũpa ndoicuai vahe rumo, ndoicatui chietera ipisi. Esepia, ndosepiai, ndoicuai avei yuvireco. Pe rumo peicua ité. Esepia, ahe ité secoi pe rese. Ipore oique itera pe pĩha pipe.

<sup>18</sup> “Ndopoeyai chira pe güeraño tẽi; ayevira niha pe rese aico vaherã.

<sup>19</sup> Chîhi tēi oime vîte arî che reroyasarēhi che repia vite vaheṛã yuvîreco. Ipare rumo ndache repia iri chira yuvîreco. Pe rumo che repiaño itera peye iyavei peicoveño itera. Esepia, che aicoveño avei.

<sup>20</sup> Ahe arî pipe peicuara che Ru rese che recosa, che rese pe recosa avei iyavei che aicose pe rese.

<sup>21</sup> Acoi oicua vahe che porocuita, omboyeroya vahe avei, ahe omboyecua ité che raisusa yuvîreco. Che Ru osaisura che raisusar; che avei asaisura, ayemboyecua aveira chupe” ehi.

<sup>22</sup> Judas (ndahei vahe rumo Iscariote) aipo ehi:

—Che Yar, ¿mahera oreuño ereyemboyecua; mahera ru ndereyemboyecua iri chira ava nde reroyasarēhi upe? —ehi chupe.

<sup>23</sup> Evocoyase aipo ehi Judas upe:

—Acoi che raisu vahe, omboyeroya vahe che ñehe yuvîreco, che Ru evocoyase osaisura iyavei che Ru reseve oroyura oroico vaheṛã sese.

<sup>24</sup> Acoi ndache raisui vahe, ahe ndovîroyai avei che ñehe yuvîreco. Co ñehesa pesendu vahe ndahei cheyesui tēi; ahe rumo che Ru, che mbousar suindar —ehi.

<sup>25</sup> “Pe rese che reco vîtese, opa co mbahe amombehu vichico pēu.

<sup>26</sup> Espîritu Santo rumo, Poropîtivîisar, che Ru ombou vahe che rer pipe, ahe pe mbohera opacatu mbahe aviye vahe rese. Pe momahenduha aveira opacatu pēu che ñehe agüer rese.

<sup>27</sup> “Aseya teco tupriṣa pēu, ahe che reco tupriṣa; ndahei rumo avaño tēi rembiapo nungar amondo pēu. Aní, ‘¿Mara yahera pîha?’ peyera; aní chiaveira pesiquiye.

<sup>28</sup> Pesendupa niha acoi, ‘Asora, ipare ayevî irira pe rese aico vaheṛã’ che hesa. Supi eté che raisuse peye, peviharetera peicuase che Ru pîri che sosa. Esepia, ahe ivate catu vahe ité che sui.

<sup>29</sup> Sese amombehupa voi co mbahe tenondeve pēu, ãgüe ehise ité, ahese peroyara.

<sup>30</sup> “Namombehu pucu iri chira mbahe pēu. Esepia, ou ité co ivî pipe oporocuai tēi vahe. Ahe rumo ndahei ivate catu vahe che sui

<sup>31</sup> ‘toicua ava che reroyasarēhi che Ru raisusa yuvîreco’ che hesa pipe. Ayapoño ité che Ru che cuaita.

“Pepûha. Yaso cohava sui” ehi güemimbohe eta upe.

## 15

### *Jesús uva hi nungar*

<sup>1</sup> Ipare Jesús oñehe iri oreu aipo ehi: “Che aico inungar uva hi supi eté vahe; che Ru evocoyase inungar sese ihañeco vahe secoi.

<sup>2</sup> Ahe oyasia sãca ndihai vahe ichui yepi; iha vahe rumo omoatîro tupri iha catu ãgua.

<sup>3</sup> Pe pe recocuer imoatîropri ité che pe mbohesa pipe.

<sup>4</sup> Peicoño ité catu che rese inungar che aicoño ité avei pe rese. Uva rãca oise ohî sui, ndiha iri ahe ae tēi; pe avei ãgüe peyera peyepêise che sui” ehi oreu.

<sup>5</sup> “Che niha uva hi nungar aico; pe evocoyase sãca nungar peico. Acoi secoi vahe che rese, che avei aico sese. Inungar mbahe miti iha atî vahe, ãgüe ehira ahe. Supi eté ndapeicatui chietera che porēhi mbahe apo.

<sup>6</sup> Acoi ndasecoi vahe che rese, ahe imombosara inungar acoi uva rãca yîpi vahe. Ipare imonuhasa sapi ãgua” ehi oreu.

<sup>7</sup> “Pe peicoñose ité che rese ndaperesaraise avei che porombohesa sui, peporanduño mbahe pe remimbotar rese, ahese imondosara pēu” ehi.

<sup>8</sup> “Che Ru oipisîra omboeteisa pe sui acoi peyapo tuprise opacatu che remimbotar. Pemboyecua evocoyase che remimbohe supî tupri vahe pe recosa.

<sup>9</sup> Che opoaisu ité, inungar che Ru che raisu. Sese peicoño ité catu che poroaisusa pipe.

<sup>10</sup> Esepia, pemboyeroyase che porocuaíta, peicoveño itera co che poroaisusa pipe. Inungar che che Ru amboyeroya che cuaisa iyavei aicoveño ité che Ru poroaisusa pipe vichico.

<sup>11</sup> “Che aipo ahe pëu ‘tovireco che vihasa oyese yuvireco’ viya; ‘toyemboviharete catu yuvireco’ che hesa pipe.

<sup>12</sup> Co che porocuaíta: Peyeaísu ñepei-pei, inungar che opoaísu.

<sup>13</sup> Ndipoi eté que poroaisusa ivate catu vahe co sui omondose que ava güecocuer omboripar rese nara.

<sup>14</sup> Pe che mboyeroyase peye, ahese che mboripar peico.

<sup>15</sup> ‘Pe mbiguai peico’ ndahe iri pëu. Esepia, mbiguai ndoicuai eté mbahe güerecuar pihañemoñetasa. Sese, ‘Che mboripar’ ahe pëu. Esepia, aicua ucapa ñehesa che Ru cheu omombehu vahe pëu.

<sup>16</sup> Pe niha ndache poravoi peye. Che rumo opoporavo iyavei opocuai peporaviqui vaheã ava reru água cheu ‘che rese ité toyuvirecoi’ che yapave. Evocoyase che Ru omboura mbahe pe porandusa che rer pipe pëu.

<sup>17</sup> Co rese opocuai: Peyeaísu catu ñepei-pei peyacatu” ehi Jesús güemimbohe upe.

### *Jesús amotarëhimbar, supindar amotarëhimbar avei*

<sup>18</sup> “Acoi ava ndoicuai vahe Tüpa pe amotarëhise, peicuaño che rane che amotarëhi yuvireco yipindar.

<sup>19</sup> Pe peico vitese ava Tüpa ndoicuai vahe pãhuve, evocoyase pe raisu aira yuvireco viña. Che rumo opoporavo ipãhu sui yuvireco. Sese tēi ndape ambota iri yuvireco. Esepia, pe ndahe iri ipãhu pendar peico.

<sup>20</sup> Peyemomahenduha pëu aipo che hesa rese: ‘Ndipoi eté que mbiguai ivate catu vahe güerecuar sui’ ahe. Che niha yipindar yamotarëhimbri aico, pe avei pe amotarëhira yuvireco. Acoi omboyeroya vahe rumo che porombohesa, pe porombohesa avei omboyeroyara yuvireco.

<sup>21</sup> Co opacatu mbahe che recocuer sui tēi ãgüe ehira pëu. Esepia, ndoicuai niha che mbousar yuvireco.

<sup>22-24</sup> “Che ndayuisse ahe ava upe mbahe sembiavi mombehu viña, evocoyase, ‘Peyavi mbahe’ ndehi chira Tüpa chupe yuvireco viña. Che rumo ayu ité, amombehu mbahe sembiavi yuvireco chupe, ayapo avei mbahe ava ndoyapoi vahe yuvireco ipãhuve; ahe rumo yepe osepia co mbahe yuvireco viña, che amotarëhiño, che Ru avei oyamotarëhi yuvireco. Sese, ‘Pereco ité mbahe pe rembiavi peyese’ ehi Tüpa chupe. Esepia, acoi che amotarëhi vahe, che Ru avei oyamotarëhi yuvireco.

<sup>25</sup> Co rumo ãgüe ehi. Esepia, imboaviyesa rane itera ñehesa sesendar icuachiapri pipe aipo ehi vahe: ‘Mbahe apoëhi pipe sui tēi che amotarëhi yuvireco’ ehi vahe.

<sup>26</sup> “Acoi ambouse rumo Poropãtiviasar, Espíritu supi eté vahe che Ru sui pëu, ahe omombehura che recocuer.

<sup>27</sup> Pe avei pemombehura che recocuer. Esepia, yipisuive ité peico che rupi” ehi.

## 16

<sup>1-2</sup> “Pe mocañehi água che rese pe yeroyasa aipo ahe opacatu co mbahe imombehu pëu: pe mombora judío rerecuar oñemonuhasa sui yuvireco, pe yuca aveira yuvireco. Ahe rumo omohara, ‘Tüpa uve nara revo na yahe’ ehira yuvireco viña.

<sup>3</sup> Evocoi rumo ãgüe ehira yuvireco che Ru cuaëhi pipe iyavei che cuaëhi pipe yuvireco.

<sup>4</sup> Amombehu aipo pëu acoi ãgüe ehise, peyemomahenduhara che remimombehugüer rese.

### *Espíritu Santo rembiapo*

“Yipisuive rumo namombehui co mbahe pëu. Esepia, aicoveño ité pe rese.



<sup>5</sup> Cūritei rumo asora che mbousar piri iyavei ndipoi que ñepei pe pãhu pendar ‘¿que vo aipo eresora?’ ehi vahe cūritei cheu.

<sup>6</sup> Pe rumo ndapeyembovihaiño aipo mbahe amombehuse pẽu.

<sup>7</sup> Supi eté rumo aipo ahe pẽu: aviye catura pẽu che asose. Esepia, ndasoise viña, ndoui chietera pe rese Poropitivisar. Asose rumo, che amboura pẽu.

<sup>8</sup> Ouse ahe, oicua ucara ava che cuaẽhisar upe yangaipa, oicua uca aveira tecocuer ñvisa iyavei cañisa ndaseco pōrai vahe upendar.

<sup>9</sup> Oicua ucara yangaipa chupe ndache reroyaise yuvireco;

<sup>10</sup> oicuara rumo che reco ihñvi tupri vahe yuvireco. Esepia, asora che Ru recosave, ahese pe ndache repia iri chietera peye;

<sup>11</sup> iyavei oicuara Tūpa poromocañisa. Esepia niha, Carugar, ahe co ivi pipendar rerecuar oipisira che Ru Tūpa ñemoirosa.

<sup>12</sup> “Setá iteanga mbahe oime amombehu vaherã pẽu. Pe rumo ndapeicatui chira cūritei senducua.

<sup>13</sup> Ouse rumo Espiritu supi eté vahe, ahe pe mbohera mbahe supi eté vahe rese. Esepia, noñehi chira oyesui tẽi, ahe rumo omombehura mbahe osendu vahe güeraño, oicua uca aveira mbahe coiye oime vaherã.

<sup>14</sup> Ahe che mboeteira. Esepia, oicua ucara opacatu mbahe cheundar pẽu.

<sup>15</sup> Opacatu mbahe che Ru vireco vahe, che mbahe. Sese niha, ‘Espiritu oipisira opacatu mbahe cheundar, oicua uca aveira pẽu’ ahe.

<sup>16</sup> “Aviyeteramo tẽi ndache repia iri chira peye. Ipare rumo coiye catumi che repia irira peye” ehi oreu.

*Yepe semimbohe ndovihai chira viña, coiye catu rumo oviharetera yuvireco*

<sup>17</sup> Evocoyase ore oroporandu-randu tẽi oreyeupe aipo orohe:

—¿Mara oya pñha: ‘Aviyeteramo tẽi ndache repia iri chira peye’ ehi yandeu; ipare rumo aipo coiye catumi yasepiara iyavei aipo osora Vu piri no?

<sup>18</sup> ¿Mara oya vo aipo: ‘Aviyeteramo tẽi’ ehi? Ndayasenducuai mo aipo iñhesa —orohe oreyeupe.

<sup>19</sup> Ipare rumo ‘oporandura co mbahe rese yuvireco cheu’ oya aipo ehi voi oreu:

—¿Ipare rumo coiye catumi che repia irira peye’ che he agüer rese co pe porandu vite peyeupe? —ehi—.

<sup>20</sup> Supi eté aipo ahe pẽu: peyasehora pe viharẽhisa pipe, ava angaipa viyar rumo ovihareteñora yuvireco. Yepe pe, ndapevihai chira viña, coiye catu rumo peviharetera.

<sup>21</sup> Inungar acoi que cuña imembira potase, tasi chupe oyepotase ari imembira ãgua; pñtani oha pare rumo, nimahenduha iri tasicuer rese; soriveteño omembri rese.

<sup>22</sup> Ëgüe peye avei; pe cūritei tasi avei pẽu, ayevi irira rumo pe repia ãgua, ahese peviharetera. Ahe viharetesa ndipoi chietera que ava virocua vaherã pe sui.

<sup>23</sup> “Ahe ari pipe, ndapeporandu iri chietera mbahe rese cheu. Supi eté aipo ahe pẽu: che Ru omboura opacatu mbahe pẽu che rer pipe peporanduse.

<sup>24</sup> Cūritei rumo ndapeporandu vitei mbahe rese che rer pipe. Peporandu catu sese, ahese peipisira. Ipipe sui perorivete catura.

*Jesucristo mbahe-mbahe tẽi recopisar*

<sup>25</sup> “Opacatu mbahe rese niha amboyoya tecocuer pẽu. Oimera rumo ari namboyoya iri chira ambuae mbahe rese tecocuer; ipa voi amombehu itera mbahe pẽu che Ru recocuer resendar.

<sup>26</sup> Ahe ari pipe pe peporandura mbahe rese che rer pipe; che rumo, ‘Ayerquirira pe rese che Ru upe’ ndahei pẽu.

<sup>27</sup> Esepia, che Ru ae ité pe raisu. Pe raisu ité niha. Esepia, pe che raisu peye, che reroya avei che Ru Tūpa sui che yuse peye.

<sup>28</sup> Asẽ che Ru sui co ivi pipe vitu; cūrītei rumo aseýara co ivi, ayevira che Ru upe” ehi oreu.

<sup>29</sup> Evocoyase ore aipo orohe chupe:

—Indó, aipo rupi ereñehe tupri catu ité; nderemboyoya iri ambuae mbahe rese imombehu oreu.

<sup>30</sup> Supi eté ereicua opacatu mbahe, ereicua avei ore porandusa. Evocoyase ndiya iri ore porandu ãgua mbahe rese ndeu. Sese oroviroya Tũpa sui nde yusa —orohe chupe.

<sup>31</sup> —¿Evocoyase che reroya ité peye? —ehi—.

<sup>32</sup> Supi eté oyepota ari cute, co pipe ité peyemosaipara che sui; che reyara che aemi peye. Ndahei rumo che ae aico. Esepia, che Ru secoi che rese.

<sup>33</sup> Amombehu co opacatu pẽu che rese mbahe tupri pipe pe reco ãgua. Peparaisu itera co ivi pipe; peyemonguerẽhi catura rumo. Esepia, che opa ité asecopi co ivi pipendar mbahe tẽi —ehi.

## 17

### *Jesús oýeroqui güemimbohe rese*

<sup>1</sup> Aipo ohe pare, Jesús omahe iva rese aipo ehi: “Che Ru, oyepota ari cute. Che mboetei eve, ipipe sui avei che nde Rahir toromboetei.

<sup>2</sup> Supi eté niha, nde erembou che mborerecua ãgua opacatu ava ivi pipendar harive iyavei tecovesa apirẽhi mondo ãgua opacatu ava nde cheu erembou vahe upe.

<sup>3</sup> Co niha tecovesa apirẽhi, tande cua nde Tũpa ñepeí supi eté vahe nde recose yuvireco, tache cua avei nde che mbose yuvireco.

<sup>4</sup> “Che niha oromboetei co ivi pipe, iyavei ayapo nde che cuaisa.

<sup>5</sup> Sese che Ru, embou irimi cūrītei che reco porañete ãgua, inungar acoi yipindar areco vahe nde rese ivi apoẽhiseve.

<sup>6</sup> “Co nde rembiporavo ava co ivi pipendar pãhu sui erembou vahe cheu; orocua ucapa chupe. Yipindar ndeundar yuvirecoi. Ipare nde erembou cheu. Ahe viroya ité nde ñehe yuvireco.

<sup>7</sup> Cūrītei oicuapa opacatu mbahe nde suindar cheu erembou vahe yuvireco.

<sup>8</sup> Esepia, amombehu ité nde ñehe erembou vahe cheu; ahe viroya ité yuvireco, viroya avei nde che mbousa yuvireco.

<sup>9</sup> “Che ayeroqui cheu nde remimbou rese ndeu. Esepia, ndeundar ité yuvirecoi; ndayeroqui rumo ambuae ava che reroyasarẽhi rese.

<sup>10</sup> Opacatu ava cheundar, ndeundar avei; ndeundar evocoyase cheundar. Ahe sese che reco porañetesa oyecua.

<sup>11</sup> “Che ndapitai chira co ivi pipe; ahe rumo opitara cohava yuvireco. Che evocoyase asora nde piri. Che Ru, seco maranehi vahe, esãro nde pĩratasa pipe nde remimbou cheu oyese yuvirecoi tupri ãgua inungar yande yaico.

<sup>12</sup> Aicose co ivi pipe, asãro tupri nde rer pĩratasa cheu erembou vahe pipe; chemahe-moha yuvireco sese mbahe tẽi sui. Ndipoi eté que ñepeí ocañi tẽi vahe; acoi yipive ocañi vaheño ité rumo ocañi tẽi; nde ñehe rupi tupri ité ãgüe ehi.

<sup>13</sup> “Cūrītei asora nde recosave. Co ivi pipe che reco vitese rumo, amombehu co mbahe chupe ‘tovireco che viharetesa yuvireco’ che yapave.

<sup>14</sup> Che niha amombehu nde ñehe yuvireco chupe. Ava che reroyasarẽhi rumo oyamotarẽhiño yuvireco. Esepia niha, ndahe iri Carugar povri pendar yuvirecoi inungar che ndahei ipovri pendar aico.

<sup>15</sup> ‘Enose ava Carugar povri pendar pãhu sui’ ndahei ndeu, che rumo aipota eresepira Carugar sui.

<sup>16</sup> Inungar che ndahei Carugar povri pendar aico, ãgüe ehi avei ahe yuvireco.

<sup>17</sup> Eipeha tupri angaipa sui ndeyeupe nara yuvireco ñehesa supi eté vahe reroyase. Nde ñehesa niha supi tupri vahe ité.

<sup>18</sup> Inungar nde che mbou eve ava co ivi pipendar pãhuve, ãgüe ahe avei che imondo ava pãhuve yuvireco.

<sup>19</sup> Amondo ité che recocuer ndeu nara ‘toyemondo catu yuvireco chupe co ñehesa supi tupri vahe reroya pipe’ viya.

<sup>20</sup> “Ndayeroquii co che remimbohe reseño ndeu, ayeroqui avei rumo ambuae ava che reroysar ñehesa sui che reroya vaheã rese.

<sup>21</sup> Aporandu avei ndeu toyuvirecoi tupri ité yuvireco oyese inungar ñepe vahe, ãgüe tehi avei yuvireco yande rese, che Ru, inungar nde ereico che rese, che avei aico nde rese. Toyuvirecoi tupri ité catu yuvireco oyese. Ipipe sui ava co ivi pipendar toviroya nde che mbousa yuvireco.

<sup>22</sup> Che reco porañetesa nde erembou vahe cheu, ahe tupri avei amondo yuvireco chupe ñepe vahe nungar yuvirecoi ãgua, inungar yande ñepe vahe yaico.

<sup>23</sup> Che aico yuvireco sese, nde evocoyase ereico che rese ahe yuvirecoi tupri ãgua inungar ñepe vahe. Ipipe sui ava co ivi pipendar toicua nde che mbousar ereico iyavei eresaisu che remimbohe yuvireco inungar nde che raisu eve.

<sup>24</sup> “Che Ru, nde niha erembou co che remimbohe cheu. Aipota rumo ahe yuvirecoi che piri che recosave osepi vaheã teco porañetesa cheu erembou vahe yuvireco. Nde niha yipive ité che raisu eve ivi apoẽhiseve.

<sup>25</sup> Che Ru, seco catupri vahe, ava co ivi pipendar tẽi nande cuai yuvireco; che rumo orocua ité, co avei oicua nde che mbousa yuvireco.

<sup>26</sup> Orocua uca chupe, orocua ucaño vite itera rumo. Evocoyase nde che raisusa toviroco avei yuvireco, che avei taico yuvireco sese” ehi Jesús oyeroqui güemimbohe recocuer rese.

## 18

### *Jesús oipisi yuvireco*

<sup>1</sup> Aipo ohe pare, Jesús ore renose ore reraso iembã Cedrón rovai. Aheve oime mbahe miti rêta, ipipe Jesús ore rorique ore reraso.

<sup>2</sup> Iyavei Judas omondo vaheã yamotarẽhimbar upe oicua avei aheve secosa. Esepia, setá rupi Jesús rese oroñemonuha aheve yepi.

<sup>3</sup> Sese Judas oyepotaño ité aheve sundao rehii reseve iyavei sundao tũparo rãrosar pahii rerecuar iyavei fariseo eta remimondo opacatu oyoepisa reseve yuvirecoi, guataendi reseve-seve avei yuviraso.

<sup>4</sup> Yipive ité rumo oicua oyeupe mbahe oime vaheã. Sese osẽ voi eté yuvireco chupe oporandu:

—¿Ava vo peseca? —ehi.

<sup>5</sup> Ahe ava rehii omboyevi yuvireco chupe:

—Jesús, Nazaret pendar, oroseca —ehi.

—Che niha ahe aico —ehi ava rehii upe.

Judas ipãhuve secoi imondo ãgua yamotarẽhimbar upe.

<sup>6</sup> “Che niha ahe aico” ehise ava upe; guaquicuei coti pãve opa oviapi yuvireco.

<sup>7</sup> Evocoyase oporandu iri ava upe:

—¿Ava vo peseca? —ehi.

Ahe aipo ehi yuvireco:

—Jesús, Nazaret pendar —ehi.

<sup>8</sup> Aipo ihese,

—“Che niha ahe aico” ahe pẽu —ehi—. Che che recase peye, pepocoi rene catu co ambuae rese, toyuvirasopaño —ehi.

<sup>9</sup> Co rumo iñehe mboaviye ãgua ãgüe ehi: “Acoi che Ru ombou vahe cheu, nocañii eté que ñepe che sui” ehi.

<sup>10</sup> Evocoiyase Simón Pedro vireco vahe quise, vinose, oyasia Malco serer vahe nambi yasu cotindar, ahe pahi rerecuar ivate catu vahe rembiguai.

<sup>11</sup> Pedro upe rumo aipo ehi:

—Emondo iri quise siru pipe —ehi—. Che Ru niha co mbahe yavai vahe ombou cheu. Añemosañño itera chupe —ehi.

*Jesús serasosa mborerecuar Anás rovai*

<sup>12</sup> Evocoiyase sundao rerecuar, osundao eta reseve iyavei judío tūparo rārosar oipisi Jesús yuvireco, oipocua.

<sup>13</sup> Yipindar viraso Anás rētave yuvireco. Esepia, ahe Caifás rovayar. Ahe araviter pipe aipo Caifás pahi eta rerecuar ivate catu vahe secoi.

<sup>14</sup> Caifás ité aipo ehi omboetasa upe: “Yandeu aviye catu itera que ñepe mbia omanose yande rese” ehi.

*Pedro, “Ndaicuai co mbia” ehi Jesús upe*

<sup>15</sup> Ore Pedro rese orosoño ité Jesús raquicuei. Che rumo pahi eta rerecuar rēta pipendar opa ité che cua yuvireco. Sese aiqueño ité Jesús raquicuei mborerecuar rētave vicho.

<sup>16</sup> Pedro rumo opitaño oquendipive ocarve. Che rumo pahi eta rerecuar che cua ité yuvireco. Evocoiyase asē, aporandu oquendipi rārosar uve Pedro reique āgua rese.

<sup>17</sup> Evocoiyase oquendipi rārosar oporandu Pedro upe:

—¿Ndahei vo nde avei co ava rupindar? —ehi chupe.

—Aní, ndahei che ahe —ehi oquendipi rārosar upe.

<sup>18</sup> Sōhisá iteanga ahe pītu pipe. Evocoiyase mborerecuar rembiguai iyavei sundao eta oyatapi yuvireco oyepehe āgua. Pedro avei aheve ipāhuve oyepehe tata ipive ohā.

*Pahi eta rerecuar ivate catu vahe oporandu Jesús upe secocuer rese*

<sup>19</sup> Pahi eta rerecuar ivate catu vahe, “¿Uma-uma vo nde remimbohe yuvirecoi iyavei mbahe rese vo erembohe?” ehi oporandu Jesús upe.

<sup>20</sup> Jesús rumo aipo ehi chupe:

—Che niha añehe opacatu rupi, opacatu ava eta rovaque avei. Esepia, aporomboheño ité niha ava ñemonuhasa rupi, tūparo guasu pipe avei. Indó, che nañemi eté añehe vaheerā.

<sup>21</sup> ¿Mahera vo evocoiyase cheu tēi ereporandu? Eporandu catu che ñehe rendusar upe. Ahe tomombehu che oyeupe ñehesa yuvireco ndeu. Ahe niha oicua che ñehe agüer yuvireco —ehi.

<sup>22</sup> Aipo ihese, ñepe mbia sundao osovapete aipo ehi chupe:

—¿Aipo ere rutei pahi rerecuar ivate catu vahe upe imboyeví? —ehi chupe.

<sup>23</sup> Evocoiyase omboyeví ahe mbia upe:

—Añehese mbahe tēi rese, emombehu che ñehe raisa; che rumo añehe tupri ité, ¿mahera vo evocoiyase che rovapete eve? —ehi.

<sup>24</sup> Evocoiyase Anás omondo pahi eta rerecuar ivate catu vahe Caifás upe ipocuasa reseve.

*Pedro, “Ndaicuai co mbia” ehi vite Jesús upe*

<sup>25</sup> Ahese Pedro oyepeheño vite ohā tata ipive. Aheve aipo ehi yuvireco chupe:

—¿Ndahei vo nde ité evocoi ava rupindar ereico? —ehi.

Pedro rumo,

—Aní, ndahei che ahe aico —ehiño.

<sup>26</sup> Ipare mbia pahi rerecuar ivate catu vahe rembiguai, inambi asiapri mu aipo ehi chupe:

—¡Aviye acoi nde ité oroepia vahe mbahe miti rēta pipe supi! —ehi chupe.

<sup>27</sup> Pedro rumo, “Aní, ndahei eté che” ehi iriño. Aipo iheseve, tacura oñehe.

*Jesús serasosa Pilato rovai*

<sup>28</sup> Evocoyase vıraso Jesús Caifás rēta sui Roma pendar mborerecuar guasu recosave yuvıreco. Cōhe potase ěgüe ehi. Judıo rumo ndoyuvıroiquei eté mborerecuar recosave oyemboangaipaēhi āgua. Esepia, ahe icuaita yuvıroiquese, ndiyai chietera Pascua resendar ovesa roho hu āgua yuvıreco chupe viña.

<sup>29</sup> Sese Pilato osē ava upe aipo ehi:

—¿Mbahe vo sembiapo naporai vahe? —ehi.

<sup>30</sup> Ahe omboyevi yuvıreco chupe:

—Seco catuprise, ndorogüeru chietera ndeu viña —ehi yuvıreco chupe.

<sup>31</sup> Evocoyase aipo ehi ava upe:

—Peraso, pe ae peyapo mbahe pēundar ité porocuita rupi sese —ehi.

Judıo rerecuar evocoyase omboyevi yuvıreco:

—Ore judıo oroico vahe upe rumo ndipotasai oroyuca vaherā que ava —ehi.

<sup>32</sup> ěgüe ehi Jesús ñehe imano āgua resendar yaviye.

<sup>33</sup> Ahese Pilato oi que iri oi pıpe, güeru uca Jesús oyeupe oporandu chupe:

—¿Nde ité vo judıo rerecuar ivate catu vahe ereico? —ehi.

<sup>34</sup> —¿Ndeyesui eté aipo ereporandu cheu, anise, oime tie que ambuae ava che mombehu vahe ndeu? —ehi Pilato upe.

<sup>35</sup> —¿Che ndahei eté judıo aico! Nde recua pendar ae niha pahi eta rerecuar nde reru yuvıreco cheu. ¿Mbahe vo evocoyase ereyapo? —ehi Pilato chupe.

<sup>36</sup> —Che mborerecuasa rumo ndahei co ivı pıpendar. Co ivı pıpendarse viña, che rupin-dareta ovavara che amotarēhimbar upe che repısave yuvıreco viña. Che mborerecuasa rumo ndahei eté coha pendar —ehi.

<sup>37</sup> Ahese Pilato aipo ehi chupe:

—Evocoyase nde mborerecuar guasu ité ereico —ehi.

—Nde niha aipo, “Mborerecuar guasu ereico” ere cheu. Aherā niha che aha co ivı pıpe mbahe supı eté vahe mombehu āgua. Opacatu ava vıroya vahe mbahe supı eté vahe, osenduño ité che ñehesa yuvıreco —ehi Pilato upe.

<sup>38</sup> Pilato rumo,

—¿Mbahe vo aipo supı eté vahe? —ehi chupe.

*“¿Tayaticasa!” ehi ava eta Jesús uve yuvıreco*

Aipo ohe pare, Pilato osē iri judıo eta upe oñehe aipo ehi:

—Che ndayosui eté co mbıa rese mbahe sembiavi.

<sup>39</sup> Pe rumo peicua amose ñepeı ava soquendaprı Pascua pieta pıpe yepı; ¿peıpota amose vaherā judıo rerecuar? —ehi.

<sup>40</sup> Aipo ihese, opacatu osapucaı pıratá yuvıreco aipo ehi:

—¿Evocoi anı! ¿Barrabás catu emose! —ehiño yuvıreco.

Barrabás rumo imonda rai vahe secoi.

**19**

<sup>1</sup> Evocoyase Pilato oporocuai Jesús nupa āgua.

<sup>2</sup> Sundao eta omonde ñaca rese yu pıaprı iyaveı omboyemonde turucuar pıraumbı vahe pıpe yuvıreco.

<sup>3</sup> İpare oyemboya sese aipo ehi:

—¿Imboeteıprı judıo Rerecuar tasecoı! —ehi angahu sovapete-pete yuvıreco.

<sup>4</sup> Pilato evocoyase osē iri ava upe aipo ehi:

—Pesepia, anose pēu pe icua āgua che ndayosui eté mbahe sembiavi —ehi.

<sup>5</sup> Evocoyase vınose yu pıaprı oāca rese turucuar pıraumbı vahe reseve senoha ava upe. Ahese Pilato aipo ehi:

—¿Ndo co aipo mbıa cute! —ehi.

<sup>6</sup> Osepiase pahi eta rerecuar, sundao rerecuar avei, omboipí osapucai:

—¡Tayaticasa! ¡Tayaticasa! —ehi pãve voi yuvireco chupe.

Pilato evocoyase aipo ehi ava upe:

—Peraso, peyatica pe ae. Esepia, che ndayosui eté mbahe sembiavi —ehi.

<sup>7</sup> Judío rerecuar rumo omboyeví yuvireco:

—Ore rumo orovireco mborocuaita. Ipípe omanoño itera. Esepia, oyeapo tēi Tūpa Rahir —ehi yuvireco.

<sup>8</sup> Aipo ñehesa renduse, Pilato oyembosiquiyé catu.

<sup>9</sup> Viroique iri oí pípe seraso. Aheve oporandu chupe:

—¿Que pendar ité vo nde ereico? —ehi.

Ahe rumo nomboyeví iri eté ñehe chupe.

<sup>10</sup> Evocoyase Pilato aipo ehi chupe:

—¡Mahera ndereñehi eté cheu! ¿Ndereicuai vo che mborerecuar aico nde atica uca ãgua, mbahe tēi sui nde renose ãgua avei? —ehi Pilato chupe.

<sup>11</sup> —¡Aní! Ndererecoi chietera nde mborerecuasa che harive Tūpa nombouise ndeu viña. Sese niha ava che mondosar ndeu oyemboangaipa catu nde sui yuvireco —ehi Pilato upe.

<sup>12</sup> Ahe ramoseve, Pilato osãha iri tēi Jesús renose ãgua; judío rerecuar rumo osapucai voíño yuvireco chupe:

—¡Acoi eremosese co mbia, ndahei chietera nde mborerecuar ivate catu vahe mboripar ereico! ¡Opacatu oyemomborerecua tēi vahe, ahe evocoyase mborerecuar ivate catu vahe amotarēhimbar tēi yuvirecoi! —ehiño yuvireco chupe.

<sup>13</sup> Evocoyase Pilato osenduse aipo ihesa, vinose uca Jesús ocarve, oguapí mborerecuar guasu renda harive. Ahe mbahe rese porandusa rer hebreo ñehe pípe Gabata ‘ita apopri’ oya.

<sup>14</sup> Mbiter ari Pascua pieta ãgua Pilato aipo ehi judío eta upe:

—¡Ndo co pe rerecuar cute! —ehi.

<sup>15</sup> Ahe rumo osapucai pĩratá aipo ehi yuvireco:

—¡Tomano! ¡Tomano ité! ¡Tayaticasa! —ehi yuvireco chupe.

Pilato rumo aipo ehi chupe:

—¿Evocoyase ayatica ucara pe rerecuar? —ehi.

Pahi eta rerecuar rumo omboyeví yuvireco chupe:

—¡Ore ndorovireco iri ambuae mborerecuar, Roma pendar mborerecuar ivate catu vahe güeraño ité orovireco! —ehi yuvireco.

<sup>16</sup> Ipape Pilato omondo sundao upe yatica uca ãgua. Ichui viraso yuvireco.

### *Jesús yaticasa curusu rese*

<sup>17</sup> Evocoyase Jesús vinose curusu seraso “Ava Ñcagüer” serer vahesave (ahe serer hebreo ñehe pípe Gólgota).

<sup>18</sup> Aheve oyatica yuvireco. Seseve avei oyatica ñuvirío ava yuvireco, ñepeipei yique ivi.

<sup>19</sup> Pilato oicuachía uca omondo curusu rese aipo ehi vahe: “Co Jesús, Nazaret pendar, judío Rerecuar guasu” ehi.

<sup>20</sup> Setá iteanga ava oyeroqui co icuachiapri rese yuvireco. Esepia, icuachiasa hebreo, latín iyavei griego ñehe pípe. Iyavei yaticasa namombriimi eté tecua sui.

<sup>21</sup> Sese pahi eta rerecuar aipo ehi Pilato upe yuvireco:

—Aní, ‘Judío Rerecuar guasu’ ere icuachía; iyacatu rumo, ‘Oyeapo pota tēi vahe judío Rerecuar guasu’ erera icuachía imoi —ehi yuvireco chupe.

<sup>22</sup> Pilato rumo omboyeví:

—Co aicuachía vahe, ñgüe ehiño itera oĩ —ehi.

<sup>23</sup> Jesús atica pare evocoi irungatu sundao, omonuha iturucuar oyeupe imboyaho ãgua yuvireco. Oipisí avei iturucuar ivri pendar nimbovívísai vahe, ñepeí reseve pucuño tẽi vahe.

<sup>24</sup> Sundao eta aipo ehi oyeupe yuvireco:

—Yamondoro eme; aviye catu yandeguayíño sese, ¿ava ité pĩha oipisira? —ehi yuvireco.

Ëgüe ehi icuachiapirer imboaviye yuvireco aipo ehi vahe: “Omboyaho-yaho ava che turucuar iyavei iguayí yuvireco sese” ehi vahe. Supi tupri ité ãgüe ehi sundao yuvireco.

<sup>25</sup> Curusu ivípive yuvirecoi ichi, ichi cupihir, María Cleofas rembireco, María Magdalena avei.

<sup>26</sup> Osepiase osi iyavei che repiase yípive, che güembiaisu, aipo ehi osi upe:

—Che si, evocoi nde membirã ererectora —ehi chupe.

<sup>27</sup> Ipare voi aipo ehi cheu:

—Evocoi nde si —ehi.

Ichuive tupri amoingue ichi che rêtave asãro vahe.

### *Jesús mano agüer*

<sup>28</sup> Ipare Jesús oicua ité Vu remimbotar yaviyepa iyavei icuachiapirer mboaviye ãgua aipo ehi:

—Che husei —ehi.

<sup>29</sup> Aheve oime mbahe riru. Ipipe savapipo vinagre oĩ. Co vinagre pipe omoaqui mbahe saviyu vahe yuvireco omondo ivira rese, osupi, imondo iyuruve yuvireco.

<sup>30</sup> Osupite pare aipo ehi:

—Opa yaviye cute —ehi.

Ipare voi ñaca iviso omano.

### *Sundao oñaruca cutu lanza pipe Jesús*

<sup>31</sup> Ñepeí arí Pascua pieta uve ipane vahe pipe aipo ãgüe ehi. Sese judío ndoipotai ava retecuer pita curusu rese mbituhusa arí pipe. Esepia, ahe mbituhusa arí imboeteipri guasu ité. Sese Pilato upe oporandu yuvireco ahe oyocuai vahe ñepeí sundao curusu rese yaticapri rêtima mope ãgua ‘tomanó’ oyapave curusu sui setecuer reroyipa ãgua yuvireco.

<sup>32</sup> Evocoyase sundao yuvirasopa ñuvirío mbia Jesús rese yaticasa vahe yuvireco. Ahe sêtima rane opa omope yuvireco.

<sup>33</sup> Oyemboyase rumo Jesús rese, “Omano ité” ehiño yuvireco chupe. Sese nomopeí sêtima yuvireco.

<sup>34</sup> Ñepeí sundao rumo oicutu yiqueve lanza pipe. Ahe ramoseve voi osẽ suví, i reseve.

<sup>35</sup> Che asepiya vahe ité; supi eté aipo ahe. Evocoyase amombehu pẽu pe seroya ãgua.

<sup>36</sup> Esepia, co mbahe ãgüe ehi icuachiapirer mboaviye ãgua aipo ehi vahe: “Ndimopesai chietera que ñepeí icangüer” ehi vahe aracahe.

<sup>37</sup> Iyavei ambuae icuachiapri aipo ehi: “Osepiara ava eta icutupri yuvireco” ehi.

### *Jesús yapocatusa ita hopri pipe*

<sup>38</sup> Ipare José, tecua Arimatea pendar, oporandu Pilato upe Jesús rehögüer reraso ãgua rese. José aipo Jesús rupindar. Ndoyecua ucai rumo omboetasa judío eta upe pahi rerecuar sui osiquiyepave. Pilato evocoyase, “Aviye, eraso” ehi chupe. Evocoyase José oso viraso sehögüer.

<sup>39</sup> Nicodemo avei oipitívii, acoi oso vahe Jesús upe pıtuse. Ahe güeru mbahe sñacua vahe mirra, áloe rese oyeseha vahe, treinta kilo, sehögüer rese nara.

<sup>40</sup> Ëgüe ehi José, Nicodemo reseve viraso sehögüer yuvireco iyavei oimama tupri turucuar secose vahe imoiacuapri pipe yuvireco. Ëgüe ehi judío oyapo ava omano vahe tĩ ãgua yuvireco yepi.

<sup>41</sup> Namombrii Jesús atícasa sui oime mbia remiti rēta. Aheve ité oime tuvipa ita hopri, ipiasu vahe iporupirēhi.

<sup>42</sup> Ipipe omoingue Jesús rehögüer yuvireco. Esepia, ahe tuvipa cōimi eté ichui iyavei virovi ité judío pituhusa ari.

## 20

### *Jesús cuerayevisa*

<sup>1</sup> Domingu pipe María Magdalena oso tuvipave pītu vitemiseve. Ahe osepia ita tuvipa rovapisa ndahe irise güendave ihāi.

<sup>2</sup> Evocoyase ahe cuña oña oso Simón Pedro upe, cheu avei aipo ehi:

—¡Viraso tuvipa sui yande Yar yuvireco! ¡Ndoroicuai que vo catu omondo yuvireco! —ehi.

<sup>3</sup> Evocoyase Pedro rese oroña oroso tuvipave.

<sup>4</sup> Che rumo aña catu Pedro sui. Che rane evocoyase ayepota tuvipave.

<sup>5</sup> Aiviro tēi, turucuar güeraño rumo asepia aheve. Ndaiquei rumo ipipe.

<sup>6</sup> Ipare Pedro oyepota che raquicuei, oique voi tuvipa pipe. Ahe avei osepia turucuar imama agüer tēi.

<sup>7</sup> Iyavei osepia turucuar ñaca mamasa. Ndahei eté setecuer mamasa rese tui; ahe rumo co coti ité ipoquesa tupri ou.

<sup>8</sup> Evocoyase che avei aique; asepia ēgüe ehi vahe. Ahese aroya voi eté.

<sup>9</sup> Ore rumo ndorosenducua vitei eté icuachiapri: “Ocuerayevira omano vahe pāhu sui” ehi vahe.

<sup>10</sup> Ipare oroyevipa oroso ore rētave.

### *Jesús oyemboyecua María Magdalena upe*

<sup>11</sup> María rumo, ore raquicuei ou vahe, opitaño ité tuvipa ipive, oyaseho. Oyasehoseve oiviro iri tuvipa pipe,

<sup>12</sup> ahese osepia ñuvirío Tūpa rembiguai iturucuar morochí vahe oguapi yuvinoi sehögüer rupagüerve. Ñepi oguapi oñ ñaca rupagüer coti, ambuae ipi rupagüer coti.

<sup>13</sup> Ahe Tūpa rembiguai oporandu yuvireco chupe:

—Cuña, ¿mahera vo ereyaseho? —ehi.

Ahe aipo ehi:

—Esepia, che Yar rehögüer viraso yuvireco iyavei ndaicuai que vo catu omondo yuvireco —ehi.

<sup>14</sup> Aipo oheseve, oyemboyere, osepia Jesús aheve secoise; “Jesús co secoi” ndehi eté rumo chupe.

<sup>15</sup> Evocoyase oporandu María upe:

—Cuña, ¿mahera vo ereyaseho? ¿Ava vo ereseca? —ehi chupe.

Ahe omoha ‘co mbahe miti rēta rārosar revo’ oya viña, aipo ehi chupe:

—Nde ererasose sehögüer, emombehuñomi tēi cheu que vo eremondo. Aheve taso seca —ehi chupe.

<sup>16</sup> Evocoyase,

—¡María! —ehi chupe.

Ahe aipo hese, oyemboyere, aipo ehi hebreo ñehe pipe chupe:

—¡Rabuni! —ehi (‘Porombohesar’ ohesave).

<sup>17</sup> Evocoyase María upe,

—Erepocoi rene che rese. Esepia, ndayeupi vitei che Ru recosave. Esoño, emombehu che reroyasar upe: “Jesús oyeupira Vu Tūpa recosave” erera chupe. Che Ru, pe Ru avei; che Tūpa, pe Tūpa avei —ehi.

<sup>18</sup> Evocoyase María Magdalena ou imombehu: “Asepia yande Yar” ehi iyavei opa omombehu mbahe semimombehu oreu.



*Jesús oyemboyecua güemimbohe upe*

<sup>19</sup> Ahe arí pipeve, domingu pipe, pĩtuse, ore ore ñemonuhasave oroyeoquenda tupri judío rerecuareta sui ore siquiyepave. Ahese Jesús oi que ore pãhuve. Ore mboavirave.

—¡Peico tupri! —ehi oreu.

<sup>20</sup> Aipo ohe pare, omboyecua opo, oi que avei oreu. Ahese orerorivete yande Yar repiase oroico.

<sup>21</sup> Ipare aipo ehi iri:

—¡Peico tupri! Inungar che Ru che mbou, ãgüe ahe aveira co che pëu —ehi oreu.

<sup>22</sup> Ichui ore peyu:

—Peipisi Espiritu Santo —ehi—.

<sup>23</sup> Peñeroise que ava upe, ahese ahe oipisira ñeroisa; napeñeroise rumo que ava upe, ahe evocoyase ndoipisii chira ñeroisa —ehi oreu.

*Tomás osepia yande Yar icuerayevise*

<sup>24</sup> Ñepeí ore mboetasa rumo Tomás icõi vahe, ndipoi eté ore pãhuve Jesús oyemboyecua oreu.

<sup>25</sup> Ipare ore aipo orohe chupe:

—Orosepia yande Yar —orohe.

Tomás rumo aipo ehi:

—¡Too! Acoi asepiase voi eté quiravo cuarer ipo rese iyavei amoinguese che cuã quiravo cuarer pipe iyavei amoinguese che po yique cutu agüerve, ahese ramo aroyara —ehiño oreu.

<sup>26</sup> Ocho arí pare, ore oroñemonuha iri oi pipe oroico. Aheve ramo Tomás secoi ore pãhuve. Yepe oroyeoquenda tupri ité viña, Jesús rumo oi queño ité ou ore pãhuve, ore mboavirave aipo ehi:

—¡Peico tupri! —ehi oreu.

<sup>27</sup> Ipare aipo ehi Tomás upe:

—Esepia che po, emoingue nde cuã quiravo cuarerve; embou ave nde po, emoingue avei che ique cutu agüerve. “Tachequerëhi eme seroya ãgua” nderei chira cheu; ¡che reroya eve! —ehi.

<sup>28</sup> Evocoyase Tomás aipo ehi:

—¡Che Yar Tũpa! —ehi chupe.

<sup>29</sup> Ahese aipo ehi Tomás upe:

—¿Cũritei che reroya che repiase eve cute? ¡Aviye catu ava che repiaëhi pipe che reroya vahe! —ehi chupe.

*Co icuachiapri Jesús reroya ãgua*

<sup>30</sup> Jesús oyapo setá ambuae poromondiisa ore rovaque. Ahe rumo ndaicuachiai co cuachiar pipe.

<sup>31</sup> Co rumo aicuachía ‘toviroya Jesús, Poropĩsirosar, Tũpa Rahir secosa; ipipe tovireco tecovesa yuvireco’ che yapave.

**21***Jesús oyemboyecua siete güemimbohe upe*

<sup>1</sup> Ore sore ivi Galilea ve, Jesús oyemboyecua iri oreu ipa Tiberia ve.

<sup>2</sup> Ahese oyeseve Simón Pedro yuvirecoi, Tomás ahe acoi icõi vahe, Natanael, ahe aipo tecua Caná pendar ivi Galilea rese, ñuvirío ore Zebedeo rahir oroico vahe iyavei ambuae ñuvirío Jesús remimbohe.

<sup>3</sup> Simón Pedro aipo ehi:

—Asora pira mboha —ehi.

Ore avei aipo orohe:

—Toroso nde rupi —orohe chupe.

Orosoño, orohe carite pipe. Ahe pĩtu pipe rumo ndorombohai eté pira.

<sup>4</sup> Cõhe potase rumo, Jesús oyemboyecua imbehĩ ivĩ. Ore rumo ndoroicuai eté Jesús secose.

<sup>5</sup> Evocoyase aipo ehi oreu:

—Mbĩa chĩhivahe, ¿ndapembohaimi eté pira? —ehi.

—Aní eté —orohe chupe.

<sup>6</sup> Evocoyase aipo ehi:

—Pemondo pira mbohasa ive pe asu cotĩ. Ahese pembohara —ehi.

Ëgũe orohe, ipare voi, “¡Too!” orohe, ndorovĩnose catui eté ipĩ sui pira mbohasa oroico. Esepia, savapĩpo tuprĩ ité pira ipĩpe.

<sup>7</sup> Evocoyase che, sembiaĩsu, aipo ahe Pedro upe:

—¡Yande Yar niha evocoi! —ahe.

Pedro che ñehe rendu ramoseve voi, omonde oturucuar. Esepia, yipĩndar nani secoi; opo ive oso chupe.

<sup>8</sup> Ore evocoyase orovĩroyepota ité carite ndatĩpĩmisave, oroichoho pira rehii imbohasa pipe seraso, cien metro tẽi oroico imbehĩ sui.

<sup>9</sup> Orovĩnose ivĩ ãtasave, orosepia tãtapĩ harive pira, pan reseve.

<sup>10</sup> —Peru moviro evocoi pira penose ramo vahe —ehi oreu.

<sup>11</sup> Evocoyase Simón Pedro oha carite pipe, oichoho ndatĩpĩsave pira guasu rehii imbohasa pipe, ciento cincuenta y tres tuprĩ; yepe setá viña, imbohasa rumo ndosoroĩ eté.

<sup>12</sup> Evocoyase aipo ehi:

—Perio, tapecarumi rane —ehi oreu.

Ndipoi eté que ñepeĩ ore pãhuve “¿ava vo nde ereico?” ehi vahe chupe. Esepia, oroicuaño ité yande Yar secose.

<sup>13</sup> Chupe ore sore, oipĩsi pan, ombou oreu, ãgũe ehi avei pira imbou oreu.

<sup>14</sup> Co rese Jesús oyemboyecua mbosapĩ rupi oreu ocuerayevire.

### *Jesús osecõha Pedro*

<sup>15</sup> Ore caru pare, Jesús oporandu Simón Pedro upe:

—Simón, Juan rahĩ, ¿che raisu catu ité eve co mbahe sui? —ehi.

—Taa, che Yar, ereicua niha che nde raisusa —ehi Pedro chupe.

—Ndehañeco tuprĩ ru catu che reroya ramomi vahe rese yuvireco —ehi.

<sup>16</sup> Imoñuvĩriosa rupi oporandu iri chupe:

—Simón, Juan rahĩ, ¿che raisu catu ité eve? —ehi.

—Taa, che Yar, nde ereicua che nde raisusa —ehi Pedro chupe.

—Evocoyase esãro tuprĩ che reroyasar yuvireco —ehi.

<sup>17</sup> Imombosapĩsa rupi oporandu iri chupe:

—Simón, Juan rahĩ, ¿che raisu vo eve? —ehi.

Aipo oyeupe hese, Pedro ndoyembovĩhai eté aipo ehi:

—Che Yar, nde niha opacatu ereicua, nde avei ereicua che nde raisusa —ehi.

—Evocoyase ndehañeco tuprĩ catu che reroyasar rese —ehi—.

<sup>18</sup> Supi eté aipo ahe ndeu: nde chĩhivahe catu vĩtese, ereyemonde vite nde ae, ereguata vite avei nde remimbotar rupi; nde cuacua catuse rumo, ereyeyivamoatara, ambuae evocoyase nde mboyemondera, nde reraso aveira nde so potaẽhisave —ehi.

<sup>19</sup> Jesús rumo omboyecua aipo ohe pipe mara ehira Pedro omano Tũpa mboeteisave curi. Ipare,

—¡Erio che rupi! —ehi Pedro upe.

### *Jesús remimbohe saĩsuprĩ*

<sup>20</sup> Che Jesús rembiaisú ité aico, che ité acoi carusa ipa vaheve yípive añ acoi aporandu chupe: “Che Yar, ¿ava vo nde mondora nde amotarẽhimbar upe?” ahe acoi chupe. Aguatase Pedro raquicuei, oyemboyere che repia.

<sup>21</sup> Ahese oporandu chupe:

—Che Yar, evocoi no, ¿mbahe oimera chupe? —ehi cheu.

<sup>22</sup> Evocoyase omboyeví Pedro upe:

—Che aipotase secove vîte ãgua che yevise nara, ¿mara vo nde ererecora viña? Nde catu, eguataño che rupi —ehi.

<sup>23</sup> Sese ambuae Jesús reroyasar ipihañemoñeta tẽi aipo che namanoi chivaherã ité yuvireco viña. Jesús rumo ndahei ‘nomanoi chietera’ ohesave aipo ehi cheu; ahe rumo, “Aipotase secove vîte ãgua che yevise nara, ¿mara vo nde ererecora viña?” ehi.

<sup>24</sup> Che ité amombehu co mbahe, che avei aicuachía iyavei yaicua supi tupri vahe ité che remimombehu.

<sup>25</sup> Oime avei ambuae mbahe setá Jesús rembiapo, que opacatú icuachiasase viña, ndiyai chietera revo ivi viña. Aipo rupive.

## APOSTOL REMBIAPO LOS HECHOS

### *Tūpa omboura Espíritu Santo viroyasar upe*

<sup>1</sup> Imboeteipri Teófilo, cuese amondo evocoi che rembicuachía Jesús recocuer resendar ndeu. Opa yipindar sembiapocuer amombehu ndeu iyavei yipisui iporombohe agüer.

<sup>2</sup> Ocuerayevire, ivave oso renondeve, Jesús omombehu oporocuita Espíritu Santo pĩratasa pipe güembiporavo apóstol upe sembiaporã.

<sup>3</sup> Oyemboyecua güembiporavo upe omanore. Setá rupi omboyecua tupri ocuerayevisa chupe. Semimbohe osepia yuvireco imanore cuarenta ari rupi. Ahese omombehu Tūpa mborerecuasa resendar güemimbohe upe.

<sup>4-5</sup> Oicove vitesse yuvireco sese, aipo ehi chupe:

—Pesēi rene Jerusalén sui. Tomboaviye rane che Ru Tūpa güemimombehu, ahe acoi amombehu pēu. Juan niha pe āpiramo i pipe tēi; Tūpa rumo Espíritu Santo pipe pe āpiramora. Movíromi tēi ari ipane vite imondo āgua pēu —ehi güemimbohe upe.

### *Jesús oso ivave*

<sup>6</sup> Oñemonuhase apóstol yuvireco sese, oporandu yuvireco chupe:

—Ore Yar, ¿erembou irira vo cūritei Israel iguar upe pĩratasa iyeyecuai āgua? —ehi semimbohe yuvireco chupe.

<sup>7</sup> Ahe rumo aipo ehi chupe:

—Ndiyai ahe ari cua āgua pēu. Esepia, Tūpa año ité vireco omborerecuasa ahe mbahe apo āgua.

<sup>8</sup> Peipisira rumo Tūpa pĩratasa oiquese Espíritu Santo pe piha pipe. Ahese pemombehu tupri che recocuer Jerusalén pendar upe, Judea pendar, Samaria pendar iyavei opacatu co ivi pipendar upe avei no —ehi chupe.

<sup>9</sup> Aipo ihe pare, omahe apóstol yuvireco sese, aheseve Tūpa vıraso ivave. Ichui Jesús oique iva quiha pãhuve. Evocoyase ndosepia iri eté yuvireco cute.

<sup>10</sup> Omahe vitesseve yuvinoha ivave ichosa rese, aviyeteramo tēi ñuvirío mbia, iturucuar morochí vahe, oyemboyecua apóstol ipive yuvinoha

<sup>11</sup> aipo ehi yuvireco chupe:

—Galilea iguar, ¿mahera vo pemahe vite iva rese pehã? Evocoi Jesús, inungar Tūpa vıraso ivave pe sui, ēgüe ehi aveira niha ogüeyi ou co ivi pipe coiye —ehi yuvireco chupe.

### *Jesús remimbohe oiporavo Matías, Judas recuñara yuvireco*

<sup>12</sup> Evocoyase apóstol oyevi yuvıraso Jerusalén ve ivitri Olivo sui, ahe ihamombrigüer ñepeí kilómetro tēi. Supivemi imombehusa judío guata āgua mbıtuhusa ari pipe yepi.

<sup>13</sup> Yuvıroiquese Jerusalén ve, oyeupipa oquesa oi ivateve yuvireco. Aheve Pedro, Juan, Santiago, Andrés, Felipe, Tomás, Bartolomé, Mateo, Santiago ahe Alfeo rahır, Simón ahe Zelote iyavei Judas, Santiago rahır yuvirecoi.

<sup>14</sup> Co opacatu ari yacatu rupi oñemonuha oyoya guasu oyeroqui āgua yuvireco yepi Jesús rivri, ichi, ambuae cuña reseve avei.

<sup>15</sup> Evocoyase ñepeí ari pipe oñemonuha guasu ciento veinte ava yuvireco. Ipãhuve Pedro opūha aipo ehi ava upe:

<sup>16</sup> “Che mu eta Jesucristo reroyasar, iya ité co imboaviyesa Tūpa Ñehengagüer Judas recocuer resendar. Ahe imombehupri David upe Espíritu Santo pipe aracahe. Evocoi Judas vıraso vahe Jesús amotarēhimbar ipisi uca āgua.

<sup>17</sup> Ahe acoi secoi yande pãhuve co mboraviquisa rese yande pıtivii āgua avei viña.

18 Evocoi güembiapo ai reprü pipe omboepi ivi. Ipare ñaca iviso oviapi oso ivive, oyetiapiipa.

19 Opacatu ava Jerusalén pendar oicua Judas recocuer yuvireco. Sese co ivi upe, ‘Acéldama’ ehi yuvireco oñehe pipe ‘Ivi Tuvi resendar’ oyapave.

20 Esepia, icuachiapri Salmo pipe aipo ehi:

‘Taseyasa sêta yuvireco.

Tipo iri eme ava ipipe’ ehi.

Iyavei ambuae aipo ehi:

‘Toime ambuae secoyar iporaviqui rãgüer pisi ãgua’ ehi vahe.

21 “Evocoyase cohava oime ava yande Yar Jesús secoi vïtese yande pãhuve

22 ñapiramosa suive yuvirecoiño vahe ité yande rupi iyavei ivave ichosa osepia vahe avei yuvireco. Ahe tiporavosa ñepei ipãhu pendar yande rupi icuerayevi agüer mombehu ãgua” ehi omboetasa upe.

23 Evocoyase oiporavo ñuvirío mbia yuvireco: ahe José Barsabás, serosa Justo; ambuae rer Matías.

24 Ipare oyerogui yuvireco aipo ehi: “Nde, ore Yar, opacatu ava pïha ereicua. Emboye-cua cohava nde rembiporavo oreu; ¿uma vo ereipota

25 eremondo vaherã icuaitarã apóstol seco ãgua Judas recuñara? Ahe oangaipa pipe oyemocañi uca tēi vahe oico” ehi Tūpa upe yuvireco.

26 Evocoyase osãha iporavo yuvireco. Matías ité vinose iporavopri sui yuvireco. Ichui tupri ité oique once apóstol pãhuve.

## 2

### *Espíritu Santo güeyi agüer*

1 Oyepotase Pentecostés pieta, opacatu Jesús reroyasar oñemonuha oi guasu pipe yuvireco.

2 Aheve oi pipe aviyeteramo tēi ivitu ipĩrata vahe nungar siapu guasu ou iva sui. Ahe siapugüer oyendupa tupri oi pipe.

3 Ahese oyecua tata rendigüer nungar opacatu aheve yuvirecoi vahe harive.

4 Ahese avei Tūpa omoingue evocoi ava pïha pipe oEspíritu Santo. Ichui ahe Espiritu omoñehe uca ambuae ñehesa pipe yuvireco.

5 Ahe ari pipe setá iteanga judío yuvirecoi Jerusalén ve omboaviye vahe ocuaita Tūpa mboeteisa, ahe oñemonuha vahe opacatu ivi rupindar yuvireco.

6 Mbahe siapu guasu vahe renduse, oñemonuha ati tēi yuvireco oyese. Ndoyemboaracuai tēi yuvireco ambuae ava oñehe pipe ñehese.

7 “¡Too!” ehi tēi oyepihamondiisa pipe yuvireco. Sese aipo ehi oyeupe:

—¿Ndahei vo acoi co ava Galilea iguar oñehe vahe yuvireco?

8 ¿Mahera pïha co ñepei-peï oñehe yande ñehe pipe yuvireco? —ehi tēi oyeupe yuvireco—.

9 Esepia, cohava yuvirecoi vahe: Partias pendar, Media pendar, Élam pendar, Mesopotamia pendar, Judea pendar, Capadocia pendar, Ponto pendar, Asia pendar,

10 Frigia pendar, Panfilia pendar, Egipto pendar, Libia cotindar, ahe Cirene cõquivotindar. Iyavei Roma pendar,

11 judío yuvirecoi vahe, ambuae judío aracuasa reroyasar avei, Creta pendar, Arabia pendar. ¡Yande yasendu opacatu yandeu iñehe yuvireco yande ñehe pipe Tūpa rembiapo icatupri vahe! —ehi.

12 Opacatu oyepihamondi, ndoicuai opihañemoñeta ãgua yuvireco.

—¿Mara ehi pïha co na oya yuvireco? —ehi-ehi tēi yuvireco oyeupe.

13 Ambuae ava rumo seroïrosa pipe aipo ehiño yuvireco:

—¡Osavaipo mo evocoi yuvireco! —ehi.

### *Pedro oñehe ava upe*

<sup>14</sup> Evocoyase Pedro opũha opacatu once vahe apóstol pãhuve, oñehe pĩrata aipo ehi: “Che mu judío eta, opacatu Jerusalén pendar avei, peicua co mbahe amombehu vaheerã pẽu; peyapısaca tupri che ñehe rese:

<sup>15</sup> ndosavaipoi moco co mbĩa yuvireco. ¿Ndapeseipai vo añihivei vite cũritei?

<sup>16</sup> Co niha Tũpa ñehe mombehusar Joel oicuachĩa vahe aracahe:

<sup>17</sup> ‘Tũpa aipo ehi:

Coiye, ari cañi renonde, amondora che Espĩritu Santo opacatu ava upe.

Ipĩratasa pipe pe rahĩ, pe rayri oñehera yuvireco.

Mbĩa chĩhivahe osepiara oquer pendar nungar mbahe yuvireco.

Oime aveira queraisa supĩ eté vahe cuacua vahe upe.

<sup>18</sup> Supĩ eté ahe ari pipe amondora che Espĩritu che rembiguai cuimbahe upe, che rembiguai cuña upe avei.

Ipare oñehera yuvireco che rese ipĩratasa pipe.

<sup>19</sup> Amboyecuarã poromondiisa iva rese.

Ëgũe ahe aveira poromondiisa mboyecua ivi pipe:

tuvi, tata iyavei tãtachi.

<sup>20</sup> Yande Yar ari tuvichã vahe imboeteipri renonde ohara pĩtu, yasi oyeapora tuvi nungar.

<sup>21</sup> Opacatu ava, che Yar che pĩtivĩ eve, ehi vahe, ahe oñepisirora yuvireco’ ehi Joel icuachĩa aracahe.

<sup>22</sup> “Pe Israel suindar, pesendu che ñehe: Jesús, Nazaret pendar, oyapo poromondiisa tuvichã vahe, mbahe yavai vahe Tũpa pĩratasa pipe pe pãhuve güeco maranehi mboyecua ãgua. Ahe niha peicua opacatu.

<sup>23</sup> Ipare rumo evocoi Jesús imondosa pẽu yuca ãgua. Ahe rumo Tũpa remimbotar rupi. Esepia, yipive ité Tũpa oicua pe peipisira yuca uca ãgua curusu rese ava naporai vahe upe.

<sup>24</sup> Tũpa rumo ombogüerayevi manosa sui. Esepia, manosa ndoicatui sereco ãgua.

<sup>25</sup> Supĩ eté mborereciar guasu David oñehe Jesús recocuer rese aracahe aipo ehi: ‘Che aicua che Yar che rese secoi che acato coti mbahe tẽi pipe che viapiẽhi ãgua yepi.

<sup>26</sup> Sese avihãño ité vichico, asapucai avei che rorivetesa pipe.

Iyavei che yeroya tuprisave asãrora mbahe aviye vahe che recove iri ãgua.

<sup>27</sup> Esepia, nde ndereseyai chira che hã omano vahe pãhuve, nderemonduyu ucai chiaveira nde rembiguai seco maranehi vahe retecuer.

<sup>28</sup> Co tecovesa ereicua uca cheu.

Che mbovihara eve nde rese che recose’ ehi David aracahe.

<sup>29</sup> “Che mu eta, supĩ eté yande ramoi David omano, ñotisa ita hopri pipe aracahe. Ahe suvipa ouve vite cohava yande pãhuve.

<sup>30</sup> David rumo Tũpa ñehe mombehusar, oicua Tũpa oyeupe aipo ehi vahe: ‘Supĩ eté aipo ahe ndeu: nde suindar oimera mborereciar guasu nde recuñara’ ehi vahe.

<sup>31</sup> Ahe ndoyavĩ osepiã vahe ité Poropisĩrosar cuerayevisa. Evocoyase aipo ehi oñehe sese: ‘Ihã ndopitai chira omano vahe pãhuve iyavei setecuer ndituyui chira’ ehi aracahe.

<sup>32</sup> Evocoi Jesús, Tũpa remimbogüerayevi secoi. Ahe imombehusar opacatu ore oroico.

<sup>33</sup> Ipare Tũpa viraso oacato coti imboguapi. Ahe oipisi imombepri Espĩritu Santo Vu sui. Evocoyase ahe opa omondo co ava yuvirecoi vahe upe. Ahe pesepia, pesendu avei cũritei peico.

<sup>34</sup> Esepia, evocoi oso vahe ivave ndahei David. Ahe ae rumo aipo ehi aracahe:

‘Yar aipo ehi che Yar upe:

Eguapi cohava che acato coti che piri.

<sup>35</sup> Asecopipa uca ranera nde amotarẽhimbar ndeu, ehi Yar che Yar upe’ ehi David aracahe.

<sup>36</sup> “Pe tapecuasapa, ticuasapa avei opacatu Israel recua rupi, supi eté evocoi Jesús curusu rese peyatica vahecuer, ahe Tūpa omoingo opacatu yande Yarã iyavei yande pĩsĩro ãgua” ehi Pedro ava rehĩi upe.

<sup>37</sup> Aipo renduse, tasĩ iteanga ipĩha pĩpe yuvireco. Evocoyase oporandu chupe, ambuae imboetasa upe avei yuvireco:

—Ore mu, ¿mbahe vo oroyapora evocoyase? —ehi.

<sup>38</sup> Evocoyase aipo ehi ahe ava upe:

—Pemboasi pe angaipa; peyevi Tūpa upe. Iyavei peñeapiramo opacatu Jesucristo rer pĩpe. Evocoyase Tūpa iñerora pe angaipa rese. Iyavei omondora Espĩritu Santo pẽu.

<sup>39</sup> Esepia, co ñehesa imombehupri, ahe pẽu nara, pe suindar upe nara iyavei opacatu amombri Tūpa sui yuvirecoi vahe upe nara avei, ahe acoi opacatu yande Yar Tūpa oyeupe nara güeru pota vahe —ehi.

<sup>40</sup> Ēgũe ehi oñehe vite ava mboaracua aipo ehi:

—¡Peyepipi co ava secocuer co coti tẽi vahe sui! —ehi chupe.

<sup>41</sup> Acoi ava viroya vahe co ñehesa, oñeapiramo uca yuvireco. Ahe ari pĩpe oyemboeta iri tres mil ava yuvireco Jesús viroya vahe rese.

<sup>42</sup> Opacatu viroya tupri ité apóstol porombohesa. Opacatu guasu avei oyeaisu tupri yuvireco, oyerogui iyavei oñemonuha oyeupe pan mboyaho-yaho ãgua yuvireco yepi.

### *Yipindar vahe Jesús reroyasar recocuer*

<sup>43</sup> Opacatu oyembosiquiye imboeteisa pĩpe yuvireco. Esepia, apóstol oyapo setá poromondiisa ‘toicua Tūpa suindar yande porombohesa yuvireco’ oyapave.

<sup>44</sup> Opacatu Jesús reroyasar ipiñañemoñeta tupri ité ombahe rese yuvireco güecocuer upe nara.

<sup>45</sup> Omondo ambuae ava upe oivi iyavei ombahe eta yuvireco. Sepri omondo oyeupe mbahe panesa rupi-rupi.

<sup>46</sup> Ari yacatu rupi judío tũparove oñemonuha yuvireco. Iyavei oi yacatu rupi avei oñemonuha oyoya guasu pan mboyaho ãgua. Ipare oyoya guasu ocaru yuvireco oyembovĩhasa pĩpe, opiñañemoñeta tupriisa pĩpe avei.

<sup>47</sup> Osapucaĩ yuvireco Tūpa upe yepi iyavei opacatu ava osaisu Jesús reroyasar yuvireco. Yande Yar evocoyase ari rupi omboeta catu ava iñepisĩro ãgua Jesucristo viroya vahe pãhuve.

## 3

### *Ndoguatai vahe cuerasa*

<sup>1</sup> Ñepeĩ ari aipo, caharuse las tres pĩpe, Pedro, Juan reseve oyoya yuviraso judío tũparove. Ahe hora pĩpe judío oyerogui yuvireco yepi.

<sup>2</sup> Ahe tũparo roquendipi rer Porañete. Aheve ari yacatu rupi viraso ñepeĩ ava oyesu suive ndoguatai vahe ‘tomondo guarepochi ava tũparove yuviroique vahe yuvireco chupe’ oyapave.

<sup>3</sup> Ahe ndoguatai vahe omahe Pedro, Juan rese tũparove seique potase, oporandu guarepochi rese chupe.

<sup>4</sup> Pedro, Juan avei rumo omahengatu yuvireco sese. Pedro aipo ehi chupe:

—Emahe ore rese —ehi.

<sup>5</sup> Evocoyase ahe mbia omahengatu sese ‘omboura revo que mbahe cheu’ oya viña.

<sup>6</sup> Aipo ehi rumo ndoguatai vahe upe:

—Che ndarecoi guarepochi, oro avei. Co areco vahe rumo amondora ndeu: Jesucristo, Nazaret pendar, rer pĩpe epũha, eguata —ehi chupe.

<sup>7</sup> Evocoyase oipisi ipo yasu cotindar imopuha. Ahe ramoseve opa tupri ipi, ipiñuha avei ovĩracua.

<sup>8</sup> Evocoiyase opũha, opo, oguata; oi que oso tũparove supi. Opo-opo vorivetesave iyavei osapucaí Tũpa upe.

<sup>9</sup> Opacatu ava osepia yuvireco iguatase iyavei Tũpa upe isapucaise.

<sup>10</sup> Omahecuase sese, “¡Too!” ehi tẽi yuvireco. Iyavei ndoyembovĩhai aviyeteramo tẽi icuerase yuvireco. Esepia, evocoi ava oicuapa tũparo roquendipi Porañete serer vahesave chinise mbahe rese iporanduse yuvireco yepi.

*Pedro oñehe ava rehii upe tũparo Corero Salomón serer vahevrive*

<sup>11</sup> Ndoguatai vahecuer ndoyepipi potai Pedro, Juan sui. Yuvinoña ati, oyepihamondii ava sepia tũparo Corero Salomón serer vaheve yuvirecoise.

<sup>12</sup> Pedro evocoiyase aipo ehi ava upe: “Che mu, ¿mahera vo peyemondii? ¿Mahera vo ore repia ati peye? Ndoyavii co ore pĩratasa pipe tẽi iyavei Tũpa rese ore pihañemoñeta tupriisa pipe tẽi orombogũera vahe co mbia pẽu viña.

<sup>13</sup> Tũpa, ahe acoi Abraham, Isaac iyavei Jacob viroya yuvireco aracahe iyavei opacatu yande ramoi eta avei no, ahe niha omondo güeco pĩratasa tuvicha catu vahe Guahir Jesús upe. Pe rumo acoi pemondoño mborerecuar Pilato povrive. Acoi omose potase, pe evocoiyase ndapeipotaiño imose ãgua chupe.

<sup>14</sup> Ahe seco maranehi vahe, seco ïvi vahe renose rãgüer pipe, peporandu: ‘Tosẽ oporapichi vahe’ peye.

<sup>15</sup> Ëgüe peye acoi tecovesa ombou vahe yuca. Tũpa rumo ombogüerayevi omano vahe pãhu sui. Ahe niha ore oromombehu oroico pẽu.

<sup>16</sup> Co Jesús rer rese yeroya pipe ité niha oipisi pĩratasa co mbia ndoguatai vahecuer opacatu pe pesepia vahe iyavei peicua vahe. Jesús rese yeroyasa pipe ité niha co pe rembiepiave ocuera tupri” ehi ava upe.

<sup>17</sup> “Che mu eta, che aicua acoi pe peipĩtĩvi vahe pe rerecuar Jesús yuca uca ãgua pe icua tupriẽhi pipe cuese.

<sup>18</sup> Ëgüe ehi Tũpa imboaviye arachendar opacatu oñehe mombehusar upe güemimombhugüer: ‘Che Rembiporavo Poropĩsirosar oiporarara mbahe-mbahe tẽi rasicuer omano’ ehi vahe.

<sup>19</sup> Sese pemboasi pe angaipa; peyevi Tũpa upe. Ipipe sui tomocañi pe angaipa pe sui. Aviyeteramo co sui omboura yande Yar pe reco morohisa ãgua,

<sup>20</sup> ombou aveira Jesús, ahe yipisuipe iporavopri pe pĩsiro ãgua.

<sup>21</sup> Cũritei rumo Jesucristo ivave vite secoi acoi Tũpa opase voi omoingatu opacatu mbahe iyevi ãgua. Aipo ehi acoi imoñehe uca arachendar oñehe mombehusar ndaseco marai vahe.

<sup>22</sup> Moisés yande ramoi yuvirecoi vahe upe aipo ehi imombehu aracahe: ‘Yande Yar Tũpa omopuhara ñepei oñehe mombehusar pe pãhuve che nungar. Ahe iñehe pesendura, pemboyeroa catu aveira.

<sup>23</sup> Opacatu ndoviroyai vahe iñehe Tũpa omocañira güembiporavo pãhu sui’ ehi.

<sup>24</sup> “Ëgüe ehi opacatu Tũpa ñehe mombehusar Samuel suive aracahe omombehu avei co ari cũritei yasepia vahe yuvireco.

<sup>25</sup> Pẽu nara niha Tũpa ñehe mombehusar remimombhugüer arachendar. Pẽu nara avei acoi Tũpa omombehu vahe güemimbotar yande ramoi eta upe. Esepia, aipo ehi Abraham upe aracahe: ‘Opacatu ava co ivi pipendar ahe sovasapri yuvirecoira nde suindar sui’ ehi.

<sup>26</sup> Acoi Tũpa Guahir ombogüerayevise, pẽu rane ombou pe rovasa ãgua ‘toseyapa ñepei-pei güecocueraí yuvireco’ oya” ehi Pedro ava rehii upe.

## 4

*Pedro, Juan serasosa mborerecuar rovai*



1-2 Pedro, Juan reseve oñehe viteseve ava rehii upe, ahese oñemoirosa pipe pahi eta, tũparo rãrosar sundao rerecuar, saduceo avei oyugũeru yuvireco chupe. Esepia, Pedro iyavei Juan ombohe ava yuvireco aipo ehi: “Jesús ocuerayevi; sese oime cuerayevisa omano vahe pãhu sui” ehi.

3 Ichui oipisi seraso soquenda yuvireco ‘ayihive voi yanosera mbahe rese porandu ãgua’ ohesa pipe. Esepia, caharuse tẽi osoquenda yuvireco.

4 Setá rumo ava ñehesa osendu vahe viroya yuvireco. Ahe cuimbahe seroyasar retacuer güeraño seni cinco mil.

5 Ahere ayihive mborerecuareta oñemonuha yuvireco Jerusalén ve: judío rerecuar, pahi eta rerecuar, Moisés porocuita rese oporombohe vahe,

6 pahi rerecuar ivate catu vahe Anás, Caifás, Juan, Alejandro, opacatu omu reseve.

7 Evocoyase güeru ucase Pedro iyavei Juan opãhuve yuvireco, oporandu yuvireco chupe:

—¿Ava pe cuaita pipe vo, ava rer pipe avei vo co mbahe peyapo? —ehi.

8 Evocoyase Pedro, Espíritu Santo pĩratasa pipe, aipo ehi chupe:

—Pe, mborerecuareta co tecua pipendar, pe avei pahi rerecuar:

9 peporandu niha co ava imbaheasi vahe ndoguata catui vahe mbogüera agüer rese oreu —ehi chupe—.

10 Evocoyase tapeicuapa opacatu pe Israel suindar peico vahe ocuera co ava ndoguata catui vahecuer Jesucristo, Nazaret pendar, rer pipe. Ahe niha peyatica uca vahecuer curusu rese. Tũpa rumo ombogüerayevi iri omano vahe pãhu sui.

11 Co Jesús pe remieroïro, ahe rumo yande viñacuasa. Pe evocoyase inungar oi mopuhasar omomboño vahe ita aviye catu vahe oi moviracuasa rãgüer yepi.

12 Ndipoi que ambuae ava sui poropĩsirosa, Jesús güeraño ité oicatu oporopĩsiro. Esepia, Tũpa nomboui ambuae ava tẽi co ivi pipe yande pĩsiro ãgua —ehi.

13 Mborerecuar osepiase iyembosiquiyeẽhisa yuvireco, “¿Mara ehi pĩha co mbia? ¡Ava tẽi, ndoyembohei vahe niha!” ehi tẽi yuvireco chupe. Ichui oicua Jesús remimbohegüer secose yuvireco.

14 Iyavei acoi ava semimbogüeragüer supive ité secoise, sese ndoicatui chupe oñehe mara ãgua yuvireco.

15 Ipare, “Pesẽ ocarve” ehi mborerecuareta yuvireco chupe. Ahe güeraño evocoyase opita oi pipe oñemoñeta yuvireco sese

16 aipo ehi:

—¿Mara yahera vo co ava rereco? Esepia, opacatu ava Jerusalén pendar oicua co mbahe poromondiisa oyapose yuvireco. Ndiyai eté, “Ëgüe ndehi” vahe chupe.

17 Yambosiquiye ava upe Jesús rer rese ñehe iriẽhi ãgua yuvireco. Ipipe sui ava tosendu iri eme Jesús resendar ñehesa yuvireco —ehi.

18 Aipo ohe pare, “Perio” ehi yuvireco chupe. “Pesendu, co pipe suive peñehe iri eme tupri iyavei pembohe iri eme avei ava Jesús rer pipe” ehi yuvireco chupe.

19 Omboyeviño rumo oñehe yuvireco chupe:

—¿Mara ehi pe pihave? ¿Uma pĩha aviye catu Tũpa rovai? ¡Pe porocuita tie oroviroya catura Tũpa ore cuaisa sui!

20 Ndiyai rumo mbahe ore rembiepia, mbahe orosendu vahe avei mombehuẽhi ãgua oreu —ehi.

21 Aipo ihese, mborerecuar ombosiquiye catu tẽi yuvireco. Ichui rumo omose tupriño. Esepia, ava omboetei guasu Tũpa yuvireco co imbaheasi vahe mbogüera repiase. Sese ndoicatui eté mbahe apo yuvireco chupe.

22 Evocoi ava oipisi vahe Tũpa poromondiisa ocuera ãgua, ahe oñaro catu cuarenta araviter vireco vahe sui.

*Jesús reroyasar oporandu Tũpa upe siquiyeẽhisa rese yuvireco*

<sup>23</sup> Yuvinosese Pedro, Juan avei, oyevi yuviraso omboetasa piri. Aheve oñemonuhasave opa omombehu pahi rerecuar oyeupe ñehe mara-mara tẽisa yuvireco.

<sup>24</sup> Aipo rendu pare, oyoya guasu oyoeroqui yuvireco Tũpa upe aipo ehi: “Ore Yar, nde niha Tũpa opacatu iva, ivi, para guasu, opacatu ipor reseve aposar ereico.

<sup>25</sup> Nde Espiritu Santo pipe aipo eremombehu uca nde rembiguai mborerecuar David upe aracahe:

¿Mahera vo co ava ndahei vahe judío oyamotarẽhi yuvireco?

¿Mahera vo ipihañemoñeta rai tẽi yuvireco?

<sup>26</sup> Mborerecuar guasu eta, ambuae mborerecuar reseve co ivi pipendar oñemonuha yuvireco yande Yar Tũpa iyavei sembiporavo amotarẽhi ãgua’ ehi aracahe.

<sup>27</sup> “Ëgüe ehi eté oñemonuhase Herodes, Poncio Pilato avei, ava ndahei vahe judío, judío eta reseve yuvireco co tecua Jerusalén ve. Esepia, oñemonuha yuvireco nde rembiguai aracaheve nde Rembiporavo Poropĩsirosar Jesús, seco maranehi vahe, amotarẽhi ãgua.

<sup>28</sup> Ëgüe ehi yapo opacatu nde pihañemoñeta aracahendar rupi tupri ité yuvireco.

<sup>29</sup> Iyavei cūrítei, ore Yar, emahe ore amotarẽhisar rese. Embou nde pĩratasa nde rembiguai oroico vahe upe siquiyeẽhisa pipe nde ñehengagüer mombehu vite ãgua.

<sup>30</sup> Ipare, nde pĩratasa pipe, embogüera imbaheasi vahe iyavei eyapo mbahe poromondiisa yavai vahe nde rembiguai Jesús rer maranehi pipe” ehi yuvireco oyoeroqui.

<sup>31</sup> Iyeroqui pare, Tũpa omboriri opacatu mbahe iñemonuhasave yuvireco chupe. Ahese Espiritu Santo opa oi que yuvireco sese. Sese osiquiyeẽhisa pipe omombehu tupri Tũpa Ñehengagüer yuvireco.

### *Jesús reroyasar ombahe opacatu oyeupe nara vireco yuvireco*

<sup>32</sup> Setá iteanga Jesús reroyasar yuvireco. Opacatu oyoya tupri ipihañemoñeta yuvireco. Ndipoi eté “co güeraño co che mbahe” ehi vahe; opacatu seroyasar mbahe rumo opacatu mbahe.

<sup>33</sup> Jesucristo apóstol omombehu vite ipĩratasa pipe icuerayevi agüer yuvireco. Ipipe Tũpa osovasa catu vite opacatu yuvireco.

<sup>34</sup> Ndipoi eté ipãhu pendar mbahe ndovirecoi vahe. Esepia, opacatu ivi vireco vahe iyavei oi omondo,

<sup>35</sup> ahe sepri omondo apóstol upe yuvireco yepi. Ahe evocoyase omboyaho-yaho opacatu upe mbahe ipane vahe rupi-rupi yuvireco.

<sup>36</sup> Ëgüe ehi ava judío ramoi Leví suindar, Chipre pendar, José serer vahe, apóstol osero, “Bernabé” ehi yuvireco chupe (‘porombovĩhasar’ oya aipo ehi),

<sup>37</sup> ahe mbia omondo oivi, güeru sepri apóstol upe.

## 5

### *Ananías iyavei Safira yemboangaipa agüer*

<sup>1</sup> Ambuae ava rumo, Ananías serer vahe, güembireco Safira reseve omondo ivi yuvireco.

<sup>2</sup> Ahe mbia rumo omboyaho sepri, ñepei iyahocuer vireco oyeupe nara, ambuae iyahocuer viraso apóstol upe, sembireco avei oicua tẽi opacatu.

<sup>3</sup> Evocoyase Pedro aipo ehi chupe:

—Ananías, ¡mahera ereroya Carugar nde piha pipe Espiritu Santo mbopa ãgua, eremboyahoño tẽi nde ivi repri guarepochi ndeyeupe nara!

<sup>4</sup> ¿Ndahei vo nde mbahe ité ivi viña? Eremondo ité niha, evocoyase nde mbahe ité guarepochi. ¡Mahera ereyapo co nungar! Ndahei ava upe nde remira, Tũpa upe ité rumo nde remira —ehi chupe.

<sup>5</sup> Osenduse Pedro ñehesa, oviapi sehögüer oso sovai. Ahese opacatu oyandu vahe osiquiye tēi yuvireco.

<sup>6</sup> Ipare mbia chīhivahe yugüeru, osupi sehögüer, oipoque seraso yuvireco ñoti āgua.

<sup>7</sup> Mbosapi hora pare, sembireco Safira serer vahe oique oi pipe. Ndoicua vitei rumo omer mano.

<sup>8</sup> Ahese Pedro oporandu chupe:

—Emombehu cheu: ¿Co guarepochi retacuer rupi eté vo pemondo pe ivi? —ehi chupe.

—Evocoi rupive ité niha oromondo —ehiño avei cuña chupe.

<sup>9</sup> Evocoiyase aipo ehi ahe cuña upe:

—¡Mahera peyemboyoya pe pihañemoñetasa rese pe secoãha āgua yande Yar Espiritu! Coi yugüeru nde mer tīsarar. Nde avei nde reraso āgua yuvireco eipeve —ehi chupe.

<sup>10</sup> Ahe ramoseve avei oviapi sehögüer Pedro rovai. Mbïa chīhivahe yuviroiquese, oipoque voñiño ité sehögüer seraso imer iviñi ñoti āgua yuvireco.

<sup>11</sup> Opacatu Jesús reroyasar, ambuae ava avei oyembosiquiye guasu yuvireco yanduse.

### *Setá poromondiisa yaposa*

<sup>12</sup> Evocoiyase apóstol pipe Tūpa omboyecua uca setá poromondiisa ava pāhuve yuvireco. Opacatu Jesús reroyasar oñemonuha judío tūparo ique, Salomón serer vahesave yuvireco.

<sup>13</sup> Opacatu ambuae ndoyemboyai yuvireco sese osiquiyepave. Ava rehii rumo, omboetei eteanga apóstol yuvirecoi vahe yuvireco.

<sup>14</sup> Oyemboeta catu yande Yar reroyasar setá cuimbahe, setá avei cuña.

<sup>15</sup> Iyavei ava rehii vinose yuvireco imbaheasi vahe supa reseve-seve Pedro renonera, “Oñocuase Pedro, aviyeteramo omohara ihāgüer. Ahese revo ombogüerara” ehi yuvireco oyeupe.

<sup>16</sup> Ava Jerusalén ivirindar avei güeru omonuha setá imbaheasi vahe, carugar rese yuvirecoi vahe apóstol upe imbogüerapirã. Ahe evocoiyase opacatu ombogüera yuvireco.

### *Apóstol yamotarēhipri yuvirecoi*

<sup>17</sup> Ichui tēi pahi rerecuar ivate catu vahe, saduceo yuvirecoi vahe oñemoiro yuvireco apóstol upe ava rese güecatēhisave.

<sup>18</sup> Sese oipisi osoquendapa uca yuvireco.

<sup>19</sup> Ipare rumo, pītu pipe, Tūpa rembiguai ìva pendar ou omboi oquenda, vinose ichui, aipo ehi chupe:

<sup>20</sup> “Peso tūparo guasuve, pemombehu avei ava upe co ñehesa tecocuer piasu resendar” ehi chupe.

<sup>21</sup> Co mbahe rendu pare, supi tupri ité oyapo yuvireco. Cōhe ramoseve yuviraso judío tūparo guasuve ava mbohe āgua.

Aheseve pahi rerecuar ivate catu vahe, supindar avei osenoi opacatu tecua pipendar mborerecuar ñemonuha āgua ivate catu vahesave; omondo yuvireco güembiguai apóstol reru āgua soquendasa sui aheve nara viña.

<sup>22</sup> Oyepotase rumo sembiguai yuvireco, oseca tēi soquendapri. Ichui oyevi tēi yuvireco imombehu

<sup>23</sup> aipo ehi:

—Oroyepotase ava roquendasave, orosepia opacatu oquenda imboyapri tupri iyavei orosepia opacatu oquendipi rupi sãrosar osãro tupri ité viña. Oromboise rumo oquenda, ndipoi eté ava soquendapri ipipe —ehi tēi yuvireco.

<sup>24</sup> Osenduse, pahi rerecuar ivate catu vahe, tūparo rãrosar rerecuar, pahi rerecuareta avei yuvireco, ipihañemoñeta tēi: “¿Que rupi vo opoira co mbahe sui yuvireco?” ehi tēi yuvireco oyeupe.

<sup>25</sup> Aheseve ñepeï mbïa oyepota imombehu:

—Evocoi pesoquenda vahecuer, ahe mbia cūritei oporombohe tūparove yuvireco —ehi chupe.

<sup>26</sup> Evocoiyase tūparo rārosar rerecuar, sembiguai avei yuviraso seru āgua mbahe tupri pipe, “Aviyeteramo yande api-api tiētera ava yuvireco yaru raise” ehi yuvireco.

<sup>27</sup> Viroyepotase yuvireco ñemonuhasa ivate catu vahesave, ahese evocoi pahi rerecuar ivate catu vahe aipo ehi chupe:

<sup>28</sup> —Ore mborerecuar tecua pipendar, ndoroipotai peporombohe evocoi mbia recocuer rese. Pe rumo pembohe opacatu Jerusalén pendar secocuer rese serer pipe. Pemombehu avei ava rehii upe ore mborerecuar oroyuca uca evocoi mbia —ehi pahi rerecuar chupe.

<sup>29</sup> Pedro, omboetasa reseve, omboyevi pahi rerecuar ivate catu vahe upe yuvireco:

—Ore cuaita ité Tūpa mboyeroya, ndahei chira rumo ava tēi rane oromboyeroyara —ehi yuvireco chupe—.

<sup>30</sup> Yepe peyatica, peyuca uca Jesús curusu rese viña, yande Ru Tūpa rumo acoi yande ramoi eta viroya vahe, ahe ité ombogūerayevi.

<sup>31</sup> Ipare osecomboivate ivave oacato coti imboguapi imoi. Ahe niha Mborerecuar guasu, Poropīsīrosar avei ‘tomboasi oangaipa, toyevi cheu, toipisi angaipa resendar ñeroisa yuvireco’ oya Tūpa Israel suindar upe.

<sup>32</sup> Ore Tūpa rembiapo repiasarer imombehu āgua oroico, Espiritu Santo avei oñehe ore ñehe rupi ava upe, ahe acoi Tūpa ombou vahe viroyasar upe —ehi.

<sup>33</sup> Osenduse mborerecuar aipo ñehesa, oñemoiró iteanga yuvireco. Oyucapa pota opacatu apóstol yuvireco viña.

<sup>34</sup> Mborerecuar pāhu pendar rumo oime mbia fariseo, Gamaliel serer vahe, ahe Moisés porocuita rese oporombohe vahe iyavei imboeteipri catu vahe. Ahe opūha oporocuai, “Toyuvīnose raimi ocarve apóstol” ehi.

<sup>35</sup> Ipare aipo ehi ambuae mborerecuareta upe:

—Che mu, judío, peicua catu, yandepihañemoñeta tupri rane mbahe apo āgua renondeve co mbia upe yuvireco —ehi—.

<sup>36</sup> Peyemomahenduha Teudas recocuer rese. Esepia niha, acoi oyemboivate aisa pipe viroguata cuatrociento ava oyeupi aracaco. Ipare acoi oyuca yuvireco. Ahese supindar opa oñemosai tēi yuvireco. Ahe peve secocuer opa.

<sup>37</sup> Coiye catu, omombehuse mborerecuar Roma pendar ava retacuer cua āgua, ahese Judas, Galilea pendar, oyemomborerecua. Setá avei ava oguata yuvireco supi. Ahe avei rumo oyuca yuvireco, opa tupriño avei supindar oñemosai tēi yuvireco —ehi—.

<sup>38</sup> Sese cūritei peyapoi rene mbahe co ava upe. Yaseyaño. Esepia, evocoi mbahe sembiapo ndipocopii chira oyapose opīratasa pipe tēi yuvireco.

<sup>39</sup> Tūpa suindarse rumo ndapemombituhu catui chietera. Peicua catu, aní chira yayamotarēhi Tūpa ipipe —ehi omboetasa upe.

Aipo ihese, opacatu imboetasa viroya yuvireco.

<sup>40</sup> Ichui rumo güeru iri apóstol inupa uca āgua iñehe iriēhi āgua Jesucristo rese yuvireco. Inupa pare opa omose yuvireco.

<sup>41</sup> Ipipe apóstol ovihareté iteanga yuvireco. Esepia, Tūpa ombou chupe iparaisu āgua yuvireco Jesús rer rese iyeroyasa sui tēi.

<sup>42</sup> Ipare ndopoi eté ari yacatu Poropīsīrosar Jesús recocuer mombehusa sui yuvireco. Omombehuño ité tūparo pipe iyavei opacatu ava rēta rupi yuvireco.

## 6

### *Siete iporavosa iparaisu vahe pītivii āgua yuvireco*

<sup>1</sup> Ahe araviter pipe aipo oyemboetase Jesús reroyasar yuvireco, griego pipe oñehe vahe oñehe rai oyeupe hebreo pipe oñehe vahe rese yuvireco: “Nihañeco tuprii ore mu

imer mano vahecuer rese ari yacatu mbahe poropitiviisa imondosase chupe” ehi oñehe yuvireco.

<sup>2</sup> Evocoyase doce apóstol omonuhapa uca opacatu Jesús reroyasar. Aheve aipo ehi yuvireco chupe:

—Ndiyai rumo ore oropoi tēi Tūpa Ñehengagüer mombehusa sui mbahe poropitiviisa mondo ñgua rese tēi —ehi yuvireco—.

<sup>3</sup> Sese ore rivireta, peiporavo siete mbia seco aviye vahe pe pãhu sui, yaracua vahe iyavei Espíritu Santo viroya vahe ité opiha pipe. Ahe mbia tihãneco co mboraviquisa rese yuvireco.

<sup>4</sup> Ore evocoyase, oroyerureñora iyavei oroporomboheño itera Tūpa Ñehengagüer rese —ehi yuvireco.

<sup>5</sup> Opacatu oipotaño yuvireco ñehesa oyeupendar. Ichui osenoi Esteban yuvireco, ahe oyeroya ité Tūpa rese iyavei viroya ité Espíritu Santo opiha pipe. Ichui oiporavo Felipe, Prócoro, Nicanor, Timón, Parmenas iyavei Nicolás evocoi mbia Antioquía pendar, ahe viroya vahecuer judío aracuasa.

<sup>6</sup> Ichui virasopa apóstol upe yuvireco. Ahe omondo opo iharive oyerogui yuvireco sese.

<sup>7</sup> Ahese Tūpa Ñehengagüer oyemosai catu tecua pipe. Ichui oyemboeta catu iri avei Jesús reroyasar yuvireco Jerusalén ve. Setá avei judío pahi viroya ñehengagüer yuvireco.

### *Esteban pisisa*

<sup>8</sup> Co mbia, Esteban, vireco ité Tūpa pĩratasa iyavei Tūpa porovasasa oyese. Oyapo avei mbahe poromondiisa, yavai vahe opacatu ava pãhuve.

<sup>9</sup> Evocoyase Jerusalén ve oime judío tũparo Mbiguaigüer serer vahe. Ahe pendar tecua Cirene iguar, Alejandría iguar, Cilicia iguar iyavei Asia ivirindar yuvirecoi vahe reseve oiñehepoepi-epi Esteban yuvireco.

<sup>10</sup> Ndoicatui rumo ñehe recopi ñgua yuvireco. Esepia, ahe oñehe mbahecuasa Espíritu Santo omondo vahe pipe.

<sup>11</sup> Evocoyase yamotarẽhimbar omboepi ambuae ava upe semira tēi ñgua sese yuvireco. “ ‘Ore orosendu co mbia oñehese mbahe naporai vahe rese Moisés amotarẽhisave, Tūpa amotarẽhisave avei’ aipo peyera peñehe” ehi yuvireco chupe.

<sup>12</sup> Evocoyase ahe ava oyamotarẽhi uca opacatu ava mborerecuar reseve iyavei judío porocuita rese oporombohe vahe upe avei yuvireco. Ichui oipisi yesapiha Esteban seraso mborerecuar uve porandusa ivate catu vahesave yuvireco.

<sup>13</sup> Iyavei oseca mbia semira tēi vahe oñehe vaherã sese yuvireco. Ahe aipo ehi:

—Co mbia oñehe-ñehe tēi yande tũparo guasu imaranehi vahe amotarẽhisave, Moisés porocuita amotarẽhisave avei.

<sup>14</sup> Ore orosendu ñehe: “Jesús Nazaret pendar omocañira tũparo guasu iyavei Moisés yande mbohese avei aipo osecañarora” ehi —ehi yuvireco chupe.

<sup>15</sup> Ahese opacatu mborerecuar oñemonuha vahe yuvinoi aheve omahe Esteban rese yuvireco. Omahese aipo yuvireco sese, ndoyavii sepiaca Tūpa rembiguai iba pendar rova.

## 7

### *Esteban oñehe oyeepisa pipe*

<sup>1</sup> Evocoyase pahi rerecuar ivate catu vahe oporandu chupe: “¿Supi eté vo aipo nde ñehe mara eico?” ehi chupe.

<sup>2</sup> Ahese omboyevi chupe: “Che mu eta, peyapisaca che ñehe rese: Tūpa imboeteipri oyemboyecua yande ramoi Abraham upe aracahe. Mesopotamia ve secoi vitese, icho renondeve Harán ve seco ñgua,

<sup>3</sup> aipo ehi chupe: ‘Eso nde recua sui; eseyapa nde mu; eso evocoi tecuave che amboyecuara ndeu’ ehi Tūpa chupe.

<sup>4</sup> Evocoyase osē Caldea ivi sui oso tecua Harán ve güeco āgua. Omano pare tu Harán ve, Tūpa ombou cohava yande recosave.

<sup>5</sup> Yepe oyepota tēi cohava aracahe, Tūpa rumo nomondoimi eté que chīhi ivi chupendar chupe. ‘Co ivi amondora ndeu nde mano pare nde suindar upe nara’ ehi Tūpa chupe (ahe rumo ndatahi vītei ahese).

<sup>6</sup> Tūpa aipo ehi avei chupe: ‘Nde suindar yuvirecoira ambuae ava recua rupi, ahe pendar ava secua vahe rembiguairā semimombaraisuguā tēi avei yuvirecoira cuatrociento aravīter rupi’ ehi.

<sup>7</sup> Tūpa rumo aipo ehi avei Abraham upe: ‘Che rumo, aicuara evocoi ava nde suindar mombaraisusar upe yuvireco. Ipare yuvinosera ipovri sui che mboetei iri āgua cohava yuvireco’ ehi Tūpa chupe aracahe.

<sup>8</sup> Tūpa oyocuai güemimbotar pīpe Abraham guahir mbocircuncida āgua rese. Sese Abraham mbocircuncida guahir Isaac iha pare ocho arī pīpe. Isaac ēgüe ehi avei guahir Jacob upe. Jacob ēgüe ehi avei guahireta upe, ahe doce vahe Israel suindar” ehi.

<sup>9</sup> “Ipare yuvirecoi vahe yande ramoi Jacob rahir omondo vivri guarepochi repirā yamotarēhisa pīpe yuvireco. Ahe tivri rer José omondo vahe Egipto pendar upe yuvireco. Tūpa rumo secoiño ité sese.

<sup>10</sup> Ichui vinose opacatu iparaisusa sui. Omondo ombahecuasa chupe iyavei seco avīye tupri āgua Egipto pendar mborerecuar guasu faraón upe. Evocoyase faraón ipotasa pīpe omoingue mborerecuar seco āgua opacatu ava ivi Egipto pendar cuai āgua iyavei güēta pīpendar cuai āgua avei.

<sup>11</sup> “Ipare ou tiavor opacatu Egipto ivi rupi, Canaán ivi rupi avei. Iparaisu yuvireco. Ahese yande ramoi ndoyosui mbahe güemihura yuvireco.

<sup>12</sup> Oyanduse rumo Jacob Egipto ve oime vītese trigo, ahese omondo guahir aheve seca, ahe yande ramoi yuvirecoi vahe. Ahe yipīndar ichosa Egipto ve yuvireco.

<sup>13</sup> Ichui yuviraso yupagüe irise Egipto ve, ahese José oyecua uca vīquehir upe. Ēgüe ehi faraón upe oicua uca uma sui oyesu.

<sup>14</sup> Evocoyase José güeru uca oyesupa Jacob iyavei opacatu omu, ahe imu retacuer setenta y cinco tupri.

<sup>15</sup> Ēgüe ehi Jacob yuviraso Egipto ve yuvirecoi āgua opacatu guahir reseve. Aheve omano iyavei opacatu yande ramoi eta omano yuvireco aracahe.

<sup>16</sup> Imano pare rumo, suminogüer vīraso icangüer yuvireco tecua Siquem ve. Aheve oñoti yuvireco. Aheve acoi Abraham vīrocua tuvīpa Hamor rahir sui aracahe” ehi mborerecuar upe.

<sup>17</sup> “Ipare, virovise arī ipapapri Tūpa Ñehengagüer Abraham upendar, ahese yande ramoi setá catu-catu iri oyesu Egipto ve yuvireco aracahe.

<sup>18</sup> Ipare oporocuai ambuae mborerecuar guasu Egipto ve. Ahe ndoicuai vahe ité yande ramoi José.

<sup>19</sup> Evocoi mborerecuar guasu ombopa yande ramoi eta aracahe. Omombaraisu avei oyucapa uca israelita rahir cuimbahe pītani. Ahe oyocuai iyesupa aipo ehi: ‘Peseya pe rahir oha ramomi vahe, tomanoño’ ehi yande ramoi upe aracahe.

<sup>20</sup> Aheseve avei aipo Moisés oha. Ahe pītani avīye ité Tūpa uve. Ihare, iyesupa mbosapī yasīmi rupive vīreco oyese güētave yuvireco.

<sup>21</sup> Oseyase rumo iyesupa ive yuvireco, ahese faraón rayri oseca ahe i rupi sui. Ichui vinose seraso güētave, omboacua omembrī nungar ité sereco.

<sup>22</sup> Ichui Egipto pendar yaracua vahe opacatu ombahecuasa rese ombohe tupri Moisés sereco yuvireco. Evocoyase Moisés ipīrata ité oñehese iyavei oyapose mbahe.

23 “Virecose rumo Moisés cuarenta araviter, ipihañemoñeta: ‘Tasepia rane che mu israelita cohave yuvirecoi vahe’ ehi.

24 Ipare aheve osepia Egipto pendar oinupa-nupa imu sereco yuvireco. Aheve oyuca Egipto pendar omu repicave.

25 Ahe rumo, ‘Oicua revo che mu Tūpa vinose uca āgua Egipto sui yuvireco cheu’ ehi viña. Imu rumo nomohai eté Moisés vinose āgua yuvireco evocoi ava po sui.

26 Ahere ayihive oso omu pāhuve. Aheve osepia ñuvirío mbia ovavase oyeupe yuvireco. Ahe rumo oipota tēi iñero āgua oyeupe yuvireco viña, aipo ehi chupe: ‘Che mu, oñemu mo peico, ¿mahera vo pevava peyese ae?’ ehi tēi chupe.

27 Oyemoviracua catu vahe rumo omombo oyesui. Ichui ahe aipo ehi chupe: ‘¿Ava vo nde moingue ore pāhuve ore rerecuarā ore recocuer moingatu āgua?’ ehi chupe.

28 ‘¡Che yuca pota avei tie eve inungar ereyuca evocoi Egipto pendar irapipe!’ ehi chupe.

29 Osenduse rumo co iñehe, oñemi voi eté oso Egipto sui ambuae ivi Madián ve. Aheve opita pucu. Ahe ivi rumo ndahei secua ité. Aheve oyesu ñuvirío tahir.

30 “Omboaviyese cuarenta araviter Madián ve, Tūpa rembiguai oyemboyecua ivitri Sinaí rerovicave ivi iporupirēhisave caha rese tata rendigüer pāhuve chupe.

31 Osepia mbahe sendi vahe oyepihamondi, oyemboya catu sese sepia tupri āgua viña. Aheve osendu Yar ñehe aipo ehi vahe:

32 ‘Che nde ramoi Tūpa aico. Nde ramoi Abraham, Isaac iyavei Jacob che reroya vahecuer yuvireco’ ehi. Evocoyase Moisés orirí osiquiyesa pipe nomahe pota iri sese.

33 Evocoyase Yar aipo ehi chupe: ‘Esequi nde pitaqui. Esepia, ivi nimarai vahesave ereico’ ehi chupe.

34 ‘Che asepia tupri ité Egipto ve nde mu che rebiporavo paraisuse; asendu avei ipoāse tēisa yuvireco yepi. Sese agüeyi ndeu nde oromondora aheve senosepa āgua’ ehi Tūpa Moisés upe aracahe.

35 “Yepe yande ramoi ndoviroya potaiño ité yuvireco, ‘¿Ava vo nde moingue ore rerecuarā ore recocuer moingatu āgua?’ ehiño yuvireco chupe, Tūpa ité rumo oyocuai güembiguai imbogüeyi tata rendigüer pāhuve imoñehe Moisés upe iporocuai āgua, ava renosepa āgua avei ivi Egipto pendar mborerecuar povri sui.

36 Ipare ahe ité vinose yande ramoi eta Egipto sui, oyapo avei mbahe poromondiisa aheve ‘toicua Tūpa yuvireco’ oya, para guasu Pira vaheve avei oyapo poromondiisa iyavei ivi iporupirēhisa rupi avei cuarenta araviter rupi.

37 Ahe avei aipo ehi israelita upe: ‘Tūpa vinosera pe pāhu sui ñepeí oñehe mombehusar che nungar’ ehi.

38 Ahe avei acoi ivi iporupirēhisa rupi ava pāhu rupi secoi. Chupe avei oñehe Tūpa rembiguai ivitri Sinaí ve yande ramoi rese; ahe avei oipisi ñehesa tecovesa resendar yandeu imbou āgua.

39 “Yande ramoi eta rumo nombayeroya potai eté Moisés yuvireco. Ipihañemoñetaño ité Egipto ve oyevi āgua rese yuvireco.

40 Evocoyase aipo ehi Aarón upe yuvireco: ‘Eyapomi catu ava tūpa rahanga oreu ore reroguata āgua’ ehi yuvireco chupe. ‘¿Que vo catu Moisés, ore renosesarer Egipto sui, secoi? Omano tie revo’ ehi tēi israelita yuvireco aracahe.

41 Ipare oyapo uca mbahe rahanga guaca repiaca nungar oyeupe yuvireco. Oyuca mbahe mimba ahe mbahe rahanga upe viropovēhe vaheñā yuvireco iyavei oyemboviha pieta apo yuvireco güembiapo ucagüer rese tēi.

42 Sese Tūpa opoiño ahe ava sui, ‘Toyerure evocoyase yasi, yasitata upe yuvireco’ ehiño chupe. Aipo ehi niha oñehe mombehusar icuachiapri pipe:

‘Pe peico vahe israelita, ndahei cheu peyuca mbahe mimba seropovēhe āgua cuarenta araviter pipe ivi iporupirēhisa rupi.

<sup>43</sup> Pe rumo che mboeteiēhisa pīpe peraso tūpa rahanga Moloc rēta iyavei yasitata rahanga Refán pe ae tēi peyapo vahe pe tūpaguã.

Sese che opovinosera pe recua sui pe mondo Babilonia cupe coi coti' ehi Tūpa chupe aracahe.

<sup>44</sup> “Ivi iporupirēhisa rupi yande ramoi eta vireco Tūpa porocuita rēta oyeupive yuvireco aracahe mbahe mīmba pīrer apopri. ‘Na peyera yapo’ ehi Moisés upe. Evocoyase iñehe rupi tupri oyapo uca.

<sup>45</sup> Ahese coiye catu yande ramoi eta vireco co oi Tūpa rēta mbahe pīrer apopri yuvireco iyavei Josué rupi yugüeru vahe güeruño ité avei yuvireco, omosepase Tūpa ambuae ava co yande recuavi sui. Ēgüe ehiño vite ité ahe sereco yuvireco mborerecuar guasu, David, secoise aracahe.

<sup>46</sup> Ahe David aviye ité Tūpa upe, oyapo pota setarã ‘toime tūparoguã yande ramoi Jacob rembieroya upe’ oya.

<sup>47</sup> Tahir Salomón rumo omopuha ité ahe tūparo.

<sup>48</sup> Tūpa rumo, seco ivate vahe, ndasecoi vahe tūparo ava tēi rembiapo pīpe. Inungar acoi omombehu vahe Tūpa ñehe mombehusar aracahe aipo ehi:

<sup>49</sup> ‘Iva che renda iyavei ivi che pīrunga.

¿Mbahe nungar oi vo peyapora cheu? ehi yande Yar.

¿Que vo evocoyase che pītuhu āgua?

<sup>50</sup> Che niha opacatu co mbahe aposar aico’ ehi Tūpa icuachiapri pīpe” ehi mborerecuar upe Esteban.

<sup>51</sup> Ichui aipo ehi chupe: “Pe rumo ndapeyapisaca potai vahe ité peico. Oime tēi pe nambi, pe pīha avei, ipīpe rumo ndapeicuai eté Tūpa. Peico Espiritu Santo amotarēhimbar tēi inungar pe ramoi aracahe yuvirecoi.

<sup>52</sup> ¡Uma profeta revo ndovireco meguai pe ramoi yuvireco! Ahe avei oyucapa yipīndar omombehu vahe ndaseco marai vahe yusa resendar yuvireco. Cūritei ou ndaseco marai vahe cute. Pe avei evocoyase ahe yuca uca āgua peporocuai.

<sup>53</sup> Pe pereco tēi Tūpa porocuita acoi Tūpa rembiguai güeru vahe yuvireco; ahe rumo ndaperoyaiño ité peico” ehi Esteban opacatu mborerecuar upe.

### *Esteban mano agüer*

<sup>54</sup> Osendupase mborerecuar iñehe, omboasí iteanga yuvireco; oñeaimboterepri ité yamotarēhisave yuvireco.

<sup>55</sup> Esteban rumo vireco ité Espiritu Santo oyese. Evocoyase iva rese omahese, osepia Tūpa porañetesa. Osepia avei Jesús opūha ohã Tūpa acato coti.

<sup>56</sup> Evocoyase aipo ehi:

—¡Pesepia! Asepia inungar iva imboipri. Aheve asepia Ava Riquehir Vu acato coti ihã —ehi.

<sup>57</sup> Mborerecuareta rumo osapucui pīrata, oyopiño oapisacuar yuvireco ichui. Ahese yuvinoña guasu yuvireco chupe.

<sup>58</sup> Viraso güecua ivi yuvireco. Aheve oseya oyeaosa Saulo pive ‘tosãro’ oya yuvireco chupe. Ipare oyapi-yapi ita pīpe yuca yuvireco.

<sup>59</sup> Oapi-apiseve, Esteban oyerure Tūpa upe: “Che Yar Jesús, eipisi che hã” ehi.

<sup>60</sup> Ipare oñenopiha, oñehe pīrata Tūpa upe: “¡Che Yar, ndeñero co ava che amotarēhisar angaipa upe!” ehi.

Aipo ohe pare, omano.

## 8

<sup>1</sup> Iyavei Saulo, “Peyuca ité” ehi catu-catu aheve ohã.

*Saulo oseca Jesús reroyasar mocañipa āgua oico*



Ahe ari pīpeve omboipi Jesús amotarēhimbar seroyasar reca mara-mara tēi catu sereco āgua yuvireco Jerusalén ve. Evocoyase opacatu seroyasar oñemosai yuviraso Judea ivi rupi, Samaria rupi avei. Apóstol güeraño opita Jerusalén ve yuvireco.

<sup>2</sup> Oime ava Tūpa mboeteisar yuvirecoi vahe, ahe víraso Esteban rehögüer ñoti yuvireco. Itĩ pare, oyasehó iteanga yuvireco sese.

<sup>3</sup> Ahe pīpeve avei aipo Saulo omombaraisu ava Jesús reroyasar yuvirecoi vahe seroya ucaēhi āgua viña. Yuviroique-iqueño tēi aipo sēta rupi cuimbahe, cuña mbotiriri senose soquenda āgua yuvireco.

*Samaria pendar osendu ñehesa Jesucristo recocuer resendar yuvireco*

<sup>4</sup> Ava oñemosai vahecuer rumo Jerusalén sui omombehuño ité ñehesa pĩsirosa resendar que yuvirasosa rupi yuvireco.

<sup>5</sup> Felipe oso Samaria rupi. Aheve omombehu ava upe: “Evocoi Jesús Tūpa Rembiporavo ava pĩsiro āgua” ehi.

<sup>6</sup> Ahese ava rehii oñemonuha Felipe ñehe rendu āgua yuvireco. Oyapisaca tupri iñehe rese yuvireco. Esepia, osepia mbahe sembiapo poromondiisa.

<sup>7</sup> Iyavei setá ava carugar rerecosar sui omose carugar. Osēse ava sui, sãse yuvireco. Iyavei setá ava nomii vahe, ndoguatai vahe avei ombogüera.

<sup>8</sup> Evocoyase oviharete ahe tecua pīpendar yuvireco.

<sup>9</sup> Aheve rumo mbia, Simón serer vahe, yipive ipaye ai oico, ombosiquiye-quiye ava Samaria pendar. “Che seco ivate vahe aico” ehi angahu ava mbopa.

<sup>10</sup> Evocoyase opacatu ava, cuacua vahe iyavei chĩhivahe catu vahe oyapisaca tupri iñehe rese, aipo ehi yuvireco: “Co niha Tūpa pĩratasa tuvicha vahe” ehi oyeupe yuvireco.

<sup>11</sup> Omboyeroya pucu ité yuvireco. Esepia, opayesa pīpe ava ombosiquiye etepri oico yepi.

<sup>12</sup> Oyepotase rumo Felipe Samaria ve omombehu ñehesa aviye vahe Tūpa mborerecuasa resendar, Jesucristo recocuer resendar avei. Ahese ava rehii viroya yuvireco. Ipare oñeapiramo ité yuvireco cuimbahe, cuña avei.

<sup>13</sup> Ahe Simón avei viroya. Oñeapiramo pare, oso Felipe rupi. Co mbahe poromondiisa iyavei Tūpa suindar ndayasepiai vahe rese oyepihamondi.

<sup>14</sup> Jerusalén ve apóstol yuvirecoi vahe oyandu Samaria ve setá ava oipisise Tūpa Ñehengagüer yuvireco. Evocoyase omondo aheve omboetasa Pedro iyavei Juan yuvireco.

<sup>15</sup> Oyepotase aheve yuvireco, oyerure opacatu ava Jesús reroyasar rese ‘Espíritu Santo toipisi yuvireco’ oya.

<sup>16</sup> Esepia, Espíritu Santo ndogüeyi vitei yuvireco sese; oñeapiramoño tēi vite yande Yar Jesús rer pīpe yuvireco.

<sup>17</sup> Pedro iyavei Juan oyerurese, omondo opo iharive yuvireco. Ahese Espíritu Santo ogüeyi yuvireco sese.

<sup>18</sup> Ahe osepiase, Simón omondo pota guarepochi chupe,

<sup>19</sup> aipo ehi:

—Cheu avei pemboumi tēi evocoi pĩratasa, amondose che po que ava harive, togüeyi avei Espíritu Santo sese yuvireco —ehi Simón.

<sup>20</sup> Omboyevi rumo Simón upe:

—¡Tocañipa nde guarepochi nde reseve! Esepia, ndepihañemoñeta co Tūpa ombou vahe oreu, ererocua vaherã nde guarepochi pīpe viña —ehi chupe—.

<sup>21</sup> Ndeu ndiyai co nungar mbahe apo āgua. Esepia, nde pihañemoñetasa ndahei ihĩvi vahe Tūpa rovaque.

<sup>22</sup> Sese epoi nde pihañemoñeta raisa sui, eyerure Tūpa upe. Aviyeteramo iñerora ndeu —ehi—.

<sup>23</sup> Aicua nde p̄iha naporai vite iyavei nde p̄ihañemoñeta raisa p̄ipe vite ereico —ehi chupe.

<sup>24</sup> Evocoyase Simón omboyev̄i chupe:

—Peyeruremi catu yande Yar upe che rese; tipo eme acoi mbahe pe remimombehu cheu —ehi chupe.

<sup>25</sup> Yande Yar ñehesa mombehu pare ahe tecua pendar upe, apóstol omombehu-mbehu co ñehesa p̄is̄irosa resendar Samaria p̄ipendar tecua rupi yuv̄ireco. Ēḡüe ehi oyepota yuv̄iroyev̄i Jerusalén ve yuḡüeru.

*Felipe omombehu Jesucristo recocuer Etiopía pendar upe*

<sup>26</sup> Ip̄are T̄üpa rembiguai oyemboyecua Felipe upe aipo ehi chupe: “Ep̄üha, eso iroh̄i coti nde yepota āgua evocoi per̄i oḡüeȳi vahe oso Jerusalén sui, Gaza ve” ehi. Evocoi Gaza piar osasa iv̄i iporupir̄eh̄i rupi oso.

<sup>27</sup> Evocoyase op̄üha oso per̄i rupi. Aheve osovañchi ñep̄ei ava, ahe seco iv̄ate vahe guarepochi apocatusar Etiopía pendar cuña mborerecuar upe nara yepi, ahe mb̄ia oso vahe Jerusalén ve T̄üpa mboetei āgua.

<sup>28</sup> Oyev̄ise oc̄areto p̄ipe, oyerocūi T̄üpa ñeh̄e mombehusar Isaías rembicuachiaḡüer rese ou.

<sup>29</sup> Evocoyase Esp̄iritu aipo ehi Felipe upe: “Eyemboya c̄aretomi rese” ehi.

<sup>30</sup> Evocoyase v̄irov̄ise ahe ava, osendu iyeroqūi Isaías rembicuachiaḡüer p̄ipe oĩ. Ahese oporandu chupe:

—¿Eresenducua aipo T̄üpa Ñehengaḡüer nde yeroquisa eĩ? —ehi chupe.

<sup>31</sup> Etiopía pendar mb̄ia omboyev̄i chupe:

—¿Mara ahera vo che senducua viña ndipoise imombehu tuprisar cheu? —ehi chupe.

Ip̄are, “Erio, eyeupi, tereguap̄i coh̄ave che p̄iri” ehi Etiopía pendar chupe.

<sup>32</sup> Ahe Isaías rembicuach̄ia oyerocūi vahe p̄ipe aipo ehi:

“Inungar ava v̄iraso ovesa yuca āgua, ěḡüe ehi avei ahe mb̄ia seraso yuca āgua yuv̄ireco. Iyavei inungar ovesa nasasei et̄e guaḡüer rerocuase, ěḡüe ehi avei ahe mb̄ia noñeh̄ei et̄e.

<sup>33</sup> Osecomomini yuv̄ireco, ndipoi ava sep̄isar.

Ndipoi ichuindar.

Esep̄ia, omocañi co iv̄i sui yuv̄ireco” ehi Isaías rembicuach̄ia p̄ipe.

<sup>34</sup> Oyerocūi pare ahe Etiopía pendar oporandu chupe:

—Emombehumi cheu: ¿Ava rese p̄iha aipo Isaías oñeh̄e: oyese ae p̄iha, ambuae ava rese tie? —ehi.

<sup>35</sup> Evocoyase co ñehesa sui omombehu ñehesa av̄iye vahe Jesús recocuer resendar Etiopía pendar upe.

<sup>36</sup> Ip̄are oguata catuse yuv̄ireco, Etiopía pendar osepīa i. Aheve ahe aipo ehi chupe:

—Esep̄ia co i tui. ¿Ndiyai vo coh̄ave che āpiramomi t̄ei eve viña? —ehi.

<sup>37</sup> Ahese omboyev̄i chupe:

—Ereroya itese opacatu nde p̄iha p̄ipe, iya it̄e ndeu —ehi.

—Aroya it̄e niha Jesucristo ahe T̄üpa Rah̄ir secoi —ehi.

<sup>38</sup> Evocoyase omomb̄ita uca oc̄areto, ichui oḡüeȳi iv̄e yuv̄iraso. Aheve Etiopía pendar Felipe oñapiramo.

<sup>39</sup> Yuv̄inosese i sui, yande Yar Esp̄iritu v̄iraso ahe Etiopía pendar sui. Ahese ndosepīa iri; ěḡüe ehiño vor̄ivete oso per̄i rupi.

<sup>40</sup> Felipe rumo oyemboyecua Azoto ve. Ichui oso co tecua Cesarea piar rupi, omombehu Jesús recocuer opacatu tecua rupi. Ēḡüe ehi oyepota Cesarea ve oso.

<sup>1</sup> Jerusalén ve rumo Saulo oñemoiró iteanga vite yande Yar reroyasar upe oico. Oyucapa potaño ité. Sese oso pahi rerecuar ivate catu vahe upe,

<sup>2</sup> oporandu chupe: “Ereyapomira mbahe icatupri vahe cheu” ehi. “Taso Damasco ve, taseca co Tecocuer Piasu rupi cuimbahe, cuña yuvirecoi vahe” ehi. “Taipiſipa seru cohava nde rer piſe” ehi, “evocoiyase eremombehura cuachiar piſe Damasco pendar tũparo rerecuar upe” ehi pahi rerecuar ivate catu vahe upe.

<sup>3</sup> Ëgüe ehi yuvinoſe Jerusalén sui, yuviraso Damasco ve ambuae ava reseve. Virovi potase rumo Damasco yuviraso, aviyeteramo tēi osesape guasu iva sui chupe.

<sup>4</sup> Evocoiyase oviapi oso ivive. Osendu iva pendar ñehesa aipo ehi vahe: “Saulo, Saulo, ¿mahera vo che moña-moña eve?” ehi chupe.

<sup>5</sup> Evocoiyase oporandu chupe: “¿Ava vo nde ereico, nde mbia?” ehi. “Che Jesús, che niha co che moña che rereco eve” ehi chupe.

<sup>6</sup> “Epũha, eique Damasco ve. Aheve amombehu ucara mbahe nde rembiapoguã ndeu” ehi chupe.

<sup>7</sup> Ava rumo, yuviraso vahe supi, osiquiyé iteanga osenduse ñehesa iva suindar yuvireco. Esepia, ndosepiai eté ivate oñehe vahe yuvireco.

<sup>8</sup> Ipare Saulo opũha, omahe tēi; ndoicatui rumo mbahe repia. Ichui supindar oipiſi iyiva rese seraso Damasco ve yuvireco.

<sup>9</sup> Aheve mbosapi ari ndasesapiſoi, ndocarui, ndoihui avei oico.

<sup>10</sup> Aheve mbia Jesucristo reroyasar Ananías serer vahe secoi. Ahe iquer nungarve oyemboyecua yande Yar aipo ehi chupe: “¡Ananías!” ehi. “Co aico, che Yar” ehi imboyevi chupe.

<sup>11</sup> Evocoiyase yande Yar aipo ehi chupe: “Epũha, eso calle Ihivi serer vahe rupi. Eporandu Judas rētave Saulo, tecua Tarso pendar, rese. Ahe oyerokuĩ cũritei.

<sup>12</sup> Oquerve angahu osepia mbia Ananías serer vahe omondose opo iharive omboesapiſo iri” ehi.

<sup>13</sup> Evocoiyase omboyevi chupe: “¡Too! Che Yar, setá rumo evocoi mbia recocuer omombehu yuvireco cheu. Mbahe tēi oyapo vahe nde reroyasar reco maranehi upe Jerusalén ve.

<sup>14</sup> Cũritei ou rutei ahe mbia pahi rerecuar porocuita rupi opacatu nde rer rese oyeroya vahe roquendapa ãgua” ehi.

<sup>15</sup> Yande Yar rumo aipo ehi chupe: “Eso. Esepia, aiporavo evocoi mbia che recocuer rese oñehe vaherã ava ndahei vahe judío upe iyavei serecuar guasu yuvirecoi vahe upe, judío upe avei.

<sup>16</sup> Che ae amboyecua setá mbahe tēi chupe oiporara vaherã che remimbotar mboaviye ãgua” ehi yande Yar chupe.

<sup>17</sup> Evocoiyase oso secosave. Oiquese ahe oi piſe, oso, omondo opo Saulo rese aipo ehi chupe:

—Che rivri, Saulo, yande Yar Jesús oyemboyecua vahe ndeu peri rupi nde yuse, ahe che mbou ndeu nde mboesapiſo iri ãgua. Toique avei catu Espíritu Santo nde rese —ehi Saulo upe.

<sup>18</sup> Ahese voi eté pira pিরer nungar mbahe oviapipa sesa sui. Ahese voi sesapiſo iri. Ichui opũha. Ipare voi Ananías oñapiramo.

<sup>19</sup> Ipare Saulo ocaruse, ipĩrata catu iri. Moviro ari tēi opita iri Jesús reroyasar piri Damasco ve.

### *Saulo omombehu Jesús recocuer Damasco ve*

<sup>20</sup> Ipare voi oso oñehe judío tũparo yacatu rupi Damasco ve aipo ehi: “Jesús Tũpa Rahir ité secoi” ehi ahe pendar ava upe.

<sup>21</sup> Ava opacatu osendu vahe iñehe,

—¿Mara ehi pĩha co? —ehi tẽi yuvireco—. ¿Ndahei vo acoi co mbia Jerusalén ve Jesús reroyasar mara-mara tẽi vireco vahe? ¿Ndahei vo acoi co avei ou cohave ava Jesús reroyasar ha pendar pĩsi ãgua serasopa ãgua avei Jerusalén ve pahi rerecuar upe viña? —ehi yuvireco chupe.

<sup>22</sup> Saulo rumo omombehu tupri catu Jesús recocuer. Osecopi opacatu omu Damasco pendar. Omboyecua catu chupe Jesús Tũpa Rembiporavo ava pĩsiro ãgua secosa. Sese ndoicatui judío iñehe mboyevi yuvireco.

### *Saulo oñemi omu sui oamotarẽhise*

<sup>23</sup> Setá ari pare judío ahe pendar omboguai yuca ãgua Saulo yuvireco viña.

<sup>24</sup> Ahe rumo oyandu omboguaisa judío osãrose tecua ãchisa roquendipive ari, pĩtu momba yuvireco yuca ãgua viña.

<sup>25</sup> Jesús reroyasar rumo pĩtu pipe tecua tapia ãchisa oyere tupri vahe tecua rese, icupe rupi ombogüeyi iruova guasu pipe imoñemi imondo yuvireco.

### *Saulo Jerusalén ve secoi*

<sup>26</sup> Coiye Saulo oyepota Jerusalén ve. Aheve oyemboya pota tẽi Jesucristo reroyasar rese. Osiquiye rumo yuvireco ichui. “Aviyeteramo co Saulo, ‘Aroya Jesucristo cute’ ehi tupri tẽira yandeu” ehiño oyeupe yuvireco.

<sup>27</sup> Ipare rumo Bernabé vıraso Saulo apóstol yuvirecoi vahe upe. Aheve Bernabé omombehupa chupe aipo ehi: “Co mbia Saulo osepia yande Yar peri rupi iyavei yande Yar oñehe chupe. Ichui co oñehe osiquiyeẽhisa pipe Damasco ve Jesús recocuer rese” ehi.

<sup>28</sup> Evocoyase Saulo opıta aheve ipiri. Ari yacatu rupi apóstol rupi oguata yepi, iyavei omombehu yande Yar recocuer osiquiyeẽhisave.

<sup>29</sup> Oñehepoepi avei secocuer rese judío griego pipe oñehe vahe yuvireco. Ichui rumo oyuca potaño yuvireco.

<sup>30</sup> Oicuase rumo Jesucristo reroyasar yuvireco, vıraso voi eté Saulo Cesarea ve. Ichui omondo Tarso ve yuvireco.

<sup>31</sup> Evocoyase opacatu Jesús reroyasar yuvirecoi vahe Judea rupindar, Galilea rupindar iyavei Samaria rupindar, chupe oime mbahe tupri. Iyavei oyemovıracua tupri catu yuvireco yande Yar mboeteisa pipe, Espıritu Santo oipıtıvıi iyemboeta catu ãgua yuvireco.

### *Eneas mbogüera agüer*

<sup>32</sup> Pedro oguata opacatu rupi oso Jesucristo reroyasar repia. Ahe oso, osepia avei tecua Lida pendar Jesús reroyasar.

<sup>33</sup> Aheve osepia mbia Eneas serer vahe, ahe ndoguatai vahe. Vupave tẽi tui vahe ocho aravıter rupi.

<sup>34</sup> Pedro aipo ehi chupe:

—Eneas, Jesucristo nde mbogüera —ehi—. Eñarapuha, emoingatu nde rupa —ehi chupe. Eneas evocoyase oñarapuha voi.

<sup>35</sup> Osepıase opacatu Lida pendar, Sarón pendar co ndoguatai vahecuer guatase, vıroyapa voi eté yande Yar yuvireco.

### *Dorcas cuerayevi agüer*

<sup>36</sup> Ahe aravıter pipe Jope ve cuña Tabita serer vahe secoi, griego ñehe pipe rumo Dorcas serer. Ahe Jesucristo reroyasar secoi. Ahe secocuer aviye vahe oporopıtıvıi yepi.

<sup>37</sup> Imbaheasi guasu rumo. Coiye omano. Ipare ava sehögüer oyosei yuvireco. Ichui vıroyeupi oi ivate vahesave seraso yuvireco.

<sup>38</sup> Jope namombriimi Lida sui. Evocoyase oyanduse Jesús reroyasar Jope pendar Pedro Lida ve secoise, ahese omondo ñuvırío mbia seru poyava ãgua Jope ve yuvireco.

<sup>39</sup> Evocoyase Pedro oso supí yuvireco oyepota yuviraso Jope ve. Aheve viroyeupi oí ivateve seraso tehögüersave yuvireco. Opacatu cuña imer mano vahecuer oyere ati voi, oyaseho Pedro ivíi yuvireco. Omboyecua avei oturucuar ihari pendar reseve Dorcas rembiapogüer yuvireco chupe.

<sup>40</sup> Ipare Pedro omosepa rane opacatu ava ocarve. Ahese ahe ae oñenopiha, oyerure Tūpa upe. Ichui omahe ahe cuña omano vahe rese aipo ehi chupe:

—¡Tabita, eñarapuha! —ehi sehögüer upe.

Aipo oyeupe hese, Tabita omboi güesa. Pedro repiase, oñarapuha oĩ.

<sup>41</sup> Ahese oipisi Tabita po rese imoñarapuha. Ipare, “Perio” ehi opacatu Jesús reroyasar, cuña imer mano vahecuer upe avei, “Pesepia ocuerayevi” ehi chupe.

<sup>42</sup> Serãcua oyanduse opacatu Jope rupi yuvireco, setá ava yande Yar viroya yuvireco.

<sup>43</sup> Evocoyase Pedro opita setá ari aheve, mbia mbahe pírer mopítasar, Simón serer vahe, piri.

## 10

### *Pedro iyavei Cornelio*

<sup>1</sup> Tecua Cesarea ve mbia Cornelio serer vahe secoi, ahe cuartel Italiano serer vahe pendar cien sundao rerecuar.

<sup>2</sup> Ahe mbia omboetei Tūpa opacatu guahir, güembireco reseve yepi. Iyavei omondoño ité judío pítivií ãgua guarepochi, oyerogui avei Tūpa upe yepi.

<sup>3</sup> Ñepeí ari, caharuse las tres rupi, osepia oquer nungar pıpe Tūpa rembiguai güecosave aipo ehi chupe: “¡Cornelio!” ehi.

<sup>4</sup> Omahengatuse sese, “¿Mbahe, che Yar?” ehi osiquiyepave. Tūpa rembiguai rumo omboyevi chupe: “Tūpa oipisi nde yeruresa; osepia avei nde poroparaisuerecosa” ehi chupe.

<sup>5</sup> “Emondo mbia Jope ve Simón reca. Ahe serer avei acoi Pedro.

<sup>6</sup> Ahe secoi ambuae Simón, mbahe pírer mopítasar piri. Ahe sēta para guasu popıve chini” ehi chupe.

<sup>7</sup> Osose Tūpa rembiguai ichui, Cornelio oñehe ñuvirío güembiguai upe iyavei ñepeí sundao Tūpa mboeteisar upe, sese acoi oyeroya vahe yepi.

<sup>8</sup> Opacatu Tūpa rembiguai ñehe mombehu pare, omondo Jope ve.

<sup>9</sup> Ahere ayihive virovise Jope yuviraso, Pedro oyeupi oí ipe vahe harıve mbıter ari senise oyerogui ãgua.

<sup>10</sup> Vıeporēhıse ocaru pota viña. Omoingatu vıteseve rumo semihura yuvireco, avıyeteramo tēi osepia mbahe oquer pendar nungar:

<sup>11</sup> ahese osepia ıva oyemboise, ahe ichui turucuar tuvicha vahe pıpe ogüeyı mbahe, ñapıchimbri ipopi yacatu ou chupe.

<sup>12</sup> Ahe turucuar pıpe, osepia opacatu mahembiar vai, mboi, vırai vai tēi avei.

<sup>13</sup> Ahese osendu ñehesa aipo ehi vahe: “Pedro, epūha, eyuca, ichui ehı” ehi chupe.

<sup>14</sup> Pedro rumo omboyevi chupe: “Anı, che Yar, che rumo ndahı vahe ité co mbahe roho ava remimbotarēhi ndıhusai vahe yepi” ehi chupe.

<sup>15</sup> Osendu iri ñehesa aipo ehi vahe chupe: “Tūpa remimbotatuprı upe, ‘Ava remimbotarēhi, ndıhusai vahe’ nderei chıra” ehi.

<sup>16</sup> Ēgüe ehi mbosapı oyupagüer rupi chupe. Ipare turucuar oyevi ıvave oso.

<sup>17</sup> Pedro ipıhañemoñeta vıtese mbahe osepia vahecuer rese oquer nungar pıpe: “¿Mbahe rese pıha co oyemboyecua cheu?” ehi vıte oico. Aheseve Cornelio remimondo oporandu-randu pare yuvireco, oyepota Simón rēta roquendıpıve yuvireco.

<sup>18</sup> Oñehe pucu oı pıpendar upe yuvınoha: “¿Ave vo Simón, ahe Pedro serer vahe, secoi?” ehi yuvireco.

<sup>19</sup> Ipihañemoñeta vitesese Pedro mbahe oyemboyecua vahecuer rese, Espiritu Santo aipo ehi chupe: “Pedro, esendu rane, pe mbosapi mbia nde reca yuvireco.

<sup>20</sup> Eyemoingatu, egüeyi chupe, eso supi. ‘¿Asora pïha?’ erei rene. Esepia, che ambou evocoi mbia nde reca” ehi Espiritu Santo Pedro upe.

<sup>21</sup> Evocoiyase ogüeyi oso chupe.

—Che, che reca vahe peye. ¿Mbahe rese vo peyu cheu? —ehi chupe.

<sup>22</sup> Ahe evocoiyase omboyevi ñehe yuvireco chupe:

—Ore oroyu sundao rerecuar Cornelio ore cuaisa pipe, ahe mbia seco ñvi vahe, Tüpa mboeteisar opacatu judío osaisu, oipota rai yuvireco. Tüpa rembiguai oyocuai nde rese ereso vaheñã sêtave, ahe osendu vaheñã nde ñehesa —ehi yuvireco Pedro upe.

<sup>23</sup> Evocoiyase omoinguepa, omombitapa oyepiri ñepeï pïtu. Ahere ayihive oso supi, moviro Jesús reroyasar Johe pendar yuviraso avei supi Cesarea ve yuvireco.

<sup>24</sup> Ahere ayihive oyepotase Cesarea ve, yuviraso sêtave. Cornelio rumo osãro opacatu omu eta rese yuvireco iyavei omboriparete güembisoho reseve avei.

<sup>25</sup> Oyepotase sêtave oso, Cornelio rane osê voi, osovaïchi, oñenopiha sovai imboeteisa pipe.

<sup>26</sup> Pedro rumo aipo ehi chupe:

—Epüha, che niha nde nungar avei aico —ehi chupe.

<sup>27</sup> Evocoiyase ahe omoñeta seroique seraso oi pipe. Aheve ava oñemonuha vahe setã osepiã yuvireco.

<sup>28</sup> Ahe ava upe aipo ehi:

—Pe peicua judío porocuita aipo ehi vahe: “Peiquei rene ndahei vahe judío piri. Aní chiaveira pendori evocoi ava peico” ehi acoi —ehi Cornelio rëta pipendar upe—. Tüpa rumo omombehu cheu che quer nungar pipe: “ ‘Ava remimbotarëhi peico’ erei rene ambuae ava upe” ehi cheu.

<sup>29</sup> Pe pemondo ava che reca. Che evocoiyase nacheatëhi che yu ãgua pëu. Sese che aicua pota, ¿mahera vo che reru uca peye? —ehi.

<sup>30</sup> Evocoiyase Cornelio aipo ehi chupe:

—Opa co irungatu ari, caharuse co hora rupi tupri avei, che cohava che rêtave aicose, ndacarui eté che yerure ãgua Tüpa upe. Aheseve oyemboyecua mbia Tüpa rembiguai iturucuar rendí iteanga vahe cheu.

<sup>31</sup> Ahe aipo ehi cheu: “Cornelio, Tüpa osendu nde yeruresa iyavei oicua avei nde poroparisuerecosa.

<sup>32</sup> Emondo nde rembiguai Johe ve Simón Pedro serer vahe reca. Ahe oicove ambuae Simón rêtave, ahe mbahe pিরer mopítasar. Ahe sêta para guasu popive chini” ehi cheu.

<sup>33</sup> Sese amondo voi eté nde reca ãgua. Aviyete nde ereyu cohava. Cüritei co opacatu yaico cohava Tüpa rovaque. Orosendu pota opacatu nde ñehe yande Yar nde cuai vahe nde ñehe ãgua oreu —ehi Cornelio chupe.

### *Pedro oñehe Cornelio rêtave*

<sup>34</sup> Evocoiyase Pedro aipo ehi chupe:

—Aicua cute, supi eté Tüpa nomboyahoi yande raisu.

<sup>35</sup> Sese ambuae ñvi pipendar omboetei vahe Tüpa, oyapo vahe avei mbahe tupri yuvireco, ahe oipisira Tüpa.

<sup>36</sup> Aracahe Tüpa oñehe avei Israel suindar upe, omombehu ñehesa tupri yeamotarëhiëhisa resendar Jesucristo rembiaporã sui, ahe opacatu ava co ñvi pipendar yuvirecoi vahe Yar.

<sup>37</sup> Pe peicua tupri ité co mbahe oime vahe opacatu judío ñvi rupi. Ahe omboipi Galilea ve Juan ñeapiramosa mombehu pare.

<sup>38</sup> Peicua revo Tũpa omondo Jesús Nazaret pendar upe opĩratasa, oEspĩritu Santo avei. Ipare Jesús oguata opacatu rupi mbahe tupri apo oico. Ombogũera avei opacatu ava iparaisu vahe caruguar povrive yuvirecoi vahe. Esepia, Tũpa secoi sese.

<sup>39</sup> Ore orosepia opacatu Jesús rembiapogũer Judea ivi rupi, tecua Jerusalén piƣe avei. Aheve imu oyatica uca curusu rese yuca yuvireco.

<sup>40</sup> Tũpa rumo ombogũerayevi imombosapisa ari piƣe. Ipare omboyecua iri oreu.

<sup>41</sup> Nomboyecuai rumo opacatu ava upe, omboyecua ore sembiporavo oroico vahe upeñomi. Ore piri niha ocaru, oihu avei ocuerayevi pare.

<sup>42</sup> Iyavei ahe ore cuai: “Pemombehu ava upe. Co che Jesucristo, Tũpa Rembiporavo, aico opacatu ava recocuer rese porandu ãgua oicove vite vahe, omano vahe avei” ehi oreu.

<sup>43</sup> Ahe secocuer avei opacatu Tũpa ñehe mombehusar omombehu yuvireco aracahe aipo ehi: “Opacatu acoi seroyasar, ahe virecora Tũpa ñeroisa serer piƣe angaipa rese yuvireco” ehi —ehi Pedro Cornelio rēta piƣe yuvinoi vahe upe.

### *Espĩritu Santo oiƣe ava ndahei vahe judío piƣa piƣe*

<sup>44</sup> Pedro oñehe viteseve, Espĩritu Santo ogũeyi opacatu ava osendu vahe rese.

<sup>45</sup> “¡Too! Evocoyase ndahei vahe judío upe avei Tũpa omondo Espĩritu Santo inungar ombou yandeu” ehi Jesús reroyasar judío yuvirecoi vahe Pedro rupi yugũeru vahe yuvireco.

<sup>46</sup> Esepia, osendu ahe oñehese ñehesa ndicuasai vahe piƣe yuvireco Tũpa upe.

<sup>47</sup> Evocoyase aipo ehi vupindar upe:

—¿Oime piƣa ndoipotai vahe co ava ñeapiramo ãgua yande pãhu pendar? Esepia, co oipisi Espĩritu Santo yuvireco inungar yande —ehi vupindar upe.

<sup>48</sup> Sese,

—Yañapiramopa Jesucristo rer piƣe yuvireco —ehi.

Ipare Cornelio rēta piƣe yuvinoi vahe aipo ehi: “Epita vitemi moviro ari ore piri” ehi yuvireco chupe.

## 11

### *Pedro remimombehu Jerusalén pendar Jesús reroyasar upe*

<sup>1</sup> Evocoyase ambuae apóstol iyavei Jesús reroyasar Judea ve yuvirecoi vahe oyandu yuvireco ava ndahei vahe judío viroya avei Tũpa Ñehengagũer yuvireco.

<sup>2</sup> Oyeviƣe rumo Pedro Jerusalén ve oso, ahese setá judío Jesucristo reroyasar viroĩro sovai eté yuvireco,

<sup>3</sup> aipo ehi:

—¡Mahera eresofno tēi eté ndahei vahe judío piri! Iyavei nde erecaruño tēi eté ipãhuve yuvireco no —ehi yuvireco chupe.

<sup>4</sup> Pedro rumo omombehu tupri yipisui opacatu mbahe gũembiepia yuvireco chupe aipo ehi:

<sup>5</sup> —Che, tecua Jope ve aicose, ayerure. Ahese che quer nungarve asepia turucuar tuvicha vahe nungar ipopi yacatu ñapichisa vahe ogũeyi ou che rovai iva sui.

<sup>6</sup> Asepia ipiƣe opacatu mahembiar ihupirēhi, mbahe mimba, mboi, vírai vai tēi avei —ehi—.

<sup>7</sup> Iyavei ahese asendu ñehesa aipo ehi cheu: “Pedro, epũha, eyuca, ehui” ehi cheu.

<sup>8</sup> Che rumo aipo ahe chupe: “Aní, che Yar, che rumo ndahui vahe ité co mbahe roho ava remimbotarēhi yepi” ahe chupe.

<sup>9</sup> Ichui asendu iri ñehesa: “Tũpa remimbocatupri upe, ‘Ava remimbotarēhi’ erei rene” ehi cheu.

<sup>10</sup> Ēgũe ehi mbosapi oyupagũer rupi cheu. Ipare opacatu oyevi iri ivave oso.

<sup>11</sup> Aheseve avei mbosapî mbîa imbouprî Cesarea sui oyepota yuvîreco che recosave che reca.

<sup>12</sup> Espîritu Santo che cuai che so âgua che atêhiêhîsa pîpe supî yuvîreco. Co seis mbîa Tûpa reroyasar, yande mu, yuvîraso avei che rupî. Ipape aheve oroyepotase oroso, oroiqûe Cornelio rêtave.

<sup>13</sup> Ahe omombehu oreu osepia vahecuer gûêtave Tûpa rembiguai oyemboyecua vahe sovai iyavei aipo ehi vahe chupe: “Emondo mbîa tecua Jope ve Simón Pedro reru âgua.

<sup>14</sup> Ahe omombehura ndeu nde ñepîsîro âgua iyavei opacatu nde rêta pendar ñepîsîro âgua avei” ehi Tûpa rembiguai Cornelio upe —ehi—.

<sup>15</sup> Añehe ramoseve chupe, Espîritu Santo ou sese yuvîreco inungar yande rese ou aracaco.

<sup>16</sup> Evocoyase che chemahenduha voi eté yande Yar ñehengagüer rese aipo ehi vahecuer: “Supî eté î pîpe Juan oporoâpiramo, pe rumo Espîritu Santo pîpe peñeapiramora” ehi vahe.

<sup>17</sup> Tûpa Espîritu Santo omondo chupe inungar ombou yandeu yayeroyase yande Yar Jesucristo rese. Sese ndaipotai eté Tûpa ayamotarêhîra —ehi Pedro omu upe.

<sup>18</sup> Osenduse rumo co Pedro ñehe, imu noñehe iri sese yuvîreco. Ahe rumo, —îToo, evocoyase Tûpa ombou avei ndahei vahe judío upe secocuer recuñaro âgua, tecovesa apîrêhî vahe rereco âgua! —ehi Tûpa mboeteisa pîpe yuvîreco.

### *Ava Jesús reroyasar Antioquía ve*

<sup>19</sup> Iyavei Esteban yucare, Jesús reroyasar oñemosai Jerusalén sui yuvîreco. Esepia, Jesús amotarêhîmbar oyamotarêhî catu yuvîreco. Evocoyase amove Jesús reroyasar yuvîraso oñemi Fenicia ve, ambuae Chipre ve, ambuae Antioquía ve. Oguatasa rupî omombehuño ité judío upe gûeraño Jesús recocuer yuvîreco.

<sup>20</sup> Amove oñemosai vahe Chipre pendar iyavei Cirene pendar oyepota tecua Antioquía ve yuvîreco. Omombehu rumo ndahei vahe judío upe avei ñehesa avîye vahe yande Yar Jesús recocuer resendar yuvîreco.

<sup>21</sup> Yande Yar pîratasa vîreco yuvîreco. Evocoyase setá ava vîroya; oseya ité yîpîndar gûembieroya yuvîreco yande Yar reroya âgua.

<sup>22</sup> Serâcua oyepotase Jesús reroyasar upe Jerusalén ve, aheve omondo Bernabé yuvîreco Antioquía ve.

<sup>23</sup> Oyepotase aheve, osepia Tûpa sovasase. Aheve sorivete aipo ehi chupe: “Peyemovîracua catu yande Yar rese. Peyapo semimbotar opacatu pe pîha pîpe” ehi chupe yuvîreco.

<sup>24</sup> Bernabé avîye etepri vahe, vîroya ité Espîritu Santo iyavei oyeroya ité yande Yar rese. Evocoyase setá ava oyemboya yande Yar rese yuvîreco.

<sup>25</sup> Ipape oso Tarso ve Saulo reca.

<sup>26</sup> Oyosuse, güeru Antioquía ve. Aheve oyemboya yuvîreco ambuae vîroya vahe rese imbohe âgua ñepeî aravîter rupî. Setá ava oyembohe ipîri yuvîreco. Aheve Jesús reroyasar Antioquía pendar upe yîpîndar, “Cristo reroyasar” ehi yuvîreco.

<sup>27</sup> Aheseve Tûpa ñehe mombehusar yugüeru Antioquía ve Jerusalén sui.

<sup>28</sup> Ñepeî ipâhu pendar, Agabo serer vahe, opûha aipo ehi Espîritu Santo pîratasa pîpe chupe: “Oura tiavor guasu opacatu ivî rupî” ehi, (ahe tiavor oyepota mborerecuar guasu Claudio recose).

<sup>29</sup> Evocoyase Jesús reroyasar Antioquía pendar omondo pota voi guarepochi Jesús reroyasar Judea pendar pîtivîi âgua yuvîreco ocatugüer rupî.

<sup>30</sup> Êgüe ehi yande Yar reroyasar rârosar Judea pendar upe porerecosa mondo. Bernabé, Saulo ahe porerecosa vîraso yuvîreco.



## 12

### *Santiago mano agüer iyavei Pedro roquenda agüer*

<sup>1</sup> Ahe araviter pipe avei mborerecuar guasu Herodes omboipi Jesús reroyasar mombaraisu.

<sup>2</sup> Ahese oyuca uca quise pucu pipe Santiago, ahe Juan riquehir.

<sup>3</sup> Oyanduse mborerecuar guasu rembiapo, sorivete judío rerecuar yuvireco. Sese Herodes oipisi uca Pedro Pascua pieta pipe. Ahe ari rupi ohu judío pan ndayapepoi vahe yuvireco yepi.

<sup>4</sup> Pedro roquenda pare omondo irungatu imar sui irungatu-ngatu sundao omondo sãro ãgua yuvireco. Mborerecuar ipihañemoñeta: “Opase co Pascua pieta, amboyecua ucara ava rovaque” ehi viña.

<sup>5</sup> Evocoyase Pedro opita voquendasave sãrombri tupri chini. Jesús reroyasar rumo oyerogui pĩrata Tũpa upe yuvireco sese.

### *Tũpa omose uca Pedro soquendasa sui*

<sup>6</sup> Ahe ari vinose potase Herodes Pedro soquendasa sui, ahe pĩtu pipe Pedro oque ñuvirio sundao guãrosar rese. Ñapichisa ñuvirio carena pipe ou, ñuvinohambe avei sãrosar soquendasa roquendipive.

<sup>7</sup> Aviyeteramo tẽi Tũpa rembiguai oyemboyecua ique viteseve chupe. Ahese sendi guasú iteanga soquendasa pipe. Ahe oñatoi Pedro iqueve imomahe: “¡Epũha poyava!” ehi chupe. Ipũhase, opa voi oyera carena ipo sui.

<sup>8</sup> Ahese Tũpa rembiguai aipo ehi chupe: “Eyemonde, emonde nde pĩtaqui” ehi. Evocoyase Pedro omonde. Ipare aipo ehi iri: “Emonde avei nde yeamosa, eyu che raquicuei” ehi chupe.

<sup>9</sup> Ègüe ehi oso saquicuei. Ahe rumo ndoicuai Tũpa rembiguai oyeupe ègüe ehise. Ndoyavii iquerve tẽi ègüe ehi vahe chupe.

<sup>10</sup> Ichui yuvinose, oñocua yipindar guãrosar yuvireco. Ipare yuviraso catumi ambuae imoñuviriosa guãrosar oñocua avei. Oyepota oquenda guasu guarepochi apoprive ocarve yuvinose ãgua yuvireco. Ahe oquenda oyemboi ahe ae ité chupe yuvireco. Ipare yuvinose yuviraso pucumi ocarusu rupi. Aviyeteramo tẽi Tũpa rembiguai ndoyecua iri chupe.

<sup>11</sup> Evocoyase Pedro aipo ehi oyeupe: “¡Too! Supi eté Tũpa ombou cheu güembiguai che renose ãgua Herodes povri sui. Tũpa che pĩsiro judío rerecuar che yuca rãgüer sui” ehi oyeupe.

<sup>12</sup> Oyese opihañemoñeta pare, oso, oyepota Juan Marcos si María rõtave oso. Aheve setá ava oñemonuha oyerogui yuvireco sese.

<sup>13</sup> Oñehese Pedro oquenda ocar cotindarve, cuñatai, Rode serer vahe, osẽ imboi ãgua chupe.

<sup>14</sup> Osenduse rumo Pedro ñehe, oquenda omboi rãgüer sui, oña oique oi pipe vorivetesave, omombehu: “Pe Pedro ihãi oquendipive” ehi oi pĩpendar upe.

<sup>15</sup> Ahe rumo,

—¿Nanderocoi vo eico? —ehiño yuvireco chupe. “¡Aní! Supi eté” ehiño Rode chupe.

—Ndahei ahe, Tũpa rembiguai mo aipo sãrosar —ehiño yuvireco chupe.

<sup>16</sup> Aheseve Pedro oñehe viteño ité oquendipive ohã. Ichui omboise oquenda yuvireco chupe cute, oyembosiquiye iriño tẽi sepiase yuvireco.

<sup>17</sup> Pedro rumo opo omopuha imonguiriri ãgua. Ichui opa omombehu yande Yar opĩsiro agüer voquendasa sui chupe yuvireco. Ipare aipo ehi chupe:

—Pemombehupa Santiago upe iyavei ambuae Jesús reroyasar upe —ehi.

Ichui oseño, ambuaeve oso.

<sup>18</sup> Cõhese sundao oyepihamondii eteanga yuvireco. “¿Que pĩha Pedro?” ehi tẽi oyeupe yuvireco.

<sup>19</sup> Ipare Herodes omondo sundao Pedro reca. Ndoyosui eté rumo yuvireco. Evocoyase Herodes porocuita rupi oporandu tupri sãrosar upe: “¿Que vo secoi?” ehi tẽi chupe. Sese oyocuai ambuae sundao opacatu ahe sãrosar yucapa ãgua. Ipare Herodes osẽ Judea sui oso Cesarea ve oyemboerecua.

### *Herodes mano agüer*

<sup>20</sup> Yipindar rumo Herodes ndasorii eté ava Tiro pendar upe, Sidón pendar upe avei. Evocoyase ahe pendar oyoya ipihañemoñeta yuviraso vaheerã mborerecuar rovai. Ahe evocoyase oyembori Blasto rese yuvireco, ahe mborerecuar Herodes mboyoyasar. Ahe oporandu Blasto upe Herodes moñero uca ãgua rese yuvireco. Esepia, Herodes porocuita sui oipisi mbahe güemihura yuvireco.

<sup>21</sup> Herodes evocoyase omombehu ari oñehe vaheerã chupe. Osupitise ahe ari, omonde sese iturucuar mborerecuar secosa resendar yivirindar yuvireco. Ipare güenda imboeteipri harive oguapi oĩ. Aheve oñehe ava rehii upe.

<sup>22</sup> Evocoyase ava rehii osapucái pĩrata yuvireco aipo ehi: “¿Co mbia oñehe vahe ndahei ava tẽi, Tũpa ité!” ehi yuvireco Herodes upe imboeteisave.

<sup>23</sup> Ava aipo iheseve voi, ñepei Tũpa rembiguai oyapo mbaheerã guasu chupe. Ichui mbahe rasoi ocaru yaviter rupi yuvireco. Esepia, nomboetei eté Tũpa. Sese omano.

<sup>24</sup> Tũpa Ñehengagüer rumo imombehusa catu opacatu rupi.

<sup>25</sup> Iyavei Bernabé, Saulo ocuita mboaviye pare, viroyevi Juan Marcos seraso yuvireco.

## 13

### *Tũpa oiporavo Bernabé, Saulo oyeupe mboraviqui apo ãgua*

<sup>1</sup> Evocoyase Jesús reroyasar Antioquía pendar pãhuve oime Tũpa Ñehengagüer mombehusar, sese oporombohe vahe avei. Ahe Bernabé, Simón (chupe, “Avaũ” ehi yuvireco), Lucio evocoi Cirene pendar, Manaén (ahe mbia oyoya ocuacua mborerecuar Herodes, Galilea pendar reseve) iyavei Saulo.

<sup>2</sup> Ñepei ari opacatu Jesús reroyasar oñemonuhase yande Yar mboetei ãgua, oyecuacu avei, ahese Espiritu Santo aipo ehi chupe: “Peiporavo Bernabé iyavei Saulo. Evocoi mbia aiporavo cheyeupe mboraviqui apo ãgua” ehi Espiritu Santo yuvireco chupe.

<sup>3</sup> Evocoyase oyeroqui pare, omondo opo yuvireco iporavopri ãca harive sovasa ãgua. Ipare omondo yuvireco ambuae tecua rupi Jesús recocuer mombehu ãgua.

### *Apóstol yuvirecoi Chipre rupi*

<sup>4</sup> Evocoyase Bernabé, Saulo Espiritu Santo remimondo yuviraso Seleucia ve. Ichui yuviraso carite pipe caha pãhu Chipre ve.

<sup>5</sup> Oyepota yemboyasa Salamina ve yuviraso. Aheve omombehu Tũpa Ñehengagüer judío tũparo rupi yuvireco. Juan avei oso supi ipitiviã ãgua.

<sup>6</sup> Opase ité uguata caha pãhu Chipre pipe yuvireco, oyepota ambuae tecua Pafos serer vahesave yuviraso. Aheve judío ipaye vahe Barjesús serer vahe osepia yuvireco. Ahe oporombohe tẽi: “Che añehe Tũpa Ñehengagüer rese” ehi tupri tẽi vahe.

<sup>7</sup> Ahe ipaye vahe oicove Chipre pendar mborerecuar Sergio Paulo serer vahe piri, ahe mborerecuar yaracua vahe. Ahe güeru uca Bernabé, Saulo avei Tũpa Ñehengagüer rendu potasave oyeupe.

<sup>8</sup> Ipaye vahe rer griego ñehe pipe Elimas. Ahe ndoviroya ucai güerecuar upe ñehesa supi eté vahe.

<sup>9</sup> Evocoyase Saulo, Pablo serer vahe, vireco ité vahe Espiritu Santo opiha pipe, omahe tupri sese.

<sup>10</sup> Ipare aipo ehi chupe:

—¡Nde iporombopa serai vahe ereico! ¡Ndipihai vahe, Carugar rahir tēi ereico! Opacatu mbahe aviye vahe amotarēhisar tēi avei ereico no. ¡Mahera nderepoi potai yande Yar porombohesa supi eté vahe reroĩrosa sui.

<sup>11</sup> Eyapisaca, cūritei yande Yar nde mombaraisura. Nande mboesapisoi chira moviro ari rupi. Ichui ndereicatu iri chietera ari rendigüer repia āgua —ehi Pablo chupe.

Aipo ehi ramoseve voi, opacatu pītumimbi chupe. Oñehe tēi ava güeraso āgua upe.

<sup>12</sup> Ahe mbahe repiase, mborerecuar viroya yande Yar. Oyepihamondii porombohesa yande Yar resendar renduse.

*Pablo, Bernabé reseve yuvirecoi Antioquía ve Pisidia ivi pipe*

<sup>13</sup> Evocoyase Pablo, supindar avei, yuviraso carite pipe Pafos sui Panfilia rupindar Perge ve. Juan rumo oseya oyevi Jerusalén ve oso.

<sup>14</sup> Perge sui yuviraso Antioquía ve, ahe namombr̄i Pisidia sui. Aheve, mb̄ituhusa ari pipe, yuviroique judío tūparove oguapi yuvinoi.

<sup>15</sup> Oyeroqui pare Tūpa porocuita resendar cuachiar pipe, Tūpa ñehe mombehusar cuachiar pipe avei, tūparo pendar rerecuar omondo oñehe Pablo upe:

—Ore mu, perecose mbahe pemombehu vahe r̄a co ava monguerēhi āgua, pemombehum̄i yandeu cūritei —ehi.

<sup>16</sup> Evocoyase Pablo opūha oh̄a. Omopuha avei opo ‘toyapisaca che ñehe rese yuvireco’ oya aipo ehi:

—Che mu eta, Israel iguar, iyavei pe ndahei vahe judío Tūpa mboeteisar, pesendu che ñehe —ehi—.

<sup>17</sup> Israel iguar Tūpa oiporavo yande ramōi oyeupe nara, ahe Egipto ivi pipe omboeta secua ambuae vahe secosa pipe. Ipare op̄iratasa pipe vino-sepa ahe ivi sui aracahe.

<sup>18</sup> Ipare Tūpa oñemosañ̄o yande ramōi reco ai upe cuarenta arav̄iter rupi, oguatase yuvireco ivi iporupir̄ehisa rupi.

<sup>19</sup> Ipare omocañ̄i ava eta Canaán pipendar siete tupri yuvirecoi vahe serecuar reseve-seve. Ipare omondo Canaán ivi yande ramōi upe nara.

<sup>20</sup> Ēgüe ehi cuatrocientos cincuenta arav̄iter rupi yapo yuvireco —ehi.

“Ipare Tūpa ombou ava recocuer moingatusar oporocuai vahe r̄a. Ipa vahe ip̄ahu pendar serer Samuel aracahe. Ahe Tūpa ñehe mombehusar avei.

<sup>21</sup> Ahese yande ramōi eta oporandu yuvireco Tūpa upe mborerecuar guasu rese. Evocoyase Tūpa omondo Saúl chupe, ahe Cis rahir, ahe yande ramōi Benjamín suindar secoi. Oporocuai cuarenta arav̄iter rupi oico.

<sup>22</sup> Ipare Tūpa virocua imborerecuasa ichui; omondo David upe yande ramōi cuai āgua. Ahe secocuer rese aipo ehi: ‘Co David, Isaí rahir, oyapo che remimbotar yepi. Ahe omboaviyera che porocuita’ ehi Tūpa.

<sup>23</sup> Ahe David suindar sui, Tūpa ombou Jesús Israel iguar p̄isiro āgua. Aracaheve Tūpa omombehu co yande ramōi upe.

<sup>24</sup> Yande Yar yu renondeve, Juan omombehu opacatu Israel iguar upe: ‘Pemboasi pe angaipa, peyevi Tūpa upe pe ñeapiramo āgua’ ehi chupe.

<sup>25</sup> Juan omboaviye senimise ocuita, aipo ehi ava upe imombehu: ‘Pepihañemoñeta revo: co ité yande p̄isiora, peye cheu viña. Oura rumo ambuae che raquicuei. Ahe che sui ivate catu vahe sese cheu ndiyai ipitaquisā yora āgua ipi sui’ ehi Juan” ehi judío tūparo pendar upe imombehu.

<sup>26</sup> “Che mu eta, pe Abraham suindar iyavei ndahei vahe Abraham suindar Tūpa mboeteisar, opacatu yandeu nara ombou Tūpa co ñehesa p̄isirosa resendar.

<sup>27</sup> Jerusalén pendar rerecuar avei ndoicuai evocoi Jesús Tūpa remimbou secoise yuvireco. Iyavei ndosenducuai Tūpa ñehe mombehusar cuachiar pipe oyeroquise

mbítuhusa ari yacatu yuvireco. Ichui ahe ae oyuca uca yuvireco. Ëgüe ehi imboaviye Jesús rese Tūpa ñehe mombehúsar rembicuachiagüer pìpendar yuvireco.

<sup>28</sup> Yepe ndoyosui mbahe sembiapo rai yuca uca ãgua yuvireco viña, ahe rumo oporanduño Pilato upe yuca uca ãgua rese yuvireco” ehi.

<sup>29</sup> “Ichui omboaviyese opacatu icuachiapri pìpendar yuvireco, oviroyi uca curusu sui ñoti ãgua yuvireco.

<sup>30</sup> Tūpa rumo ombogüerayevi iri.

<sup>31</sup> Setá ari rupi oyemboyecua oyeupi oguata vahe upe, evocoi ava yugüeru vahe supi Galilea sui, Jerusalén ve. Cūritei ahe ava ité omombehu Jesús recocuer ava upe yuvireco” ehi tūparo pendar upe.

<sup>32</sup> “Sese che mu eta, cūritei oromombehu pēu evocoi ñehesa aviye vahe Tūpa omondo vahe yande ramo upe aracahe.

<sup>33</sup> Tūpa omboaviye ramo güemimombhugüer yande Israel suindar yaico vahe upe, ombogüerayevise Jesús. Evocoi güemimombehu oicuachía uca Salmo moñuviriosa pipe aipo ehi: ‘Co pipe nde che Rahir ereico; che nde Ru aico’ ehi Tūpa chupe.

<sup>34</sup> Tūpa omombehu avei güemimbogüerayevi sete tuyuēhi ãgua icuachiapri pipe aracahe aipo ehi: ‘Che niha oroovasara acoi David upe che ñehe maranehi supi tupri vahe mboaviye ãgua’ ehi.

<sup>35</sup> Sese omombehu avei ambuae icuachiapri pipe: ‘Nde, Tūpa, ndereseyai chira nde rembiguai Ava seco maranehi vahe rete ituyupa ãgua’ ehi.

<sup>36</sup> Supi eté, David omboaviye ocuaita ava rese ohañecosa pipe yepi. Ipare omano. Evocoiyase oyapocatu tuvipave imu pãhuve yuvireco. Ahe setecuer rumo opaño ité ituyu” ehi.

<sup>37</sup> “Acoi Tūpa ombogüerayevi vahe retecuer rumo ndituyui eté” ehi tūparo pendar upe imombehu.

<sup>38</sup> “Sese, che mu eta, peyapisaca, tapeicua evocoi Jesús recocuer sui oime ñeroisa angaipa rese yandeu. Ahe co amombehumi pēu. Moisés porocuita sui ndipoi ñeroisa angaipa rese yande reco mohivi ãgua.

<sup>39</sup> Jesús recocuer sui rumo oime ñeroisa ñepeipei viroya vahe upe” ehi.

<sup>40</sup> “Peicua catu co mbahe sui, toviapi eme pe harive acoi Tūpa ñehe mombehúsar rembicuachiagüer pipe aipo ehi vahe:

<sup>41</sup> ‘Esepia, pe seroĩrosar peico vahe. Peyepihamondi, ipare pecañi tēira. Esepia, che ayapora mbahe pe recoveseve. Yepe ambuae omombehu tupri itera pēu che rembiaporã viña, pe rumo ndaperoyai chietera’ ehi Tūpa” ehi Pablo tūparo pendar upe.

<sup>42</sup> Yuvinose potase tūparo sui, omombita Pablo yuvireco: “Teremombehu irimi eremombehu vahe ñehesa ambuae mbítuhusa ari pipe oreu” ehi yuvireco chupe.

<sup>43</sup> Yuvinosese ava rehi tūparo sui, setami judío iyavei ambuae oyembojudío vahe yuviraso Pablo, Bernabé rupi yuvireco. Ahese, “Peico tupri catu Tūpa pe rovasasa pipe” ehi ava upe yuvireco.

<sup>44</sup> Ambuae mbítuhusa ari pipe seni opacatu ava ahe pendar oñemonuha yuvireco Tūpa Ñehengagüer rendu ãgua.

<sup>45</sup> Osepiase ava rehi, judío rereciar oñemoiró iteanga Pablo upe, supindar upe avei yuvireco. Viroiro Pablo ñehe ava upe yuvireco.

<sup>46</sup> Evocoiyase Pablo, Bernabé reseve oñehe yuvireco judío upe osiquiyeēhisave:

—Tūpa ore cuai pēu rane ore ñehe ãgua. Pe rumo ndapeyapisaca potai iñehengagüer rese. Ipipe sui ndiyai peipisi tecovesa apirēhi vahe. Evocoiyase orosora, oroñehe ava ndahei vahe judío upe.

<sup>47</sup> Esepia, yande Yar ombou ore cuaitarã co ñehesa rese aracahendar aipo ehi vahe:

‘Che oroporavo tataendi nungar nde reco ãgua ndahei vahe judío yuvirecoi vahe upe pĩsirosa reroguata ãgua opacatu ivi rupi’ ehi.

<sup>48</sup> Ava ndahei vahe judío osenduse co ñehesa, oviharete yuvireco, omboetei avei Tũpa Ñehengagüer. Opacatu ava iporavopri tecovesa apirẽhi vahe pĩsi ãgua, ahe viroya yuvireco.

<sup>49</sup> Evocoiyase Tũpa Ñehengagüer omombehu opacatu ahe ivi rupi yuvireco.

<sup>50</sup> Judío rumo omonguerẽhi cuña imboyeroyapri Tũpa mboeteisar iyavei mbia seco ivate vahe Pablo, Bernabé mose uca ãgua güecua sui yuvireco yamotarẽhisave.

<sup>51</sup> Ahese Pablo, Bernabé oipipete opitaqui ivi sui yuvireco ‘Tũpa toicua mbahe sembiapo ai rese yuvireco chupe’ oya. Ichui yuviraso Iconio ve.

<sup>52</sup> Jesús reroyasar rumo oviharete yuvireco, vireco ité Espiritu Santo oyese yuvireco.

## 14

### *Pablo, Bernabé reseve omombehu Tũpa Ñehengagüer Iconio ve yuvireco*

<sup>1</sup> Pablo, Bernabé oyepota Iconio ve yuviraso. Aheve yuviroique judío tũparo pipe, omombehu tupri yandé Yar recocuer yuvireco. Sese setá ava viroya ñehesa yuvireco judío, ndahei vahe avei judío.

<sup>2</sup> Judío ndoviroyai vahe rumo oipihañemoñeta rerova yuvireco ava ndahei vahe judío Pablo, Bernabé iyavei ambuae Jesús reroyasar amotarẽhi ãgua.

<sup>3</sup> Ahe rumo opita pucu yuvireco Iconio ve, omombehuño yandé Yar recocuer osiquiyeẽhisave yuvireco. Aheve Tũpa ombou opiratasa mbahe yavai vahe apo ãgua chupe ‘ichui toicua yuvireco Pablo, Bernabé che poroaisusa mombehuse’ oyapave.

<sup>4</sup> Ahe tecua pendar rumo ipihañemoñeta yoivi yuvireco: ñepi judío pihañemoñetasa rupindar; ambuae evocoiyase apóstol pihañemoñetasa rupindar yuvireco.

<sup>5</sup> Oime judío iyavei ndahei vahe judío oyemboyoya mborerecuar rese mara-mara tẽi sereco ãgua yuvireco, “Ita pipe avei yayapi-yapi” ehi yuvireco chupe viña.

<sup>6</sup> Oyanduse rumo yuvireco, oñemi voi yuviraso Licaonia rupi, Listra ve, Derbe ve, ipopi rupi avei.

<sup>7</sup> Supi omombehu ñehesa aviye vahe Jesús resendar yuvireco.

### *Pablo yapi-yapisa ita pipe Listra ve*

<sup>8</sup> Listra ve yuvirecoise, oime mbia oha ramomi suive ndoguatai vahe. Ahe mbia oguapi oĩ

<sup>9</sup> oyapisaca Pablo ñehe rese. Ahese Pablo omahengatuse sese, oicua ndoguatai vahe oyeroya ité Tũpa rese ocuera ãgua.

<sup>10</sup> Evocoiyase aipo ehi pĩrata chupe:

—¡Epũha! —ehi.

Ahese opo, opũha, uguata voi.

<sup>11</sup> Osepiase ava rehii mbahe sembiapo yuvireco, osapucái pĩrata Licaonia ñehe pipe yuvireco:

—¡Tũpa ité ava nungar ogüeyi yuvireco yandeu! —ehi yuvireco Pablo, Bernabé upe viña.

<sup>12</sup> Ipihñemoñeta yuvireco Bernabé ahe tũpa Zeus iyavei Pablo ahe tũpa Hermes viña. Esepia, Pablo oñehe vahe.

<sup>13</sup> Ahese co tũpa Zeus pahi güeru tivi, mbahe potri avei. Ahe tecua tapia roquendave, ahe Zeus tũparo tecua pipe ava reiquesa rupi chini. Oyuca pota tivi Pablo, Bernabé mboetei ãgua yuvireco viña.

<sup>14</sup> Oicuese rumo Bernabé, Pablo, ahese omondo oturucuar yuvinoña ava pãhuve; oñehe pĩrata yuvireco:

<sup>15</sup> —Mbia, ¿mahera ãgüe peye oreu? —ehi—. Ore rumo ava tã pe nungar avei oroico. Oromombehu: “Pepoi co mbahe ãgüe ehi tã vahe mboeteisa sui; peroya Tũpa supi etã vahe” orohe pãu. Ahe oyapo vahe ìva, ìvi, para guasu, opacatu ipor reseve.

<sup>16</sup> Aracahe rumo Tũpa, “Ëgüe tehi oguata ndahei vahe judío opihãñemoñetasa rupi yuvireco” ehi viña.

<sup>17</sup> Tũpa rumo ndasesarai ava upe mbahe tupri apo ãgua sui. Ahe ombou amar pãu mbahe miti ha aviye ãgua yepi. Ëgüe ehi mbahe tembihu imbou iyavei viharetesa pãu —ehi ava upe yuvireco.

<sup>18</sup> Yepe aipo omombehu yuvireco chupe, ava rehi rumo seniño itã tãvi oyuca yuvireco chupe imboetei ãgua viña.

<sup>19</sup> Ahese oyepota moviro judío Antioquía sui, Iconio sui avei. Oipihãñemoñeta rerova ava rehi yuvireco. Ichui oyapi-yapi ita pipe Pablo yuvireco. Ipare ombotiriri seraso yuvireco tecua ìvi. Ipihãñemoñeta: “Yayuca itã” ehi yuvireco chupe viña.

<sup>20</sup> Oyere tupri Pablo rese Jesús reroyasar yuvireco. Ahe rumo oñarapuha, oique iri oso tecua pipe. Ahere ayihive yuvirase oyevi yuvirase Bernabé reseve Derbe ve.

<sup>21</sup> Omombehu tuprise co ñehesa icatupri vahe Derbe rupi, setã ava viroya yande Yar yuvireco. Ipare oyevi yugüeru Listra rupi, Iconio rupi avei, oyepota Antioquía ve yuvireco.

<sup>22</sup> Ahe supi omonguerãhi catu opacatu Jesús reroyasar yuvireco, aipo ehi imombehu: “Yepe ava yande mombaraisura yuvireco viña, yaroyaño itera rumo Jesucristo. Sese peseya eme itã seroyasa. Yandeu aviye catu itã mbahe-mbahe tã pipe yande recose Tũpa mborerecuasave yande reique ãgua” ehi yuvireco Jesús reroyasar upe.

<sup>23</sup> Ipare oiporavo ava Jesús reroyasar rãro ãgua ñepe-pe ñemonuhasa rupi. Oyeroqui iyavei oyecuacu. Ipare viropovãhe yande Yar upe iporaviqui ãgua yuvireco.

### *Pablo, Bernabé oyevi yuvireco Antioquía ve Siria ìvi rese*

<sup>24</sup> Ipare yuvirase Pisidia rupi, oyepota Panfilia ìvi rese.

<sup>25</sup> Omombehu Tũpa Ñehengagüer yuvireco Perge ve. Ipare yuvirase Atalia ve.

<sup>26</sup> Ahe ichui yuvirase carite pipe Antioquía ve, ahe tecua pipe yipindar imondopri Tũpa upe sovasapri yuvirecoi mboraviqui apo ãgua. Aheve tupri avei imboaviye pare oyevi yuvireco.

<sup>27</sup> Oyepotase Antioquía ve yugüeru, omonuha opacatu Jesús reroyasar yuvireco. Aheve omombehu opacatu Tũpa mbahe oyapo vahe oyese yuvireco iyavei aipo ehi: “Yande Yar ombou avei ava ndahei vahe judío upe Guahir reroya ãgua yuvireco” ehi yuvireco omboetasa upe.

<sup>28</sup> Aheve Pablo, Bernabé opita pucu yuvireco ipiri.

## 15

### *Jesús reroyasar oñemonuha Jerusalén ve yuvireco*

<sup>1</sup> Evocoyase moviro mbia Jesús reroyasar judío yugüeru Judea sui Antioquía ve. Ahe ombohe Jesús reroyasar yuvireco aipo ehi: “Aracahe Tũpa oyocuai Moisés yande ramoi cuai ãgua: ‘Pembocircuncida opacatu pe mu cuimbahe cheu nara’ ehi Tũpa aracahe” ehi yuvireco. “Cũritei acoi ãgüe ndapeyeise Jesús reroyasar upe, noñepisiroi chietera yuvireco” ehi Antioquía pendar upe yuvireco.

<sup>2</sup> Pablo, Bernabé reseve rumo oñehe pãrata yuvireco chupe. Nomoingatu catuise rumo mbahe yuvireco, ahese Jesús reroyasar omondo Pablo, Bernabé iyavei ambuae omboetasa Jerusalén ve apóstol upe iyavei Jesús reroyasar rãrosar upe aipo mbahe moingatu ãgua yuvireco.

<sup>3</sup> Ëgüe ehi Jesús reroyasar Antioquía pendar yocuai imondo yuvireco. Oñocuase Fenicia, Samaria avei yuvirase, oguatasa rupi omombehu-mbehu Jesús reroyasar upe

ndahei vahe judío recocuer yuvireco aipo ehi: “Setá ava ndahei vahe judío opa oseya aracahendar aracuasa Tūpa rupi oguata āgua yuvireco” ehi. Ahese opacatu Jesús reroyasar oyembovīharete yuvireco senduse.

<sup>4</sup> Yuviroyepotase Jerusalén ve, apóstol, Jesús reroyasar rārosar iyavei ambuae Jesús reroyasareta oipisi tupri yuvireco. Aheve omombehu Tūpa mbahe oyapo vahe oyese yuvireco.

<sup>5</sup> Osenduse rumo, moviro Jesús reroyasar fariseo opūha voi aipo ehi yuvireco chupe: —Aní —ehi—. Pembocircuncida rane ité catu opacatu Jesús reroyasar ndahei vahe judío —ehi yuvireco—. Peyocuai avei opacatu ambuae Moisés porocuita mboaviye āgua yuvireco —ehiño ité yuvireco.

<sup>6</sup> Ahese apóstol, Jesús reroyasar rārosar avei oñemonuha oyemomborandu āgua aipo mbahe rese yuvireco.

<sup>7</sup> Yemomborandu viteseve, Pedro opūha ipāhuve aipo ehi:

—Che mu, peicua niha aracaco Tūpa che poravo pe pāhu sui co ñehesa poropīsirosa resendar mombehu āgua ava ndahei vahe judío upe ‘toviroya yuvireco’ oyapave.

<sup>8</sup> Tūpa oicua ité opacatu ava pihañemoñetasa. Chupe avei omondo Espiritu Santo inungar yandeu. Ipipe sui yaicua Tūpa oipisi avei ahe ava oyeupe nara —ehi—.

<sup>9</sup> Evocoyase, “Judío aviye catu vahe ava ndahei vahe judío sui” ndehi Tūpa. Esepia, opacatu oyoya pāve Tūpa upe yaico. Sese omoatiro ipihañemoñeta rai sui oyese yeroyasa pipe.

<sup>10</sup> ¡Pe tie pesecoāha pota Tūpa! ¡Mahera peyocuai uca pota co Jesús reroyasar mbahe yavai rai vahe apo āgua! Aní rumo. Esepia, yande ramoi ndoicatu Tūpa porocuita mboaviye āgua yuvireco, yande avei ēgüe yahe —ehi—.

<sup>11</sup> Co rumo, yaroyase yande Yar Jesucristo, yande pīsirora oporoaisusa pipe, inungar co ava ndahei vahe judío yuvirecoi —ehi Pedro.

<sup>12</sup> Evocoyase opacatu oyemonguiriri yuvireco, osendu Bernabé, Pablo ñehesa, mbahe sembiapo avei yuvireco. Evocoyase omombehu ndayasepia vahe poromondiisa Tūpa oyapo uca ava ndahei vahe judío pāhuve yuvireco chupe.

<sup>13</sup> Osendupase iñehe yuvireco, ahese Santiago aipo ehi:

—Che mu, Jesús reroyasar, peyapisacami che ñehe rese:

<sup>14</sup> Simón omombehu yandeu Tūpa osaisu avei ava ndahei vahe judío. Sese oiporavo ahe ava oyeupe nara —ehi—.

<sup>15</sup> Oyoya tupri Tūpa ñehe mombehusar rembicuachiagüer rese. Ñepe ipāhu pendar oicuachía aracahe aipo ehi:

<sup>16</sup> ‘Coiye catu ayevíra vitu. Ahese ayapo piasu irira che rēta David oyapo uca vahecuer, ahe oi imocañipirer. Ambopiasu irira oitipa vahecuer yuvireco.

<sup>17</sup> Ēgüe ahera yapo opacatu ambuae ava, toseca oYar yuvireco, che yapave opacatu ava ndahei vahe israelita cheu nara ipehapri reseve.

<sup>18</sup> Evocoi yande Yar rembiaporā icuapri aracahe suive’ ehi Tūpa ñehe mombehusar aracahe.

<sup>19</sup> “Sese chepihañemoñeta iya ndayayocuai chira Moisés porocuita rupi oñecuñaro vaherā ndahei vahe judío Tūpa rupi oguata āgua yuvireco” ehi.

<sup>20</sup> “Aviye rumo yaicuachias chupe co mbahe resendar güeraño: Pehui rene mbahe mimba yucapri mbahe rahanga tēi upe seropovēhepri iyavei ndapeaguasai chira, pehui rene mbahe mimba yucapri suvi renosepirēhi, mbahe ruvi avei” ehi.

<sup>21</sup> “Esepia, opacatu tecua rupi yuvirecoi ava omombehu vahe Moisés porocuita ñepeipei mbituhusa ari pipe judío tūparo pipe aracahe suive. Aipo rupive” ehi Santiago.

*Icuachiapri ndahei vahe judío upe nara*

<sup>22</sup> Ahese apóstol, Jesús reroyasar rãrosar, ambuae Jesús reroyasar avei omondo pota opãhu pendar Pablo, Bernabé rupi Antioquía ve yuvireco. Oiporavo yuvireco ñuvirío mbia, ahe Judas Barsabás iyavei Silas. Ahe imboyeroyapri omboetasa pãhuve yuvireco.

<sup>23</sup> Ahe supi aipo ehi icuachía imondo yuvireco:

“Ore apóstol, Jesús reroyasar rãrosar, pe mboetasa oroico vahe. Pe mboaviravesa, ndapemarai revo pe ndahei vahe judío Antioquía pendar, Siria pendar, Cilicia pendar avei.

<sup>24</sup> Oroyandu amove ava ore pãhu pendar pe mañeco tẽi aipo oporombohesa pipe yuvireco. Ahe ava ndahei ore ocuaita pipe yuviraso pẽu pe pihañemoñeta rerova.

<sup>25</sup> Sese oyoya orepihañemoñeta oroiporavo ñuvirío mbia ore rembiaisu ore rivri Bernabé, Pablo rupi imondo eipeve pẽu.

<sup>26</sup> Ahe acoi oyemondo vahe mbahe-mbahe tẽi povrive yande Yar Jesucristo recocuer rese yuvireco.

<sup>27</sup> Oromondo Judas, Silas avei pẽu: ahe teieté omombehura opacatu cuachiar pipendar pẽu yuvireco.

<sup>28</sup> Aviye Espiritu Santo upe, oreu avei co porocuita güeraño oromondo vahe rese pẽu. Ndape cuaisa pota iri rumo ambuae mborocuita rese.

<sup>29</sup> Pehui rene mbahe mimba yucapri seropovẽhepri mbahe rahanga tẽi upendar, ndapehui chiaveira mbahe ruvi, mbahe mimba yucapri suvi renosepirẽhi vahe iyavei ndapeguasai chira. Pepoise evocoi mbahe naporai vahe sui, oimera mbahe tupri pẽu. Aipo rupive. Peico tupri” ehi.

<sup>30</sup> “Aviye” ohe pare, yuviraso, oyepota Antioquía ve. Aheve opase omonuha Jesús reroyasar yuvirecoi vahe omondo cuachiar yuvireco chupe.

<sup>31</sup> Ahe cuachiar rese oyerouise, oyemboviharete yuvireco.

<sup>32</sup> Judas, Silas Tũpa suindar ñehesa mombehusar avei yuvirecoi. Sese omboviharete catu iyavei omonguerẽhi catu avei ahe ava yuvireco oñehe pipe.

<sup>33</sup> Opitase moviro ari aheve, Jesús reroyasar Antioquía pendar aipo ehi: “Aviye. Peyevi tupri pe mbousar upe” ehi yuvireco chupe.

<sup>34</sup> Silas rumo opita potaño ité aheve.

<sup>35</sup> Pablo, Bernabé avei opita viteño ité aheve yuvireco, ahe setá ambuae Jesús reroyasar reseve imbohe vite ãgua yande Yar resendar ñehesa rese yuvireco.

### *Imoñuviriosa Pablo guata agüer Jesús recocuer mombehu ãgua*

<sup>36</sup> Coiye Pablo aipo ehi Bernabé upe:

—Yaso, yasepia iri Jesús reroyasar opacatu yande Yar ñehengagüer yamombehu vahecuer rupi, ¿mara ehi pãha ahe yuvireco? —ehi.

<sup>37</sup> Ahese Bernabé viraso pota Juan Marcos oyeupi viña.

<sup>38</sup> Nomboyoyai rumo Pablo ipihañemoñeta rese. Esepia, cuese Juan Marcos oseyaño oyepotase yuvireco Panfilia ve. “Taipitiviñño iporaviquisa rese” ndehi chupe.

<sup>39</sup> Nomoingatuise mbahe oyeupe yuvireco, oyepepiño yuvireco oyesui. Ahese Bernabé viraso Marcos oyeupi carite pipe Chipre ve.

<sup>40</sup> Pablo rumo oiporavo Silas oyeupi icho ãgua. Yuvinose ãgua Antioquía sui, Jesús reroyasar ahe pendar aipo ehi yuvireco chupe: “Tape rovasa Tũpa oporoaisusa pipe” ehi yuvireco imondo.

<sup>41</sup> Ipare yuviraso Siria, Cilicia rupi Jesús reroyasar monguerẽhi catu ãgua yuvireco.

## 16

### *Timoteo oso Silas ndugüerã Pablo rupi*

<sup>1</sup> Pablo ondugüer reseve yuviraso Derbe ve, Listra ve avei. Aheve osepia Jesús reroyasar, Timoteo serer vahe, judía, Jesús reroyasar membri. Iyesupa rumo griego.



<sup>2</sup> “Evocoi Timoteo aviye etepri” ehi Jesús reroyasar Listra pendar, Iconio pendar avei yuvireco chupe.

<sup>3</sup> Pablo viroguata potaño ité Timoteo oyeupi. Sese seroguata renondeve, ombocircun- cida uca seroïroëhi ãgua judío yuvirecoi vahe upe. Esepia, opacatu oicua Timoteo ru griego secose yuvireco.

<sup>4</sup> Evocoyase opacatu tecua iguatagüer rupi omombehu ahe mborocuaita apóstol, Jesús reroyasar rãrosar Jerusalén pendar ombou vahe yuvireco chupe.

<sup>5</sup> Sese Jesús reroyasar ahe tecua rupindar oyemoviracua catu yuvireco Jesús reroyasa pipe iyavei oyemboeta catu yuvireco ari rupi.

*Tüpa omondo uca Pablo Macedonia ve iquer nungar pipe*

<sup>6</sup> Espiritu Santo ndoipotai Asia rupi yuviraso vahe rã Tüpa Ñehengagüer mombehu ãgua. Sese oyahuva yuviraso Frigia rupi, Galacia rupi avei.

<sup>7</sup> Ëgüe ehi oyepota Misia popive yuvireco. Ichui yuviraso pota tõi Bitinia ve. Jesús Espiritu rumo ndoipotai icho ãgua supi.

<sup>8</sup> Ahese osasaviño yuviraso Misia sui carite guasu yemboyasa Troas ve oyepota ãgua yuvireco.

<sup>9</sup> Oyepotase aheve, ahe pïtu pipe Pablo oquer nungar pipe osepia mbia, Macedonia pendar, “Ereyumira Macedonia ve ore pïtivii ãgua viña” ehi ohã chupe.

<sup>10</sup> Ipare ore oroyemoingatu voi eté Macedonia ve ore so ãgua. Esepia, ore oroicua ité Tüpa aheve ore mondora ñehesa pïsirosa resendar mombehu ãgua.

*Pablo, Silas Filipino ve yuvirecoi*

<sup>11</sup> Oroso carite pipe Troas sui oromohiviño voi oroso evocoi ivi para guasu Samotracia ve. Ahere ayihive oroyepota Neápolis ve.

<sup>12</sup> Ichui oroso ivi rupi Filipos ve, ahe tecua seroyapri catu vahe ambuae tecua sui, ahe ivi Macedonia rupindar. Aheve Roma iguar oyeyecuai, oyocuai avei opacatu tecua ivirindar ava yuvireco. Aheve moviro ari tõi oroico.

<sup>13</sup> Mbituhusa ari pipe orosë evocoi tecua sui iai popive. “Aheve oñemonuhara judío oyerogui ãgua” orohe. Aheseve cuña oñemonuha yugüeru. Aheve oroyepota chupe, oroguari ipãhuve. Ipare oromombehu co ñehesa pïsirosa resendar yuvireco chupe.

<sup>14</sup> Ñepeï imboetasa, Lidia serer vahe, Tiatira pendar, oyapisaca ore ñehere rese oï. Ahe Tüpa mboeteisar secoi, turucuar suendi vahe mbovendesar avei secoi. Yande Yar omohivi ipihañemoñetasa iyapisaca ãgua Pablo remimombehu rese.

<sup>15</sup> Sese ñapiramosa, opacatu sêta pendar reseve. Ipare ore mombita pota güëtave.

—Che reroyase peye yande Yar reroyasar che recose, pepitara che rêtave —ehi oreu.

Ëgüe ehi ore monguerëhi. Sese oropita sêtave ipiri.

<sup>16</sup> Ipare ambuae ari oroso irise oroyeroqui ãgua, cuñatai ore rovaïchi, ahe cuñatai caruguar pïratasa pipe mbahe mombehusar. Oicatu ava upe mbahe oime vahe rã mombehu. Omombehuse mbahe, setá oipisi sepi guarepochi güerecuar yuvirecoi vahe upe nara yepi.

<sup>17</sup> Ahe cuñatai ou ore raquicuei,

—iCo ava Tüpa ivate catu vahe upendar oporaviqui yuvireco omombehu: “Na ehira Tüpa yande pïsiro” ehi yuvireco! —ehi pucu-pucu ore mombehu ava upe.

<sup>18</sup> Setá ari ëgüe ehi oico oreu. Omañeco tõeise rumo Pablo, oyemboyere chupe cute, aipo ehi icaruguar upe:

—Che orocuai Jesucristo rer pipe: esë co cuñatai sui —ehi.

Aheseve voi caruguar osë ichui.

<sup>19</sup> Evocoyase cuñatai rerecuar oyanduse, “Ndoipisi uca iri chira guarepochi yandeu” ehi yuvireco. Imboasipave oipisi Pablo, Silas mborerecuar upe ocarusuve seraso yuvireco.

<sup>20</sup> Ipare mborerecuar yuvirecoi vahe upe aipo ehi yuvireco:

—Co ñuvirío mbia orogüeru vahe peu, judío tēi yuvirecoi. Ayeve omboavü guasu tēi yuvireco yande recua pipe.

<sup>21</sup> Oporombohe güecocuer rese yuvireco. Secocuer rumo naporai oreu. Ore Roma iguar oroico, sese ndoroicatui secocuer moña āgua —ehi yuvireco mborerecuar upe.

<sup>22</sup> Evocoiyase ava eta oyamotarēhi Pablo iyavei Silas yuvireco iyavei mborerecuar, “Pesequi iturucuar ichui. Ipare peinupara ivira pipe” ehi.

<sup>23</sup> Inupá iteanga pare, osoquenda yuvireco. Oyocuai pīrata soquendapri rārosar yuvireco, “Esāro tupri” ehi yuvireco chupe.

<sup>24</sup> Aipo oyeupe he ramoseve, soquendapri rārosar omoingue Pablo, Silas oi ava nose catui vahesa pipe. Aheve omopaha cepo pipe.

<sup>25</sup> Ahe pītu mbiter rupi rumo Pablo, Silas oyerogui, osapucaí Tūpa mboeteisave yuvireco. Ambuae ava soquendapri evocoiyase osenduño tēi yuvireco isapucaí.

<sup>26</sup> Ahese aviyeteramo tēi ivi orirí eteanga. Opa omomara ava roquendasa moviracuasa, opacatu oquenda oyemboi iyavei opacatu carena oyera soquendapri sui.

<sup>27</sup> Ahese soquendapri rārosar omahe yesapiha. Osepiase oquenda imboipri, ahese vinose oquise pucu siru sui oyeyuca āgua viña. Esepia niha, “Opacatu ité revo soquendapri yuviraso” ehi viña.

<sup>28</sup> Pablo rumo,

—¡Ereyapoi rene mbahe tēi ndeyeupe! ¡Esepia, opacatu oroicoveño cohave! —ehi pucu soquendapri rārosar upe.

<sup>29</sup> Evocoiyase soquendapri rārosar, “Emboumi tataendi” ehi ondugüer upe. Ichui oña oique, orirí, osiquiyepave oñenopiha Pablo, Silas rovai oso.

<sup>30</sup> Vinose pare soquendasa sui oporandu chupe:

—Mbia, ¿mara ahera vo che ñepisiro āgua vichico? —ehi chupe.

<sup>31</sup> —Eroya yande Yar Jesucristo. Ichui ahe nde pīsirora, nde rēta pendar avei —ehi yuvireco chupe.

<sup>32</sup> Ahese omombehu yuvireco Tūpa Ñehengagüer soquendapri rārosar upe, opacatu sēta pendar upe avei.

<sup>33</sup> Ahe pītu pipeve avei soquendapri rārosar viraso oyeupi, yapichasa oyoseipa chupe. Ahese Pablo, Silas oñapiramo guārosarer, sēta pendar avei yuvireco.

<sup>34</sup> Viraso pare sārosar güētave, ombocarú. Ahe sēta pendar avei oviharete ité yuvireco Tūpa reroyasa rese.

<sup>35</sup> Cōhese mborerecuareta omondo sundao ava rese icuapri soquendasave yuvireco. Oyepotase yuvireco, aipo ehi: “Emosepa evocoi mbia judío” ehi.

<sup>36</sup> Ahese soquendapri rārosar omombehu co ñehesa Pablo upe:

—Mborerecuar ombou yuvireco ñehesa cheu pe mose āgua. Peso tupriño peico —ehi chupe.

<sup>37</sup> Omboyevi rumo chupe,

—Ore niha romano oroico viña, ore nupasa rumo opacatu ava rovaque. Ndoporandu rane angai eté rumo mbahe rese oreu. Ore roquendapa voiño tēi yuvireco. Ipare aipo ava rembiepiaēhive tēi ore mosepa uca pota viña. ¡Aní eté rumo! Ahe teieté ru toyugüeru ore mose āgua —ehi soquendapri rārosar upe.

<sup>38</sup> Ipare sundao ava rese icuapri omombehu güerecuareta upe Pablo ñehe. Oyanduse Pablo, Silas romano secose, osiquiyé iteanga yuvireco.

<sup>39</sup> Ahese ahe teieté yuviraso Pablo, Silas oyeupe ñero āgua rese yuvireco: “Peso tupriño ore recua sui” ehi yuvireco chupe.

<sup>40</sup> Pablo, Silas yuvinosese voquendasa sui, yuviraso iri Lidia rētave. Oñemonuha irise ambuae Jesús reroyasar pāhuve, omonguerēhi catu yuvireco. Ipare yuviraso ichui.

## 17

### *Ava yaivvu guasu tēi Tesalónica ve yuvireco*

<sup>1</sup> Oguatase Pablo iyavei Silas, oñocua Anfípōlis iyavei Apolonia rupi yuviraso. Ēgüe ehi oyepota tecua Tesalónica ve yuvireco. Aheve oime judío tūparo.

<sup>2</sup> Secocuer rupi eté mbituhusa ari pipe Pablo oique judío tūparove, oñemoñeta ava eta upe mbosapī mbituhusa ari rupi Tūpa Ñehengagüer rese.

<sup>3</sup> Omboyecua tupri imombehu Tūpa Rembiporavo ava pĩsiro āgua iparaisu rane itera, omanora, ipare rumo ocuerayevī iriño itera. Ipare aipo ehi:

—Jesús, acoi amombehu vahe pēu, ahe ité niha Tūpa Rembiporavo ava pĩsiro āgua —ehi.

<sup>4</sup> Amove ipāhu pendar seroyasa pipe oyemboya sese yuvireco. Setá avei ava griego yuvirecoi vahe, Tūpa mboeteisar judío aracuasa reroyasar avei. Ipāhuve setá avei cuña oyemboetei vahe oyemboya sese yuvireco.

<sup>5</sup> Judío rumo ndoviroyai vahe oñemoirombave secatēhi ava rese yuvireco. Sese omonuha ava yuvireco tēi vahe, ndipihai vahe yuvireco. Imonuha pare, ahe omboaiivu guasu uca tēi ahe ava upe opacatu güecua pipe yuvireco. Yuviraso Jasón rētave Pablo, Silas reca, vinose pota ava rehī pāhuve yuvireco viña.

<sup>6</sup> Ndoyosuisse rumo aheve yuvireco, virasoño Jasón, ambuae Jesús reroyasar avei güecua rerecurar rovai yuvireco. Viroāse guasu sereco yuvireco,

—¡Evocoi mbia Pablo iyavei Silas virova vahe ava recocuer opacatu tecua rupi yuvireco, cūrītei oyepotapa yuvireco cohave!

<sup>7</sup> Co Jasón omombituhu güētave. ¡Opacatu co yuvirecoi vahe ndoviroyai Cesar porocuaíta yuvireco iyavei omombehu yuvireco: “Oime ambuae mborerecurar guasu, ahe Jesús” ehi niha aipo yuvireco! —ehi yuvireco mborerecurar upe.

<sup>8</sup> Aipo ñehesa renduse, oyepīhamondīi guasu ava eta, mborerecurar avei tecua pipendar yuvireco.

<sup>9</sup> Mborerecurar rumo oipisipase guarepochi Jasón sui, ambuae Jesús reroyasar sui avei, ahese opa omose.

### *Pablo, Silas omombehu Tūpa Ñehengagüer Berea ve yuvireco*

<sup>10</sup> Ahe pĩtu pipeve voi ava Jesús reroyasar omondo Pablo, Silas tecua Berea ve yuvireco. Oyepotase aheve, yuviroique judío tūparo pipe.

<sup>11</sup> Berea pendar ava aviye catu ava Tesalónica pendar sui. Ēgüe ehi ipisi ohāpisiēhisa pipe ñehesa yuvireco iyavei ari yacatu rupi oseca Tūpa Ñehengagüer pipe ‘¿supi eté pĩha Pablo ñehesa?’ oyapave yuvireco.

<sup>12</sup> Evocoyase setá avei Pablo ñehē reroyasar iyavei setá griego viroya yuvireco, ndahei cuimbahe güeraño, cuña oyemboetei vahe avei.

<sup>13</sup> Judío Tesalónica pendar rumo oyandu yuvireco Pablo porombohesa Tūpa Ñehengagüer rese Berea ve. Sese yuviraso aheve imboaiivu guasu tēi uca āgua ava upe yuvireco.

<sup>14</sup> Evocoyase Jesús reroyasar Berea pendar Pablo viroguata poyava voi tecua sui para guasu coti yuvireco. Silas iyavei Timoteo rumo opita viteño aheve yuvireco.

<sup>15</sup> Evocoyase Pablo rupi yuviraso vahe viroyepota Atenas ve seraso. Ahe ichui viroyevī Pablo ñehē Silas upe iyavei Timoteo upe avei yuvireco yuviraso voi āgua Pablo piri ahe tecuave yuvireco.

### *Pablo Atenas ve secoi*

<sup>16</sup> Pablo osāro vīteseve Silas iyavei Timoteo Atenas ve oico, ndoyembovihai osepiase opacatu rupi tūpa rahanga-anga tēi.

<sup>17</sup> Sese judío tũparo pĩpe omombehu Jesús recocuer judío eta upe iyavei ambuae Tũpa mboeteisar upe avei. Iyavei ari yacatu omoñeta ava osepia vahe ocarusu rupi ava ñemonuhasave ahe tecua pĩpe.

<sup>18</sup> Evocoiyase amove mbia oyembohe vahe epicúreo aracuasa rese iyavei mbia oyembohe vahe estoico aracuasa rese oñemoñeta Pablo rese yuvireco. Amove aipo ehi Pablo upe yuvireco seroĩrosave:

—¿Mbahe rese angahu pĩha co mbia ñehe papa rai ava upe oico? —ehi.

Ambuae aipo ehi yuvireco:

—Ndoyavii co mbia oñehe vahe ambuae ava Tũpa rese tẽi —ehi yuvireco.

Esepia, omombehu Jesús recocuer iyavei cuerayevisa resendar.

<sup>19</sup> Evocoiyase ahe oyembohe vahe viroyeupi Pablo Areópago serer vahesave seraso yuvireco. Aheve ava oñemonuhasave aipo ehi yuvireco chupe:

—¿Ndiyai vo eresenducua uca tupri catumira co porombohesa piasu resendar oreu viña?

<sup>20</sup> Supi eté niha eremombehu mbahe ndorosendu vitei vahe, ore oroicua tupri pota, ¿mara oyapave ité vo aipo ehi? —ehi yuvireco Pablo upe.

<sup>21</sup> Atenas pendar iyavei yugüeru vahe Atenas ve, oyembohe pota serai vahe yuvireco. Ahe oñemoñetaño, omombehuño mbahe oyeupe yuvireco yepi iyavei osendu pota rai ñehesa ipiasu vahe. Aheño ité ipihañemoñetasa yuvireco.

<sup>22-23</sup> Evocoiyase Pablo opũha ahe ava pãhuve aipo ehi:

“Pesendu rane Atenas iguar. Aguatase ocar rupi asepia pe tũpa eta pemboetei vahe. Ahese asepia ñepe tũpa upe seropovẽhepri renda. Sese asepia icuachiapri aipo ehi oĩ: ‘Tũpa ndicuasai vahe upendar’ ehi. Evocoi Tũpa ndapeicua vitei vahe, ahe secocuer niha amombehu pẽu” ehi.

<sup>24</sup> “Evocoi Tũpa oyapo vahe co ivi, opacatu mbahe ipor avei. Ahe niha ivi, iva Yar secoi. Sese ndasecoi tũparo ava tẽi rembiapo pĩpe.

<sup>25</sup> Ndahei ava rembiapo pĩpe sui tẽi oicove. Esepia, ndipoi mbahe ipane vahe chupe. Ahe ité niha opacatu upe ombou tecovesa, pĩtuhesa iyavei opacatu mbahe oime vahe ivi, ivave” ehi.

<sup>26</sup> “Tũpa oyapo opacatu-catu tẽi ava ñepe ava sui ava yesu ãgua opacatu ivi rupi. Omondo ivi ava yemboerecua ãgua ñepe-pe upe. Ari avei omondo co ivi pĩpe iyemboerecua ãgua yuvireco chupe.

<sup>27</sup> Ëgüe ehi ava upe ‘tache reca yuvireco’ oya, ‘ipĩpe sui aviyeteramo che reroyara yuvireco’ oyapave. Ëgüe ehi rumo Tũpa yande resevemi eté.

<sup>28</sup> Esepia niha, Tũpa sui yaicove, ipĩratasa pĩpe yayembovava, ichui avei yareco yande recovesa, inungar oicuachía amove pe recua pendar yuvireco, aipo ehi: ‘Yaico ité Tũpa suindar’ ehi yuvireco.

<sup>29</sup> Sese yande Tũpa suindar yaicose, ‘Co mbahe rahanga oro apopri iyavei guarepochi, ita apopri, ahe revo Tũpa’ ndayahei chira. Esepia, mbahe rahanga ava rembiapo tẽi, ndahei Tũpa” ehi.

<sup>30</sup> “Pe ramoi ndoicua tupriise yuvireco aracahe, Tũpa oñemosañe mbahe sembiapo rese chupe. Cũritei rumo oyocuai opacatu ava co ivi pĩpendar ‘tomboasi oangaipa, toyevi yuvireco cheu’ oya.

<sup>31</sup> Esepia, ahe oiporavo ari opacatu ava recocuer rese porandu uca ãgua güecocuer ivi tupriisa pĩpe ñepe güembiporavo upe. Ahe ombogüerayevi güembiporavo omano vahe pãhu sui ‘toicua opacatu ava güecocuer rese iporandu ãgua’ oya” ehi Atenas pendar upe.

<sup>32</sup> Osenduse yuvireco cuerayevisa resendar, ahese oime ava oyoyai catu yuvireco seroĩrosave. Ambuae rumo aipo ehi yuvireco:

—Torosendu irimi aipo ñehesa curi —ehi yuvireco.

<sup>33</sup> Sese Pablo osẽ ipãhu sui oso.

<sup>34</sup> Moviro rumo mbia oyemboya sese, viroya ité vahe ñehesa yuvireco. Ahe ipãhuve secoi mbia Dionisio serer vahe, ahe Areópago pãhu pendar iyavei cuña Dámaris serer vahe. Ambuae oime vite yuvireco seroyasar.

## 18

### *Pablo Corinto ve secoi*

<sup>1</sup> Coiye catu Pablo osê Atenas sui, oso Corinto ve.

<sup>2</sup> Aheve oyoepia mbia judío, Aquila serer vahe rese yuvireco. Ahe mbia aipo Ponto ve oha vahecuer. Yugüeru ramo rumo Italia sui güembireco Priscila reseve. Yuvínose ñepeí tecua Italia rupindar Roma sui oyocuaise mborerecuar guasu Claudio: “Toyuvínose ité opacatu judío Roma sui” ehise. Pablo oso,

<sup>3</sup> opíta Aquila piri oporaviqui ãgua. Esepia, Pablo, Aquila avei ahe mbahe pírer mbovívar pãve yuvirecoi.

<sup>4</sup> Mbituhusa ari yacatu rupi Pablo omombehu Jesucristo recocuer ava upe judío tũparo pipe ‘toviroya Jesús judío iyavei ndahei vahe judío yuvireco’ oyapave.

<sup>5</sup> Oyepotare rumo Silas, Timoteo Macedonia sui yuvireco, ahese Pablo oyemondo ité Jesús recocuer mombehu ãgua rese güeraño judío eta upe aipo ehi: “Jesús niha Tũpa Rembiporavo ava pĩsiro ãgua secoi” ehi.

<sup>6</sup> Ñehe-ñehe tẽi rumo seroĩrosave yuvireco chupe. Sese Pablo oipipete oturucuar sovaque ‘oimera mbahe tẽi pẽu’ oya, iyavei aipo ehi chupe yuvireco:

—Pe ae niha peseca Tũpa ñemoĩrosa peyeupe pe recocuerai sui. Ndahei rumo che resera mbahe. Esepia, che amboaviye tupri che cuaita pẽu. Che rumo, co pipe suive, amombehu catuño itera co ñehesa ava ndahei vahe judío upe vichico —ehi Pablo judío upe.

<sup>7</sup> Evocoyase Pablo osê judío tũparo sui, oique mbia Ticio Justo serer vahe rõtave, ahe Tũpa mboeteisar avei secoi. Ahe sêta judío tũparo iqueve.

<sup>8</sup> Crispo, ahe judío tũparo rerecuar viroya avei yande Yar, opacatu sêta pendar avei viroya yuvireco. Setá ambuae Corinto pendar avei viroya osenduse ñehesa yuvireco. Seroya pare, oñeapiramopa uca yuvireco.

<sup>9</sup> Ñepeí pĩtu pipe yande Yar oñehe Pablo upe iquer nungarve: “Eresiquiyeyi rene, ereñehe ava upe, che mombehuño eve, erepoi rene che mombehusa sui.

<sup>10</sup> Esepia, che nde reseve aico. Sese ndiyai ava upe nde momara uca ãgua. Supi eté che areco setá che rahirã co tecua pipe” ehi yande Yar chupe.

<sup>11</sup> Evocoyase opíta ñepeí araviter yemombitesa rupi Corinto ve oico. Aheve ombohe Tũpa Ñehengagüer rese ahe pendar ava.

<sup>12</sup> Galión mborerecuar secose opacatu Acaya rupi, judío oñemonuha Pablo amotarẽhsave. Ichui viraso ahe mborerecuar upe porandusa ivate catusave yuvireco,

<sup>13</sup> aipo ehi yuvireco chupe:

—Co mbia oipihañemoñeta rerova tẽi ava oTũpa mboetei ãgua. Ndahei rumo Roma pendar porocuita rupi ãgüe ehi yuvireco —ehi yuvireco seroĩrosave chupe.

<sup>14</sup> Oñehe pota tẽi viña, Galión rane rumo oñehe judío upe:

—Peyapisaca mbia judío. Pemombehuse cheu ava rembiapo naporai vahe, ahese ayemonguerẽhira che yapisaca ãgua pe remimombehu rese viña.

<sup>15</sup> Pe rumo peporandu cheu mbahe pe yembohessa resendar, pe Tũpa rer resendar iyavei pe Tũpa porocuita resendar rese tẽi. Pemoingatu pe ae pe recocuer; ndaipotai aipo nungar mbahe moingatu ãgua —ehi Galión ahe ava upe.

<sup>16</sup> Ipare opa omboyepipi porandusa sui.

<sup>17</sup> Ahese opacatu griego oipisi judío tũparo rerecuar Sóstenes yuvireco. Ipare yuvirocua-rocua Galión rovai ahe peve yuvireco sese. Galión rumo, “Mara etemo che areco viña” ehiño chupe.

### *Pablo yevi irisa Antioquía ve*

<sup>18</sup> Pablo secói pucu vite pare Corinto ve, “Asora vichico cute” ehi Jesús reroyasar upe. Ipare yuviraso Aquila, Priscila reseve. Oyepotase Cencrea ve yuvireco para guasu popive, aheve Pablo oñeapipa tupri oñehe mboaviye água. Ipare yuviraso carite pipe Siria ve.

<sup>19</sup> Siria piar rupi yuviraso Efeso ve. Aheve opita Aquila, Priscila yuvireco. Ichui Pablo oique judío tūparo pipe Jesús resendar ñehesa mombehu água chupe yuvireco.

<sup>20</sup> Ahe pendar omombita pota vite tēi yuvireco viña, Pablo rumo ndopita potai aheve.

<sup>21</sup> Evocoyase, “Aviye, taso rane” ehiño chupe yuvireco. “Tūpa oipotase cheu, ayevi irira vitu pe piri” ehi.

Ipare oso Efeso sui carite pipe.

<sup>22</sup> Oyepotase Cesarea ve, oso Jerusalén ve “avirave” apo água Jesús reroyasar upe. Ipare oso Antioquía ve.

<sup>23</sup> Opita pucu pare aheve, osē, oguata iri Galacia rupi, Frigia rupi opacatu Jesús reroyasar monguerēhi catu água.

### *Apolos omombehu Jesús recocuer Efeso ve*

<sup>24</sup> Aheseve avei judío Apolos serer vahe oso Efeso ve, ahe Apolos, Alejandría iguar. Oñehe tupri ai vahe, oicua tupri avei Tūpa Ñehengagüer.

<sup>25</sup> Ahe oyembohe vahe avei yande Yar recocuer rese. Omombehu oquerēhisa pipe secocuer ava upe, oporombohe tupri ai avei sese. Ahe rumo oicua Juan oãpiramo agüer güeraño tēi.

<sup>26</sup> Ahe osiquiyeēhisave judío tūparo pipe omombehu Tūpa Ñehengagüer. Osenduse Aquila, Priscila ñehesa, omombita yuvireco oyepiri. Ahese omombehu tupri catu Tūpa recocuer chupe yuvireco.

<sup>27</sup> Oso potase Apolos Acaya coti, ahese Jesús reroyasar Efeso pendar omonguerēhi catu. Oyapo cuachiar Acaya pendar upe imondo yuvireco sese hañeco tupri água. Ipare oyepota oso Acaya ve. Aheve oime ava Tūpa guaisusa pipe sui viroya vahe Jesús yuvireco. Ahe ava Apolos oipitivi seroya tupri catu água yuvireco.

<sup>28</sup> Omboyecua opacatu rovaque judío pihañemoñetasa co coti tēi vahe. Ahese opa osecopi oñehe pipe ahe ava. Esepia, Tūpa Ñehengagüer pipe omboyecua ité: “Jesús Tūpa Rembiporavo ava piñero água secói” ehi eté judío eta upe.

## 19

### *Pablo omombehu Jesús recocuer Efeso ve*

<sup>1</sup> Evocoyase Apolos Corinto ve ipitaseve, ahe tecua Acaya rupindar, Pablo oñocua ivivaté vahe oyepota Efeso ve oso. Aheve osepia setá Jesús reroyasar.

<sup>2</sup> Evocoyase oporandu ahe ava upe:

—¿Peipisi vo Espíritu Santo pe piha pipe peroyase Jesús? —ehi chupe.

—Ore ndorosendui eté aipo Espíritu Santo resendar ñehesa —ehiño yuvireco chupe.

<sup>3</sup> Ichui oporandu iri chupe:

—Evocoyase, ¿mbahe nungar vo ãpiramosa peipisi? —ehi.

—Juan poroãpiramosa oroipisi —ehi ahe ava yuvireco chupe.

<sup>4</sup> Evocoyase aipo ehi ahe ava upe:

—Juan niha oñapiramo acoi omboasi vahe oangaipa oyevisé Tūpa upe. Ipare rumo omombehu ava upe: “Peroya ahe eté vahe ou vaherã che raquicuei” ehi. Ahe ou vaherã, “Jesús upe” aipo ehi —ehi Pablo chupe.

<sup>5</sup> Osenduse Pablo ñehe, opacatu oñeapiramo uca Jesucristo rer pipe yuvireco.

<sup>6</sup> Omondose Pablo opo iharive yuvireco, ahese ogüeyi Espiritu Santo, oi que ipiha pipe yuvireco. Ipare aviyeteramo tēi oñehe ambuae ñehesa pipe iyavei omombehu Tūpa suindar ñehesa yuvireco.

<sup>7</sup> Ēgüe ehi Tūpa ahe doce mbia yuvirecoi vahe upe.

<sup>8</sup> Mbosapi yasi rupi Pablo oi que omombehu Tūpa Ñehengagüer judío upe osiquiyeehisave itūparo pipe ipihañemoñeta rerova āgua Tūpa mborerecuasa resendar reroya āgua rese.

<sup>9</sup> Amove rumo judío ipihavĩracua ité seroyaēhi āgua yuvireco. Ipipe iñehe-ñehe tēiño co tecocuer ipiasu vahe mombehusa rese yuvireco ava rehii rovaque. Evocoyase Pablo oyepepi ichui, vīnosepa oyeupi Jesús reroyasar yeroquisa Tirano serer vahesave seraso. Aheve ari yacatu rupi oñehe yepi.

<sup>10</sup> Ēgüe ehi ñuvirío araviter rupi. Sese opacatu ava Asia rupindar judío, ava ndahei vahe judío avei osendu yuvireco yande Yar ñehengagüer.

<sup>11</sup> Tūpa omondo güeco pĩratasa Pablo upe poromondiisa apo āgua.

<sup>12</sup> Sese pañueru iyavei turucuar Pablo rese imboyapri, ahe serasosa imbaheasi vahe upe imbogüera āgua. Carugar avei opa yuvīnose yuvireco ichui.

<sup>13</sup> Amove oime judío oguata vahe ocar rupi carugar mose āgua ava sui. Sese nara oiporu pota yande Yar Jesús rer yuvireco.

<sup>14</sup> Evocoyase aipo ehi carugar upe: “Pablo Jesús recocuer omombehu vahe rer pipe, ‘Peyepipi co mbia sui’ ahe pēu” ehi. Ēgüe ehi pota avei siete Esceva rahir mbahe apo yuvireco viña. Ahe iyesupa judío pahi rerecuar secoi.

<sup>15</sup> Carugar rumo omboyevi chupe: “Che aicua Jesús recocuer, aicua avei Pablo; pe rumo ndopocuai, ¿ava vo catu pe peico?” ehiño carugar chupe.

<sup>16</sup> Aheseve ahe cuimbahe carugar vireco vahe opo ipāhuve oso. Opacatu opĩratasa pipe opa ité osecopi siete mbia yuvirecoi vahe. Omomara-mara tēi oguayieñehisa pipe imonanipa tupri imondo.

<sup>17</sup> Co mbahe sembiapo rēracua opa oyepota opacatu Efeso pendar upe, judío upe, ava ndahei vahe judío upe avei. Evocoyase oyembosiquiye guasu yuvireco. Ipipe sui opacatu oicua yande Yar Jesús rer yuvireco.

<sup>18</sup> Setá Jesús viroya ramo vahe yugüeru opacatu mbahe güembiapocuer naporai vahe mombehu yuvireco

<sup>19</sup> iyavei setá ipaye vahe Jesucristo viroyase, omonuhapa ocuachiar ombopayesa resendar sapi āgua opacatu ava rovaque yuvireco. Sapi pare, opa ahe cuachiar repri vīnose yuvireco. Ahe sepri cincuenta mil tupri ari mboraviqui repri.

<sup>20</sup> Ēgüe ehi Tūpa opĩratasa pipe ombouvicha oñehengagüer iyavei iñehe pĩratasa oyecua catu ava rese.

<sup>21</sup> Ipare Pablo ipihañemoñeta Jerusalén ve oso āgua ivi Macedonia, Acaya rupi. “Coiye catu aheve che reco viteseve, ichuive che asora Roma ve” ehi.

<sup>22</sup> Evocoyase omondo ñuvirío opĩtivĩisar Timoteo, Erasto Macedonia ve güenonera. Ahe rumo opita vitemi Asia rupi oico.

### *Ava Efeso pendar yaivu guasu yuvireco*

<sup>23</sup> Ahe ari pipe Efeso pendar yaivu guasu yuvireco co tecocuer ipiasu vahe rese.

<sup>24</sup> Aheve mbia Demetrio serer vahe secoi. Ahe oyapo Artemisa rēta rahanga guarepochi apopri guarepochi pisi āgua. Ambuae ava mbahe rahanga aposar oipisi tupri avei oporaviqui repri ipiri yuvireco.

<sup>25</sup> Sese Demetrio omonuha mbahe rahanga aposar, omonuha avei ambuae oporaviqui vahe Artemisa rahanga rese, ava mboavū guasu uca āgua. “Pe mbia, peicua yayapose mbahe Artemisa nungar, yaipisi tupri yande poraviqui repri” ehi omboetasa upe.

<sup>26</sup> “Peicua avei Pablo opa ovirova ava eta piha Artemisa mboeteisa sui ‘ndahei Tūpa ité’ ohesa piḡe yande rembiapo uve. Ndahei rumo cohapeño ēgüe ehi, opacatu Asia rupi ēgüe ehi avei imombehu.

<sup>27</sup> Aviyeteramo mbahe tēi oimera yandeu yande poraviquisa mocañi tēi āgua, tūparo guasu Artemisa upendar aviyeteramo ocañi tēi aveira. Opacatu Asia pendar iyavei ava opacatu ivi rupindar omboetei acoi Artemisa rahanga guasu yuvireco viña. Aviyeteramo rumo ava nomboetei iri chira, iyavei viroñora yande rembiapo catuprisa yuvireco” ehi.

<sup>28</sup> Osenduse aipo ihe ava yuvireco, oñemoirosa piḡe virosapucaí aipo ehi yuvireco: “¡Imboetepri catu Artemisa yande recua pendar tasecoi!” ehi yuvireco.

<sup>29</sup> Opacatu Efeso rupi ava yaivu guasu tēi. Osapucaí vahe oipisi Gayo iyavei Aristarco, ahe ñuvirío Pablo rupindar yugüeru vahe Macedonia sui. Oipisise, omombo-mombo seraso yuvireco ava ñemonuha guasusave.

<sup>30</sup> Pablo oique pota tēi ava rehii pāhuve, ambuae Jesús reroyasar rumo nomoingue uca potai yuvireco.

<sup>31</sup> Iyavei moviro mborerecuar imboripar Asia rupindar omondo oñehe chupe aipo ehi: “Ereiquei rene ava ñemonuhasa guasuve” ehi avei yuvireco chupe.

<sup>32</sup> Ñemonuhasave amove ava osapucaí pīrata ñepei mbahe rese, amove osapucaí ambuae mbahe rese. Esepia, yaivu tēi yuvireco. “¿Mahera vo evocoyase yañemonuha?” ehi tēi setá ipāhu pendar yuvireco.

<sup>33</sup> Amove rumo ava rehii pāhuve yuvirecoi vahe judío, ahe ombohe-mbohe imoañi-añi imondo Alejandro mbahe mombehu āgua ava rehii rovaque yuvireco. Alejandro evocoyase omopuha tēi opo ava monguiriri āgua viña. Osepí pota omu judío ava rehii rovaque viña.

<sup>34</sup> Ava rehii rumo oicuase Alejandro judío secose yuvireco. Opacatu guasu osapucaí pīrata yuvireco. “¡Imboetepri catu Artemisa yande recua pendar tasecoi!” ehi pucu-pucu yuvireco. Ēgüe ehi ahe osapucaí ñuvirío hora rupi rutei yuvireco.

<sup>35</sup> Evocoyase tecua piḡendar mbahe cuachiasar oicatusave ava monguiriri āgua, aipo ehi chupe: “Peyapisaca mbia pe Efeso pendar, ndipoi ava ndoicuai vahe yande Artemisa tūparo rese yandé hañecosa iyavei sahanga íva sui oviapi vahe rese avei hañecosa.

<sup>36</sup> Ndipoi niha ava, ‘Aní’ ehi vaheḗ che remimombehu rese. Sese peyemonguiririño, peyapoi rene mbahe pe yapisacaēhisave.

<sup>37</sup> Peruño tēi eté co ñuvirío mbia cohove, ndoyapoi rumo mbahe tēi Artemisa upe yuvireco. Nimondai mbahe rese itūparove, ndoviroñoi avei serer yuvireco.

<sup>38</sup> Sese Demetrio iyavei oporaviqui vahe supi ahe oñemoirose que ava upe, toyuviraso rane ava recocuer moingatusar upe yuvireco; aheve tomoingatu güecocuer yuvireco.

<sup>39</sup> Pemoingatu potase que ambuae mbahe, peso ranera yemomborandusave imoingatu āgua.

<sup>40</sup> Mborerecuar revo oyandura yande rembiapo co piḡe, ‘¿Mahera peaivu guasu tēi? ¿Che amotarēhimbave tie ēgüe peye?’ ehi tiētera yandeu. Oporanduse yandeu, ndayaicatui chitiētera imboyeve āgua iñehe chupe. Esepia niha, co yañemonuha yande remimbotar tēi cohove” ehi chupe.

<sup>41</sup> Aipo ihe pare, omomba aheve oñemonuhasa yuvireco.

## 20

### *Pablo guata agüer Macedonia, Grecia rupi*

<sup>1</sup> Ava aivu guasu pare, Pablo, “Toyugüeru” ehi ava Jesús reroyasar upe. Ahese omboaracua ahe ava. Chupe, “Aviye” ohe pare, oso Macedonia ve.



<sup>2</sup> Oguatase Macedonia rupi, omonguerẽhi-rẽhi avei ambuae Jesucristo reroyasar yuvirecoi vahe tecua-tecua rupi. Ipare oyepota Grecia ve oso.

<sup>3</sup> Aheve opita mbosapi yasi. Oso potase Siria ve carite pipe, judío ipihañemoñeta mara sereco água rese yuvireco. Oyanduse, carite pipe oso rãgüer sui, oyevı iri oso Macedonia ve ivı rupi.

<sup>4</sup> Yuviraso movıro mbıa supı, ipãhuve ñepeı Berea pendar, Pirro rahır Sópater; ñuvırío Tesalónica pendar, Aristarco, Segundo; ñepeı Derbe pendar, Gayo; ñuvırío Asia pendar, Tíquico, Trófimo. Timoteo oso avei supı.

<sup>5</sup> Evocoi mbıa yuviraso Pablo renondeve sãro água Troas ve.

<sup>6</sup> Pieta pan ndayapepoi vahe hu pare, orosẽ tecua Filipino sui carite pipe, cinco arı rupi oroyepota Troas ve. Ahe tecuave oropıta siete arı rupi.

### *Pablo Troas ve secoi*

<sup>7</sup> Domingu pipe, ore oroñemonuha pan hu água. Aheve Pablo oporombohe oico pıtu mbıter rupi. Esepia, ahe osẽ pota ahere ayihive voi ichui.

<sup>8</sup> Ahe oi ivate vahesave ñemonuhasa pipe setá tataendi.

<sup>9</sup> Mbıa chıhivahe, Eutico serer vahe, metanave uguapi oı. Pablo rumo oñehe pucú iteanga. Evocoyase omboopesı ahe chıhivahe. Ipare oquẽ; avıyeteramo tẽi ovıapi oi ivate vahe mbosapısa sui. Aheve ava ogüeyı sehõgüer rupi ivı sui yuvireco.

<sup>10</sup> Evocoyase Pablo ogüeyı ou chupe, oñeno oso sese icuhaguã. Ipare aipo ehi Jesús reroyasar upe:

—Pesiquıyeı rene; nomanoi moco —ehı.

<sup>11</sup> Ipare oyeupi iri oso ombohi pan igua. Ichui oñehe pucu vıte. Omomba cõhe senise; ipare oso cute.

<sup>12</sup> Evocoyase co mbıa chıhivahe vıroyevıse secosave, opacatu oyembovıha guasu catu yuvireco. Esepia, nomanoi eté.

### *Pablo yuviraso Troas sui Mileto ve*

<sup>13</sup> Pablo oso pota ivı rupi, ore ranengatu rumo oroso carite pipe Aso ve. Aheve oroyepota Pablo reraso água semimbotar rupi.

<sup>14</sup> Oroyoepıase aheve, oha carite pipe ore pıri. Ichui oroso cute Mitilene ve.

<sup>15</sup> Ahere ayihive carite pipe oroñocua Quío oroso. Ambuae arı rese oroyepota Samos ve. Ichui oroso no oroyepota Mileto ve.

<sup>16</sup> Pablo ipoyava. Esepia, oıpota Jerusalén ve Pentecostés pieta pipe tuprı güeco água. Sese Efeso oroñacuasaño oroso.

### *Pablo ñehesa Jesús reroyasar rãrosareta Efeso pendar upe*

<sup>17</sup> Mileto ve ore recose, Pablo omondo oñehe Efeso ve ‘toyugüeru Jesús reroyasar rãrosar cheu’ oya.

<sup>18</sup> Oyepotase yuvireco chupe, aipo ehi: “Peıcuı niha che recocuer avıye ité yıpısuıve arı che reıque ramosa resendar co Asia ve.

<sup>19</sup> Arı yacatu rupi aporavıquı yande Yar upe pe pãhuve vıchıco che reco asıẽhisave che yasehosa pipe. Yepe judío che mboguai eteprı che recoãhasave pe recuave yuvireco viña,

<sup>20</sup> che rumo ndaicatui ñehesa avıye vahe mombehuẽhi pẽu mbahe avıye água yepı. Che opombohe ava rehı rovaque, opombohe avei ñepeı-peı pe rẽta rupi yepı” ehi.

<sup>21</sup> “Amombehu ñehesa judío upe, ava ndahei vahe judío upe avei aipo ahe: ‘Pemboası pe angaıpa; peyevı Tũpa upe, peroya avei yande Yar Jesús’ ahe” ehi.

<sup>22</sup> “Cũriteı asora Jerusalén ve vıchıco. Aheve che so água Espıritu che cuai che pıha pipe. ‘¿Mara ehıra pıha yuvireco peve cheu?’ aipo ahe.

<sup>23</sup> Co güeraño che aıcuı: opacatu tecua che sosa rupi Espıritu Santo aipo ehi cheu che roquenda água iyaveı che mombaraisu água yuvireco yepı” ehi.

<sup>24</sup> “Ndacherecatēhi rumo cheyese che mano āgua. Che rumo amboaviye potaño ité che poraviquisa Tūpa upe, ahe yande Yar Jesucristo che cuai vahe co ñehesa icatupri vahe mombehu āgua. Co Tūpa oporoaisusa pipe ombou ñepei vahe Guahir ava p̄siro āgua” ehi.

<sup>25</sup> “Opa niha Tūpa mborerecuasa amombehu p̄u. Che rumo aicua ndache repia iri chira peye.

<sup>26</sup> Sese tapeicua cūritei: ndayavii eté che cuaita mboaviye āgua co tecocuer aviye vahe mombehu pipe p̄u.

<sup>27</sup> Esepia, ndaicuacui eté Tūpa Ñehengagüer mombehu; che rumo amombehuño ité opacatu Tūpa recocuer p̄u.

<sup>28</sup> Sese peñearo tupri, pesāro avei opacatu Jesús reroyasar Espiritu Santo porocuita rupi. Inungar ovesa rārosar, ēgüe peye tupri sāro. Ahe Tūpa remimboepi yuvirecoi. Esepia, Jesús oipiyere vuvi opacatu ava angaipa repirā.

<sup>29</sup> Aicua che opoeyare, oyugüerura ambuae ava mahembiar oñaro ai vahe nungar pe p̄huve opacatu Jesús reroyasar mocañipa pota āgua.

<sup>30</sup> Oime aveira que ava pe p̄hu pendar pe mbopa pota aveira yuvireco pe reraso āgua oyeupi.

<sup>31</sup> Sese pemahemoha tupri peyese. Pemahenduha acoi opomboaracua tuprise mbosapi araviter rupi, p̄tu, ari yacatu rupi avei che yasehosa pipe pe rereco” ehi.

<sup>32</sup> “Sese, che rivireta, opoeyara Tūpa povrive iyavei iñehesa iporovasasa resendar pipe. Ahe pe moviracua catura pe rereco iyavei omboura opacatu mbahe güemimombehu p̄u opacatu ambuae güembiporavo reseve.

<sup>33</sup> Ndahei pe guarepochi, que oro iyavei pe turucuar pota raisa pipe aso pe p̄huve.

<sup>34</sup> Peicua niha acoi che po pipe ité aporaviqui che recove āgua, che rupindar recove āgua avei.

<sup>35</sup> Ēgüe ahe amboyecua che recocuer p̄u. Supi avei ēgüe peyera; yaporaviqui tupri iparaisu vahe rese hañeco āgua. Pepihañemoñeta acoi yande Yar Jesús remimombehu rese: ‘Sorivete catu ava iporereco vahe, mbahe oipisi vahe sui’ ehi aracahe” ehi Efeso pendar Jesús reroyasar rārosar upe.

<sup>36</sup> Oñehe pare, oñenopiha oyerure āgua opacatu omboripar reseve.

<sup>37-38</sup> Ndoyembovihal eté, “Ndache repia iri chira peye” oyeupe ihese. Sese opacatu oyasehó iteanga yuvireco, oyaco-yaco, osovaupite-pite iri t̄i avei yuvireco saisupave. Ipare yuvirasoño ité yuvireco supi carite yemboyasave.

## 21

### *Pablo so agüer Jerusalén ve*

<sup>1</sup> Evocoyase oroseyase ore rivireta yuvireco, oromohivi voi oroso carite pipe Cos ve. Ahere ayihive oroyepota Rodas ve, ichui oroyepota Pátara ve oroso.

<sup>2</sup> Aheve orosepia carite oso vaherā Fenicia ve, ahe ipipe oroha, oroso.

<sup>3</sup> Orosasase para guasu oroso, orosepia caha p̄hu guasu Chipre serer vahe. Ahe oroñocua yande mbahe rese pocoēhisa coti, oroso ivi Siria ve, para guasu rovai. Carite rumo seroyemboyasa tecua Tiro ve ipipendar mbahe reya āgua.

<sup>4</sup> Aheve orosepia Jesús reroyasar yuvirecoi vahe. Ahese oropita siete ari ipiri. Yepe ahe Jesús reroyasar aipo ehi Pablo upe yuvireco: “Espiritu Santo oñehe oreu. Evocoyase eresoi rene Jerusalén ve” ehi yuvireco chupe viña,

<sup>5</sup> siete ari pare rumo, orosoño ité para guasu popive. Opacatu Jesús reroyasar yugüeru, güembireco, guahir reseve-seve ore rupi. Aheve oroñenopihapa ore yerure āgua.

<sup>6</sup> “Aviye, toroso rane” ore he pare chupe yuvireco, oroha carite pipe. Ahe evocoyase oyevi yuviraso güētave.

<sup>7</sup> Tiro sui oroso Tolemaida ve. Oroyepotase, oroso Jesús reroyasar repia āgua. Aheve oropita ñepei ari.

<sup>8</sup> Ahere ayihive oroso Cesarea ve. Aheve oroique, oropita Felipe rēta ve, ahe oguata vahe Jesús recocuer mombehu. Ahe mbia iporavopri seci aracaco ambuae seis yuvirecoi vahe pāhuve.

<sup>9</sup> Evocoi Felipe vireco irungatu guayri ndomendai vahe. Tayri Tūpa ñehe mombehusar pāve yuvirecoi.

<sup>10</sup> Oropitase setá arimi ipiri, ahese oyepota Judea sui mbia Agabo serer vahe oreu. Ahe avei Tūpa ñehe mombehusar seci.

<sup>11</sup> Ouse ore pāhuve, vīrocua Pablo rumbicuasa ichui. Ipīpe oñapichi opī, opo avei. Ahese aipo ehi oreu:

—Espíritu Santo oicua uca cheu, na ehira judío Jerusalén pendar co tumbicuasa yar āpichi yuvireco iyavei omondora ava ndahei vahe judío upe —ehi Agabo imombehu oreu.

<sup>12</sup> Orosenduse aipo ihe, ore, evocoi Cesarea pendar avei, oromombehu Pablo upe: “Erosoi rene Jerusalén ve” orohe tēi chupe.

<sup>13</sup> Omboyevi rumo oreu:

—¡Mahera peyaseho che rese, ndache mbovīhai peye! Che rumo ayemoingatu voi che āpichi uca āgua, che mano āgua rese avei Jerusalén ve yande Yar Jesús recocuer rese —ehi oreu.

<sup>14</sup> Ndorocatuise ipihañemoñetasa rerova āgua, oropoiño ichui aipo orohe:

—Tayaposa ayase yande Yar remimbotar —oroheño chupe.

<sup>15</sup> Ipare cute oroyemoingatu ore so āgua Jerusalén ve.

<sup>16</sup> Ichui yuviraso avei moviro ore rupi Jesús reroyasar Cesarea pendar. Ahe ore reraso Chipre pendarer Mnasón rētave. Ahe oremoingue oyepiri. Ahe yīpive ité vīroya yande Yar oico.

### *Pablo ombori Santiago*

<sup>17</sup> Oroyepotase Jerusalén ve, ahe pendar Jesús reroyasar nihapisi ore pisi yuvireco.

<sup>18</sup> Ahere ayihive Pablo, ore avei oroso Santiago repia. Aheve yuvirecove avei opacatu Jesús reroyasar rārosar Jerusalén pendar.

<sup>19</sup> Pablo, “Avirave” ehi opacatu oñemonuha vahe upe. Ipare omombehu tupri yīpīsuive oyeupe Tūpa mbahe oyapo uca vahe ava ndahei vahe judío pāhu rupi.

<sup>20</sup> Osenduse, omboetei guasu Tūpa yuvireco. Omombehu Pablo upe yuvireco:

—Che mu, ereicua setá iteanga judío vīroya Jesús yuvireco. Ahe setacuer setá catu mil vahe sui cute. Opacatu evocoi ava iquerēhi vahe Moisés porocuita aracahendar mboaviye āgua yuvireco —ehi—.

<sup>21</sup> Osendu tēi nde rembiapo yuvireco. Omombehu tēi avei aipo nde he yande mu ambuae tecua rupindar yuvirecoi vahe upe: “‘Peseya Moisés porocuita. Pembocircuncida iri rene pe rahir. Peico iri rene yande recocuer aracahendar pīpe’ aipo ehi tēi oico” ehi nde mombehu yuvireco —ehi Pablo upe yuvireco—.

<sup>22</sup> ¿Mara yahera vo? Esepia, oyandura nde yepotasa cohava yuvireco.

<sup>23</sup> Avīye catu ereyapora ore porocuita oromombehu vahe ndeu. Oime irungatu mbia ore pāhuve. Ahe mbia omboaviyera güemimombehu Tūpa upe yuvireco.

<sup>24</sup> Eraso co mbia ndeyeupi, eñemoatiro supi eso, emboepi avei mbahe Tūpa upe icuavēhepri. Ahese ahe mbia oicatura oñeapi yuvireco. Eremboaviyese evocoi mborocuita, opacatu judío nde reroyara, oicua ava semira tēise mbahe nde rembiapo rese yuvireco. Oicua aveira, nde ereroya vite Moisés suindar mborocuita —ehi yuvireco chupe—.

<sup>25</sup> Ndoroyocuai rumo ava Jesús reroyasar ndahei vahe judío evocoi nungar mbahe rese. Esepia, opa icuachiasa chupe: “Pehui rene mbahe mīmba yucapri mbahe rahanga

tēi upendar seropovēhepri, pehui rene mbahe ruvi, pehui rene mbahe mīm̄ba yucapri suvi renosepirēhi vahe iyavei peaguasai rene” orohe chupe —ehi yuvireco.

*Judío oipisi Pablo tūparo guasu pipe yuvireco*

<sup>26</sup> Evocoyase Pablo vīraso ahe irungatu mb̄ia yuvirecoi vahe oyeupi. Ahere ayihive oyoya oñemoatiro yuvireco. Ipare yuviroique judío tūparo guasu pipe, omombehu yuvireco pahi upe: “Oroñemoatiro ramo. Sese oroyevira siete ari pipe oromombase ore ñemoatiroso. Ahese oromondo pota ndeu porerecosa Tūpa porocuita rupi icuavēhepirā” ehi yuvireco pahi upe.

<sup>27</sup> Opa potase evocoi siete ari, judío Asia pendar osepia Pablo tūparo pipe yuvireco. Ahese omoñemoiro uca opacatu ava reh̄i tūparo pendar. Ipare ipisise,

<sup>28</sup> sāse yuvireco: “¡Ore mu, ore p̄itiv̄i peye co mb̄ia oroipisi vahe rese! Esepia, oguata opacatu rupi. Oñehe tēi yande rese, Moisés porocuita rese, yande tūparo rese avei iyavei v̄iroique ava ndahei vahe judío yande tūparo pipe. Sese omonguiha tēi yande tūparo maranehi” ehi yuvireco chupe.

<sup>29</sup> Co rese aipo ehi. Esepia, cuese osepia Pablo v̄iroguatase Trófimo oyeupi, ahe mb̄ia Efeso pendar ndahei vahe judío. Sese ipihañemoñeta ‘Pablo v̄iroguata ava ndahei vahe judío yande tūparo pipe’ oya yuvireco viña.

<sup>30</sup> Opacatu Jerusalén pendar ndasori yuvireco. Cūriteimi ava yuvinoña guasu tūparove. Oipisi Pablo ombotiriri senose tūparo pipe sui yuvireco. Ahese omboya voi guaquicuei tūparo roquenda yuvireco.

<sup>31</sup> Oyuca potase yuvireco, ahese yaiv̄u rēracua oyepota sundao rereciar guasu upe.

<sup>32</sup> Cūriteimi sereciar v̄irasosundao, yuvinoña yaiv̄u vahe upe yuvirasosundao rereciar guasu, isundao avei yuvireco, ndoyuv̄irocua iri Pablo rese yuvireco.

<sup>33</sup> Ahese ahe sundao rereciar guasu oyemboya oso Pablo rese, oipisi uca. Ipare oyocuai osundao, “Tapeicuhacua ñuv̄irío carena pipe” ehi. Evocoyase oporandu ava upe: “¿Ava vo co mb̄ia? ¿Mbahe vo oyapo p̄ēu?” ehi judío eta upe.

<sup>34</sup> Ahese amove ava ñepei mbahe rese oñehe, ambuae, ambuae mbahe rese tēi yuvireco. Evocoyase sundao rereciar ndoicatui supi eté vahe mbahe rendu āgua yaiv̄u guasu vahe p̄āhuve. Sese, “Peraso quartelve” ehi.

<sup>35</sup> V̄iroyepotase yeupisave, ichui osupi sundao oachihive seraso yuvireco ava reh̄i ñemoiró iteangasa sui.

<sup>36</sup> Ava reh̄i rumo yuvirasosño ité saquicuei, “¡Tomano!” ehi pucu-pucu yuvireco chupe.

*Pablo oyoepi ava reh̄i rovaque*

<sup>37</sup> Omoingue potase Pablo cartel pipe yuvireco, aipo ehi sundao rereciar guasu upe:

—¿Iyacatu vo yañemoñeta raimi? —ehi.

Evocoyase, omboyevi mborereciar chupe:

—¿Ereicua vo griego ñehe? —ehi—.

<sup>38</sup> ¿Ndahei vo nde Egipto pendar, vavasa oyapo vahecuer ereico? Nde revo acoi ereraso oporoyuca vahe p̄āve cuatro mil tupri iv̄i iporupirēhisa rupi —ehi sundao rereciar chupe.

<sup>39</sup> Evocoyase,

—Che judío, tecua Tarso pendar aico. Ahe tecua Cilicia pipendar imboeteipri vahe seci. Eyapomi mbahe icatupri vahe cheu, tañehemi rane catu ava upe —ehi.

<sup>40</sup> Evocoyase mborereciar, “Av̄iye” ehi chupe. Ipare opūha yeupisa harive, omopuha opo ava eta monguiriri āgua. Ahese oyapisaca tupri ava reh̄i yuvireco. Ahe ava upe oñehe hebreo ñehe pipe aipo ehi:

## 22

<sup>1</sup> “Che mu eta, peyapisaca, che añehemira che yoepi āgua p̄ēu cūritei” ehi.

<sup>2</sup> Oñehe hebreo ñehe pipe. Sese osenduse, oyapisaca tupri catu yuvireco.

<sup>3</sup> “Che judío aico. Aha Cilicia ivi pipe Tarso ve. Cohave rumo acuacua, Jerusalén pipe, Gamaliel che mbohe oyerquisave. Aheve ayembohe tupri yande ramoi porocuita rese. Ahe che mbohesa pipe avei ayembohe Tūpa mboetei āgua rese vichico inungar pe peico cūrteí.

<sup>4</sup> Che yipindar aseca-seca catu ava co Tecocuer Piasu rupi oguata vahe yamotarēhisave. Supitísave, añapichi-pichi yuvireco yepi, asoquenda-quenda cuimbahe, cuña avei. Ayuca uca pota rai ahe ava yuvireco.

<sup>5</sup> Pahi rerecuar ivate catu vahe iyavei opacatu tecua pendar rerecuar oicua che reco yuvireco. Ichui niha aipisi cuachiar aru vaherā yande mu tūparo rerecuar Damasco pendar upe, ‘Taso Damasco ve pahi rerecuar rer pipe ava Jesús reroiyasar pisi āgua. Ichui tarupa cohava imombaraisu āgua’ ahe viña.

*Pablo omombehu oñecuñaro agüer*

<sup>6</sup> “Evocoyase aso Damasco ve. Ahe ipiar rupi arovisé vicho mbiter ari rupi, aviyeteramo tēi osesape guasu íva sui oreu.

<sup>7</sup> Ahese aviapi ivive. Asendu avei ñehesa: ‘Saulo, Saulo, ¿mahera vo che amotarēhi etepri eve?’ ehi vahe cheu.

<sup>8</sup> Ahese aporandu: ‘¿Ava vo nde ereico, Mbía?’ ahe chupe. ‘Che Jesús, Nazaret pendar aico. Che niha che amotarēhi etepri che rereco eve’ ehi cheu.

<sup>9</sup> Che rupindar osepia sendigüer, osiquiye avei yuvireco ichui. Ndosendui rumo ñehesa cheundar yuvireco.

<sup>10</sup> Aipo ahe chupe no: ‘¿Che Yar, mara ahera vo vichico?’ Ahese ahe aipo ehi cheu: ‘Epūha, eso Damasco ve. Aheve ava opara omombehu mbahe nde rembiaporā’ ehi cheu.

<sup>11</sup> Sendí iteanga vahe, ndache mboesapisoise, ahese che rupindar che po pisi che reraso Damasco ve yuvireco” ehi.

<sup>12</sup> “Aheve mbía, Ananías serer vahe, ou cheu. Ahe Tūpa mboyeroyasar ité, viroya tupri vahe avei iporocuita; sese opacatu judío secua pendar: ‘Co mbía aviye vahe ité’ ehi yuvireco chupe.

<sup>13</sup> Oyepotase, aipo ehi: ‘Che rivri, Saulo, esareco iri’ ehi. Aheseve iporēhi iri mbahe cheu.

<sup>14</sup> Ipare aipo ehi: ‘Yande ramoi rembieroya, yande Ru Tūpa, nde poravo güemimbotar cua āgua. Oipota avei eresepia vaherā ichuindar ava seco ívi vahe, eresendu aveira iñehe’ ehi.

<sup>15</sup> ‘Nde evocoyase eremombehura secocuer opacatu ava upe; eremombehura nde rembiepia, eresendu vahe avei’ ehi cheu.

<sup>16</sup> ‘Evocoyase, cūrteí ndiya iri eresāro’ ehi. ‘Epūha, toroāpiramo. Eporandu yande Yar upe nde reco moatiro āgua nde angaipa sui’ ehi Ananías cheu.

*“Tūpa che mondo ava ndahei vahe judío upe” ehi Pablo*

<sup>17</sup> “Coíye catu, ayeví irise Jerusalén ve, ayerure tūparo guasu pipe. Ahese che quer nungarve asepia mbahe.

<sup>18</sup> Asepia yande Yar. Ahe aipo ehi cheu: ‘Nde poyava, eso voi Jerusalén sui. Esepia, Jerusalén pendar ndoyapisaca potai chira eremombehuse ñehesa che resendar’ ehi Jesús cheu.

<sup>19</sup> Che aipo ahe chupe: ‘Che Yar, opacatu che cua nde reroiyasar roquenda-quendase, ainupa-nupa ucase avei aguatase judío tūparo yacatu rupi’ ahe.

<sup>20</sup> Aipo ahe avei chupe: ‘Oyucase Esteban yuvireco, ahe nde recocuer mombehusar, che ahese asepia. Chepihañemoñeta rupi aviyeño oyucase yuvireco. Sese asāro yucasar yeaosa vihā’ ahe chupe.

<sup>21</sup> Che Yar rumo omboyeví cheu: ‘Eso, oromondora coi rupi ava ndahei vahe judío pāhuve’ ehi che Yar cheu” ehi Pablo ava rehí upe.

*Pablo sundao rerecuar guasu povrive secoi*

<sup>22</sup> Aipo rupi osendu ñehe yuvireco. Ahese rumo osapucaí pĩrata yuvireco chupe: “¡Tomano co mbia! ¡Toicove vite iri eme co ivi pipe!” ehi yuvireco chupe.

<sup>23</sup> Osapuca-pucaí, osequipa oyeaosa oñemoĩrombave yuvireco iyavei omombombo ivi cuhi ivate coti yuvireco yamotarẽhimbave.

<sup>24</sup> Ahese sundao rerecuar guasu omoingue uca cuartelve, aipo ehi osundao upe: “Peinupa, ahese revo omombehura mbahe sui vo sãse atĩ yamotarẽhimbave ava yuvireco chupe” ehi osundao upe.

<sup>25</sup> Oñapichise rumo inupa ãgua yuvireco, Pablo omombehu ñepeĩ sundao rerecuar upe: —Yepe che judío, che rumo romano avei aico. ¿Iyacatu pĩha peinupara romano chupe mbahe rese poranduẽhiseve? —ehi mborerecuar upe.

<sup>26</sup> Osenduse ñehe, oso voi omombehu güerecuar upe.

—Eicua catu, aipo mbia romano secoi —ehi.

<sup>27</sup> Evocoyase sundao rerecuar guasu ou chupe:

—¿Supi eté vo aipo nde romano ereico? —ehi.

—Taa, ahe ité niha aico —ehi.

<sup>28</sup> Ahese sundao rerecuar guasu aipo ehi chupe:

—Che rumo setá guarepochi amondo romano che reco ãgua —ehi.

—Che rumo che ha ramo suive, romano aico —ehiño sundao rerecuar upe.

<sup>29</sup> Ahese oinupa pota vahe osiquiyepave oyepepi yuvireco ichui; sundao rerecuar guasu avei oicuae Pablo romano secosa rese, osiquiye ñapichi ucase.

*Pablo oyoepeĩ judío porandusa ivate catu vahesave*

<sup>30</sup> Ahere ayihive sundao rerecuar guasu oicua tupri pota: ¿Mbahe sui pĩha judío oyamotarẽhi Pablo yuvireco? Evocoyase oyora. Ahese oyocuai porandusa pendar ivate catu vahe ahe opacatu judío pahi rerecuar, opacatu ambuae judío rerecuar ñemonuha ãgua yuvireco. Ahese oviraso uca Pablo yuvireco chupe.

## 23

<sup>1</sup> Aheve Pablo omahengatu ava oñemonuha vahe rese ohã aipo ehi chupe:

—Che mu, che rembiapo mbahe tupri Tũpa rovaque areco yepi che pihañemoñeta tupriisa pipe —ehi.

<sup>2</sup> Ahese Ananías, ahe pahi rerecuar ivate catu vahe, yipi pendar uve, “Peiyurupete” ehi.

<sup>3</sup> Ahese Pablo omboyevi chupe:

—¡Tũpa nde nupara, nde aviye tupri tẽi angahu vahe ereico! Nde mbahe rese porandu ãgua cheu porocuita rupi ereĩ. Evocoyase, ¿mahera ereporocuai che yurupete ãgua mborocuita mboyeroyaẽhisa pipe? —ehi chupe.

<sup>4</sup> Yivirindar aipo ehi yuvireco chupe:

—¡Ereñehe rai rutei seroĩrosa pipe co Tũpa rembiporavo, co yande pahi rerecuar ivate catu vahe upe! —ehi yuvireco.

<sup>5</sup> Ahese omboyevi chupe:

—Che mu, ndaicuai co oñehe vahe pahi rerecuar ivate catu vahe secose. Esepia, icuachiapri pipe aipo ehi yandeu: ‘Peñehe rai eme pe rerecuar upe’ ehi —ehi.

<sup>6</sup> Ahese oicuae oñemonuha vahe pãhuve amove oime saduceo, amove fariseo. Ahese oñehe pĩrata chupe:

—Che mu, che fariseo aico iyavei fariseo che yesupa yuvirecoi. Oroviroya avei ava ocuerayevi vaherã curi. Sese revo co imboasipave oporandu mbahe rese yuvireco cheu —ehi.

<sup>7</sup> Aipo he ramoseve voi, fariseo, saduceo oñeñehepoepeĩ-epi yuvireco. Sese oyemboyaho yuvireco.

<sup>8</sup> Esepia, saduceo ndoviroyai vahe cuerayevisa iyavei “ndipoi Tūpa rembiguai, que espíritu” ehi vahe yuvireco. Fariseo rumo viroyaño ité opacatu aipo mbahe yuvireco.

<sup>9</sup> Sese sãse guasu yuvireco. Ahese oime amove opūha vahe Moisés porocuita rese oporombohe vahe fariseo Pablo repisave yuvireco aipo ehi:

—Co mbia ndoyapoi eté mbahe tēi. Aviyeteramo espíritu que Tūpa rembiguai revo oyemboyecua mbahe mombehu āgua chupe —ehi yuvireco.

<sup>10</sup> Yaivu guasu catu-catu irise yuvireco, ahese sundao rereciar guasu aipo ehi: “Aviyeteramo ombohi-mbohira Pablo yuvireco” ehi. Ahese oyocuai osundao, “Penose ava pāhu sui, pemoingue iri cuartel pipe” ehi.

<sup>11</sup> Ahe pītu pipe, yande Yar oyemboyecua chupe aipo ehi: “Eyemonguerēhi catu, Pablo, inungar che mombehu nde siquiyeēhisa pipe cohava Jerusalén ve, ēgüe ere aveira che mombehu Roma ve” ehi.

### *Omboguai Pablo yuca āgua yuvireco*

<sup>12</sup> Ahere ayihive setá judío oñemonuha, omboguai Pablo yuca āgua yuvireco: “Tūpa rovaque ndayayucase Pablo, ndayacarui chira, ndayaihui chiaveira; yayucase voi, yacarura, yaihura” ehi yuvireco.

<sup>13</sup> Ahe ava aipo ehi vahe retacuer setá catu cuarenta sui.

<sup>14</sup> Ichui yuviraso pahi rereciar upe, tecua pendar rereciar upe avei aipo ehi:

—Oromboguai Tūpa rovaque Pablo; ndorocarui chira ndoroyucase —ehi yuvireco chupe—.

<sup>15</sup> Sese pe, ambuae porandusa ivate catu vahe pendar avei peporandu ahe sundao rereciar guasu upe aipo peyera imombehu chupe: “Ayihive emose uca irimi Pablo oreu; oroicua uca pota iri mbahe sembiapo chupe” peyera —ehi yuvireco—. Osēse, oroquētirora sese. Oyepotase ou, oroyucara —ehi yuvireco.

<sup>16</sup> Pablo rihir rumo oyanduse sēracua, oso cuartelve chupe imombehu.

<sup>17</sup> Ahese Pablo oñehe sundao rereciar upe aipo ehi imombehu chupe:

—Erasomi tēi co mbia chīhivahe sundao rereciar guasu upe. Omombehu pota mbahe chupe —ehi.

<sup>18</sup> Evocoyase mborereciar viraso ahe chīhivahe güereciar upe aipo ehi:

—Pablo soquendapri oñehe cheu aipo ehi: “Eraso co mbia chīhivahe sundao rereciar guasu upe” ehi. Co chīhivahe omombehu pota mbahe ndeu —ehi.

<sup>19</sup> Ahese mborereciar guasu oipisi ipo rese, viroyepepi ambuae sui, oporandu chupe:

—¿Mbahe vo eremombehu pota cheu? —ehi.

<sup>20</sup> Evocoyase ahe aipo ehi:

—Judío rereciar oyemboyoya yuvireco. Oporandu angahu tēira Pablo rese seraso iri āgua ñemonuhasa ivate catu vahesave ayihive yuvireco. “Oroporandu pota iri Pablo upe sembiapo rese” aipo ehi tēira yuvireco ndeu —ehi—.

<sup>21</sup> Ndereroyai chira ahe iporandusa yuvireco. Esepia, cuarenta sui setá catu ava oquētiro vahe rā yuvireco sese. Omboguai eté yuca āgua yuvireco. Ndocarui, ndoihui chira aipo ndoyucase yuvireco. Cūritei oyemoingatu, osāro viteño nde porocuita yuvireco —ehi mbia chīhivahe chupe.

<sup>22</sup> Ipare sundao rereciar guasu omboyevi imondo, aipo ehi chupe: “Eremombehui rene ambuae ava upe eremombehu vahe cheu” ehi.

### *Pablo imondosa mborereciar guasu Félix rovai*

<sup>23</sup> Sundao rereciar guasu ñuvirío opovri pendar sundao rereciar upe aipo ehi yocuai: “Pemoingatu dosciento sundao Cesarea ve yuviraso vahe rā opi rese, ambuae setenta sundao cavayu harive iyavei doscientos tupri toguata lanza resendar yuvireco. Ipare pesopara pītuse las nueve pipe” ehi.

<sup>24</sup> “Pemoingatu uca avei cavayu Pablo yeupi ãgua. Ëgüe peye pesãro tuprira seraso yande rerecuar Félix upe” ehi.

<sup>25</sup> Evocoyase sundao rerecuar guasu oicuachía Félix upe imondo. Aipo ehi chupe:

<sup>26</sup> “Imboeteipri ore rerecuar Félix. Che, Claudio Lisias, amondo che mahenduhasa ndeu.

<sup>27</sup> Iyavei co amombehu pota ndeu: judío oipisi co mbia yuvireco yuca ãgua viña. Che rumo aicua romano seco rese, ahese araso sundao sepi ãgua judío eta sui

<sup>28</sup> ‘¿mbahe rese pñha ndoyambotai yuvireco?’ viya. Sese araso judío porandusa ivate catu vahe pendar upe ñemonuhasave yuvireco.

<sup>29</sup> Ahese aicua yamotarêhisa judío porocuita sui tēi iyavei ndoyapoi mbahe tēi oreu. Sese ndiyai yuca ãgua oreu, soquenda ãgua avei.

<sup>30</sup> Ayanduse rumo judío oquētiro sese yuvireco, amondo voi evocoi mbia ndeu. Ipare amombehu yamotarêhisar upe: ‘Peporandu potase Pablo recocuer rese, pesora Félix rovai’ ahe chupe yuvireco. Aipo rupive” ehi.

<sup>31</sup> Evocoyase ahe pñtu pipe sundao viroguata Pablo ocuita rupi yuvireco, viraso Antípatris ve yuvireco.

<sup>32</sup> Ahere ayihive sundao yuviraso vahe opi rese oyeví yugüeru cuartelve. Sundao cavayu ari pendar güeraño rumo yuvirasoñe vite.

<sup>33</sup> Viroyepotase Cesarea ve, omondo cuachiar mborerecuar guasu upe yuvireco. Aheseve avei Pablo omondo yuvireco chupe.

<sup>34</sup> Oyeroqui pare mborerecuar cuachiar rese, oporandu Pablo upe: “¿Que pendar vo nde ereico?” ehi. “Che Cilicia cotindar aico” ehi.

<sup>35</sup> —Oyepotase nde amotarêhisar yuvireco, asendura nde yoepisa —ehi Félix chupe.

Evocoyase oyocuai opñtivisar Pablo rãro ãgua güëtave Herodes rembiapogüer pipe.

## 24

### *Pablo oyoepi mborerecuar Félix rovai*

<sup>1</sup> Cinco ari pare, Ananías, ahe pahí rerecuar ivate catu vahe, tecua pipendar rerecuar avei yugüeru Cesarea ve. Ou avei mbia ava mbahe aposar pñtivisar oñehe vaherã Pablo amotarêhi uca ãgua, ahe serer Tértulo. Ahe yugüeru Pablo recocuer mombehu ãgua mborerecuar Félix upe.

<sup>2</sup> Evocoyase Félix güeru uca Pablo. Ahese Tértulo omboipi sese oñehe aipo ehi Félix upe: —Nde imboyeroyapri ereico. Aviye ndeu nde porocuai tuprisa rese. Esepia, ndipoi vavasa ore recua rupi. Ereyapo uca avei ore recua pipe mbahe iporañete vahe nde poroaisusa pipe.

<sup>3</sup> Opacatu rupi nde ereyapo tupri vahe oroipisi. Sese, “Aviye ndeu” orohe ndeu, imboyeroyapri Félix.

<sup>4</sup> Ndoromombita pucu potai rumo che ñehe pipe. Sese eyapisaca raimi tēi catu che ñehe rese —ehi—.

<sup>5</sup> Oroyandu co mbia ava mañeco tēisar oguata opacatu ivi rupi. Ore judío, ore mboyaho ore yeamotarêhi uca ãgua, ahe Jesús, Nazaret pendar, reroyasar rerecuar —ehi—.

<sup>6</sup> Viroique avei ava ndahei vahe judío ore tūparo pipe. Ëgüe ehi ore tūparo momara. Sese co oroipisi —ehi—.

<sup>7</sup> Evocoi sundao rerecuar guasu Lisias rumo oyepota ore pãhuve. Ahe opñratasa pipe vinose ore po sui,

<sup>8</sup> aipo ehiño oreu: “Peso, tapemombehu co mbahe sembiapo Félix upe” ehi. Nde avei ereporandura sembiapo rese mbahe sui eté vo Ëgüe orohe chupe —ehi Tértulo.

<sup>9</sup> Aipo ehi tupri avei ambuae judío yugüeru vahe yuvireco supi.

<sup>10</sup> Ipare Félix oyaiti Pablo upe ‘toñehe’ oyapave. Ahese oñehe:



—Aicua nde ereporocuai setá araviter ore recua rupi. Sese ayoepira nde rovaque che rorivetesá pipe —ehi Félix upe—.

<sup>11</sup> Nde ereicua tupri potase, ereporandura supi eté co pipe doce ari ramo opa che yepotare Jerusalén ve Tūpa mboetei āgua.

<sup>12</sup> Co judío oicua yuvireco nañhengatai ava upe tūparo guasu pipe, namboaiivu ucai avei ava ambuae judío ñemonuhasa rupi iyavei que ambuae ava Jerusalén pendar —ehi—

<sup>13</sup> Co mbia ndoicatui eté mbahe che rembiavi mombehu seroya tupri āgua yuvireco ndeu.

<sup>14</sup> Co rumo amombehu vahe ndeu: che amboetei Tūpa, ore ramoi rembieroya Tecocuer Piasu pihañemoñetasa rupi. Co judío upe rumo: “Co porombohesa co coti tēi vahe” ehi. Che rumo aroya ité opacatu icuachiapri porocuita pipendar iyavei Tūpa ñehe mombehusar rembicuachiagüer avei —ehi—.

<sup>15</sup> Inungar co mbia, ēgüe ahe tupri avei aicua Tūpa ombogüerayevira ava omano vahecuer seco aviye vahe, ndaseco pōrai vahe avei coiye.

<sup>16</sup> Sese ayemoviracua tupri che pihañemoñetasa rereco tupri catu āgua yepi Tūpa rovaque, ava rovaque avei.

<sup>17</sup> “Setá araviter pare ayevi che recua Jerusalén ve ava iparaisu vahe upe porerecosa mondo āgua. Ahese avei mbahe mimba ayuca uca Tūpa upe seropovēhe āgua.

<sup>18-19</sup> Evocoyase moviro judío Asia pendar che repia yuvireco Jerusalén ve tūparo pipe judío porocuita rupi che ñemoatiro pare. Ndipoi ahese ava rehi che rupi, namboaiivu guasu ucai avei ava. Ahe che repia vahe rumo iya yugüeru ndeu che mombehu, que virecose che amotarēhisa yuvireco viña.

<sup>20</sup> Anise, aviyeteramo co oyepota vahe cohava yugüeru, omombehura ndeu que mbahe che rembiavi yuvireco pahí rerecuar guasu ñemonuhasave che reiquesendar” ehi.

<sup>21</sup> “Co rese revo oñemoiro yuvireco cheu aipo ahe pīratase ipāhuve: ‘Che aroya ava ocuerayevira coiye. Sese che reraso pe rovai co pipe che recoāha āgua yuvireco’ ahese” ehi Félix upe.

<sup>22</sup> Félix oicua tupri co Tecocuer Piasu. Sese osendu pare aipo ñehesa, ndoyapo pota vitei mbahe, aipo ehiño ava upe:

—Oyepotase Lisias, ahe sundao rerecuar guasu, ahese voi aicua tupri catura aipo mbahe sembiapo —ehi Félix ava upe.

<sup>23</sup> Evocoyase oyocuai sundao rerecuar Pablo rāro āgua: “Eremondomira rumo que mbahe semimbotar apo āgua chupe iyavei imboripar yugüeruse, tihañecoño yuvireco sese. Ēgüe ere sāro” ehi Félix sārosar upe.

<sup>24</sup> Moviro ari pare Félix viroyepota güembireco Drusila, ahe judía avei. Ahese Félix güeru uca Pablo, osendu pota iñehe Jesucristo reroyasa resendar yuvireco.

<sup>25</sup> Pablo rumo omombehuse chupe teco ivisa resendar, teco ñearosa resendar avei iyavei aipo ehise: “Tūpa oporandura mbahe yande rembiapogüer rese yandeu ari cañise coiye” ehise, ahese Félix osiquiyepave aipo ehi Pablo upe:

—Esoño rane. Arecose ari nde ñehe rendu iri āgua, orogüeru uca irira —ehiño.

<sup>26</sup> Félix ipihañemoñeta yepi ‘Pablo revo omboura guarepochi cheu osē āgua’ oya viña. Sese osāro pucu tēi. Iyavei setá oyupagüer güeru uca oyeupe oñemoñeta āgua sese.

<sup>27</sup> Ñuvirío araviter pare rumo, Porcio Festo oique Félix recuñara. Ahese Félix judío mbovīha āgua, oseya Pablo soquendasave.

## 25

### *Festo rovai Pablo imondosa*

<sup>1</sup> Mbosapi ari oyepotare Festo osē Cesarea sui, oso Jerusalén ve.

<sup>2</sup> Aheve oyepotase, pahi rerecuareta, judío rerecuareta avei omombehu Pablo recocuer yuvireco chupe.

<sup>3</sup> Ipare oporandu chupe: “Emboumi uca Pablo cohava oreu” ehi yuvireco ‘yayuca perirupive’ oyapave yuvireco viña.

<sup>4</sup> Festo rumo aipo ehi chupe: “Aní. Esepia, Pablo Cesarea ve soquendasa oico iyavei che ayeve piaivira vicho aheve” ehi.

<sup>5</sup> –Sese pemondo pe rerecuar che rupi. Naporaise co mbia rembiapo, aheve tomombehu yuvireco cheu sembiapocuerai sereco mara água –ehi Festo chupe.

<sup>6</sup> Evocoyase Festo opita Jerusalén ve ocho ari rupi revo, anise diez ari. Ipare oyevi oso Cesarea ve. Ahere ayihive oguapi güendave ava reco moingatu água oí. Ahese oyocuai Pablo reru água.

<sup>7</sup> Oyepotase Pablo oso, ahese judío yugüeru vahe Festo rupi, oyemboya yuvireco sese. Ahese omombehu-mbehu tēi Festo upe Pablo rembiapo yuvireco, ndoicatu eté rumo seroya uca água yuvireco.

<sup>8</sup> Esepia, Pablo aipo ehi oyoepisave:

–Ndayemboangaipai judío porocuita rese, judío tūparo rese, yande rerecuar guasu Roma pendar Cesar rese avei –ehi.

<sup>9</sup> Festo rumo ombovaha pota judío, sese oporandu Pablo upe:

–¿Ndequerēhi vo Jerusalén ve ereso vaherã? Aheve co mbahe nde rembiapo rese aporandura ndeu –ehi chupe.

<sup>10</sup> Ahe rumo omboyeve chupe:

–Cūritei aico cohava romano mborerecuar guasu porandusa rovai. Aheve ité iyacatu che rembiapo rese porandusara cheu. Nde niha ereicua ndipoi eté mbahe tēi ayapo judío amotarēhisave –ehi–.

<sup>11</sup> Ayapose que mbahe naporai vahe, aviyeño che yuca uca água eve; ndayapoise rumo co judío omombehu vahe yuvireco ndeu, ndiyai che mondo água evocoi ava povrive eve. Che rumo aso pota mborerecuar Cesar ivate catu vahe upe cheu mbahe rese porandu água –ehi.

<sup>12</sup> Ahese Festo oñemoñeta opitiviisar oporomboaracua vahe rese, ipare omombehu Pablo upe:

–Ereso pota Cesar upe. Aviye, eresora evocoyase –ehi chupe.

### *Pablo mborerecuar Agripa rovai*

<sup>13</sup> Evocoyase moviro ari pare, evocoi mborerecuar guasu Agripa, cuña Berenice rese, oyepota Cesarea ve “avirave” apo água Festo upe yuvireco.

<sup>14</sup> Opitase yuvireco setá ari Cesarea ve, Festo omombehu Agripa upe Pablo recocuer. Aipo ehi chupe:

–Oime ñepe mbia soquendapri oseya vahe Félix cheu –ehi–.

<sup>15</sup> Asose Jerusalén ve, judío pahi rerecuareta, tecua pendar rerecuareta avei omombehu yuvireco cheu secocuerai, ‘Tayucasa, tehi chupe’ oya yuvireco viña –ehi–.

<sup>16</sup> Ahese aipo ahe yuvireco chupe: “Ndiyai eté romano mborerecuar omondo vaherã que ava uve sese oñemoñeta vahe rese mbahe moingatuēhi renondeve. Toyoepi rane omombehusar rovai, tomombehu tupri rane opacatu güecocuer” ahe judío upe –ehi–.

<sup>17</sup> Sese yugüeruse cohava yuvireco, aporandu voi pota secocuer rese chupe. Evocoyase ñepe ari pare aguapi che rendave porandusave. Ahese ayocuai che pitiviisar evocoi mbia reru água –ehi–.

<sup>18</sup> Evocoyase opūha sese oñemoñeta vahe sembiapo ai mombehu água. Asendu renondeve che pihamoñeta: “Oyapo revo mbahe naporai vahe” ahe viña. Ndiptoi eté rumo mbahe sembiapo –ehi–.

<sup>19</sup> Mbahe sembieroya tēi omombehu yuvireco. “Evocoi Jesús omano” ehi ava yuvireco. Pablo rumo aipo ehi imombehu: “Jesús oicoveño ité” ehi.

<sup>20</sup> “¿Mara ahera pīha co sembiapo moingatu?” ahe tēi. Sese aporandu chupe: “¿Ndequerēhi vo Jerusalén ve mbahe nde rembiapo rese porandu āgua ndeu?” ahe chupe —ehi—.

<sup>21</sup> Pablo rumo oporandu cheu Cesar upe oso āgua. Oipota mborerecuar ivate catu vahe oyeupe mbahe güembiapo rese porandu āgua. Sese asoquenda ucaño vite sereco imondo āgua Cesar upe —ehi Agripa upe.

<sup>22</sup> Evocoyase Agripa aipo ehi chupe:

—Asendu pota avei ahe mbia ñehe —ehi.

Ahe aipo ehi chupe:

—Ayihive voi teresendu —ehi.

<sup>23</sup> Ahere ayihive, Agripa oyepota, Berenice rese yugüeru chupe inungar opivondi vahe, ēgüe ehi yuviroique mborerecuar ñemoñetasave sundao rerecuar iyavei opacatu tecua pipendar ava seco ivate catu vahe reseve. Ahese Festo oyocuai opitiviisar Pablo reru āgua yuvireco,

<sup>24</sup> aipo ehi:

—Ore rerecuar guasu Agripa iyavei opacatu ambuae yuviroique vahe, peyapisaca: pesepia co mbia. Co mbia rese judío eta oñehe tēi yuvireco Jerusalén ve iyavei cohava Cesarea ve. Osapucái pīrata tēi yuvireco ‘¡tomano ité evocoi!’ oya yuvireco cheu —ehi—.

<sup>25</sup> Ndayosui rumo mbahe sembiapo yuca uca āgua iyavei oporandu oso āgua mborerecuar ivate catu vahe Cesar upe. Sese che ayemoingatu ité imondo āgua chupe.

<sup>26</sup> Ndarecoi rumo mbahe naporai vahe aicuachía vaherã imondo āgua chupe. Sese aru uca co mbia pe rovai —ehi ava upe—. Iyavei nde ore rerecuar guasu Agripa, ndeu ité aru uca. Nde chupe mbahe rese porandu pare, aviyeteramo oimera mbahe icuachiapirã sesendar Cesar upe nara —ehi—.

<sup>27</sup> Chepihañemoñeta amondose co mbia chupe, naporai cheu ndipoise mbahe sembiapo ai —ehi Festo Agripa upe.

## 26

### *Pablo omombehu güecocuer Agripa rovai*

<sup>1</sup> Evocoyase Agripa aipo ehi Pablo upe:

—Emombehuño nde yoepisa cheu —ehi.

Ahese Pablo omopuha opo oñehe āgua aipo ehi:

<sup>2</sup> “Ore rerecuar Agripa, ayoepira che rorivetesave judío che rese ñemoñeta-ñeta tēisa sui mbahe che rembiapoēhi rese nde rovai.

<sup>3</sup> Esepia, ereicua tupri opacatu judío recocuer, ipihañemoñetasa avei. Sese eyapisacami nde reco mbegüesa pipe che ñehe rese” ehi.

### *Pablo omombehura güecocuer oñecuñaro viteēhisendar*

<sup>4</sup> “Opacatu judío che cua vahe yuvireco, oicua tupri che recocuer che chñivahe suive che recuave iyavei Jerusalén ve aicose yuvireco.

<sup>5</sup> Omombehu potase che recocuer yuvireco viña, aipo ehira: ‘Pablo viroya tupri ité fariseo porombohesa. Ahe icuapri catu yande recua rupi’ ehira yuvireco viña.

<sup>6</sup> Sese cūrítei che reru nde rovai yuvireco che recocuer rese nde porandu āgua. Esepia, aroya Tūpa remimombehugüer ore ramoí uve omombehu vahe aracahe” ehi.

<sup>7</sup> “Doce ore ramoí suindar opacatu judío yuvirecoi, osãro vite evocoi Tūpa remimombehugüer aviye vahe yuvireco. Sese yuviroique tūparove ari, pītu pipe avei Tūpa mboetei āgua yuvireco. Ore rerecuar Agripa, eyapisaca tupri che ñehe rese. Evocoi Tūpa

remimombehugüer reroyasa sui judío eta semira-mira tēi che amotarēhisave che rese yuvireco” ehi.

<sup>8</sup> “Iyavei opacatu pe, ¿mahera pe avei ndaperoyai Tūpa porombogüerayevisa?” ehi.

*Pablo omombehu yipindar Jesús reroyasar amotarēhi agüer*

<sup>9</sup> “Yipindar che avei che pihanemoñeta rai aracaco mbahe tēi apo āgua rese ava Jesús, Nazaret pendar, rer amotarēhisave.

<sup>10</sup> Ēgüe ahe Jerusalén ve. Ombose pahi rerecuar oporocuita cheu, ahese serer pīpe setá Jesús reroyasar asoquenda; iyavei ambuae ava oyucase Jesús reroyasar yuvireco, ‘Toyucaño yuvireco’ ahe voiño ité che” ehi.

<sup>11</sup> “Setá rupi amombaraisu Jesús reroyasar ‘tamomboipa ava seroyasa sui yuvireco’ che hesa pīpe tēi. Ēgüe ahe aguata opacatu tūparo rupi, ambuae tecua rupi avei yamotarēhisa pīpe” ehi.

*Pablo omombehu güeco recuñaro agüer*

<sup>12</sup> “Evocoyase aso avei Damasco ve Jesús reroyasar mombaraisu āgua, pahi rerecuar ombouse oporocuita apo āgua cheu” ehi.

<sup>13</sup> “Mbitar ari rupi rumo, aguatase Damasco piar rupi, asepia mbahe sendí vahe íva sui. Ari sui osesape catu cheu, che rupindar upe avei.

<sup>14</sup> Orovīapipase ivive, asendu ñehesa aipo ehi vahe hebreo ñehe pīpe cheu: ‘Saulo, Saulo, ¿mahera vo ereyapo mbahe-mbahe tēi cheu? Ereyapose evocoi mbahe tēi, nde ae ereyemombaraisu’ ehi cheu.

<sup>15</sup> Evocoyase amboyeví: ‘¿Ava vo nde ereico, mbia?’ ahe chupe. Omboyeví cheu: ‘Che Jesús aico, che niha co che amotarēhi eve.

<sup>16</sup> Epūha, co rese ayemboyecua ndeu, tasecoi che rembiguai, che yapave. Tomombehu avei co mbahe osepiā vahe iyavei tomombehu avei co mbahe amboyecua vaherā chupe curi, viya ndeu’ ehi.

<sup>17</sup> ‘Oropīsīrora judío sui iyavei oromondora ava ndahei vahe judío upe. Ereguatase ipāhuve, oropīsīro aveira’ ehi cheu.

<sup>18</sup> ‘Oromondora, tache cua yuvireco, che yapave iyavei toguata iri eme pītumimbi vahe nungar rupi; toguata catu tesapesa rupi yuvireco. Ipīpe sui toyuvireco iri eme carugar povrīve yuvireco; toguata catu Tūpa rupi; ēgüe tehi che reroya yuvireco. Ahese oipīsīra ñeroisa oangaipa rese yuvireco iyavei oipīsīra Tūpa porerecosa oime vaherā opacatu che rembipeha rupive’ ehi Jesús cheu” ehi Agripa upe.

*Pablo viroya mbahe güembiepia*

<sup>19</sup> “Evocoyase, che rerecuar Agripa, che quer nungarve asepia vahe íva pendar, aroya ité.

<sup>20</sup> Aipo ahe ava upe: ‘Pemboasi pe angaipa; peyeví Tūpa upe. Peicove tuprī, ipīpe sui toicua ava yuvireco pe ñecuñarosa’ ahe. Aipo ahe Damasco pendar upe rane añehe, ipare Jerusalén pendar upe iyavei Judea rupindar upe, coiye catumi ava ndahei vahe judío upe.

<sup>21</sup> Sese tēi judío che pīsī tūparo pīpe che yuca pota yuvireco” ehi.

<sup>22</sup> “Tūpa che pītivīsa pīpe rumo aicoveño ité supi, amombehu-mbehu vite Tūpa recocuer opacatu ava seco ivi coti catu vahe upe, seco ivate catu vahe upe avei. Namombehui eté que mbahe co coti tēi Tūpa ñehe mombehusar iyavei Moisés, ‘Oimera mbahe avīye vahe’ ihe agüer sui.

<sup>23</sup> Aracahe omombehu yuvireco: ‘Tūpa Rembiporavo Poropīsīrosar omano ranera’ ehi. Ahe rumo yipindar ocuerayeví vaherā omano vahe pāhu sui. Omombehu aveira tesapesa ñepīsīrosa resendar ore mu judío yuvirecoi vahe upe iyavei ava ndahei vahe judío upe avei” ehi Agripa upe.

*Pablo osecuñaro pota tēi Agripa recocuer*

<sup>24</sup> Aipo ehise Pablo oñehe oyoepisave, Festo oñehengataño chupe aipo ehi:

—¡Nande mboaracuai moco nde mbahecuva vaisa! —ehiño chupe.

<sup>25</sup> Ahe rumo omboyeví chupe:

—Imboyeroyapri Festo, ¿mara ahe vo ndache aracuai? Amombehu rumo ndeu mbahe supi eté vahe, ndahei che aracuaēhisave —ehi Festo upe—.

<sup>26</sup> Co mborerecuar revo oicua tupri avei che remimombehu. Sese ndasiquiyei opacatu co mbahe mombehu āgua chupe. Esepia, opacatu co mbahe yaposa vahe ndahei ñomipri tēi.

<sup>27</sup> Ore rerecuar Agripa, ¿ereroya vo evocoi Tūpa ñehe mombehusar rembicuachía? Che aicua ereroya ité —ehi Agripa upe.

<sup>28</sup> Ahese Agripa omboyeví chupe:

—Moviro tēi ñehesa ipane cheu Jesús reroya āgua —ehi chupe.

<sup>29</sup> Ahe omboyeví Agripa upe:

—Ipanese que moviro tēi, anise setá vite ñehesa ndeu iyavei opacatu osendu vahe che ñehe co pipe, ēgüe ehi tarahu Tūpa pēu viña che nungar pe reco āgua. Ndahei chira rumo soquendapirã peico —ehi.

<sup>30</sup> Aipo ihe pare, mborerecuar guasu iyavei ambuae mborerecuar Berenice reseve iyavei opacatu sendusar opūha yuvireco.

<sup>31</sup> Oyepepi pare, oñemoñeta co coti aipo ehi yuvireco:

—Evocoi mbia ndoyapoi eté mbahe. Sese ndiyai yucapirã; ndiyai avei soquendapirã viña —ehi yuvireco oyeupe.

<sup>32</sup> Ahese Agripa aipo ehi:

—Ahe ndoporanduisse Cesar upe oso āgua rese, yamoseño itera niha viña —ehi Festo upe.

**27***Pablo imondosa Roma ve*

<sup>1</sup> Evocoyase mborerecuar opihañemoñeta omboyoya yuvireco ore mondo āgua carite pipe Italia ve. Sese omondo Pablo iyavei ambuae ava soquendapri yuvireco mbia Julio serer vahe upe. Ahe mbia sundao rehi rerecuar secoi, ahe yuvirecoi vahe rer Mborerecuar upendar.

<sup>2</sup> Oroha carite pipe, ahe Adramitio sui yuviraso pota vahe Asia ve. Mbía Tesalónica pendar, Aristarco serer vahe, oha avei ore rupi, ahe secua Macedonia ivi rupi.

<sup>3</sup> Ahere ayihive oroyepota yemboyasa Sidón serer vahesave, aheve Julio saisupave Pablo upe aipo ehi: “Eguata tupri nde mboripar rēta rupi nde rese ihañeco tupri āgua yuvireco” ehi chupe.

<sup>4</sup> Sidón sui orosirise, oroso Chipre ivi rupi ivitu sui ore ñemoha āgua. Oroso pota tēi ari sosa coti rupi, ndoroicatui rumo. Esepia, oipeyu pĩrata ivitu icoti sui.

<sup>5</sup> Evocoyase oroguata para guasu pipe Cilicia, Panfilia ivi rupi. Ipare oroyepota tecua Mira yemboyasave, ahe Mira, Licia ivi pipe.

<sup>6</sup> Aheve sundao rerecuar oyosu carite ou vahe Alejandría sui, oso vaherã Italia ve. Evocoyase ahe ipipe opa voi ore mboha.

<sup>7</sup> Ichui oroguata mbegüe setá ari. Oroporaviquí iteanga oreypota āgua Gnido rovai. Ivitu oipeyu pĩrata vite. Sese oroyahuva Creta coti, oroñocua tecua Salmón rovai rupi. Ēgüe orohe oroso Creta cupe rupi.

<sup>8</sup> Supi yavai rai ore guata āgua, ipare oroyepota yemboyasa Yemboyasa Aviye vahe serer vahesave. Ahe ichui namombrí tecua Lasea.

<sup>9</sup> Ore yepota āgua aheve, setá ari oromocañi. Ahese ivitu naporai catu oreu cute. Esepia, viroví ari naporai catu vahe. Sese Pablo aipo ehi carite pipendar upe:

10 —Mbia, naporai iri chira revo yande guata vite ãgua. Yaguata vitesse, yamocañira carite, ivosita reseve, yande avei eté aviyeteramo yacañi tẽira —ehi.

11 Sundao rerecuar rumo nomboyeroyai iñehe, ahe omboyeroya catu carite reroquatar, carite yar avei.

12 Ahe yemboyasa naporai ivitu ai rãro ãgua aheve. Sese setá catu “yasoño” ehi vahe yuvireco, “Tayayepota catu Fenice ve, aheve tayasãro ivitu ai” ehi yuvireco viña. Ahe Fenice Creta ivirindar yemboyasa aviye vahe. Aheve carite yuviroique norte ique rupi iyavei irohi ique rupi avei yepi.

### *Ivitu ai para guasu pipe*

13 Oipeyu mbegüemise ivitu irohi coti sui, ipihañemoñeta yuvireco, “Yaicatuño ité yande yepota ãgua” ehi yuvireco viña. Ahese orosirise ore yemboyasa sui, oroso Creta ivi rupi.

14 Coiyemi tẽi rumo oyepota ivitu ai oreu Creta coti sui. Ahe ivitu ai ou norte ique coti sui.

15 Oyepotase oreu, ndoroicatu iri eté sovañchi. Evocoyase, “Tayande rerasoño” orohe chupe.

16 Oroñocua caha pãhumi serer Cauda. Ahe oroñocuasave oroviroha sãi ore caritemi ore carite guasu pipe.

17 Orosupire, ahe oicuhacua carite guasu inicha pipe yuvireco. Ipare ipihañemoñeta yuvireco ‘carite oyeupi tiẽtera ivi cuhi Sirte serer vahe harive’ oya. Sese opa viroyi imombitasa yuvireco. Ahese ivitu ore reroquataño.

18 Ivitu rumo ombohítu iteanga para guasu. Sese ahere ayihive oporaviqui vahe omboipi carite vosita mombo yuvireco.

19 Imombosapisa ari pipe, omombo vite mbahe carite resendar yuvireco.

20 Setá ari ndoyecuai ari, yasitata avei oreu. Ivitu ai ndopaiño ité avei. Opa ité ore ipihañemoñeta mocañi, “Yacañi tẽi etera para guasu pipe” orohe viña.

21 Setá ari ore caruẽhi pare, Pablo opũha aipo ehi carite pipendar upe:

—Mbia, ehi acoi che reroya voira peye viña, nayasẽise Creta sui, ahese ndipoi chira co mbahe yandeu cũritei viña —ehi—.

22 Cũritei, peyemongerẽhi catuño. Esepia, ndipoi chira yande pãhu pendar omano vahe, carite güeraño rumo ocañi tẽira.

23 Ayihi pisa oyemoporẽhi cheu Tũpa rembiguai semimbou, chupendar che aico, chupe avei aporaviqui.

24 Ahe aipo ehi cheu: “Pablo, eresiquiyeyi rene. Ereyepotaño itera Cesar upe. Tũpa oipĩsiro aveira opacatu nde rupindar carite pipendar” ehi cheu.

25 Mbia, ayeroya Tũpa rese. Esepia, ahe omboaviye itera oñehesa cheu. Sese peyemongerẽhiño —ehi—.

26 Yande mohañira rumo imbehi coti caha pãhumi rese yande mondo —ehi.

27 Ñuvirío semana ivitu ore reroquata pare ahe pĩtu mbiter pipe para guasu Adriático rupi orocose, carite pipe oporaviqui vahe ipihañemoñeta yuvireco ‘yarovi revo ivi yaico’ oya.

28 Sese osãha para guasu ripigüer yuvireco. Ahe tipigüer treinta y seis metros tupri. Ipare osiri irimi yuvireco. Aheve osãha iri, tipigüer veintisiete metros tẽi. Ahese oicua, “Yarovi ivi” ehi yuvireco.

29 Ipihañemoñeta yuvireco: “Aviyeteramo yayepotara itave” ehi. Sese yuviraso carite rupitave. Aheve osiquiyepave omombo irungatu carite mombitasa tuvicha vahe ipive yuvireco. “¡Omocohe voi tarahu Tũpa yandeu viña!” orohe tẽi.

30 Oñemi potase oporaviqui vahe carite guasu sui yuvireco, viroyi caritemi mbahe-mohasa. Ombopa pota tẽi ambuae carite pipendar yuvireco viña, “Oromombora carite renonendar imombitasa” ehi tupri tẽi yuvireco.

31 Pablo rumo aipo ehi sundao rerecuar upe, sundao eta upe avei imombehu:

—Ndopitaise carite pipe yuvireco co oñemi pota vahe, pe ndapeñepisiroi chietera —ehi.

<sup>32</sup> Ahese sundao eta oyasia caritemi sã oiti ive imondo yuvireco.

<sup>33</sup> Cõhe ramose Pablo aipo ehi opacatu upe:

—Cũritei ñuvirío semana pemomba pecaruẽhi peico ‘¿mara yahera pñha co yaico?’ pe hesa pipe.

<sup>34</sup> Evocoiyase pehuñomi mbahe cute pe ñepisiro ãgua. Acoi ocañise carite, yande rumo nayacañi chira iyavei que ñepepe ha nocañi chietera —ehi Pablo.

<sup>35</sup> Aipo ehi pare, oipisi pan, “Aviye ndeu” ehi Tũpa upe ihu ãgua. Ahe imbohi pare, ohu.

<sup>36</sup> Evocoiyase opacatu ava oyemonguerẽhi yuvireco ocaru ãgua.

<sup>37</sup> Ore retacuer doscientos setenta y seis tupri.

<sup>38</sup> Ore caru pare, oporaviqui vahe opa omombo trigo carite vosita para guasu pipe iposiiẽhi ãgua yuvireco.

### *Carite ocañi*

<sup>39</sup> Cõhese, osepiase ivi, “¿Que pñha yaico?” ehi tẽi yuvireco. Oyosuse rumo yãcua vahe, ipipe oime ivi cuhi ipiru vahe. Aheve yuviroique pota tẽi yuvireco viña.

<sup>40</sup> Oyasia ahe carite mombitasa cuasa carite sui yuvireco, omonguhi carite mboyahu-vasa, osupi carite resendar turucuar imboguatasa yuvireco. Evocoiyase oroique oroso yãcua vahe pipe.

<sup>41</sup> Oroguatase rumo, oroyapi ivi cuhi. Aheve carite opãha ité sese. Ndoicatu eté seroyevi yuvireco iyavei carite rupita i ohitu vahe opa tupri oyoca.

<sup>42</sup> Ahese sundao eta, “Aviyeteramo soquendapri ohita tiẽtera, oñemi yuvireco. Sese yayucapa” ehi yuvireco chupe viña.

<sup>43</sup> Sundao rerecuar rumo ndoipotai Pablo mano ãgua, sese, “Teheni” ehi, “peyucai rene soquendapri” ehi. “Ohita oicua vahe rane toyuvirocui ive, toyuvinose ivi rese yuvireco” ehi.

<sup>44</sup> “Ambuae evocoiyase ivirape, carite yecacuer rese toyasecoño yuvinose ãgua ivi rese” ehi. Ëgüe orohe orosẽpa ivi rese oroso.

## 28

### *Caha pãhu Malta ve Pablo secoi*

<sup>1</sup> Ore ñepisiropare, ahese ramo oroicua caha pãhu rer Malta revo rahe.

<sup>2</sup> Ahe pendar ava nihapisii ore repiase yuvireco. Oquí iteanga, sõhisa avei. Ahese oyatapı guasu yuvireco, “Perio, tapeyepehemi” ehi yuvireco oreu.

<sup>3</sup> Evocoiyase Pablo omonuha yepaha seru, omondo potase rumo tatave, ahese osẽ aviyeteramo tẽi sacucuer sui mboi ahe eté vahe chupe, oipomama ichuhu.

<sup>4</sup> Osepiase mboi ichuhuse ahe pendar yuvireco, ahese, “Co mbia revo oporapichi vahe ité. Yepe oñepisiro para guasu sui viña, Tũpa rumo oichuhu uca mboi upe ‘tomanõ’ oya” ehi yuvireco viña.

<sup>5</sup> Ahe rumo omomboño mboi tatave imondo oyesui. Ipare nomomaraiño ité.

<sup>6</sup> Ahe pendar opacatu osãro tẽi yuvireco, “Irurura chupe, ahese oviapira, omanora revo” ehi yuvireco chupe viña. Osãro pucu tẽi yuvireco, Pablo rumo nimaraiño ité. Ahese, “Ndahei vo co mbia tũpa ité co secoi” ehi tẽi yuvireco chupe.

<sup>7</sup> Evocoiyase mbia Publio serer vahe, ahe opacatu caha pãhu Malta pendar ava rerecuar secoi. Iivi namombriimi ichui. Ahe nihapisii ore repia güetave iyavei ihañeco tupri ai ore rese mbosapi ari rupi.

<sup>8</sup> Aheve ore recoseve Publio yesupa sohı iteanga ou, sepochiuvi avei. Evocoiyase Pablo oiique chupe. Ahese oyeroqui Tũpa upe sese, omondo opo iharıve. Ëgüe ehi imbogüera.

<sup>9</sup> Oyanduse ahe icuera yuvireco, ahese ambuae imbaheasi vahe evocoi caha pãhu pendar yugüeru chupe, ahe ombogüerapa avei.

<sup>10</sup> Ahe pendar oyemboava etepri yuvireco oreu. Ipare ore ha ãgua ambuae carite pipe, opacatu mbahe ore guatasa rupi ipaneñhi ãgua ogüeru yuvireco oreu.

### *Pablo oyepota Roma ve*

<sup>11</sup> Co carite mbosapi yasi osãro vahe ari mbahe tẽi vahe pituhu ãgua. Ipipe oroso. Ahe carite yugüeru Alejandría sui. Ahe ichĩ rese ñuvirío itũpa rahanga yuvireco: ñepei rer Cástor, ambuae evocoyase Pólux.

<sup>12</sup> Ahese oroso oroyepota yemboyasa Siracusa ve. Aheve oropita mbosapi ari.

<sup>13</sup> Ichui orosẽ oroso oroyepota Regio ve. Ahere ayihive ivitu oipeyu irohĩ coti sui. Sese oroyepota Puteoli ve ambuae ari pipeve.

<sup>14</sup> Aheve orosepia ambuae Jesús reroyasar. Ore mombita güetave yuvireco ñepei semana. Ipare oroso Roma ve ivi rupi.

<sup>15</sup> Jesús reroyasar Roma pendar yipive ore andu yuvireco. Sese moviro yugüeru Foro de Apio ve, ambuae yugüeru Tres Tabernas ve ore rape penda ãgua yuvireco. Sepiase, Pablo, “Aviye ndeu” ehi Tũpa upe.

<sup>16</sup> Oroyepotase Roma ve, sundao rereciar co coti omondo Pablo ñepei sundao upe sãro uca ãgua.

### *Pablo omombehu Roma ve Tũpa Ñehengagüer*

<sup>17</sup> Mbosapi ari pare Pablo omonuha opacatu judío rereciar Roma pendar. Ahese oñehe chupe:

—Che mu eta, ndayapoi mbahe tẽi judío Jerusalén pendar upe, naroĩroi avei yande ramoi recocuer viña. Che roquendasa rumo iyavei imondopri aico Romano sundao rereciar povrive.

<sup>18</sup> Ahe mborereciar oporandu che recocuer rese yuvireco. Oicuase che recocuer, opoi pota tẽi che sui yuvireco viña. Esepia, ndoyosui eté mbahe che rembiapo che yuca ãgua yuvireco.

<sup>19</sup> Evocoi judío rumo ndoipotaiño ité chupe. Ahese ayu pota cohava Cesar upe che yoepi ãgua. Nayamotarẽhi uca potai rumo che mu Jerusalén pendar Cesar upe —ehi—.

<sup>20</sup> Che yoepi ãgua oposoho uca. Opomoñeta pota yande remiaro rese. Co Tũpa Rembiporavo ava pĩsiro ãgua resendar reroyasa rese carena pipe ñapichimbri aico —ehi.

<sup>21</sup> Ahese ahe ava omboyevi yuvireco chupe:

—Ndroipisi eté cuachiar Judea sui nde resendar. Iyavei yande mu oyepota vahe Judea sui nomombehui mbahe naporai vahe nde recocuer resendar yuvireco oreu —ehi—.

<sup>22</sup> Opacatu rupi ava viroĩro pe rembieroya piasu yuvireco. Sese orosendu pota nde pihañemoñetasa —ehi yuvireco chupe.

<sup>23</sup> Oiporavo ari iñehe ãgua yuvireco. Osupitise ari chupe, setá catu ava oñemonuha yuvireco secosave. Ahese omombehu Tũpa mborerecuasa resendar iyavei Jesús recocuer Moisés porocuita icuachiapri pipe sui iyavei Tũpa ñehe mombehusar rembicuachía pipe avei ‘toviroya yuvireco’ oyapave. Êgüe ehi imombehu ari momba.

<sup>24</sup> Amove osendu vahe viroya yuvireco, ambuae rumo ndoviroyai eté yuvireco.

<sup>25</sup> Opihañemoñetasa nomboyoyaise yuvireco, yuvinosépa pota. Ahese aipo ehi ahe ava upe:

—Supi eté Isaías omombehu Espiritu remimombehu pe recocuer resendar pe ramoi upe aracahe aipo ehi:

<sup>26</sup> “Eso nde mu pãhuve.

Emombehu aipo ere:

‘Yepe pesendu tẽira mbahe viña,



ndapesenducuai chira rumo.

Iyavei pesepia tēira mbahe viña,

ndapemahecuai chira rumo sese' ere chupe.

<sup>27</sup> Esepia, co ava ipiharātá iteanga seroyaēhisave.

Ndoyemboapisaiño yuvireco.

Iyavei osapivii tupriño mbahe sui, ndosepia potai mbahe aviye vahe yuvireco.

Ndosenducua catui eté avei ñehesa supi eté vahe.

Evocoyase ndoyevi potai cheu güecocuer moingatu yuvireco” ehi Espiritu Santo remimombehu chupe aracahe —ehi—.

<sup>28</sup> Sese tapeicua co pipe suive Tūpa omboyecua ucara oporopisirosa ava ndahei vahe judío upe. Ahe niha oyapisacara imombehusa rese yuvireco —ehi chupe.

<sup>29</sup> Aipo ihe pare, judío yuvinose iñehe rese oyecopi-copi yuviraso.

<sup>30</sup> Ipare Pablo opita ambuae ava rētave ñuvirío araviter rupi omboepi oque ãgua oico. Aheve nihapisii opacatu ava rese oyepiri oyepotase yepi.

<sup>31</sup> Omombehu Tūpa mborerecuasa resendar iyavei oporombohe opacatu yande Yar Jesucristo recocuer resendar osiquiyeēhisa pipe. Ndipoi eté que ava omombituhu vahe Pablo ñehese.

## PABLO REMBICUACHIA ROMA PENDAR UPE ROMANOS

### *Pablo mahenduhasa Roma pendar Jesús reroyasar upe*

<sup>1</sup> Che Pablo, Jesucristo rembiguai, aicuachía co che ñehe pëu. Tūpa che poravo apóstol che reco āgua ñehesa poropĩsirosa resendar mombehu āgua.

<sup>2</sup> Tūpa niha yipisuive omombehu uca co ñehesa ava oñehe mombehusar upe icuachi-apri maranehi pipe aracahe.

<sup>3</sup> Ahe ñehesa Tūpa Rahir Jesucristo resendar. Ahe ava güecosa pipe ité oyesu ou mborerecuar guasu David suindar sui;

<sup>4</sup> ocuerayevise oespíritu maranehi pipe, ahese opĩratasa pipe omboyecua tupri ité Tūpa Rahir güecosa. Ahe niha yande Yar Jesucristo.

<sup>5</sup> Ahe ichui Tūpa ombou cheu oporopĩtiviisa apóstol che reco āgua, che cuai avei ava ndahei vahe judío upe Guahir recocer mombehu āgua opacatu ivi rupi sese yeroya uca āgua ‘ipipe sui toviroya che Rahir yuvireco’ oya.

<sup>6-7</sup> Pe Roma pendar peico vahe, pe avei senoipri ipāhuve peico Jesucristo rese peico vahe. Pe niha Tūpa rembiaisu peico. Oipota avei pe reco catupri āgua oyeupe nara. Peipisi catu porovasasa, teco tupriisa yande Ru Tūpa suindar, yande Yar Jesucristo suindar avei.

### *Pablo oso pota Jesús reroyasar repia Roma ve*

<sup>8</sup> Che yipindar yande Yar Jesucristo rer pipe, “Aviye ndeu” ahe Tūpa upe pe rese. Esepia, opacatu ivi rupi icuapri sese pe yeroyasa.

<sup>9</sup> Iyavei Tūpa oicua pe rese ari rupi che yeroquisa. Chupe ité niha mbahe ayapo opacatu che piha pipe, amombehu Tahir resendar ñehesa aviye vahe vichico.

<sup>10</sup> Aporanduño ité semimbotar rupi pe piri che so āgua rese chupe yepi.

<sup>11</sup> Esepia, che aso pota ité Espiritu suindar mbahecuaa mondo pëu pe pĩtivi āgua ‘toyemoviracua tupri catu Cristo rese yuvireco’ che yapave.

<sup>12</sup> Che aipota ité yande ñepeipei yañepitivi catu āgua Cristo rese yande yeroyasa yareco vahe pipe.

<sup>13</sup> Che rivireta, che aipota peicua setá rupi che so pota tēisa pe piri yepi. Cūritei rumo ndaicutiño vite ité. Che rumo aipota, “Toime que che poraviquisa sui Cristo rese oyemoviracua catu vahe yuvireco ipāhuve” ahe pëu, inungar opacatu ambuae ivi rupi ēgüe ahe ava ndahei vahe judío upe vichico.

<sup>14</sup> Che cuaita ité niha opacatu ava upe che ñehe āgua, tecua pipendar yuvirecoi vahe upe iyavei ndayaracua vitei vahe upe, imbahecua vahe upe, nimbahecuai vahe upe avei nō.

<sup>15</sup> Sese pe Roma ve peico vahe upe avei ayemonguerēhi voi eté co ñehesa pĩsirosa resendar mombehu āgua.

### *Ñehesa pĩsirosa resendar pĩratasa*

<sup>16</sup> Che nachĩ eté co ñehesa pĩsirosa resendar aviye vahe sui. Esepia, ahe Tūpa pĩratasa opacatu viroyasar pĩsiro āgua, judío rane yipindar, ipare opacatu ambuae ava-ava tēi avei.

<sup>17</sup> Supi eté co ñehesa omboyecua Tūpa ava reco mbocatupriisa. Oyese yande yeroyasa pipeño ité ēgüe ehi yandeu. Esepia, icuachiapri arachendar aipo ehi: “Acoi ava seco catupri vahe Tūpa rese oyeroyasa pipe sui oicoveño itera apirēhi” ehi.

### *Opacatu ava rembiavi resendar*

<sup>18</sup> Supi eté niha yande Aposar oñemoïrosa ipĩrata vahe ombou itera iva sui opacatu ava viroyasarẽhi upe, ndaseco põrai vahe upe avei, mbahe güembiapo ai sui ndoicua uca potai vahe co ñehesa supi eté vahe ambuae ava upe yuvireco.

<sup>19</sup> Ahe oicua tupri tẽi mbahe Tũpa suindar yuvireco. Esepia, Tũpa ité niha omboyecua chupe.

<sup>20</sup> Ëgüe ehi eté Tũpa recocuer ndoyecuai vahe oyecua rumo mbahe sembiapo pipe. Supi eté yamahe mbahe sembiapocuer ivi apo ramo suive oime vahe rese. Sese yaicua ahe Tũpa ité secoi iyavei ipĩratasa apirẽhi vahe. Sese ava angaipa viyar ndiyai, “Eñemosañõ tẽi rane oreu” ehi vaherã yuvireco chupe.

<sup>21</sup> Esepia, yepe ahe oicua tẽi Tũpa yuvireco viña, nomboetei rumo Tũpa secosa rese. “Aviye ndeu” ndehi avei yuvireco chupe. Iyavei ipihañemoñeta mbahe ëgüe ehi tẽi vahe rese. Ipipe sui mbahe ndosenducua catu iri eté yuvireco.

<sup>22</sup> Yepe, “Ore mbahecua vai” ehi tẽi viña, ndoicuai eté rumo mbahe ipipe yuvireco.

<sup>23</sup> Esepia, ahe Tũpa nomanoi vahe seco porañete vahe mboetei rãgüer sui, omboetei ava ocañi tẽi vaherã rahanga yuvireco iyavei vĩrai, opacatu mbahe mimba, mboi tẽi avei omboetei yuvireco.

<sup>24</sup> Sese Tũpa, “Toyapoño ité mbahe güemimbotarai yuvireco” ehi chupe. Ichui oyapo ité mbahe poromochisa guasu oyeupe oyemboeteiẽhisa pipe yuvireco.

<sup>25</sup> Esepia, mbahe supi vahe reroya rãgüer sui temira tẽi viroya catu yuvireco. Iyavei Tũpa ité mboyeroia rãgüer sui omboetei catu mbahe sembiapocuer tẽi yuvireco. Yaposar ité ru timboeteisa catu yepi.

<sup>26</sup> Sese Tũpa opoi eté ichui, “Toyapoño poromochisa mbahe tẽi güemimbotarai pipe yuvireco” ehi chupe. Evocoyase cuña avei cuimbahe rese güeco rãgüer sui yuvirecoi oyese ae.

<sup>27</sup> Cuimbahe avei cuña rese güeco rãgüer sui yuvirecoiñõ avei oyese ae iyavei oipota raiño ité evocoi güeco raisa yuvireco. Evocoi nungar aposa sui oyemomara ahe ae yuvireco.

<sup>28</sup> Iyavei, “Tũpa supi eté vahe” ndehise seroyaẽhisa pipe yuvireco, Tũpa evocoyase opoi eté ichui ‘toyapoño ayase mbahe ndipotasai vahe güeco raisa pipe yuvireco’ oya chupe.

<sup>29</sup> Ahe evocoyase yuvirecoi opacatu mbahe-mbahe tẽi pipe; oyemboaguasa-guasa tẽi vahe cuimbahe, cuña avei, ambuae ava mbahe oipota rai iyavei oyapo mbahe-mbahe tẽi ava upe. Ahe oñemoïro ambuae ava mbahe pota raisave tẽi, oporapichi, ivava serai, iporombopa serai, ipihañemoñeta ava reco momara ãgua tẽi iyavei imahechiroi ai ipipe yuvireco.

<sup>30</sup> Iyavei ambuae ava cupe cotive mara ehi-ehi tẽi vahe, ahe Tũpa amotarẽhisar yuvirecoi, viroïro avei ava, oyemboivate ai, oyecomboivate ai tẽi avei oñehe pipe yepi, osecaseca tẽi mbahe naporai vahe güembiaporã, nomboyeroiyai avei oyesupa yuvireco,

<sup>31</sup> ndoyapisaca potai eté Tũpa suindar ñehesa rese, nomboaviyei avei oñehe, ndosaisui avei que ava, niñeroi avei ava upe, ndoiparisuerecoi eté ava yuvireco.

<sup>32</sup> Oicua tẽi Tũpa “oimera evocoi nungar aposar upe cañisa” ehi vahe, oyapo viteño rumo mbahe tẽi yuvireco iyavei ambuae ava oyapose mbahe tẽi, ovihareteño sepiase yuvireco.

## 2

### *Tũpa omondo ava upe sembiapogüer rupi tupri ité*

<sup>1</sup> Oimese que pe pãhu pendar ‘co oyapo mbahe tẽi; tocañi’ ohesave ambuae upe, ahese ahe ae oyemocañi tẽi uca. Esepia, ahe inungar tupri avei.

<sup>2</sup> Yaicua rumo Tũpa omocañise evocoi nungar mbahe tẽi aposar recocuer, ahe evocoyase oyapo mbahe supi tupri vahe.

<sup>3</sup> Pe opase ava recocuer pesenoi, pe avei rumo ãgüe peye tupri peico. Pe avei eté evocoyase ndapeñemi chietera Tũpa ñemoirosa sui.

<sup>4</sup> ¿Peroĩro tie Tũpa oyapo vitesse mbahe aviye vahe oñemosase, seco mbegüe tupri ai vitesse avei pẽu? ‘Tosecuñaro güecocuer yuvireco’ oyapave rumo ãgüe ehi pẽu.

<sup>5</sup> Pe rumo pepiharãta viteño ité Tũpa upe pe yevi potaẽhi ãgua. Sese pereco catu viteño ité Tũpa ñemoirosa peyese, acoi ari oyepotase Tũpa güeco tuprisa pipe yande renoipara yande mocañi ãgua, anise yande pĩsiro ãgua curi.

<sup>6</sup> Ahese opara omboepi ñepeipei yande rembiapogüer rupi yandeu.

<sup>7</sup> Omboura tecovesa apirẽhi vahe yandeu yasecase teco ori, Tũpa suindar poromboeteisa iyavei mbahe apirẽhi vahe yande mbahe tupri aposa pipe.

<sup>8</sup> Ombou aveira oñemoirosa ava ndiporomboyeroyai vahe upe, ahe acoi co ñehesa supi eté vahe reroya rãgüer sui viroya vahe mbahe tẽi.

<sup>9</sup> Judío opacatu mbahe-mbahe tẽi aposar ranengatu oiporarara mbahe rasicuer yuvireco, iparera ndahei vahe avei judío.

<sup>10</sup> Tũpa rumo opacatu seco catupri vahe upe omondora imboetei ãgua ‘toipisi teco ori iyavei toyuvirecoi mbahe tupri pipe’ oya chupe. Yipindar rumo judío eta upe rane omondora, iparera ndahei vahe judío upe.

<sup>11</sup> Esepia, Tũpa ndayande mboyoavirati yande rereco.

<sup>12</sup> ãgüe ehi eté, opacatu oyemboangaipa vahe Moisés porocuita porẽhi oyemocañi tẽira yuvireco. Acoi oyemboangaipa vahe Moisés porocuita rereco pipe yuvireco, ahe porocuita pipe avei opara ocañi tẽi porandusave yuvireco coiye.

<sup>13</sup> Esepia, osenduño tẽi vahe porocuita ndahei seco catupri vahe yuvireco. Viroya vahe ité rumo porocuita, ahe seco catupri vahe yuvirecoi.

<sup>14</sup> Supi eté acoi ndahei vahe judío yuvirecoi vahe yepe ndovirecoi co porocuita yuvireco viña, ahe rumo co porocuita rupi tupri oyapose mbahe, ahe evocoyase inungar porocuita vireco vahe yuvireco.

<sup>15</sup> Esepia, güembiapo catupri pipe omboyecua porocuita virecose opiha pipe. Opihañemoñeta pipe avei oyandu porocuita mboaviyesa. Ahe ipipe avei oyandu mbahe güembiavi, ichui avei oyemonguerẽhi mbahe aviye vahe apose.

<sup>16</sup> Ahe ari cañi pipe Tũpa oyocuai ucara opacatu ava rembiapo cuaẽhisa repri pisi ãgua Jesucristo upe, co ñehesa pĩsirosa resendar amombehu vahecuer rupi tupri ãgüe ehira curi.

*Ñehesa judío resendar, Moisés porocuita resendar avei*

<sup>17</sup> Pe rumo, “Judío aico” peye vahe, peyeroya opacatu Moisés porocuita mboaviyesa pipe pe reco catupri ãgua Tũpa rovaque viña. Iyavei ipipe peyecomboivate ai Tũpa rese peicose.

<sup>18</sup> Peicua semimbotar. Ahe porocuita pe mbohe avei mbahe aviye catu vahe poravo ãgua.

<sup>19</sup> Pe, “Aicatu ité ndasesapisoi vahe nungar ava ndayaracuai vahe mboaracua iyavei ava angaipa viyar pĩtumimbi vahe nungarsave tẽi resape ãgua” peye tẽi.

<sup>20</sup> “Aicatu avei ava mbahe ndosenducuai vahe mboaracua iyavei ava chĩhivahemi nungar mbohe ãgua. Esepia, areco co mborocuita vireco vahe opacatu mbahecuaa iyavei mbahe supi tupri vahe ité” peye tẽi avei.

<sup>21</sup> Pe pembohe vahe ambuae ava, ¿mahera ru ndapeyembohei pe ae? Pe pemombehu vahe ambuae ava mondaẽhi ãgua, ¿mahera ru pe ae avei pemonda no?

<sup>22</sup> Pe, “Ndiyai pe aguasa” peye; pe teieté avei rumo ãgüe peye. Ndapesepia potai eté mbahe rahanga; pe avei rumo opa peñomi mbahe sepi vahe itũparo pipe sui.

<sup>23</sup> Peyecomboivate ai co mborocuita rerecoa rese; ndapemboetei rumo Tũpa ipipe ahe mborocuita mboavieẽhi pipe.

<sup>24</sup> Supi eté icuachiapri arachendar pipe aipo ehi: “Pe sui tēi ava ndoicuai vahe Tūpa ñehe-ñehe tēi serer maranehi rese yuvireco” ehi.

<sup>25</sup> Supi eté co tecocuer cuacua circuncisión resendar ahe aviye angara pēu, peroya tupri itese Moisés porocuita viña. Ndaperoya tupriise rumo, pe evocoyase inungar ndapeyembocircuncidai vahe peico.

<sup>26</sup> Acoi ava ndoyembocircuncidai vahe, ahe rumo viroyase porocuita, ahe seroyapri inungar imbocircuncidapri yuvirecoi.

<sup>27</sup> Acoi ndoyembocircuncidai vahe, oyapose rumo mborocuita yuvireco, ahe evocoyase omombehura pe cañi água yuvireco. Esepia, yepe pereco Tūpa porocuita viña, pe rumo ndapemboaviyei eté.

<sup>28</sup> Judío supi eté vahe yaicose, ndahei yande yesupa judío recocuer rupi güeraño ěgüe yahera. Iyavei circuncisión supi eté vahe ndahei yande retocuer rese güeraño tēi avei no.

<sup>29</sup> Judío ete ité rumo opihá pipe ité viroya Tūpa. Iyavei circuncisión supi eté vahe, Espiritu rembiapo yande piha pipe, ndahei porocuita icuachiapri rembiapo tēi. Evocoyase judío supi eté vahe oipisira omboeteisa Tūpa suindar ité, ndahei ava tēi suindar.

### 3

<sup>1</sup> Evocoyase, ¿mbahe vo co aviye judío yande reco água? ¿Yande yembocircuncidasa piha aviye?

<sup>2</sup> Supi eté. Esepia, yipindar Tūpa omondo ñehe judío eta upe imboaviye água.

<sup>3</sup> Amove yepe ipāhu pendar nomboaviyeise ocuita viña, ¿Tūpa avei tie ěgüe ehira?

<sup>4</sup> ¡Aní eté! Tūpa rumo supi tupri vahe ité secoi, yepe que ava opacatu semirañete ai tēi yuvireco. Esepia, icuachiapri arachendar pipe aipo ehi:

“Supi tupri vahe Tūpa’ ehira nde ñehe rese yuvireco.

Sese ereiquese ava porandusave, eresē tupriñora eso ichui” ehi.

<sup>5</sup> Yande reco rai pipe tēi yamboyecua Tūpa reco tupri, ¿mara yahera vo evocoyase? ¿“Tūpa ndahei supi tupri vahe yande reco raisa rese yande nupa” yahera tie? (Che rumo aipo ahe inungar-ra ava co ivi pipendar tēi viña.)

<sup>6</sup> ¡Aní eté! Esepia, Tūpa ndaheise supi tupri vahe viña, ndiyai chietera yande recocuer rese porandupa tupri água chupe viña.

<sup>7</sup> Aviyeteramo oimera ava aipo ehi vahe: “Yande remira pipe sui tēi ava omboetei catuse Tūpa supi eté vahe, ¿mahera piha evocoyase angaipa viyar nungar yande rerecora viña?” ehi.

<sup>8</sup> “Yayapora ayase mbahe naporai vahe mbahe tupri reime água” ehi. Amove ava, “Pablo ondugüer reseve aipo ehi eté oporombohe” ehi tupri tēi yuvireco oreu. Aipo ehi tēi vahe rumo. Iya ité oipisira cañisa yuvireco.

#### *Opacatu yande angaipa viyar yaico*

<sup>9</sup> ¿Mara ehi ru evocoyase? ¡Yande judío yaico vahe ndahei eté ivate catu yande recocuer opacatu ambuae ava-ava tēi sui! Esepia, opa amboyecua Tūpa rovaque opacatu angaipa viyar yaico que judío, que ndahei vahe judío avei.

<sup>10</sup> Supi eté icuachiapri arachendar pipe aipo ehi:

“¡Ndipoi eté ava seco catupri vahe, que ñepe angara viña!

<sup>11</sup> Ndipoi avei que ava Tūpa recocuer osenducua tupri vahe.

Ndipoi avei Tūpa oseca vahe yuvireco.

<sup>12</sup> Opacatu ava oguata mbahe tēi pipe yuvireco, co coti tēi avei secocuer yuvireco.

¡Ndipoi eté que ava mbahe tupri aposar, que ñepe angara viña!

<sup>13</sup> Ñehesa mbahe tēi eté, inungar tuvipa ndasovapisi vahe.

Oñehesa pipe oporombopa yuvireco.

Ahe ñehesa evocoyase inungar mboi naporai vahe oporomocañi tēi vahe.

14 Ipípe oñehe rai opihavĩracuá iteangasa pipe yuvireco.

15 Ndayipitii oporapichi ãgua yuvireco.

16 Setá ava omomara, omombaraisu avei oguatasa rupi yuvireco.

17 Iyavei ndoicuai eté güeco tupri ãgua yuvireco.

18 Ndihihañemoñetai eté Tũpa sui osiquiye ãgua yuvireco” ehi.

19 Yande niha opa yaicua opacatu co mbahe omombehu vahe mborocuita aracahendar pipe, omombehu co porocuita pipe yuvirecoi vahe upe ‘Che ndayapoi eté mbahe, tehi eme opacatu ava yuvireco’ oyapave, iyavei ‘toicua opacatu ivi rupindar ava Tũpa ñemoirosa pisi ãgua yuvireco’ ohesave aipo ehi.

20 Esepia, ndipoi chietera que ñepeí seco aviye vahe Tũpa rovaque co porocuita mboaviye pipe. Ahe mborocuita rumo oicua uca yande angaipa viyar yande reco.

### *Cristo rese yande yeroya pipe Tũpa yande pĩsirora*

21-22 Cũritei rumo Tũpa oicua uca yandeu ndahe iri mborocuita mboaviye pipe seco catupri vahe nungar yande rerecora. Cristo rese yande yeroyasa pipe sui niha seco catupri vahe nungar yande rereco. Ahe niha ndayande mboyoavii eté. Yipive ité ahe imombehupri secoi porocuita aracahendar pipe, iñehe mombehusareta rembicuachi-agüer pipe avei.

23 Supi eté yande opacatu yayapo angaipa, ndayasupitii eté Tũpa reco porañetesa.

24 Ahe rumo oporoaisusa pipe, “Ereyavi mbahe che ñemoirosa pisi ãgua” ndehi iri yandeu. Esepia, ahe yande pĩsiro uca Guahir Jesucristo upe. Yande rumo ndayamboepii eté yande raisusa chupe.

25-26 Tũpa rumo ombou Guahir Cristo oipiyere vaherã vuví yande angaipa rese ñero ãgua. Sese yande yeroya pipe oime ñeroisa yandeu. Ipípe omboyecua güeco ñvi tupriisa. Yipisuive rumo güeco asiẽhisa pipe oñemosañõ aracahendar ava angaipa upe; cũritei rumo omboyecua ité güeco ñvisa yandeu, seco ñviño ité seco catupri vahe yande rerecose Tahir rese yande yeroya pipe.

27 ¡Evocoyase ndiyai eté yande yeecomboivate ai ãgua sovaque! Esepia, ndahei porocuita mboaviye rese ãgüe ehi, ahe rumo Cristo rese yande yeroya pipe ãgüe ehi yandeu.

28 Sese yaicua Tũpa, “Ereyavi mbahe che ñemoirosa pisi ãgua” ndehi iri Cristo rese yande yeroyase yandeu, ndahei mborocuita mboaviyesa sui tẽi.

29 ¡Tũpa niha opacatu ité ava Tũpa, ndahei ore judío oroico vahe Tũpa güeraño!

30 ¡Supi eté ñepeíño ité secoi: sese yayeroyase Cristo rese, oyoya guasũño ité, “Ereyavi mbahe che ñemoirosa pisi ãgua” ndehi chira yandeu, yepera imbocircuncidapri viña, anise que ndahei vahe imbocircuncidapri viña no!

31 Ndahei rumo, “Ëgüe ehi tẽi vahe” vahe evocoi mborocuita upe Jesucristo reroyasa pipe. Ipípe rumo yamboyecua evocoi mborocuita ãgüe ndehi tẽi vahe.

## 4

### *Abraham recocuer sui yembohesa*

1 Iyavei, ¿mara ehi pĩha yande ramoi Abraham recocuer aracahe?

2 Acoi mbahe güembiapo pipe sui tẽi oipisise güeco tupri ãgua Tũpa sui, oyemboivate aira oico ipípe viña. Ndiyai eté rumo ãgüe ehi Tũpa rovaque.

3 Esepia, icuachiapri aracahendar pipe aipo ehi: “Abraham oyeroya ité Tũpa rese. Sese Tũpa, ‘Co seco catupri vahe’ ehi chupe” ehi.

4 Co rumo yande yayapose mboraviqui, ahe yaipisi vahe ndahei porerrecosa tẽi, ahe rumo mboraviqui repri ité yaipisi.

<sup>5</sup> Yande rumo, yayeroyase Tūpa rese, Tūpa evocoyase yande pīsira, ‘co seco catupri vahe’ ohesave. Esepia, ahe ěgüe ehi vahe ité oyese oyeroya vahe upe, yepe ndoyapoi chira mbahe aviye vahe chupe viña.

<sup>6</sup> David mborereciar arachendar avei oñehe ava rorivetesese rese Tūpa seco catupri vahe nungar pīsisa rese. Ahe rumo ndahei mbahe sembiapogüer rese tēi oipīsī.

<sup>7</sup> Ahe aipo ehi aracahe:

“¡Sorivete acoi ava Tūpa iñeroise yangaipa rese, iyavei ndoyemomahenduha irise yangaipa rese chupe!

<sup>8</sup> ¡Sorivete avei ava, ‘Nde angaipa viyar ereico’ ndehi irise Tūpa chupe!” ehi.

<sup>9</sup> Co mbahe tupri rumo ndahei judío upeño, ahe rumo ava ndahei vahe judío upe avei. Supi eté Tūpa, “Co seco catupri vahe secoi” ehi Abraham upe oyese iyeroyasa rese.

<sup>10</sup> ¿Marase pīha oipīsī oyeupe nara sereco? ¿Oyembocircuncida renondeve pīha, anise ipare tie? Yipive ité.

<sup>11</sup> “Toicua ava co seco catupri vahe che rese iyeroyase yuvireco” ehi Tūpa chupe. Sese imbocircuncidapri secoi. ěgüe ehi Abraham opacatu ava oyeroya vahe Tūpa rese, ndoyembocircuncidai vahe yesupa nungar secoi. ěgüe ehi Tūpa, “Co seco catupri vahe yuvirecoi” ehi avei ahe ava upe.

<sup>12</sup> Supi eté yande ramoi Abraham opacatu ava oyembocircuncida vahe, Tūpa rese oyeroya vahe yesupa avei secoi. Abraham rumo oyeroya vahe Tūpa rese ndoyembocircuncida viteiseve.

*Tūpa remimombehu imboaviyesara sese yeroyasa pipe*

<sup>13</sup> Esepia, aracahe Tūpa aipo ehi Abraham upe, ichuindar upe avei: “Peipīsira opacatu co ivi pe mahera” ehi. Ndahei Moisés porocuita mboyeroya pipe ěgüe ehi chupe, oyese yeroyasa pipe sui eté rumo ahe oipīsī ‘co seco catupri vahe’ ohesave.

<sup>14</sup> Supi etese co mborocuita mboyeroyasar güeraño oipīsise co mbahe oime vaherã chupe viña, evocoyase yande yeroyasa Tūpa rese ěgüe ehi tēi etera, Tūpa remimombehugüer evocoyase ěgüe ehi tēi vahe aveira viña no.

<sup>15</sup> Esepia, co mborocuita mboaviyeēhisa pipe ñemoirosa oime ava upe. Ndipoise rumo mborocuita, ndipoi chietera ahe porocuita mboyeroyaēhisa.

<sup>16</sup> Sese mbahe Tūpa remimombehugüer porerecosa yaipīsira sese yande yeroyasa pipe, ahe semimombehugüer supi tupri vahe opacatu yande Abraham suindar upe nara. Esepia, ndahei mborocuita mboyeroyasar upe güeraño, ahe rumo opacatu yande Abraham nungar Tūpa rese oyeroya vahe upe nara. Evocoyase ahe opacatu yande ramoi secoi.

<sup>17</sup> Icuachiapri arachendar pipe aipo ehi: “Orombou ava eta ivi rupindar ramoirã” ehi. Co Tūpa niha Abraham rembieroya, ahe avei omoingove vahe omano vahecuer iyavei oyapo vahe mbahe ndipoi vahe yipindar.

<sup>18</sup> Yepe yavai eté seroya ãgua viña, Abraham rumo oyeroya ité Tūpa oyeupe ñehesa rese; sese ava eta ivi rupindar ramoi eté secoi Tūpa ñehe: “Setá oimera ava nde suindar” ehi vahe rupi tupri ité.

<sup>19</sup> Abraham evocoyase ndasesarai eté oyeroya tuprisa sui, yepe vireco pota ité cien araviter viña. Iyavei oyoya güembireco reseve nañaroi eté guahi ãgua yuvireco viña.

<sup>20</sup> Ndopoi eté Tūpa oyeupe ñehesa reroyasa sui. Ahe rumo oyeroya catu ité sese iyavei omboetei eté.

<sup>21</sup> “Supi eté Tūpa vireco opĩratasa opacatu oñehengagüer mboaviye ãgua” ehiño ité opīha pipe.

<sup>22</sup> Sese Tūpa, “Co seco catupri vahe secoi” ehi iyeroyasa rese chupe.

<sup>23</sup> Co ñehesa ndahei Abraham upe güeraño.

<sup>24</sup> Yandeu avei niha. Esepia, “Co seco catupri vahe” ehi avei yandeu yayeroyase sese. Ahe niha acoi ombogüerayevi vahe yande Yar Jesús.

<sup>25</sup> Esepia, ahe imondopri secoi yande angaipa repirã. Ipare Tũpa ombogüerayevi yande pisi ãgua seco catupri vahe nungar oyeupe.

## 5

### *Tũpa, “Peyavi mbahe” ndehi iri*

<sup>1</sup> Sese yaico mbahe tupri pipe Tũpa, “Peyavi mbahe” ndehi irise yandeu yande Yar Jesucristo rembiapo sui sese yande yeroyasa pipe.

<sup>2</sup> Esepia, Jesucristo sui niha yareco co Tũpa suindar porovasasa yayeroyase sese. Ipipe avei yayemoviracuaño ité yaico, yayembovaha avei. Esepia, yaicua Tũpa piri yande reco ãgua imborerecuasave.

<sup>3</sup> Ndahei rumo sese güeraño yayembovaha, yande yemombaraisusa rese avei niha yayembovaha yaico. Esepia, yaicua ahe yande mbohe yande ñemosa ãgua,

<sup>4</sup> iyavei yañemosañose, yasẽ tuprira yande recoãhasa sui, ahese yaicua yaipisi vaheerã mbahe aviye vahe Tũpa suindar yepi.

<sup>5</sup> Iyavei ahe yande remiaro nayamoha tẽi chira sereco. Esepia, Tũpa ombou ité oporoaisusa yandeu oEspíritu Santo yandeu ombou vahe pipe.

<sup>6</sup> Yande ae ndayaicatu yande ñepisiro ãgua yande recocuerai sui, Cristo rumo opitise ari chupe, omano opacatu yande angaipa rese.

<sup>7</sup> Aviyeteramo oimera que ñepi ava omano vaheerã ambuae ava aviye vahe upe nara; yepe que ava recocuer supi eté aviye aira viña, seni rumo ndipoi eté que ava, “Che tamano sepirã” ehi vaheerã chupe.

<sup>8</sup> Yepe yande angaipa viyar yaico yipindar, Tũpa rumo omboyecua yande raisusa; ombou Cristo imano ãgua yande angaipa repirã.

<sup>9</sup> Ipipe sui cõritei, “Peyavi mbahe” ndehi iri chira. Sese nomboui chietera oñemoirosa yandeu.

<sup>10</sup> Esepia, yamotarẽhimbar yaico vitese, ahe Guahir manosa pipe sui yande reroyevi iri oyeupe mbahe tupri pipe; ocuerayevisa pipe evocoyase oicatu ité yande pisiro.

<sup>11</sup> Ndahei co reseño ãgüe yahera, yaviha catu aveira Tũpa rese, yande Yar Jesucristo rese avei. Ichui niha ndipo iri mbahe Tũpa rovaque yande rese.

### *Adán iyavei Cristo resendar ñehesa*

<sup>12</sup> Supi eté Adán sui oime angaipa ivi pipe, ichui avei oime manosa opacatu ava upe. Esepia, opacatu ité oyapo angaipa yuvireco.

<sup>13</sup> Ndipo viteise Moisés porocuita, oime voi eté angaipa co ivi pipe. Yepe tie ndicuaa vitei angaipa porocuita ndipoise viña,

<sup>14</sup> Adán reco sui tupri ité rumo ava omanoño ité oangaipa pipe yuvireco. ãgüe ehiño ité yuvireco Moisés recose, yepe ahe ava yuvirecoi vahe angaipa ndahoyoyai Adán angaipa mborocuita mboaviyeẽhisa resendar rese viña. Ahe Adán rese omboyecua mbia ou vaheerã.

<sup>15</sup> Tũpa porerecosa ombou vahe rumo yandeu ndahoyoyai eté Adán angaipa rese. Esepia, Adán rembiavi sui setá ava omano; Jesucristo rembiapo sui rumo Tũpa ombou oporerecosa poropisirosa yandeu. Ahe rumo aviye catu vahe ava eta upe nara.

<sup>16</sup> Ahe ñepi ava angaipa rumo ndoyoyai eté Tũpa poropisirosa ombou vahe rese yandeu. Esepia, ñepi ava angaipa sui ou Tũpa ñemoirosa; oporerecosa rumo Tũpa ombouño ité ava eta mbahe oyavi ati vahe upe nara yangaipa mocañi ãgua.

<sup>17</sup> Supi eté ñepi ava angaipa sui oimeño ité manosa opacatu yandeu. Yande rumo yaipisi mbahe ipirata catu vahe ichui, ahe Tũpa porovasasa tuvichá vahe ité iyavei iporerecosa, “Peyavi mbahe” iheẽhisa resendar. Sese yareco ité tecovesa apirẽhi vahe yandeyeupe nara ñepi ava sui, ahe Jesucristo.



<sup>18</sup> Evocoyase inungar Adán rembiapo ai güeru Tūpa ñemoirosa opacatu ava upe, Jesucristo rembiapo aviye vahe avei güeru opacatu ava upe Tūpa ñemoirosa pisiēhi āgua ‘tovireco tecovesa apirēhi yuvireco’ oya.

<sup>19</sup> Esepia, ñepi ava Tūpa reroyaēhisa sui setá oime ava angaipa viyar; ēgüe ehi aveira ñepi ava mboyeroyasa sui setá aveira ava vireco güeco catuprisa Tūpa rese yuvireco.

<sup>20</sup> Supi eté porocuita ouse aracahe, ahese angaipa yaposa catu ité. Yepe ēgüe ehi viña, Tūpa porovasasa rumo ivate catu ité ichui.

<sup>21</sup> Evocoyase inungar angaipa ipirata yandeu yande mano āgua viña, ēgüe ehi avei rumo Tūpa oporovasasa ipirata vahe pipe yande pisi seco catupri vahe nungar yande rereco ‘toipisi tecovesa apirēhi vahe che Rahir Jesucristo rembiapo sui’ oya.

## 6

*Angaipa upe omano vahe nungar yaico; Cristo rese yaicose rumo oicove vahe ité yaico*

<sup>1</sup> Evocoyase, ¿iya iri pīha yayapo vite angaipa yaico Tūpa yandeu oporovasasa mboycua catu āgua?

<sup>2</sup> ¡Aní chietera! Esepia, yande niha senosepri angaipa sui. Evocoyase ndiya iri eté yayapo viteño angaipa yaico.

<sup>3</sup> ¿Ndapeicuai vo pe yañeapiramose Jesucristo rer pipe, ndoyavi yamano vahe ité sese?

<sup>4</sup> Yande ñeapiramose, aviye acoi ñotimbrī yaico Cristo rupive yande mbogüerayevi iri āgua iyavei yande recocuer mopiasu āgua avei, inungar acoi Cristo ocuerayevi Vu reco pīratasa pipe.

<sup>5</sup> Yande omano vahe nungar yaicose supive, ēgüe vahe aveira yande yacuerayevi supi.

<sup>6</sup> Yaicua avei niha yipindar yande recocuerai yaticapri nungar curusu rese Cristo rupive, “Che recocuerai tocañipa che sui” yande hesa pipe, iyavei yande angaipa pipe mbiguai tēi nungar yande recoēhi āgua.

<sup>7</sup> Esepia, acoi omano vahe ndoyapo iri angaipa yuvireco.

<sup>8</sup> Yande avei niha omano vahe nungar Cristo rese yaico. Evocoyase yayeroya avei yaicove vaheṛā sese.

<sup>9</sup> Yande niha yaicua, Cristo ñepi reseve ocuerayevi, nomano iri chietera. Esepia, manosa ndoicatu iri eté chupe.

<sup>10</sup> Supi eté omanose Cristo, omano ñepi reseve opacatu angaipa mocañi āgua; cūrtei rumo oicove Tūpa upe nara.

<sup>11</sup> Ēgüe peye avei pe, “Che omano vahe nungar aico angaipa upe” peyera; “Che rumo Tūpa upeño ité aicovera yande Yar Jesucristo rese che recosa pipe” peye aveira.

<sup>12</sup> Sese aní peico vite angaipa pīratasavri pe cuai āgua pe remimbotarai mboyeroyasa pipe.

<sup>13</sup> Aní peyemondo angaipa upe mbahe tēi apo āgua. Peyemondo catu Tūpa upe. Esepia, pe inungar ava ocuerayevi iri vahe peico. Sese peyemondo tupri ité Tūpa upe mbahe tupri apo āgua.

<sup>14</sup> Evocoyase, pe angaipa ndape cuai iri chira pe rereco. Esepia, ndapeicoi Moisés porocuita pipe; pe rumo Tūpa porovasasa pipe peico.

*Yembohesa mbiguai tēi recocuer sui*

<sup>15</sup> Ndayaico iri mborocuita pipe tēi, yaico rumo Tūpa porovasasa pipe. Evocoyase, ¿“Tayapo vite angaipa” yahera pīha? ¡Aní chietera!

<sup>16</sup> Pe niha peicua que ava pemboyeroyase, ipovri pendar evocoyase peico. Pemboyeroyase Carugar angaipa apo āgua, ahe evocoyase pe reco mocañi tēira. Tūpa pemboyeroyase rumo, ahe evocoyase pe reco mohivira.

<sup>17</sup> Aviye Tūpa upe. Esepia, pe yipindar mbiguai tēi nungar peico angaipa pipe viña, cūrtei rumo pemboyeroya pe pihave ité porombohesa peipisi vahe.

<sup>18</sup> Ñepei reseve pe angaipa sui Tũpa pe renosese, pe evocoyase mbiguai nungar mbahe supi tupri vahe apo ãgua peico.

<sup>19</sup> (Che amboyoya tecocuer mbahe co ivi pipendar rese imombehu pẽu. Esepia, yavai vite ite pẽu co ñehesa renducua tupri ãgua.) Yipindar pe retecuer pereco mbahe tẽi pipe mbahe naporai vahe apo ãgua. Ëgũe peye rumo pe cũritei pe reco mohivi ãgua peico mbahe tupri pipe ñepei reseve Tũpa upe pe reco ãgua.

<sup>20</sup> Pe peico vitesese mbiguai tẽi nungar pe angaipa pipe, ahese ndapeyapo vitei mbahe supi tupri vahe;

<sup>21</sup> cũritei rumo pechĩ tẽi ichui, ahe niha ndape pĩtivii ete pe recocuer rese, iyavei pe reraso pota manosa apirẽhi vahesave yepi.

<sup>22</sup> Cũritei rumo angaipa sui senosepri peico Tũpa povrive pe reco ãgua. Ichui mbahe tupri oime pẽu. Ahe niha ombou oyeupe nara ite pe reco tupri ãgua. Ipipe sui peicora apirẽhi vaheerã.

<sup>23</sup> Angaipa niha ombou manosa tẽi yandeu, Tũpa rumo oporerecosa ombou tecovesa apirẽhi vahe yandeu yande Yar Jesucristo rese yande recose.

## 7

### *Mendasa sui yembohesa*

<sup>1</sup> Che rivireta, pe niha peicua tupri mborocuita, peicua avei ahe porocuita povriveño ite opacatu yaico yaicove vitesese co ivi pipe.

<sup>2</sup> Esepia, inungar cuña omenda vahe, imer oicove vitesese, iporocuitavrive viteño ite secoi yepi. Omanose rumo imer ichui, ahe cuña ndahe iri omer porocuitavrive secoi.

<sup>3</sup> Acoi cuña omer recove viteseseve, virecose ambuae cuimbahe, oyemboaguasa tẽi evocoyase; acoi omanose rumo imer ichui, ndaseco iri ipovrive. Ahe iyacatu ite omenda yupagũe iri; ahese ndahei yaguasa tẽi cute.

<sup>4</sup> Che rivireta, pe niha egũe peye avei Cristo rese peico vahe; Cristo manosa sui ndahe iri Moisés porocuitavrive peico Cristo rese peico ãgua. Ahe niha acoi ocuerayevi vahe. Sese yande recocuer egũe ndehi tẽi vahe Tũpa upe.

<sup>5</sup> Esepia, yande yaicove vitesese yande reco ai pipe, ahe porocuita renduse, yaipota catu mbahe tẽi pipe yande reco ãgua. Ipare rumo ahe manosave tẽi yande reraso ucara viña.

<sup>6</sup> Cũritei rumo yande omano vahe nungar yaico acoi porocuita pipe yaico vahecuer sui. Egũe yahe, yasẽ ichui Tũpa upe mbahe apo ãgua Espiritu sui yande reco piasu pipe. Ndahe iri mborocuita icuachiapri yipindar vahe pipe yaico.

### *Angaipa oime vahe yande rese*

<sup>7</sup> ¿“Tũpa porocuita angaipa” yahera pĩha? ¡Aní ete; ndahei ete ahe angaipa! Co rumo ndaicuai chietera che angaipa Tũpa porocuita ndipoise viña. Supi ete che ndaicuaise, “Ndapeipota rai chira ambuae ava mbahe” ehi vahe mborocuita pipe, ahese ndaicuai chiaveira che mbahe pota raisa viña.

<sup>8</sup> Aicuase mborocuita, ahese angaipa ipĩrata catu cheu. Ahe mborocuita apo potaehisa pipe che querẽhi catu opacatu che remimbotarai tẽi apo ãgua. Esepia, mborocuita porẽhi angaipa aviyeye ndipoi vahe viña.

<sup>9</sup> Yipindar Tũpa porocuita ndaicua viteise, ndoyavii aviyeye vahe ite che reco areco viña. Porocuita aicuase rumo, aipota rai angaipa apo ãgua.

<sup>10</sup> Che evocoyase acañi tẽi vaheerã aico ipipe viña. Ahe porocuita che recove apirẽhi ãgua mbou rãgũer sui, che mondo ucaño itera manosa apirẽhi vahe pipe tẽi viña.

<sup>11</sup> Esepia, angaipa ahe porocuita pipe che mbopa ite. Ahe ipipe avei che mocañi tẽira viña.

<sup>12</sup> Evocoyase co porocuita ndaseco marai vahe ité, supi tupri vahe ité, aviye vahe avei.

<sup>13</sup> ¿Co porocuita aviye vahe pīha che rereco che mano āgua tēi? ¡Aní eté! Angaipa tēi rumo ēgüe ehi che rereco. Evocoyase co porocuita cuasa sui oipota catu uca mbahe tēi apo āgua cheu. Ipipe aicua angaipa oime vahe che rese. Ēgüe ehi avei ahe porocuita omboyecua tupri ité angaipa mbahe tēi vahe yandeu.

<sup>14</sup> Yaicua niha porocuita Tūpa suindar, che tēi rumo imondopri aico angaipa mboyeroya āgua.

<sup>15</sup> Che rumo ahese ndaicuai mbahe oime vahe cheu. Esepia, che remimbotar ayapo pota vahe ndayapoi; mbahe che remimbotarēhi rumo ayapo.

<sup>16</sup> Che rumo ayapose mbahe ndayapo potai vahe, ahese aicua co porocuita aviye vahe.

<sup>17</sup> Evocoyase ndahei cheyesui eté ēgüe ahe, angaipa tēi rumo ēgüe ehi che mbohe uca.

<sup>18-19</sup> Esepia, che aicua ndipoi eté mbahe aviye vahe che reco ai rese; sese yepe che ayapo pota ité mbahe aviye vahe viña, ndaicutui eté rumo yapo. Iyavei yepe ndayapo potai mbahe tēi viña, che rumo ayapoño ité.

<sup>20</sup> Sese ayapo viteño itese mbahe ndayapo potai vahe, ndahei rumo che ité ayapo, che pīha pipe angaipa oime vahe, ahe tēi rumo oyapo uca cheu.

<sup>21</sup> Sese che aicua oime che cuaisar che rese. Esepia, ayapo potase mbahe aviye vahe yepi viña, ahe rumo oyapo uca pota voiño ité mbahe naporai vahe cheu yepi.

<sup>22</sup> Che pīha pipe rumo Tūpa porocuita aipotá iteanga tēi,

<sup>23</sup> che rumo aicua che pīha pipe oime ambuae mbahe, mbahe tupri apo potaēhisar cheu, ahe angaipa tēi oime vahe che rese. Ahe mbiguai nungar tēi che rereco.

<sup>24</sup> “¡Che paraisu ité!, ndaicutu iri eté, ¿uma pīha co mbahe tēi sui che renosera viña?” ahe cheyeupe vichico.

<sup>25</sup> Tūpaño ité oicatu Guahir Jesucristo rese. “Aviye” yande Ru Tūpa upe. Ēgüe ehi ahese mbahe cheu; Tūpa porocuita amboaviye pota viña, che remimbotarai tēi rumo che rereco uca angaipa povri ve.

## 8

### *Yaico vaherā Tūpa Espiritu rese*

<sup>1</sup> Cūrtei rumo ndipo iri Tūpa ñemoirosa yandeu Jesucristo rese yaicose.

<sup>2</sup> Esepia niha, Jesucristo rese yaicose, yande cuaisar Espiritu tecovesa mondosar yande renose angaipa povri sui, manosa sui avei.

<sup>3</sup> Esepia, yande remimbotarai rese ndayaicutui Moisés porocuita mboyeroya āgua, ahe avei evocoyase ndoicutui eté yande reco moingatu. Tūpa rumo oicatuño ité. Esepia, Guahir ombou yande nungar tupri ité ‘toyemondo ava angaipa repirā’ oya. Ēgüe ehi imocañi opacatu yande angaipa yande sui, yande remimbotarai avei.

<sup>4</sup> Ahe ēgüe ehi yande yamboaviye vaherā mborocuita. Esepia, ndayaico iri yande remimbotar tēi pipe. Yaico rumo Espiritu aviye vahe rese.

<sup>5</sup> Esepia, acoi yuvirecoi vahe rumo güemimbotar tēi pipe, güecocuerai reseño tēi ipihañemoñeta yuvireco; Espiritu rese yuvirecoi vahe rumo semimbotar rese ipihañemoñeta catu yuvireco.

<sup>6</sup> Iyavei acoi güemimbotarai rese tēi ipihañemoñeta vahe, ahe omano itera apirēhi yuvireco. Ipihañemoñeta vahe rumo Espiritu suindar mbahe rese, virecora tecovesa apirēhi vahe mbahe tupri pipe yuvireco.

<sup>7</sup> Esepia, acoi güecocuerai reseño tēi ipihañemoñeta vahe, ahe Tūpa amotarēhimbar yuvirecoi. Ndoipotai eté iyavei ndoicutui Tūpa porocuita mboyeroya āgua yuvireco.

<sup>8</sup> Ēgüe ehi eté, acoi yuvirecoi vahe güemimbotarai pipe, ndoicutui eté Tūpa remimbotar apo āgua yuvireco.

<sup>9</sup> Pe rumo ndapeico iri pe remimbotarai pīpe. Peico rumo Tūpa Espiritu rese, ahe perecose peyese. Acoi ndovirecoi vahe rumo Espiritu Cristo suindar, ndahei eté chupendar.

<sup>10</sup> Cristo secoise rumo pe rese, yepe pe rete ocañi tēi vaherā angaipa sui viña, pe espíritu rumo oicoveño ité. Esepia, Tūpa, “Peyavi mbahe” ndehi iri pēu.

<sup>11</sup> Acoi Tūpa Espiritu secoise pe rese, Tūpa evocoyase omondora tecovesa piasu pe retecuer upe oEspiritu pe rese secoi vahe pīratasa pīpe. Esepia niha, ipīpe ité ombogüerayevi Guahir Jesucristo.

<sup>12</sup> Ēgüe ehi che rivireta, yareco yande cuaita, ndahei rumo yande remimbotarai pīpe yande reco āgua.

<sup>13</sup> Esepia, pe peicoño itese pe remimbotarai pīpe, ahese pecañi tēira; pemombopase rumo Espiritu pīpe peyesui, ahese peicovera apirēhi vaherā.

<sup>14</sup> Esepia, opacatu Tūpa Espiritu ombohe vahe, Tūpa rahir ité yuvirecoi.

<sup>15</sup> Supi eté pe Espiritu peipisi vahe ndapembosiquiye uca iri pe rereco, ahe rumo pemoingo Tūpa rahir ité pe reco āgua. Ahe avei, “¡Che Ru!” pe mbohe uca chupe.

<sup>16</sup> Co Espiritu avei oicua uca yande espíritu upe Tūpa rahir yande recose.

<sup>17</sup> Evocoyase yaipisi aveira mbahe yande Ru Tūpa ombou vaherā yandeu; ahe oyoya Cristo reseve yaipsisira, Cristo paraisu agüer pīpe ité yaicose yareco vaherā teco porañetesa ipiri curi.

#### *Teco porañetesa ou vaherā curi*

<sup>18</sup> Cūrítei rumo yande paraisusa ndoyoyai eté teco porañetesa yande rese ou vaherā rese.

<sup>19</sup> Opacatu Tūpa rembiapocuer osāro vite ité opacatu oquerēhisa pīpe, osepia pota ité teco porañete vahe tahir yuvirecoi vahe rese.

<sup>20</sup> Esepia, Tūpa rembiapo ndahe iri eté yipindar nimarai vahe nungar. Ndahei rumo oyesui tēi ēgüe ehi, Tūpa ité, “Ēgüe tehi” ehi chupe, ombouse angaipa reprī ava upe. Mbahe sembiapocuer rumo osāroño ité

<sup>21</sup> güeco opa tēi vaherā sui ñepisiro āgua teco porañete vahe Tūpa rahir vireco vahe rupiti āgua curi.

<sup>22</sup> Yande niha yaicua aracahe suive opacatu mbahe Tūpa rembiapo oiporara mba-herasicuer yuvireco cuña imembī rasi vahe nungar.

<sup>23</sup> Ndahei rumo ahe güeraño ēgüe ehi yuvireco, yande avei ēgüe yahe. Yande yareco ité Espiritu, ahe yipindar vahe yaipisi vaherā ichui curi. Yayemombaraisu, yasāro vite yande querēhisa pīpe Tūpa guahir ité yande rereco āgua, yande retecuer recuñaro āgua avei.

<sup>24</sup> Esepia, yande niha yañepisiro ité yande remiaro reroya pīpe; sese acoi yasepia vahe mbahe yande remiaro, nayasāro iri. Ndipoi ava osāro vite tēi vahe mbahe güembiepia.

<sup>25</sup> Acoi mbahe yande remiaro ndayasepia viteise rumo, yasāro vite yande ñemosasa pīpe sereco.

<sup>26</sup> Ēgüe ehi avei Espiritu yande pītivii ndayaicatu irise. Esepia, ndayaicuai eté mara yahera yayeroqui, co Espiritu Santo rumo oporandu ité Tūpa upe yande rese oyemopoasesa pīpe.

<sup>27</sup> Iyavei Tūpa, ahe oicua vahe opacatu yande pīhañemoñetasa, oicuaño ité Espiritu mbahe omombehu pota vahe oyeupe. Esepia, Espiritu oporandu chupe semimbotar rupi yande seroyasar yaico vahe rese.

#### *Yasecopīpa itera mbahe tēi*

<sup>28</sup> Tūpa niha yande poravo güemimbotar rupi. Yepe yaicua mbahe tēi oime yandeu viña, Tūpa rumo opacatu mbahe oyapo yandeu mbahe tupri reime āgua yande raisusave.

<sup>29</sup> Esepia, yipive Tūpa yande cua, yande poravo Guahir Jesucristo nungar ité yande reco āgua ‘ahe che Rahir tenonde catu vahe tasecoi opacatu ambuae che rahir sui’ oya.

<sup>30</sup> Iyavei Tūpa yipisuiwe ahe yuvirecoi vahe oiporavo. Chupe oñehe oyeupe nara seco āgua. Ipare, “Co seco catupri vahe” ehi chupe; ahe chupe avei omondo teco porañetesa.

<sup>31</sup> ¿Mara yahe irira vo chupe? ¡Tūpa niha yande repisar secoi, sese ndoicatu iri eté yande amotarēhimbar yuvireco!

<sup>32</sup> Tūpa niha ombou ité Guahir imano āgua opacatu yande rese. Sese yaicua ombou aveira opacatu mbahe yandeu yande pñivii āgua Tahir rese yande recose.

<sup>33-34</sup> Sese ndiyai eté ava upe, “Pecañi tēira, peyavi pe recocuer” ihe āgua yande iporavopri yaico vahe upe yuvireco. Esepia, Tūpa opa omocañi yande angaipa yande sui Cristo omanose sepirā, iyavei ocuerayevise. Cūritei Cristo Vu acato coti, “Co cheundar ité yuvirecoi” ehi yande rese oyerure yepi.

<sup>35</sup> ¿Mbahe pñha yande mboyepipira Cristo yande raisusa sui viña? ¿Que yande paraísusa, mbahe yavai vahe yandeu, yande momara-mara tēisa, que tieporēhi, anise que yande turucuarā ndipoise, que mbahe tēise yandeu, yande yuca potase tie yuvireco?

<sup>36</sup> Inungar icuachiapri aracahendar pipe aipo ehi: “Oyemoingatu voi ari rupi yande yuca āgua yuvireco ndeundar yaicose, ovesa yucapirā nungar tēi yande rereco yuvireco” ehi aracahe.

<sup>37</sup> Opacatu rumo co mbahe oimese yandeu, yasecopipa ité ahe yande raisusar recocuer pipe sui.

<sup>38</sup> Sese che aroya ité Tūpa yande raisu viteño itera yepi yepe que yamanora, anise que mbahe oime vahe yandeu yande recove vitesse. Ndayande mboyepipi chiaveira ichui que Tūpa rembiguai, que seco ivate vahe, seco pñrata vahe ndayasepiāi vahe, que cūritei mbahe oime vahe yandeu, anise que mbahe oime vaherā curi.

<sup>39</sup> ¡Ndayande mboyepipi chiaveira que iva pendar mbahe, anise que mbahe ivi pipendar, que ambuae mbahe Tūpa rembiapo iporoaisusa sui omboyecua vahe opacatu yande Yar Jesucristo recocuer pipe yandeu!

## 9

### *Tūpa oiporavo Israel oyeupe nara aracahe*

<sup>1</sup> Che Cristo reroyasar che reco pipe supi eté añehe, ndopombopai. Tūpa Espiritu oicua ité che pñhañemoñetasa supi vahe.

<sup>2</sup> Ndavihai eté che pñha pipe; oime mbahe tasi vahe cheu yepi.

<sup>3</sup> Che aipota tēi opacatu che mu judío ñepisiro āgua yuvireco viña. “Tacañi tēi Cristo porēhi icañi tēiēhi āgua yuvireco” ahera viña.

<sup>4</sup> Ahe niha Israel suindar yuvirecoi, aracahe Tūpa oiporavo vahe guahirguā. Ahe ipāhuve avei secoi güendigüer porañetesa pipe, iyavei omondo ité oñehe güemimbotar, oporocuaite avei chupe nara viña ‘tache mboetei oyeruresa pipe che rētave yuvireco’ oya, iyavei, “Amboaviye itera che ñehe pe rese” ehi yuvireco chupe.

<sup>5</sup> Ahe avei niha yande ramoi yipindar vahe suindar yuvirecoi, Tūpa Rembiporavo Poropisirosar avei ahe ichuindar oyesu vahe. Ahe Poropisirosar niha Tūpa ité, ivate catu vahe secoi opacatu sui. Sese, ¡timboeteisa catu yepi! ¡Ēgüe tehi apirēhi!

<sup>6</sup> “Tūpa nomboaviyei Israel upe oñehe imombehupri” ndapeyei chira. Esepia, ndahei opacatu Israel suindar supi tupri vahe.

<sup>7</sup> Iyavei ndahei opacatu Abraham suindar tahir supi tupri vahe yuvireco. Esepia, Tūpa aipo ehi: “Nde rahir Isaac sui rumo oimera nde suindar sovasapri” ehi chupe.

<sup>8</sup> Co rumo osenducua uca yandeu ndahei Abraham suindar yuvirose vaheño ité Tūpa rahir yuvirecoi, Tūpa remimombehu rupi yuviroha vahe güeraño rumo ichuindar ité yuvirecoi.

<sup>9</sup> Esepia, Tūpa Abraham upe aipo ehi aracahe: “Co ari rupi avei ayevira curi, ahese oimera Sara membrī ndeu” ehi.

<sup>10</sup> Ndahei rumo co reseño, tahir Isaac rese avei. Esepia, ocuacuase sembireco Rebeca imembi cõi, ahe icõi vahe yesupa rumo ñepeño ité.

<sup>11-13</sup> Ahe ndoyuviroha viteise, ndoyapo viteise mbahe que aviye vahe, que naporai vahe yuvireco, Tũpa aipo ehi ichi Rebeca upe: “Yipindar oha vahe nde membri ahe omboyeroyara ipandar” ehi. Co oyoya ité icuachiapri rese acoi aipo ehi vahe: “Che asaisu ité Jacob, Esaú rumo ayamotarẽhi” ehi. Sese yaicua iya ité Tũpa upe ava poravo güemimbotar rupi, ndahei seco aviye vahe rese.

<sup>14</sup> ¿Sese pĩha Tũpa upe, “Ndaseco tupri vahe” yahera? ¡Aní eté!

<sup>15</sup> Esepia, acoi Moisés upe aipo ehi: “Aiparaisuerecora ava, asaisu aveira che remimbotar rupi” ehi.

<sup>16</sup> Supi eté ndahei yande remimbotar rupi tẽi, ndahei avei yande pĩratasa rupi Tũpa oyapo mbahe; ahe rumo oporoparaisuerecosa pipe mbahe oyapo yandeu.

<sup>17</sup> Supi eté Tũpa aipo ehi mborerecuar guasu Egipto pendar upe aracahe: “Che oromoingue uca mborerecuar nde reco ãgua che pĩratasa mboyecua ãgua nde sui, che rer mboetei ãgua avei opacatu ava upe co ivi pipe” ehi.

<sup>18</sup> Ëgũe ehi oporoparaisuereco güemimbotar rupi. Güemimbotar rupi avei omboavai viroya ãgua ava upe.

<sup>19</sup> Aviyeteramo oimera que amove pe pãhu pendar aipo ehi vahe, “Ndiyai evocoyase Tũpa upe, ‘Pe peyavi mbahe’ he ãgua yandeu. Esepia, ndipoi eté niha ava, ‘¡Aní!’ ehi vaherã Tũpa remimbotar upe” ehira.

<sup>20</sup> “Ndiyai eté rumo Tũpa poepi ãgua ndeu” ahera aipo ehi vahe upe. Inungar ñaihu mbahemoinda ndiyai, “¿Mahera che apo rai tẽi eve?” ihe ãgua oaposar upe.

<sup>21</sup> Ñaihu rese oporaviqui vahe rumo güemimbotar rupi oyapora mbahe yuvireco sese. Oicatu ichui aviye catu vahe apo, oicatu avei ambuae iporupirã tẽi apo ãgua.

<sup>22</sup> Tũpa rumo oñemosa pare iya ité oñemoirora, opĩratasa mboyecua ãgua ocañi tẽi vaherã upe.

<sup>23</sup> Ëgũe ehi avei yapo güemimbotar rupi güeco porañetesa ivate vahe mboyecua ãgua yandeu. Esepia, yande paraisuereco iyavei yipisuive teco ori porañetesa omoingatu yandeu aheve yande reique ãgua.

<sup>24</sup> Yande avei yande renoi oyeupe, que judío, anise que ndahei vahe judío yande recose.

<sup>25</sup> Esepia, Oseas rembicuachiagüer pipe aipo ehi:

“Acoi ava ndahei vahe cheundar, chupe,

‘Cheundar ité’ ahera, iyavei acoi ava ndahei vahe saisupri yuvirecoi, chupe, ‘Che rembiaisu ité’ ahera” ehi.

<sup>26</sup> “‘Pe ndahei vahe cheundar peico’ ehi vahesave, ahe chupe, ‘Tũpa oicove vahe rahir ité’ hesara” ehi.

<sup>27</sup> Isaías rumo aipo ehi israelita upe: “Yepe Israel suindar setá iteangara viña inungar ivi cuhi, moviro tẽi rumo oñepisirora yuvireco.

<sup>28</sup> Esepia, yande Yar omboaviye voira oñehe ava viroyasarẽhi mocañi ãgua co ivi pipe” ehi.

<sup>29</sup> Oyoya avei ambuae Isaías remimombehugüer yipindar vahe rese:

“Yande Yar seco pĩrata catu vahe noipisiroise que moviro yande ramoi yandeu, yacañipa tẽira viña inungar tecua guasu Sodoma, Gomorra reseve yuvireco” ehi.

### *Judío yuvirecoi vahe iyavei ñehesa pĩsirosa resendar*

<sup>30</sup> ¿Mara yahera vo evocoyase? Yaicua ava ndahei vahe judío, yepe ndahei osecá vahe güeco catupri ãgua yuvireco viña, Cristo rese oyeroyasa pipe rumo vireco ité güeco catupriisa Tũpa rovaque.

<sup>31</sup> Judío yuvirecoi vahe rumo oipota tēi güeco tupri ãgua ité Tūpa porocuita mboyeroya pipe viña, ndoicatui eté rumo supiti yuvireco.

<sup>32</sup> Esepia niha, ndahei oyeroyasa pipe ité oseca oñepisiro ãgua, ahe rumo co mborocuita mboyeroysa sui tēi Tūpa rese yuvirecoi pota viña. Ahe evocoyase ndoyavi oyepiapi vahe “ita yepiapis” rese yuvireco.

<sup>33</sup> Aipo ehi tupri icuachiapri arachendar pipe:

“Che amondo Sión ve ñepe ita yepiapis, ahe oporoeti vahe.

Acoi sese oyeroyá vahe rumo, nomochi ucai chietera oyesui” ehi Jesús recocuer upe.

## 10

<sup>1</sup> Che rivireta, che aipota che piha pipe ité iyavei ayerure Tūpa upe che mu judío recocuer rese ‘toñepisiro yuvireco’ che yapave.

<sup>2</sup> Supi eté iquerēhi ité Tūpa upe mboraviqui apo ãgua yuvireco viña. Oquerēhisa sui rumo oyavi senducuaēhisa pipe yuvireco.

<sup>3</sup> Esepia, ndoicua potai mara ehi Tūpa ava pisi oyeupe. Sese oyesui tēi oseca güecocuer tupri pipe ‘tomoingatu Tūpa opiha yande pisi ãgua’ ohesave yuvireco viña. Ipipe sui nomboyeroyai eté Tūpa remimbotar güeco mbocatupri ãgua ité yuvireco.

<sup>4</sup> Esepia, Cristo recocuer pipe imboaviyasa tupri Moisés porocuita, “Peyavi mbahe che ñemoirosa pisi ãgua” ehiēhi ãgua Tūpa oyese oyeroya vahe upe.

<sup>5</sup> Co yande reco catupri ãgua porocuita pipe sui, Moisés aipo ehi icuachía: “Acoi ava omboaviye tupri vahe opacatu co mborocuita, ipipe sui yuvirecovera” ehi.

<sup>6</sup> Tūpa, “Peyavi mbahe che ñemoirosa pisi ãgua” heēhi ãgua rumo yande yeroyasa pipe, “Ava vo oyeupira ivave Tūpa Rembiporavo reroyi ãgua” ndapeyei chira.

<sup>7</sup> Iyavei, “Ava vo ogüeyira omano vahe pãhuve Tūpa Rembiporavo mboyeupi uca ãgua” ndapeyei chiaveira.

<sup>8</sup> ¿Mara peyera evocoyase pe piha pipe? “Co ñehesa namombriveimi pe sui, pe yuru pipe ité, pe piha pipe avei secoi” peyera.

<sup>9</sup> “Jesús, che Yar” peyese, pe piha pipe peyeroyase avei Tu imbogüerayevisa rese, ahese ipisiroprí peicora.

<sup>10</sup> Esepia, yande piha pipe yayeroya Jesús rese. Ahese Tūpa, “Co seco catupri vahe” ehira yandeu. Iyavei yamombehuse sese yande yeroyasa, ahese ipisiroprí yaicora.

<sup>11</sup> Esepia, icuachiapri arachendar pipe Tūpa aipo ehi: “Acoi sese oyeroyá vahe rumo, nomochi ucai chietera oyesui” ehi.

<sup>12</sup> Sese oyoya tupri judío ndahei vahe judío recocuer rese. Esepia, ñepeño ité niha Yar opacatu ava upe nomopanei vahe oporovasasa tuvichá vahe oyeupe oporandusar upe.

<sup>13</sup> Esepia, icuachiapri arachendar pipe aipo ehi: “Acoi opacatu osenoi vahe yande Yar rer, ipisiroprí yuvirecoira” ehi.

<sup>14</sup> Ava rumo ndoporandui chira písirosa rese Jesús upe, sese ndoyeroyaise yuvireco. Iyavei sese ndoyeroyai chira sesendar ñehesa ndosenduisse yuvireco. Iyavei ndosendui chira ndipoise ñehesa mombehusar yuvireco chupe.

<sup>15</sup> Iyavei mara ehira co ñehesa mombehu yuvireco ndipoise imondosar chupe. Aipo ehi avei niha acoi icuachiapri arachendar pipe: “¡Aviye ai eté acoi ava güeru vahe ñehesa aviye vahe písirosa resendar!” ehi.

<sup>16</sup> Ndahei rumo opacatu che mu judío viroya co ñehesa písirosa resendar yuvireco. Isaías niha aipo ehi avei aracahe: “Che Yar, ¿uma piha viroya ore ñehe yuvireco?” ehi.

<sup>17</sup> Sese yayeroya Jesucristo rese co ñehesa písirosa rendusa pipe.

<sup>18</sup> ¿Osendu piha judío co ñehesa yuvireco? ¡Osendu ité! Esepia, aipo ehi avei acoi icuachiapri arachendar pipe:

“Sendusa niha opacatú ivi rupi iñehe” ehi.

<sup>19</sup> Iyavei, ¿osenducua p̄iha yuvireco? ¡Osenducuaño ité! Esepia, yipindar Moisés omombehu icuachiapri pipe aipo ehi:

“Perecatēhira che porovasasa rese oipisise ava ndahei vahe judío iyavei peñemoirora ayapose mbahe aviye vahe acoi ava, ndayaracuai vahe upe” ehi.

<sup>20</sup> Ipare omombehu tupri ité Isaías osiquiyeēhisave Tūpa ñehe aipo ehi vahe:

“Acoi ava ndache recaí vahe, ahe che p̄isi ité yuvireco.

Iyavei ayemboyecua acoi ava che rese ndoporandui vahe upe” ehi.

<sup>21</sup> Judío recocuer rese avei rumo aipo ehi: “Ari rupi ñehe tēi ava che reroyasarēhi ndiporeroyai vahe upe vichico” ehi aracahe.

## 11

### *Moviro tēi ava Israel pendar Tūpa oiporavo oyeupe nara*

<sup>1</sup> Evocoyase, ¿omombo p̄iha Tūpa ava Israel güembiporavo eta oyesui? ¡Aní eté! Esepia, che avei niha ichuindar aico. Abraham niha che ramoí eté, Benjamín suindar avei aico.

<sup>2</sup> Yipisuive ité niha Tūpa, “Co ava cheundar ité” ehi ore ramoí israelita upe. Sese cūritei ndore momboí eté oyesui. Peicua niha acoi Elías resendar icuachiapri aracahendar oyerogui tēise omu israelita rese aipo ehise Tūpa upe:

<sup>3</sup> “Che Yar, nde ñehe mombehusareta opa oyuca yuvireco. Ndeu porerecosa reropovēhesa renda avei opa omombo yuvireco. Che güeraño aicove vitemi nde reroyasar. Che yuca potaño avei eté rumo yuvireco” ehi.

<sup>4</sup> Tūpa rumo omboyevi chupe: “Aipeha rumo siete mil tupri ava che mboyeroyasar cheyeupe nara noñenopihai vahe Baal rahanga rovai yuvireco” ehi.

<sup>5</sup> Ēgüe ehi avei cūritei opita viteño moviro judío, ahe niha Tūpa oiporavo oporoaisusa pipe.

<sup>6</sup> Ipipe ité niha ēgüe ehi, ndahei eté que ava rembiapo sui oiporavo. Ava rembiapo suise rumo, ahese ndahe iri chira poroaisusa pipe viña.

<sup>7</sup> Evocoyase judío eta ndosecai eté mbahe oipotá catu vahe Tūpa suindar yuvireco. Sembiporavo ete ité rumo oipisi yuvireco. Ambuae upe rumo Tūpa omboavai catu viroya āgua.

<sup>8</sup> Icuachiapri pipe aipo ehi aracahe: “Tūpa nomboyecua uca iri mbahe secocuer pipe. Cūritei ēgüe ehiño vite ité yuvireco. Omondo tēi sesarā; ipipe rumo ndosepia ucai mbahe chupe. Omondo tēi avei yapisaguā; ipipe ndosenducua ucai mbahe chupe” ehi.

<sup>9</sup> Iyavei David aipo ehi aracahe:

“Ipietasa ivonde nungar iyavei pira mbohasa nungar tasecoi chupe.

Ipipe sui toyuviroha mbahe tēi pipe yuvireco, toyemombaraisu uca avei ipipe yuvireco.

<sup>10</sup> Toicua eme mbahe inungar ndasesapisoí vahe yuvireco.

Icuhapapri nungar ayase toyuvirecoí apirēhi vaherā” ehi.

### *Ndahei vahe judío ñepisiro agüer*

<sup>11</sup> Evocoyase areco iri che porandusa p̄eu: ¿Apirēhi vaherā ité p̄iha judío eta ndoyeroyai Jesucristo rese oñepisiro āgua yuvireco? ¡Aní eté! Ahe rumo ēgüe ehi ava ndahei vahe judío p̄isirosa p̄isi āgua yuvireco. Ipipe sui oyemonguerēhi catura judío ipisi āgua yuvireco curi.

<sup>12</sup> Evocoyase judío eta rembiavi sui tuvichá Tūpa poroparaisuerecosa oime opacatu ava ndahei vahe judío upe. Coiye rumo tuvicha catu itera Tūpa poroparaisuerecosa opacatu ava upe oyevisse yuvireco chupe.

<sup>13</sup> Che rumo areco che ñehesa p̄eu pe ndahei vahe judío. Tūpa niha che cuai oñehe mombehu āgua ndahei vahe judío upe. Sese, “Aviye ai eté che poraviquisa” ahe che mu judío rovaque yepi.



14 Sendusa sui aviyeteramo oimera ipãhuve oyemonguerẽhi vahe pĩsirosa Tũpa suindar pĩsi ãgua oyeupe nara yuvireco.

15 Esepia, judío mombosa pipe sui Tũpa omoime ñerosa opacatu ava co ivi pipendar upe. ¿Mara ehira pĩha evocoyase Tũpa ipĩsise? Ahese oipĩsira tecovesa apĩrẽhi vahe yuvireco, evocoyase ndoyuvireco iri chira omano vahe nungar Tũpa upe.

16 Esepia, yipindar panguã sui yapopri seropovẽhese Tũpa upe, opacatu panvi evocoyase sovasapri avei ichui. Iyavei inungar ivira rapo seropovẽhese Tũpa upe viña, sãca avei evocoyase opacatu ãgũe ehi aveira viña.

17 Amove che mu judío inungar Olivo rãca yasiapri. Pe evocoyase ndahei vahe judío ivira caha pipendar rãca nungar peico vahe, peso yasiapri rendagũerve, ipipe sui peipĩsi vĩracuasa pe recove ãgua.

18 Aní chira rumo, “Yande aviye catu vahe yaico ivira rãca nungar yipindar yuvirecoi vahe sui” peye pe yeecomboivate aisa pipe. Esepia, ndahei pe sui judío oipĩsi oymoviracua ãgua yuvireco, pe rumo yipindar ichui eté peipĩsi pe yemoviracua ãgua.

19 Iyavei, “Co judío rumo imombosa ité ivira rãca asiapri nungar yande sendagũerve yapita vaherã” peye revo.

20 Supi eté, co rumo Tũpa reroyaẽhi pipe ahe imombosa ichui yuvireco, pe rumo seroya pipe suiño ité pepita sendagũerve. Sese peicua catu, aní chira peyemboivate ai ipipe.

21 Esepia, Tũpa oiporavo co judío oyeupe nara ité viña, ndoviroyaise rumo, ndoipĩsii eté. Pẽu avei ãgũe ehira ndapemboyeroyaise.

22 Peyapisaca tupri, Tũpa niha aviye vahe ité. Seco pĩrata vahe avei rumo ava viroyaẽhisar upe. Pẽu rumo aviye ité. Peicoño catu iporoaisusa pipe; aviyeteramo ndapeicoise supi, pe avei yasiapri nungar tẽi peicora.

23 Opoipase rumo judío eta Cristo reroyaẽhisa sui, Tũpa evocoyase viroyevi irira oyeupe nara. Esepia, chupe iya ité ipĩsi iri ãgua.

24 Pe ndahei vahe judío ivira caha pipendar rãca yasiapri nungar peico, Tũpa rumo pe mondo ivira aviye vahe nungar rese. ¡Evocoyase judío ete ité inungar ahe ivira aviye vahe rãca yasiapri, ahe ivate catu oipĩsi irira oyeupe nara!

### *Ipa vahe judío ñepĩsiro agũer*

25 Che rivireta, che aipota, “Toicua Tũpa remimbotar icuapĩrẽhi oyemboivate aiẽhi ãgua yuvireco” ahe pẽu. Esepia, amove Tũpa judío upe omboavai viroya ãgua. Ahe rumo, “Tache reroyapa rane ité ndahei vahe judío che rese yuvirecoi pota vahe” ehi vite pẽu,

26 ahese ramo opacatu ava judío yuvirecoi vahe Tũpa oipĩsirora. Esepia, icuachiapri aracahendar pipe aipo ehi:

“Oura ava Pĩsiosar judío recua Sión pãhu sui, ahe oipehara mbahe naporai vahe opacatu judío sui.

27 Evocoi niha che remimbotar chupe nara, amocañise yangaipagũer yuvireco ichui” ehi.

28 ãgũe ehi cũritei judío eta ndosendu potai ñehesa pĩsirosa resendar yuvireco. Sese Tũpa amotarẽhisar yuvirecoi. Pẽu mbahe tupri ãgua rumo ãgũe ehi. Tũpa rumo osaisu vite. Esepia, yipive ité oiporavo tamoi eta oyeupe.

29 Supi eté, Tũpa ndoviroyevi iri eté mbahe gũemimondo iyavei ndovirova-rova tẽi vahe opihañemoñetasa gũembiporavo sui.

30 Yipindar niha pe ndapemboyeroyai eté Tũpa. Cũritei rumo judío eta ndoviroyaise yuvireco, pe paraisuereco Tũpa.

31 ãgũe ehi avei judío eta cũritei ndoviroyai yuvireco. Tũpa pe paraisuereco uca ãgua rumo ãgũe ehi yuvireco. Coiye inungar pe, judío avei osupitira Tũpa poroparaisuerecosa yuvireco.

<sup>32</sup> Esepia, Tūpa ité, “Opacatú oyavi mbahe che reroyaēhisa pipe” ehi ‘oicuase mbahe güembiavi, tiquerēhi opacatú che poroparaisuerecosa pisi āgua yuvireco’ oya.

<sup>33</sup> ¿Mara ehi rutei Tūpa aracuasa, imbahecuasa avei? Ndipoi chietera que ava yaracuasa mombehu tupri āgua. Ndayaicutui avei secocuer cuapa tupri āgua.

<sup>34</sup> Ndipoi eté que ava oicua vahe yande Yar pihañemoñetasa iyavei ndipoi eté que ambuae ava tēi ombohe vahe no.

<sup>35</sup> Ndipoi que ava mbahe omondo vahe yande Yar upe ‘tomboyevi cheu’ ohesave.

<sup>36</sup> Esepia, Tūpa suiño ité niha opacatu mbahe oime, oyeupe nara avei mbahe oyapo opīratasa pipe. ¡Sese imboeteipri ité Tūpa tasecoi yepi! Ēgüe tehi apirēhi.

## 12

### *Yande recocuer imondopri Tūpa upe nara*

<sup>1</sup> Sese che rivireta, che Tūpa poroparaisuerecosa pipe aipota pe yemondo ité pe recovesave chupe nara, inungar mbahe Tūpa upe seropovēhepri ité, ahe aviye itera chupe. Ahe niha pe cuaita pe piha pipe sui eté peyapo vaheerā chupe.

<sup>2</sup> Peico iri eme co ivi pipendar pihañemoñetasa tēi rupi. Iyacatu rumo pesecuñaro pe pihañemoñetasa. Ipipe sui opacatu pe recocuer oñecuñarora. Ēgüe peyese, peicuara Tūpa remimbotar ahe mbahe aviye vahe, semimbotar supi tupri vahe ité.

<sup>3</sup> Tūpa niha oporovasasa pipe che cuai, sese aipo ahe pēu: pepihañemoñeta eme pe yemboivate ai āgua rese. Iyacatu rumo peicua tupri pe pihañemoñetasa peyendar Tūpa pēu mbahe imbougüer rupi sese pe yeroyasa pipe.

<sup>4</sup> Inungar yande rete ñepeño ité, sesendar rumo setá, iyavei ndahoyoyai mbahe sembiapo.

<sup>5</sup> Ēgüe yahe avei yande, yepe que yande retara viña, Cristo rese yayemboyase rumo, ñepe vahe nungar yaico. Evocoyase yande ñepe-pe opacatu upendar yaico.

<sup>6</sup> Tūpa niha omboyevirati mbahecuasa imbou oporoaisusa pipe ñepe-pe upe. Evocoyase Tūpa ombouse oñehe mombehu āgua yandeu, yamombehura ñepe-pe iñehe sese yande yeroyagüer rupi.

<sup>7</sup> Que ombouse mbahecuasa ambuae ava pītivii āgua yandeu, yaipītivii tupri aveira. Ombouse yande porombohe āgua, yaporombohe tupriño itera.

<sup>8</sup> Iyavei ombouse yandeu ambuae ava monguerēhi āgua, yaporomonguerēhiño itera. Ombouse yande poropītivii āgua ava mbahe ndovirecoi vahe upe, yamondoño itera mbahe chupe yande recatēhiēhisave. Acoi oporocuai vahe, toyapoño oquerēhisa pipe; iparaisu vahe pītiviiisar, toipītiviiño avei vorivetesa pipe.

### *Cristo reroyasar cuaita*

<sup>9</sup> Iyavei peyeaisu tupri ité; aní pesepia potara mbahe tēi, iyacatu rumo peicoño itera mbahe aviye vahe pipe.

<sup>10</sup> Peyeaisu catu ñepe-pe oyeivri nungar tupri pe recosa pipe. Pe ae peyemboetei rāgüer sui pemboetei catura ambuae ava Jesús reroyasar.

<sup>11</sup> Peyemonguerēhi, aní ndapequerēhi chira iyavei peyapo yande Yar upe mbahe opacatu pe recoete pipe.

<sup>12</sup> Peicoño pe viharetasave mbahe iva péndar rārosa pipe; peñemosañ mbahe rasícuer peiporarase iyavei aní chira peseya pe yeruresa yepi.

<sup>13</sup> Peipītivii ambuae ava Cristo reroyasar mbahe ipanese chupe, pemohapisira ava oyepota vahe pe piri.

<sup>14</sup> Peyerure pe amotarēhimbar rese; peporandu Tūpa porovasasa rese ahe ava upe nara; aní pe avei peñehe mara chupe.

<sup>15</sup> Peyemboviha acoi ava oyemboviha vahe rupive; peyaseho avei ava oyaseho vahe rupive.

<sup>16</sup> Peico tupri oyoya guasu ñepi-pey oyese pe yeaisusa pipe. Aní chira peyecomboivate ai. Iyacatu rumo peyemoingatu ava seco mbegüemi vahe mbori ñgua. Aní peñemoha imbahecua vai vahe nungar.

<sup>17</sup> Aní pēu mbahe tēi aposar upe pemboyevira mbahe tēi avei. Peyapo catu mbahe tupri opacatu ava rembiepiave.

<sup>18</sup> Peicatu vahe rupi peseca pe reco tupri ñgua opacatu ava upe.

<sup>19</sup> Che rivireta, aní pe ae pemboyevi mbahe tēi pipe pe rereco momarasar upe. Peseyaño Tūpa upe. Ahe oicuara chupe. Esepia, icuachiapri pipe aipo ehi: “Che ité aicuara ava mbahe tēi aposar upe. Che amboepira” ehi yande Yar.

<sup>20</sup> Iyavei aipo ehi: “Acoi nde amotarēhimbar ndasiepoise, emondo mbahe itohu, iyavei acoi ihuseise, eremondora itoihu. Esepia, ñgüe peyese pe amotarēhimbar upe, ochira pe sui” ehi.

<sup>21</sup> Aní mbahe tēi upe peyecopi uca. Iyacatu rumo pesecopira mbahe-mbahe tēi mbahe tupri aposa pipe.

### 13

<sup>1</sup> Opacatu mborerecuar yuvirecoi vahe pemboyeroyara. Esepia, ndipoi mborerecuar ndovirecoi vahe ocuaita Tūpa suindar. Co oime vahe rumo semimbou ité.

<sup>2</sup> Sese acoi mborerecuar upe que mara ehi vahe, Tūpa porocuita reroyaēhisar yuvirecoi. Ñgüe ehi vahe inupambrī yuvirecoira.

<sup>3</sup> Esepia, mborerecuar yuvirecoi vahe ndahei ava seco tupri vahe mbosiquiye ñgua yuvirecoi, ahe rumo yuvirecoi ava mbahe tēi aposar mbosiquiye ñgua. Ndayasiquiye potaise mborerecuar sui, iya yaicora mbahe tupri pipe. Mborerecuar evocoyase, “Aviye” ehira yande reco catuprisa rese yandeu.

<sup>4</sup> Esepia, ahe Tūpa rembiguai mbahe tupri apo ñgua yandeu. Acoi mbahe tēi yayapose rumo, yasiquiyera ichui. Esepia, ahese mborerecuar yande nupaño itera yuvireco. Ahe niha Tūpa remimbotar rupi eté icuaita ava mbahe tēi aposar nupa ñgua yuvireco.

<sup>5</sup> Sese iya yamboyeroya ité mborerecuar; ndahei rumo ahe yande nupaēhi ñgua reseño, yande pihañemoñetasa momaraēhi ñgua rese avei.

<sup>6</sup> Sese avei yamondora guarepochi mborerecuar upe yuvireco yandeu oporanduse. Esepia, ahe mborerecuar Tūpa rembiguai yuvirecoi. Evocoyase aheño ité iporaviquisa yuvireco.

<sup>7</sup> Yamondo ñepi-pey ava upe mbahe chupendar. Iya ité yamondo mborerecuar upe guarepochi oporanduse sese, yamboetei avei ava imboyeroyapri.

<sup>8</sup> Aní yandereve. Ahe yande cuaita. Yande cuaita avei yande yeaisu ñgua, supi eté acoi ava osaisu vahe ambuae ava, omboaviye ité Tūpa porocuita.

<sup>9</sup> Aipo ehi acoi Tūpa porocuita: “Ndapeyemboaguasai chira, ndapeporoyuca chira, ndapemondai chira, ndaperemirai chira, ndapeipota rai chiaveira ambuae ava mbahe” ehi. Co iyavei opacatu ambuae Tūpa porocuita sendusa tupri ité co ambuae ñhesa rese: “Pesaisu ava pe yeaisu nungar” ehi.

<sup>10</sup> Acoi vireco vahe oporoaisusa, ahe ndoyapoi eté mbahe ava upe; sese poroaisusa pipe imboaviyesa tupri ité porocuita.

<sup>11</sup> Iyavei peicua tupri co mbahe oime vahe yandeu. Cūritei ari osupiti ité yandeu yande yemopoase ñgua. Esepia, yande Yar yevi ñgua cōimi catu yandeu ññehengagüer yipindar seroyasa sui.

<sup>12</sup> Supi eté osupiti senimi ari yandeu; sese iyacatu yapoi pñtumimbi vahe nungar mbahe-mbahe tēi aposa sui mbahe icatupri vahe pipe yande reco ñgua. Evocoyase tayaico sundao oyoepisa omonde vahe nungar.

<sup>13</sup> Yande catu yaguata yande reco ñvi tuprisa pipe, inungar yaguatase ari pipe. Aní catu yaico caguar pipe tēi iyavei pieta siapu tēi vahe rupi, ndayande poropota rai

chiaveira, iyavei ndayayapoi chira mbahe tēi, ndayaicoi chiaveira yande pīhañemoñeta ndahoyoyai vahe pīpe, ambuae ava mbahe pota raisa pīpe avei no.

<sup>14</sup> Iya rumo yarecora yande Yar Jesucristo recocuer yande yese, aní yande pīhañemoñeta mbahe-mbahe tēi apo āgua yande remimbotarai pīpe.

## 14

### *Aní peroĩro ambuae Jesús reroyasar*

<sup>1</sup> Acoi ava ndoyeroya tupri vitei vahe yande Yar rese que oiquese pe piri, peipisi tupri; aní peiñehopepīra ipīhañemoñetasa ndahoyoyaise pe pīhañemoñeta rese.

<sup>2</sup> Esepia, amove evocoi nungar ava ihupri pāve tēi yuvirohu, oime rumo amove ava ipīhañemoñeta opacatu mbahe hu āgua rese.

<sup>3</sup> Acoi ava opacatu mbahe ohu vahe, toviroĩro eme amove ndohui vahe mbahe iyavei acoi amove ndohui vahe mbahe, toviroĩro eme acoi ohu vahe opacatu mbahe. Esepia, evocoi nungar ava Tūpa oipisi ité.

<sup>4</sup> Supi eté pe ndiyai eté peroĩro vahe ambuae ava rembiguai. Esepia, ahe yande Yar povri pendar secoi. Yepe ndoyaviise mbahe ipipe, anise ichui oviapise mbahe tēi pīpe, sereciar ité oicuaru chupe. Esepia, yande Yar opīratasa pīpe osecomoingatuño itera.

<sup>5</sup> Oime avei amove ava ñepi ari omboetei catu yuvireco ambuae ari sui, iyavei ambuae oime aipo ehi: “Oyoya guasuño ité niha ari” ehi vahe. Ñepi-pei opīhañemoñeta rupi, “Co supi tupri vahe” ehira opīha pīpe yuvireco.

<sup>6</sup> Acoi que ñepi ari ava omboetei vahe, yande Yar mboeteisa pīpe rumo ēgüe ehi. Iyavei ohu vahe opacatu mbahe, Yar mboeteisave avei ēgüe ehi. Esepia, ahe güembiapo rese, “Aviye ndeu” ehi Tūpa upe; iyavei acoi amove ndohui vahe mbahe, Yar mboeteisave ēgüe ehi, iyavei, “Aviye ndeu” ehi avei Tūpa upe.

<sup>7</sup> Esepia, yande ñepi-pei ndayaicoi yandeyeupe nara tēi, ndayamanoi avei yandeyeupe nara.

<sup>8</sup> Esepia, yaicove vītese, yaico yande Yar upe nara; yamanose, yamano yande Yar upe nara avei. Ēgüe yahe yande yaicove vītese, anise yamanose, opacatu chupe nara ité yaico.

<sup>9</sup> Sese niha Cristo omano, ipare ocuerayevi opacatu ava Yar güeco āgua que omano vahe, anise que oicove vite vahe upe avei.

<sup>10</sup> ¿Mahera evocoyase peroĩro pe mboetasa Cristo reroyasar iyavei mahera ndape-sepia potai? Esepia, supi eté niha yande opacatu yasora Tūpa rovai. Ahe evocoyase opara oporandu yande recocuer rese yandeu.

<sup>11</sup> Esepia, icuachiapri arachendar pīpe omombehu: “Supi eté che reco pīpe aipo ahe, ehi yande Yar, opacatu ava oñenopihara che rovai yuvireco, iyavei che mboeteira yuvireco, ehi” ehi.

<sup>12</sup> Evocoyase yande ñepi-pei yamombehura yande recocuer Tūpa upe.

### *Aní pe rivireta mbahe tēi pīpe pereco uca*

<sup>13</sup> Sese yande ndiyai yañeroĩro. Iyacatu rumo ñepi reseve pereco tupri ambuae pe rivri, angaipa pīpe sereco ucaēhi āgua, iyeroyasa momaraēhi āgua avei.

<sup>14</sup> Che yande Yar reroyasar che reco pīpe aicua ndipoi eté que tembihu yande reco momara vahe. Amove rumo ava, “Mbahe tēi co tembihu, ndiyai yahu” ehise, ahe chupe evocoyase mbahe tēi, ndiyai eté ihu āgua.

<sup>15</sup> Iyavei yande que mbahe yahuse, ipipe yamomara tēise yande rivri pīhañemoñetasa Tūpa rese, ndahei evocoyase yande poroaisusa pīpe ité ēgüe yahe. ¡Aní ahe yamocañi tēi uca Cristo sui evocoi nungar mbahe yahu vahesa pīpe! Esepia, secocuer rese Cristo omano.

<sup>16</sup> Yepe que mbahe aviye yandeu viña, ndayayapoi chira rumo evocoi nungar yande rembiapo rese ava ñehe-ñehe tēiēhi āgua.

<sup>17</sup> Esepia, ndahei ivate catu vahe Tūpa upe yande carusa, yande igua avei ipovrive yande recose. Ēgüe ehi rumo co ivate catu vahe chupe yande recocuer mohivisa, yande reco tuprisa ambuae Tūpa reroyasar pāhuve iyavei yande rorivetesa yareco vahe Espiritu Santo sui.

<sup>18</sup> Ēgüe yahese Cristo mboeteisave, aviye aira Tūpa upe iyavei opacatu ava rembiepi-ave avei no.

<sup>19</sup> Sese opacatu yande recoeté pipe yasecara yaico tupri vahe rã yandeyeupe. Ipipe sui yande yaicatura yañepitivi yande yemoviracua tupri āgua yande Yar rese.

<sup>20</sup> Aní pemocañi uca tēi ava recocuer Tūpa remipisiro tembihu sui tēi. Opacatu niha co tembihu aviye aiño ité; ndiyai eté rumo yahu que tembihu ambuae ava Cristo reroyasar pihañemoñetasa momara āgua.

<sup>21</sup> Aviye catu ndayahuisse mbahe roho, que ndayahuisse uva ricuer iyavei que ambuae mbahe ndayayapoise, ambuae ava Cristo reroyasar angaipa pipe seiti uca iriēhi āgua.

<sup>22</sup> Yande pihañemoñetasa yareco vahe rumo yarecoño itera yandeyeupe ité Tūpa rovaque. ¡Aviye ai catuño ité ava acoi, “Aviye yayapose evocoi nungar mbahe” he pare, “¿Mara ehi pñha?” ndehi irise opihañemoñetasa pipe!

<sup>23</sup> Acoi que ava, “¿Mara ehi pñha?” ehise tembihu upe. Ipare rumo ohuse, ahe evocoyase oyemboangaipa ipipe. Esepia, ndohui Tūpa rese oyeroyasa pipe. Iyavei ava, “¿Mara ehi pñha?” ehi vitesese que mbahe upe, ipare oyapose ité, ahe angaipa.

## 15

### *Yambovihara ava yande cotindar, ndahei chira yande ae tēi yayemboviha*

<sup>1</sup> Yande yayemoviracua catu vahe Cristo rese yande yeroyasa pipe, iyacatu yande teieté yañemosañora ava Tūpa rese ndipihañemoñeta tupri vitei vahe rese. Ndahei chira rumo yande ae tēi yayemboviha.

<sup>2</sup> Iyacatu rumo opacatu yande yambovihara ava yande cotindar, yayapo aveira mbahe aviye vahe seco aviye āgua yuvireco chupe ‘toyeroya catu opihañemoñeta pipe Tūpa rese yuvireco’ yande yapave.

<sup>3</sup> Esepia, Cristo ndahei ahe ae oyemohapisi, ahe rumo oyapo mbahe, icuachiapri mombehusa rupi tupri ité acoi omombehu vahe: “Nde rese ñehe-ñehe tēi opa aipisi” ehi.

<sup>4</sup> Supi eté co opacatu omombehu vahe aracahe opa icuachiasa yande mbohe āgua, yande yasãro vahe rã Tūpa reco porañetesa yande ñemosasa pipe iyavei yande pihamonguerēhisa pipe avei ahe yareco vahe ichuindar.

<sup>5</sup> Tūpa, acoi ombou vahe yande ñemosasa, yande pihamonguerēhisa avei yandeu, tape pñivi oyoya guasu pe reco tupri āgua ñepe-pe peyese Jesucristo recocuer rupi.

<sup>6</sup> Ipipe sui pe opacatu oyoya guasu ñepe pe pihanemoñetasa pipe, pe ñehe pipe avei tapemboetei Tūpa, yande Yar Jesucristo Ru.

### *Ñehesa pñirosa resendar imombehusa ava eta ndahei vahe judío upe*

<sup>7</sup> Peyepisi tupri ñepe-pe, inungar Cristo pe pñi tupri oyeupe nara Vu mboetei āgua.

<sup>8</sup> Che rumo aipo ahe pñu: Jesucristo ou judío pñivi Tūpa remimombehugüer mboaviye āgua judío ramoi aracahendar upe. Ēgüe ehi Tūpa oñehe mboaviyesa mboyecua

<sup>9</sup> ‘tomboetei ava ndahei vahe judío yuvirecoi vahe che Ru Tūpa iporoparisuerecosa rese yuvireco’ oyapave. Ahe Ēgüe ehi icuachiapri rupi tupri ité aipo ehi vahe:

“Sese che oromboeteira opacatu ava ndahei vahe judío pñu rupi, iyavei asapucaira ndeu nde rer mboeteisa pipe” ehi.

<sup>10</sup> Iyavei acoi ambuae icuachiapri pipe omombehu avei no:

“¡Peyembovîha catu pe opacatu ndahei vahe judío peico vahe judío Tûpa rembiporavo reseve!” ehi.

11 Ambuae pipe avei aipo ehi no:

“Pe opacatu ivi pipendar ava, ipemboetei yande Yar!” ehi.

12 Isaías avei aipo ehi icuachía:

“Oimera niha ava Isaí suindar, opacatu ava rerecuarã secoira.

Ava ndahei vahe judío seseño ité oyeroyara yuvireco” ehi.

13 Tûpa acoi ombou vahe mbahe oyesuindar rãro ãgua, tayande mbovîharete catu iyavei mbahe tupri tayareco sese yeroyasa pipe. Ipípe sui tombou yasãro vaherã ahe mbahe aviye vahe Espíritu Santo pîratasa pipe.

14 Che rivîreta, ayeroya ité pe reco aviyesa rese, opacatu mbahe peicuapa tupri, peicatu avei pe ñepeipei peyeupe pe yemboaracua ãgua.

15 Co tecocuer rese rumo aicuachía opacatu che siquiyeêhisa pipe pëu pe resaraiêhi ãgua ichui. Esepia, ayapo Tûpa che cuaita ombou vahe che raisusa pipe cheu

16 Jesucristo rese che poraviqui ãgua ava ndahei vahe judío recocuer aviye ãgua. Evocoyase judío pahi nungar che cuaisa pipe amombehu co ñehesa Tûpa ombou vahe písîrosa resendar yuvireco chupe imoporêhi ãgua Tûpa rovai inungar mbahe seropovêhepri aviye vahe Tûpa upe Espíritu Santo pipe yepi.

17 Supi eté che Jesucristo reroyasar che recosa pipe avîharete Tûpa che cuaita rese.

18 Esepia, cheu ndiyai añehe vaherã que ambuae mbahe rese: co mbahe Cristo oyapo uca vahe cheu ava ndahei vahe judío recocuer rese, seseño ité iyacatu cheu añehe vaherã. Esepia, amonguerêhi Tûpa reroya ãgua yuvireco che ñehe rese, che rembiapo sui avei.

19 Êgüe ahe poromondiisa mbahe yavai vahe apo Tûpa pîratasa pipe. Ahe ayapo Espíritu Tûpa suindar pîratasa pipe. Ipípe che amboaviye ñehesa Cristo resendar mombehu vichico. Tecua Jerusalén sui tupri aguata opacatu rupi, ayepota ivi Iliria ve avei no.

20 Chequerêhi avei co ñehesa písîrosa resendar mombehu ãgua ava Cristo recocuer ndosendui vahe upe yepi. Ndahei rumo ambuae ava imboaracua pare têi,

21 che rumo ayapo inungar icuachiapri pipe omombehu vahe:

“Ava ndoicuai vahe ité, ahe osepiara yuvireco curi, acoi ndosendui vahecuer, osenducua tupri aveira secocuer yuvireco no” ehi.

### *Pablo ipîhañemoñeta Roma ve oso ãgua*

22 Co rese têi che ndaicutui aso pe pîri, yepe setá rupi aso pota têi viña.

23 Cûritei rumo opa amboaviye che poraviqui co ivi rupi, iyavei opa têi setá aravîter pe pîri che sosa rãgüer.

24 España ve che soseve, apîta pucumira vicho pe pîri yande yembovîha ãgua. Iyavei pe sui che sê potase, che pîtivîmira peye aheve che so ãgua.

25 Cûritei rumo che asora Jerusalén ve. Arasora porerecosa ahe pendar yande mboetasa Jesús reroyasar pîtivîi ãgua.

26 Esepia, ivi Macedonia pendar iyavei Acaya pendar Jesús reroyasar, ahe omonuha guarepochi yuvireco Jerusalén ve yande rivri iparaisu vahe pîtivîi ãgua yuvireco.

27 Ahe êgüe ehi güemimbotar rupi yuvireco iyavei iya ité imboyeve ãgua yuvireco chupe ahe mbahe tupri oyeupe apo agüer rese. Esepia, yîpîndar Jesús reroyasar judío yuvirecoi vahe oicua uca co tecocuer Tûpa suindar ahe ava ndahei vahe judío yuvirecoi vahe upe. Sese iya ité imboyeve ãgua co ivi pipendar porerecosa chupe.

28 Opase che co porerecosa amondo yuvireco chupe, España ve che sose, ahese apîtara vicho pe pîri.

29 Che amoha voi eté asose eipeve, tuvichá omboura Cristo oporovasasa yandeu.

<sup>30</sup> Che rívr̄eta, yande Yar Jesucristo rer p̄ipe iyavei yeaisusa Esp̄ritu ombou vahe p̄ipe avei aporandu p̄eu opacatu che rese peyeroqui p̄írata vaheṛã Tũpa upe che p̄ítiv̄i ãgua co mborav̄iqui rese.

<sup>31</sup> Peporandu Tũpa upe, tache repi ava Jesús reroyasar̄hi sui iv̄i Judea ve, iyavei Jerusalén pendar yande rívr̄eta co porerecosa p̄isi tupri ãgua avei.

<sup>32</sup> Ahese Tũpa oipotase, che aviharetera ayepotase pe repia, iyavei toime p̄ituhusa yandeu che pe p̄iri che sose.

<sup>33</sup> Ēgüe tehi Tũpa güeco tuprisa p̄ipe tasecoi opacatu pe rese.

## 16

### *Pablo mahenduhasa ñepe-pepe ava upe*

<sup>1</sup> Co yande reindr̄i Febe serer vahe, ahe oip̄ítiv̄i tecua Cencrea pendar Cristo reroyasar oico.

<sup>2</sup> Peip̄isi tupri catu yande Yar rer p̄ipe; ahe niha yande cuaita Cristo reroyasar yande recose, iyavei peip̄ítiv̄iño que mbahe chupe ipane vahe rese. Esepia, ahe setá ité oporop̄ítiv̄i iyavei che avei eté che p̄ítiv̄i no.

<sup>3</sup> Pemombehu che mahenduha Prisca upe, Aquila upe avei, ahe niha che p̄ítiv̄i mborav̄iqui Jesucristo recocuer resendar rese yuv̄ireco.

<sup>4</sup> Ahe avei niha mbahe t̄i p̄ipe omondo güecocuer che repicave yuv̄ireco, sese, “Av̄iye” ahe chupe, iyavei ndahei che güeraño aipo ahe, opacatu yande rívr̄i ndahei vahe judío aipo eh̄i avei yuv̄ireco chupe.

<sup>5</sup> Pemombehu avei che mahenduha s̄etave oñemonuha vahe upe yuv̄ireco. Pemombehu avei che mahenduha che rembiaisu Epeneto upe. Ahe rane niha yip̄indar iv̄i Asia pendar Cristo reroyasar.

<sup>6</sup> Pemombehu avei che mahenduha María upe. Ahe niha oporav̄iqui iteanga vahe pe recocuer rese.

<sup>7</sup> Pemombehu avei che mahenduha che mu Andrónico iyavei Junias upe. Ahe niha che mboetasa yuv̄irecoi che roquendasave; ahe avei apóstol remimboyeroya yuv̄irecoi, ahe rane avei yip̄indar Cristo reroyasar yuv̄irecoi che sui.

<sup>8</sup> Pemombehu avei che mahenduha che rembiaisu Ampliato upe yande Yar rese secosa p̄ipe.

<sup>9</sup> Pemombehu avei che mahenduha Urbano upe. Ahe niha yande ndugüer oporav̄iqui vahe Cristo recocuer rese, che mboripar Estaquis upe avei.

<sup>10</sup> Pemombehu avei che mahenduha Apeles upe. Ahe niha güecoãhasa sui os̄e tupri vahe Cristo rese oyeroyasa p̄ipe. Iyavei pemombehu che mahenduhasa ava Aristóbulo r̄eta pipendar yuv̄irecoi vahe upe avei.

<sup>11</sup> Pemombehu avei che mahenduha che mu Herodión upe, ava Narciso r̄eta pipendar yande Yar reroyasar upe avei.

<sup>12</sup> Pemombehu avei che mahenduha Trifena upe iyavei Trifosa upe. Ahe niha oporav̄iqui vahe yande Yar upe nara yuv̄ireco, iyavei yande rembiaisu yande reindr̄i Pérsida. Ahe avei niha oporav̄iqui ité yande Yar upe nara.

<sup>13</sup> Pemombehu avei che mahenduha Rufo upe, ahe niha icuapri ité Jesús reroyasar seco rese. Iyavei ichi, ahe che si nungar ité secoi.

<sup>14</sup> Pemombehu avei che mahenduha Asíncrito upe, Flegonte upe, Hermes upe, Patrobas upe, Hermas upe iyavei opacatu ambuae yande rívr̄eta supi yuv̄irecoi vahe upe avei.

<sup>15</sup> Pemombehu avei che mahenduha Filólogo upe iyavei Julia upe, Nereo upe iyavei seindr̄i upe, Olimpas upe, opacatu yande rívr̄i yande Yar rese yuv̄irecoi vahe ip̄indar upe avei.

<sup>16</sup> Peyeovaupite catu pe reco maranehisa pipe che mahenduha mombehuse peyeupe. Opacatu Cristo reroyasar cohawe omondo avei omahenduhasa yuvireco pëu.

<sup>17</sup> Che rivireta, peicua catu pe pãhu pendar omboyaho pota serai vahe sui. Oime ava ãgüe ehi vahe, oiti uca vahe ava mbahe tã pipe. Esepia, ahe ndahei eté co ñehesa pe yembohesa rupi yuvirecoi. Sese evocoi nungar ava sui peyepipiño itera.

<sup>18</sup> Esepia, ahe ava ndahei yande Yar Jesucristo upe nara oyapo mbahe yuvireco. ãgüe ehi rumo ahe oyeupe nara tã oipota rai mbahe yuvireco. Iyavei ombopa ava ndayaracua tupri vahe; oñehe tupri ai angahu oporomohapisi aisa pipe tã yuvireco.

<sup>19</sup> Opacatu ité icuasa pe poreroyasa. Sese che aviharete vichico. Che rumo aipota pemboyecua vahrã pe mbahecuasa mbahe aviye vahe apo ãgua, ndahei mbahe tã apo ãgua.

<sup>20</sup> Evocoyase Tũpa güeco tuprisa pipe pihaivi Carugar osecopipa tupri itera. Pe avei evocoyase pesecoreroyira. Yande Yar Jesucristo tape rovasa.

<sup>21</sup> Omondo avei omahenduhasa Timoteo pëu. Ahe che pãtã che poraviquisa rese yepi. Iyavei che mu Lucio, Jasón, Sosípater, ahe avei imahenduha yuvireco pe rese.

<sup>22</sup> Che, Tercio, aicuachía vahe co ñehesa pëu, che avei che mahenduhasa amondo yande Yar reroyasa pipe pëu.

<sup>23</sup> Omondo avei omahenduhasa Gayo pëu. Ahe sãtave ité niha aque yepi, ipiri avei ambuae Jesús reroyasar oñemonuha yuvireco yepi. Iyavei Erasto omondo omahenduhasa opacatu pëu, ahe tecua mbahe guarepochi apocatusar. Yande rivri Cuarto avei omondo omahenduhasa pëu.

<sup>24</sup> Aviye, yande Yar Jesucristo tape rovasa opacatu.

#### *Pablo omboetei Tũpa*

<sup>25</sup> ¡Yamboetei Tũpa! Ahe niha oicatu pe moviracua co ñehesa ñepisirosa resendar amombehu vahe rupi iyavei co porombohesa Jesucristo recocuer resendar rupi avei. Ahe oyoya tupri ité Tũpa omboyecua ramo vahe cheu co ivi apoẽhi suive mbahe ndicuasai vahe rese.

<sup>26</sup> Cũritei rumo oyecua uca oñehe mombehugar rembicuachía pipe Tũpa apirẽhi vahe porocuita rupi cute. Ahe ñehesa ndicuasai vahe omboyecua uca opacatú ava upe 'toviroya sese oyeroyasa pipe yuvireco' oya.

<sup>27</sup> ¡Tũpa güeraño imbahecuá vahe yepi, ãgüe tehi ahe yande Yar Jesucristo rer pipe imboeteipri tasecoi!



## YIPINDAR PABLO REMBICUACHIA CORINTO PNDAR UPE CORINTIOS

### *Pablo mahenduhasa Jesús reroyasar Corinto pndar upe*

<sup>1</sup> Che Pablo, yande rivri Sóstenes reseve, oromondo co ore mahenduhasa opacatu p̄eu. Tūpa niha, güemibotar rupi, che poravo apóstol che reco āgua.

<sup>2</sup> Aicuachía co che ñehe p̄eu, pe Jesús reroyasar peñemonuha vahe Tūpa upe tecua Corinto ve. Peicua niha pe ipehapri peico Tūpa upe nara ité Jesucristo rese peicose. Peicua avei niha Tūpa pe poravose oyeupe nara pe reco catupri āgua, inungar opacatu ambuae seroyasar co ivi pipendar omboetei vahe yande Yar Jesucristo rer yuvireco. Supi eté niha Jesucristo, ahe opacatu ava Yar, yande Yar avei.

<sup>3</sup> Yande Ru Tūpa, yande Yar Jesucristo tape rovasa pe reco tupri āgua.

### *Jesucristo suindar porovasasa seroyasar upe*

<sup>4</sup> Che, “Aviye ndeu” aheño ité Tūpa upe pe recocuer rese yepi. Esepia, Tūpa pe rovasa ité Jesucristo rese peicose.

<sup>5</sup> Ēgüe ehi secocuer pipe sui Tūpa ombou opacatu pe reco tupri catu āgua, pemombehu tupri vaherā imbahecuasa, opacatu mbahe supi eté vahe cua tupri āgua avei.

<sup>6</sup> Esepia niha, ore co ñehesa Jesucristo resendar p̄eu imombehusa pipe sui pe recuñaro uca ité.

<sup>7</sup> Sese ndipoi eté que porovasasa Tūpa Espiritu suindar ipane vahe p̄eu yande Yar Jesucristo yevi āgua pesārose.

<sup>8</sup> Tūpa niha pe moviracuaño itera pe rereco ari cañisa pipe Jesucristo yevise voi curi ‘tipo eme que mbahe t̄ei secocuer rese yuvireco’ ohesave.

<sup>9</sup> Ahe acoi omboaviye vahe ité oñehengagüer yande poravo Guahir yande Yar Jesucristo rese yande reco āgua.

### *Jesús reroyasar p̄ihañemoñetasa ndahoyoyai vahe resendar*

<sup>10-11</sup> Che rivireta, che amombehu potami mbahe p̄eu yande Yar Jesucristo rer pipe. Esepia, Cloé mu pe mombehu yuvireco cheu: “Oñemoiro-iro yuvireco oyeupe ae” ehi. Sese aipo ahe p̄eu: pemboyoya catu pe p̄ihañemoñetasa, ndapeyemboyahoi chira peyesui. Peico catu pe yeaisusa pipe. Ichui tahoyoya pe p̄ihañemoñetasa, tahoyoya avei mbahe pe remimbotar.

<sup>12</sup> Supi eté amove aipo, “Ore Pablo rupindar oroico” peye t̄ei; ambuae evocoiyase, “Aní, ore rumo Apolos rupindar oroico” ehi; ambuae, “Ore Pedro rupindar oroico” ehi; ambuae, “Ore Cristo rupindar oroico” aipo peye-peye t̄ei aipo peico.

<sup>13</sup> ¡Cristo rumo vireco porombohesa ndoyaho-yaho t̄ei vahe! ¿Che tie amano curusu rese pe angaipa repirā? anise, ¿che rer pipe tie peñeapiramo uca peico?

<sup>14</sup> ¡Aviye Tūpa upe che ndopoāpiramoise! Crispo iyavei Gayo, ahe güeraño rumo añapiramo yuvireco cuese.

<sup>15</sup> Sese ndipoi chira “serer pipe ñapiramosa” ehi vahe yuvireco cheu.

<sup>16</sup> Estéfanas r̄eta pndar avei añapiramo yuvireco, ipare ndipo iri revo ambuae ava añapiramo vahecuer.

<sup>17</sup> Cristo niha nomombehui che poroāpiramo āgua. Ēgüe ehi rumo che cuaita ñehesa ñepisirosa resendar mombehu āgua t̄ei. Iyavei ndahei ñehesa yavai catu vahe aiporu. Esepia, nañomi potai eté que chíhi co ñehesa p̄iratagüer Jesucristo curusu rese imano agüer resendar ava sui.

### *Cristo Tūpa p̄iratasa, imbahecuasa avei*

<sup>18</sup> Esepia, acoi ava ocañi tēi vaherã upe co ñehesa curusu rese Cristo manosa resendar aviye ãgüe ehi tēi vahe viña. Yande ipĩsiropri yaico vaherã upe rumo co ñehesa vireco ité Tũpa pĩratasa,

<sup>19</sup> inungar Isaías rembicuachiagüer pipe aipo ehi:

“Amocañira co ivi pipendar ava tēi mbahecuasa iyavei arocuara ava yaracua vai tēi vahe sui yaracuasa” ehi.

<sup>20</sup> ¿Mara ehi evocoyase co ivi pipendar ava imbahecua vai vahe, ava-ava tēi aracuasa cuapar avei, iyavei ñehe cua tupri ai vahe co ivi pipendar mbahe rese yuvireco? ¿Tũpa niha osecuñaro evocoi nungar mbahecuasa ãgüe ehi tēi vahe pipe!

<sup>21</sup> ãgüe ehi eté oaracuasa pipe ‘toicua eme che recocuer ava oaracuasa pipe tēi’ oya. Yepe, “Co ñehesa Cristo resendar ãgüe ehi tēi vahe” ehi tēi ava yuvireco chupe viña, Tũpa rumo co ñehesa mombehusa sui ‘toñepisiro che Rahir rese yeroyasa pipe yuvireco’ oyapave yandeu.

<sup>22</sup> Che mu judío osepia pota tēi mbahe poromondiisa ipĩratá vahe iva pendar yuvireco. Griego evocoyase osendu pota tēi ñehesa aracuasa resendar yuvireco no.

<sup>23</sup> Yande rumo, “Cristo omano curusu rese” yahe ava upe yaico. Amove judío upe mbahe tēi co ñehesa. Iyavei amove ndahei vahe judío, co ñehesa osenduse, aviye acoi ãgüe ehi tēi vahe yuvireco chupe.

<sup>24</sup> Yande rumo, Tũpa rembiporavo yaico vahe, que judío, anise que griego avei, yandeu co ñehesa Tũpa Rembiporavo Cristo resendar Tũpa pĩratasa ité, imbahecuasa avei.

<sup>25</sup> Esepia niha, ava upe, Tũpa suindar mbahe aviye acoi ãgüe ehi tēi vahe viña. Co Tũpa suindar rumo mbahecuasa aviye catu vahe ité ava tēi mbahecuasa sui iyavei acoi mbahe Tũpa suindar aviye nipiratai vahe ava upe viña, ahe rumo ipĩrata catu ité opacatu ava tēi pĩratasa sui.

<sup>26</sup> Che rivireta, peyemomahenduha catu co rese: Tũpa pe poravo, yepe pe pãhu pendar ndasetaimi imbahecua vai vahe ava rovaque yuvireco viña. Ndasetaimi avei pereco pe mu seco ivate vahe viña no.

<sup>27</sup> Evocoi ava, “Ndoicuai vahe mbahe yuvireco” ehi yuvireco pëu viña. Tũpa rumo pe poravo evocoi ava imbahecua vai vahe mochi ãgua. Iyavei oiporavo ava pe pãhu pendar ndoicatu tuprii vahe yuvireco ava ipĩrata vahe Tũpa cuaparëhi mochi ãgua.

<sup>28</sup> Oiporavo avei co ivi pipe ava remieroïro seco mbegüemi vahe, ava seco ivi coti catu vahe pe pãhu pendar co ava seco ivaté vahe reroyi ãgua

<sup>29</sup> ‘toyemboivate ai eme que ava che rovaque yuvireco’ oya.

<sup>30</sup> Tũpa ité rumo yande mboyemboya Guahir Jesucristo rese, ahe avei ombou Guahir yande mboaracua ãgua, yande reco mohivi ãgua avei ‘toyuvirecoi cheu nara’ ohesave iyavei ‘ipĩsiropri toyuvirecoi’ oya yandeu.

<sup>31</sup> Sese inungar aipo ehi ñehesa icuachiapri arachendar pipe: “Acoi ava oyecomboivate ai pota vahe, toyecomboivate catu yande Yar rembiapo rese” ehi.

## 2

### *Pablo omombehu curusu rese Cristo mano agüer*

<sup>1</sup> Iyavei, che rivireta, che asose cuese, añehese pëu Tũpa suindar ñehesa supi eté vahe yipindar ndicuasai vahe pipe, nañehi co ivi pipendar tēi ava mbahecuasa pipe, ñehesa ivate ai vahe pipe avei.

<sup>2</sup> Esepia, acoi aicose pe pãhuve cuese, ndachepihañemoñetai eté que ambuae mbahe rese; Jesucristo recocuer rese, yatica agüer rese catu ité che pihañemoñeta vichico.

<sup>3</sup> Iyavei ndachepĩratatai, aririi avei che siquiyepave pëu che sose.

<sup>4</sup> Iyavei acoi añehese ñehesa pĩsirosa resendar rese pëu, ndaiporui eté rumo ñehesa ivate ai vahe pe pihañemoñetasa rerova ãgua. Che rumo Tũpa Espiritu pĩratasa pipe añehi pëu

<sup>5</sup> ‘toyeroya catu Tūpa pĩratasa rese yuvireco’ che yapave pe yeroyaẽhi ãgua ava tẽi mbahecuasa rese.

*Tūpa oEspíritu pipe oicua uca mbahe yandeu*

<sup>6</sup> Ore rumo oromombehuño ité aracuasa pẽu, pe peyemoviracua vahe Jesús rese pe yeroyasa pipe. Co aracuasa rumo aviye vahe ndahei ava suindar tẽi, ndahei avei ava mborerecuar co ivi pipendar tẽi aracuasa nungar. Esepia, ahe imborerecuasa ocañi tẽi vaherã.

<sup>7</sup> Oroñehe catu aracuasa Tūpa suindar ndicuasai vahe rese, ahe yipive vireco vahe ivi apoẽhi viteseve, ahe co omboyecua ramo vahe yandeu yaico vaherã teco ori apirẽhi vahesave.

<sup>8</sup> Co ivi pipendar ava mborerecuareta rumo ndosenducuai eté co ñehesa. Osenducuae rumo mborerecuar Jerusalén pendar yuvireco viña, ndoyatica ucai chira yande Yar seco ivate, porañete vahe curusu rese yuvireco viña.

<sup>9</sup> Icuachiapri aracahendar pipe aipo ehi:

“Tūpa omoingatu mbahe ava guaisupar upe. Ahe rumo mbahe ndosepiai vahe ité ava yuvireco yepi, ndosendui vahe ité, iyavei ndoyembopihañemoñetaimi eté sese yuvireco no” ehi aracahe.

<sup>10</sup> Tūpa rumo oicua uca Espiritu pipe yandeu cute. Esepia, Espiritu oicua tupri catu ité opacatú secocuer oico.

<sup>11</sup> Ëgüe ehi eté, inungar opacatu ava pãhuve ndipoi eté que ñepeï ava pihañemoñetasa oicua vahe, iespíritu güeraño ité oicua mbahe oime vahe ipiha pipe. Ëgüe ehi avei Tūpa Espiritu güeraño ité oicua Tūpa pihañemoñetasa.

<sup>12</sup> Yande evocoyase ndahei co ivi pipendar tẽi espíritu yaipisi, ãgüe ehi rumo Espiritu Tūpa suindar yaipisi yaicua vaherã iporerecosa oporoaisusa pipe ombou vahe yandeu.

<sup>13</sup> Ahe niha oromombehu Tūpa Espiritu ore mbohe vahe, ndahei ñehesa ava tẽi aracuasa sui. Ëgüe orohe co supi eté vahe ñehesa Espiritu suindar oromombehu Espiritu rese yuvirecoi vahe upe yepi.

<sup>14</sup> Acoi ava ndovirecoi vahe rumo Tūpa Espiritu opiha pipe, ndoipisi eté mbahe Tūpa Espiritu suindar yuvireco. Esepia, chupe evocoi mbahe aviye ãgüe ehi tẽi vahe, iyavei ndosenducua catui eté yuvireco. Esepia, evocoi nungar mbahe senducua Espiritu pipeño ité.

<sup>15</sup> Acoi ava vireco vahe rumo Tūpa Espiritu opiha pipe oicatu opacatu mbahe cua ãgua. Ndipoi chira rumo ambuae ava ndovirecoi vahe Espiritu opiha pipe ahe ava recocuer cua tupri ãgua.

<sup>16</sup> Esepia, icuachiapri aracahendar pipe aipo ehi: “¿Ava vo oicua tẽira yande Yar pihañemoñetasa viña? ¿Ava vo ombohe tẽira viña?” ehi. Yande rumo yareco yande Yar Cristo pihañemoñetasa.

### 3

*Pablo iyavei Apolos Tūpa upe oporaviqui vahe yuvirecoi*

<sup>1</sup> Che rivireta, ndapeguata tupri Espiritu reroyasa pipe; pe rumo peguataño vite ava tẽi pihañemoñetasa rupi peico. Sese namombehu catui ñehesa yavai vahe Espiritu suindar pẽu. Esepia, pe pĩtanimi nungar vite tẽi pe pihañemoñetasa Cristo rese.

<sup>2</sup> Sese che opombohe mbahe ndayavaimi vahe rese. Esepia, pĩtanimi ndoicatu vitei ocaru. Sese ocambu viteño tẽi. Cũritei rumo ãgüe peye vite ité. Esepia, pe ndapesenducua catu vitei eté Tūpa Ñehengagüer yavai vahe.

<sup>3</sup> Peguata viteño co ivi pipendar pihañemoñetasa tẽi rupi. Esepia, peyemoecatẽhi tẽhi oyeupe, iyavei peñemoiro peyeupe pe pihañemoñeta ndahoyoyai vahesa pipe. Pe evocoyase peyapo ava ndoicuai vahe Tūpa rembiapo nungar.

<sup>4</sup> Esepia, aipo peyeño tēi, “Ore Pablo rupindar oroico”; ambuae evocoyase, “Ore Apolos rupindar oroico” peye-peye tēi pe yembohesa rese pe yeecopisa pīpe. Aipo ehi vahe pe pāhuve inungar ava Tūpa ndoicuai vahe pīhañemoñetasa.

<sup>5</sup> Pesendu che ñehe: ¡Che Pablo iyavei Apolos Tūpa rembiguai tēi oroico! Esepia, yande Yar niha ombou ñepei-peī mboraviqui yandeu chupe yayapo vaheṛā. Tūpa upe ore poraviquisa pīpe sui niha peroya yande Yar peico:

<sup>6</sup> che rane inungar añoti vahe mbahe rāhi pe pīha pīpe; Apolos evocoyase inungar imboihusar; Tūpa rumo inungar omboori vahe pēu.

<sup>7</sup> Evocoyase ndiyai peyeroya mbahe tīsar rese tēi, imboihusar rese tēi avei. Peyeroya catura rumo Tūpa rese. Ahe niha pe reco momirata catu pe rereco.

<sup>8</sup> Ore rumo oyoya tupri oroyapo mbahe pēu nara. Sese ñepei-peī Tūpa omboura porerecosa pe rese ore poraviquigüer rupi oreu.

<sup>9</sup> Ore oroporaviqui vahe Tūpa upe. Pe evocoyase ivi nungar peico Tūpa poraviqui āgua iyavei pe inungar Tūpa omopuha ramomi vahe oi peico.

<sup>10-12</sup> Che inungar oi apo cuapar oyapo rane vahe oi vīracua āgua, ēgüe ahe imombehu Cristo resendar ñehesa pēu seroya tupri āgua. Ndiyai eté yaroya que ambuae ava tēi, Jesucristo güeraño ité yaroyara. Ambuae evocoyase inungar oi aposar omopuha vahe ivīracuasa harive, ēgüe ehi ahe pe monguerēhi catu pe mbohe co ñehesa rese. Evocoyase inungar oi aposar amove oiporu mbahe ipocopi vahe oi apo āgua yuvireco oro, guarepochi, anise ita aviye vahe. Amove rumo oiporu avei ndipocopi vahe mbahe que ivirape tēi, capihi, anise tacuar tēi oigüā yuvireco. Ēgüe ehi aveira pe mbohesar yuvireco. Ahe ñepei-peī rumo iya oicua tupriṛa pe mbohe āgua yuvireco.

<sup>13</sup> Ahe iporaviqui agüer rumo ari cañise icuasa tupriṛa ñepei-peī yuvireco. Esepia, ahe ari pīpe yande Yar oura tata reseve ñepei-peī pe mbohesar poraviqui agüer cua āgua.

<sup>14</sup> Acoi ava oporombohe tupri vahe inungar ava oyapo oi ndocai vahe, ahe oipisira oporaviqui repri;

<sup>15</sup> ambuae oporombohe rai vahe rumo inungar oi oyapo ocai vahe tēi, iporombohe agüer opa tēi etera ocañi. Ahe güeraño evocoyase oñepisiro sāira tata guasu sui.

<sup>16</sup> ¿Ndapeicuai vo pe yande Jesús reroyasar Tūpa rēta nungar yaico? IEspíritu niha secoi eté yande pīha pīpe.

<sup>17</sup> Oimese que ava yande pāhuve omomara vahe Tūpa rēta, Tūpa evocoyase omboura oñemoirosa ahe ava upe. Esepia, Tūpa rēta nimarai vahe ité; yande teieté niha Tūpa rēta yaico.

<sup>18</sup> Peyembopa eme catu pe ae. Oimese que pe pāhu pendar oyeupe aipo “che yaracua tupri vahe aico” ehi vahe co ivi pipendar pīhañemoñetasa rupi tēi, toyecomombegüemi rane oaracua āgua.

<sup>19</sup> Esepia, ava tēi aracuasa Tūpa upe ēgüe ehi tēi vahe. Inungar icuachiapri aracahendar pīpe aipo ehi: “Ava oaracua raisa pīpe oyeiti uca mbahe tēi pīpe Tūpa upe yuvireco” ehi.

<sup>20</sup> Iyavei aipo ehi no: “Yar rumo oicua ava tēi yaracua rai vahe pīhañemoñetasa, ahe ēgüe ehi tēi vahe” ehi.

<sup>21</sup> Sese ndapeyecomboivate ai chira que ava tēi porombohesa rupi peico. Esepia, opacatu mbahe pēundar ité:

<sup>22</sup> Ēgüe ehi eté che Pablo, iyavei Apolos, Pedro avei, opacatu ivi pipendar mbahe Tūpa omoime vahe yandeu, tecovesa, manosa avei, yasepia vahe, iyavei mbahe oime vaheṛā, ahe niha opacatu pēu nara,

<sup>23</sup> pe niha Cristo upendar, Cristo evocoyase Tūpa upendar secoi.

## 4

*Apóstol yuvirecoi vahe poraviqui agüer*

<sup>1</sup> Iya aipo peye: “Co mbia Cristo povri pendar yuvirecoi, icuaita ité niha Tūpa suindar ñehesa oyecua ramo vahe rese iporombohe ãgua” peyera oreu viña.

<sup>2</sup> Acoi vireco vahe ocuaitarã, iya ité omboyecua ocuaita mboaviye tupriisa.

<sup>3</sup> Mara etemo che areco pe che recocuer rese peporanduse viña. Iyavei cheu mbahemi tēi che reraso potase que ava tēi porandusave che recocuer rese porandu ãgua yuvireco. Che avei ndaicuai eté che recocuer cuapa tupri.

<sup>4</sup> Yepe ndaicuai que mbahe che rembiavi che cuaita sui viña, ndiyai chira rumo, “Che amboaviye tupri che cuaita” ahe vahe rã pēu. Yande Yar rumo oicua.

<sup>5</sup> Sese pe, “Ahe ava recocuer aviye ai”; anise, “Ahe ava recocuer naporai vahe” ndapeye voi tēi chira. Pesãro ranera rumo yande Yar yevi ãgua. Ahe niha omboyecua opacatu mbahe ndoyecuai vahe, iyavei omboyecuapara ñepeipei yande pihañemoñetas. Ipare aipo ehira yandeu: “Aviye, nde eremboaviye tupri nde cuaita” ehira; anise, “Nderemboaviyei nde cuaita” ehira ñepeipei yandeu.

<sup>6</sup> Che rivireta, che añehe cheyese ae, Apolos rese avei pēu mbahe tupri ãgua rese ‘ore recocuer sui toyembohe yuvireco Tūpa remimbotar icuachiapri rupi tupri yuvirecoi ãgua’ ore yapave pēu. Pe evocoyase, “Co mbia seco ivate catu vahe co ambuae mbia sui” ndapeyei chira pe yemboivate aisa pipe oreu.

<sup>7</sup> ¿Pe tie aviye catu vahe peico ambuae ava sui? Opacatu rumo mbahe pe rembiereco, ahe Tūpa suindar. ¿Sese ndiyai peyecomboivate etepri co mbahe pereco vahe rese! ¿Aviye opacatu mbahe peyesui tēi pe reco vahe viña!

<sup>8</sup> Ndojavii pereco ité vahe opacatu mbahe pe remimbotar viña, ndoyavii avei nipanei vahe ité Tūpa suindar mbahe pēu. Peyeupe revo ndoyavii mborerecuar guasu peico ore sui viña. ¡Ēgüe peye itera tarahu viña! Ahese, ore avei mborerecuar oroicora pe pãhuve viña.

<sup>9</sup> Ore rumo apóstol oroico vahe ndoyavii cheu Tūpa ore renoi ipa tēi vahe ore mano tēi ãgua. Sese seroñrombri oroico inungar ava imboguaiipri yucapirã. Ēgüe orohe oroico opacatu ava rovaque, Tūpa rembiguai eta iva pendar rovaque avei.

<sup>10</sup> Iyavei, “Co ndayaracuai vahe” ehi rutei ava yuvireco oreu Cristo rese ité ore recose; ahese avei rumo pe peyeapo imbahecua etepri vahe peico Cristo rese pe recosa pipe. Iyavei ore ndoyavii ndaseco pĩratavi vahe oroico ava rembiepiave; aheseve avei rumo peyecomomirata tēi peico. Ore seroñrombri tēi oroico, pe evocoyase ava pe mboetevi guasu pe rereco yuvireco.

<sup>11</sup> Cūritei ore oroicove vite ité ore rieporēhi pipe, ore husei tēi iyavei ndore turucuai eté. Ava rumo evocoyase mara-mara tēi ore rereco yuvireco. Iyavei ndorovirecoi ore rēta ité.

<sup>12</sup> Ore oroporaviquiño ité, oroyembogüerai tēi ipipe. Ava rumo iñehe mara-mara tēi eté yuvireco oreu; ore evocoyase oromboyevĩño iñehe mbahe tupri pipe chupe. Ore reca-catuño ité ore momara ãgua yuvireco; ore rumo oroñemosañño ité yuvireco chupe.

<sup>13</sup> Iñehe-ñehe tēi ore rese yuvireco; ore rumo saisusa pipe oromboyevi iñehe yuvireco chupe. Ore rereco itĩ nungar tēi iyavei ore rereco inungar ava Ēgüe ehi tēi vahe yuvireco. Cūritei Ēgüe ehi viteño ité yuvireco oreu.

<sup>14</sup> Ndahei pe mochi ãgua aipo ahe icuachía pēu, Ēgüe ehi rumo pe mboaracua ãgua tēi. Inungar che rahir ité, che rembiaisu opovireco.

<sup>15</sup> Esepia, yepe pereco ati pe pĩtĩvisar Cristo rese pe reco ãgua viña, ndaperecoi rumo setá pe yesupa. Esepia, che amombehuse niha ñehesa pĩsirosa resendar pēu, ahese ramo peroya Jesucristo. Seroyasa pipe evocoyase che inungar pe yesupa ité aico pēu.

<sup>16</sup> Sese che aipota ité che recocuer moña peye.

<sup>17</sup> Sese che amondo che rembiaisu Timoteo pēu, che rahir nungar omboaviye vahe ocuaita yande Yar suindar. Ahe pe momahenduhara Cristo rupi che guatasa rese. Ahe oyoya che porombohe agüer rese che sose opacatu Jesús reroyasar ñemonuhasa rupi yepi.

<sup>18</sup> Amove oime pe pãhuve oyecomboivate ai vahe. “Ndou iri chietera revo cohave yande repia” ehi yuvireco cheu viña;

<sup>19</sup> aso pïhaiviño itera rumo pe repia yande Yar oipotase cheu. Ahese aicua tuprira oyemboivate ai vahe reco pïratasa yuvireco. Ndahei chira iñehe güeraño tēi aicuara.

<sup>20</sup> Esepia, Tūpa omborerecuasave, ndahei oñehe pïpe tēi oporocuai, opïratasa pïpe rumo ěgüe ehi.

<sup>21</sup> ¿Mbahe pïha peipota peico? ¿Peipota pïha che aso vaherã pēu che ñehe pïrata pe mboaracua ãgua mbahe pe rembiavi rese? Anise, pemoingatu rane pe recocuer, ahese asora mbahe tupri pïpe pe pïri.

## 5

### *Pablo oñehe ñepei Jesús reroyasar pãhu pendar oyemboaguasa vahe rese*

<sup>1</sup> Ambuae mbahe, oroyandu ñepei mbahe tēi pe pãhu pendar rembiapo oroico: oime aipo osi recoyar rese secoi vahe. Ahe angaipa guasu oyapo oico. Tūpa reroyasarēhi ité ndoyapoi evocoi nungar mbahe tēi yuvireco.

<sup>2</sup> ¡Pe rumo peyecomboivate ai peico! ¡Iyacatu rumo ndapeyemboivahi chira evocoi nungar mbahe tēi repiase viña! Evocoi nungar ava iyacatu ité pemboyepepïra pe pãhu sui.

<sup>3</sup> Yepe niha che teieté ndaicoi pe pãhuve viña, pe rese che mahenduhasa pïpe rumo aicove ité pe pãhuve iyavei aicua voi eté aipo oyapo vahe mbahe tēi recocuer inungar-ra aico vahe ité pe pãhuve viña.

<sup>4</sup> Acoi peñemonuhase, che avei niha aicora pe pãhuve che mahenduhasa pïpe, yande Yar Jesucristo pïratasa avei secoira pe rese.

<sup>5</sup> Evocoyase ahe ava timondosa Carugar povrïve secocuerai mocañi ãgua. Ipïpe sui iespïritu oñepïsirora yande Yar Jesucristo yevise curi.

<sup>6</sup> Ndapeyecomboivate ai chira peico co mbahe tēi oimese pe pãhuve. Esepia, peicua niha co ñehesa aipo ehi vahe: “Yepe chïhimi imondosa pan mboapeposa panguã rese viña, ahe rumo oiunquepa tupri panguã rese” ehi.

<sup>7</sup> Evocoi ava rembiapo ai inungar pan mboapeposa pe pãhuve. Sese pemombopa pe pãhu sui peicoēhi ãgua angaipa pïpe peico vaherã inungar panguã ipïasu vahe ndovirecoi vahe omboapeposa oyese. ěgüe peye ité niha. Esepia, yande Yar Jesucristo iparaisu omano yande repïrã. ěgüe ehi ahe inungar ovesa yucapri angaipa mocañi ãgua judío pieta Pascua pïpe yepi.

<sup>8</sup> Sese inungar judío omboetei vahe Pascua pieta yuvireco yepi omombopaño pan mboapeposa cuacua vahe oyesui pan ipïasu, ndayapepoi vahe rereco ãgua, ěgüe yahe aveira yaico yande reco pïasu supi eté vahe pïpe; yamombopara yande recocuerai yandeyesui, ahe ava reco momara-mara tēisa, mbahe naporai vahe avei.

<sup>9-10</sup> Ambuae aicuachía vahe pïpe aipo ahe pēu: “Ndapemborï chira ava oyemboaguasa-guasa tēi vahe, acoi ava oipota rai vahe ambuae ava mbahe, imonda rai vahe, iyavei ava mbahe rahanga upe tēi oyerure vahe” ahe. Co che ñehesa rumo ndahei Tūpa ndoicua vïtei vahe upendar. Esepia niha, pe yepepi ãgua ñepei reseve evocoi nungar ava sui, pesē itera co ivi pïpe sui viña.

<sup>11</sup> Che niha aipo ahe icuachía pēu: ndapemborï chira que ava acoi “che Jesucristo reroyasar aico” ehi angahu tēi vahe, que oyemboaguasase, anise oipota raise que ambuae ava mbahe, oyeruqui tēi vahe que mbahe rahanga upe, iyavei imahechiroi ai vahe, caguar tēi vahe, anise imonda rai vahe. Evocoi nungar ava pïri ñepei yepe ndapecarui chietera.

<sup>12-13</sup> Cheu ndiyai eté ava ndoyuvirecoi vahe Tūpa rese recocuer rese porandu ãgua. Tūpa ahe ava yuvirecoi vahe recocuer opara oicua coiye. Pe rumo pe cuaita ité Tūpa rese

yuvirecoi vahe upe pe porandu āgua secocuer rese. ¡Sese pemboyepipiño ité osi recoyar rese secoi vahe pe pāhu sui!

## 6

*Ndiyai Jesús reroyasar serasosa ndahei vahe Jesús reroyasar mborerecuar rovai*

<sup>1</sup> Ambuae mbahe no: Oime pe pāhu pendar “co mbia oyapo mbahe tēi cheu” ehi vahe ambuae Jesús reroyasar upe. ¡Mahera peraso mborerecuar Tūpa reroyasarēhi upe tēi evocoi mbia rembiapo ai rese porandu āgua! Iyacatu rumo Tūpa reroyasareta upe perasora secocuer moingatu āgua yuvireco viña.

<sup>2</sup> Peicua niha pe Tūpa reroyasar peporandura ava ndoicuai vahe Tūpa upe secocuer rese yuvireco curi. Evocoyase, ¿ndapeicatuī pīha co tecocuer mbahemi tēi moingatu peico?

<sup>3</sup> ¿Ndapeicuai vo yande avei yaporandura Tūpa rembiguai recocuer rese curi? Evocoyase, ¡peporandu catu itera co ivi pipendar tecocuer rese peyeupe yepi!

<sup>4</sup> Perecose evocoi nungar mbahe tēi peyeupe, ¡mahera peiporu ava ēgüe ehi tēi vahe tūparo pendar upe mbahe moingatu āgua!

<sup>5</sup> Che aipo ahe ité pēu pe chī āgua: ¿Ndipoimi eté vo pe pāhuve que ñepeī yaracua vahe oicatu vahe que mbahe tēi peyeupendar moingatu āgua?

<sup>6</sup> ¡Amove pevava peyeupe! ¡Ndahei co güeraño, oime avei pe pāhu pendar Tūpa reroyasar vīraso ambuae omboetasa mborerecuar Tūpa reroyasarēhi upe tēi mbahe moingatu āgua!

<sup>7</sup> Supi eté evocoiya pe reco pipe peyavi guasu ité. Iya peñemosañora co mbahe tēi pe mboetasa suindar upe viña. Ēgüe ehi eté, iya mbahe pe reco vahe, “Toñomiño yuvireco” peyera chupe pe raso rāgüer sui Tūpa reroyasarēhi mborerecuar upe viña.

<sup>8</sup> Amove rumo pe avei peyapo mbahe-mbahe tēi eté; peñomi avei pe mboetasa Tūpa reroyasar mbahe.

<sup>9-10</sup> ¡Pe niha peicua acoi ava mbahe-mbahe tēi aposar ndoyuviroiquei chietera Tūpa mborerecuasa pipe curi! Peyembopa ucai rene chupe. Esepia, acoi ava oyemboaguasaguasa tēi vahe, mbahe rahanga upe tēi oyerokuī vahe, omendasa sui oyemboaguasa vahe, cuimbahe pāve oyapo vahe mbahe oyese ae yuvireco, imonda rai vahe, oipota rai vahe ambuae ava mbahe, osavaipo serai vahe, imahechiroi ai vahe, iyavei ava vīrocua yesapihaño tēi vahe mbahe tēi pipe ambuae ava mbahe, ahe opacatu ndoyuvirasoi chira ivave Tūpa mborerecuasave curi.

<sup>11</sup> Oime avei niha acoi pe pāhu pendar yipīndar ēgüe ehi vahe yuvireco viña, cūritei rumo opa pe angaipa imocañisa pe sui iyavei pe ipehapri peico Tūpa upe nara ité. Ahe, “Peyavi mbahe” ndehi iri pēu yande Yar Jesucristo rer pipe iyavei yande Ru Tūpa Espiritu pīratasa pipe avei no.

*Yande rete ipehapri Tūpa upe nara yaguasaēhi āgua*

<sup>12</sup> Iyavei ambuae mbahe: Supi eté niha “aviye que mbahe che remimbotar ayapo vaherā” ehi vahe. Amove rumo co mbahe ndahei aviye vahe yandeu iyavei yandeu ndiyai evocoi nungar mbahe povrīve nara tēi yande reco āgua.

<sup>13</sup> Supi eté niha aipo ehi vahe: “Yande rembihu yande avīter upe nara, yande avīter evocoyase yande rembihu upe nara” ehi. Coiye rumo Tūpa opara omocañi evocoi nungar mbahe. Yande retecuer rumo ndicuitai yaguasa tēi vaherā, ahe rumo yande Yar upe nara. Yande Yar evocoyase yande retecuer upe nara secoi.

<sup>14</sup> Inungar Tūpa ombogüerayevi yande Yar, ēgüe ehi aveira yande mbogüerayevi opīratasa pipe coiye.

<sup>15</sup> Peicua niha yande rete Jesucristo upendar ité. Ndiyai eté evocoyase Jesucristo upendar yande rete mondo āgua cuña güetecuer omondo-mondo tēi vahe upe.

<sup>16</sup> Peicua niha pe aipo nungar cuña ndipihai vahe rese peicose, pe reteducer evocoyase ñepei vahe nungar ité pereco. Esepia, icuachiapri aracahendar pipe aipo ehi yandeu: “Yepe ñuvirío ava yuvirecoi vahe viña, ñepei vahe nungar ité rumo secocuer yuvireco” ehi.

<sup>17</sup> Acoi ava secoci vahe rumo yande Yar rese, ahe secocuer evocoyase ñepeiño ité.

<sup>18</sup> Peyepipi voiño catu ava yemboaguasa-guasa tēisa sui. Opacatu ambuae angaipa ndahei yande reteducer rese nara ité. Acoi ava rumo oyapo tēi vahe mbahe cuña rese, güeteducer ae evocoyase omomara catu güembiapo pipe sui tēi.

<sup>19</sup> ¿Ndapeicuai vo pe reteducer Espíritu Santo upendar ité secoci, iyavei ahe Espíritu Tūpa remimbou pe rese ité secoci? Sese pe reteducer ndahei pēundar ité.

<sup>20</sup> Esepia, Tūpa yande rerocua oyeupe nara. Yande rumo yande repi chupe. Sese peyapo mbahe aviye vahe pe reteducer pipe Tūpa mboetei āgua.

## 7

### *Poromboaracuasa mendasa resendar*

<sup>1</sup> Cūritei amboyevira pēu acoi cuese pe porandusa mendasa resendar peicuachía vahe imbou cheu. Aviyeño ité niha que ava ndomendaise viña.

<sup>2</sup> Pe aguasa-guasa tēiēhi āgua rumo peyacatu perecora pe rembireco, cuña avei evocoyase tovireco oyacatu omer yuvireco.

<sup>3</sup> Cuimbahe tomboaviye omendasa güembireco rese iyavei cuña omenda vahe, tomboaviye avei mendasa omer rese. Ahe niha yande cuaita yamendase.

<sup>4</sup> Esepia, cuña omenda vahe güeteducer ndahe iri oyeupe nara vireco, omer upe nara ité rumo. Iyavei cuimbahe omenda vahe, ndahei avei güeteducer oyeupe nara vireco, ahe rumo güembireco upe nara ité vireco.

<sup>5</sup> Ndiyai peatēhi oyeupe. Oyoya rumo, “Yayapo eme mbahe” peyese peyeupe pe yeroqui āgua Tūpa upe, ahe aviyeño. Ndiyai rumo peyoeya pucura, aviyeteramo ndapeñemosai chira, ipipe sui aviyeretamo Carugar pe ātoi tiētera.

<sup>6</sup> Ndahei che opocuai ‘tomenda yuvireco’ viya pēu.

<sup>7</sup> Che rumo aipota che nungar pe mendaēhi āgua viña. Tūpa rumo ombou yande yacatu yande recorā.

<sup>8</sup> Iyavei ndomenda vitei vahe upe, cuña imer mano vahecuer upe avei amombehu pota mbahe: iyacatu revo ndapemendai peico che nungar.

<sup>9</sup> Ndapeicatuise rumo pe ñemosa āgua, pemendaño. Esepia, aviye catu itera pemenda poropota rai rāgüer sui.

<sup>10</sup> Che rumo amombehu omenda vahe upe ‘topoi eme cuña omer sui’ viya. Ndahei cheyesui tēi aipo ahe. Ahe rumo yande Yar porocua ité.

<sup>11</sup> Acoi opoise cuña omer sui, tomenda iri eme, anise toyevi iri omer upe. Iyavei cuimbahe omenda vahe, topoi eme avei güembireco sui.

<sup>12</sup> Ambuae ava opacatu upe rumo cheyesui eté aipo ahe. Esepia, ndipoi eté yande Yar ñehe sesendar: acoi Jesús reroyasar virecose güembireco ndahei vahe Jesús reroyasar, ahe cuña secoci potaño itese sese, evocoyase ahe topoi eme ité güembireco sui.

<sup>13</sup> Iyavei acoi cuña Jesús reroyasar, virecose omer ndahei vahe Jesús reroyasar, ahe cuimbahe secoci potaño itese sese, evocoyase ahe cuña topoi eme ité ichui.

<sup>14</sup> Esepia, co cuña Jesús reroyasar virecose omer ndahei vahe Jesús reroyasar, ndahei eté angaipa yuvireco Tūpa rovaque. Ēgüe ehi aveira cuimbahe Jesús reroyasar virecose güembireco Jesús reroyasarēhi. Ēgüe ndehise rumo, tahir avei ndoyavi chira ndahei vahe Jesús reroyasar rahir yuvireco viña. Ahe tahir rumo Tūpa upendar yuvirecoira.

<sup>15-16</sup> Sese pe, pemenda vahe ndahei vahe Jesús reroyasar rese, pepoi eme catu ichui; aviyeteramo pe recocuer sui pe mer oñepisirora. Iyavei pe cuimbahe, aviyeteramo pe recocuer sui avei pe rembireco oñepisirora. Acoi cuña ndahei vahe Jesús reroyasar opoi



potase omer Jesús reroyasar sui, topoiño ichui. Iyavei cuimbahe ndahei vahe Jesús reroyasar opoi potase güembireco Jesús reroyasar sui, topoiño avei ichui. Esepia, Tūpa oipota mbahe tupri pipe yande reco āgua.

<sup>17</sup> Co rumo mbahe: peicoveño yipindar pēu Tūpa ombou vahe rese seroyaēhi vitesendar pipe. Ahe aporocuai opacatu Cristo upendar ñemonuhasa rupi yepi.

<sup>18</sup> Acoi Tūpa osenoise ava judío oyeupe nara, ahe judioño ité secoira. Acoi osenoise rumo, ndahei vahe judío, ahe ndoyembocircuncida ucai chira judío güeco āgua.

<sup>19</sup> Esepia, ndahei chira que judío, anise que ndahei vahe judío yaicose aviye catura yaico. Co rumo Tūpa oipota catu, “Tomboaviye opacatu che porocuita amondo vahe chupe yuvireco” ehi yandeu.

<sup>20</sup> Sese peicoveño peyacatu pe recocuer pēu Tūpa ombou vahe rese pe renoiēhi viteseve.

<sup>21</sup> Pe mbiguai tēi peico vahe pe renoise Tūpa, pepihañemoñeta etepri eme evocoiya pe recosa sui pesē vahe rā rese. Peicatuse rumo, peyepipiño itera ichui.

<sup>22</sup> Esepia, yepe pe mbiguai tēi peico viña, peroyase rumo yande Yar, ahese inungar ndahe iri vahe mbiguai peico chupe. Iyavei pe no, ndahei vahe mbiguai tēi peico vahe, yepe ēgüe peye viña, peroyase rumo Cristo, ahese sembiguai peico.

<sup>23</sup> Tūpa upe rumo perepí iteanga, sese ndiyai eté ambuae ava povrive tēi peico.

<sup>24</sup> Sese, che rivireta, peicoveño itera pe recocuer pipe inungar yipindar Tūpa pe renoise.

<sup>25</sup> Cuñatai ndomenda vitei vahe resendar rese rumo ndarecoi Yar suindar che ñehe āgua. Che rumo amondora che pihañemoñetasa yuvireco chupe. Esepia, yande Yar che paraisuerecosa pipe imboyeroyapri aico.

<sup>26</sup> Cheu aviye catuño ité ndomendai vahe ēgüe ehiño tēise yuvireco viña. Esepia niha, tecocuer yavaí eteanga cūrtei.

<sup>27</sup> Acoi pemendase, pepoi eme ité oyesui. Acoi ndapemendaise, ndapeseca iri chietera peyeupe.

<sup>28</sup> Pemendase rumo, ndahei angaipa iyavei cuñatai omendase, ndoyapoi avei angaipa. Acoi omenda vahe upe rumo yavaí catura co ivi pipe yuvireco chupe. Sese che ndaipotai evocoi nungar mbahe pipe yuvireco vahe rā.

<sup>29</sup> Che rivireta, aipo mbahe amombehu pota pēu: ndipucuvei co ari naporai vahe yepota āgua yandeu. Sese co pipe suive tupri omenda vahe toyuvirecoi ndomendai vahe nungar yande Yar rese opihañemoñetasa pipe.

<sup>30</sup> Acoi ndovihai vahe, toyuvirecoi eme oviharēhisa pipe iyavei acoi oviharete vahe, ahe toyuvirecoi eme avei oviharetasa pipe, iyavei virocua vahe mbahe omahera, toyuvirecoi inungar mbahe ndovirocui vahe omahera viña yande Yar rese opihañemoñetasa pipe.

<sup>31</sup> Acoi ava ipihañemoñeta catu vahe co ivi pipendar mbahe poru āgua, tipihañemoñeta eme evocoi nungar mbahe tēi rese yuvireco. Esepia, co ivi pipendar mbahe yasepia vahe, ocañi tēira.

<sup>32</sup> Che ndaipotai co ivi pipendar recocuer rese tēi pe pihañemoñeta etepri peico. Acoi mbia ndomendai vahe rumo, ipihañemoñeta catuño ité yande Yar rese imbovaha āgua;

<sup>33</sup> omenda vahe rumo ipihañemoñeta avei co ivi pipendar recocuer rese tēi, güembireco mbovaha āgua rese avei.

<sup>34</sup> Evocoiyase ndahei ñepepi opihañemoñetasa vireco. Ēgüe ehi avei cuña opihañemoñeta rereco; cuña ndomendai vahe, ipihañemoñeta yande Yar upendar mbahe rese, güetecuer iyavei oespíritu rereco tupri āgua Tūpa upe. Cuña omenda vahe rumo ipihañemoñeta co ivi pipendar recocuer rese tēi omer mbovaha āgua oico.

<sup>35</sup> Che aipo ahe pēu ‘mbahe tupri pipe toyuvirecoi’ viya, ndahei mbahe yavaí vahe pipe pe reco āgua. Che aipota ité pe reco catuprisa pipe yande Yar upeño ité mbahe peyapo vahe rā pe recoeté pipe peico.

<sup>36</sup> Acoi ava ipihañemoñeta vahe güembirecovi rese omenda ãgua, “Aviyeteramo ayavira mbahe ichui iyavei niha osupiti ité imenda ãgua, sese aviye catu yamenda” ehise, toyapoño güemimbotar. Tomendaño ité güembirecovi rese. Esepia, mendasa niha ndahei angaipa.

<sup>37</sup> Acoi mbia rumo ndovirecoise que ocuaita omenda ãgua iyavei oicatu ité güemimbotar apo, ipihañemoñetase ñepeí reseve güembirecovi rese omendaẽhi ãgua, ahe aviyeño ité.

<sup>38</sup> Evocoyase acoi omenda vahe aviyeño; acoi ndomendai vahe rumo, aviye catuño ité.

<sup>39</sup> Iyavei acoi cuña omenda vahe, ahe ndiyai eté iyepepi ãgua omer sui imanoẽhi viteseve. Omanose rumo ichui, ahese ramo ahe cuña upe aviyeño imenda iri ãgua güemimbotar rupi. Yande Yar reroyasar rese avei rumo omendara.

<sup>40</sup> Ndomenda irise rumo, aviye catuño itera. Ahe che pihañemoñetasa, iyavei revo ahe che pihañemoñetasa Tũpa Espíritu suindar.

## 8

### *Pablo oñehe tembihu mbahe rahanga upe tẽi seropovẽhepri rese*

<sup>1</sup> Cũritei ambuae mbahe amombehura pẽu mbahe rahanga upe mbahe mimba yucapri seropovẽhepri rese. Supi eté aipo ehi vahe: “Yande opacatu yareco yande mbahecuasa” ehi. ¡Yande rumo, “Aicua tupri opacatu mbahe” yande hesa pipe yayeecomboivate ai tẽi! Yayeaisuse rumo, ahese yañepitivi catu Cristo reroya tupri ãgua.

<sup>2</sup> Supi eté yande, “Che aicua ité co mbahe” vahe tẽise que mbahe upe, ipane vite ité rumo icua tupri ãgua yandeu.

<sup>3</sup> Yande rumo yasaisuse Tũpa, ahese Tũpa, “Co ava cheundar ité secoi” ehira yandeu.

<sup>4</sup> Evocoyase co mbahe rahanga upe tẽi seropovẽhepri mbahe mimba yucapri hu ãgua rese añehe. Yande niha yaicua co mbahe rahanga ãgüe ehi tẽi vahe co ivi pipe, iyavei oime ñepeí güeraño ité Tũpa.

<sup>5</sup> Esepia, yepe ava upe setá tũpa ivave, ivive avei viña (setá iteanga niha oime tũpa angahu tẽi, yar angahu tẽi avei).

<sup>6</sup> Yande rumo yaicua ñepeíño ité Tũpa oime, ahe niha yande Ru opacatu mbahe aposar. ¡Evocoyase yande chupe nara ité yaico! Oime avei yande Yar ñepeí vahe, ahe Jesucristo. Ahe ichui oime opacatu mbahe, ichui avei yaicove.

<sup>7</sup> Ndahei rumo opacatu oicua aipo mbahe yuvireco. Amove Jesús reroyasar yipindar güecocuer vireco vahe sui ndasesarai viteño yuvireco; imahenduhaño vite mbahe rahanga rese oyeroya agüer rese yuvireco. Esepia, yuvirohuse mbahe roho seropovẽhepri, ipihañemoñeta, “Co mbahe roho tũpa rahanga upe seropovẽhepri” ehi viteño yuvireco oyeupe. Ipipe sui omomara uca Tũpa rese opihañemoñetasa yuvireco.

<sup>8</sup> Supi eté tembihu ndayande pítivi Tũpa rese yaico vaheã. Ndahei mbahe roho husa pipe sui tẽi aviye catura yaico iyavei ndayahuse, ndahei chira mbahe tẽi catu yaico.

<sup>9</sup> Pẽu niha aviyeño pehu viña; peicua catura rumo, aviyeteramo que Jesús reroyasar ndoicatu tupri vitei vahe pemboangaipa uca.

<sup>10</sup> Esepia, pe co mbahe peicua vahe, pehuse co tembihu mbahe rahanga upendar carusave ahe Jesús reroyasar rembiepiave, aviyeteramo pemonguerẽhi aveira ihu uca ãgua chupe.

<sup>11</sup> Evocoyase co pe mbahecuasa pipe pemocañi uca yande rivri Tũpa rese noviracua tupri vitei vahe peico. ¡Cristo rumo omano ipĩsiro ãgua!

<sup>12</sup> Esepia, pemomarse Tũpa rese ipihañemoñetasa, ahese pe ae peyemboangaipa uca Cristo amotarẽhisa pipe peico.

<sup>13</sup> Sese yande mbahe roho husa pipe sui yamboangaipa ucase yande rivri viña, ndayahu iri chietera evocoi mbahe roho yande rivri mboangaipa ucaẽhi ãgua.

## 9

*Apóstol Pablo ndoporandu potai oyeupe nara apóstol upendar mbahe rese ava upe*

<sup>1</sup> Supi eté che aicatu avei apóstol upendar mbahe pisi ãgua viña. Esepia, che apóstol aico. Supi eté che asepia yande Yar Jesús iyavei che poraviquisa pipe sui niha peroya yande Yar peico.

<sup>2</sup> Yepe, “Pablo ndahei apóstol” ehi ambuae ava yuvireco cheu viña, pe rumo, “Ahe co secoi” peye voiño itera cheu. Esepia, che remimombehu pipe sui niha yande Yar peroya peico. Ipipe sui avei icuasa tupri apóstol che recosa pëu.

<sup>3</sup> Ahe ñehesa amboyevi tupri ava che recoãha potasar upe yuvireco yepi.

<sup>4</sup> Iya ité che remihura pisi, che iguarã avei pe sui viña.

<sup>5</sup> Iyavei inungar ambuae apóstol viraso ité güembireco oyeupi yuvireco yepi, Jesús rivireta avei ëgüe ehi yuvireco, ëgüe ehi avei Pedro, ëgüe ahe aveira niha che viña.

<sup>6</sup> ¿Ore güeraño tie Bernabé rese oroporaviquira ambuae mbahe rese ore recove ãgua?

<sup>7</sup> Esepia, sundao nomboepi sundao güeco ãgua, ahe rumo oporaviquisa repri oipisiño. Iyavei ava uva tïsar, ahe avei yaviyese, ohu güemitigüer. Iyavei ovesa rãrosar, ahe avei omohe ovesa cambi igua.

<sup>8</sup> Che ndahei cheyesui tēi aipo ahe pëu. Esepia niha, Moisés porocuita pipe avei aipo ehi yandeu:

<sup>9</sup> “Pemondo eme tivi yuru rese mbahe icaruëhisa mbahe rãhi oicambese yuvireco pëu” ehi. Supi eté co Tüpa aipo ehi vahe ndahei tivi upeño.

<sup>10</sup> Yande reco tupri ãgua rese niha aipo ehi yandeu. Esepia, acoi ava omonguhi vahe ivi iyavei acoi oicambe vahe mbahe rãhi, oyoya osãro mbahe oipisi vahe rã oporaviquisa sui oyeupe nara yuvireco yepi.

<sup>11</sup> Evocoyase ore avei oroñoti Tüpa Ñhengagüer pe piha pipe ore pe mbohese. Sese aviyeño aveira oroipisise mbahe pe sui oreyeupe nara viña.

<sup>12</sup> Esepia, ambuae oicatu mbahe pisi ãgua oyeupe nara yuvireco pe sui. Evocoyase ore avei niha oroicatu mbahe pisi ãgua pe sui ore poraviquisa pipe viña.

Ore rumo ëgüe ndorohei eté. Esepia, ore oroñemosañito ité ‘tiñehe mara eme co ñehesa Cristo resendar rese yuvireco’ ore yapave.

<sup>13</sup> Pe niha peicua ité acoi oporaviqui vahe judío tūparove, ichui ocaru yuvireco. Esepia, yuvirohu mbahe roho Tüpa upe seropovëhepri tūparo rocarve yuvireco yepi.

<sup>14</sup> Ëgüe ehi avei yande Yar ore cuai ‘toipisi mbahe ipane vahe co ñehesa mombehusa pipe sui yuvireco oyeupe’ oyapave oreu.

<sup>15</sup> Che rumo ndaporandui eté mbahe pe rembiereco rese vichico pëu yepi. Ndahei ‘tombou mbahe yuvireco cheu’ che yapave aipo aicuachía imondo pëu. Che rumo evocoi nungar mbahe rese ayembovihaño ité. ¡Yepe che yucapri tēira tieporēhi viña, ndaporandui chietera rumo mbahe rese pëu! Esepia, namocañi potai eté co che yembovihasa cheyesui.

<sup>16</sup> Che rumo amombehuse co ñehesa pīsirosa resendar ava upe, ndiyai ayecomboivate ai ipipe. Esepia niha, che cuaita ité yapo ãgua iyavei, ¡cheparaisu itera ndamombehuse ava upe co ñehesa viña!

<sup>17</sup> Tüpa ndache cuaise oñehe mombehu ãgua viña, che rumo che querēhisa pipe amombehuse, ahese aipisira Tüpa suindar porerecosa. Ëgüe ndahei rumo. Esepia, Tüpa che cuaisa pipe niha amombehu.

<sup>18</sup> Ndaporanduisse mbahe rese pëu amombehuse co ñehesa pīsirosa resendar, ipipe ayemboviha ahe che vihasa porerecosa nungar cheu. Yepe aicatu mbahe rese che porandu ãgua viña, che rumo ëgüe ndahei eté.

<sup>19</sup> Yepe che ndahei ava povrive tēi aico viña, che rumo che remimbotar rupi opacatu ava rembiguai nungar ayeereco ‘tasetá catu ava iquerēhi vahe Cristo reroya āgua’ che yapave.

<sup>20</sup> Esepia, aicose judío pāhuve, secocuer rupi aicoveño Yar upe imonguerēhi catu āgua yuvireco. Ēgüe ahe ité, aicose ava Moisés porocuita povrive yuvirecoi vahe pāhuve, che avei eté mborocuitavrive nungar aico. Ndahei rumo Moisés porocuita povrive ité aico imboavīye āgua.

<sup>21</sup> Iyavei ava ndoyuvirecoi vahe Moisés porocuita povrive, ipāhuve aicose, inungar ahe yuvirecoi, ēgüe ahe tupri avei imonguerēhi āgua yande Yar upe vichico. Ndahei rumo Tūpa porocuita mboyeroaēhisa pipe aico. Esepia, Cristo porocuitavrive che recocuer.

<sup>22</sup> Iyavei no, aicose ava yande Yar ndoviroya tupri vitei vahe pāhuve, secocuer nungar tupri avei aico Yar upe imonguerēhi catu āgua. Ēgüe ahe opacatu ava upe ‘toñepisiro catu ahe avei yuvireco’ viya.

<sup>23</sup> Che ayapo co opacatu mbahe ‘taseta catu co ñehesa pīsīrosa reroyasar yuvireco’ che hesa pipe, ‘taipisi avei co porovasasa oime vahe co ñehesa reroyasa pipe’ che yapave avei.

<sup>24</sup> Peicua niha guayisa oimese, ava opacatu guasu yuvinoñase yuvireco, ivava catu vahe güeraño rumo oipisi porerecosa yepi. Evocoyase inungar co ivava catu vahe, ēgüe peye avei pe recocuer pipe Tūpa porerecosa pisi āgua peico.

<sup>25</sup> Iyavei opacatu oyemoingatu vahe oguayī āgua oñearo tupri opacatu mbahe tēi sui oyemomaraēhi āgua yuvireco. Ahe ēgüe ehi porerecosa ndipocopi vahe pisi āgua tēi yuvireco. Yande rumo yayemomborarara porerecosa apirēhi vahe pisi āgua yaico.

<sup>26</sup> Evocoyase che avei, ndahei ava oyahuva-huva tēi vahe nungar aico Tūpa remimb-otar apo āgua iyavei che ndaicoi ava iguayī tēi vahe nungar.

<sup>27</sup> Che rumo mbiguai nungar che retecuer areco, amboyeroya uca pihañemoñeta tuprisa upe. Esepia, ndaipotai ambuae ava mbohe pare imombopri tēi nungar guayisa sui che yereco āgua.

## 10

### *Ndiyai aracahendar ava recocuerai rupi yaguata*

<sup>1</sup> Che rivireta, che aipota pe judío peico vahe peyemomahenduha vitera aracahe yande ramoi guatasa rupi mbahe pītu Tūpa imboguata agüer rese. Iyavei para guasu Pīra vahe avei osasa opacatu yuvireco aracahe.

<sup>2</sup> Ēgüe ehi eté opacatu oguatase mbahe pītuvri rupi iyavei para guasu osasase yuvireco, ndoyavī ñapiramombri yuvirecoi Moisés recocuer rupi oguata āgua aracahe.

<sup>3</sup> Iyavei oyoya guasu yuvirohu tembihu Tūpa ombou vahe chupe nara yuvireco,

<sup>4</sup> opacatu guasu avei oihu ita sui Tūpa ombou vahe ihiguarā yuvireco. Ahe ita rumo inungar Cristo secoi opacatu iguatasa rupi yuvireco.

<sup>5</sup> Yepe ēgüe ehi Tūpa opacatu yande ramoi judío upe viña, setá iteanga rumo ava ipāhu pendar ndahei avīye vahe ipiha rupi yuvireco. Ipīpe sui opa omano ivi iporupirēhisa rupi aracahe.

<sup>6</sup> Co opacatu mbahe sembiapogüer yuvireco ahe yande mbohe āgua ‘toipota rai eme mbahe-mbahe tēi inungar ahe ava yuvirecoi’ oyapave yandeu.

<sup>7</sup> Sese yande ndayamboetei chira mbahe rahanga tēi, inungar ahe ipāhu pendar yuvirecoi aracahe. Aipo ehi eté niha icuachiapri aracahendar pipe: “Co ava ocaru vahe, yuviroihu avei yuvinoi. Ichui yuviropūha, oyembovihaño pieta apo yuvireco” ehi.

<sup>8</sup> Ndayayemboaguasa-guasa tēi chiaveira inungar ahe amove ēgüe ehi yuvireco. Ipīpe sui tēi ñepe arī pipe ahe opa omano veintitrés mil tupri yuvireco aracahe.

<sup>9</sup> Ndayasecoāha-āha tēi chiaveira yande Yar, inungar ahe yuvireco. Ipīpe sui oyeyu- capa uca mboi osuhusa pipe yuvireco.

<sup>10</sup> Iyavei ndayande ñehe mara-mara tēi chira yande Aposar rese, inungar ahe ěgüe ehi yuvireco. Ipipe sui Tūpa ombou güembiguai ava yucasar iva sui ahe ava yucapa āgua aracahe.

<sup>11</sup> Co opacatu yande ramoipe mbahe oime vahe aracahe icuachiapri yande ipa yaico vahe upe nara: “¡Peicua catu aipo nungar mbahe sui!” he āgua yandeu.

<sup>12</sup> Sese yande “che aico tupri ité Tūpa rese” yahe vahe, yaicua catura rumo. Aviyeteramo yaviapira mbahe tēi pipe.

<sup>13</sup> Pe recoãhasa rumo oyoya tupri ité ambuae ava recoãhasa rese. Pe rumo peyeroyaño itera Tūpa rese, ahe niha oicua pe yemoviracuasa, noñocuai chira tecoãhasa imbou pēu. Acoi mbahe tēi oimese pe recoãhase, Tūpa ombou voiñora pīratasa evocoi mbahe tēi sui pe sē āgua, chupe pe ñemosa āgua.

<sup>14</sup> Sese che rivireta, che rembiaisu, peyepipi mbahe rahanga mboeteisa sui.

<sup>15</sup> Ava niha peico pesenducua vaheñā mbahe, evocoyase peporandu co che remimombehugüer rese peyeupe icua tupri āgua.

<sup>16</sup> Yaihuse uva ricuer sovasapri, “Aviye ndeu, che Yar” yande hesa pipe, ahese oyoya guasu Cristo rese yaico suvi pipe sui. Yahuse co pan imboyaho-yahopri, ahese oyoya guasu yaipisi Cristo retecuer yandeyeupe nara.

<sup>17</sup> Yepe yande reta yaico viña, opacatu rumo yahu ñepepe pan sui. Sese yande ñepepe vahe ité yaico.

<sup>18</sup> Peyapisaca acoi ava aracahendar Israel recocuer rese. Esepia, acoi yuvirohu vahe Tūpa upendar mbahe seropovēhepri, ahe evocoyase chupendar ité yuvirecoi.

<sup>19</sup> Che rumo, “Mbahe rahanga aviye vahe ité” ndahei, iyavei, “Mbahe roho icuavēhepri mbahe rahanga upe, aviye catu ité” ndahei avei.

<sup>20</sup> Co rumo, acoi ava ndoicuai vahe Tūpa oicuavēhe mbahe caruguar upe tēi yuvireco yepi. Ndahei rumo Tūpa upe nara ité ěgüe ehi yuvireco. Che evocoyase ndaipotai eté caruguar upe nara tēi ěgüe peye vaheñā peico.

<sup>21</sup> Peihuse rumo yande Yar upendar igua, ndiyai peihu avei caruguar upendar igua; iyavei pehuse yande Yar upendar mbahe, ndiyai avei pehu caruguar upendar mbahe.

<sup>22</sup> ¿Yasecara pīha yande ae yande Yar ñemoiro āgua yandeyeupe? ¡Yande rumo ndahei chira ipīrata catu vahe yaico ichui!

*Yande renosesa mbiguai tēi nungar yande recosa sui mbahe tupri apo āgua*

<sup>23</sup> Amove ava, “Aviyeño opacatu mbahe yayapo yande remimbotar rupi” ehi yuvireco viña. ěgüe ehi eté niha, ndahei rumo opacatu aviye, ndahei avei co opacatu mbahe yande pītivii catu Cristo rese yande reco āgua.

<sup>24</sup> Ndapesecai chira que mbahe aviye vahe peyeupe nara tēi, pesecara rumo ambuae ava upe nara.

<sup>25</sup> Pehuño mbahe tembihu opacatu mbahe mboepisa rupi sui perocua vahe. Ndapeporandui chira rumo sese Tūpa rese pe pihañemoñetasa momaraēhi āgua.

<sup>26</sup> Esepia, ivi opacatu ipor reseve, ahe yande Yar upendar.

<sup>27</sup> Acoi Tūpa reroyasarēhi pe soho ucase oyepiri pe mbocarū āgua, peso potase ipiri, pehuñora mbahe imboupri pēu. Ndapeporandui chira rumo sese chupe Tūpa rese pe pihañemoñetasa momaraēhi āgua.

<sup>28</sup> Acoi ava, “Co mbahe roho icuavēhepri mbahe rahanga upe” ehise pēu, ndapehui chira ahe mbahe roho. ěgüe peyera pēu imombehugar rereco meguaēhi āgua, ava pihañemoñetasa momaraēhi āgua avei.

<sup>29</sup> Supi eté che añehe co ambuae ava pihañemoñetasa rese, ndahei pe pihañemoñetasa rese.

Oimera rumo oporandu vahe sese “¿mahera aipo ndiyai chira cheu mbahe apo, ndaheise ambuae ava pīha rupi?” ehi vahe.

<sup>30</sup> Iyavei aipo ehira no: “‘Aviye ndeu’ ahese Tūpa upe mbahe ahū vahe rese, ¿mahera pīha che reroīrora yuvireco ahuse viña?” ehira.

<sup>31</sup> Iyacatu rumo pehuse que mbahe, peihuse avei, anise que mbahe peyapose, peyapo ru opacatu Tūpa mboeteisa pipe.

<sup>32</sup> Supi eté ndapemboyecuai chira pe recocuerai, que judío upe, que ndahei vahe judío yuvirecoi vahe upe, anise que Jesús reroyasar yuvirecoi vahe upe avei.

<sup>33</sup> Che opacatu che rembiapo pipe aipota ité mbahe tupri apo āgua opacatu ava upe nara. Ndahei cheyeupeño mbahe tupri aseca, ambuae ava upe avei mbahe tupri aipota iñepisiro āgua yuvireco.

## 11

<sup>1</sup> Che raquicue moñá catu peye inungar che asaquicue moña Cristo vichico.

*Mara ehira cuña Jesús reroyasar ñemonuhasave yuvireco yepi*

<sup>2</sup> Che rivireta, che, “Aviye ité yuvirecoi” ahe pēu yepi che rese pemahenduha vitesē iyavei peguataño vitesē che opombohe vahe agüer rupi.

<sup>3</sup> Che rumo aicua uca tupri pota pēu, Cristo niha secoi ñepeipei cuimbahe cuaisar, cuimbahe evocoyase güembireco cuaisar secoi. Ēgüe ehi avei Tūpa Guahar Cristo upe.

<sup>4</sup> Acoi cuimbahe Cristo upe ñemonuhasave oāca ndiru ndosequise oyerure āgua, anise Tūpa Ñhengagüer mombehu āgua, ahe Ēgüe ehi güerecuar Cristo mboeteiēhisa pipe.

<sup>5</sup> Iyavei acoi cuña ndoyopiise oāca oyeruqui āgua, anise Tūpa Ñhengagüer mombehu āgua, ahe Ēgüe ehi omer mboyeroyaēhisa pipe. Ahe cuña evocoyase ndoyavii oñeapipa tupri vahe.

<sup>6</sup> Acoi cuña ndoyopi potaise oāca, tayapecāraisa tupri. Ochīse rumo oapecārai āgua, evocoyase toyopiño oāca sereco.

<sup>7</sup> Cuimbahe rumo ndoyopi chira oāca sereco. Esepia, ahe Tūpa rahanga ité secoi iyavei iporañetesa omboyecua ité oyese. Cuña rumo omboyecua omer recocuer oyese yuvireco.

<sup>8</sup> Esepia, Tūpa oyapose cuimbahe, ndahei cuña sui vinose, cuimbahe sui niha cuña oyapo.

<sup>9</sup> Iyavei ndahei cuña upe nara Tūpa oyapo cuimbahe, ahe rumo oyapo cuña cuimbahe upe nara.

<sup>10</sup> Co rese cuña virecora oācapisa omer mboyeroyasa mboyecua āgua omahese Tūpa rembiguai eta yuvireco sese.

<sup>11</sup> Yande, yande Yar reroyasar yaico vahe co tecocuer rese, yañepitivii oyoya yaico. Evocoyase cuimbahe ndoicatui cuña porēhi; cuña avei ndoicatui cuimbahe porēhi yuvireco.

<sup>12</sup> Esepia, yepi supi eté cuimbahe sui yapopri cuña. Ipare rumo cuña sui oha cuimbahe; opacatu rumo oyoya Tūpa suindar yuvirecoi.

<sup>13</sup> Evocoyase peyapisaca tupri co rese: ¿Iya pīha cuña noñeacapii vahe oyerure Tūpa upe?

<sup>14</sup> Yande ité yaicua yemochisa cuimbahe oyemboha vucuse.

<sup>15</sup> Cuña rumo oviharete oha vucu porañetesa rese. Esepia, chupe imondopri ité ñacapi āgua.

<sup>16</sup> Acoi ava iñehe-ñehe tēi pota vahe co tecocuer rese, toicua ore ndoroicoi ambuae reco pipe. Iyavei opacatu ambuae Jesús reroyasar Ēgüe ehi avei yuvireco.

*Yande Yar rese yemahenduha raisa*

<sup>17</sup> Co ambuae mbahe rese rumo ndaicatui eté, “Aviye tupri yuvirecoi” che he āgua pēu. Esepia, aipo pe ñemonuhasave, mbahe tēi eté aipo peyapo.

<sup>18</sup> Esepia, yipindar che ayandu peñemonuhasave aipo oyese yande Yar mboetei āgua pe pīhañemoñetasa ndahoyoyai pipe peico. Amove ayanduse pe rerācua, aroya ité.

<sup>19</sup> ¡Iya ité revo pihañemoñetasa ndahoyoyai vahe reime ãgua pe pãhuve Jesús reroyasar supi tupri vahe cua tupri ãgua!

<sup>20</sup> Peñemonuhase pe pihañemoñetasa ndahoyoyai vahe pipe pe caru ãgua, ndahei yande Yar rese pe yemomahenduhaseve ãgüe peye.

<sup>21</sup> Espia, aipo pecaruse, pe rane aipo pepoyava pecaru. Ambuae aipo evocoyase ndasiepoi tēi yuvireco; ambuae rumo pe pãhu pendar aipo oyembosavaipoño yuvireco.

<sup>22</sup> Pereco niha pe rēta aheve pe caru ãgua iyavei pe ihu ãgua. Pe rumo pe reco pipe opa peroñro ambuae Jesús reroyasareta peico. Ipipe avei pemochi ava ndovirecoi vahe mbahe. ¡Che evocoyase, “Aviye yuvireco” ndahei chietera co mbahe pe rembiapo ai rese pēu!

### *Yande Yar rese yemomahenduhasa supi ité vahe resendar*

<sup>23</sup> Co ñehesa aipisi vahe yande Yar suindar amombehu vahe pēu: ahe pĩtu pipe acoi Jesús mboguaisar opisi ãgua renonde, ahe oipisi pan.

<sup>24</sup> “Aviye ndeu” ohe pare Vu upe, ombohi-mbohi, ahese aipo ehi güemimbohe eta upe: “Co che rete amondo vahe manosave mbahe tupri pe reco ãgua. ãgüe peyera che rese pe mahenduhasa pipe peico” ehi.

<sup>25</sup> ãgüe ehi avei ocarure yuvireco, ahe oipisi igua riru aipo ehi: “Co uva ricuer omboyecua pēu Tũpa oyapora mbahe ipiasu vahe pe recorã. Che ruvi pipe rumo yaposara. Evocoyase co ari pipe suive peihuse co, peyemomahenduhara che rese yepi” ehi.

<sup>26</sup> Esepia, acoi pehuse co, peihuse avei, peyemomahenduhara, pemombehu aveira yande Yar mano agüer opacatu ava upe peico. ãgüe peyera iyevi rãro peico.

### *Mara yahera yande Yar rese yayemomahenduhase*

<sup>27</sup> Evocoyase acoi ava ocaruño tēi vahe, yuviroihuño tēi vahe avei Yar mboeteiēhisave, ahe evocoyase nomboetei yuvireco yande Yar rembiapocuer omondose güetecuer, iyavei oipiyerese vuvi.

<sup>28</sup> Sese tipihañemoñeta rane oyacatu güecocuer rese ava co pan hu ãgua renonde, oihu ãgua renonde avei co uva ricuer yuvireco.

<sup>29</sup> Esepia, acoi pe yemomahenduhaēhisave co setecuer rese pehuse iyavei peihuse, ahese mbahe naporai vahe peseca peyeupe nara peico.

<sup>30</sup> Ichui niha setá pemaheasi, oime setá nipirata iri vahe avei pe pãhuve, oime avei omano vahe pe pãhu pendar.

<sup>31</sup> Yande pihañemoñeta tuprise rumo yande reco ãgua rese, yande Yar evocoyase nomoime chira mbahe tēi yandeu evocoyase yande recosa pipe.

<sup>32</sup> Yande Yar rumo oicua yande rembiapo ai. Sese omoime mbahe tēi yandeu. Yande reco mohivi tupri ãgua rumo ãgüe ehi yandeu, ndahei yande cañi ãgua opacatu ava viroyasarēhi reseve.

<sup>33</sup> Sese, che rivireta, acoi peñemonuhase pe yemomahenduha ãgua yande Yar rese, peñearo ranera oyoya guasu pe caru ãgua.

<sup>34</sup> Acoi ava ndasiepoise yuvireco, tocaru rane güētave. Ahese yuvirasose ñemonuhaseve, ndipoi chira mbahe chupe. Iyavei che asose eipeve pe repia, opara ambuae mbahe amoingatu vicho pēu.

## 12

### *Mbahecuasa Tũpa Espiritu suindar*

<sup>1</sup> Che rivireta, che aicua uca pota pēu co mbahecuasa resendar ñepeipei pēu Espiritu omondo vahe.

<sup>2</sup> Pe niha cūrítei peicua tupri ité yipindar Tũpa rese peicoēhi vitese, peyembopa uca mbahe rahanga ãgüe ehi tēi, noñehei vahe upe peico.

<sup>3</sup> Sese, che aipotá peicua acoi ava iñehe mara Jesús upe ndahei Tūpa Espíritu pĩratasa pĩpe ãgũe ehi. Iyavei ava ndoicatui chira, “¡Jesús che Yar secoi!” ohe ãgua opĩha pĩpe Espíritu Santo ndovirecoise.

<sup>4</sup> Oime setá ambuae-ae tẽi mbahecuasa Espíritu suindar yande Jesús reroyasar yaico vahe upe nara, ahe Espíritu rumo ñepeiño ité imondosar secoi.

<sup>5</sup> Setá mbahe avei oime mbahe yayapo vaheerã yande Yar upe. Ahe yande Yar rumo ñepeiño ité secoi.

<sup>6</sup> Iyavei setá oime ambuae mbahe Tūpa oyapo vahe yande rese opĩratasa pĩpe, Tūpa rumo ñepeiño ité secoi. Ahe oyapo opacatu co mbahe ñepei-pei yande rese.

<sup>7</sup> Ahe omboyecua yande Espíritu rerecosa ñepei-pei yandeu opacatu yande reco tupri ãgua.

<sup>8</sup> Espíritu pĩratasa pĩpe Tūpa omondo ñepei viroyasar upe iñehe ãgua aracuasa rese iyavei ambuae upe omondo iporombohe tupri catu ãgua ombahecuasa pĩpe.

<sup>9</sup> Ambuae upe evocoyase omondo oyese yeroya tupri catu ãgua oEspíritu pĩpe sui avei. Iyavei ambuae upe omondo opĩratasa imbaheasi vahe mbogũera ãgua.

<sup>10</sup> Ambuae oipĩsi pĩratasa mbahe poromondiisa oyapo vaheerã yuvireco. Ahe ichui avei vireco ambuae ava omombehu vaheerã ñehesa Tūpa suindar yuvireco. Ambuae upe Tūpa omondo mbahecuasa espíritu naporai vahe iyavei Espíritu supi tupri vahe cua tupri ãgua. Ambuae evocoyase ichui avei oicatu ñehesa ndicuasai vahe Tūpa suindar pĩpe oñehe ãgua. Ahe ichui avei ambuae oicatu ahe ñehesa ndicuasai vahe mombehu tupri ãgua ava upe.

<sup>11</sup> ãgũe ehi Espíritu ñepeiño ité gũemimbotar rupi omondo ñepei-pei yande Jesús reroyasar yaico vahe upe co mbahecuasa.

*Opacatu Cristo rese yaico vahe ñepeiño ité yande recocuer*

<sup>12</sup> Inungar yande retecuer resendar setá mbahe oime viña, ahe rumo ñepeiño ité; ãgũe ehi avei Cristo.

<sup>13</sup> ãgũe yahe avei opacatu, yepe yande pãhuve oime: judío, ndahei vahe judío, mbiguai, ndahei vahe avei mbiguai, yande rumo opacatu ñapiramombri yaico ñepei vahe nungar yande reco ãgua Espíritu ñepei vahe pĩpe. Ahe ñepei Espíritu avei opa yaipĩsi.

<sup>14</sup> Supi eté yande rete resendar ndahei ñepei mbahe, setá rumo mbahe.

<sup>15</sup> Iyavei yepe que yande pi revo aipo ehira yandeu viña: “Che ndahei nde po aico, sese ndahei nde rete resendar” ehira viña; ndahei chira rumo ichui tẽi ndaseco iri chira yande rete rese.

<sup>16</sup> Iyavei yepe que yande nambi aipo ehira viña: “Che ndahei nde resa aico, sese ndahei nde rete resendar” ehira yandeu viña. ¡Ndahei chiaveira ichui tẽi ndaseco iri chira yande rete rese!

<sup>17</sup> Esepia, opacatu tupri yande rete sesa pãve tẽise, ndayasendui chietera evocoyase mbahe viña. Anise, yande rete yapisacuar pãve tẽise, ndayasẽtui chietera evocoyase mbahe viña.

<sup>18</sup> Tūpa rumo ñepei-pei yande rese mbahe omondo senara rupi tupri gũemimbotar rupi.

<sup>19</sup> Yande opacatu ñepei ava rete resendar nungar pãve tẽise, ndahei evocoyase opacatu tupri ava rete nungar yaico.

<sup>20</sup> Supi eté yepe setá mbahe yande rete rese, ñepeiño ité rumo yande rete.

<sup>21</sup> Iyavei que yande resa ndiyai aipo ehira yande po upe: “¡Nde ãgũe ere tẽi vahe eico!”; anise que yande ãca avei, “¡Nde ãgũe ere tẽi vahe eico!” ndehi chira yande pi upe.

<sup>22</sup> Esepia, yande rete resendar mbahe aviye nipiratai vahe yandeu, ahe sese rumo yayeroya catu.

<sup>23</sup> Iyavei yande rete rese mbahe ndayasaisu tupri vahe, ahe rumo yamboyemonde tupri ai sereco. Iyavei no yande rete resendar mbahe ndayamboyecuai vahe ava rembiepiave, ahe yayopi tupri sereco.



<sup>24</sup> Oime rumo ambuae yande rete resendar ndayayopii vaheerã. Êgüe ehi Tûpa yande rete resendar mbahe imoingatú tupri. Evocoyase yande rete resendar mbahe ndayasaisu tupri vahe imboeteipri catu secoi.

<sup>25</sup> Tipo eme pihañemoñetasa ndoyoyai vahe pe pãhuve. Oyoya pehañeco tupri ñepeipei peyese peico.

<sup>26</sup> Evocoyase que ñepeipei yande pãhu pendar upe mbahe tasise, opacatu ambuae upe avei tasi; anise que ñepeipei imboyeroyapri secoise, ambuae avei opacatu oyembovîha yuvireco sese.

<sup>27</sup> Supi eté pe inungar Cristo rete peico. Êgüe peye ité ñepeipei chupendar ité peico.

<sup>28</sup> Êgüe ehi Tûpa iporavo viroyasar pãhuve, “Toime rane yipindar apóstol; ipare toime ava che ñehengagüer mombehu ãgua, ichui ambuae upe iporombohe ãgua, ipare ambuae mbahe ndayasepiai vahe apo ãgua, iyavei ambuae ava imbaheasi vahe mbogüera ãgua, ambuae ava pîtivîisar tasecoi, ambuae ava recocuer reroguata tupri ãgua tasecoi, ambuae ava evocoyase toñehe ñehesa ndicuasai vahe pipe” ehi.

<sup>29</sup> Ndahei rumo opacatu ava apóstol yuvirecoi, iyavei ndahei opacatu Tûpa ñehe mombehusar yuvirecoi, ndahei opacatu oporombohe yuvireco, ndaopacatu avei oyapo mbahe ndayasepiai vahe yuvireco,

<sup>30</sup> ndahei opacatu vireco pîratasa oporombogüera ãgua yuvireco, iyavei ndahei opacatu ndicuasai vahe ñehesa Espîritu suindar pipe oñehe yuvireco, ndaopacatu avei oicua evocoi ñehesa renducua uca ãgua ambuae ava upe yuvireco.

<sup>31</sup> Peseca ru Espîritu suindar mbahecuasa aviye catu vahe peyeupe nara.

### *Yembohesa yande poroaisu ãgua resendar*

Che rumo amombehura tecocuer aviye catu vahe pëu.

## 13

<sup>1</sup> Yepe yande yañeheño tēise ambuae ava ñehe ndayaicuai vahe pipe, iyavei Tûpa rembiguai ñehe pipe avei viña, ndayasaisuise rumo ava ipipe, yande evocoyase êgüe yahe tupri tēi inungar mbahe guarepochi apopri siapu iteanga vahe, iyavei inungar acoi platillo siapú rai tēi vahe, êgüe yahe tēi yaico.

<sup>2</sup> Iyavei yepe yamombehuño tēise Tûpa suindar ñehesa ou vahe yandeu viña, iyavei yepe yaicuase mbahe opacatu icuapirēhi Tûpa suindar yaico, yarecose avei yande aracuasa opacatu yandeyese, iyavei yepe yande Tûpa rese yeroya pipe yarosirira ivitri guasu senda sui viña, ndayasaisuise rumo ava ipipe, yande evocoyase êgüe yahe tupri tēira yaico.

<sup>3</sup> Iyavei yande mbahe opacatu yareco vahe yamboyaho-yaho tupri tēise ava iparaisu vahe upe viña, iyavei yayoapi ucapa tupri tēise viña, ndayasaisuise rumo ava ipipe yaico, ndayande pîtivîi eté evocoyase yande reco agüer.

<sup>4</sup> Acoi ava iporoaisu vahe, ahe seco mbegüe tupri, secocuer aviye ai eté iyavei ndoporoamotarēhi ambuae ava mbahe potasave; “Che aviye catu vahe aico” ndehi avei, ndoyecomboivate ai eté,

<sup>5</sup> ahe ndovirecoi eté oporomboeteiēhîsa, ndahei oyeupe güeraño mbahe oipota, niñemoiro serai vahe, ahe rumo iñero voño ambuae ava upe.

<sup>6</sup> Ndahei mbahe tēi rese oyembovîha; ahe rumo oyembovîha mbahe supi tupri vahe rese.

<sup>7</sup> Oporoaisusa virecose oñemosañe opacatu uve, oyeroya vite sese, osãro vite mbahe tupri ichui, iyavei seco mbegüe viteño chupe.

<sup>8</sup> Poroaisusa niha ndopai vahe ité. Oyepotara ari ipapapri coiye, ahese ndayamombehu iri chira Tûpa suindar ñehesa ou vahe, ndayañehe iri chira ambuae ñehesa ndayaicuai vahe pipe, ndayaiporu iri chiaveira yande mbahecuasa.

<sup>9</sup> Esepia niha, yaicua raimi tēi mbahe iyavei chīhi raimi tēi yamombehu Tūpa Ñehengagüer.

<sup>10</sup> Acoi ouse rumo oicuapa tupri vahe mbahe, ahese ndahe iri chira yaicua raimi tēi vahe yaiporura.

<sup>11</sup> Esepia niha, chīhivahe vite yande recose, yañehe, yandepihañemoñeta, yasenducua mbahe chīhivahe nungar; yacuacuase ité rumo cute, yaseyapa chīhivahe yande reco agüer.

<sup>12</sup> Cūritei yande ndayasenducua tupri Tūpa resendar mbahe, inungar acoi yepiasa pipe yasepia hāvomi tēi que mbahe; oyeovai eté yaicose rumo, yasenducua tupri catu itera mbahe evocoyase. Cūritei rumo yaicua raimi tēi mbahe Tūpa suindar yaico; coiye rumo yaicua tupri catu itera, inungar ahe oicua tupri ité yande recocuer.

<sup>13</sup> Co oime mbosapi mbahe ndopai vaheerā, ahe: Tūpa rese yande yeroyasa, mbahe yande remiaro ivave oime vahe iyavei yande yeaisusa; co imombosapisa rumo aviye catú vahe ité ambuae sui yandeu, ahe yeaisusa.

## 14

### *Yaseca catura Tūpa suindar ñehesa mombehu āgua*

<sup>1</sup> Peseca catu pe yeaisu tupri āgua peico; aheseve avei peipotara mbahecuasa Tūpa Espiritu remimbou. Ichuindar ñehesa mombehu āgua rese catu ité rumo peicora.

<sup>2</sup> Esepia, acoi ava oñehe vahe ñehesa ndayaicuai vahe pipe, Tūpa upe ité evocoyase oñehe; ndahei ava upe tēi oñehe. Esepia, ndipoi eté ava iñehe renducupar. Ahe rumo oñehe mbahe ndicuasai vahe rese oespíritu pipe.

<sup>3</sup> Acoi ava omombehu vahe rumo Tūpa suindar ñehesa yasenducua vahe pipe, ahe oipitivi ambuae ava Tūpa rese iyeroya āgua, oporomonguerēhi catu, oporombovaha catu avei.

<sup>4</sup> Acoi ava oñehe vahe rumo ñehesa ndayaicuai vahe pipe, ahe ae tēi vireco catu Tūpa rese opihañemoñetasa. Acoi ava omombehu vahe rumo Tūpa suindar ñehesa icuapri ité, ahe ombopihañemoñetá catu Tūpa rese Cristo reroyasar yuvirecoi vahe.

<sup>5</sup> Yepe aipotara opacatu pe ñehe āgua ñehesa ndayaicuai vahe pipe pēu viña, aviye catu rumo pemombehura Tūpa suindar ñehesa icuapri vahe peico. Esepia, ahe aviye catu ñehesa ndayaicuai vahe sui. Oimese rumo ava ñehesa ndayaicuai vahe renducua uca tupri āgua, ahese aviyeño oñehe Jesús reroyasar rovaque. Ipipe sui ipihañemoñeta catura Tūpa rese yuvireco.

<sup>6</sup> Sese, che rivireta, asose pe repia, añehese co ñehesa ndayaicuai vahe pipe pēu, ndapesenducuai chira che ñehe viña. Amombehuse rumo Tūpa oicua uca vahe cheu que mbahecuasa supi tupri vahe resendar, anise que ñehesa Tūpa suindar, anise que ambuae porombohesa, ahese pesenducua viña.

<sup>7</sup> Mbahe yande remimombehu rumo inungar acoi mbahe porasei recasar imoñehepri viña, inungar mimbi, arpa avei. Esepia, ndoyoya tupriise iñehegüer yuvireco, ndayasenducuai eté evocoyase mbahe-mbahe sapucaisa osāha yuvireco.

<sup>8</sup> Anise co inungar mimbi nomoñehe tupriise vavasave nara yuvireco viña, ndipoi chiera que ava oyemoingatu voi vaheerā ovava āgua viña.

<sup>9</sup> Ëgüe peye avei niha peico peñehese ava upe ñehesa ndayasenducuai vahe pipe, ahe evocoyase osenduño tēi, ndosenducuai eté rumo pe ñehe yuvireco. ¡Evocoyase peñeheño tēi eté!

<sup>10</sup> Supi eté, setá iteanga co ivi pipe oime ambuae-ae tēi ava ñehesa. Oime avei rumo ava osenducua vahe aipo nungar ñehesa.

<sup>11</sup> Acoi ndayasenducuaise rumo ambuae ava ñehe, yande evocoyase inungar ambuae tecua pendar tēi yaico vahe chupe; yandeu avei evocoyase ahe ava inungar ambuae tecua pendar tēi yuvirecoi vahe.

<sup>12</sup> Pe niha peipotá ité pereco vaheerã mbahecuasa Tũpa Espĩritu suindar yepi. Sese peporandu catu mbahecuasa Espĩritu suindar rese opacatu Jesũs reroyasar pĩtivĩi ãgua Tũpa rese yuvirecoi tupri catu vaheerã.

<sup>13</sup> Sese acoi ava oñehe vahe ñehesa ndayaicuai vahe pipe, toporandu rane Tũpa upe ambuae ava upe senducua uca tupri ãgua rese.

<sup>14</sup> Esepia, acoi yayeroquiño tẽise Tũpa upe ñehesa ndayasenducuai vahe pipe, yayeroqui yande espĩritu pipe, ndayasenducuai rumo yande yeroqui.

<sup>15</sup> ¿Mara yahera vo evocoyase? Yayeroquiã yande espĩritu pipe, yande aracuasa pipe avei. Yasapucaira yande espĩritu pipe, yande aracuasa pipe avei no.

<sup>16</sup> Esepia, acoi Tũpa upe, “Aviye ndeu” yahese yande espĩritu pipe güeraño, evocoyase ava ndosenducuai vahe, oyemboyase yande rese iyavei osenduse yande yeroquiã, “Aviye ité” ndehi chietera yuvireco. Esepia niha, ahe ndosenducuai eté yande yeroqui yuvireco.

<sup>17</sup> “Aviye ndeu” yande hesa, aviyeteramo aviyera Tũpa upe viña, ambuae ava rumo osenduse, noipitivĩi chietera Tũpa rese imbopihañemoñeta catu ãgua senducuaẽhi pipe.

<sup>18</sup> “Aviye ndeu” ahe Tũpa upe. Esepia, añehe catu ñehesa ndayaicuai vahe pipe opacatu pe sui.

<sup>19</sup> Jesũs reroyasar ñemonuhasave rumo aipota catu amombehu vaheerã moviromi tẽi ñehesa yasenducua vahe ava mbohe ãgua setã ñehesa ndicuasai vahe pipe che ñehe rãgũer sui.

<sup>20</sup> Che rivireta, pepihañemoñeta eme chĩhivahemi pihañemoñeta nungar pipe. Iyacatu rumo peicora cuacua vahe pihañemoñeta nungar pipe. Peyemochihivahe catuñora rumo peico mbahe naporai vahe apoẽhi ãgua.

<sup>21</sup> Porocuita resendar icuachiapri aracahendar pipe aipo ehi: “Añehera co ava yuvirecoi vahe upe ambuae ava ñehe pipe. Iyavei ava ambuae ivi pendar amoñehe ucara iñehe pipe yuvireco chupe. Ahe rumo ndache mboyeroyai chiño itera yuvireco, ehi yande Yar” ehi aracahe.

<sup>22</sup> Evocoyase co ñehesa ndayaicuai vahe pipe oñehese ava Tũpa pĩratasa pipe, ahe Jesũs reroyasarẽhi yuvirecoi vahe upe nara: “¡Peicua catu, co supi tupri vahe!” he ãgua. Ndahei rumo ava Jesũs reroyasar yuvirecoi vahe upendar. Ñehesa Tũpa suindar senducupri yamombehuse rumo, ahe, “Co supi tupri vahe” he ãgua Jesũs reroyasar yuvirecoi vahe upe; ndahei ava seroyasarẽhi yuvirecoi vahe upendar.

<sup>23</sup> Evocoyase, acoi opacatu pe Jesũs reroyasar pe ñemonuhasave oyoya guasu peñehese ñehesa ndayaicuai vahe pipe tẽi, ipare yuviroiquese pe pãhuve Jesũs reroyasarẽhi ndosenducuai vahe Tũpa suindar mbahe yuvireco, “¡Opacatu co ndayaracuai vahe tẽi yuvireco!” ehira yuvireco pẽu.

<sup>24</sup> Opacatu rumo peñehese Tũpa suindar ñehesa yasenducua vahe pipe, yuviroiquese evocoi nungar ava yuviraso pe pãhuve, ahe ae evocoyase, “Supi eté ayavi che recocuer Tũpa rovaque” ehira pe ñehe renduse yuvireco.

<sup>25</sup> Ëgũe ehira opihañemoñeta rai ndoyecuai vahe imboporẽhipa uca oyeupe pe ñehe rendu ramose yuvireco. Ipipe sui omboeteira Tũpa yuvireco. Ahese, “Supi eté catu Tũpa ité pereco peyese” ehira yuvireco pẽu.

### *Yayapora mbahe opacatu yande cuaita rupi ñemonuhasave*

<sup>26</sup> Sese che rivireta, peñemonuhase, oime pe pãhu pendar osapucai pota vahe sapucaisa Tũpa upendar, ambuae evocoyase oipota ité ava mbohe yuvireco, anise ambuae omombehu pota ava upe mbahe oyeupe omboyecua uca vahe Tũpa, ambuae oipota ité oñehe ñehesa ndicuasai vahe pipe, anise ambuae osenducua uca pota avei ambuae ava upe ñehesa ndicuasai vahe. Opacatu rumo co mbahe yayapora ambuae Jesũs reroyasareta seroya catu ãgua yuvireco.

<sup>27</sup> Acoi ava oñehese ñehesa ndayaicuai vahe pipe, toñehhe ñuvirío güeraño yuvireco, anise que mbosapi ñepe-peipe rupi; ñepe evocoyase osenducua ucara iñehhe ava upe oico.

<sup>28</sup> Acoi ndipoise ité rumo ambuae ava ahe ñehesa ndayaicuai vahe renducua uca ãgua, ndiyai ahe oñehera yuvireco pe ñemonuhasave; oyeupeñomi evocoyase ahe oñehera ipipe yuvireco Tūpa upe.

<sup>29</sup> Ēgüe peye tupri aveira pemombehuse Tūpa suindar ñehesa ambuae ava upe, peñehera ñuviriomi, anise mbosapi. Ambuae evocoyase pe pãhu pendar oyapisaca tupri sese yuvireco ‘¿supi eté pãha?’ ohesave.

<sup>30</sup> Que ñepe oñehhe vitesse Tūpa oicua ucasa mbahe ambuae ava upe, topituhuño yipindar oñehhe vahe, ambuae evocoyase toñehhe pëu.

<sup>31</sup> Evocoyase Ēgüe peyera peñehhe ñepe-peipe opacatu ambuae osendu vahe mbohe ãgua iyavei imonguerëhi catu ãgua.

<sup>32</sup> Acoi omombehu vahe ñehesa Tūpa suindar, ahe oicatu oñehhe mombituhu ãgua.

<sup>33-34</sup> Esepia, Tūpa secoi mbahe aviye vahe aposar, ndahei ndoyembohe catui vahe.

Ndiyai cuña upe iñehhe ãgua pe ñemonuhasave. Esepia, Ēgüe ehi avei opacatu ambuae Jesús reroyasar ñemonuhasa rupi yuvireco. Evocoyase ndiyai eté aheve iñehhe ãgua yuvireco chupe. Iyacatu rumo ahe imboyeroyapri yuvirecoira omer upe Tūpa porocuita rupi.

<sup>35</sup> Oicua potase que mbahe, iya omer upe oporandura güetave yuvireco. Esepia, cuña upe ndiyai eté iporandu ãgua mbahe rese pe ñemonuhasave.

<sup>36</sup> Peyapisaca catu co ñehesa rese. Ndahei niha pe rane pemombehu Tūpa Ñehengagüer ava upe peico, ndahei avei pëuñomi ou Tūpa suindar ñehesa.

<sup>37</sup> Acoi que pe pãhuve oimese “che Tūpa Ñehengagüer mombehuse aico” ehiño tēi vahe, anise que “aicua Espíritu suindar mbahe” ehi vahe, iya rumo oicua tupri co aicuachía vahe imondo pëu, ahe yande Yar porocuita resendar.

<sup>38</sup> Ahe ndoyapisaca potaise rumo che ñehhe rese, iñehhe rese evocoyase ndapeyapisacai chira.

<sup>39</sup> Sese, che rivireta, peyemonguerëhi catu Tūpa suindar ñehesa icuapri vahe mombehu ãgua peico. Ndiyai rumo ndapeipotai ambuae ava upe ñehesa ndayaicuai vahe pipe iñehhe ãgua.

<sup>40</sup> Peyapora rumo opacatu mbahe ñepe-peipe pe cuaita rupi mbahe tupri pipe.

## 15

### *Cristo cuerayevi agüer*

<sup>1</sup> Che rivireta, che aipota peyemomahenduha acoi ñehesa pñisirosa resendar pëu mombehu vahecuer rese. Co ñehesa niha peipisi. Ipipe sui avei niha peyemoviracua peyese.

<sup>2</sup> Seroya pipe niha peñepisiro peico peyemoviracuase sese. Ēgüe ndapeyese rumo, peroya tupri tēi.

<sup>3</sup> Acoi ñehesa aipisi vahe, opa uca aicua pëu. Esepia, ahe aviye catu vahe: Cristo omano yande angaipa repirã Tūpa Ñehengagüer icuachiapri rupi eté

<sup>4</sup> iyavei oñoti sehögüer yuvireco. Ipare rumo, imombosapisa ari pipe, ocuerayevi iri icuachiapri rupi eté avei.

<sup>5</sup> Ichui oyemboyecua Pedro upe. Ipare voi oyemboyecua apóstol yuvirecoi vahe upe.

<sup>6</sup> Ichui oyemboyecua quiniento sui setá catu vahe viroyasar upe. Evocoyase oyoya guasu osepia yuvireco. Setá vite rumo sepiasarer yuvirecove vite cūrítei; amove rumo ambuae opa omano yuvireco.

<sup>7</sup> Coiye oyemoporëhi Santiago upe. Ipare opacatu apóstol once yuvirecoi vahe upe.

<sup>8</sup> Cheu avei ipa ité oyemboyecua cute, aviye evocoyase che ipá oha vahe aico seroya ãgua.

<sup>9</sup> Esepia, che seco ivi coti catu vahe opacatu ambuae apóstol sui aico. Iyavei ndacheãroi eté apóstol che reco ãgua viña. Esepia, che yipindar seroyasar aseca-seca catu vahe mara-mara tēi sereco ãgua.

<sup>10</sup> Che rumo apóstol ité aico. Esepia, Tūpa oyapo mbahe aviye vahe ité cheu; che rovasa oico. Evocoyase che recocuer osecuñaro ité sereco. Ichui che aporaviqui catu ité opacatu ambuae apóstol sui. Ndahei rumo cheyesui tēi ěgüe ahe vichico, Tūpa rumo oporovasasa pipe secoi che rupi.

<sup>11</sup> Ndapepihañemoñetai chira rumo acoi oporaviqui catu vahe rese tēi. Co ñehesa Cristo recocuer resendar ore oromombehu vahe rese rumo pepihañemoñeta catura. Esepia niha, ahe peroya vahe ité peico.

### *Ava omano vahe cuerayevisa*

<sup>12</sup> Oromombehu ité niha Cristo cuerayevi agüer resendar pēu. Oime rumo amove pe pãhu pendar, “¿Mahera aipo ocuerayevira omano vahe yuvireco viña?” ehiño yuvireco.

<sup>13</sup> Ndocuerayevise ité rumo ava omano vahe viña, Cristo avei evocoyase ndocuerayevii chietera viña;

<sup>14</sup> iyavei Cristo ndocuerayevise viña, ore secocuer oromombehu vahe evocoyase ěgüe ehi tēi etera viña. Iyavei pe yeroyasa Cristo rese ěgüe ehi tēi aveira viña.

<sup>15</sup> Acoi ěgüe ehise ité rumo viña, ore avei evocoyase oroñehesño tēi etera Tūpa resendar ñehesa rese oroico viña. Esepia, “Tūpa Cristo ombogüerayevi” orohe ité imombehu ava upe oroico. Ndocuerayevise ité rumo omano vahe yuvireco viña, ahese Tūpa nombogüerayevii chiaveira Cristo viña.

<sup>16</sup> ěgüe ehi eté, acoi omano vahe ndocuerayevise yuvireco viña, Cristo avei evocoyase ndocuerayevii chietera viña;

<sup>17</sup> Tūpa rese pe yeroyasa evocoyase ěgüe ehi tēi vahe itera viña; angaipa pipe viteño tēi evocoyase pe recocuer viña.

<sup>18</sup> Iyavei acoi ěgüe ehise ité viña, evocoyase omano vahe Cristo reroyasar, ahe avei ocañi tēira viña.

<sup>19</sup> Ndipoise yasãro vaherã Cristo suindar mbahe yamanose, yande evocoyase imbopapri tēi catu itera yaico opacatu ambuae ava sui yuvireco viña.

<sup>20</sup> Cristo rumo supi eté ocuerayevi omano vahe pãhu sui; ahe rane yipindar ocuerayevi vahe.

<sup>21</sup> Esepia, ñepeï ava rembiapo sui oime manosa yandeu. Evocoyase ñepeï ava rembiapo sui avei yacuerayevira.

<sup>22</sup> Esepia, inungar acoi Adán rembiapo ai sui ava opacatu omano yuvireco, ěgüe ehi aveira Cristo rembiapo sui opacatu ava sese yuvirecoi vahe virecora tecovesa yuvireco.

<sup>23</sup> Ñepeï-peï yandeu imombehusa rupi; yipindar Cristo ocuerayevi, ichui yande seroyasar yaico vahe yacuerayevi aveira sese acoi ahe oyevisse curi.

<sup>24</sup> Ahese oura ari ipa vahe cute. Yipindar rumo Cristo omocañipara opacatu seco pĩrata ěgüe ehi tēi vahe. Ipare omondora opovri pendar Vu Tūpa upe.

<sup>25</sup> Ahe rane ité rumo opacatu oporocuiraira oico acoi Tu opase voi eté omondo opacatu yamotarẽhimbar ipovrive.

<sup>26</sup> Ahese ipa manosa opa itera.

<sup>27</sup> Esepia, Tūpa osecopi opacatu mbahe imondo ipovrive, “Opacatu ité mbahe secopipri” ehise. Ndahei rumo Tu Tūpa avei secoi ipovrive. Esepia, Tu ité opacatu mbahe osecopi imondo ipovrive.

<sup>28</sup> Evocoyase, opase mbahe imondosa ipovrive, ahe ae evocoyase oyemondora Vu Tūpa povrive. Tu evocoyase secoira ivate catu vahe opacatu mbahe sui.

<sup>29</sup> Ndipoise omano vahe cuerayevi ãgua yuvireco viña, ¿mbahe rese pĩha evocoyase omanose ava, amove chupe nara tēi ambuae oñeapiramo uca yuvireco? Esepia, omano

vahe ndocuerayevise yuvireco viña, ¿mahera ru evocoyase ahe ava oñeapiramo uca chupe yuvireco?

<sup>30</sup> Iyavei ore no, ¿mahera ru evocoyase oroyemondora mbahe tēi upe ari rupi viña?

<sup>31</sup> Supi eté, che rivireta, ari yacatu aviye che amano vaheerã opacatu co mbahe tēi sui. Ahe pipeve avei rumo che areco ité che viharetesa pe rese yande Yar Jesucristo rese che recose.

<sup>32</sup> Oime mbia Efeso pendar mbahe tēi eté oyapo yuvireco cheu. Aviye acoi mahembiar oñaro ai vahe rese avava vahe vichico. Acoi omano vahe ndocuerayevise rumo yuvireco viña, evocoyase ichui ndipoi chietera mbahe aviye vahe cheu viña. Sese che ayapoño itera inungar ava aipo ehi vahe yuvireco viña “yacaruño, yaihuño avei. Esepia, ayihive yamanora” ehi vahe.

<sup>33</sup> Peyembopa uca eme evocoi nungar ava upe peico. Supi eté ñehesa aipo ehi vahe: “Ava naporai vahe pirí peicose, ahe evocoyase virovvara pe reco tupri” ehi vahe.

<sup>34</sup> Pepihañemoñeta tupri iri, peyemboangaipa uca iri eme. Esepia, amove pe pãhu pendar oime ndoicuai vahe ité Tũpa yuvireco. Che aipo ahe ité pẽu ‘toyuvinochi che ñehesenduse yuvireco’ viya.

### *Yande retecuer cuerayevisa resendar*

<sup>35</sup> Aviyeteramo pe pãhu pendar oimera oporandu vahe: “¿Mara ehira pãha omano vahe ocuerayevi irise yuvireco coiyé? ¿Mara ehi angahura pãha setecuer ahese yuvireco?” ehira yuvireco oyeupe.

<sup>36</sup> ¡Pe aipo peye-peye tēi peico! Esepia, mbahe rãhi yañotise, ituyu rane ité sorí ãgua.

<sup>37</sup> Yañotise mbahe, sãhi rane ité yañoti; ndahei ihí opacatu reseve yañoti.

<sup>38</sup> Ipare rumo Tũpa omondo ahe mbahe rãhi upe ihiguã güemimbotar rupi, iyavei ambuae mbahe rãhi yacatu omondo ihiguã.

<sup>39</sup> Ndahoyoyai rumo que ñepe mbahe mití hi ambuae mbahe mití hi rese. Ëgüe yahe avei yande yaico vahe ambuae ité yande rete mbahe mimba sui; vïrai rete ambuae ité iyavei pira rete ambuae tēi no.

<sup>40</sup> Ëgüe ehi avei niha, oime íva pendar rete, ivive ava yuvirecoi vahe rete avei no. Iva pendar rete catuprigüer rumo ndahoyoyai eté ivi pipendar rete rese.

<sup>41</sup> Ari rendigüer avei ndahoyoyai yasi rendigüer rese, yasitata rendigüer rese avei. Ñepe yasitata ambuae yasitata rese ndahoyoyai avei sendigüer yuvireco.

<sup>42</sup> Ëgüe ehi aveira niha omano vahe cuerayevisa; yañotise sehögüer, ahe ituyu vaheerã. Ocuerayevise rumo ndituyu iri chietera; apirēhi vaheerã ité secoira.

<sup>43</sup> Tehögüer ñotimbrí nimomburusai vahe; coiyé ocuerayevise rumo, imboetepri ité secoi. Acoi ava rehögüer oñoti vahe yuvireco, nipirata iri eté oico, coiyé ocuerayevise rumo, ipirata itera.

<sup>44</sup> Supi eté, acoi ava rehögüer ñotisa vahe, ahe co ivi pipendar tēi setecuer. Ocuerayevise rumo, setecuer íva pendar secoira. Esepia, oime ité ivi pendar setecuer, oime avei íva pendar setecuer.

<sup>45</sup> Supi eté aipo ehi icuachiapri arachendar pipe: “Yipindar ava Adán serer vahe. Ahe sete upe ombou Tũpa secove ãgua co ivi pipe” ehi. Ichui rumo ambuae ité ipa Adán nungar ou vahe, ahe rumo vireco ité tecovesa íva pendar ava upe imbou ãgua.

<sup>46</sup> Yipindar oime co ivi pipendar tecovesa. Ipare rumo oime co tecovesa íva pendar yandeu.

<sup>47</sup> Ëgüe ehi yipindar ava ivi sui yapopri, ivi rese nara ité icuaita oico; coiyé catu ava ou vahe evocoyase íva pendar.

<sup>48</sup> Inungar yipindar ava ivi suindar, Ëgüe ehi avei opacatu ava ivi suindar tecovesa rereco yuvireco. Iyavei inungar Jesús íva suindar, Ëgüe ehi aveira opacatu íva suindar tecovesa vireco vahe yuvireco.

<sup>49</sup> Iyavei inungar cūrītei Adán nungar tupri yaico; ěgüe yahe aveira yande Jesucristo iva pendar nungar tupri yaico curi.

<sup>50</sup> Che rivireta, co mbahe amombehu potami pēu: acoi ava upe güetecuer reseve, ndiyai eté seique āgua ivave Tūpa mborerecuasave. Esepia, co yande rete ocañi tēi vaherā, ndoipisii chira tecocuer apirēhi vahe.

<sup>51</sup> Iya, peicua co mbahe oyecua ramo vahe: ndahei chira opacatu yamano. Opacatu rumo yande rete aviyeteramo tēi eté secuñarosapara.

<sup>52</sup> Mimbī moñehese voi yande resapihara inungar yande resapiqui vahe, ěgüe ehira secuñarosapa yande rete. Aheseve avei omano vahe ocuerayevipara apirēhi vaherā ité yuvireco; yande evocoyase nayamano vitei vahe, opaño tēira yande rete secuñarosa.

<sup>53</sup> Esepia, co yande rete ocañi tēi vaherā, ahe yande rete niha opara oñecuñaro apirēhi vaherā yuvireco.

<sup>54</sup> ěgüe ehise yandeu, ahese ramo osupitira Tūpa ñehe icuachiapri pipe imombehupri yandeu curi: “Manosa opara imocañisa” ehi vahe.

<sup>55</sup> Iyavei aipo ehi: “Ndayasiquiye iri chira yande mano āgua. Esepia, manosa ndovireco iri chira oyeroyasa oyese inungar acoi cau popiar opa vahe serocuasa ichui” ehi.

<sup>56</sup> Angaipa niha inungar mbahe popiar omoime vahe manosa yandeu. Moisés porocuita aracahendar evocoyase ombou pīratasa angaipa upe angaipa aposar mo-cañi uca āgua.

<sup>57</sup> Che rumo, “¡Aviye ndeu!” ahe Tūpa upe. Esepia, ahe ombou angaipa recopi āgua yandeu yande Yar Jesucristo rembiapo sui.

<sup>58</sup> Sese, che rivireta, peico tupriño ité Cristo rese iyavei peyemoviracua opacatu mbahe tēi upe; peporaviqui catuño yande Yar upendar mbahe rese peico. Esepia, peicua niha yande Yar rese peicose, pe poraviquisa ndahei ěgüe ehi tēi vahe.

## 16

### *Porerecosa Jesús reroyasar pītivii āgua resendar*

<sup>1</sup> Iyavei co guarepochi monuha āgua iparaisu vahe Jesús reroyasar upe nara, pe avei catu peyapo mbahe inungar che amombehu Jesús reroyasar ivi Galacia rupindar upe.

<sup>2</sup> Domingo yacatu iya pe avei peipeha voimi guarepochi peico pe poraviqui repri sui yapocatu āgua. Eipeve che yepotase, ndapeyemañeco iri chira guarepochi monuha āgua rese peico.

<sup>3</sup> Evocoyase acoi ayepotase eipeve vicho, amondora ava pe rembiporavo Jerusalén ve. Che ñehe icuachiapri avei amondora chupe guarepochi pe remimonuha reraso āgua yuvireco ahe pendar yuvirecoi vahe upe.

<sup>4</sup> Aviyeteramo, iyase cheu, che avei asora aheve. Evocoyase ahe yuvirasora che rupi.

### *Pablo ipihañemoñeta oguata āgua rese*

<sup>5</sup> Che sose, asora ivi Macedonia rupi, ipare asora pe repia Corinto ve.

<sup>6</sup> Aviyeteramo apita pucumira pe piri, anise aviyeteramo pe pirive ité mbahe porañehi che mombitañora. Ipare pe che pītiviñomira peye eipeve sui ambuae tecuave che so āgua rese.

<sup>7</sup> Ndaipotai che opoepia raimi tēi eipeve vicho. Yande Yar rumo oipotase, aico pucu itera pe piri.

<sup>8</sup> Che rumo cūrītei apitaño vitera cohove Efeso ve, asepi ranera Pentecostés pieta.

<sup>9</sup> Esepia, oime ité yande Yar upe che poraviquisa aviye vahe ité cohove, yepe setá iteanga ava che amotarēhimbar yuvirecoi viña.

<sup>10</sup> Acoi Timoteo oyepotase oso pe piri, taseco tupriño ité pe pāhuve. Esepia, ahe avei oporaviqui yande Yar upe nara oico che nungar.

<sup>11</sup> Tipo eme ñepeí yepe sepia potaẽhisar yuvireco, iya rumo peipĩtivii catura che piri iyepota tupri ãgua rese. Esepia, che iyavei ambuae Jesús reroyasar rese orosãro ité iyepota ãgua oroico.

<sup>12</sup> Yande rivri Apolos upe, “Eso ambuae Jesús reroyasar piri Corinto ve” ahe tẽi. Cũritei rumo niqerẽhi oso pe repia; iyase chupe, ahese osora pe piri.

*Pablo mahenduhasa ipa vahe*

<sup>13</sup> Pemahemoha peyese; peyemoviracua avei Jesús rese pe yeroyasa pipe. Peñemosañõ catu pe cuaita upe. Peicoveño itera Tũpa pĩratasa pipe.

<sup>14</sup> Opacatu mbahe peyapo pota vahe, peyapora pe poroaisusa pipe ité.

<sup>15</sup> Che rivireta, pe peicua Estefanas opacatu güeta pendar reseve, ahe ranei yipĩndar ivi Acaya rupi viroya vahe ñehesa yande Yar resendar yuvireco. Oyemondo avei ambuae Jesús reroyasar rese hañeco tupri ãgua yuvireco no.

<sup>16</sup> Evocoyase che aipota peyemboyeroyara evocoi nungar ava rese iyavei opacatu ambuae yande Yar upe oporaviqui vahe rese avei.

<sup>17</sup> Pe pãhu pendar Estefanas, Fortunato iyavei Acaico cohava oyepotase che mboviha yuvireco. Esepia, ahe oyapo ité pe ndapeicatu tupri vahe apo yuvireco.

<sup>18</sup> Ahe che monguerẽhi catu yuvireco, ãgüe ehi avei revo pẽu no. Pemboeteira evocoi nungar ava peico.

<sup>19</sup> Jesús reroyasar Asia pendar opacatu ombou omahenduhasa yuvireco pẽu. Aquila, Priscila avei imahenduhá iteanga yuvireco pe rese iyavei opacatu ambuae ava oñemonuha vahe ahe sètave yuvireco, ahe avei ombou omahenduhasa yande Yar rer pipe yuvireco pẽu.

<sup>20</sup> Opacatu Jesús reroyasar coha pendar avei omondo omahenduhasa yuvireco pẽu. Peyeovaupite catu pe reco maranehisa pipe ahe mahenduhasa mombehu peyeupe pe viharetasave.

<sup>21</sup> Che Pablo, che po pipe ité aicuachía co che mahenduhasa imondo pẽu.

<sup>22</sup> Acoi ava ndosaisui vahe yande Yar Jesucristo, ahe tocañi mbahe tẽi pipe. ¡Toyevi pihaivi voi yande Yar ou!

<sup>23</sup> Yande Yar Jesucristo tape rovasa ité yepi.

<sup>24</sup> Pẽu opacatu amondo che poroaisusa opacatu Jesucristo rese yande recosa pipe. Aipo rupive che ñehesa pẽu.



## IMOÑUVIRIOSA PABLO REMBICUACHIA CORINTO PENDAR UPE CORINTIOS

### *Pablo mahenduhasa Jesús reroyasar Corinto pendar upe*

<sup>1</sup> Avirave, opacatu Jesús reroyasareta Corinto pendar peico vahe, pe Tūpa reroyasar ivi Acaya rupindar avei. Che Pablo, Tūpa remimbotar rupi Jesucristo apóstol aico. Aicuachía che ñehe pëu. Co yande rivri Timoteo avei omondo omahenduhasa pëu.

<sup>2</sup> Tapeipisi catu yande Ru Tūpa, yande Yar Jesucristo porovasasa avei pe reco tupri ãgua.

### *Pablo paraisu agüer resendar*

<sup>3</sup> Yamboeteiño itera yande Ru Tūpa. Ahe niha yande Yar Jesucristo Ru secoi, ahe yande paraisuereco vahe iyavei ombou vahe yande mbovaha ãgua yepi.

<sup>4</sup> Ahe niha yande mbovahaño opacatu yande paraisu pipe, yande avei evocoyase yaicatura ava iparaisu vahe mbovaha ãgua yuvireco. Ëgüe ehi eté Tūpa imbou vihasa yandeu, ahe avei yande yamondora yuvireco chupe.

<sup>5</sup> Esepia, inungar Cristo imombaraisupri secoi, Ëgüe yahe aveira imombaraisupri yaico yaicose sese. Cristo sui avei rumo oime itera vihasa yandeu.

<sup>6</sup> Ore paraisu pe mbovaha ãgua 'toñepisiro yuvireco' ore yapave. Iyavei Tūpa ore mbovaha pe mbovaha ãgua avei. Supi evocoyase pe peñemosañora mbegüe rupi ore paraisu agüer nungar tupri pe recose.

<sup>7</sup> Ore oroyeroya ité Tūpa pe pítivi ãgua rese. Esepia, oroicua ore paraisu agüer nungar tupri peico, Ëgüe peye avei peipisi ore vihasa Tūpa suindar.

<sup>8</sup> Che rivireta, opomomahenduha pota mara orohe oroico ivi Asia rupi. Ore recoãhasa yavai vahe ité oime aheve oreu. Ndroicatu iri eté oroñemosa ore pĩrataẽhise chupe, seni orepahañemoñeta: "Yamanoño itera co mbahe-mbahe tẽi pipe" orohe viña.

<sup>9</sup> Supi eté oromoha ore cañi tẽi ãgua viña, Ëgüe ehi rumo oreu oroyeroya catu ãgua Tūpa rese, ndahei oreyses tẽi. Esepia, ahe oporombogüerayevi vahe secoi.

<sup>10</sup> Ahe niha ore repi ore mano rãgüer sui, ore repi aveira curi evocoi nungar mbahe tẽi sui. Supi eté oroyeroya viteño ité sese. Ahe ité niha ore repi viteño itera mbahe-mbahe tẽi sui,

<sup>11</sup> pe ore pítiviise peye pe yeroqui pipe. Ahese setá, "Aviye ndeu" ehira yuvireco Tūpa oporopítiviisa ombou vahe rese oreu setá yeroquisa sui.

### *Mbahe sui Pablo ndosoi Corinto ve*

<sup>12</sup> Oime mbahe ore mboviharete vahe: ore piha pipe ité oroicua oroico tupri Tūpa suindar ore reco catupriisa pipe, ore pihañemoñeta tupriisa pipe avei co ivi pipendar ava rembiepiave, pe rembiepiave avei eté. Tūpa porovasasa pipe niha Ëgüe orohe, ndahei ava co ivi pipendar mbahecuasa pipe tẽi.

<sup>13-14</sup> Esepia, che ñehe aicuachía vahe imondo pëu, aicuachía ñepei reseve pe yeroqui tupri ãgua, pe senducua tupri ãgua avei no. Iyavei ore cua revo chíhi peye cute. Acoi yande Yar Jesús yevise curi, ahese peyembovihara ore rese, inungar ore oroyembovihara pe rese.

<sup>15-16</sup> Sese yipindar supi eté che pihañemoñeta aso vahe rã ñuvirío yupagüer pe repia, pe mbovaha catu ãgua viña. Ëgüe ahe ité, che pihañemoñeta pe piri rane che so ãgua che guatasa rupi Macedonia ve. Ichui ayevi pota iri pe piri viña, ipare pe che pítivimira peye ivi Judea rupi che so ãgua rese viña.

<sup>17</sup> Ndachepihañemoñeta voiño tēi che so ãgua, ndahei iporombopa serai vahe aico “che co mbahe ayapora” ehi tēi vahe, ipare rumo nomboaviyei eté.

<sup>18</sup> Tūpa rumo oicua ore ndahei, “Aviye” ore he voisa pēu, ahe pīpeve avei, “Aní” ore hesa.

<sup>19</sup> Esepia, Tūpa Rahir Jesucristo avei ñepeí reseve vahe ité yayeroyá vahe sese. Ahe secocuer niha oromombehu oroico pēu, che, Silvano, Timoteo avei.

<sup>20</sup> Esepia, opacatu Tūpa remimombehugüer imboaviyesa sese. Sese niha serer pīpe, “Ēgüe tehi” yahe Tūpa upe imboeteisave.

<sup>21</sup> Tūpa niha opacatu yande momirata seseño ité yande reco ãgua, yande poravo avei.

<sup>22</sup> Güerer omondo yande rese ‘cheu nara’ oyapave. Ombou avei oEspíritu yande pīha pīpe ‘ipīpe toicua che remimombehugüer rupi tupri ité mbahe amondora chupe yuvireco curi’ oyapave.

<sup>23</sup> Tūpa niha oicua acoi ndayeviise Corinto ve pe piri, ěgüe ahe pēu mbahe aviye ãgua rese.

<sup>24</sup> Ndahei opocuai pota mbahe pe rembieroyarã rese. Esepia, pe Tūpa rese pe yeroyasa pīpe peyemoviracuaño ité Cristo rese. Ore rumo oroipota pe pītivīisa pe yemboviha ãgua.

## 2

<sup>1-2</sup> Co rese ndaso catu iri pe piri. Esepia, che aso irise pe piri ndopomboviha catui chira viña, ¿ava vo evocoyase che mbovihara viña? Pe ité niha che mbovihasar peico.

<sup>3</sup> Sese che aicuachía ñehesa ipīrata vahe pēu cuese. Esepia, ndaipotai eipeve che sose, che mbovihaēhi ãgua peye. Pe rumo iya ité che mboviha catura peye viña. Che ayeroya ité opacatu pe rese aviharetese, pe avei evocoyase opacatu peviharetera che rese.

<sup>4</sup> Supi eté che aicuachiasa che ñeha pēu, che ae ayepihamboasi ité, ayaseho avei. Esepia, aicuachía vahe pēu ndahei pe mbovihaēhi ãgua, che rumo aicuachía ‘toicua che guaisu eteprisa yuvireco’ che yapave pēu.

### *Oime ñerosa ava upe mbahe sembiavi rese*

<sup>5</sup> Acoi yande rivri omoime uca vahe viharēhisa co mbahe tēi apo pīpe, ndahei che güeraño ndache mbovihai, pe avei rumo seni opacatu ěgüe peye. Che, “Seni” aipo ahe ité pēu. Esepia, ndaipotai che ñeha rasi ãgua.

<sup>6</sup> Co mbia upe setá mbahe peiporara uca ité, evocoi rupive iya ěgüe peye chupe.

<sup>7</sup> Co suive ité rumo peñerora chupe, peipītivī aveira. Esepia, aviyeteramo oviharēhisa pīpe oyemocañi tēira.

<sup>8</sup> Sese cūritei opomonguerēhi ité pe mboyecua iri ãgua pe poroaisusa chupe.

<sup>9</sup> Cuese ambuae che ñeha aicuachía co che pe mbohesa resendar pēu pe recoãha ãgua, “¿Oyapo itera pīha che remimombehu yuvireco?” ahe pēu.

<sup>10</sup> Cūritei cheñero avei que ava upe peñero vahecuer upe. Esepia, oimese que mbahe rese che ñero ãgua, Cristo rovaque ěgüe ahe pe raisusave

<sup>11</sup> Carugar yande mbopaēhi ãgua. Esepia, yande yaicua tupri ité iporombopasa.

### *Tecua Troas ve Pablo nombohe catui opihañemoñetasa*

<sup>12</sup> Ayepotase tecua Troas ve Cristo recocuer mombehu ãgua, oime ité yande Yar upe nara aheve che poraviqui ãgua viña.

<sup>13</sup> Nambohe catui rumo che pīhañemoñetasa. Esepia, ndasepiai eté yande rivri Tito. Sese, che, “Aviye” ahe pare ava Troas pendar upe, asoño ivi Macedonia rupi.

### *Cristo rese yaicose, yaicatu mbahe tēi recopi*

<sup>14</sup> Aviye yande Ru Tūpa upe. Esepia, yande Cristo rese yaico vahe yande renose oamotarēhimbar povri sui opacatu ava rembiepiave iyavei yande recocuer sui opacatu ava upe oicua uca güecocuer inungar mbahe siacua vahe yasētu vahe opacatu rupi.

<sup>15</sup> Esepia, inungar itaisi sñacua vahe opacatu rupi, ěgüe yahe avei yande Tũpa upe Cristo yande reropovĕhese yaico ava ipĩsiropirã upe, ava ocañi tĕi vahe rã upe avei.

<sup>16</sup> Ahe ava ocañi tĕi vahe rã upe evocoi ñehesa yaru vahe inungar cañi tĕisa resendar; ava ipĩsiropirã yuvirecoi vahe upe rumo evocoi ñehesa ombou tecovesa. Yande ae tĕi rumo ndayaicatui evocoi nungar mbahe apo.

<sup>17</sup> Ore rumo ndahei setã ambuae ava nungar tĕi oroico. Esepia, oromombehuse Tũpa Ñehengagüer, ndahei mbahe pisi ãgua tĕi rese ěgüe orohe, ore rumo ore pihãñemoñeta tupriisa pipe oromombehu co ñehesa Tũpa rovaque Cristo rese ore recosa pipe. Esepia niha, ore semimondo oroico.

### 3

#### *Ñehesa Tũpa remimbotar ipiasu vahe resendar*

<sup>1</sup> Ore aipo orohese, aviyeteramo pĕu ndoyavii oroyecomboivate ai pota iri viña, ěgüe ndorohei rumo iyavei ndorosecai icuachia ãgua ava ñehesa aviye vahe ore recocuer resendar oromondo vahe rã pĕu. Ndorosecai avei aipo nungar cuachiar pe suindar, inungar co ambuae oyapo vahe yuvireco yepi.

<sup>2</sup> Esepia, pe ité inungar ore rembicuachia ore recocuer resendar ore oroipota vahe, ěgüe peye peico ore pihã pipe. Esepia, opacatu ava pe reco tupri repiase, oicua ore poraviqui tupriisa pe pãhuve yuvireco.

<sup>3</sup> Pe niha pemboyecua pe reco tupri pipe ore rembiapo Cristo porocuita pipe pe pãhuve. Sese pe inungar Cristo rembicuachia aviye vahe oromondo vahe ava upe, ahe rumo ndahei tinta pipe ité icuachiapri itape rese, Espiritu Tũpa oicove vahe suindar pipe rumo yapopri ava pihã pipe.

<sup>4</sup> Oroyeroya ité co rese Tũpa rese ore yeroyasa pipe. Cristo niha ěgüe ehi oreu.

<sup>5</sup> Ndahei oreyesui tĕi oroicatu co mbahe apo. Tũpa rumo ombou oreu opacatu co mbahe apo ãgua.

<sup>6</sup> Ahe niha ombou opĩratasa oreu güemimbotar ipiasu vahe rese poraviqui ãgua, ndahei Moisés rembicuachiagüer rupi oroporaviqui. Esepia, ahe imboaviyeñehisa pipe yamano tĕira viña. Ahe rumo Espiritu Tũpa suindar pipe oroporaviqui. Esepia, ahe ombou tecovesa yandeu.

<sup>7</sup> Co Moisés recosendar porocuita icuachiasa ité itape rese, iyavei Tũpa reco porañetesa pipe ou. Israelita evocoyase Moisés rova rese nomahe catui eté yuvireco. Esepia, sendí iteanga, yepe sendigüer ogüe mbegüeño oso viña. Ahe Moisés recosendar porocuita ava upe manosa tĕi güeru vahe iporañete ai eté yipindar oico viña.

<sup>8</sup> ¡Cũritei rumo iporañeté catu ité ñehesa Tũpa remimbotar ipiasu vahe resendar Espiritu Santo ombou vahe yandeu!

<sup>9</sup> Supi eté yepe iporañete ai eté Moisés porocuita acoi güeru vahe manosa yandeu viña, ¡co ñehesa ipiasu vahe rumo yande reco moingatu vahe iporañete catu ité ichui!

<sup>10</sup> Esepia, co yipindar porañete vahe ndahoyoyai ñehesa cũriteindar porañete catu vahe rese.

<sup>11</sup> Acoi mborocuita yipindar ndipocopimi vahe virecose Tũpa reco porañetesa, co ñehesa piasu ipocopi vahe rumo iporañete catu itera ichui.

<sup>12</sup> Ore oroyeroya ité co ñehesa ipocopi vahe rese. Sese oroñehe ava upe ore siquiyeñehisa pipe ité.

<sup>13</sup> Ore rumo ndahei Moisés nungar oroico. Esepia, ahe oyovapi turucuar pipe omu israelita sui güepiañehi ãgua ndogüe viteise sendigüer ichui aracahe.

<sup>14</sup> ěgüe ehi ahe ndosenducua ucai eté ndoyavii sovapisa vite vahe cũritei, ěgüe ehi vite oyerokise Moisés porocuita icuachiapri yipindar vahe pipe yuvireco. Nomipri

vahe nungar tēi chupe ahe senducuaēhi pipe. Esepia, Cristo güeraño ité oicatu sovapisa nungar rerocua ichui senducua uca āgua chupe.

<sup>15</sup> Ēgüe ehi vite cūrítei, senducuaēhi pipe Moisés porocuaíta pipe oyerocuvi viteño tēi eté yuvireco inungar sovapisa vite vahe.

<sup>16</sup> Supi eté que ava oveyise yande Yar upe, ahese ramo serocuasa sovapisa nungar ichui senducua tupri āgua.

<sup>17</sup> Esepia niha, yande Yar Espíritu secoi. Ahe Espíritu ava rese secoise, ndahe iri mbuguai nungar yuvirecoi.

<sup>18</sup> Sese opacatu yande ndahei Moisés oyeovapi vahe nungar yaico Tūpa porañetesa sendiyai vahe repiaēhi āgua. Yande rumo inungar yepiasa yamboyecua ité yande Yar porañetesa sendiyai vahe ava upe yaico. Yaico catuño ité yande Yar Cristo nungar ari yacatu rupi yepi. Esepia, ēgüe yahese, yareco catu-catu iri seco porañetesa yandeyese. Yande Yar rumo acoi Espíritu secoi vahe ēgüe ehi yandeu.

## 4

<sup>1</sup> Sese, “Ndorequerēhi iri” ndorohei eté. Esepia, Tūpa ore poravo ore paraísuerecosa pipe ore poraviquí āgua co ñehesa rese.

<sup>2</sup> Ore rumo oroseyapa opacatu mbahe tēi ore chī aisa, ndoromboyecuai vahe avei ore piha pipe sui; ndoroporombopa-mbopa tēi iyavei Tūpa Ñehengagüer ndorosecuñaro-ñaro tēi. Ore rumo oroñehe tupri mbahe supi tupri vahe rese güeraño. Ēgüe orohe opacatu ava upe Tūpa rovai ‘Supi eté, tehi yuvireco opiha pipe’ ore yapave.

<sup>3</sup> Yavaise co ñehesa písirosa resendar ore remimombehu renducua āgua, ahe ēgüe ehi ava ocañi tēi vaherā upe. Ahe aviye oyeovapi vite vahe.

<sup>4</sup> Esepia, supi eté caruguar rerecuar inungar nomboesapiso vahe ahe ava yuvireco, sese ndosenducua ucai chupe ‘toviroya eme ñehesa Poropísirosar Cristo resendar porañete vahe’ oyapave. Ahe niha Tūpa recocuer mboyecuar secoi.

<sup>5</sup> Esepia, oromombehuse ñehesa pēu, ndahei oreyese tēi. Ore rumo, “Jesucristo yande Yar secoi” orohe oroico. Ore evocoyase mbuguai nungar tēi oroico pēu Jesús raisupave.

<sup>6</sup> Esepia, Tūpa aipo ehi aracahe: “Toime tesapesa pītumimbi vahe resape āgua” ehi. Ahe avei osesape uca yande piha pipe ‘ipipe toicua che porañetesa che Rahir Cristo recocuer rese oime vahe yuvireco’ oya.

### *Yaicora Cristo rese yande yeroyasa pipe ité*

<sup>7</sup> Co tesapesa nungar porañete vahe Tūpa suindar rumo yareco yande retecuer pipe, inungar-ra que mbahe sepirusu vahe yapocatupri ivi mbahemoinda ndipocopi vahe pipe tēi viña. Ipipe toicua opacatu ava yuvireco co pīratasa Tūpa suindar, ndahei oreyesuindar tēi.

<sup>8</sup> Yepe mbahe-mbahe tēi oime opacatu rupi oreu viña, oimeño ité rumo ore sē āgua ichui. Yepe orepihañemoñeta-ñeta tēi mbahe rese, yande Yar rese ore pihañemoñetasa rumo ndoromocañi eté oreyesui.

<sup>9</sup> Yepe ore reca-reca catu tēi ore amotarēhimbar yuvireco viña, Tūpa rumo ndore reyai eté; iyavei yepe ore reiti ore recopi āgua yuvireco viña, aní eté rumo.

<sup>10</sup> Opacatu ore guatasa rupi rumo orovirecoño ité Jesús mara-mara tēi sereco agüer ore mano āgua oreyese, “Toyecua avei secocuer ore rese” ore hesave.

<sup>11</sup> Esepia, ore recove viteseve imboguaipri oroico ore mano āgua Jesús rese. Ēgüe orohe secocuer mboyecua āgua ore retecuer ndipocopi vahe rese.

<sup>12</sup> Evocoyase co ñehesa mombehu pipe ore manosa ore ropeña, ipipe sui rumo pesopeña tecovesa apirēhi vahe peico seroyasa pipe.

<sup>13</sup> Icuachiapri aracahendar pipe niha aipo ehi: “Ayeroya ité Tūpa rese, ipipe sui añehe” ehi; ēgüe orohe avei ore, sese oroyeroya ité, ichui oroñehe.

<sup>14</sup> Esepia, yaicua niha acoi Tūpa yande Yar Jesús ombogüerayevi vahe, yande mbogüerayevi aveira supive. Ipare oyoya guasu pe reseve oyeipive yande rerecora.

<sup>15</sup> Co opacatu mbahe tēi oime vahe oreu, pēu mbahe aviye āgua rese niha ‘tovireco catu Tūpa porovasasa yuvireco; ipipe sui, Aviye ndeu, tehi setá catu ava imboetisave yuvireco chupe’ ore yapave.

<sup>16</sup> Sese orequerēhiño ité mbahe apo oroico pēu. Yepe ore rete ocañi pota tēi viña, ore recocuer rumo Tūpa ombopiasu-asuño ité ari yacatu rupi.

<sup>17</sup> Esepia, co mbahe oroiporara vahe co ivi pipe, ahe ēgüe ehi raimi tēi vahe, ipare rumo opañora; ahe ichui rumo oimera mbahe tupri ivate catu vahe oreu ivave apirēhi orovireco vahehã.

<sup>18</sup> Sese ore ndorepahañemoñeta atii chira co ivi pipendar mbahe rese; ore rumo orepahañemoñeta mbahe iva pendar ndayasepiai vahe rese. Esepia, co mbahe yasepia vahe, ahe ēgüe ehi raimi tēi vahe; co mbahe rumo ndayasepiai vahe, apirēhi vahehã ité.

## 5

<sup>1</sup> Yaicua niha yande retecuer ndipocopii vahe, inungar oi ndipocopii vahe avei. Sese imocañisase, aviyeño. Esepia, Tūpa opa omoingatu ambuae yande rete ndopai vahe ivave yandeu. Ndahei ahe ava rembiapo tēi.

<sup>2</sup> Supi eté yaicove vitesese co yande rete ndipocopii vahe rese, yande poāsesa pipe yaipota ité yande rete iva pendar.

<sup>3</sup> Aheve yande rete ipiasu vahe yarecose, ahese ndahei chira yande hã nani tupri vahe nungar yuvirecoira.

<sup>4</sup> Ēgüe ehi eté yande retecuer pipe vite yaicose, yande poāse yande viharēhisa pipe. Esepia, ndayaipotai yande hã nani tupri vahe nungar seco āgua, yande rumo yaipota yande retecuer ipiasu vahe, ndopai vahe. Evocoyase, “Tocañipa co mbahe ocañi tēi vahehã yande resendar tecovesa piasu, ndopai vahe rereco āgua” yahe.

<sup>5</sup> Tūpa niha yande apo ‘na tehi yuvireco’ oyapave, ombou avei oEspíritu Santo yandeu ‘ipipe toicua opacatu yuvireco che amondo aveira co opacatu tecocuer ipiasu vahe chupe’ oya.

<sup>6</sup> Sese niha yayeroyaño ité yepi; iyavei yaicuaño yande yaicove vitesese yande rete rese, ndayaico vitei eté ivave yande Yar piri.

<sup>7</sup> Esepia, cūritei yande Yar rese yeroyasa pipe ité yaguata, ndahei mbahe yande rembiepia pipe.

<sup>8</sup> Yande rumo yayeroyaño ité sese, iyavei yaipota ité yande retecuer reya āgua yande Yar piri yande so āgua ivave.

<sup>9</sup> Sese yaseca yande Yar mboviha āgua yepi, que yaicove vitesese yande rete rese, anise que yasēse ichui.

<sup>10</sup> Esepia, yande opacatu yañecuavēhera Cristo rovai iporandusave yaipisi vahehã ñepeipei mbahe yande rembiapocuer rupi mbahe aviye vahe, anise que mbahe naporai vahe yande rete rese yaico vitesese.

### *Ñehesa yande reco moingatusa resendar*

<sup>11</sup> Ore niha oroicua yande Yar sui ore siquiye āgua imboyeroyasave. Sese orosãha ava pahañemoñeta rerova Tūpa rese ipahañemoñeta āgua yuvireco. Tūpa niha ore cua tupri, tapeicua avei ru ore recocuer.

<sup>12</sup> Ndoronehei pēu ore yemboivate ai āgua tēi. Ore rumo oroñehe pēu ‘toviharete catu ore rese yuvireco’ ore yapave. Ipipe sui peicatura ava güembiepia rese tēi oyemboivate ai vahe upe iñehe mboyeve āgua. Esepia, ahe ndahei ava piha pipendar rese oyemboviha yuvireco.

<sup>13</sup> Ndayaracuai vahe nungar ore rerecose amove pe pãhu pendar yuvireco. Tũpa upe rumo ěgũe orohe oroico. Yaracua vahe nungar rumo, ore rerecose peye, pẽu mbahe aviye ģgua rese ěgũe orohe.

<sup>14</sup> Cristo poroaisusa, ahe ité ore reroguata catu. Esepia, supi eté ahe omano opacatu ava repirã, ipipe sui yaicua opacatu ava ocañi tẽi vahe rã yuvireco viña.

<sup>15</sup> Cristo niha omano opacatu yande repirã. Yande yaicove vite vahe evocoyase ndahe iri yandeyeupe nara tẽi yaico; yande rumo yaico chupe nara ité. Esepia, ahe omano, ocuerayevi yande rese.

<sup>16</sup> Sese, iya ité oreu ore pihañemoñetaẽhi iri ģgua que ava rese, ava tẽi pihañemoñetasa rupi. Yepe yipindar inungar ava ivi pipendar tẽi ěgũe orohe ore Cristo rese ore pihañemoñeta oroico viña, cũritei rumo ěgũe ndorohe iri orepihãñemoñeta sese.

<sup>17</sup> Evocoyase acoi ava Cristo rese ité secoi vahe, ahe secocuer ipiasu vahe ité; ndipo iri eté secocuerai yipindar vahe sese. Opacatu ité oyembopiasu iri.

<sup>18</sup> Co mbahe opacatu Tũpa oyapo yandeu, ahe niha Cristo rembiapo sui yande recocuer moingatu oyeupe nara. Ipare oreu avei ombou co ñehesa mombehu ģgua ambuae ava upe secocuer moingatu ģgua avei.

<sup>19</sup> Aipo oyapave aipo ehi: Tũpa ombou Guahir Cristo co ivi pipe ava recocuer moingatu ģgua ‘toyevi cheu’ oya; ipipe sui avei ahe ava angaipagũer omocañi yuvireco ichui. Ore evocoyase ore cuai ahe ñehesa ava recocuer moingatusa resendar mombehu ģgua ava upe.

<sup>20</sup> Ore evocoyase Cristo porocuaita rupi oroñehe vahe oroico, inungar Tũpa ité oñehera pẽu viña. Sese, “Peyevi Tũpa upe, ahe pe recocuer moingatura oyeupe nara” orohe Cristo rer pipe pẽu.

<sup>21</sup> Yepe Cristo ndoyapoi eté angaipa, Tũpa rumo vireco uca angaipa viyar nungar yande repirã yande reco ivi ģgua Cristo rupi yande guatase.

## 6

<sup>1</sup> Ore pe mboetasa co Tũpa upendar mboraviqui resendar ore recosa pipe: “Peicua catu, pemocañi tẽi rene Tũpa porovasasa peipisi vahe” orohe pẽu.

<sup>2</sup> Esepia, Tũpa aipo ehi icuachiapri aracahendar pipe: “Acoi ari aviye vahe pipe niha che asendu pe yeruresa; iyavei ahe ari poropĩsirosa pipe opopĩtĩvi” ehi.

¡Ahe ari oyepota cute! iyavei oime ité cũritei ñepĩsirosa.

<sup>3</sup> Ore niha ndoromboyecuai ore reco ai ava pãhuve. Esepia, ndoroipotai que ava Tũpa upe ore poraviquisa rese iñehe rai ģgua yuvireco.

<sup>4</sup> Ore rumo oromboyecua ité Tũpa rembiguai ore recosa. Esepia, ore reco mbegũesa pipe oroñemosañi mbahe-mbahe tẽi upe yepe ipane mbahe oreu viña, iyavei mbahe yavaise;

<sup>5</sup> ěgũe orohe avei ore nupa-nupase, ore roquendase avei iyavei omonguerẽhise ava rehii ore amotarẽhi ģgua yuvireco. Oroyapo avei mboraviqui ipĩrata vahe; amove ndoroquei eté, setá rupi ndoreriepoi tẽi avei.

<sup>6</sup> Oromboyecua avei ore reco maranehisa, ore mbahecuasa supi eté vahe, ore reco mbegũe tupriisa, yeaisusa orovireco avei no. ěgũe orohe ité niha Espĩritu Santo pĩratasa pipe, ore poroaisusa supi eté vahe pipe avei.

<sup>7</sup> Ore remimombehu supi eté vahe pipe iyavei Tũpa pĩratasa pipe avei oroico. Ore niha ore reco tupri pipe orosecopi mbahe-mbahe tẽi. Ipipe avei oroyoepi.

<sup>8</sup> Amove ava ore mboetei ai, amove rumo oñemoiro yuvireco oreu; amove avei oñehe tupri ai ore rese yuvireco, ipare rumo iñehe-ñehe tẽi ore rese yuvireco yepi no. Iyavei amove oporombopa tẽi vahe nungar ore rereco yuvireco, yepe oromombehu tẽi mbahe supi eté vahe viña.

<sup>9</sup> Amove ndicuasai vahe nungar tēi ore rereco yuvireco, icuapri ité tie oroico viña; amove ore yuca seni yuvireco, orocoveño ité rumo; iyavei amove ore mombaraisusa catu tēi, ndore yucaí eté rumo ipipe yuvireco.

<sup>10</sup> Amove ndoyavii ndorovihaí vahe yuvireco chupe, ore rumo orovihaño ité yepi; iyavei yepe ndoyavii iparaisu vahe oroico viña, ore rumo oromondo catuño ité mbahe aviye vahe ava eta upe. Yepe ndoyavii ndorovirecoi eté mbahe viña, opacatuño ité rumo mbahe aviye vahe Tūpa suindar oime oreu.

<sup>11</sup> Che rivieta Corinto pendar, ore ñehesa pipe opacatu mbahe oromboyecua pēu iyavei pe raisu āgua orovireco ore piha pipe tuvichá pe rese.

<sup>12</sup> Ndorehāpisii pe rese pe raisu āgua; pe rumo ēgüe ndapeyei ore rese.

<sup>13</sup> Che niha opovireco che rahir nungar; pemboyevi avei catu ore pe raisusa oreu.

### *Tūpa oicove vahe rēta nungar ité yaico*

<sup>14</sup> Ndapeyovaichoi chira ava Tūpa ndoviroyai vahe rese. Esepia, ndoyoyai eté pe pihañemoñetasa. Ēgüe ehi eté teco ñvisa ndoyoyai teco rai rese inungar tesapesa ndoyoyai pītumimbi vahe rese.

<sup>15</sup> Ndahoyoyai eté niha Cristo pihañemoñetasa Carugar pihañemoñetasa rese yuvireco. ¿Oyoya tie Tūpa reroyasar Tūpa reroyasarēhi rese yuvireco? ¡Aní eté!

<sup>16</sup> ¿Oyoya tie mbahe rahanga tēi Tūpa rēta rese? Yande niha Tūpa oicove vahe rēta nungar ité yaico. Ahe ité niha aipo ehi icuachiapri pipe aracahe:

“Che aicovera seseve iyavei aguatarā ipāhu rupi yuvireco; che avei aicora iTūpa ité; ahe evocoyase cheundar yuvirecoira” ehi.

<sup>17</sup> Iyavei aipo ehi:

“ Sese peyepēpi evocoi nungar ava naporai vahe sui; peyemboyai rene que mbahe naporai vahe rese.

Ahese che opopisira.

<sup>18</sup> Che aicora pe yesupa; pe evocoyase peicora che rahir, che rayri avei’ aipo ehi yande Yar güeco pīratasa pipe” ehi.

## 7

<sup>1</sup> Che rivieta, che rembiaisu, co Tūpa remimombehu imboaviyepirā yandeu. Sese yande yamoiingatū tuprira yande recocuer chupe yarecoēhi āgua yande retocuer iyavei yande espíritu mbahe tēi pipe. Iyavei Tūpa mboeteisa pipe yasecara yande reco catupri āgua chupe nara güeraño ité.

### *Corinto pendar ava recocuer recuñarosa resendar*

<sup>2</sup> ¡Che pisi peye pe piha pipe! Ndoroyapoi niha mbahe tēi que ava upe, ndoromomarai eté que ava recocuer, ndoroporombopai avei.

<sup>3</sup> Ndahei pe recocuer rese che ñehē raisave aipo ahe pēu. Supi eté yipindar, “Che pihave ité opoaisu, pēu nara avei aicove, amano aveira pēu” ahe acoi pēu cuese.

<sup>4</sup> Ayeroya ité pe rese, pe rese avei aviharete. Che paraisu pāhuve ayemonguerēhi iyavei ayembovihareteño.

<sup>5</sup> Ore yepotasa suive rumo Macedonia ve, ndopituhui eté mbahe tēi ore sui; oime viteño ité rumo mbahe-mbahe tēi oreu opacatu rupi: oime ore amotarēhimbar iyavei oime ore yepihamondiisa.

<sup>6</sup> Tūpa rumo, ava ndoyemonguerēhi vahe, omonguerēhi iri yepi. Ahe ore monguerēhi catu iri Tito yepotase.

<sup>7</sup> Ndahei rumo Tito yepotaseño oroviharete, ahe avei oyemboviha guasu pe rese. Ahe aipo ehi oreu pe aipo che repia pota ité peye yepi; omombehu avei che rese pe viharēhi agüer cheu, pemahenduhaño ité aipo che rese pe che raisusave yepi. Aipo nungar renduse ayembovihá catu.

<sup>8</sup> Yepe che ñehe aicuachía vahecuer imondo pëu ndape mbovîhai viña, cheu rumo aviyeño cūrîtei. Yipîndar rumo ayepîhamboasi aicuase che ñehe tasí iteanga vahe pëu; chîhi rupi tēi rumo ndapevîhai peyeroqui pare sese.

<sup>9</sup> Cūrîtei che avîhareté. Ndahei rumo pe vîharêhisa rese êgüe ahe. Esepia, co pe vîharêhisa sui pemboasi pe angaipa Tûpa upe pe yevî âgua, evocoi nungar Tûpa oipota. Evocoiyase ore ñehe ndoyapoi mbahe naporai vahe pëu.

<sup>10</sup> Esepia, co nungar vîharêhisa Tûpa oipota vahe yande angaipa mboasi uca, chupe yande yevî âgua. Ipîpe sui niha yañepisîro yande pîhañemoñeta rerovaêhisa pîpe. Co ivî pîpendar tēi vîharêhisa rumo manosa tēi vîreco yandeu.

<sup>11</sup> Pe rumo peñemosañe pe vîharêhisa upe; ahe aviye Tûpa upe. ¡Pesepia ru co mbahe aviye vahe pe recocuer pîpe oime vahe evocoi Tûpa remimbou pe vîharêhisa sui cute! Supi eté rumo, peyapisaca iyavei pe querêhisa pîpe peyoepî, pemboasi pe pîha pîpe ité co mbahe tēi oimese pe pâhuve, iyavei peyembosiquiye peico. Ichui che repia pota ité peye, iyavei pequerêhi ité mbahe moingatu âgua. Sese pemboyepî ité evocoi mbahe tēi aposar peyesui. Che aicua cute pëu ndahei pe pîha rupi co nungar mbahe tēi oimese.

<sup>12</sup> Cuese aicuachiasse evocoi che ñehe imondo pëu, ndahei ava mbahe tēi aposar reseño, ndahei avei mbahe tēi oiporara vahe reseño, che rumo aipota catu peicua pe ore raisusa pereco vahe oreu nara Tûpa rovaque.

<sup>13</sup> Co rese ore oroyembovîharete.

Iyavei orovîha catu Tito yembovîhasa repiase. Esepia, pe avei niha opacatu pembovîha catu ité pe recocuer pîpe.

<sup>14</sup> “Co Corinto pendar ava aviye ité” ahe Tito upe pe mombehu cuese. Che ñehe pe resendar aviye ité, ipîpe nachî eté. Inungar oromombehu mbahe supî tuprî vahe pëu yepî; inungar tuprî avei supî eté mbahe oromombehu vahe pe rese yeroyasave Tito upe.

<sup>15</sup> Iyavei cūrîtei ahe pe raisu catu ité pe rese omahenduhase opacatu pe poreroyasa rese. Iyavei peipîsî tuprî ité imboeteisave sereco.

<sup>16</sup> ¡Ayeroya ité pe rese, sese avîha ité!

## 8

### *Ava querêhisa porerecosa mondo âgua Jerusalén pendar upe*

<sup>1</sup> Che rivîreta, cūrîtei che amombehu potami pëu mara ehi mbahe tuprî apo Tûpa ava viroyasar upe ivî Macedonia rupi.

<sup>2</sup> Yepe ahe ava recocuer yavai eté yuvîreco chupe secoãhasa pîpe viña, ovîhareteño rumo ipîpe yuvîreco; yepe iparaisu vahe pâve tēi, iporerecoño ité rumo yuvîreco.

<sup>3</sup> Supî eté oquerêhisa pîpe omondo ité ocatugüer rupi; amove oseca iri mbahe güemimbotar rupi yuvîreco.

<sup>4</sup> Ahe, “Ore avei catu toroipîtivî ambuae Tûpa reroyasar” ehi yuvîreco.

<sup>5</sup> Ahe rumo oñocua iri ore pîhañemoñetasa yuvîreco. Yande Yar upe rane oyemondo. Ipape Tûpa remimbotar rupi êgüe ehi avei oreu yuvîreco.

<sup>6</sup> Evocoiyase ore aipo orohe Tito upe pëu: “Tomboyepî iri co porerecosa monuha âgua ava upe” orohe. Esepia, yipîndar ahe osose pe pâhuve, ahe pe pîtivî imboipî âgua.

<sup>7</sup> Aicua peyapo tuprî ité opacatu co ambuae mbahe: peyeroya tuprî ité yande Yar rese, pemombehu tuprî ai Tûpa ñehesa, pereco ité Tûpa suindar mbahecua, pequerêhi ité Tûpa upe mbahe apo âgua iyavei ore raisu ité peye. Evocoiyase êgüe peye aveira co nungar poroaisusa apo.

<sup>8</sup> Ndahei pe cuaisa pîpe aipo ahe pëu, che rumo ‘toicua ambuae ava rembiapo oquerêhisa pîpe oyapo vahe yuvîreco’ che yapave. Sese niha peicua, supî eté vahe pîha pe poroaisusa.



<sup>9</sup> Peicua niha pe yande Yar Jesucristo poroaisusa. Yepe ahe mbahe yar secoi viña, opa rumo oseya ombahe pe recocuer rese; iparaisu pipe sui niha pe iva pendar mbahe pereco.

<sup>10</sup> Pëu mbahe aviye ãgua che ãhehe co nungar mbahe rese. Cuese ambuae araviter pe niha yipindar pemboipi co mbahe apo. Ahe niha pe querêhisa pipe peyapo.

<sup>11</sup> Cûritei pemboaviye catu pe porerecosa pe querêhisa yipindar pe reco vahe pipe; pemondoñora mbahe peicatugüer rupi.

<sup>12</sup> Esepia, acoi que ava omondo pota vahe mbahe, Tûpa oipisi ahe iporerecosa que mbahe virecomi vahe; ahe rumo ndoporandui mbahe ndayarecoi vahe rese yandeu.

<sup>13</sup> “Toyemombaraisu ava pîtivîisa pipe yuvireco” ndahei rumo pëu.

<sup>14</sup> Cûritei mbahe pe rembiereco eta pipe peipîtivîi catu ambuae ava ipane vahe mbahe yuvireco chupe. Virecomise mbahe, ahe avei pe pîtivîira yuvireco pëu mbahe ipanese. Evocoyase pe recocuer oyoya tupri itera.

<sup>15</sup> Inungar Tûpa ñehe mombehusar aipo ehi icuachiapri pipe aracahe: “Acoi omonuha ati vahe mbahe, ndasumbîrei eté mbahe chupe; iyavei acoi movîromi têi mbahe omonuha vahe, nipanei mbahe chupe” ehi.

### *Pablo omondo Tito indugüer reseve Corinto ve*

<sup>16</sup> Aviye Tûpa upe ombopihañemoñeta Tito pe rese inungar che pihañemoñetasa pe rese yepi.

<sup>17</sup> Ahe viroya ité che ñehe. Güemimbotar rupi eté rumo iquerêhi oso ãgua pe repia.

<sup>18</sup> Supi oromondo yande rivri, ahe opacatu ambuae Jesús reroyasar oicua iporaviqui tupri aise ñehesa pîsirosa rese yuvireco.

<sup>19</sup> Sese opacatu oiporavo yuvireco ore rupi iguata ãgua ore pîtivîi vaherã avei co porerecosa reraso ãgua. Ore êgüe orohe oroico yande Yar mboetei ãgua rese ‘toicua ore querêhisa pipe ité oroporopîtivîi yuvireco’ ore yapave.

<sup>20</sup> Ore ndoroipotai que ava oñehe têira ore rese yuvireco co porerecosa monuhasa pipe sui.

<sup>21</sup> Esepia, ore oroyapo pota mbahe aviye vahe, ndahei Tûpa rovaque güeraño, opacatu ava rembiepiave avei.

<sup>22</sup> Supi avei oromondo ambuae yande rivri. Ahe omboyecua ité oreu oquerêhisa opacatu mbahe güembiapo pipe. Ahe cûritei iquerêhi catu ité. Esepia, oyeroya ité pe rese.

<sup>23</sup> Acoi oporanduse que ava Tito rese yuvireco pëu, “Ahe oyoya Pablo rese oporaviqui vahe pe pîtivîi ãgua” peyeñora. Acoi oporanduse avei ambuae yande rivri rese yuvireco pëu, “Ahe ambuae Jesús reroyasareta remimbou Cristo mboeteisar yuvirecoi” peyeño aveira chupe.

<sup>24</sup> Sese, pe recocuer cua ãgua, pemboyecua catu pe poroaisusa supi eté vahe chupe yuvireco. Evocoyase tovîroya ité che ayeroyase iyavei ayembovîhase pe recocuer rese yuvireco.

## 9

### *Porerecosa imonuhapri Jesús reroyasar upe*

<sup>1</sup> Porerecosa imonuhapri Jesús reroyasar upe nara rese rumo nañehe iri pëu.

<sup>2</sup> Esepia, che aicua pequerêhi ité ipîtivîi ãgua. Evocoyase che viharetosa pipe Macedonia iguar Jesús reroyasar upe aipo ahe yepi: “Acaya iguar, ahe oyemoingatu voi eté ambuae Jesús reroyasareta pîtivîi ãgua cuese ambuae araviter suive yuvireco” ahe yuvireco chupe. Evocoyase pequerêhise ité ipîtivîi ãgua, ahese setaño ité oye-monguerêhi yuvireco.

<sup>3</sup> Che rumo amondo co yande rivri yuvireco pëu cûritei ‘êgüe tehi têi eme che ñehesa aviye vahe sesendar yuvireco’ viya pëu. Pe yemoingatu tupri ãgua ité aipo ahe pëu;

<sup>4</sup> aní acoi arasose Macedonia pendar cheyeupi, sembiepiave ndapeyemoingatu vitei chira peico. Ēgüe peyese ore mochi guasu uca tiëtera peye. Esepia, che ayeroya ité pe rese. Pe avei evocoiyase pechîra.

<sup>5</sup> Sese che pîhañemoñeta yipîndar añehe co mbosapi yande rivri upe yuvireco, ahe ranei ore renonde yuviraso ãgua pe pîri pe pîtivii ãgua co porerecosa aviye vahe monuha ãgua rese, acoi cuese pe remimombehugüer rupi. Evocoiyase ahe pe porerecosa pe remimonuha opara pemoingatu tupri ité pe avagüer mboyecua ãgua, ndahei chira rumo pe recatêhisa pipe.

<sup>6</sup> Peyemomahenduha co rese: acoi noñoti atîimi vahe mbahe, chupe moviromi têi avei iha; acoi oñoti atî vahe rumo mbahe, ahe setá catu avei iha chupe.

<sup>7</sup> Ñepepei iya opîhañemoñetasa rupi omondora oporerecosa Tûpa upe yuvireco, ndahei chira opîha vîracuasa pipe têi iyavei ndahei chiaveira ambuae ava ocuai pîratasa pipe têi. Esepia, Tûpa osaisu ava oviharetasa pipe omondo vahe oporerecosa chupe.

<sup>8</sup> Tûpa niha oicatu opacatu mbahe aviye vahe mondo ãgua pëu ari yacatu rupi pereco vahe ã opacatu mbahe ipane vahe pëu iyavei sumbirer pipe opacatu ambuae mbahe aviye vahe rese pe poropîtivii ãgua.

<sup>9</sup> Inungar icuachiapri pipe aipo ehi:

“Ahe iporereco ai iparaisu vahe rese yepi. Ahe mbahe aviye vahe sembiapo nocañii chietera” ehi.

<sup>10</sup> Tûpa niha ombou mbahe rãhii ava remitîra, mbahe semihura avei. Sese ombou catura mbahe pëu iyavei ombouvicha catura pe rembiapo aviye vahe ava pîtivii ãgua.

<sup>11</sup> Tûpa ombou catura opacatu mbahe pe rembiarecorã ava upe imondo catu ãgua pe avasa pipe. Ore orovirasose porerecosa pe remimbu yande rivireta upe, ahe evocoiyase, “Aviye ndeu” ehira Tûpa upe yuvireco.

<sup>12</sup> Esepia, co pemondo vahe yande rivireta pîtivii ãgua, ndahei peipîtivii mbahe ipane vahe rese güeraño, ichui avei niha, “Aviye Tûpa upe” ehira yuvireco.

<sup>13</sup> Ahe evocoiyase omboeteira Tûpa yuvireco. Esepia, co pe poropîtiviiisa pipe pemboyecua itera pe Cristo ñehe reroyasa peico. Ahe avei omboeteira Tûpa yuvireco. Esepia, pe pemondoño itera mbahe pe porerecosa chupe iyavei opacatu ambuae ava upe.

<sup>14</sup> Evocoiyase ahe oyerquirã pe rese iyavei pe raisu etepriã yuvireco. Esepia, Tûpa pe pîtivii eté oporovasasa pipe.

<sup>15</sup> ¡Aviye Tûpa upe! ¡Esepia, ahe ombou mbahe tuvichá vahe aviye catu vahe yandeu, ndayaicatui vahe mombehu tupri ãgua!

## 10

### *Pablo cuaita apóstol seco ãgua*

<sup>1</sup> Che Pablo añehe Cristo poroaisusa, seco asiêhisa pipe avei pëu. Amove ava pe pãhu pendar, “Seco mbegüemi têi yande pãhuve oicose, amombri güecose rumo oñehe pîratã iteanga” aipo ehi têi yuvireco cheu viña.

<sup>2</sup> Che rumo asose pe repia, ndaipotai che pîratasa mboyecua ãgua pe pãhu pendar upe. Amove rumo ava pe pãhu pendar ipîhañemoñeta: “Oyapo mbahe co ivi pîpendar pîhañemoñetasa rupi têi” ehi yuvireco cheu. Sese che ayemoingatuño ité evocoi nungar ava upe añehe pîrata vahe ã.

<sup>3</sup> Supi eté, yepe co ivi pipe orocove viña, ore rumo ndoroyapoi mbahe ava co ivi pîpendar rembiapo nungar.

<sup>4</sup> Esepia, ore yoepisa ndahei ava co ivi pîpendar yoepisa nungar; orovireco rumo Tûpa pîratasa mbahe têi seco pîrata vahe recopi ãgua ava aracuasa têi recopi ãgua avei.

<sup>5</sup> Ahe ipipe ore opa orosecopi yepoepi-episa iyavei opacatu semira-mira tēi vahe güeco ivate aisa pipe ndoicua uca potai vahe Tūpa recocuer ava upe. Iyavei opacatu ava pihañemoñeta raisa orosecopi Cristo reroya tupri ãgua yuvireco.

<sup>6</sup> Iyavei ore oroyemoingatu ité opacatu ndiporeroyai vahe recocuer reroyi ãgua. Pe rane rumo peroya tupri.

<sup>7</sup> Pe rumo pemaheño tēi ahe ava recocuer rese. Acoi ava pe pãhu pendar oicua vahe Cristo rese güecosa, toicua tupri avei ore Cristo rese ore recosa yuvireco.

<sup>8</sup> Yepe ayecomboivate che mborerecuasa rese pēu viña, ipipe rumo nachi eté. Esepia, yande Yar ombou mborerecuasa cheu pe recocuer moviracua tupri ãgua, ndahei rumo pe recocuer momara ãgua.

<sup>9</sup> Aní chira, “Pablo yande mbosiquiye pota güembicuachía pipe” peye cheu.

<sup>10</sup> Esepia, amove ava pe pãhu pendar, “Oñehe oicuachía vahe ombou yandeu, ahe ipiratá, yavai avei yandeu; ahe ité rumo aní angai vahe secoi yande pãhuve iyavei ñehe ãgüe ehi tēi vahe” ehi yuvireco cheu.

<sup>11</sup> Toicua catu ru yuvireco: eipeve oroso irise, inungar amombehu che rembicuachía pipe amombri che recose, ãgüe ahe tupri aveira yapo pe pãhuve.

<sup>12</sup> Ndoromboyoyai eté ore recocuer ava oyese tēi oñehe vahe recocuer rese. Esepia, omboyoyase oyese, ndoyapisacai eté yuvireco.

<sup>13</sup> Ore rumo ore remimombehu pipe ndoroyapirasai chiera ore cuaita ore yeecomboivatesa pipe. Tūpa rumo güemimbotar rupi ombou ore poraviqui ãgua oreu, eipeve pe rese ore poraviqui ãgua avei.

<sup>14</sup> Ore rumo ndoroyapirasai ore cuaita mombehusa icuachía pēu. Esepia, supi eté ore ranei eté oroico pe pãhuve, ore ranei avei oroviraso Cristo resendar ñehesa imombehu pēu.

<sup>15</sup> Ndoroyapirasai avei ore ñehe pipe ambuae ava poraviquisa sui tēi. Ore rumo, orosãro ore oroporaviqui catu vaheñã pe pãhuve Tūpa rese pe yeroyasa rupi. Ndoroyapirasai avei rumo ore cuaita.

<sup>16</sup> Iyavei orosãro ñehesa pisirosa resendar mombehu ava amombri catu yuvirecoi vahe upe. Ndahei chira rumo ambuae ava poraviqui agüer rese tēi oroyecomboivate oroico.

<sup>17</sup> Acoi ava oyecomboivate pota vahe, toyecomboivate catu yande Yar rese.

<sup>18</sup> Esepia, acoi ava “che aico tupri” ehi vahe ndahei ahe osē tupri güecoãhasa sui yande Yar rovaque; “Aviye ité co mbia” ehise rumo yande Yar chupe, ahe osē tupri güecoãhasa sui.

## 11

### *Pablo iyavei apóstol angahu tēi yuvirecoi vahe*

<sup>1</sup> ¡Peñemosa iriñomi tēira cheu co che ñehe ndayaracuai vahe nungar pipe che ñehese!

<sup>2</sup> Esepia, che cherecatēhi ité pe rese, ahe tecatēhisa ou cheu Tūpa sui. Che aipota Cristo upe opomondo vaheñã pe reco maranehisa pipe, inungar cuñatai ndaseco marai vahe imondopri cuimbahe upe imenda ãgua.

<sup>3</sup> Che rumo asiquiye co mbahe sui, inungar mboi ombopa Eva oporombopasa pipe, aviyeteramo Carugar pe mbopa aveira pe pihañemoñetasa rerova ãgua Cristo mboeteisa supi eté vahe sui.

<sup>4</sup> Esepia, peñemosaño ava oñehe vahe pēu ambuae Jesús rese ndoyoyai vahe ore remimombehu rese. Ichui peipisi pe querēhisa pipe ambuae espíritu peipisi vahecuer sui. Iyavei ambuae ñehesa pisirosa resendar peipisi avei ndoyoyai vahe ore pēu oromombehu vahe rese.

<sup>5</sup> Che rumo namohai eté ivi coti catu tēi aicora evocoi supi peguata vahe apóstol yemboivate ai tēi vahe sui.

<sup>6</sup> Yepe ndayembohei che ñehe tupri ãgua ité, che rumo areco che mbahecuasa, ahe oromboyecuaño ité opacatu ore rembiapo pipe pe rembiepiave.

<sup>7</sup> Ndamombehui eté niha ñehesa pĩsirosa resendar pe cheu imboepi ãgua; pe recocuer mboivate catu ãgua rumo Tũpa rovaque ãgũe ahe che reco yemominisa pipe. ¿Mbahe tẽi pĩha ayapo ãgũe ahese pẽu?

<sup>8</sup> Aipisi ambuae ava Jesús reroyasar sui guarepochi, pe recocuer rese che poraviqui ãgua.

<sup>9</sup> Iyavei acoi aicose pe pãhuve, ipane avei mbahe cheu. Ndopomañecoi eté rumo; yande rivri ivi Macedonia pendar yugũeru vahe ombou mbahe ipane vahe yuvireco cheu. ãgũe ahe che pepoisupave pe mañecoẽhi vichico. Ndopomañecoi chietera niha mbahe ipanese cheu.

<sup>10</sup> Supi eté aicua supi tupri vahe mbahe Cristo suindar. Evocoyase supi eté avei che aicua ndipoi chietera que ava ivi Acaya rupi virocua vaheã co che viharetesa che sui yuvireco.

<sup>11</sup> ¿Mbahe rese pĩha aipo ahe pẽu? ¿Pe raisuẽhisave pĩha? ¡Tũpa rumo oicua che pe raisusa!

<sup>12</sup> Ayapoño itera rumo co mboraviqui cheu imboepiẽhisa pipe vichico co ambuae pe pãhu pendar ava pe mbopaẽhi ãgua yuvireco. Esepia, che nungar yuvirecoi pota tẽi viña.

<sup>13</sup> Ahe rumo ndahei apóstol supi tupri vahe yuvirecoi, ahe oporombopa tẽi, “Ore apóstol oroico” ehi tupri tẽi yuvireco.

<sup>14</sup> Yaicua niha Carugar rerecuar oporombopa. Esepia, oyeapo inungar Tũpa rembiguai amove.

<sup>15</sup> Sese yaicua avei Carugar povri pendar oporombopasa pipe oyeapo inungar Tũpa ñehe mombehusar yuvireco. ¡Ahe chupe rumo oimera Tũpa ñemoĩrosa mbahe sembiapocuer rupi curi!

*Pablo oiporara mbahe-mbahe tẽi apóstol güecosa pipe*

<sup>16</sup> Aipo ahe iri pẽu: tipo eme ava “ndayaracuai” ehi vahe cheu. Acoi, “ãgũe ehi oico” peyese cheu, tañehẽño ayase ndayaracuai vahe nungar, che avei evocoyase tayeecomboivateño vichico.

<sup>17</sup> Ndahei rumo yande Yar che cuaisa pipe aipo ahe, che aracuaẽhisa nungar pipe rumo aipo ahe che yemboivate aisa pipe.

<sup>18</sup> Esepia niha, setá iteanga ava ahe ae tẽi oyemboivate ai güecocuer aviye angahu vahe tẽi pipe. Sese che avei ayemboivatera.

<sup>19</sup> Esepia, yepe pe imbahecua vai vahe nungar peico, pemboyoyá catu pe querẽhisa pipe ava ndayaracuai vahe.

<sup>20</sup> Pe niha pemboyoyaño acoi que mbiguai tẽi nungar pe rereco vahe, que mbahe pe rembiereco sui tẽi oicove vahe, que pe mbopa tẽisar, pe reroĩrosar, que pe rova petepesar avei.

<sup>21</sup> Che chĩsa pipe aipo ahe co imombehu, jore reco mbegũe etepri evocoi nungar apo ãgua pẽu!

Acoi oñehese ambuae ava oyeupendar mbahe rese oyemboivate aisa pipe, che avei evocoyase ãgũe ahera. Aipo ahese rumo aviye ndayaracuai vahe nungar aico.

<sup>22</sup> Ahe, “Che hebreo aico” ehise yuvireco, che avei ahe aico; “Che israelita aico” ehise, che avei ahe aico; “Che Abraham suindar aico” ehise yuvireco, che avei ahe ichuindar aico.

<sup>23</sup> “Che Cristo rembiguai aico” ehi yuvireco, che rumo sembiguai catu aico ichui yuvireco, aipo añehese aviye che ndayaracuai vahe aico. Aporaviqui catu rumo ichui yuvireco, setá catu soquendapri tẽi aico yuvireco ichui, inupambri catu aico ichui yuvireco, setá rupi avei seni-seni che yuca uca che mombaraisusa pipe yuvireco.

<sup>24</sup> Cinco yupagũer judío che nupá iteanga treinta y nueve tupri tucumbo pipe yuvireco.

<sup>25</sup> Mbosapî yupagüer che nupasa ivîra pîpe, ñepei rupi evocoiyase che api-apisa ita pîpe. Mbosapî yupagüer avei oñeapivîi iar ipîve che guatasa rupi cheu, ñepei pîtu, ñepei ari avei avevui tîi para guasu avîter rupi vichico.

<sup>26</sup> Setá aguata opacatu rupi, iyavei ïai rupi mbahe-mbahe tîi oime cheu, aico avei imonda rai vahe pâhuve; che mu judío mbahe tîi vahe pâhuve avei aico iyavei ndahei vahe che mu pâhuve no. Aico avei tecua guasu pîpe mbahe tîisave, amombri vahesa rupi iyavei para guasu pîpe, iyavei mbahe-mbahe tîisave Jesús reroyasar angahu tîi pâhuve aico.

<sup>27</sup> Aporaviqui ité iyavei ayapo mbahe cheu yavai vahe; iyavei setá yupagüer ndaquei eté; aiporara avei tieporêhi iyavei husei; setá rupi ndacarui; sôhisagüer avei aiporara, ndacheturucuai avei vichico.

<sup>28</sup> Ndahei co opacatu mbahe güeraño aiporara, ari yacatu rupi che mahenduhano ité avei opacatu tecua rupindar Jesús reroyasar rese.

<sup>29</sup> Oimese que oiporara vahe mbaherasicuer, che avei ayandu co mbaherasisa. Acoi que oimese oyavi uca vahe mbahe, che moñemoiro uca.

<sup>30</sup> Iyase che yeecomboivate ai âgua cheu, co mbahe omboyecua vahe che pîrataêhisa rese ayeecomboivate aiño itera.

<sup>31</sup> Yande Yar Jesucristo Ru Tûpa, ahe imboeteipri apirêhi secoi vahe, ahe oicua aipo che hesa supî tupri vahe.

<sup>32</sup> Tecua Damasco ve aicose, mborerecuar guasu Aretas povri pendar mborerecuar oyocuai osundao co tecua roquendipîve che rese osareco vaherã che roquenda âgua yuvîreco viña;

<sup>33</sup> oime rumo ava iruova guasu pîpe che mogüeyi vahe tecua âchisa metana rupi yuvîreco. Êgüe ahe añemi ichui yuvîreco.

## 12

### *Tûpa omboyecua Pablo upe mbahe queraisa nungar pîpe*

<sup>1</sup> Ndipoi eté que ava mbahe oipîsi vahe ahe ae tîi oyemboeteisa pîpe. Che rumo amombehuño itera mbahe asepiã vahe che quer nungar pîpe iyavei yande Yar remimboyecua che aipîsi vahe ichui.

<sup>2</sup> Che aicua mbîa Cristo reroyasar, omomba cûritei catorce aravîter ahe imbosapîsa ivave seraso agüer. Ndicuasai güetecuer rese tie revo oso, anise ihã güeraño tie revo. Tûpa rumo oicua.

<sup>3-4</sup> Che rumo, “Êgüe ehi tie revo oico” ahe aipo mbîa upe, Tûpa güeraño oicua. Serasopri ivave teco orisave. Aheve osendu ñehesa ndicuasai vahe. Ahe niha que ava tîi upe ndipotasai imombehu âgua yuvîreco.

<sup>5</sup> Evocoi nungar mbîa rese ayeecomboivatera; cheyese ité rumo ndayeecomboivate ai chira. Che recocuer nipiratai vahe reseño êgüe ahera vichico.

<sup>6</sup> Yepe che añehe tupri aira cheyese viña, che revo ndahei chira ndayaracuai vahe nungar aico. Esepia, mbahe supî eté vahe amombehura viña. Ahe rumo ndayapoi. Esepia, ‘tipihañemoñeta catu che rembiapo rese, che remimombehugüer rese avei yuvîreco che querve nungar mbahe mombehu rãgüer sui’ viya.

<sup>7</sup> Sese che yemboivate aiêhi âgua che quer nungar mbahe che pîhamondîi vahe rembiepiagüer rese Tûpa ombou teco asisa cheu. Ahe aviye yu che cutu guasu vahe, ndoyavîi avei Carugar mara-mara tîi che rereco vahe.

<sup>8</sup> Mbosapî yupagüer yande Yar upe aporandu ité teco asisa che sui serocua âgua rese viña.

<sup>9</sup> Ahe rumo aipo ehi cheu: “Che porovasasa ndeu ambou vahe iyara nde ñemosã âgua. Esepia, che pîratasa oyecua catu ité ava nipiratai vahe recocuer rese” ehi. Evocoiyase

che ayembovihã catuño itera che reco nipuratai vahe rese. Êgüe ehira Jesucristo pĩratasa oyecua che rese.

<sup>10</sup> Sese Cristo rese che recosa pipe aviyeño ité ndache pĩratase, que ambuae ava oñehe raise che rese, que mbahe ipanese cheu, ambuae che reca-reca tẽise che reco momara ãgua yuvireco iyavei que mbahe yavai vahe aiporarase Cristo sui. Esepia, ayanduse che pĩrataẽhisa, ahese che pĩrata catu.

*Pablo ipihãñemoñeta ité Jesús reroyasareta Corinto pendar rese*

<sup>11</sup> Che ndayaracuã vahe nungar aico pẽu, pe rese tẽi rumo êgüe ahe. Iya rumo peñehe tuprãra che rese viña. Esepia, yepe ndahei seco ivate vahe aico viña, co apóstol angahu tẽi rumo pe supi peguata vahe ndahei ivate catu vahe che sui yuvireco.

<sup>12</sup> Che ñemosa tuprã pipe mboraviqui ayapo pe pãhuve. Ayapo mbahe poromondiisa mbahe pesepia yesapiha rai vahe imboyecua ãgua che supi eté vahe apóstol che recosa.

<sup>13</sup> Co mbahe reseño pe ivi coti catu peico ambuae Jesús reroyasareta sui, che ndopomañecoise mbahe cheu pembou vahe rã rese. ¿Ayavi tie che cuaita, êgüe ahese pẽu? ¡Peñero sese cheu!

<sup>14</sup> Cũritei che ayemoingatu imombosapisa rupi che so ãgua pe piri. Iyavei ndopomañecoi chira mbahe rese. Esepia, ndasecai mbahe pe rembiereco; pe recocuer ité rumo aipota. Esepia, iyepia omonuha guarepochi guahir upe, ndahei tahir tẽi êgüe ehi oyesupa upe yepi.

<sup>15</sup> Evocoyase che querẽhisa pipe amondora opacatu che mbahe areco vahe pe pĩtivii ãgua iyavei opacatu che recocuer rese ayemondo pẽu pe reco tuprã ãgua. Che rumo opoaisu ité, pe tie revo ndache raisu tuprã eté peye.

<sup>16</sup> Cheu mbahe ipanese, ndaporandui eté mbahe pereco vahe rese pẽu. Amove rumo ava, “Yande mbopa ãgua tẽi êgüe ehi Pablo yandeu” ehi tẽi yuvireco.

<sup>17</sup> ¿Opombopa uca tie ava pẽu che remimondo pipe?

<sup>18</sup> Che Tito upe, “Eresora ipiri yuvireco” ahe. Supi avei ambuae yande rivri Tũpa reroyasar amondo. ¿Pembopa tie Tito? Oyoya tuprã mbahe oroyapo Tũpa upe ñepe ore pihãñemoñetasa pipe.

<sup>19</sup> Che rivireta, che rembiaisu, pe revo pepihãñemoñeta ore oroicuachia co pẽu, ore yoepi ãgua tẽi. Êgüe ndorohei eté rumo. Ore rumo Cristo rese ore reco pipe oroñehe Tũpa rovaque. Opacatu ité niha mbahe oroyapo pe recocuer moviracua catu ãgua.

<sup>20</sup> Che asiquiye asose eipeve pe repia, aviyeteramo ndahei chira che piha rupi pe recocuer. Iyavei pe aviyeteramo êgüe peye aveira che repiase. Che asiquiye ité, oime revo pe pãhuve yepoepi-episa, pe pihãñemoñeta raisa ava mbahe pota raisa pipe, pe ñemoirosa peyeupe. Iyavei aviyeteramo oimera pe pãhuve ava oyeupeño tẽi mbahe oipota vahe, imahechiroi ai vahe iyavei oñehe-ñehe tẽi vahe ambuae ava rese, seco ivate ai vahe iyavei ndiporoviroyai vahe.

<sup>21</sup> Asiquiye avei aso irise pe repia, omboura Tũpa pe sui che chĩ ãgua, che mboyaseho uca tiẽtera peye setã pe cueseve peyemboangaipa vahe rese iyavei ndapemboasii etese mbahe tẽi, yemboaguasa-guasa tẽisa iyavei que mbahe pe remimbotarai peyapo vahecuer.

## 13

*Poromboaracuasa iyavei mahenduhasa*

<sup>1</sup> Co niha imombosapisa yupagüer asora pe repia. Pemombehu potase que ava rembiapo ai cheu, toime que ñuvirio, anise mbosapi oicua vahe sembiapo ai.

<sup>2</sup> Co yipindar oyemboangaipa vahe upe opa aipo ahe: “Peicua catu” ahe che imoñuvirio yupagüesa pipe aicose pe piri. Cũritei amombri aico pe sui, amombehu irira rumo co pẽu. Co yipindar vahe upe iyavei opacatu ambuae angaipa pipe yuvirecoi vahe upe aipo ahe: aso irise pe pãhuve, ndopoparaisuereco iri chira.

<sup>3</sup> Esepia, pe peipota ité che recoãha ãgua ‘¿Cristo ité pïha omoñehe uca?’ pe yapave cheu. Cristo ndaseco mbegüemi pëu mbahe apo oico. Ahe rumo omboyecua opïratasa pëu.

<sup>4</sup> Supi eté niha ahe yaticasa, inungar ava nipiratai vahe. Cüritei rumo ahe oicove Tüpa pïratasa pipe. Ëgüe orohe avei ore seco pïrataëhisa sereco. Oroicose rumo sese oroico Tüpa pïratasa pipe pe rese hañeco ãgua.

<sup>5</sup> Pemahecua tupri catu pe recocuer rese: ¿peico ité pïha pe Cristo rese yeroyasa pipe? ¿Ndapeicuai vo Jesucristo secoise pe rese, pesëse pe recoãhasa sui?

<sup>6</sup> Pe revo peicuara ore ndorocañi tëi vahe oroico ore recoãhasa pipe.

<sup>7</sup> Iyavei oroyerure pe rese Tüpa upe ‘toyapo eme mbahe tëi yuvireco’ ore hesave. Ndahei rumo ore ivate catu vahe mbahe tëi rasa pare mboyecuasave ëgüe orohe; co catu ‘toyapo mbahe aviyeva vahe yuvireco’ ore yapave, yepe pëu ndoyavii orocañi tëi vahe oroico viña.

<sup>8</sup> Esepia, ndiyai mbahe supi tupri vahe amotarëhi ãgua oreu; ëgüe ehi rumo sese catu ité oroñehe.

<sup>9</sup> Sese orovihaño ité norepïrataise, ore rumo oroipota ité pe momirata; iyavei ore oroyerure catuño itera pe recocuer catupri catu ãgua rese.

<sup>10</sup> Aicuachía co che ñehe imondo pëu pe piri che so ãgua renonde. Acoi asose, namboyecua pïratatai chira che mborerecuasa eipeve. Ahe niha yande Yar ombou vahe cheu pe reco momirata catu ãgua, ndahei pe reco momara ãgua.

<sup>11</sup> Imomba ãgua, che rivireta, aipota peviharetera peico. Peseca avei pe reco tupri catu ãgua peyeupe, peyemonguerëhi catu, oyoya guasu peico tupri avei peyese mbahe tupri pipe. Evocoyase Tüpa oporoaisusa pipe, güeco tuprisa pipe avei secoira pe rese.

<sup>12</sup> Pemombehu che mahenduhasa ñepeipei peyeupe pe yeovaupitesa pipe.

<sup>13</sup> Opacatu ambuae yande rivri, Tüpa reroyasar avei omondo omahenduhasa yuvireco pëu.

<sup>14</sup> Peipisi yande Yar Jesucristo porovasasa, Tüpa poroaisusa iyavei Espiritu Santo tasecoi opacatu pe rese. Aipo rupive che ñehe pëu.

## PABLO REMBICUACHIA GALACIA PENDAR UPE GALATAS

### *Pablo mahenduhasa Jesús reroyasar Galacia pendar upe*

<sup>1</sup> Che, Pablo, imondopri aico apóstol che reco ãgua. Ndahei ava tēi sui ayu pēu iyavei ndahei ava tēi che cuai; Jesucristo ité niha che cuai iyavei yande Ru Tūpa che mbou acoi ombogüerayevi vahecuer Guahir.

<sup>2</sup> Che, Pablo, iyavei opacatu Jesús reroyasar yuvirecoi vahe cohava oroicuachía co ore ñehe pēu, pe opacatu Jesús reroyasar Galacia pipe peico vahe.

<sup>3</sup> Tapeipisi yande Ru Tūpa, yande Yar Jesucristo porovasasa pe reco tupri ãgua.

<sup>4</sup> Ahe acoi oyemondo vahe omano ãgua yande angaipá repirã. Ëgüe ehi cūritei yande renose co ivi pipe mbahe-mbahe tēi sui yande Ru Tūpa remimbotar rupi.

<sup>5</sup> ¡Imboetepri apirēhi Tu tasecoi!

### *Ndipoi ambuae ñehesa poropĩsirosa resendar*

<sup>6</sup> Che pihamondi etepri peye. Esepia, peyepēpi poyava peico Tūpa sui. Ahe niha pe renoi Guahir Jesucristo pe raisusa pipe sui. Pe rumo, peroya pota ambuae tēi yembohesa pe ñepisiro ãgua peico viña.

<sup>7</sup> Supi eté ndipoi ambuae ñehesa pĩsirosa resendar. Ëgüe ehi rumo, oime ava pe mañeco tēi vahe pe mbopa ãgua ñehesa supi tupri vahe sui yuvireco. Iyavei virova pota co ñehesa Jesucristo resendar yuvireco.

<sup>8</sup> Oimese rumo que ambuae ava oñehe vahe poropĩsirosa angahu tēi rese ndoyoyai vahe che ñehesa rese pesendu vahe yipisui, evocoi nungar ava upe “Toime Tūpa ñemoirosa” ahe yepe chera viña, anise que Tūpa rembiguai íva pendar avei no.

<sup>9</sup> Amboyupagüe iri, “Evocoi nungar ava upe toime ité Tūpa ñemoirosa” ahe.

<sup>10</sup> Aipo che he pipe, ndasecai ava tēi, “Co mbia aviye vahe” he ãgua cheu, Tūpa rumo aseca cheu aipo he ãgua. Esepia, java remimbotar rupi tēi mbahe ayapo vites, evocoyase ndahei chietera Cristo rembiguai aico viña!

### *Mara ehi Pablo apóstol güeco ãgua*

<sup>11</sup> Che rivireta, tapeicua co ñehesa poropĩsirosa resendar amombehu vahe ava upe ndahei ava tēi pihañemoñetasa.

<sup>12</sup> Ndahei avei ava tēi che mbohe; Jesucristo ité niha oicua uca cheu.

<sup>13</sup> Pe niha pesendu yipindar che recocuer resendar, che mu judío yembohesa rupi aguata vites aracaco. Che pĩratasa pipe tēi aseca opacatu Tūpa rembiporavo Jesús reroyasar momara ãgua.

<sup>14</sup> Ëgüe ahe che ayemboivate ai catu che mboetasa eta sui judío yembohesa pipe. Ayapó catu opacatu che recocuer pipe yipindar che ramoi eta yembohe agüer rupi eté vichico.

<sup>15</sup> Tūpa rumo yipive che ha viteẽhiseve che poravo oyeupe nara. Iyavei oporoaisusa pipe che renoi güemimbotar rupi.

<sup>16</sup> Ëgüe ehi ahe oicua uca Guahir cheu, che imombehu ãgua co ñehesa Tahir recocuer resendar ava ndahei vahe judío upe. Ndasoi rumo ava tēi upe icua ãgua;

<sup>17</sup> ndasoi avei Jerusalén ve yipive apóstol yuvirecoi vahe repia ãgua. Che rumo aso voi eté ivi Arabia ve. Coiyé ayevi tecua Damasco ve vitu.

<sup>18</sup> Ichui mbosapi araviter che seroya pare, aso tecua guasu Jerusalén ve cute. Ahese ramo Pedro ambori quince arí rupi güerañomi tēi.

<sup>19</sup> Ndasepiai eté rumo ambuae apóstol. Yande Yar rivri Santiago güeraño asepa.

<sup>20</sup> Tūpa oicua co mbahe aicuachía vahe pēu, supi tupri vahe ité.



<sup>21</sup> Ipare aso ivi Siria ve, Cilicia ve avei no.

<sup>22</sup> Yande Yar reroyasar rumo oñemonuha vahe ivi Judea ve ndache cuai eté yuvireco.

<sup>23</sup> Co oyanduño tēi yuvireco ambuae ava aipo ehi vahe: “Acoi aracaco yande reca-reca catu vahe yandeu mbahe tēi apo āgua, cūritei omombehu Jesucristo reroya āgua oico” ehi, “Ahe acoi yipindar yande mocañi pota rai vahe oico” ehi yuvireco cheu.

<sup>24</sup> Ahese, “Imboeteipri Tūpa tasecoi” ehi yuvireco che recocuer rese.

## 2

### *Ambuae apóstol, “Aviye ité Pablo porombohesa” ehi yuvireco*

<sup>1-2</sup> Coiye catorce araviter pare, Tūpa omboyecua cheu Jerusalén ve che yevi āgua. Evocoyase aso iri aheve. Ahese oroso Bernabé rese, Tito avei oroviraso oreyeupi. Aheve yipindar opacatu Jesús reroyasar rerecuar reseño rane oroñemonuha. Esepia, ndaipotai che rembiapo opitara ēgüe ehi tēi vaherã. Evocoyase amombehu co ñehesa poropĩsirosa resendar chupe yuvireco acoi amombehu vahe ava eta ndahei vahe judío pãhuve.

<sup>3-4</sup> Oime rumo amove yande rivri angahu tēi, ahe yuviroique mbegüe vahe ore pãhuve ‘yasecoepia rane, ¿supi eté ndoviroyai Moisés porocuita Jesucristo reroyasa pipe yuvireco?’ oyapave. Oipota ahe ore reroyevi iri Moisés porocuitavrive tēi yuvireco viña. Ahese che ndugüer Tito upe, “¡Eyembocircuncida Moisés porocuita rupi!” ehi yuvireco. Esepia, ahe ndahei vahe judío secoi.

<sup>5</sup> Ore rumo ndoroipotai eté semimbotar apo āgua yuvireco chupe. Esepia, ‘tovireco viteño oyese co ñehesa pĩsirosa resendar supi tupri vahe yuvireco’ ore yapave pëu.

<sup>6</sup> Co rumo acoi icuapri ité Jesús reroyasar rerecuar, nomombehui eté yembohesa ambuae vahe yuvireco cheu, oyoyaño ité che porombohesa rese. (Yepe ocuaita virecora ivate yuvireco viña. Che rumo nañecuñaroi chietera che recocuer sui. Esepia niha, Tūpa ndahei ava rete tēi osepia.)

<sup>7</sup> Ahe rumo oicua yuvireco Tūpa che cuai oñehengagüer poropĩsirosa resendar mombehu āgua ndahei vahe judío yuvirecoi vahe upe, inungar omondo Pedro oñehengagüer poropĩsirosa resendar mombehu āgua judío upe.

<sup>8</sup> Esepia, inungar Tūpa omondo Pedro upe apóstol seco āgua ava judío upe nara, ēgüe ehi avei imbou apóstol che reco āgua ava ndahei vahe judío upe nara.

<sup>9</sup> Sese Santiago, Pedro iyavei Juan, ahe chupe, “Oyemoviracua vahe Jesús reroyasar pãhuve” ehi yuvireco, ahe oicua yuvireco Tūpa ombou vahe oporovasasa cheu. Ahese imboetasa ore recosa pipe che po pisi yuvireco, Bernabé upe avei ēgüe ehi yuvireco. Iyavei ipiha rupi eté ore oroporaviqui vaherã ava ndahei vahe judío pãhuve oroico, inungar ahe oporaviqui judío pãhuve yuvireco.

<sup>10</sup> Co reseño oporandu yuvireco oreu: “Peyemomahenduhami ava iparaisu vahe pĩtivii āgua rese” ehi. Yipive ité rumo che ēgüe ahe pota vichico yepi.

### *Pablo oñhe pĩrata Pedro upe sembiavi rese Antioquía ve*

<sup>11</sup> Iyavei osose Pedro tecua Antioquía ve. Aheve oyavi güecocuer. Evocoyase añehe pĩrata sovai eté chupe mbahe sembiavi rese.

<sup>12</sup> Esepia, yipindar ahe ocaru ndahei vahe judío piri viña. Ipare rumo, oyepotase ambuae judío Jesús reroyasar Santiago mboetasa yuvireco, ahese Pedro osiriño ichui osiquiyepave. Iyavei ndocarir iri ipiri. Esepia, ahe Jesús reroyasar judío yugüeru vahe “judío recocuer rupi yagatara yande ñepisiro āgua” ehi vahe ité yuvireco viña.

<sup>13</sup> Evocoyase ambuae Jesús reroyasar judío avei osiripaño tēi supive yuvireco. Bernabé avei eté supive ēgüe ehiño tēi.

<sup>14</sup> Che asepiase rumo, ndahoyoyai secocuer yuvireco co ñehesa poropĩsirosa resendar supi tupri vahe rese. Ichui Pedro upe añehe opacatu Jesús reroyasar rovaque: “Nde niha

judío, ereico rumo inungar ndahei vahe judío. Cũritei rumo erembohe tẽi nde rembiapo pĩpe evocoi ava ndahei vahe judío Jesús reroyasar judío rereco uca ãgua” ahe chupe.

*Judío, ndahei vahe judío oyoya õñepisiro yuvireco Cristo rese oyeroyasa pĩpe*

<sup>15</sup> Yande niha judío yande hasa suive yaico, ndahei ava ndahei vahe judío nungar yangaipa vahe yaico.

<sup>16</sup> Cũritei rumo yaicua, ndipoi eté que ava seco catupri vahe Tũpa rovaque Moisés porocuita mboaviyasa pĩpe. Jesucristo rese yeroyasa pĩpeño ité rumo yande reco catupri. Sese yande yayeroya ité Jesucristo rese, “Co seco catupri vahe” Tũpa he ãgua yandeu. Ëgũe ehi eté seroya pĩpe, ndahei acoi porocuita tẽi reroyasa pĩpe. Esepia, ndipoi chietera que ñepeí ava seco catupri vahe Tũpa rovaque evocoi porocuita tẽi apõsa pĩpe.

<sup>17</sup> Yasecase yande reco catupri ãgua Cristo rese yande yeroyasa pĩpe, ipĩpe yaicuase angaipa viyar yande reco, ¿Cristo pĩha evocoyase yande mboangaipa? ¡Aní eté!

<sup>18</sup> Che amocañise mbahe, ipare rumo amopuha irise, che evocoyase ayemboangaipa ipĩpe.

<sup>19</sup> Esepia, ndaicutise Moisés porocuita reroya tupri che ñepisiro ãgua, ahese ocañi tẽi vahe aico ipĩpe. Ichui rumo Jesucristo reroyasa pĩpe asupiti Tũpa upe nara che recove ãgua. Esepia, che aviye yaticapri aico Cristo rese.

<sup>20</sup> Sese ndahe iri che ité aicove; Tũpa Rahir Cristo rumo che rese secoi. Sese ité ayeroya che retecuer pĩpe che recove ãgua. Ahe niha oyemondo omano ãgua che raisupave.

<sup>21</sup> Naroíroi eté co Tũpa porovasasa. Esepia, ava seco catupri Tũpa rovaque porocuita tẽi reroya pĩpe viña, evocoyase Cristo mano agüer ãgua ehi tẽi etera viña.

### 3

*Porocuita iyavei yeroyasa*

<sup>1</sup> ¡Ndapembahecuaí eté pe Galacia pendar! Pe ndoyavii ipaye vahe remimbopa peico. Oromombehu tupri niha pe rovai eté acoi Jesucristo curusu rese yatica agüer pẽu.

<sup>2</sup> ¡Pemboyecua co che porandusa cheu! ¿Moisés porocuita mboyeroya pĩpe pĩha peipisi Espiritu Tũpa suindar, co ñehesa pesendu vahecuer reroya pĩpe tie?

<sup>3</sup> ¡Ndapembahecuaí eté! Yipindar Espiritu pĩpe pemboipi Cristo rupi pe guata ãgua. ¿Ëgũe peye aveira pĩha pe pĩratasa pĩpe tẽi pe guata tupri ãgua Cristo rupi cũritei?

<sup>4</sup> ¿Ndape pĩtivimi eté vo acoi opacatu pe paraisusa Cristo recocuer rese? ¡Pe pĩtivimira tarahu viña!

<sup>5</sup> Tũpa niha omondo oEspiritu pe rese iyavei oyapo poromondiisa pe pãhuve. ¿Mahera pĩha oyapo? Esepia, co ñehesa pesendu vahe peroya ité, sese ãgua ehi pẽu ndahei Moisés porocuita tẽi reroya pĩpe.

<sup>6</sup> Esepia, aracahe Abraham oyeroya ité Tũpa rese, ipĩpe sui Tũpa oipisi seco catupri vahe nungar oyeupe nara.

<sup>7</sup> Sese iya ité peicuará opacatu acoi oyeroya vahe Tũpa rese yuvireco, ahe Abraham suindar supi tupri vahe.

<sup>8</sup> Iyavei Tũpa Ñhengagüer icuachiapri pĩpe omombehu ité senondeve Tũpa oipisi aveira opacatu oyese oyeroya vahe ndahei vahe judío co ivi pĩpendar oyeupe nara. Iyavei omombehu co ñehesa icatupri vahe Abraham upe: “Opacatu ava ivi pĩpendar sovasapri yuvireco nde sui” ehi.

<sup>9</sup> Evocoyase Tũpa osovásara cũriteindar oyese yeroyasareta inungar Abraham aracahe.

<sup>10</sup> Acoi seco catupri pota vahe Moisés porocuita pĩpe tẽi yuvirecoi vahe, ahe Tũpa ñemoirosavri tẽi yuvirecoira. Esepia, icuachiapri aracahendar pĩpe aipo ehi: “Opacatu ava nomboaviyei vahe ité opacatu Tũpa porocuita icuachiapri pĩpe yepi, ahe iñemoirosavri tẽi yuvirecoira” ehi.

11 Sese, co omboyecua tupri yandeu ndahei Moisés porocuita reroyasa pipe tēi Tūpa, “Co seco catupri vahe” ehi ava upe. Esepia, icuachiapri arachendar pipe aipo ehi: “Acoi ava seco catupri vahe oicovera Tūpa rese oyeroyasa pipe sui” ehi.

12 Moisés porocuita ndahoyoyai Cristo rese yeroyasa rese. Esepia, ahe porocuita aipo ehi: “Acoi ava oico pota vahe co porocuita pipe, tomboaviye tupri ité opacatu porocuita güecove āgua” ehi.

13 Moisés porocuita mboaviyeēhisa pipe yacañi tēira viña. Cristo rumo yande renose yande cañi tēi rāgüer sui. Ahe ae opa oipisi ñemoirosa yande repirā. Esepia, icuachiapri arachendar pipe aipo ehi: “Opacatu ava imboyasecopri ivira rese, oipisi Tūpa ñemoirosa yuvireco” ehi.

14 Ēgüe ehi Cristo yandeu ‘toipisi ava ndahei vahe judío che Ru porovasasa che rembiapo sui’ oyapave. Ahe porovasasa Tūpa omombehu vahecuer Abraham upe aracahe. Ipipe sui yande opacatu yaipisi Espiritu imombehupri yayeroyase Cristo rese cūrítei.

### *Porocuita iyavei Tūpa güemimombehugüer omboaviye vaheerā*

15 Iyavei, che rivireta, amboyoya pota mbahe co ivi pipendar mbahe rese. Inungar acoi que ava ñepeí reseve oicuachiasse güemimbotar omombehu vahe, ahese ndipoi que ambuae ava omboyeho vaheerā iyavei ndipoi que ambuae ava omboyepi iri vaheerā.

16 Ēgüe ehi avei Tūpa remimombehugüer Abraham upe aracahe. Esepia, oñehe ñepeí reseve chupe iyavei ichuindar upe avei. Tūpa Ñehengagüer icuachiapri pipe: “Nde suindareta upe” ndehi, inungar-ra que ava rehí upe viña. Ēgüe ehi rumo, “Nde suindar upe ité” ehi ‘ñepeí ava’ ohesa pipe, ahe Tūpa Rembiporavo Jesucristo.

17 Co mbahe amombehu pota pēu: evocoi porocuita Tūpa ombou vahecuer cuatrocientos treinta araviter pare, ndoicatui chietera Tūpa ñepeí reseve Abraham upe omombehu vahecuer iyavei oñehe omboaviye vaheerā mboyeho āgua.

18 Supi eté acoi Tūpa suindar ou vaheerā porerecosa Moisés porocuita mboaviyasa pipe suise viña, ahese ndahei chiaveira Tūpa remimombehugüer sui. Ahe rumo ñepeí reseve Tūpa remimombehugüer rupi Abraham upendar porerecosa.

19 ¿Mahera pīha evocoyase aviye Moisés porocuita? Esepia, ava poreroyaēhisa cua āgua Tūpa ombou oporocuita Moisés upe aracahe. Co porocuitavriye rumo ava yuvirecoi acoi oyepotase voi Abraham suindar Jesús Tūpa remimombehugüer rupi. Yipindar rumo Tūpa oyocuai güembigui i va pendar oporocuita mombehu āgua Moisés upe aracahe ‘tomombehu evocoyase Moisés che porocuita opacatu ava upe’ oyapave.

20 Ñepeí ava rese oñemoñetase, ndipotasai ambuae imoingatu āgua. Tūpa niha ñepeí vahe secoi.

### *Mbahe sui Tūpa ombou oporocuita*

21 “Moisés porocuita co coti tēi Tūpa remimombehugüer imboaviyepirā sui” aipo ndahei eté pēu. Esepia, acoi Tūpa omondose que porocuita ombou vaheerā tecovesa apirēhi ava upe imboaviyasa pipe, evocoyase porocuita reroya pipe yande reco catuprira Tūpa rovaque viña.

22 Icuachiapri arachendar pipe rumo omombehu ité co: opacatu ava inungar mbiguai tēi oangaipa pipe yuvirecoi. Evocoi ēgüe ehi, Jesucristo rese yande yeroyasa pipe yasē vaheerā ichui mbahe imombehupri pisi āgua.

23 Yipindar rumo mbiguai nungar yaico Tūpa nomboyecua viteise Guahir rese yande yeroya āgua.

24 Inungar chīhivahemi tēi, ēgüe yahe porocuitavriye yaico yipindar. Ahe porocuita rumo yande mbohe Cristo yu āgua ‘toyeroya Cristo rese güeco catupri āgua curi’ oya yandeu.

<sup>25</sup> Cūritei rumo oime Jesucristo rese yeroya āgua cute. Evocoyase ndahe iri ahe porocuitavrive yaico.

<sup>26</sup> Pe niha opacatu Tūpa rahir peico Jesucristo rese yeroya pipe.

<sup>27</sup> Opacatu pe ñapiramombri peico vahe Jesucristo rupi pe guata āgua, secocuer avei pereco.

<sup>28</sup> Iyavei ndipoi eté yemboyahosa Jesucristo rese yaicose, yepera que judío viña, ndahei vahe judío; anise mbiguai, ndahei vahe mbiguai; que cuimbahe, cuña avei. Esepia, opacatu ñepe vahe nungar ité yaico Cristo rese.

<sup>29</sup> Jesucristo rese peicose, pe evocoyase Abraham suindar nungar tupri ité peico. Evocoyase pe avei peipisira Tūpa remimombehu porerecosa yandeundar.

## 4

<sup>1</sup> Amboyopari vitera co che ñehesa pēu: inungar que ava omanose, oseyá ombahe eta guahir upe chíhivahemise. Yepe ahe tahir opacatu mbahe yar secoira viña, ahe rumo inungar tupri mbiguai tēi secoi vahe yepi.

<sup>2</sup> Esepia, ahe guārosar povrive secoi imboyeroya āgua. Ocuacuase voi eté, opoira tu remimombehugüer rupi ichui.

<sup>3</sup> Ēgüe ehi avei yandeu. Yande chíhivahemise, evocoyase mbiguai nungar yipindar vahe co ivi pipendar porocuitavrive yaico.

<sup>4</sup> Oyepotase rumo ari imombehupri, Tūpa ombou Guahir, ahe oha cuña sui; evocoyase ahe Moisés porocuitavrive secoi.

<sup>5</sup> Ēgüe ehi ou opacatu yande renose āgua evocoi mborocuitavri sui Tūpa rahir ité yande reco āgua.

<sup>6</sup> Evocoyase Tūpa omboyecua Guahir yande recose ombouse Guahir Espiritu yande piha pipe, “¡Che Ru!” yande he āgua chupe.

<sup>7</sup> Sese yande Tūpa rahir ité yaico, ndahe iri cūritei mbiguai tēi nungar. Tūpa rahir yande reco pipe ahe ombou aveira oporerecosa yande mahera.

### *Pablo ipihañemoñetaño ité Jesús reroyasar rese oico*

<sup>8</sup> Yipindar tūpa angahu rembiguai tēi peico Tūpa ité cuaēhi pipe.

<sup>9</sup> Cūritei rumo peicua Tūpa, ēgüe ehi rumo Tūpa ité oicua pe recocuer. Sese niha aipo ahe cheyeupe: “¿Mara ehi piha oyevi iri mborocuita tēi pipe mbiguai tēi güeco iri āgua yuvireco?” ahe pēu.

<sup>10</sup> Esepia, pemboetei vite ari, yasi, araviter pieta eta tēi peico.

<sup>11</sup> ¡Che ayembosiquiye pe rese, “Che porombohesa revo ēgüe ehi tēi vahe ipāhuve yuvireco chupe” ahe pēu!

<sup>12</sup> Iyavei che rivireta, aipota che recocuer moña peye. Esepia, cuese che asē Moisés porocuita povri sui inungar pe yipindar ēgüe ahe vichico pe pāhuve. Ahese ndapeyapoi eté mbahe cheu.

<sup>13</sup> Peicua niha che yipindar chembaheasise vichico, ahese amombehu co ñehesa piñsirosa resendar pēu.

<sup>14</sup> Yepe co che mbaherasisa yavai etepri pēu viña, pe rumo ndache reroiroi eté peye iyavei ndache momboi peye. Ēgüe ehi rumo aviye acoi Tūpa rembiguai eté che rereco peye viña iyavei aviye Jesucristo itera aico pēu viña no.

<sup>15</sup> ¡Mahera ru cūritei ndapeyemboviharete vitei che rese peico eipeve! Esepia, supi eté, cuese acoi que pe resa teieté revo pemboura cheu viña.

<sup>16</sup> ¡Evocoyase cūritei che amotarēhi tie peye acoi pēu mbahe supi tupri vahe mombehusa sui tēi!

<sup>17</sup> Evocoi ava iquerēhi ité pe rese, ndahei rumo mbahe aviye vahe apo āgua yuvireco. Ahe rumo oipota pe mboyepipi āgua tēi ore sui yuvireco pe querēhi āgua supi.

<sup>18</sup> Avīye ité niha yande querēhise mbahe apo ambuae ava upe, mbahe avīye vahe apo āgua rumo. Ndahei chira pe pāhuve che recoseño pereco pe querēhisa. Iyacatu rumo pequerēhiño itera yepi.

<sup>19</sup> Che rahireta, che ayembopiharasi ité vichico pe rese. Inungar cuña imembirasi vahe; ēgüe aheño itera ayemombaraisu vichico ‘toico rane ité Cristo sese yuvireco’ che yapave pēu.

<sup>20</sup> Cūritei rāgüer opoepiara viña añehe tupri catu āgua pe rese. Esepia, “¿Mara ahera revo sereco yuvireco?” ahe pēu.

### *Agar, Sara recocuer resendar yembohesa*

<sup>21</sup> Pe peroya pota vahe Moisés porocuita pe reco catupri āgua, pemombehumi cheu: ¿Ndapesenducuai tie co mborocuita aipo ehi vahe?

<sup>22</sup> Esepia, aipo ehi: Abraham aipo vireco ñuvirío guahir, ñepei tahir aipo sembiguai Agar membri, ambuae tahir evocoyase sembireco Sara membri.

<sup>23</sup> Evocoi sembiguai membri oha que ava tēi yesu nungar; sembireco membri rumo oha Tūpa remimombehugüer rupi eté.

<sup>24-25</sup> Co tecocuer mboyoyasa yaracua vahe ité. Co ñuvirío cuña sui yayembohe ñuvirío Tūpa remimbotar rese. Yipindar sembiguai Agar omboyecua evocoi porocuita imondopri Arabia pipendar ivitri Sinaí ve aracahe. Ahe cuña mbiguai tēi inungar Jerusalén upendar ava. Esepia, ahe Moisés porocuitavrive yuvirecoi. Ēgüe ehi avei opacatu Moisés porocuita pipendar, yuviroha mbiguai nungar güeco āgua, opacatu ichuindar ēgüe ehi vite yuvireco.

<sup>26</sup> Yande rumo inungar-ra que Jerusalén iva pendar suindar yaico viña ēgüe yahe yaico mbiguaiēhi.

<sup>27</sup> Esepia, icuachiapri aracahendar pipe aipo ehi:

“Eyembovihareté, cuña nimembii vahe;

esapucái nde rorivetsa pipe, nde ndereiporarai vahe nde membri rasicuer.

Esepia, acoi cuña seyapri imembii ati catura cuña omer vireco vahe sui” ehi.

<sup>28</sup> Che rivireta, inungar Sara membri Isaac, ēgüe yahe avei tahir ité yaico Tūpa remimombehugüer rupi.

<sup>29</sup> Co rumo aracahe sembiguai membri oha vahe ava tēi yesu nungar, ahe ndoyambotai sembireco membri acoi Espiritu pīratasa pipe sui oha vahe; cūritei ēgüe ehi tupri avei.

<sup>30</sup> ¿Mara ehi icuachiapri aracahendar pipe? “Pemboyepipi pe rēta sui cuña mbiguai tēi imembii reseve. Esepia, cuña mbiguai tēi membri ndiyai oyoya cuña ndahei vahe mbiguai membri rese vu mbahe pisi āgua yuvireco” ehi.

<sup>31</sup> Sese, che rivireta, yande ndahei sembiguai tēi membri nungar yaico, yande rumo sembireco membri nungar yaico. Esepia, ahe ndahei mbiguai.

## 5

### *Peyemoviracuaño ité Moisés porocuita pipe pe recoēhi āgua*

<sup>1</sup> Jesucristo niha ombou yandeu mbiguai tēi nungar sui yande sē āgua. Sese peyemoviracua mbiguai tēi pe reco iriēhi āgua.

<sup>2</sup> Pesendu che ñehe. Che, Pablo, aipo ahe pēu: acoi peyembocircuncida ucase, ahese ēgüe ehi tēi vahe Cristo pereco.

<sup>3</sup> Che amombehu pota irimi pēu, que ava oyembocircuncida uca vahe, vireco niha ocuaita opacatu Moisés porocuita mboyeroya āgua.

<sup>4</sup> Pe pereco catupri pota tēi vahe Tūpa rovaque evocoi porocuita tēi reroya pipe, peyepipi ité Cristo sui. Evocoyase Tūpa porovasasa avei pemocañi tēi peyesui.

<sup>5</sup> Yande rumo yande querêhisa pipe yayeroya yande reco catupri ãgua rese. Êgüe yahe Espíritu yande pítiviisa pipe iyavei Jesús rese yeroyasa pipe avei.

<sup>6</sup> Esepia, acoi yaicose Jesucristo rese, yepe yayembocircuncidase, anise ndayayembocircuncidaise, ahe ndayande pítivii eté yande reco catupri ãgua Tûpa rovaque. Co güeraño rumo yande pítivii Jesús rese yande yeroyasa. Ahe niha yande mboyeaisu uca.

<sup>7</sup> Peico tupri niha yipindar viña. ¡Ava ru ndoviroya uca iri mbahe supi tupri vahe pëu!

<sup>8</sup> Ndahei eté rumo pe poravosar Tûpa êgüe ehi pëu.

<sup>9</sup> ¿Ndapeicuai vo acoi aipo ehi vahe: “Chîhimi pan mboapeposa oso panguã rese opacatu rupi oicahopa tupri yepi” ehi?

<sup>10</sup> Che rumo ayeroya yande Yar rese pe pîhañemoñeta ãgua che pîhañemoñetasa rupi. Tûpa rumo omboura oñemoirosa que ava pe mbopîhañemoñeta yoavirati uca vahe upe.

<sup>11</sup> Che rumo, che rivireta, “Iya yayembocircuncida yande reco catupri ãgua” ahe vitese Jesús reroyasar upe viña, ahese revo ndipoi chira che amotarêhisar judío pâhuve, ahese avei ndipoi chira ñehesa curusu rese Jesús manosa resendar amotarêhimbar ipâhuve viña.

<sup>12</sup> Evocoi ava pe mbopîhañemoñeta yoavirati uca vahe circuncisión rese yuvireco, ¡mahera ahe ae ndoyeasiapa voi ñepeï reseve yuvireco!

<sup>13</sup> Esepia, pe ore rivireta, Tûpa niha pe renoi mbiguai têi nungar pe recosa sui pe renose ãgua. Ndahei chira rumo pe remimbotarai têi apo ãgua, iyacatu rumo peñepítivira pe yeaisusa pipe.

<sup>14</sup> Esepia, opacatu evocoi mborocuita imboaviyesa yamboaviyese co ñehesa aipo ehi vahe: “Esaisu ambuae ava nde yeaisu nungar” ehi vahe.

<sup>15</sup> Peyeseño tetei rene catu; peicua catu, aviyeteramo êgüe peyese, pe recocuer pemomarapa tiêtera.

*Yaguarata Espíritu remimbotar rupi, ndahei yande remimbotar têi rupi*

<sup>16</sup> Pesendu che ñehes: Espíritu pîratasa pipe catu peico yepi. Iyavei peyapoi rene mbahe pe remimbotarai.

<sup>17</sup> Esepia, co pe remimbotarai ndahoyoyai eté Tûpa Espíritu remimbotar rese. Ndoymbohe catui eté. Sese ndapeyapo ucai mbahe pe remimbotar aviye vahe peyeyupe.

<sup>18</sup> Acoi Espíritu ité pe reroguatase, ahese ndahe iri chaveira Moisés porocuitavrive peico.

<sup>19</sup> Yande remimbotarai suindar yande rembiapo ai icuasa tupri ité. Ahe: yemboaguasa têisa, teco quihasa, mbahe têi aposa;

<sup>20</sup> mbahe rahanga upe yerure têisa, yembopayesa, ñeroirosa, ñehepoepi-episa iyavei ambuae ava mbahe pota raisa; ñemoiro seraisa, yemboyaho-yahosa, pîhañemoñeta yoyaêhisa,

<sup>21</sup> iyavei ambuae ava mbahe pota raisa rese ñemoirosa, savaiposa, yembopieta têisa iyavei ambuae mbahe co nungar tupri aposa. ¡Peicua catu! Esepia, evocoi nungar mbahe aposar ndoyuviroiquei chietera Tûpa mborerecuasave yuvireco curi.

<sup>22</sup> Yayapose rumo Espíritu remimbotar, yande evocoyase yayeaisura, yande rorivetera, yaicora mbahe tupri pipe, yande reco mbegüera, yaporoaisura yande reco aviyesa pipe, yamboyecuara yande cuaita mboaviyesa,

<sup>23</sup> yayemominiñora iyavei yande recorã rese yañearo tuprira. Evocoi nungar yayapose, ndipoi eté que mborocuita pipe yande yeamotarêhi ãgua.

<sup>24</sup> Jesucristo rese ité yuvirecoi vahe rumo, opa ité omombo güecocuerai co ivi pipendar têi oyesui yuvireco, güemimbotarai, opîhañemoñeta raisa avei no.

<sup>25</sup> Yande yaicose Espíritu pîratasa rese, ahese Espíritu rupi eté yaguarata.

<sup>26</sup> Ndayayemboivate ai chira. Esepia, ipipe sui yayeamotarêhi, yaipota rai avei yande mboetasa recocuer nungar yande reco ãgua.

## 6

*Peñepitiviñ ñepei-pei*

<sup>1</sup> Che rívíreta, acoi que Jesús reroyasar pe pãhu pendar oyavise güecocuer, pe peico vahe Espíritu rese, peipitiviñ secocuer moingatu ãgua pe recocuer mbegüemisa pipe. Peicua catura rumo, aviyeteramo oyoya voi peyemboangaipa uca tiêtera.

<sup>2</sup> Peñepitivi-tiviñ catu que mbahe yavai rai vahe rese. Êgüe peyese, Jesucristo porocuita pemboaviyera.

<sup>3</sup> Amove ava, “Che ivate catu vahe aico” ehi tõi. Êgüe ehi rumo ahe ae oyembopa aipo ohesa pipe oico.

<sup>4</sup> Sese niha ñepei-pei eté yaicua tuprira yande recocuer. Aviyese, evocoyase sese yaviharetera. Ndahei acoi ambuae ava recocuer rese tõi yamboyyara yande recocuer.

<sup>5</sup> Esepia, ñepei-pei eté yande yacatu yareco yande cuaita imboaviye ãgua.

<sup>6</sup> Acoi oyembohe vahe Tũpa ñehe pĩsĩrosa resendar rese, tomondo ombohesar upe mbahe güembiereco ipĩtiviñ ãgua.

<sup>7</sup> Peyembopa eme catu pe ae. Ndipoi chietera que ava viroĩro vahe Tũpa ñemoĩrosa pĩsiẽhisa pipe. Êgüe ehi eté: yañotise mbahe, ichui avei mbahe yaipĩsira.

<sup>8</sup> Acoi ava rumo oyapo vahe mbahe güemimbotarai pipe, ahe oipĩsira cañisa apirẽhi vahe. Acoi oyapo vahe mbahe Espíritu remimbotar rupi, ahe oipĩsira tecovesa apirẽhi vahe yuvireco.

<sup>9</sup> Evocoyase tayandecuerai eme mbahe tupri aposa pipe. Esepia, acoi ndayandecueraise, yaipĩsira mbahe tupri apo repri.

<sup>10</sup> Sese yande catugüer rupi yayapo mbahe icatupri vahe opacatu upe; yande mboetasa Jesús reroyasar upe ité rumo yayapora.

*Pablo, “Peicua catu pe mbocircuncida pota vahe sui” ehi iyavei ñehesa ipa vahe*

<sup>11</sup> ¡Pesepia co ñehesa ipa vahe che pove ité aicuachía tuvicha vahe pẽu!

<sup>12</sup> Acoi judío Jesús reroyasar pe mbocircuncida uca potaño tõi vahe ‘Co mbia aviye ité, tehi ndahei vahe Jesús reroyasar judío yuvireco yandeu’ ohesa pipe tõi êgüe ehi yuvireco viña. Esepia, ndoipotai evocoi judío oamotarẽhi co ñehesa Cristo atica agüer mombehu pipe yuvireco.

<sup>13</sup> Acoi oyembocircuncida uca tõi vahe avei rumo nomboaviyei eté opacatu mborocuita yuvireco. Oipota rumo pe mbocircuncida ucara oyemboivate ai ãgua pe cuaise evocoi nungar apo yuvireco.

<sup>14</sup> Che rumo ndayemboivate potai eté. Curusu rese yande Yar Jesucristo mano agüer rese güeraño ité ayemboviha. Imano agüer sui co ivi pipendar mbahe pota raisa opa ité che sui. Che evocoyase inungar omano vahe aico chupe.

<sup>15</sup> Yepe que yayembocircuncidase revo, anise que ndayayembocircuncidaise viña, ndayande pĩtiviñ eté Cristo rese yaico tupri ãgua. Co rumo aviye vahe ité yandeu: Tũpa yande recocuer mbopiasuse.

<sup>16</sup> Opacatu yuvirecoi vahe co ñehesa che remimombehugüer rupi iyavei opacatu Tũpa upendar supi eté vahe toipisi Tũpa suindar teco tuprisa iyavei iporoparisuerecosa yuvireco.

<sup>17</sup> Aviye, co pipe suive ndaipota iri que ava che mañeco tõi vaherã. Esepia, che areco che retocuer rese che apicha-picha agüer. Ahe omboyecua Jesús rembiguai che recosa.

<sup>18</sup> Che rívíreta, yande Yar Jesucristo tape rovasa opacatu. Aipo rupive.

## PABLO REMBICUACHIA EFESO PENDAR UPE EFESIOS

### *Pablo mahenduhasa Jesús reroyasar Efeso pendar upe*

<sup>1</sup> Che, Pablo, Jesucristo apóstol aico Tūpa remimbotar rupi. Che aicuachía co che ñehe pēu pe Efeso pendar, Tūpa upendar Jesucristo reroyasar peico vahe.

<sup>2</sup> Yande Ru Tūpa iyavei yande Yar Jesucristo tombou oporovasasa pe reco tupri āgua pēu.

### *Cristo suindar porovasasa*

<sup>3</sup> Yande Yar Jesucristo Ru Tūpa imboeteipri tasecoi. Ahe ombou opacatu porovasasa iva sui yande Cristo rese yaico vahe upe.

<sup>4</sup> Sese niha Tūpa yande poravo yipivé ité ivi apoēhi viteseve ‘toyuvirecoi cheu nara ité iyavei tasecomara eme yuvireco che rovaque’ oyapave oporoaisusa pipe.

<sup>5</sup> Ipípe avei yipisuive yande pisi guahirguā Jesucristo yande pīsirosa pipe güemimbotar rupi.

<sup>6</sup> Sese yande yasapucái chupe iporoaisusa porañete vahe rese yepi. Ahe ipípe niha yande rovasa Guahir güembiaisu sui.

<sup>7</sup> Tūpa yande raisu eteprisa pipe yande pīsiro Guahir ruvi piyeresá pipe yande angaipa rese ñero āgua.

<sup>8</sup> Yande raisu pipe avei ombou opacatu yande aracua āgua iyavei yande yapisaca āgua avei yandeu,

<sup>9</sup> iyavei oicua uca güemimbotar yipisuive ndicuasai vahe yandeu co güembiaiporā mboaviye āgua.

<sup>10</sup> Oyepotase ahe ari imboaviye āgua, Tūpa opacatu mbahe iva pendar, co ivi pipendar avei opara omoingue ñepei reseve Guahir Cristo povrive.

<sup>11</sup> Cristo rese yaicose, Tūpa yande poravo yipisuive ichuindar mbahe yandeundar pisi āgua. Opacatu rumo mbahe Tūpa remimbotar rupi. Ahe niha oicua ité güemimbotar apo āgua

<sup>12</sup> ‘tomboetei che mborerecuasa ava yuvireco che Rahir rese yeroyasar yipindar yuvirecoi vahe recocuer repiase’ oya oreu.

<sup>13</sup> Pe avei niha, pesenduse co ñehesa supi eté vahe pīsirosa resendar, Cristo peroya pe piha pipe sese peico vaherā. Tūpa ombou güemimombehugüer Espíritu Santo pe piha pipe ‘cheundar ité yuvirecoi’ oya.

<sup>14</sup> Ipísisa pipe niha yaicua yande yaipisi vaherā yandeundar mbahe imoingatupri, acoi Tūpa opase oipīsiro ava oyeupendar ‘ipípe sui tomboetei che reco ivatesa ava yuvireco’ oya.

### *Pablo oporandu Tūpa upe mbahecuasa Jesús reroyasareta upe mondo āgua*

<sup>15</sup> Ayandu peyeroya tupri yande Yar Jesús rese iyavei pesaisu ité ava opacatu Tūpa upendar.

<sup>16</sup> Sese ndapoi eté Tūpa upe, “Aviye ndeu” che hesa sui chemahenduhase pe rese che yeruresa pipé.

<sup>17</sup> Che aporandu yande Yar Jesucristo Ru Tūpa seco porañete vahe upe, pe recocuer resape āgua rese. Ipípe peicua tupri catura semimboyecua iyavei peicua tupri catura yande Yar.

<sup>18</sup> Ēgüe ahe ité aporandu Tūpa upe pe piha resape āgua rese. Ipípe peicua catura co pesāro vahe ivave pe reique āgua; chupe nara ité Tūpa pe peha. Iyavei peicuara co mbahe imondopirā iva pendar iporañete vahe Tūpa upendar yuvirecoi vahe upe.



19-20 Ipípe sui peicua tupri aveira Tūpa pīratasa ndopai vahe yande seroyasar yaico vahe rese. Co pīratasa ivaté vahe ité. Ahe pīratasa Tūpa omboyecua, ombogüerayevise Guahir Cristo omano vahe pāhu sui, iyavei omboguapise oacato coti ivave.

21 Osecomboivate catu opacatu iva pendar, ivi pendar seco ivate vahe mborerecuar recuar tēi pīratasa sui iyavei opacatu cūrteindar sui, que oime vahe rā sui avei.

22 Opacatu mbahe omondo Guahir Cristo povrive, Tahir upe avei ombou mborerecuar ivate catu vahe seco āgua opacatu viroyasar upe.

23 Opacatu yande seroyasar yaico vahe recouer rese Cristo seci. Evocoyase yande setecuer nungar yaico. Ahe opacatu rupi seci.

## 2

### *Tūpa oporovasasa pipe yande pīsiro*

1 Pe rumo, yipindar angaipa pipe peicose, inungar omano vahe peico Tūpa upe.

2 Co ivi pipendar pihañemoñetasa rupi tēi peico iyavei ivate rupindar carugar rerecuar porocuaita tēi avei peroya, ahe Jesús reroyasarēhi ombohe vahe.

3 Yipindar opacatu yande avei yaguata yande remimbotar rupi tēi yande recocuera i pipe. Yande pihañemoñeta raisa rupi tēi avei yayapo mbahe. Sese Tūpa ñemoirosa yaipisira opacatu ambuae ava rupive viña.

4 Tūpa rumo yande paraisuereco ité, yande raisu etepri avei.

5 Yepe angaipa pipe yaico omano vahe nungar viña, ahe rumo ombou Guahir yande recove āgua. Ahe oporovasasa pipe yande pisiro.

6 Yande mbogüerayevi iri avei niha sese. Ipare seseve yande moingue oyepiri ivave

7 “tamboyecua opacatu iva pendar upe che porovasasa iyavei che poroaisusa tuvicha vahe che Rahir rembiapo pipe sui curi’ oya.

8 Esepia, oporovasasa pipe pe pīsiro Jesús rese peyeroyase. Ndahei rumo pe recouer sui tēi peñepisiro, ahe rumo ombou porerecosa pēu.

9 Ndahei avei ava rembiapo sui tēi ou vahe. Evocoyase ndiyai chira yayemboivate ai ipipe.

10 Tūpa niha yande recouer mohivi Jesucristo rese yande reco āgua mbahe icatupri vahe apo āgua. Ahe mbahe icatupri vahe yipisive Tūpa omoime yande rembiaporā.

### *Cristo ombou yande reco tupri āgua*

11 Evocoyase peyemomahenduha yipindar pe recouer rese. Ndahei rumo judío suindar peico: “Co ndoicuai vahe Tūpa, ndoyembocircuncidai vahe tēi yuvirecoi” ehi judío yuvireco pēu, (ahe judío oyembocircuncida vahe güete rese oyeupe, “Yande Tūpa rembiporavo imbocircuncidapri yaico” ehi yuvireco).

12 Peyemomahenduha yipindar Cristo ndaperecoi vahe rese. Ahese ndapeicoi Tūpa rembiporavo Israel recua pendar iyavei ndapecuai Tūpa remimbotar semimombehu avei ombou vahe judío upe ipitivi āgua; ndaperecoi Tūpa iyavei ndaperecoi sārosa pe ñepisiro āgua co ivi pipe viña.

13 Esepia, ahese amombrī Tūpa sui peico. Cūrte i rumo Jesucristo rese peico. Esepia, ahe vuvī pipe pe reru Vu Tūpa upe.

14 Ahe avei niha teco tuprisa yandeu. Esepia, ahe yande mboyeseha judío, ndahei vahe judío ñepei vahe nungar yande yeamotarēhiēhi iri āgua oyeupe. Yande ñemoirosa niha opa omocañi yande sui güetecuer mondosa pipe.

15 Cristo omomba opacatu Moisés porocuaita. Ahe oipota ñepei ava nungar teco piasu pipe yande reco āgua, judío iyavei ndahei vahe judío. Ēgüe ehi imocañipa yande yeamotarēhisa yande sui yande reco tupri āgua.

16 Evocoyase ahe ae omanose curusu rese, ombou yandeu yandeyeupe ñero āgua judío, ndahei vahe judío ñepei ava nungar Tūpa rupi yande reco āgua.

<sup>17</sup> Ahe ou omombehu co tecocuer piasu pëu pe amombri Tūpa sui peico vahe, omombehu avei ore namombrii vahe judío oroico vahe upe 'tiñero yuvireco oyeupe' oya.

<sup>18</sup> Esepia, Cristo rembiapo pīpe sui niha oyoya yande judío iyavei ndahei vahe judío yaico vahe yayemboya vaheerā Tūpa rese Espiritu ñepei vahe pīpe.

<sup>19</sup> Sese pe ambuae ivi pendar peico vahe, ndahe iri amombri Tūpa sui peico cute. Cūritei rumo Tūpa upendar ité peico opacatu ambuae seroyasar reseve. Yande evocoyase ñepei reseve oñemu guasu vahe nungar yaico.

<sup>20</sup> Pe inungar tūparo maranehi imopuhambri ihivipirā hari pendar peico; apóstol iyavei Tūpa ñehe mombehusar evocoyase inungar ihivipi yuvirecoi tūparo moviracua āgua. Jesucristo rumo inungar ita yipindar vahe imohivisa yandeu.

<sup>21</sup> Ichui Cristo opa yande mboyeseha oyese, inungar oi imopuhambri oyeupi catu-catu iri vahe tūparoguā, ēgüe vahe ipehapri yaico yande Yar upe nara sese ité yande reco āgua.

<sup>22</sup> Sese niha, Cristo rese peicose, pe ambuae viroyasar rese avei sētarā nungar peico. Ipīpe Tūpa, oEspiritu pīpe, secoira.

### 3

#### *Pablo cuaita ñehesa pīsīrosa resendar mombehu āgua ava ndahei vahe judío upe*

<sup>1</sup> Sese, che Pablo, soquendapri aico cohava Jesucristo recocuer mombehusa sui tēi. Ndahei vahe judío peico vahe pe recocuer aviye āgua rese ēgüe ahe.

<sup>2</sup> Peicua tupri revo co che poraviquisa Tūpa ombou vahe cheu oporovasasa mombehu āgua pëu nara.

<sup>3</sup> Co ñehesa yipindar ndicuasai vahe güemimbotar resendar Tūpa omboyecua uca vahe cheu, ahe niha aicuachía chíhi pëu.

<sup>4</sup> Co rese peyeroquise peicua tupri catura co che aracuasa Cristo recocuer resendar oyecua ramo vahe.

<sup>5</sup> Co ñehesa icatupri vahe ndoicuai eté ava yuvireco aracahe. Cūritei rumo Tūpa oEspiritu pīpe omboyecua güembipeha yuvirecoi vahe upe. Ahe sembipeha apóstol, iñehe mombehusar avei yuvirecoi.

<sup>6</sup> Evocoi oyecua ramo vahe, ahe co: pe ndahei vahe judío upe avei Tūpa omboura judío upendar nungar tupri porovasasa co ñehesa poropīsīrosa resendar reroyasa pīpe. Pe avei oñemu nungar tupri peico, oyoya ore judío oroico vahe rese. Pëu nara avei Tūpa remimombehugüer aracahendar peyeroyase Jesucristo rese.

<sup>7</sup> Yepe ndiyai cheu viña, Tūpa rumo che moingo opīratasa pīpe ñehesa pīsīrosa resendar mombehu āgua.

<sup>8</sup> Che recocuer niha ivi coti catu opacatu ambuae Tūpa reroyasar sui viña, ahe rumo ombou oporovasasa co mboraviquisa ñehesa aviyé vahe Cristo recocuer resendar mombehu āgua ava ndahei vahe judío upe nara cheu.

<sup>9</sup> Iyavei ombou che cuaitarā amombehu tupri vaheerā opacatu ava upe opacatu mbahe Aposar pīhañemoñetasa yipindar ndicuasai vahe.

<sup>10</sup> Ēgüe ehi cūritei oyesuindar aracuasa cua uca āgua viroyasareta recocuer rese opacatu mborerecuar guasu, seco pīrata vahe iva pendar upe.

<sup>11</sup> Ēgüe ehi, Tūpa opīhañemoñeta ndopai vahe mboaviye Guahir, yande Yar Jesucristo rese.

<sup>12</sup> Sese yande yeroyasa suiño ité yaicatu yande yemboya āgua Tūpa rese yande siquiyeēhisa pīpe.

<sup>13</sup> Sese aní chira, ndapequerēhi iri Cristo rupi pe guata āgua, pe recocuer rese che yemombaraisusa sui. Iyacatu rumo che paraisusa pereco pe yemboviha āgua.

#### *Cristo poroaisusa*

<sup>14</sup> Sese añenopiha yande Ru Tūpa rovaque.

<sup>15</sup> Ichui serer pãve vïreco yuvïreco, opacatu seroyasareta ìva pendar, ìvi pendar avei ñepei oñemu yuvïrecoi vahe nungar.

<sup>16</sup> Che aporandu chupe ‘tombou güeco porañetesa sui opĩratasa yuvïreco chupe oEspĩritu pĩpe imoviracua ãgua’ viya pẽu.

<sup>17</sup> Ëgüe ahe ayeroqui pe rese pe pĩha pĩpe Cristo rereco ãgua sese pe yeroyasa pĩpe. Iyavei pe poroaisusa pĩpe pe yemoviracua catu ãgua peyese

<sup>18</sup> ‘toicatu opacatu ambuae Jesús reroyasareta reseve Cristo poroaisusa tuvichá vahe ité renducua tupri catu ãgua yuvïreco’ viya pẽu.

<sup>19</sup> Che ayeroqui ahe poroaisusa peicua tupri catu ãgua rese (yepes ndayaicatui icuapa tupri ãgua yaico viña). Ipĩpe sui Tũpa tasecoi pe rese.

<sup>20</sup> Cũritei yamboetei yande Ru Tũpa. Esepia niha, ahe opĩratasa pĩpe ombouvicha catu itera mbahe yande porandusa sui, yande pĩhañemoñetasa sui avei yandeu. Esepia, opĩratasa pĩpe oporaviqui yande rese.

<sup>21</sup> ¡Sese ãgüe tehi imboeteipri Tũpa tasecoi seroyasareta recocuer sui, Jesucristo sui avei apirẽhi vaheerã!

## 4

### *Ava Espĩritu rese oyoya guasu yuvïrecoi vahe*

<sup>1</sup> Sese Cristo recocuer mombehusa sui che roquendasa pĩpe, “Peico tuprira pe cuaita rupi Tũpa pe renoisa pĩpe” ahe pẽu.

<sup>2</sup> Peyemominira peico pe reco aviyesa pĩpe, pe reco mbegüesa pĩpe aveira iyavei peñemosañe pe yeaisusa pĩpe peyeupe.

<sup>3</sup> Peyapo opacatu pe recocuer pĩpe peico tupri vite ãgua peyepãhuve Espĩritu Santo pe pĩtivĩisa pĩpe, pe reco tuprisa pĩpe avei.

<sup>4</sup> Yaico ñepei nungar Cristo rese iyavei yareco ñepei Espĩritu. Ëgüe ehi avei Tũpa yande poravo ñepei guãrosa rereco ãgua.

<sup>5</sup> Oime ñepei yande Yar, ñepei yande yeroyasa, oime avei ñepei poroãpiramosa.

<sup>6</sup> Oime ñepei Tũpa, ahe opacatu yande Ru, opacatu yande cuaisar, ahe oporaviqui opacatu yande rese, secoi avei yande rese no.

<sup>7</sup> Iyavei Cristo niha yande yacatu ñepei-pe mbahecuasa ombou.

<sup>8</sup> Sese aipo ehi icuachiapri aracahendar pĩpe:

“Oso ìvave, vïraso secopĩpĩreta oyeupi; omondo avei porerecosa ava upe” ehi.

<sup>9</sup> ¿Mara oya aipo ehi: “Oso ìvave”? Yipĩndar ogüeyi co ìvi pĩpe.

<sup>10</sup> Acoi ogüeyi vahe co ìvi pĩpe oso ìvate catusave ‘taico opacatu rupi’ oya.

<sup>11</sup> Ahe niha ombou amove apóstol seco ãgua, ambuae upe ombou Vu ñehe mombehu ãgua, ambuae upe ombou ñehesa pĩsĩrosa mombehu ãgua, ombou avei ambuae upe vïroyasar rãro ãgua iyavei iporombohe ãgua.

<sup>12</sup> Ëgüe ehi ava vïroyasar mbohe oyeupe mboraviqui apo ambuae vïroyasar moviracua tupri catu ãgua.

<sup>13</sup> Opacatu yaico tupri rane itera oyese Jesús rese yeroyasa pĩpe iyavei yaicua tuprira Tũpa Rahir recocuer. Ahese yaico tuprira yande Cristo rese inungar ava ipĩhañemoñeta tupri catu vahe, ahese yasupitira Cristo recocuer yaico.

<sup>14</sup> Evocoyase ndahe iri chira chĩhivahe tẽi nungar ova-ova tẽi vahe yaico inungarra que ìvitu yande reraso vahe oyeupi. Ndayayembopa uca iri chira ava co coti tẽi oporombohe vahe upe, que yande rerova pota vahe upe mbahe tẽi pĩpe.

<sup>15</sup> Yande rumo evocoyase yañehera mbahe supi eté vahe rese poroaisusa pĩpe iyavei yaroya catu-catu irira Cristo opacatu yande recocuer pĩpe. Ahẽ niha yande rerecuar secoi.

<sup>16</sup> Esepia, ahe yande mboya tupri oyese, yande moenda tupri avei yande rereco, ěgüe ehi ahe yande mboyemboya oyese ñepei vahe nungar. Ñepei-pei yaporaviqui tuprise, ahese opacatu yayeroya catu itera, yayemoviracua catu aveira yande yeaisusa pipe.

### *Cristo yande recocuer mbopiasu*

<sup>17</sup> Che aipo ahe Tūpa rer pipe pēu che pe cuaisa pipe: peico iri eme ava Tūpa cuaparēhi nungar. Ahe yuvirecoi vahe ité opihañemoñeta raisa pipe,

<sup>18</sup> ndoicatui mbahe renducua tupri āgua iyavei ndovirecoi tecovesa Tūpa suindar oyese yuvireco. Esepia, ndoicuai Tūpa ñehe opihañemoñetaēhisa pipe yuvireco.

<sup>19</sup> Ndoyuvinochi iri mbahe tēi apo āgua iyavei oyemondo ité mbahe tēi pipe. Ndosiquiyei eté opacatu güemimbotarai apo āgua yuvireco.

<sup>20</sup> Pe rumo ndapeyembohei eté evocoi nungar mbahe rese Cristo rese peicose,

<sup>21</sup> supi eté pesenduse porombohesa supi tupri vahe Jesucristo resendar iyavei peyembohesa secocuer rese.

<sup>22</sup> Ahe yande mbohe yande recocuerai yipindar vahe reya āgua. Esepia, ahe naporai vahe yande mbopa tēi yande pihañemoñeta rai apo āgua.

<sup>23</sup> Pesecuñaro catu pe yapisacasa.

<sup>24</sup> Peicoño ité avei pe recocuer piasu pipe. Sese niha Tūpa yande apo yande reco ĩvi tupri āgua yande reco maranehi vaherã supi tupri vahe pipe, inungar ahe.

<sup>25</sup> Sese ndaperemira iri chira, iya rumo peñehe ñepei-pei mbahe supi tupri vahe rese peyeupe. Esepia niha, yande opacatu ñepei ava rete resendar nungar yaico.

<sup>26</sup> Peyemboangaipai rene peñemoirose, iyavei ndiyai peñemoiro ari momba peico.

<sup>27</sup> Peipota ucai rene Carugar upe peyeupe mbahe apo āgua.

<sup>28</sup> Acoi imonda rai vahe, timonda iri eme; toporaviquiño ava iparaisu vahe p̃tivivi āgua.

<sup>29</sup> Ndapeñehe rai chira, iyacatu rumo peñehe tuprira ñehesa aviye vahe pipe ambuae pe ñehe rendusar monguerēhi catu āgua yuvireco yande Yar rese.

<sup>30</sup> Peyapoi rene mbahe Espiritu Santo mbovihadēhi āgua. Ahe niha Tūpa ombou yandeu 'toicua ava co cheundar oipisira ari ipa vahe pipe poropisirosa ñepei reseve vahe yuvireco' oya.

<sup>31</sup> Peyepepi co nungar mbahe sui: p̃iha ṽracuasa, mbahe mboasi p̃iratasa, ñemoirosa, pe rãse aisa, opacatu pe ñehe rai, opacatu ambuae mbahe-mbahe tēi sui avei.

<sup>32</sup> Iya rumo peico tupri ambuae upe pe yeaisusa pipe. Peñeroño itera peyeupe yepi inungar Tūpa iñero Guahir Cristo rese pēu.

## 5

### *Mara ehira ava Tūpa rahir yuvireco*

<sup>1</sup> Pe niha Tūpa rahir sembiaisu peico. Sese peyemonguerēhi catu secocuer moña āgua.

<sup>2</sup> Peico pe poroaisusa pipe, inungar Cristo yande raisu iyavei oyemondo yande recocuer rese, ovesa nungar seropovēhepri Tūpa uve. Ahe aviye ité inungar mbahe s̃iācua vahe chupe.

<sup>3</sup> Pe niha Tūpa upendar ité peico. Sese ndapeyemboaguasai chietera iyavei ndapeicoi chira ambuae mbahe naporai vahe pipe, que yemombotasa opacatu mbahe rese.

<sup>4</sup> Ndapeñehe rai chira que poromochisa rese, que ěgüe ehi tēi vahe rese, anise que co coti-coti tēi vahe rese. Esepia, evocoi nungar ndahei mbahe aviye vahe. "Aviye ndeu" peye catuñora rumo Tūpa upe peico.

<sup>5</sup> Peicua niha acoi oyemboaguasa vahe, oyapo vahe mbahe naporai vahe, que yemombotasa (esepia, ahe inungar mbahe rahanga mboeteisa), evocoi nungar ndoyuvirecoi chira Tūpa povrive iyavei Tahir Cristo povrive.

<sup>6</sup> Ndapeyembopa ucai chira evocoi nungar ñehesa tecocuer ěgüe ehi tēi vahe upe. Esepia, evocoi nungar mbahe apo pipe sui ou Tūpa ñemoirosa ava seroyasarēhi upe.

<sup>7</sup> Sese ndapeyemboyai chira evocoi nungar ava rese.

<sup>8</sup> Peicua niha yipindar peico p̄tumimbisa nungar mbahe-mbahe t̄i pipe. Cūritei rumo peico tesapesa nungar pipe yande Yar rese. Sese peico tupriño ité Tūpa suindar poroesapesa pipe.

<sup>9</sup> Esepia, poroesapesa pipe yande recose, yayapo opacatu mbahe tupri ava upe yande reco ñvi tuprisave, mbahe supi tupri vahe pipe.

<sup>10</sup> Sese peyembohe catu mbahe Tūpa piha rupindar apo āgua rese.

<sup>11</sup> Peyepipi ité opacatu p̄tumimbisa nungar ava rembiapo ai, ēgüe ehi t̄i vahe sui. Iya peicua uca voira co nungar mbahe.

<sup>12</sup> Esepia, ahe sembiapo yemoch̄isa ñomipri t̄i vireco yuvireco.

<sup>13</sup> Acoi yamboyecua ucasa rumo evocoi nungar mbahe tesapesa nungar pipe, ahese oyecua tupri secocuer naporai vahe.

<sup>14</sup> Esepia, co tesapesa omboyecua tupri opacatu mbahe recocuer yandeu. Sese aipo ehi:

“Peyemopoāse pe oque vahe nungar, peyepipi omano vahe nungar p̄ahu sui. Ahese niha Cristo pe recocuer resapera” ehi.

<sup>15</sup> Sese pemahecua tupri pe recocuer rese. Peicoi rene ndayaracuai vahe nungar; peicora rumo pe yapisaca tuprisa pipe.

<sup>16</sup> Peiporu catu ñepi-pei ari yande Yar upe nara pe recoveseve. Esepia, cūritei tecocuer co ñvi pipe mbahe t̄i.

<sup>17</sup> Sese peico eme ndoyemboaracuai vahe; iya rumo peyembohe catu yande Yar remimbotar apo āgua.

<sup>18</sup> Ndahei chira caguar t̄i peico, evocoi mbahe ndoporopoisui mbahe t̄i apo uca āgua. Peico catura rumo Esp̄ritu Santo pe mbohesa pipe.

<sup>19</sup> Peñehe catu Salmo pipe, opacatu Tūpa upendar sapucaisa pipe avei peyeupe; pesapucui, pemboetei avei opacatu pe piha pipe yande Yar.

<sup>20</sup> “Aviye” peyera opacatu mbahe rese yande Ru Tūpa upe yande Yar Jesucristo rer pipe yepi.

### *Omenda vahe cuaitarã mbiguai reseve*

<sup>21</sup> Peyemboyeroia catu ambuae rese Cristo mboeteisa pipe peico.

<sup>22</sup> Cuña tomboyeroia omer, inungar yande Yar omboyeroia yuvireco.

<sup>23</sup> Esepia, imer güembireco cuai āgua secoi, ēgüe ehi avei niha Cristo viroyasar cuai āgua oico. Viroyasar Pisirosar avei secoi, inungar güetecuer ité sereco.

<sup>24</sup> Evocoiyase inungar seroyasar omboyeroia Cristo yuvireco, cuña avei niha ēgüe ehira opacatu omer mboyeroia yuvireco.

<sup>25</sup> Iyavei cuimbahe osaisura güembireco, inungar Cristo osaisu opacatu viroyasar, oondo güecocuer chupe nara.

<sup>26</sup> Ēgüe ehi yande recocuer moatiro yande angaipa sui i pipe Tūpa Ñhengagüer reroyasave.

<sup>27</sup> Iyavei oyeupe yande rerecora yande reco catuprisa pipe iyavei yande reco quihañhisa pipe ‘tipo eme que mbahe t̄i secocuer rese’ oya, ‘toyuvirecoi cheu nara güeraño ité güeco tuprisave’ ohesa pipe.

<sup>28</sup> Ēgüe ehi aveira ava güembireco raisu inungar ahe oyeaisu. Acoi ava osaisu vahe güembireco, oyeaisu ité ahe ae.

<sup>29</sup> Supi eté, ndipoi eté que ava ndosaisui vahe güetecuer. Ahe rumo ocaruño ité oyemoviracua āgua, oñearo tupri avei. Ēgüe ehi avei Cristo opacatu viroyasar upe.

<sup>30</sup> Esepia, chupendar ité yaico setecuer nungar.

<sup>31</sup> “Sese ava osevara vu, osi güembireco rese güeco āgua; ñuvirío yuvirecoira ñepi ava nungar.”

<sup>32</sup> Ahe ñehesa pipe oime mbahe oyecua ramo vahe aviye vahe ité. Ahe Cristo opacatu seroyasareta resevendar ñehesa.

<sup>33</sup> Ëgüe ehi eté ñepepei-pesaisu pe rembireco pe yeaisu nungar. Iyavei cuña tomboetei tupri omer yuvireco.

## 6

<sup>1</sup> Chñhivahe, pemboyeroya pe yesupa, pe si avei yande Yar raisu pipe. Esepia, ahe niha pe cuaita.

<sup>2</sup> Co porocuaita yipindar omombehu vahe porovasasa pisi ãgua imboaviyesa pipe aipo ehi: “Pemboeteira pe ru, pe si avei.

<sup>3</sup> Ëgüe peyese, pe rorivetera iyavei pe reco pãhumbucu catura co ivi pipe” ehi.

<sup>4</sup> Iyavei pe iyepia, pemoñemoiro ucai rene pe rahir. Iyacatu rumo pemboacua imboaracuasa tupri pipe, imbohesave avei yande Yar upe saisusa pipe.

<sup>5</sup> Pe avei no mbiguai, pemboyeroya catura pe rerecuar co ivi pipe imboeteisave. Ichui pe siquiyepave avei mbahe tupri pipe mbahe peyapora inungar-ra Jesucristo upe ité mbahe peyapo vahe ña viña.

<sup>6-7</sup> Pe poraviqui tupri catu chupe nara, ndahei chira rumo pe repiaseño imboviha ãgua tẽi; pe poraviquira rumo pe querẽhisa pipe Cristo rembiguai pe recosa pipe opacatu pe rorivetesave yande Yar upe pe cuaita mboaviye tupri ãgua.

<sup>8</sup> Esepia, peicua Tũpa omboepira opacatu yandeu yayapose mbahe aviye vahe mbiguai yaicose, anise que ndahei vahe mbiguai avei.

<sup>9</sup> Iyavei pe serecuar, peico tupri aveira pe rembiguai upe pe recoasiẽhisa pipe. Peicua niha pe opacatu Tũpa pe rerecuar ivave chini vahe povrive peicose. Ahe niha ndayande raisu yoavirati yande rereco.

### *Ava Cristo rese yuvirecoi vahe yoepisa resendar*

<sup>10</sup> Sese peyemoviracua catu yande Yar rese, ipiratasa rese avei.

<sup>11</sup> Peñearo tupri catu Tũpa pĩratasa pipe pe yemoviracua ãgua Carugar pe mbopa tẽiẽhi ãgua.

<sup>12</sup> Esepia, yande ndahei ava ité amotarẽhisave yayepihamoviracua. Yande rumo yayepihamoviracua espĩritu naporai vahe ndoyecuai vahe upe iyavei co ivi pipendar Carugar ipĩrata vahe pĩtumimbisa pendar reroyaẽhi ãgua.

<sup>13</sup> Sese peipisi catu opacatu mbahe Tũpa ombou vahe pẽu pe yoepi ãgua. Evocoyase yepe oime tẽira mbahe tẽi pẽu viña, peyemoviracuaño itera rumo chupe.

<sup>14</sup> Ëgüe peye aveira peyemoviracua catu ñehesa supi tupri vahe pipe. Iyavei peyoepira pe reco ivi tupri pipe.

<sup>15</sup> Peyemoingatu voi Tũpa Ñehengagũer ñeroisa resendar mombehu ãgua yepi.

<sup>16</sup> Iyavei pereco catu Tũpa rese pe yeroyasa peyese. Ahe inungar sundao yoepisa. Ipape peyoepira carugar uhu tata resendar nungar pe ãtoisa sui.

<sup>17</sup> Poropĩsirosa inungar sundao ãca ndiru, ipape tapeyoepi; peiporu avei Tũpa Ñehengagũer, ahe niha inungar quise pucu Espĩritu vireco vahe.

<sup>18</sup> Peyeroqui catu Espĩritu pĩratasa pipe ari yacatu rupi Tũpa upe opacatu yeruresa pipe. Pemahemoha catuño ité pe yeruresa pipe. Peyeroquiño ité avei opacatu ava Tũpa reroyasar rese yepi.

<sup>19</sup> Peyeroqui avei che rese. Evocoyase Tũpa tombou che ñehẽ ãgua cheu che siquiyẽhisa pipe ñehesa ñepĩsirosa icuapi ramo vahe cua uca ãgua ava eta upe.

<sup>20</sup> Tũpa niha che cuai co ñehesa mombehu ãgua. Ichui tẽi cũritei soquendapri aico. Peyeroqui catu che rese che siquiyẽhisa pipe co ñehesa mombehu ãgua.

### *Ñehesa ipa vahe*

<sup>21</sup> Yande rĩvri Tíquico, yande rembiaĩsu, che pĩtĩvĩsar omboavĩye vahe ocuaita yande Yar upe mboravĩquĩsa rese, ahe omombehura opacatu che recocuer, mbahe che rembiapo avei pẽu.

<sup>22</sup> Sese amondo eipeve pẽu ore recocuer mombehu ãgua ‘ĩpipe toyemonguerẽhi catu yuvĩreco’ viya.

<sup>23</sup> Yande Ru Tũpa iyavei yande Yar Jesucristo tomondo opacatu vĩroyasar upe teco catupri ãgua, iporoaisu ãgua, oyese yeroya ãgua avei.

<sup>24</sup> Tũpa tosovasa opacatu yande Yar Jesucristo raisupar saisusa ñepi reseve vahe pipe. Aipo rupive.

## PABLO REMBICUACHIA FILIPO PNDAR UPE FILIPENSES

### *Pablo mahenduhasa Jesús reroyasar Filipino pendar upe*

<sup>1</sup> Che, Pablo, iyavei Timoteo oroico Jesucristo rembiguai. Aicuachía co che ñehe pëu, pe Tūpa upendar Jesucristo rese peico vahe tecua Filipino ve, Jesús reroyasar rãrosar uve, seroyasar rese ihañeco vahe upe avei.

<sup>2</sup> Yande Ru Tūpa, yande Yar Jesucristo tape rovasa pe reco tupri āgua.

### *Pablo yeruresa Jesús reroyasar rese*

<sup>3</sup> Pe rese che mahenduhasa pipe, “Aviye ndeu” ahe Tūpa upe yepi.

<sup>4</sup> Iyavei che ayerurese, ari rupi ayeroqui opacatu pe rese Tūpa upe che viharetesa pipe yepi.

<sup>5</sup> Esepia, oyoya yañepitivii Jesucristo resendar ñehesa icatupri vahe rese, acoi pe seroya ramo suive.

<sup>6</sup> Che aicua co Tūpa omboipi mbahe aviye vahe güemimbotar apo pe rese, ahe omboaviye tupri itera acoi ari pipe oyevice yande Yar Jesucristo.

<sup>7</sup> Aviye ité aipo rupi che pihañemoñeta areco opacatu pe rese. Esepia, che opoaisu ité. Opacatu niha oyoya yaipisi Tūpa porovasasa yepe co che roquendasave aĩ, anise que co coti rupi aico mborerecuar rovai co ñehesa pĩsirosa resendar repi āgua iyavei amboyecua vaherã ahe ñehesa supi tupri vahe yuvireco chupe.

<sup>8</sup> Tūpa oicua ité che opoaisu etepri opacatu. Esepia, Jesucristo niha pe raisu uca cheu.

<sup>9</sup> Che aporandu vite Tūpa upe che yeruresa pipe: “Toicua tupri oaracuasa pipe oyeaisu catu-catu iri āgua yuvireco” ahe pëu.

<sup>10</sup> Ipipe sui peicuara mbahe aviye catu vahe poravo āgua yepi; ěgüe peye aveira pe recocuer moatiro āgua peico. Evocoyase ndipoi chira angaipa pe rese acoi Jesucristo ouse curi.

<sup>11</sup> Perecora pe recocuer aviye vahe ité Jesucristo ombou vahe pëu Tūpa mboetei āgua.

### *Cristo Pablo recovesa ité secoi*

<sup>12</sup> Che rivireta, aipota peicuara co mbahe tēi co oyapo vahe yuvireco cheu, ahe ichui setá catu ava osendura Jesucristo resendar ñehesa yuvireco.

<sup>13</sup> Evocoyase opacatu mborerecuar guasu poraviquisa pendar iyavei opacatu ambuae ava oicuapa che roquendas Jesucristo rupi che guata sui tēi yuvireco.

<sup>14</sup> Iyavei setá etepri yande rivri che repiase soquendapri che recose yuvireco, oye-monguerēhi catu Tūpa Ñehengagüer mombehu āgua osiquiyeēhisa pipe. Yande Yar rese evocoyase oyeroyá catu yuvireco.

<sup>15</sup> Supi eté oime ava oñehe angahu tēi vahe Jesucristo rese che reroĩrosa pipe tēi. Oime rumo amove ava oñehe tupri Jesucristo rese opihañemoñeta tupriisa pipe.

<sup>16</sup> Evocoi ava oñehe tupri oporoaisusa pipe, ahe oicua cohava che roquendase yuvireco, “Co ñehesa Tūpa ñehe pĩsirosa resendar, ahe supi eté vahe, ndahei temira tēi” ahese.

<sup>17</sup> Evocoi ambuae ava Cristo rese oñehe angahu tēi vahe oyeupe nara tēi oipota mbahe. Ahe che reco momara pota catu co che roquendasave che rēi vitesave.

<sup>18</sup> Mara etemo che areco aipo mbahe-mbahe tēi viña. Yepe amove ava ipihañemoñeta rai yuvireco viña, opacatu rumo ñehesa Cristo rese. Ahe niha che mboviha.

Che mboviha catu aveira.

<sup>19</sup> Esepia, che aicua co opacatu mbahe-mbahe tēi sui añepisirora pe yeruresa pipe iyavei che pĩtivira Jesucristo Espiritu.



<sup>20</sup> Che aipota ité, asãro avei opacatu che recocuer sui che chĩehi ãgua añehe vaherã opacatu che siquiyeẽhisa pipe. Evocoyase yepe amanora, anise aicovera, tomboetei catu ava Cristo che recocuer repiase yuvireco.

<sup>21</sup> Esepia, Cristo che recovesa ité secoi; amanose rumo, aviyeño itera cheu.

<sup>22</sup> Aicove vitesse co ivi pipe, aicatura aporaviqui tupri yande Yar recocuer rese. Evocoyase ndaicuai uma revo aviyecheu.

<sup>23</sup> Ndaicatui co ñuvirio che pihañemoñetasa rereco: amove amano pota che so ãgua ivave Cristo piri. Ahe aviye catura cheu viña.

<sup>24</sup> Pẽu nara rumo aviye catu aicove vitesse co ivi pipe.

<sup>25</sup> Sese che aicua aicove vite vaherã pe pĩtivii vite ãgua, pe guata tupri vite catu ãgua iyavei pe viharete catu ãgua pe Jesús reroyasa pipe.

<sup>26</sup> Evocoyase che rereco vitera peye pe piri. Ahese pe viharetasa pipe, “Imboeteipri Jesucristo tasecoi” aipo peyera che repiase.

<sup>27</sup> Co catu toyoya tupri pe recocuer co ñehesa aviye vahe Jesucristo resendar rese. Evocoyase asose pe repia, anise amombri aicose pe sui, asendu pota pe resendar ñehesa aviye vahe, pe yemoviracuasa resendar, pe pihañemoñetasa yoyasa resendar iyavei pe poraviqui pĩratasa resendar pe poreroyasave co ñehesa poropĩsirosa resendar rese.

<sup>28</sup> Iyavei ndapeyembosiquiyei chira pe amotarẽhimbar sui. Evocoyase ahe oicua yuvireco chupe ité Tũpa omondora imocañi ãgua; pe rumo Tũpa pe pĩsirora curi.

<sup>29</sup> Supi eté ndahei Jesucristo recocuer reroya ãgua güeraño Tũpa oipota pẽu, sese pe yemombaraisu ãgua avei oipota.

<sup>30</sup> Esepia, pe, che avei oyoya tupri yaporaviqui pĩrata yande amotarẽhimbar pãhuve yaico. Iyavei acoi pesepia yipindar che aporaviqui pĩrata che amotarẽhimbar pãhuve vichico, iyavei cĩritei peyandu mara ahe aporaviqui pĩrata vite ipãhuve yuvireco.

## 2

### *Cristo yemominisa, seco ivatesa resendar avei*

<sup>1</sup> Iyavei Cristo pe monguerẽhi, pe mbovĩha oporoaisusa pipe oico, Espĩritu avei secoi pe rese. Peyeaisu tupri iyavei pe yeaisusa pipe peñepĩtivil.

<sup>2</sup> Sese che mbovĩha catu peye: perecora pihañemoñetasa ñepei reseve, oyoya guasu avei peyeaisura, oyoya aveira pe pihañemoñetasa, ñepei reseve mbahe pe remimbotar rese avei.

<sup>3</sup> Ndapeyapoi chira mbahe peyeupe güeraño tẽi. Ndapeyapoi chiaveira mbahe pe yemboivate aisave. Iyacatu rumo pe reco yemominisa pipe ambuae aviye catu perecora peyesui.

<sup>4</sup> Pesecai rene mbahe aviye vahe peyeupe nara güeraño; iyacatu rumo peseca avei mbahe aviye vahe ambuae ava reco tupri ãgua.

<sup>5</sup> Inungar Cristo pihañemoñeta, ěgũe peye tupri aveira.

<sup>6</sup> Yepe ahe Tũpa recocuer vireco, “Taseya eme Tũpa recocuer areco vahe ivive che so ãgua” ndehi.

<sup>7</sup> Opa ité rumo oseya, oyemboava inungar mbiguai tẽi ou.

<sup>8</sup> ěgũe ehi oyemomini.

Vu porocuita reroyasa pipe ou iyavei omano poromochisa pipe curusu rese.

<sup>9</sup> Sese Tũpa omboivate catu, omondo avei sererguã ivate catu vahe opacatu ambuae rer sui.

<sup>10</sup> Evocoyase ahe terer ivate catu vahe renduse ‘toñenopiha opacatu iva pendar, ivi pipendar, opacatu omano vahecuer avei yuvireco’ oya.

<sup>11</sup> Ichui toicua opacatu, “Jesucristo ité yande Yar” tehi yande Ru Tũpa mboetei ãgua yuvireco.

*Jesús reroyasar tesapesa nungar yuvirecoi co ivi pipe*

12 Evocoyase che rembiaisu, yepe che amombri aico pe sui viña, iya rumo pe che reroya vite ité peye inungar aicose pe pãhuve cuese. Che aipota peicora písirosa pipeño ité Tũpa mboeteisave ichui pe siquiyesa pipe.

13 Esepia, Tũpa ombou pe querẽhisa semimbotar apo ãgua. Güemimbotar rupi avei ombou pĩratasa imboaviye ãgua pẽu.

14 Peyapo opacatu mbahe pe ñehe-ñehe tẽĩhisa pipe, pe yepoepi-epiẽhisa pipe avei.

15 Sese tipo eme mbahe pe rembiavi que pe reco raisa pe rese. Evocoyase peicora Tũpa rahir ndayangaipai vahe ava mbahe-mbahe tẽi oyapo vahe pãhuve. Ahe ipãhuve pe recocuer osesapera, inungar tataendi osesape pĩtumimbisave.

16 Pemombehuse ñehesa tecovesa resendar yuvireco chupe, acoi ouse Cristo curi, aviharetera pe rese. Esepia, pe rese che poraviquisa ãgũe ndehi tẽi vaheã.

17-18 Jesucristo recocuer rese pe yeroyasa, ahe inungar mbahe seropovẽhepri Tũpa upe. Aviyeteramo ichui tẽi che yucara yuvireco. Ahe omboaviye tupri itera pe porerecosa Tũpa upe. Yepe che yucara yuvireco viña, che rumo ayembovihañora opacatu pe rese. Pe avei, pevihañora che rese.

### *Pablo oicuachía Timoteo, Epafrodito recocuer resendar*

19 Che ayeroya yande Yar Jesús rese amondo pihaivi vaheã Timoteo pe repia. Ahe omboveyise ñehesa pe recocuer resendar, ahese che aviharetera.

20 Iyavei ndipoi eté ambuae ava Timoteo nungar che pihañemoñetasa rupi tupri imahenduha vahe pe rese pe reco tupri ãgua.

21 Esepia, opacatu oseca güemimbotar tẽi apo ãgua, ndosecai eté Jesucristo remimbotar yuvireco.

22 Pe niha peicua Timoteo reco tupri opacatu upe. Iyavei che pĩtivii Tũpa Ñehengagũer mombehu ãgua, inungar chĩhivahe oipĩtivii oyesupa, ãgũe ehi che pĩtivii oico.

23 Sese che aipota imondo ãgua pe repia acoi aicuase mara ehira che rereco yuvireco.

24 Che rumo ayeroya yande Yar rese aso pihaivi vaheã che teieté pe repia.

25 Iyavei revo aviye catu co yande rivri Epafrodito amboveyira pe piri ahe pembou vahe che pĩtivii ãgua mbahe cheu ipane vahe rese. Ahe che ndugũer oporaviqui pĩrata vahe Tũpa upe.

26 Esepia, ahe pe repia pota ité opacatu. Iyavei ahe ehiño oico pẽu peicuase imbaheasi.

27 Supi eté imbaheasi oico, seni eté omano viña. Ipare rumo Tũpa oiparisuereco, ndahei ahe güeraño oipĩtivii, che avei che paraisuereco co viharẽhisa yeapi-apiñoẽhi ãgua cheu.

28 Sese che amondo pota poyava ité pe piri sese pe yemboviha iri ãgua, che mboviha iri ãgua avei.

29 Peipisi tupri pẽu iyepotase pe viharetasa pipe. Esepia, ahe yande rivri yande Yar rese secoi vahe ité. Pesaisu itera evocoi nungar ava yepi.

30 Yande Yar rese oporaviquise che piri seni omano. Ahe niha oyemondo ité mbahe-mbahe tẽi porara ãgua che pĩtivii pipe. Esepia, pe ité ndapeicatu che pĩtivii peye.

## 3

### *Oicoete ai vahe ité*

1 Iyavei, che rivireta, peyembovihaño yande Yar rese peicose. Ndachecuerai eté ñehesa aicuachía vahecuer cuachía iri ãgua pẽu. Iyavei aviye catu ité pẽu nara.

2 Peñearo acoi ava cave nungar tẽi sui, oyapo vahe mbahe tẽi iyavei güetecuer omomara tẽi vahe.

3 Yande rumo imbocircuncidapri nungar supi eté vahe Tũpa mboyeroyasar yaico. Esepia, yayerure Espĩritu pipe Tũpa upe; yayemboviha avei Jesucristo reroyasar yande recosa rese. Ndahei yande retecuer rese tẽi yayeroya,

<sup>4</sup> yepe che supi eté ayeroya catura ambuae ava sui evocoi nungar mbahe rese viña.

<sup>5</sup> Esepia, che imbocircuncidapri aico ocho ari pipe che hare, israelita, Benjamín suindar aico. Iyavei che hebreo, hebreo rahir avei aico no. Che yipindar fariseo recocuer areco. Evocoiyase ayembohe tupri fariseo aracuasa judío porocuita resendar rese vichico.

<sup>6</sup> Ipipe sui tēi eté aseca-seca catu ayapo vaheṛã mbahe opacatu ava Jesucristo reroyasar upe vichico. Co porocuita reroyasa rese rumo ndipoi eté ava “mara” ehi vahe yuvireco cheu.

<sup>7</sup> Opacatu co mbahe aviye ité cheu aracaco viña. Cūritei rumo Jesucristo rese aicose, ěgüe ehi tēi vahe nungar areco.

<sup>8</sup> Iyavei opacatu que ambuae mbahe aviyeṛa cheu viña, areco rumo inungar ití che Yar Jesucristo recocuer cuasa pipe. Opacatu ahe mbahe aseya Cristo rese che reco ãgua. Supi eté Cristo rereco ãgua areco opacatu ambuae mbahe ití nungar tēi

<sup>9</sup> “taico sese’ che yapave. Ndahei porocuita mboaviyasa rese tēi aseca che reco catupri ãgua, che rumo aseca Jesucristo rese che yeroyasa pipe sui ěgüe ahe vaheṛã. ěgüe ehi eté Tūpa che pisi seco catupri vahe nungar Cristo rese che yeroyasa pipe.

<sup>10</sup> Che aipota ité Cristo cua tupri catu ãgua. Iyavei areco pota pĩratasa icuerayevi agüer resendar cheyese. Iyavei aipisi pota iparaisu agüer. Iyavei inungar ahe omano, ěgüe ahe pota avei.

<sup>11</sup> ěgüe tahe avei che cuerayevi ãgua omano vahe pãhu sui, ahe co che asãro vichico.

*Pablo osupiti pota ité güeco maranehi ãgua*

<sup>12</sup> “Asupiti ité opacatu co mbahe” ndahei eté. Iyavei, “Ndaseco marai vahe ité aico” ndahe vitei chietera. Che rumo aseca vite ahe tecocuer che recorã. Esepia, Jesucristo che pisi ité oyeupe nara.

<sup>13</sup> Che rivireta, “Che ae tēi co tecocuer ihĩvi vahe opa ité ayapo vichico” ndahei chira pẽu. Co rumo mbahe che ayapo, ayemboesarai opacatu che reco agüer sui. Iyavei opacatu che recovesa rese aguata tenondeño ité.

<sup>14</sup> Esepia, Tūpa che renoi ivave che so ãgua aipisi vaheṛã iporerrecosa iva pendar Jesucristo rese che recose. Ahe niha aipota catu ité cheyeupe nara.

<sup>15</sup> Aipo rupi iya yande pihañemoñetara opacatu yande yaracua tupri vahe. Que revo yande pihañemoñetase que ambuae mbahe rese tēi, ahe Tūpa oicua ucara yandeu.

<sup>16</sup> Co rese rumo yaicora yande yembohesa yareco vahe rupi tupriño ité.

<sup>17</sup> Che rivireta, peico che nungar iyavei pemahecua tupri ava ore recocuer moñasar rese.

<sup>18</sup> Iyavei amombehu setá yupagüer pẽu, cūritei amboyevi iri che yasehosa pipe imombehu pẽu. Setá ité oime ava co ñehesa Cristo mano agüer curusu resendar amotarẽhimbar.

<sup>19</sup> Ahe rumo imocañipirã yuvirecoira curi. Oyemonguerẽhi opacatu mbahe tēi apo ãgua rese yuvireco yepi. Ahe niha otūpa nungar ité vireco. Iyavei güeco ivate aisa pipe oyapo mbahe tēi yande mochi ai vahe yuvireco. Co ivi pipendar mbahe-mbahe tēi reseño ité ipihañemoñeta yuvireco.

<sup>20</sup> Yande rumo ivave nara ité yaico. Iyavei yasãro ité yaico iva sui ou vaheṛã yande Pĩsrosar, ahe yande Yar Jesucristo.

<sup>21</sup> Ahe opĩratasa pipe virecora opacatu mbahe opovrive. Ahe opĩratasa pipe avei osecuñaropara yande retecuer ěgüe ehi tēi vahe, ahese inungar ahe setecuer sendi yai, nimarai vahe, ěgüe yahe aveira yande yaico.

**4**

*Yayembovaha yande Yar rese yepi*

<sup>1</sup> Sese che riviřeta, che rembiaisu, peyemoviracuara yande Yar rese yepi. Che niha opoepia pota ité. Pe inungar porerecosa imbouprı peico cheu. Esepia, che vihasa ité peico.

<sup>2</sup> Ambuae mbahe, Evodia iyavei Síntique toyuviřecoi oyecupıhır nungar ité yande Yar reroyasa pipe yuviřeco.

<sup>3</sup> Nde niha che pıřivıi tuprı vahecuer che poravıquısa rese eve. Eıpıřivıi evocoi cuña. Esepia, ahe niha oyembopıhavıřacua ité che pıřivıise Tıpa Ñehengagüer pıřirosa resendar mombehu āgua yuviřeco cuese. Oyoya Clemente rese iyavei ambuae oporavıquı vahe rese che rupı yuviřeco. Ahe serer opa icuachiaprı yuviřeco Tıpa cuachiar tecovesa apıřehı vahe resendar pipe.

<sup>4</sup> Peyembovıharete arı yacatu rupı yande Yar rese yepi, “ıPeyembovıhaño ité!” ahe aıpo pıu.

<sup>5</sup> Pemboyecua catu opacatu ava upe pe reco mbegüesa. Esepia, cıimi yande Yar yevı iri āgua yandeu.

<sup>6</sup> “¿Mara ahera pıha vıchico?” ndapeyei chira que mbahe rese. Iyacatu rumo peyerurera opacatu evocoi nungar mbahe rese Tıpa uve, peporandura evocoi mbahe rese iyavei, “Avıye ndeu” peyera chupe.

<sup>7</sup> Evocoiyase Tıpa omondora güeco tuprısa pıu, pe Jesucristo rese peico vahe. Co teco tuprısa niha avıye catu ité opacatu ava pıhañemoñetasa sui. İpipe sui Tıpa osāřora pe pıha, pe pıhañemoñetasa avei pıu.

#### *Yandepıhañemoñetara opacatu mbahe avıye vahe rese*

<sup>8</sup> Co ipa, che riviřeta: yande pıhañemoñetara opacatu mbahe supı tuprı vahe rese, poromboetei āgua rese, mbahe ihıvi vahe rese, mbahe maranehi rese, mbahe yande mbovıha vahe rese, opacatu mbahe avıye vahe icuaprı vahe rese. İyavei yande pıhañemoñetara que ambuae mbahe avıye vahe rese, imboeteıprı vahe rese avei.

<sup>9</sup> İyavei peyapo ité acoi mbahe che opombohe vahecuer, pesendu vahe che aıpo ahese, che repıa vahecuer yapose peye. Evocoiyase Tıpa güeco tuprısa reseve secoıra pe rese.

#### *Filipo pendar porerecosa Pablo upe*

<sup>10</sup> Avıharete yande Yar rese. Esepia, pemahenduha irimi che rese pe porerecosa mbou āgua cheu. “Sesarai yuviřeco che sui” ndahei chira pıu. Pe rumo yıpıNDAR ndapeıcatui eté che pıřivıi āgua peye.

<sup>11</sup> “İpane mbahe cheu” ndahei chira pıu. Esepia, ayembohe che viharete āgua mbahe che rembiřeco rese.

<sup>12</sup> Aıcuı mara yahe yande paraisusa pipe yaıco, aıcuı avei mara yahe mbahe rereco atı āgua. Ayembohe avei che viha āgua opacatu mbahe oımesese cheu, que chehıtarose, ndache riepoıse, que oımesese sumbıre vahe mbahe cheu, que mbahe ipanese cheu.

<sup>13</sup> Aıcatu opacatu mbahe uve che yemovıracua āgua. Esepia, Cristo ombou che pıřata āgua.

<sup>14</sup> Pe rumo peyapo mbahe avıye vahe cheu che pıřivıi etepıřısave peye mbahe-mbahe tıi oımesese cheu.

<sup>15</sup> İyavei pe Filipino pendar peıcuı avei acoi yıpıNDAR peıpıřıse pıřirosa resendar Tıpa Ñehengagüer acoi che sose Macedonia sui, ndıpoi eté Jesús reroyasar ambuae tecua pendar iporerecosa vahe yuviřeco che rese. Pe güeraño pembou pe porerecosa, “Avıye” pe hesa pipe che pıřivıi āgua.

<sup>16</sup> İyavei aıcose Tesalónica ve, pembou pe porerecosa cheu ñuvıřıo yupagüer che pıřivıi āgua.

<sup>17</sup> Ndachepıhañemoñetaı mbahe arocuaño tıi vaheřa pe sui. Che rumo aıpota Tıpa omboyevıra pıu co pe porerecosa pembou vahe cheu.

<sup>18</sup> Che opa aipisi pe porerecosa Epafrodito upe pembou vahe. Evocoyase oimeño ité iyavei sumbire vite cheu. Ahe pembou vahe cheu aviye ité, inungar itaisi sñacua vahe, iyavei inungar mbahe seropovêhepri aviye vahe Tũpa upe.

<sup>19</sup> Evocoyase yande Ru Tũpa, ombahe eta porañete vahe sui omondora opacatu mbahe ipane vahe pẽu Jesucristo rese oime vahe.

<sup>20</sup> ¡Ëgüe tehi timboeteisa yande Ru Tũpa! ¡Ahe apirẽhi vahe secoi yepi!

*Ñehesa ipa vahe*

<sup>21</sup> Aviye, pemombehu che mahenduhasa opacatu Tũpa reroyasar Jesucristo rese yuvirecoi vahe upe eipeve. Iyavei opacatu Jesús reroyasar yuvirecoi vahe che rese, ahe avei omondo omahenduhasa yuvireco pẽu.

<sup>22</sup> Iyavei opacatu ambuae yuvirecoi vahe cohava Jesús reroyasar iyavei acoi mborerercuar guasu rêtave yuvirecoi vahe, ahe ité avei omondo omahenduhasa yuvireco pẽu.

<sup>23</sup> Yande Yar Jesucristo tape rovasa opacatu. Aipo rupive.

## PABLO REMBICUACHIA COLOSA PENDAR UPE COLOSENSES

### *Pablo mahenduhasa Jesús reroyasar Colosa pendar upe*

<sup>1</sup> Che, Pablo, Jesucristo apóstol aico Tūpa remimbotar rupi yande rivri Timoteo reseve.

<sup>2</sup> Co aicuachía pēu, pe Cristo rese peico tupri vahe Colosa ve, Tūpa upendar peico vahe. Yande Ru Tūpa tape rovasa, tombou pe reco tupri āgua pēu.

### *Pablo yeruresa Jesús reroyasar rese*

<sup>3</sup> Ari yacatu ore yeroqui pipe, “Aviye ndeu” orohe yande Yar Jesucristo Ru Tūpa upe pe rese.

<sup>4-5</sup> Esepia, oroyandu acoi oyepota ramose Tūpa ñehe supi eté vahe, aviye vahe pīsirosa resendar pēu, peyapisaca tupri sese. Ipipe sui peyeroya ivave pe reique āgua Tūpa porerecosa pisi āgua. Ahe ichui peyeroya tupri Jesucristo rese iyavei pesaisu opacatu ambuae Tūpa rembiporavo yepi.

<sup>6</sup> Co ñehesa imombehusa avei opacatu ivi rupi, setá ava oipisi tupri avei yuvireco. Inungar acoi pesenduse yipindar Tūpa porovasasa resendar ñehesa, ipipe sui peicua tupri catu ahe porovasasa supi eté vahe.

<sup>7</sup> Co ñehesa yande rembiaisu yande mboetasa Epafras pe mbohe. Ahe mbia yande Yar Jesucristo rese oporaviqui vahe ore rupi, ocuaita viroya tupri vahe pe pāhuve.

<sup>8</sup> Ahe omombehu oreu Espiritu pipe pe ore raisusa resendar.

<sup>9</sup> Sese avei ore aipo nungar rendu ramoseve ndoroyeroquipai pe rese. Oroyeroqui, oroporandu pe rese ‘toicua tupri opacatu Tūpa remimbotar ombahecuasa Espiritu suindar pipe, senducua tuprisa pipe avei yuvireco’ ore yapave pēu.

<sup>10</sup> Ipipe sui tapeguata tupri yande Yar rupi seroyasar tupri pe recosa pipe. Tapemboaviye tupri opacatu semimbotar; mbahe pe rembiapo tupri pereco catu sovaque. Ipipe sui avei tapeicua tupri catu Tūpa recocuer peico.

<sup>11</sup> Iyavei tombou catu pe momirata āgua güecocuer pīratasa pipe sui. Evocoyase oimese que mbahe tēi pēu, peñemosañora pe reco mbegüesa pipe.

<sup>12</sup> “Aviye ndeu” peyera pe viharetasa pipe yande Ru Tūpa uve. Esepia, ahe omoingatu pe recocuer peipisi āgua iporerecosa oime vaherã opacatu sembiporavo upe acoi yuvirecoi vahe Tūpa poroesapesa pipe.

<sup>13</sup> Ahe niha yande pīsiro Carugar povri sui. Ēgüe ehi yande reraso Guahir güembiaisu povrive.

<sup>14</sup> Ahe Tahir yande pīsiro iyavei yande angaipa rese iñero yandeu.

### *Jesús omano curusu rese Tūpa upe opacatu mbahe moingatu āgua*

<sup>15</sup> Jesucristo niha omboyecua uca Vu recocuer ndoyecuai vahe güecocuer pipe. Ahe avei niha yipisuive ivate catu vahe opacatu mbahe yapopri sui.

<sup>16</sup> Esepia, Tūpa niha opacatu mbahe oyapo uca Guahir upe aracahe: ivive, ivave avei; oyecua vahe, ndoyecuai vahe avei no. Ipipe sui avei yapopri opacatu iva pendar mborerecuar, mborerecuar guasu iyavei mborerecuar ivate catu vahe. Ēgüe ehi ipipe sui opacatu mbahe yapopri, chupe nara avei.

<sup>17</sup> Ahe oicove yipisuive aracahe opacatu mbahe reimeēhi viteseve. Ahe avei omoime vite opacatu mbahe yandeu.

<sup>18</sup> Iyavei ahe niha yande rerecuar tenonde secoi yandeu opacatu seroyasar yaico vahe. Esepia, ahe rane yipindar vahe iyavei ahe rane avei ocuerayevi. Evocoyase ahe ivate catu vahe opacatu sui.

<sup>19</sup> Esepia, Tu oipota opacatu güecocuer reseve secoi āgua sese yepi.

<sup>20</sup> Iyavei ‘che Rahir recocuer pipe sui taroyevi iri opacatu mbahe cheyeupe ivi pipendar, iva pendar avei’ oya. Ēgüe ehi Jesús oipiyere vuvu curusu rese Tūpa upe opacatu mbahe moingatu āgua.

<sup>21</sup> Yipindar pe pihañemoñeta raisa pipe sui tēi amombri Tūpa sui peico yamotarēhisa pipe mbahe pe rembiapo ai rese.

<sup>22</sup> Cūritei rumo Tūpa iñero pēu pe reroyevi oyeupe Cristo mano pipe. Ahe niha ēgüe ehi Vu rovai iphapri pe rereco oyeupe nara, pe reco maranehi āgua mbahe aviēhisa pipe ava rovaque.

<sup>23</sup> Ēgüe peye āgua rumo peyemoviracuaño itera Cristo rese pe yeroyasa pipe yepi. Ndapeyepipi chiaveira mbahe oime vaherā rese pe yeroyasa sui pesendu vahe co ñehesa ñepisirosa resendar pipe. Ahe imombehusa opacatu ivi rupi. Che niha Pablo, icuairi, aico co ñehesa mombehu āgua.

### *Pablo icuaita Jesús reroyasar rese hañeco āgua*

<sup>24</sup> Cūritei aviha pe rese che yemomborarasa pipe. Ēgüe ahe iporara che rete rese cohove vichico. Ēgüe ehi avei Cristo oyemomborara vite viroyasar rese. Esepia, yande seroyasar setecuer nungar yaico.

<sup>25</sup> Jesús reroyasar pītivi āgua niha Tūpa che cuai. Sese amombehu opacatu iñehengagüer pēu pe reco tupri āgua rese.

<sup>26</sup> Ahe ñehesa aracahe suive ndicuasai vahe ité. Cūritei rumo Tūpa omboyecua viroyasar upe.

<sup>27</sup> Chupe ité omboyecua pota co ñehesa porañete vahe omboyecua ramo vahe ava ndahei vahe judío upe. Co ndicuasai vahe, ahe Cristo pe rese secoi vahe. Co yande remiaro yareco vaherā teco ori porañete vahe curi.

<sup>28</sup> Ore niha Cristo recocuer oromombehu opacatu ava upe. Orombohe avei ava yaracua tupri āgua ore aracuasa pipe ‘toyuvirecoi tupri ité Cristo rese Tūpa rovai’ ore hesa pipe.

<sup>29</sup> Co rese niha che aporaviqui etepri opacatu Cristo pīratasa pipe.

## 2

<sup>1</sup> Che aipota peicua che yemboaquisa pe recocuer rese, Laodicea pendar recocuer rese, setá ambuae ava che cuaparēhi recocuer rese avei

<sup>2</sup> ‘toyemonguerēhi catu, toyemboyoya guasu oyeaisusa pipe yuvireco’ viya. Iyavei ‘senducua tupri pipe toyuvirecoi mbahe tupri pipe’ viya opacatu pēu. Esepia, ichui avei peicua tupri co mbahe imboyecuapi ramo, ahe niha Cristo.

<sup>3</sup> Ahe vireco opacatu mbahe yande mboaracua āgua, mbahe renducua tupri āgua avei.

<sup>4</sup> Aipo mbahe amombehu pēu ava oñehe tupri aisa pipe tēi pe mbopaēhi āgua.

<sup>5</sup> Iyavei yepe amombri aico pe sui viña, pe rese chemahenduha pipe rumo aicoveño pe reseve yepi. Aicua peguata tupri aise pe reco iñisa pipe, ndapeyepipiise co coti rupi Jesucristo reroyasa sui. Sese che mbovihareteño ité peye.

### *Jesús suindar tecocuer piasu*

<sup>6</sup> Evocoyase inungar acoi peipisi Jesucristo pe Yarā, ēgüe peye aveira peico sese ari yacatu rupi

<sup>7</sup> pe yemoviracuasa pipe. Pe yembohesa rese peyemomirata catura Cristo rese pe yeroyasa pipe. Iyavei, “Aviye ndeu” peye itera Tūpa upe ari yacatu yepi.

<sup>8</sup> Peicua catu, peyembopa ucai rene aracahendar tēi ava aracuasa pipe. Esepia, ahe ēgüe ehi tēi vahe, ava suindar tēi yembohesa, ivi pipendar ava seco ivate catu vahe pihañemoñetasa tēi. Ndahei Cristo suindar porombohesa.

<sup>9</sup> Esepia, Cristo vireco opacatu Vu Tūpa reco oyese.

<sup>10</sup> Evocoyase pe pereco Tūpa reco Cristo rese peicose. Ahe opacatu mborerecuar ivi pīpendar iyavei iva pendar rerecuar secoi.

<sup>11</sup> Iyavei sese peicose, ahese inungar imbocircuncidapri peico. Ndahei rumo pe rete rese iyavei ndahei ava rembiapo tēi. Co rumo Cristo oyapo vahe pe recocuer rese. Esepia, ahe vīrocua pe recocuerai pe sui.

<sup>12</sup> Pe āpiramosa pīpe ndoyavii pe recocuerai ñotimbrī Cristo reseve. Ēgüe ehi avei ndoyavii pe recocuer ocuerayevi vahe seseve avei, peyeroyase Tūpa pīratasa rese. Ahe niha ombogüerayevi vahe Guahir omano vahe pāhu sui.

<sup>13</sup> Pe niha acoi cuese omano vahe nungar peico Tūpa upe pe angaipa pīpe, pe ndahei vahe judío peico vahe. Ahe rumo pe recocuer mbogüerayevi Guahir reseve iyavei iñero pe angaipa rese pēu.

<sup>14</sup> Ahe yande cañi rāgüer rumo opa omboepi. Esepia, yande iporocuaita pīpe yaico imboaviye āgua viña, evocoyase imocañipri tēi yaico ipovri ve viña; ombou rumo Guahir curusu rese yatica āgua yande cañi rāgüer sui yande renose āgua.

<sup>15</sup> Ēgüe ehi ahe omano pīpe curusu rese carugar, ipovri pendar mborerecuareta reseve secopi. Ēgüe ehi seco reroi, inungar vavasa pendar ipisipri serasosa opacatu ava rembiepiave.

#### *Peseca iva pendar mbahe pe recocuer upe nara*

<sup>16</sup> Evocoyase toñehe-ñehe tēi eme que ava pe rembihu rese yuvireco, pe igua rese avei; anise que ndapemboeteise judío pieta, que ari, yasi osē ramomi vahe, anise que judío ari mbituhusa avei no.

<sup>17</sup> Esepia, opacatu co mbahe, ahe yipindar vahe, “Ēgüe ehira Cristo ou” hesa tēi yandeu. Co rumo Cristo ité cute.

<sup>18</sup> Peyapisacai rene acoi ava “ndapeipisii chira porerecosa iva pendar ndaperoyaise ore ñehe” ehi tēi vahe rese pēu. Acoi ava “Tūpa rembiguai pemboeteira” ehi tēi vahe yuvireco. Ahe avei, “Che seco mbegüe vahe aico” ehi angahu tēi. Iyavei, “Che asepi che quer nungar pīpe iva pendar mbahe” ehi tēi. Esepia, ahe oyemboivate ai oaracua rai tēisa pīpe yuvireco.

<sup>19</sup> Evocoi rumo ndoyuvirecoi yande cuaisar Cristo rese yuvireco. Ahe omoviracua vahe opacatu vīroyasar yepi. Evocoyase ahe omboyemboya tupri oyese, ñepe vahe nungar vireco oyeupe Vu Tūpa remimbotar rupi.

<sup>20</sup> Pe omano vahe nungar peico Cristo rese. Evocoyase ndahe iri co ivi pīpendar pīhañemoñetasavri ve peico. ¿Mahera evocoyase peroya vite co ivi pīpendar porocuaita ēgüe ehi tēi vahe,

<sup>21</sup> inungar “pepocoi rene co mbahe rese, pehui rene evocoi nungar mbahe” ehi tēi vahe?

<sup>22</sup> Opacatu co nungar porocuaita ocañi tēi vahe. Esepia, ahe ava remimbotar tēi yembohesa, iporocuaita tēi avei.

<sup>23</sup> Co mbahe aviye angahu aracuasa supi eté vahe. Esepia, seroyasar ahe ehiño oyeruresa uve, oyecomomini tēi iyavei omombaraisu güetecuer yuvireco viña. Ahe aracuasa rumo ēgüe ehi tēi vahe. Esepia, ndayande pītivii eté yande yepipi āgua yande remimbotarai sui.

### 3

<sup>1</sup> Cūritei rumo ocuerayevi vahe peico Cristo rese. Sese peseca catu co mbahe aviye vahe iva pendar. Aheve ivave Cristo oguapi oĩ güeco mborerecuasa pīpe Vu acato coti.

<sup>2</sup> Pepīhañemoñeta mbahe iva pendar rese, ndahei chira ivi pīpendar mbahe rese tēi.

<sup>3</sup> Esepia, cūritei omano vahe nungar peico pe recocuerai upe. Iyavei Cristo reseve peico Tūpa piri, inungar-ra ivave viña.



<sup>4</sup> Cristo niha yande recovesa ité secoi. Sese ahe oyeve irise curi, ěgüe peye aveira perecora ipiri seco ori porañetesa.

*Yande recocuer yipindar iyavei yande recocuer piasu*

<sup>5</sup> Evocoyase pepoi opacatu co mbahe naporai vahe co ivi pipendar tēi pe rese oime vahe sui: ndapeyemboaguasai chira, ndapeyapoi chira mbahe tēi pe recocuer pipe, ndapeipota rai chira pihañemoñeta raisa, ndapeipota rai chiaveira ambuae ava mbahe (esepia, ahe niha oyoya mbahe rahanga tēi mboeteisa rese).

<sup>6</sup> Acoi oyapo vahe co nungar mbahe, ahe Tūpa ñemoirosa oipisira seroyaēhisa pipe yuvireco.

<sup>7</sup> ěgüe peye avei yipindar pe recocuerai pipe peico.

<sup>8</sup> Cūrtei rumo peseya opacatu co mbahe-mbahe tēi: pe ñemoirosa, pe poroyucaí aisa, pe reco raisa, pe ñehe mara-mara tēisa iyavei pe ñehesa ndayamombehui vahe.

<sup>9</sup> Ndaperemirai chira peyese. Esepia, pepoi yipindar pe reco ai sui iyavei pe rembiapo ai sui.

<sup>10</sup> Iyavei peipisi tecocuer piasu, aviye vahe. Ipípe peyembohe ari yacatu yande Aposar Tūpa recocuer rese peico, icua tupri catu āgua.

<sup>11</sup> Ndahe iri ivate yandeu “che griego aico” ehi vahe; que “che judío aico” ehi vahe. Iyavei “imbocircuncidapri aico”, “nimbocircuncidapri aico” ehi vahe avei. Iyavei que “ahe ambuae tecua pendar secoi”, “ahe chori”, “ahe ava rembiguai tēi secoi” ehi vahe. Aníse que “che ndahei ava rembiguai aico” ehi vahe. Co rumo ivate vahe yandeu: Cristo ivate catu vahe opacatu sui. Iyavei oyoya guasu opacatu yande pihá pipe yareco.

<sup>12</sup> Esepia, Tūpa pe raisu etepri iyavei pe poravo ‘toyuvirecoi cheu nara’ oya. Evocoyase peyapora co nungar mbahe: peporoaisura, peavara peyeupe, peñemominira, pe reco mbegüera iyavei peñemosañora.

<sup>13</sup> ěgüe peyera peñemosa oyeupe, peñero aveira opacatu oyeupe acoi pe pāhu pendar oñemoirose pēu. Inungar Cristo ñerosa ombou yandeu, pe avei ěgüe peyera ambuae ava upe.

<sup>14</sup> Iyavei peyeaisu catura. Esepia, ahe yande mboyemboya tupri oyese yepi.

<sup>15</sup> Acoi teco tuprisa Cristo ombou vahe pēu, tape mbohe pe pihañemoñeta tupri āgua. Esepia, co rese Tūpa pe renoi ñepei ava nungar pe reco āgua. Iyavei, “Aviye ndeu” peyera chupe.

<sup>16</sup> Topita tupri Cristo ñehengagüer pe pihá pipe. Pe aracuasa tuprisave peyembohe tupri, peyemonguerēhi catu sapucaisa Tūpa resendar rese. Pesapucaí opacatu sapucaisa Tūpa upendar pe pihá pipe, “Aviye ndeu” pe hesave yepi.

<sup>17</sup> Iyavei opacatu que mbahe peyapo vahe, que peñehe vahe avei peyapo yande Yar Jesús rer pipe. Jesús rer pipe avei, “Aviye ndeu” peyera Tūpa upe yepi.

*Jesús reroyasar cuaita resendar*

<sup>18</sup> Iyavei pe no cuña omenda vahe: pemboyeroyara pe mer. Ahe niha pe cuaita pe yande Yar rese peico vahe.

<sup>19</sup> Pe avei no imer: pesaisu pe rembireco. Perecoi rene pihavīracuasa pipe.

<sup>20</sup> Pe avei no chīhivahe: peroya aveira pe yesupa. Esepia, ahe yande Yar oipota.

<sup>21</sup> Pe avei no tu: pemoñemoiro ucai rene pe rahir peyeupe. Esepia, aviyeteramo niquerēhi iri chira ocuaise pēu.

<sup>22</sup> Pe avei no mbiguai: peroya tupri avei pe rereciar co ivi pipe yepi. Aní chira ahe pe repiaseño pembovihara. Iyacatu rumo pemboyeroyara pe pihañemoñeta tuprisa pipe, Tūpa sui pe siquiyesa pipe avei.

<sup>23</sup> Opacatu mbahe peyapo vahe, peyapo pe querēhisave yande Yar mboviha āgua. Ndahei chira ava mboviha āgua tēi.

<sup>24</sup> Esepia, peicua tupri co: yande Yar omboura oporerecosa yandeundar. Esepia niha, Cristo upe nara ité mbahe peyapo. Ahe niha pe Yar supi tupri vahe.

<sup>25</sup> Acoi ava oyapo vahe mbahe naporai vahe, oipisi aveira güembiapo ai repri. Tüpa niha nomboyoavirati yande raisu.

## 4

<sup>1</sup> Pe avei sereciar: peyapo mbahe ihivi vahe pe pihañemoñeta tuprisa pipe pe rembiguai upe. Peyemomahenduha co rese: pe avei pereco pe rereciar ivave.

<sup>2</sup> Iyavei no opacatu peyeroqui catu ari rupi pe mahemohasa pipe. “Aviye ndeu” peye Tüpa upe.

<sup>3</sup> Peyeroqui avei ore rese. Tore pítivii Tüpa oñehengagüer mombehu vite ãgua. Toroñehe vite avei co ñehesa Cristo resendar Tüpa omboyecua ramo vahe rese yandeu. Sese tēi niha co che roquendasas.

<sup>4</sup> Evocoyase peyeroqui che rese, tamombehu tupri catu co ñehesa opacatu upe senducua tupri catu ãgua. Ëgüe tahe che cuaita mboaviye.

<sup>5</sup> Peico tupri pe aracuasa pipe ava ndahei vahe Cristo reroyasar rovaque. Peyapo tupri mbahe co tecocuer aviye viteseve.

<sup>6</sup> Pe reco aviye tuprisa pipe peñehera yepi. Iyavei peicua tuprira ñehesa mboyeve ãgua ñepepei-pei ava uve.

### *Ñehesa ipa vahe*

<sup>7</sup> Co yande rivri, yande rembiaisu, Tíquico, che pítivii tuprisar, ahe oporaviqui tupri yande Yar recocuer rese che rupi. Ahe omombehura che recocuer resendar pēu.

<sup>8</sup> Sese co amondo pēu ore recocuer cua tupri ãgua, pe monguerēhi catu ãgua avei.

<sup>9</sup> Co Onésimo avei osora supi. Ahe avei yande rembiaisu, yande rivri seco tupri vahe pe recua pendar. Ahe ñuvirío mbia omombehura pēu opacatu mbahe oime vahe cohava.

<sup>10</sup> Aristarco, che ndugüer che roquendasave, omondo omahenduhasa pēu iyavei Marcos, Bernabé rihir. Pe revo peicuaño Marcos so ãgua eipeve; orose pe piri, peipisi tupriñora.

<sup>11</sup> Iyavei omahenduhasa omondo Jesús, ahe serer acoi Justo, pēu. Co güerañomi Jesús reroyasar pãhuve judío oporaviqui vahe che rupi yuvireco Tüpa mborerecuasave nara. Ahe niha che mboviha yuvireco yepi.

<sup>12</sup> Epafra avei omondo omahenduhasa pēu. Ahe pe recua pendar ité, Jesucristo rembiguai. Ahe oyeruqui vahe pe rese yepi ‘toyemoviracua tupri iyavei toyuvirecoi Tüpa remimbotar rupi yuvireco’ oyapave.

<sup>13</sup> Che aicua ité secocuer. Ahe oyemboaquí oyeruresa pipe pe recocuer rese, Laodicea pendar recocuer rese, Hierápolis pendar recocuer rese avei.

<sup>14</sup> Iyavei yande rembiaisu Lucas, oporoposano vahe, Demas reseve omondo omahenduhasa yuvireco pēu.

<sup>15</sup> Pemboaviravemi eipeve yande rivri Laodicea pendar oreu, cuña Ninfa serer vahe avei iyavei opacatu oñemonuha vahe Tüpa reroyasar yuvireco.

<sup>16</sup> Peyeroquire, pemondo co cuachiar Laodicea pendar Jesús reroyasar upe iyeroqui ãgua. Iyavei Laodicea pendar cuachiar rese peyeroqui avei.

<sup>17</sup> Iyavei emombehu Arquipo upe aipo ere: “Emboaviye tupri Tüpa nde cuaisa” ere.

<sup>18</sup> Che Pablo aico. Che ité aicuachía co che mahenduhasa pēu. Tapemahenduha vite che roquendasave che rese. Aviye pēu. Yande Aposar tape pítivii. Aipo rupive.

## PABLO REMBICUACHIA YIPINDAR VAHE TESALONICA PENDAR UPE TESALONICENSES

### *Pablo mahenduhasa Jesús reroyasar Tesalónica pendar upe*

<sup>1</sup> Che, Pablo, Silvano reseve iyavei Timoteo, aicuachía co che ñehe pëu, ore riviřeta, peñemonuha vahe Tūpa upe tecua Tesalónica ve, yande Ru Tūpa, yande Yar Jesucristo rese peico vahe. Tape rovasa pe reco tupri āgua yande Ru Tūpa, yande Yar Jesucristo avei.

### *Tesalónica pendar yeroyasa resendar ñehesa*

<sup>2</sup> Ore, “Aviye ndeu” orohe ari rupi Tūpa upe opacatu pe rese yepi. Iyavei oremahenduha pe rese ore yeruresa pipe.

<sup>3</sup> Pe niha yande Yar rese pe yeroya tupriřa pipe peporaviquiño yepi, iyavei pe poroaisusa pipe peyapo mbahe Tūpa upe, iyavei peñemosañño mbahe tēi upe Jesucristo rārosa pereco vahe rese. Sese oremahenduha pe rese ari yacatu rupi yande Ru Tūpa rovai.

<sup>4</sup> Ore riviřeta, Tūpa niha pe raisu, oroicua avei ahe ité pe poravo.

<sup>5</sup> Esepia, acoi oromombehuse ñehesa pīsirosa resendar, ndahei ñehesa oreyesuindar tēi oromombehu pëu; Espiritu Santo reco pīratasa pipe rumo oroñehe. Iyavei oroicua ité co ñehesa supi eté vahe. Peicua avei niha acoi pe pāhuve oroicose, oroico tupriño ité, orosecañño avei pe reco tupri āgua.

<sup>6</sup> Ipare pemboyeapi ore recocuer peico iyavei yande Yar recocuer avei no. Iyavei yepi peparaisu mbahe-mbahe tēi pāhuve peico viña, peipisiñño ité rumo co ñehesa pe vihasa pipe Espiritu Santo ombou vahe pëu.

<sup>7</sup> Evocoya pe reco pipe pemboyecua catu pe reco catupriřa Tūpa reroyasar Macedonia pendar upe, Acaya pendar upe avei.

<sup>8</sup> Esepia, pe Tūpa ñehe peicua uca Macedonia rupi, Acaya rupi avei. Ndahei rumo co rupiño, opacatu rupi avei oicua yuvireco Tūpa reroyasa pereco vahe peyese. Sese ore ndoromombehu iri chira pe recocuer.

<sup>9</sup> Esepia, ahe avei omombehu yuvireco oreu acoi ore so agüer pe piri, pe ore pisi tupri agüer avei. Iyavei omombehu mbahe rahanga sui pe poi agüer Tūpa oicove vahe rupi pe guatasa yuvireco, pe chupe nara mbahe apo āgua avei no.

<sup>10</sup> Omombehu avei pesāro vahe Tūpa Rahir Jesús iyevi āgua iva sui yuvireco oreu, acoi Tūpa ombogüerayevi vahe omano vahe pāhu sui. Ahe niha yande pīsirora Tūpa ñemoirosa ipīrata vahe ou vaherā sui.

## 2

### *Tesalónica pendar yeroyasa mboyecuasa*

<sup>1</sup> Ore riviřeta, pe niha peicua ore so agüer pe piri ndahei ēgüe ehi tēi vahe.

<sup>2</sup> Peicua tupri avei niha acoi cuese yipindar mara-mara tēi ava ore rereco yuvireco tecua Filipo ve. Tūpa rumo ore pītivii oñhengagüer pīsirosa resendar mombehu āgua opacatu ore siquiyeēhisa pipe ore amotarēhimbar pāhuve.

<sup>3</sup> Esepia, ndoroyavii eté ore ñehe iyavei ndoroñehei ore pihañemoñeta raisa tēi pipe pëu, ndahei avei ore porombopa āgua oroñehe.

<sup>4</sup> Tūpa rumo ore recoāha, ichui ore cuai oñhengagüer pīsirosa resendar mombehu āgua; ēgüe ehi ore ñehe, ndahei ava tēi mboviha āgua. Tūpa yande pihañemoñetasa oicua vahe rumo oromboviha.

<sup>5</sup> Peicua niha ore ndoroñehei ñehesa icatupri catu vahe tēi rese pe mbopa āgua, iyavei ndahei guarepochi potasave tēi oroñehe tupri. Tūpa niha oicua.

<sup>6</sup> Ore ndorosecai eté ava ore mboetei catu āgua pe, que ambuae ava eta avei no.

<sup>7</sup> Ehi oroyandu ucara ore mborerecuasa Jesucristo ore cuaisa pēu viña; oroyeminiño rumo oroico pe pāhuve inungar acoi cuña osāro tupri vahe omembrī imboacua.

<sup>8</sup> Ēgüe orohe avei ore pe raisu. Sese ndahei Tūpa Ñehengagüer año oromondo pota pēu, ore recocuer avei no. Esepia, opoaisú ité.

<sup>9</sup> Ore rivireta, peyemomahenduha acoi ore paraisu agüer rese, ore poraviqui agüer rese avei ari, pītu reseve. Ndahei que ñepeī mañeco tēi āgua mbahe rese oromombehu Tūpa Ñehengagüer oroico pēu.

<sup>10</sup> Pe niha ore repia peye Tūpa avei oicua, ore reco tupri sa, ore rembiapo supi eté vahe, ihīvi vahe pe Jesús reroyasar pāhuve.

<sup>11-12</sup> Peicua niha, inungar mbīa guahir upe, ēgüe orohe pe monguerēhi, pe mbovīhasa avei ñepeī-peī opacatu. Iyavei oromondo pe cuaitarā pe reco tupri āgua Tūpa remimbotar rupi. Ahe niha oñehe pēu peico vahe rā sese imborerecuasa porañetesave.

<sup>13</sup> Co rese, “Aviye ndeu” orohe Tūpa upe ari yacatu rupi. Esepia, Tūpa Ñehengagüer, oromombehu vahe pēu, peipisi ité, “Co Tūpa ñehe, ndahei ava tēi ñehe” aipo peye ité pe chupe. Supi eté Tūpa ñehe. Ahe niha osecuñaro ité pe recocuer peroyare.

<sup>14</sup> Ore rivireta, acoi cuese peiporara mbahe-mbahe tēi pe mu eta pāhuve peicose; ēgüe ehi tupri avei Jesús reroyasar Judea pendar yuvirecoi vahe Jesucristo recocuer rese. Imu judío ae oseca-seca yamotarēhisave yuvireco.

<sup>15</sup> Ahe niha oyuca yande Yar Jesús yuvireco. Ahe avei oyucapa Tūpa ñehe mombehusar yuvireco aracahe. Ore avei opa ore mombo yuvireco. Ndoviroyai Tūpa yuvireco iyavei opacatu ava amotarēhimbar tēi yuvirecoi.

<sup>16</sup> Esepia, acoi oroñehe potase ava ndahei vahe judío upe iñepisiro āgua rese, ahe rumo ndoipotai yuvireco oreu. Ipipe sui oyemboangaipa catu yuvireco. Cūritei rumo Tūpa ñemoirosa ipīrata vahe ou iharīve yuvireco cute.

### *Pablo oso pota iri Tesalónica pendar repia*

<sup>17</sup> Ore rivireta, yepe ndayayoepia iri yayepēi raimise yandeyesui, ore piha pipe rumo, “Ahé” oroheño ité pēu. Iyavei orequerēhiño ité yepi oroso iri vahe rā pe repia.

<sup>18</sup> Orosāha tēi ore so āgua pe repia yepi; che Pablo teieté setá yupagüer tēi aso pota. Carugar rumo ndoipotai.

<sup>19</sup> ¿Ava sui piha orosāro mbahe aviye vahe? ¿Uma ore vihasa? ¿Uma ore mbovīharete catura? ¡Peño itera acoi yande Yar Jesucristo yevise curi!

<sup>20</sup> Pe ité niha ore mbovīhara peye, iyavei oroviha catura pe rese no.

## 3

<sup>1-2</sup> Evocoyase che nañemosā irise pe repiaēhi rese, chepihañemoñeta yande rivri Timoteo mondo āgua pe repia; “Che güeraño tapita Atenas ve” ahe. Esepia niha, ahe oporaviqui vahe Tūpa upe ore rupi, omombehu vahe co ñehesa písirosa resendar Cristo suindar ou vahe. Ahe amondo pēu pe moviracua catu āgua, pe monguerēhi catu āgua avei peyeroya catu vahe rā Cristo rese.

<sup>3</sup> Evocoyase tipo eme oyembosiquiye vahe co mbahe tēi pe mombaraisuse. Peicua niha yaiporara rane itera co nungar mbahe.

<sup>4</sup> Iyavei niha acoi oroico vītese pe piri, “Yande paraisu rane itera mbahe yavai vahe” orohe voi eté acoi pēu. Ahe niha cūritei peicua.

<sup>5</sup> Evocoyase che nañemosā irise, amondo Timoteo ‘¿yuvirecoiño ité piha Tūpa rese?’ che yapave. Che asiquiye, “Aviyeteramo Carugar omondora mbahe tēi pipe yuvireco” ahe ‘ore poraviqui agüer evocoyase ocañi tēira’ che hesave.

<sup>6</sup> Cūritei rumo Timoteo oyevi Tesalónica sui, güeru ñehesa aviye vahe pe resendar oreu pe Tūpa reroyasa, iyavei pe poroaisusa resendar avei. Iyavei aipo pemahenduha ore

rese pe poroaisusa pipe. Iyavei pe ore repia pota tēi peye no; inungar ore pe repiasa pota tēi avei.

<sup>7</sup> Sese, ore rivireta, ore paraisusa pāhuve ore mboviharete peye, co oroicuase pe reco tupri Tūpa reroyasa pipe.

<sup>8</sup> Cūritei ore mopoase catu iri oroyanduse pe yemoviracua tupri yande Yar rese.

<sup>9</sup> “¿Mara yahera pīha, ‘Aviye ndeu’ yande he tupri catu āgua Tūpa upe?” orohe pe reco tupri rese, iyavei ore yembovīha catusa rese avei no

<sup>10</sup> pītu, ari rupi oroporandu Tūpa upe ore so āgua pe repia eipeve iyavei Tūpa reroyasa ipane vite vahe mboaviye tupri āgua pēu.

<sup>11</sup> Iyavei ore oroipota ore pīviira yande Ru Tūpa, yande Yar Jesucristo avei ore so āgua pe piri.

<sup>12</sup> Evocoyase yande Yar tape moviracua catu, tombou catu avei pe yeaisu āgua, iyavei opacatu raisu catu āgua, inungar ore orovireco pe raisusa.

<sup>13</sup> Ipīpe sui tape moviracua pe reco maranehi pipe pe mbahe aviēhisave yande Ru Tūpa rovai acoi oyeveise yande Yar Jesús opacatu ovoya reseve. Ēgüe tehi pēu.

## 4

### *Teco tupri Tūpa oipota*

<sup>1</sup> Ore rivireta, cūritei oroñehe pota pēu pe cuaitarā rese yande Yar Jesús rer pipe: inungar cūritei pe recocuer pereco, ēgüe peyeño ité catu peico ore pe mbohe agüer rupi Tūpa mboetei āgua.

<sup>2</sup> Pe niha, peicua acoi ore pe mbohe agüer yande Yar Jesús rer pipe.

<sup>3</sup> Esepia, Tūpa oipota pe reco maranehi āgua oyeupe. “Tipo eme que ñepeí oyemboaguasa tēi vahe” ehi.

<sup>4</sup> Iyavei peico tupri pe rembireco rese pe reco ĩvisa pipe Tūpa remimbotar rupi, iyavei pemboetei tupri sereco yepi.

<sup>5</sup> Peicoi rene ava Tūpa ndoicuai vahe reco pipe pe remimbotar tēi apo āgua.

<sup>6</sup> Tipo eme avei oyapo vahe co nungar angaipa yande rivri reco momara āgua tēi. Esepia, Tūpa omondora oñemoirosa ipīrata vahe evocoi nungar ava upe. Evocoi niha yipisuive oromombehu vahe pēu.

<sup>7</sup> Esepia, Tūpa niha yande poravo yande reco maranehi āgua, ndahei angaipa pipe yande reco āgua tēi.

<sup>8</sup> Sese acoi ndosendu potai vahe co yembohesa, ndahei eté ava tēi viroĩro, ahe rumo Tūpa ité viroĩro yuvireco acoi ombou vahe oEspíritu Santo pēu.

<sup>9</sup> Iyavei co peyepāhuve pe yeaisusa rese, ndaicuachía iri chira pēu. Esepia, Tūpa ité niha pe mbohe pe yeaisu āgua opacatu.

<sup>10</sup> Ēgüe peye niha opacatu yande rivireta co Macedonia rupindar raisu peico. Co catu peyapo che rivireta: pe mbouvicha vite catu pe poroaisusa.

<sup>11</sup> “Peico tupriño avei pe reco mbegüesa pipe; mbahe pe rembiapo reseño tupri pehañeco; peporaviqui pe po pipe ité” aipo orohe acoi pēu cuese.

<sup>12</sup> Evocoyase pe mboyeroyara ava ndahei vahe Jesús reroyasar yuvireco; iyavei ēgüe peyera mbahe pēu ipaneēhi āgua avei no.

### *Oyevira yande Yar co ivi pipe*

<sup>13</sup> Ore rivireta, ore oroipota peicua aveira manosa recocuer; sese ndapeicoi chira pe viharēhisa pipe inungar co ava ndoyeroyai vahe Tūpa rese.

<sup>14</sup> Esepia, yande yaroya: Jesús omano, ichui ocuerayevi. Evocoyase yande avei yaroya Tūpa Guahir Jesucristo reseve ombogüerayevira opacatu acoi seroyasa pipe omano vahe yuvireco.

<sup>15</sup> Sese co oromombehu p̄eu, ahe niha yande Yar porombohesa: yande yaicove vite vahe co ivi pipe, acoi oyeveise yande Yar, ndahei chira yande rane omano vahecuer sui yayemboya yande Yar rese.

<sup>16</sup> Esepia, yande Yar ité ogüeyi irira iva sui ou mborerecuar ivate vahe ñehesa pipe; ahese oyeendura Arcangel ñehe iyavei Tūpa remimbi moñehe p̄iratasa. Ahese seroyasar omano vahecuer rane opūhara yuvireco.

<sup>17</sup> Ipare voi yande yaicove vite vahe, serasopri yaicora opacatu iva quiha rese co yande Yar rovaichi āgua ivitu rupi. Ēgüe yahera yande Yar piri yaico vaherā apirēhi.

<sup>18</sup> Sese peyemonguerēhi catu co ñehesa pesendu vahe rese.

## 5

<sup>1</sup> Iyavei no, acoi ari yande Yar yusa resendar ore ndoroicuachiai chira p̄eu.

<sup>2</sup> Esepia, pe peicua tupri co yande Yar ari oyepotara imohaēhisa pipe, inungar acoi imonda rai vahe oyepota p̄itu pipe.

<sup>3</sup> Acoi ava aipo ehise yuvireco: “Opacatu avīye ité yaico, ndipo iri mbahe-mbahe tēi yandeu” ehise, ahese inungar acoi cuña imembirasī aviyeteramo tēi, Ēgüe ehi aveira, aviyeteramo tēi icañi oura iharive, ahese ndoicatu chira ichui oñemi yuvireco.

<sup>4</sup> Pe rumo, ore rivireta, ndahei p̄itumimbisa pendar nungar peico. Evocoyase oyepotase yande Yar ari, ndahei chira imonda rai vahe nungar pe resapiha tēi ou.

<sup>5</sup> Esepia, pe opacatu peico vahe Tūpa poroesapesa pipe, ndahe iri yande p̄itumimbi pipendar yaico.

<sup>6</sup> Evocoyase ndayaicoi chira co ambuae yuviroque tēi vahe nungar p̄ihañemoñetasa pipe; iyacatu rumo yande yayemopoase yande p̄ihañemoñeta tupriisa pipe.

<sup>7</sup> Acoi yuviroque vahe, yuviroque p̄itu pipe; iyavei acoi osavaipo vahe, osavaipo avei p̄itu pipe yuvireco.

<sup>8</sup> Yande rumo yaico vahe Tūpa poroesapesa pipe. Evocoyase yareco tupriira yande p̄ihañemoñetasa yande reco tupri āgua yepi. Iyavei yayoepira yande yeroyasa pipe, poroaisusa pipe avei no. Iyavei inungar acoi sundao vireco oāca ndiru guarepochi apopri yuvireco oāca repi āgua, yande avei tayareco yande remiaro yande ñepisiro āgua.

<sup>9</sup> Esepia niha, Tūpa yande poravo ndahei yaico vaherā iñemoirosa pipe nara; ahe rumo yande poravo yasupiti vaherā ñepisirosa yande Yar Jesucristo rembiapo sui.

<sup>10</sup> Esepia, ahe omano yande recocuer rese oyese yande rereco āgua opacatu yande recove vitesse, yamanose avei.

<sup>11</sup> Sese peyemonguerēhi catu, iyavei peyemoviracua catu vite peyeupe inungar co peyapo peico.

### *Pablo omboaracua Jesús reroysar oico*

<sup>12</sup> Iyavei no, ore rivireta, pemboyeroya acoi oporaviqui vahe yuvireco pe p̄ahuve. Ahe niha pe cuai vahe yuvireco, iyavei pe mboaracua vahe yande Yar uve nara yuvireco.

<sup>13</sup> Pemboyeroya iyavei pesaisu tupriira iporaviquisa rese. Peico tupri avei peyepāhuve.

<sup>14</sup> Iyavei ore rivireta, pe cuaisa: pemboaracua acoi ndoporaviqui potai vahe imbohe catu āgua. Iyavei pemonguerēhi acoi niquerēhi iri vahe. Peipitivi avei acoi ndoyemoviracuai vahe Tūpa rese güeco āgua. Iyavei peñemosañō opacatu ava uve yepi.

<sup>15</sup> Peicua catu pe rereco megua potasar sui. Ndapemboyevii chira mbahe-mbahe tēi co pe rereco megua potasar upe. Iyacatu rumo peyapo tupri mbahe avīye vahe peyeupe, opacatu ava upe avei no.

<sup>16</sup> Peyembovihanora ari yacatu peico.

<sup>17</sup> Iyavei peyeroquirā ari yacatu rupi no.

<sup>18</sup> “Avīye ndeu” peyera Tūpa upe opacatu mbahe rese. Esepia, ahe niha Tūpa oipota yandeu Cristo rese yaico vahe.

<sup>19</sup> Iyavei ndapemombituhui chira mbahe Espíritu Santo oyapo pota vahe pe rese.

<sup>20</sup> Ndapeyamotarēhii chira Tūpa ñehe imombehupri.

<sup>21</sup> Pesāhapa rane opacatu mbahe. Ichui peipisira mbahe aviye vahe peyeupe.

<sup>22</sup> Peyepēpi opacatu mbahe naporai vahe sui.

<sup>23</sup> Tūpa acoi ombou vahe teco tupriisa yandeu tape pehapa tupri oyeupe nara. Iyavei tosāro tupri opacatu pe espíritu, pe hã, pe rete avei pe reco maranehi ãgua co yande Yar Jesucristo yevi irise.

<sup>24</sup> Ahe acoi pe poravo vahe oyeupe nara seco tupri vahe. Ahe omboaviyera opacatu co mbahe.

*Pablo imahenduha Jesús reroyasar rese*

<sup>25</sup> Ore rivireta, peyroqui ore rese.

<sup>26</sup> Pemboavirave opacatu yande rivri eipe pendar pe yeovaupitesa pipe.

<sup>27</sup> Che opocuai yande Yar rer pipe: peyroqui co cuachiar opacatu yande rivireta upe.

<sup>28</sup> Yande Yar Jesucristo tape rovasa tupriño pe rereco. Aipo rupive.

## PABLO REMBICUACHIA IMOÑUVIRIOSA TESALONICA PENDAR UPE TESALONICENSES

*Pablo mahenduhasa Jesús reroyasar Tesalónica pendar upe*

<sup>1</sup> Che, Pablo, Silvano, Timoteo reseve, aicuachía co ore ñehe pëu, ore rivireta, peñemonuha vahe Tūpa uve tecua Tesalónica ve, yande Ru Tūpa, yande Yar Jesucristo rese peico vahe.

<sup>2</sup> Tombou pëu oporovasasa pe reco tupri ãgua yande Ru Tūpa, yande Yar Jesucristo avei.

*Tūpa omombaraisura viroyasarëhi Jesucristo yevise curi*

<sup>3</sup> Ore rivireta, “Aviye ndeu” orohe itera Tūpa upe pe recocuer rese yepi. Esepia, Tūpa rese pe yeroyasa tuvicha-vicha iri, tuvicha-vicha iri avei pe yeaisusa opacatu peyeupe pereco vahe.

<sup>4</sup> Evocoyase, ore oroñehe pe rese ore vihasa pipe Tūpa reroyasar ñemonuhasa rupi. Esepia, acoi ava mbahe-mbahe tēise pëu, peñemosañõ chupe pe Cristo rese pe yeroyasa pipe.

<sup>5</sup> Co niha omboyecua Tūpa reco ñvisa ava upe. Esepia, ipipe pe rereco omborere-cuasave pe reique ãgua. Sese niha, peparaisu vite tēi peico.

<sup>6</sup> Tūpa omombaraisura acoi pe mombaraisusarer. Iya ité ãgüe ehi vaheã chupe.

<sup>7</sup> Pe rumo imombaraisupri peico vahe, Tūpa omondora pe pituhu ãgua, ore pituhu ãgua avei, acoi yande Yar Jesús oyevise tata rendigüer pãhuve ìva sui opacatu güembigui seco pĩrata catu vahe reseve.

<sup>8</sup> Ahe oura opacatu Vu Tūpa reroyasarëhi mombaraisu ãgua iyavei oyesuindar ñehesa poropĩsirosa resendar rendu tēisar mombaraisu avei.

<sup>9</sup> Evocoi iparaisura yuvireco, imocañipri yuvirecoira apirëhi. Iyavei imoyepepisara amombri yande Yar reco pĩratasa porañetesa sui.

<sup>10</sup> Acoi ouse ahe ari pipe, yande Yar imboeteipri opacatu seroyasar pãhuve; ipãhuve pe peicora. Esepia, peroya ité oromombehu vahe pëu.

<sup>11</sup> Co rese oroyeroqui pe rese yepi: oroporandu yande Ru Tūpa upe tape rereco tupri güemienoi pe recosa pipe. Iyavei oroyeroqui chupe, tomboaviye güeco pĩratasa pipe opacatu ñepi-pei mbahe aviye vahe peyapo pota vahe iyavei opacatu mbahe pe rembiapo aviye vahe sese pe yeroyasa pipe.

<sup>12</sup> Evocoyase yande Yar Jesucristo rer imboeteipri pe recocuer pipe sui; iyavei pe imboeteipri peico yande Yar rese peico vahe yande Ru Tūpa, yande Yar Jesucristo pe raisusave.

## 2

*Yande Yar Jesús yevisa resendar mombehu tupri isa*

<sup>1</sup> Iyavei, ore rivireta, ore oromombehu potami pëu opacatu acoi yande Yar Jesucristo yevisa resendar yande monuha vaheã oyese.

<sup>2</sup> Peicua catu, tapepihañemoñeta rerova eme iyavei peyembosiquiyei rene que ava “che añehe Espiritu pipe” ehi vahe sui, que icuachiapri sui, que ñehesa pesendu vahe sui inungar-ra ore ñehesa ité viña “oyepota ari Jesús yevisa” ehi tēi vahe yuvireco pëu.

<sup>3</sup> Peicua catu peyembopa ucai rene ñepi yepe ava upe. Esepia, yipindar ari Jesucristo yu ãgua renonde, yugüerura mbahe-mbahe tēi aposar. Ahe Tūpa amotarëhisar yuvirecoi vahe. Ahese oyemboyecua ara ava yangaipã guasu vahe. Ahe ocañi tēi vaheã.



<sup>4</sup> Oyemboivate aira opacatu Tūpa rer rerecosar amotarēhisave iyavei ndoipotai chira ambuae mboetei. Oique aveira, oguapī Tūpa rēta pīpe inungar-ra Tūpa ité viña. “Supi eté che Tūpa aico” ehi tupri tēira oī.

<sup>5</sup> ¿Ndapemahenduhai vo acoi che ñehengagüer rese pe pāhuve aico vītese cuese?

<sup>6</sup> Co imombitasar peicua cūrītei. Ihari oyepotase voi, oyemboyecuara.

<sup>7</sup> Co porocuaita amotarēhisar ndoyemboyecua vītei vahe rembiapo oime cūrītei. Co güeraño ipane imombitasar renose āgua ipāhu sui,

<sup>8</sup> ahese voi oyemboyecuara acoi ava yangaipa guasu vahe. Yande Yar Jesús rumo oyucara oñehe pīpe, omocañi itera güendigüer pīratasa pīpe oyevise curi.

<sup>9</sup> Yucasa renonde rumo, acoi ava yangaipa guasu vahe oura Carugar pīratasa pīpe; güerura güeco pīratasa tuvicha vahe; omboyecua angahura poromondiisa.

<sup>10</sup> Oyapo angahura opacatu mbahe tēi oporombopa āgua oico ava ocañi tēi vaherā upe. Esepia, evocoi ava ndosendu potai porombohesa supi eté vahe oñepisiro āgua yuvireco.

<sup>11</sup> Sese Tūpa oseyara co porombopasa reroya āgua yuvireco

<sup>12</sup> ‘ipīpe tocañi tēi co ava, opacatu mbahe supi eté vahe reroyaēhisar, acoi oyemboviha catu vahe mbahe-mbahe tēi rese yuvireco’ oya.

### *Iporavopri ipīsīropirā*

<sup>13</sup> Ore rumo, “Avīye ndeu” orohera Tūpa upe pe recocuer rese yepi, ore rivireta, yande Yar rembiaisu peico vahe. Esepia, Tūpa niha pe poravo yipisuipe pe pīsīro āgua pe reco maranehi āgua rese Espīritu pīpe iyavei porombohesa supi eté vahe reroya āgua.

<sup>14</sup> Sese niha, Tūpa oñehe yandeu yande pīha pīpe co ñehesa pīsīrosa resendar pīpe, ore oromombehu vahe pēu ‘tovireco che Rahir Jesucristo reco porañetesa’ oya.

<sup>15</sup> Sese ore rivireta, peyemoviracua iyavei peresarai eme acoi oromombehu vahecuer iyavei oroicuachía vahe acoi pēu.

<sup>16</sup> Yande Yar Jesucristo teieté, yande Ru Tūpa avei, yande raisusa yande rovasasa pīpe ombou vahe vihasa apirēhi vahe yandeu iyavei yande reco tupri rāro āgua,

<sup>17</sup> ahe tape monguerēhi, tape moviracua avei opacatu ñehesa avīye vahe rese, opacatu mbahe pe rembiapo avīye vaherā rese avei.

## 3

### *Pablo oporandu Jesucristo reroyasar yeroquisa rese oyeupenara*

<sup>1</sup> Ore rivireta, co mbahe ipa vahe amombehu pota pēu: peyeroqui ore rese. Evocoiyase toyepota pīhaivi yande Yar ñehengagüer opacatu rupi; tipīsisa tupri imboeteisa pīpe inungar oyepota pe pāhuve.

<sup>2</sup> Peyerure avei ore repi āgua rese ava ndaseco pōrai vahe, ipihañemoñeta rai vahe sui. Esepia niha, ndaopacatu Tūpa rese ipihañemoñeta yuvireco.

<sup>3</sup> Yande Yar rumo seco īvi vahe. Ahe pe recocuer moviracuara iyavei pe rārorā mbahe tēi sui.

<sup>4</sup> Ore oroyeroya yande Yar rovai peyapo vahe rese iyavei peyapo vīteño vaherā rese acoi ore pe cuai agüer.

<sup>5</sup> Yande Yar tape pītivī pe poroaisu āgua inungar Tūpa oporoaisu iyavei Cristo ñemosasa rereco āgua.

### *Yande cuaita yande poraviqui āgua*

<sup>6</sup> Ore rivireta, opocuai yande Yar Jesucristo rer pīpe: acoi ndoporaviqui potai vahe yande rivri pe pāhuve, peyepipiño ichui, acoi ndoviroya potai vahe avei ore porombohesa oromombehu vahe pēu.

<sup>7</sup> Pe peicua mara peyera ore recocuer moña āgua peico. Ore oroicose pe pāhuve, ndoroico tēi,

<sup>8</sup> ndorohu tēi avei ambuae tembihu imboepirēhi. Ore rumo que ñepe mañeco tēiēhi āgua rese oroporaviqui ore cuerai rane ité ari, p̄itu reseve.

<sup>9</sup> Iya ité niha mbahe rese ore porandu āgua p̄eu ore p̄itivi āgua rese viña; ore rumo oroporaviqui pe ore recocuer rupi pe guata āgua rese.

<sup>10</sup> Acoi oroico v̄itese pe p̄ahuve, oromondo pe cuaitarã: acoi ndoporaviqui potai vahe, ahe tocaru eme.

<sup>11</sup> Oroyandu amove aipo pe p̄ahu pendar yuvirecoiño tēi ndoporaviqui vahe. Evocoi omañeco tēi ambuae ava recocuer.

<sup>12</sup> Ore oromondo acoi ava upe mborocuaita yande Yar Jesucristo rer pipe: toporaviqui güeco quiririsa pipe; ipipe sui yuvirecovera.

<sup>13</sup> Ore rivireta, pecuerai eme mbahe aviye vahe apo.

<sup>14</sup> Oimese ndov̄iroyai vahe ore remimombehu co cuachiar pipe, peicua tupri evocoi nungar. Peyemboya eme sese. Evocoiyase toch̄i ahe.

<sup>15</sup> Pereco eme catu yamotarēhisa chupe; iyacatu rumo pemboaracua catuñora inungar yande rivri.

*Ñehesa ipa vahe*

<sup>16</sup> Aviye, yande Yar ae tombou güeco tuprisa pe reco tupri āgua p̄eu ari yacatu rupi opacatu pe reco pipe. Tasecoi pe rese ari yacatu.

<sup>17</sup> Che, Pablo, aicuachía co mahenduhasa che po pipe ité p̄eu. Che rembicuachía icuapri opacatu che cuachiar pipe.

<sup>18</sup> Yande Yar Jesucristo tape rovasa opacatu yepi. Aipo rupive.

## PABLO REMBICUACHIA YIPINDAR VAHE TIMOTEO UPE TIMOTEO

### *Pablo mahenduhasa Timoteo upe*

<sup>1-2</sup> Che, Pablo, aicuachía che ñehe ndeu, Timoteo. Nde niha che rahir Tũpa reroyasa pipe ereico. Che niha Jesucristo apóstol aico, yande Pĩsirosar Tũpa porocuita rupi iyavei yande Yar Jesucristo porocuita rupi. Ahe niha yande remiaro. Tombou yande Ru Tũpa, yande Yar Jesucristo oporovasasa, oporoparisuerecosa ndeu nde reco tupri ãgua.

### *Pablo, “Eicua catu porombohesa co coti tẽi vahe sui” ehi Timoteo upe*

<sup>3</sup> Iyavei acoi aipo ahe ndeu cuese che so ãgua Macedonia ve: nde epita co tecua Efeso ve. Evocoyase eremboaracuara co ava co coti tẽi oporomboaracua vahe, toporomboaracua eme pihañemoñetasa co coti-coti tẽi vahe rese yuvireco.

<sup>4</sup> Toyapisaca eme avei tecocuer ipapapri tẽi vahe rese, tecocuer aracahendar ěgũe ehi tẽi vahe rese avei. Ahe ichui osẽ yeacasa naporai vahe yepi; ndayande pĩtivii rumo Tũpa remimbotar reroya tupri ãgua rese.

<sup>5</sup> Sese co amondo porocuita ndeu yande yeaisu ãgua yande pihañemoñeta catuprisa pipe, yande reco yapisaca tuprisave, iyavei yande yeroyasa supi eté vahe pipe.

<sup>6</sup> Esepia, amove ava oime ichui oyearacua mocañi oñehe-ñehe tẽisa pipe yuvireco.

<sup>7</sup> Oporombohe pota tẽi Tũpa porocuita rese; ndosenducuai rumo oporombohesa yuvireco, “Supi tupri revo yaporombohe” ehi tẽi yuvireco viña.

<sup>8</sup> Yaicua niha co porocuita aviye ai eté yaiporuse Tũpa remimbotar rupi eté.

<sup>9</sup> Yaicua avei acoi porocuita ndahei ava aviye vahe upe nara. Ahe rumo ndiporeroyai vahe mboaracua ãgua, ndayaracua potai vahe upe nara, angaipa viyar upe nara avei, iyavei opacatu mbahe-mbahe tẽi aposar upe nara, nomboetei vahe Tũpa iyavei chupendar pihañemoñetasa; acoi vu, osi oyuca vahe; opacatu ava oporapichi vahe upendar.

<sup>10</sup> Acoi oyemboaguasa tẽi vahe, iyavei cuimbahe ambuae cuimbahe rese oyapo vahe mbahe, que cuña ambuae cuña rese avei; iyavei acoi virocua tẽi vahe mbiguai ambuae ava sui, semirañete ai vahe; iyavei acoi, “Che amombehu mbahe supi eté vahe” ehi tẽi angahu vahe, chupe nara ité co porocuita; imondosa avei opacatu porombohesa nimarai vahe amotarẽhisar upe nara.

<sup>11</sup> Co porombohesa nimarai vahe oyoya tupri ñehesa porañete vahe poropĩsirosa resendar rese. Tũpa sovasapri secoi, ahe che cuai vahe sese.

### *Pablo oparaisuerecosa rese, “Aviye ndeu” ehi Tũpa upe*

<sup>12</sup> “Aviye ndeu” ahe yande Yar Jesucristo upe. Ahe niha ombou pĩratasa co che ñehe ãgua. Esepia, ahe oyeroya che rese. Sese che mondo oñehengagũer mombehu ãgua.

<sup>13</sup> Yepe che yipindar che ñehe-ñehe tẽi sese; aseca-secaño mbahe-mbahe tẽi che rembiapoguã yamotarẽhimbave che yemboivate aisa pipe, Tũpa rumo, che paraisuerecoño. Esepia, che ahese, ndahe vitei Cristo reroyasar aico; ndaicua vitei mbahe ayapo vahe.

<sup>14</sup> ěgũe ehi yande Yar ombou catu oporovasasa che rese iyavei ombou che oyese yeroya ãgua iyavei che poroaisu ãgua Jesucristo rese che recosa pipe.

<sup>15</sup> Iya peroya co supi eté vahe, che aipota avei opacatu oyapisacara yuvireco sese: Jesucristo ou co ivi pipe ava yangaipa vahe pĩsiro ãgua. Che rumo acoi ivate catu vahe yipindar aico ipãhuve.

<sup>16</sup> Sese Tũpa che paraisuereco che rese rane Jesucristo reco mbegũe tuprisa mboyecua ãgua. ěgũe ehi che recocuer upe ambuae ava seroya ãgua. Ipipe sui osupitira tecovesa apirẽhi vahe yuvireco.

<sup>17</sup> ¡Sese yamondo imboeteisa apirēhi yande Rerecuar ndopai vahe upe! ¡Ahe nomanoi vahe, ndayasepiai vahe, ahe ñepeí vahe Tūpa!

<sup>18-19</sup> Che rahir Timoteo, co amondo nde cuaitarā ndeu nde reco moviracua āgua mbahe tēi recopi āgua Cristo rese nde yeroyasa pipe nde pihañemoñeta catuprisa pipe avei. Supi tupri cuese Tūpa reroyasar oñehe yuvireco nde rese serer pipe. Amove ava opihañemoñeta tupri reroyaēhisave, omocañi uca Tūpa rese oyeroyasa

<sup>20</sup> inungar vahe Himeneo rese, Alejandro yuvirecoi. Ahe che amondo Carugar povrive ‘evocoyase toicua tiñehe-ñehe tēi eme Tūpa upe yamotarēhisave yuvireco’ che yapave.

## 2

### *Ñehesa yeruresa resendar*

<sup>1</sup> Iyavei no, co che opomonguerēhi pe yerure āgua, peporandu, pemondo avei “aviye” pe hesa Tūpa upe opacatu ava recocuer rese.

<sup>2</sup> Iyavei peyerure opacatu mborerecuar rese. Evocoyase tayareco yande reco tupri Tūpa mboetei tuprisa pipe, yande poromboeteisa pipe avei.

<sup>3</sup> Co aviye ité; ahe niha yande Písirosar Tūpa remimbotar.

<sup>4</sup> Supi eté ahe oipota opacatu ava ñepisiro iyavei co porombohesa supi eté vahe cua tupri āgua.

<sup>5</sup> Esepia, ñepeño ité Tūpa, iyavei ñepeño ité ava oicatu vahe yande reraso Tūpa upe: ahe Jesucristo.

<sup>6</sup> Esepia, Jesucristo omano opacatu ava yangaipa vahe repirā ipísiro āgua. Ahe imombehusa chupendar ari iporavopri rupi.

<sup>7</sup> Sese che supi eté apóstol, icuapri aico Tūpa Ñhengagüer mombehu āgua, ava ndahei vahe judío mbohe āgua, co yeroyasa rese iyavei supi eté vahe rese. Supi eté ndopombopai.

<sup>8</sup> Evocoyase che aipota opacatu rupi ava toyerure yuvireco. Tomopuha opo yuvireco opihañemoñeta catuprisa pipe, ombahe mboasiēhisa pipe, oyeacaēhisa pipe avei.

<sup>9</sup> Iyavei cuña toyemonde tupriño turucuarño tēi pipe yuvireco. Aní chira rumo oāca moporañeteisa pipe yuvirecoi; tomondo eme avei mbahe sendí vahe inungar oro oyese yuvireco. Iyavei turucuar sepi rusu vahe tomondo eme yuvireco.

<sup>10</sup> Iyacatu rumo yuvirecoi tupri ra güembiapo aviye vahe pipe, inungar cuña oyemondo tupri vahe Tūpa upe yuvireco yepi.

<sup>11</sup> Iyavei cuña tosendu porombohesa oquiririsa pipe imboyeroyasave.

<sup>12</sup> Ndaipotai cuña oporombohe ava rehí pāhuve iyavei toyocuai eme cuimbahe. Iyacatu rumo iquiririñora yuvireco.

<sup>13</sup> Esepia, Tūpa oyapo yipindar Adán; ipare Eva oyapo.

<sup>14</sup> Adán ndahei imbopapri; cuña rumo oyembopa uca. Ichui oviapi angaipa pipe.

<sup>15</sup> Oñepisiora rumo ocuaita mboaviyesa pipe oyese yeroyasa rereco pipe, iporoaisusa pipe, güeco maranehisa pipe avei.

## 3

### *Tūpa reroyasar rārosar cuaita*

<sup>1</sup> Iyavei co supi eté: acoi amove oico pota vahe Tūpa reroyasar rāro āgua, ahe oipota mboraviqui aviye catu vahe.

<sup>2</sup> Sese acoi vireco vahe ocuaita Tūpa reroyasar rāro āgua, ahe secoi tupri mbahe aviye vahe pipe yepi. Ipipe ava noñehei chira yamotarēhisave. Iyavei omendara ñepeí cuña reseño ité. Toñearo tupri avei yuvireco, toyapo mbahe supi eté vahe, tiporomboetei tupri

avei. Iyavei omoinguera oyepiri ava oyepota vahe güëtave. Oicua aveira ava mbohe tupri água.

<sup>3</sup> Iyavei ndahei chira caguar tēi. Ndosecai chiaveira ovava água. Iyacatu rumo seco mbegüera opacatu ava upe. Ndoipota rai chiaveira guarepochi.

<sup>4</sup> Iyavei oicua tupri água güëta pipendar rãro água. Ombohe aveira guahir iporeroya água, iporomboetei água avei.

<sup>5</sup> Esepia, acoi ndoicuai vahe güëta pipendar rãro, ¿mara ehira evocoyase Tũpa reroyasar rãro?

<sup>6</sup> Tũpa reroyasar rãrosar rumo ndahei chira oipisi ramo vahe Tũpa opiha pipe. Esepia, aviyeteramo oyemboivate ai tiëtera. Ipipe sui imocañipri avei secoira Caruguar nungar.

<sup>7</sup> Iyavei oyecua uca tupri ranera Tũpa reroyasarēhi pãhuve. Ahese ndipoi chira imboeteiēhisa iyavei ndoviapi chira Caruguar povrive.

#### *Tũpa reroyasar rese ihañeco vahe cuaita*

<sup>8</sup> Iyavei Tũpa reroyasar rese ihañeco vahe yuvirecoira oporomboeteisa pipe. Tomboaviye oñehe. Ndahei chira caguar tēi; ndahei chiaveira guarepochi pota raisar tēi.

<sup>9</sup> Iyacatu rumo, porombohesa supi eté vahe rese oyemboya catura opihañemoñeta catuprisa pipe yuvireco.

<sup>10</sup> Iyavei secoãhasa ranera. Acoi osē tuprise, ahese toyuvirecoi Tũpa reroyasar rese ihañeco vahrã.

<sup>11</sup> Iyavei sembireco yuvirecoi aveira oporomboeteisa pipe, nimahechiroi chira, osãro tupri água güecocuer yuvireco, iyavei imboyeroyapri aveira opacatu mbahe rese yuvireco.

<sup>12</sup> Iyavei Tũpa reroyasar rese hañecosar ñepeño itera sembireco, oicua aveira guahir rãro tupri água, güëta pipendar rãro água avei.

<sup>13</sup> Esepia, Tũpa reroyasar rese hañecosar oyapo tuprise oporaviquisa yuvireco, ipipe sui imboyeroyasara. Osiquiyeēhisave avei secoira Jesucristo reroyasa pipe.

#### *Tũpa reco oyecua ramo vahe reroya tuprisa*

<sup>14</sup> Che aso pihavi pota nde repia. Aicuachía rumo co che ñehe ndeu

<sup>15</sup> acoi che aracahese, ereicuañora rumo pe reco tupri água ava Tũpa rese yuvirecoi vahe pãhuve; ahe acoi Tũpa oicove vahe upendar yuvirecoi, oyemoviracua tupri vahe yuvireco co porombohesa supi eté vahe mboyecua água.

<sup>16</sup> Supi eté tuvichá etepri Tũpa reco oyecua ramo vahe reroya tuprisa: Cristo oyemoporēhi yande reco nungar pipe yandeu.

Ipape Espiritu pipe imboyecuasa secocuer supi tupri vahe.

Iyavei Tũpa rembiguai rembiepiave secoi.

Ichui imombehusa opacatu ivi rupi; opacatu rupi avei seroyasa.

Iyavei ipisipri secoi ivave nara.

## 4

#### *Oimera ava oyepipi vahe Tũpa rese oyeroyasa sui yuvireco coiye*

<sup>1</sup> Iyavei Espiritu aipo ehi tupri yandeu: coiye, ari cañi renonde, amove ava oyepipira Tũpa rese oyeroyasa sui yuvireco. Omboyeroyara espiritu oporombopa tēi vahe, porombohesa Caruguar suindar avei.

<sup>2</sup> Oyapisacara ava aipo ehi tēi vahe rese, semirañete ai vahe ñehe rese avei yuvireco. Ëgüe ehira opihañemoñetasa mocañi tēi yuvireco.

<sup>3</sup> Co ava niha, “Aní chira yamenda” ehi tēi ava upe yuvireco; “Aní chira yahu opacatu mbahe” ehi avei chupe. Tũpa rembiapo rumo co tembihu poromoviracuasa. Sese Jesús reroyasar iyavei oicua tupri vahe mbahe supi eté vahe yuvirohura ‘aviye ndeu’ ohesa pipe Tũpa upe yuvireco.

<sup>4</sup> Esepia, opacatu mbahe Tūpa rembiapo, aviye ité. Ahe ndiyai chira yaroïro yaipisise, “Aviye ndeu” yande hesa pipe chupe.

<sup>5</sup> Esepia, Tūpa oñehe pipe yande yeroquise co tembihu rese, osovasa yandeu.

*Cristo rembiguai aviye vahe resendar*

<sup>6</sup> Acoi erembohese co mbahe rese yande rivireta iyavei ereyemoviracuase ñehesa poreroyasa resendar rese iyavei porombohesa aviye vahe nde yese erereco vahe rese, ahese Jesucristo rembiguai aviye vahe ereicora.

<sup>7</sup> Ndereyapisacai chira rumo acoi mbahe aracahendar co ivi pendar yapisaca tēisa rese. Eyembohe catu yande Yar uveño ité nde reco āgua.

<sup>8</sup> Esepia, yepe aviyeño chñhi yande retecuer yamoviracua viña, yande Yar upe yande reco āgua aviye catu opacatu yande reco uve nara. Esepia, ahe yande pñivira yande recove āgua cūrtei iyavei curi yande recove āgua.

<sup>9</sup> Co supi eté vahe, evocoyase yande yaroyara opacatu yepi.

<sup>10</sup> Sese niha yaporaviquí etepri. Esepia, yande yayeroya ité Tūpa ndopai vahe rese, ahe opacatu ava Pñirosar, iyavei viroyasar Pñirosar catu ité secoi.

<sup>11</sup> Co porombohesa eremombehura ava pñhuve, erembohe aveira sese.

<sup>12</sup> Tipo eme ava nde roeroïro vahe chñhivahe catu nde reco rese. Nde rumo ereico tuprira Tūpa reroyasar rovaque. Eñehe Tūpa reroyasave nde reco tuprisa pipe. Esaisu tupri nde yeroyasave nde recocuer maranehi pipe.

<sup>13</sup> Che yepota renondeve, eyeroqui catu Tūpa Ñehengagüer rese opacatu ava rovaque. Emonguerēhi catu yande rivireta iyavei erembohe tuprira.

<sup>14</sup> Nderepoi chira Tūpa ndeu mbahecuasa ombou vahe sui. Esepia, ava Jesús reroyasar rārosar upe Tūpa omombehuse nde cuaitarā, omondo opo nde harive yuvireco.

<sup>15</sup> Ndehañeco catu co mbahe rese; tosepia catu opacatu ava nde recocuer yemoingatu catusa yuvireco.

<sup>16</sup> Iyavei eñearo tupri, eicua catu nde porombohesa rese; eyemoviracua sese ité nde hañeco. Acoi ēgüe erese, ipñiropri ereicora; nde ñehe rese oyapisaca vahe avei ipñiropri yuvirecoira.

## 5

*Mara ehira Jesús reroyasar oyepñhuve yuvireco*

<sup>1</sup> Eremboaracua pñrata eme mbia cuacuami. Iyacatu rumo eremboaracuara mbegüe rupi inungar nde yesupa ité sereco. Iyavei mbia chñhivahe upe ereñehe tuprira secocuerā rese inungar nde rivri upe.

<sup>2</sup> Cuña oñaro vahe upe avei ereñehe tuprira inungar nde si ité sereco; iyavei cuñatai eremboaracua tuprira inungar nde reindri ité ererecora opacatu nde reco catuprisa pipe.

<sup>3</sup> Acoi imer mano vahecuer ité ereipñivira que mbahe ipane vahe rese.

<sup>4</sup> Que oimese imembri, anise que semiaro, toyembohe rane ocuaita mboaviye āgua yuvireco chupe. Ēgüe tehi guaisu mboyevi chupe, ahe niha Tūpa remimbotar.

<sup>5</sup> Iyavei acoi cuña imer mano vahecuer, acoi supi eté ahe ae secoi vahe, ahe oyeroya ité Tūpa rese, iyavei oyeropiñe ité ari, pñtu yacatu yepi.

<sup>6</sup> Osecase rumo mbahe güemimbotar yuvireco, ahese omano vahe tēi secocuer yuvirecoi.

<sup>7</sup> Eyocuai tupri ava co ñehesa rese; ichui ndahei chira ava ñehepora tēi yuvirecoi.

<sup>8</sup> Acoi ava rumo nosaroi vahe omu; acoi güeta pipendar nosaroi vahe avei, ahe ndoguata iri Tūpa rese oyeroyasa rupi iyavei mbahe tēi catu Jesús reroyasarēhi sui.

<sup>9</sup> Icuachiasara rumo ambuae cuña imer mano vahecuer pñhuve ivate catu sesenta sui iharaviter vahe, iyavei ñepeiño ité omer vireco vahecuer.

10 Icuaprira secocuer icatuprisa rese, omboacua tuprise chñhivahe oyesuindar, omoinguese ava güeta pipe, ihañecose ava Tūpa reroyasar rese ipi sei āgua, oipitiviise ava iparaisu vahe, oyapo tuprise opacatu mbahe aviye vahe.

11 Ereicuachía eme iharaviter ndosupitii vahe sesenta cuachiar pipe. Esepia, amove güemimbotar pipe tēi oyepepi Cristo sui, omenda yupagüe pota iri vahe.

12 Ipipe oimera Tūpa poronupasa chupe. Esepia, yipindar oyemondo Tūpa upeño ité oyecuachias. Ipare rumo nomboaviyei eté oñehe.

13 Iyavei oi yacatu rupi tēi oguatase oico, ahese virecora oatēhisa, iyavei imahechiroi tēira, oñangareco tēira opacatu rese, omombehu-mbehu tēi aveira mbahe naporai vahe.

14 Sese co aipota acoi imer mano vahecuer cuñatai vite vahe: tomenda iri, timembi iri avei yuvireco, iyavei tosāro tupri güeta pipendar. Sese yamotarēhimbar secocuer ndahei chira oñehepora tēi vireco yuvireco.

15 Esepia, oime ité amove oyepepi vahe güemimbotar pipe Carugar rupi güeco āgua.

16 Acoi oimese que cuña Tūpa reroyasar vireco vahe que cuña imer mano vahecuer oyepiri, ahe toipitivi yuvireco. Ahe sese evocoyase tūparo pendar nihañecoi chira. Ahese oicatura supi eté imu ndipoi vahe rese hañeco āgua yuvireco.

17 Iyavei acoi Tūpa reroyasar rārosar osāro tupri vahe, ahe toipisi catu ava poropitiviisa imboyeroyasave. Acoi oyemondo vahe Tūpa Ñehengagüer mombehu āgua, ava mbohe āgua avei, ahe co poropitiviisa oipisi catura.

18 Esepia, aracahendar icuachiapri pipe aipo ehi: “Ereyuru āpichi rene tivi oporaviqui vahe trigo cambesar” ehi. Iyavei aipo ehi: “Mbia oporaviqui vahe iyacatu oipisira oporaviqui repri” ehi.

19 Iyavei nde, ndereroyai chira mbahe omombehu vahe Tūpa reroyasar osāro vahe yamotarēhisave yuvireco. Oimese que ñuvirío sepiasar, que mbosapi, ahese ramo ereroyara.

20 Acoi oimese rumo angaipa aposar ipāhuve, ahese eremboaracuara opacatu ava rovaque. Evocoyase ambuae osiquiyera angaipa apoēhi āgua yuvireco.

21 Iyavei che orocuai Tūpa rovaque, Jesucristo rovaque iyavei opacatu Tūpa rembiguai iva pendar rovaque avei: ereyapo tuprira co mborocuaita, nderemomahuatii chira ava imboaracua nde remimbotar rupi tēi.

22 Ndahei chira pihavi ereseno mbia mborocuaita rese ihañeco vahe. Aviyeteramo nde rese pāve mbahe oimera. Eñearo tupri nde reco maranehisa pipe.

23 Nde rie mbaherasisa upe ndereihui chira i güeraño tēi, chñhimi rumo uva ricuer ereihuñomira chupe.

24 Amove ava angaipa oyecua tupri oyeupe porandu āgua renonde. Oime rumo acoi oñomi vahe oangaipa yuvireco. Ipare tēi icuasa.

25 Inungar avei acoi mbahe ava rembiapo oime aviye vahe oyecua tupri vahe no, acoi ndoyecuai vahe ité nañomisai chira.

## 6

1 Iyavei co ava mbiguai Jesús reroyasar, ahe oyeroya tuprira güerecuar yuvireco ava oñehe-ñehe tēiēhi āgua Tūpa rer rese, yande porombohesa rese avei no.

2 Acoi co mbiguai virecose güerecuar Tūpa viroya vahe yuvireco, ahese ndovirecoi chira imboyeroyaēhisa Jesús reroyasar recosa rese. Iyacatu rumo omboyeroya tupri catura güerecuar yuvireco. Esepia, serecuar oipisi vahe iporaviquisa, ahe Jesús reroyasar saisupri yuvirecoi yepi.

*Tūpa rese yande pihañemoñetasa sepirusu vahe nungar*

Eporombohe, emombehu co mbahe:

<sup>3</sup> oimese oporombohe vahe oyesuindar pihañemoñetasa co coti tēi vahe rese, ndoyoyai vahe yande Yar Jesucristo porombohesa aviye vahe rese, ndoyoyai vahe avei yande yembohesa Tūpa rese yande yeroya tuprisa rese,

<sup>4</sup> ěgüe ehi vahe oyemboivate ai tēi mbahe renducuaēhisave. Iyavei oporandu-randu tēi ñehesa rese secoāha āgua inungar imbaheasi vahe. Ichui osē mbahe pota raisa, ñemoirosa, ñehe-ñehe tēisa, yemboyeroyaēhisa

<sup>5</sup> iyavei iporoacasa ndopai vahe ava yaracua rai vahe pāhuve. Ndoicuai rumo mbahe supi tupri vahe yuvireco. Ipihañemoñeta Tūpa rese omahenduhasa pipe mbahe rereco ati āgua yuvireco viña.

<sup>6</sup> Yayembovihanose mbahe yande rembiereco rese, ahese Tūpa rese yande pihañemoñetasa inungar mbahe sepirusu vahe yandeu.

<sup>7</sup> Esepia, ndayarui eté niha mbahe yahase co ivi pipe iyavei ndayarasoi chiaveira mbahe yamanose yande yeupi.

<sup>8</sup> Iyacatu rumo yarecose yande remihura, yande yemonde āgua avei, sese yayembovihanora yaico.

<sup>9</sup> Amove rumo ava, “Mbahe rerecosar ité taico” ehi tiēte viña, ndoyemoviracuai rumo tecoāhasa upe. Ipare ovipai mbahe tēi pipe, setá mbahe pota raisave, ipipe oyeecomomara. Ipare oyemocañi tēi.

<sup>10</sup> Esepia, guarepochi pota raisa sui osē opacatu mbahe naporai vahe. Amove ava ipota raisa pipe oyepepi Tūpa reroyasa sui iyavei omombaraisu güecocuer ipipe ahe ae yuvireco.

### *Tūpa rese yande reco vīracuasa*

<sup>11</sup> Nde rumo, Tūpa rese ereico vahe, eyepepi opacatu co nungar mbahe naporai vahe sui. Eico nde reco ivisa pipe, ndemahenduhaño ité Tūpa rese. Eroya, esaisu, eñemosa avei eico nde reco mbegüesave.

<sup>12</sup> Eyemoviracua ité mbahe tēi uve Tūpa reroyasa rese. Erepoi rene tecovesa apirēhi vahe sui, sese niha Tūpa oñehe ndeu. Iyavei eremombehu ité niha Tūpa reroyasa nde reco āgua ava eta rovai.

<sup>13</sup> Cūritei Tūpa rovaque, ahe opacatu mbahe moingovesar iyavei Jesucristo rovaque, ahe niha omombehu tupri ité supi eté vahe Poncio Pilato rovai, che orocuai

<sup>14</sup> ndererovai chira che remimombehu ‘tipo eme, mara ehi, ehi tēi vahe yuvireco ndeu’ che yapave. Nderepoi chietera co nde reco tuprisa sui acoi ouse yande Yar Jesucristo.

<sup>15</sup> Acoi oyepotase ari imombehupri curi, ahese Tūpa omboyevira Guahir. Ahe niha ñepi vaheño ité imbooteipri, seco pīrata catu vahe. Aheño ité niha mborerrecuar ivate catu vahe rerecuar.

<sup>16</sup> Aheño ité teco apirēhi vahe, tesapesa secoi; ndipoi oyemboya vahe sese, ndipoi eté que ava osepia vahe. ¡Ěgüe tehi, imbooteipri tasecoi opacatu opīratasa apirēhi vahe rese!

<sup>17</sup> Acoi imbahe eta vahe co ivi pipe eyocuai: toyemboivate ai eme, iyavei toyeroya rai eme ombahe eta rese tēi yuvireco. Esepia, ahe ěgüe ehi tēi vahe. Iyacatu rumo Tūpa rese oyeroyara yuvireco. Ahe niha opacatu mbahe icatupri vahe ombou yandeu nara yande rembiporuguā.

<sup>18</sup> Eyocuai avei evocoi ava: toyuvirecoi mbahe yar nungar mbahe aviye vahe aposa pipe. Iyavei toyemointatuño acoi mbahe vireco vahe mboyaho āgua ambuae ava upe yuvireco.

<sup>19</sup> Evocoiyase virecora mbahe aviye vahe, apirēhi vahe oyeupe nara yuvireco curi tecovesa supi eté vahe rereco āgua.

### *Timoteo cuaitarā ipa vahe*

<sup>20</sup> Timoteo, esāro tupri co porombohesa supi tupri vahe Tūpa ombou vahe ndeu. Ereyapisacai rene ava tēi pihañemoñetasa ěgüe ehi tēi vahe rese, iyavei porombohesa co



coti tēi vahe rese avei. Esepia, amove ava aipo ehi co porombohesa rese, “Co ité, yande mboaracuara” ehi tupri tēi vahe yuvireco chupe.

<sup>21</sup> Ipipe sui niha amove ava oyavi Tūpa reroyasa yuvireco.  
Aviye, yande Aposar tande rovasa. Aipo rupive.

## PABLO REMBICUACHIA IMONŪVIRIOSA TIMOTEO UPE TIMOTEO

### *Pablo mahenduhasa Timoteo upe*

<sup>1-2</sup> Che, Pablo, amondo co cuachiar ndeu, che rembiaisu, che rahir nungar, Timoteo. Che niha Jesucristo apóstol aico Tūpa remimbotar rupi acoi “che amondora teco piasu che reroyasar uve” ehi vahe rupi tupri. Ahe cūrítei oime yandeu Jesucristo rese yande recose. Yande Ru Tūpa iyavei yande Yar Jesucristo tombou oporovasasa, oporoparisuerecosa nde reco tupri āgua ndeu.

### *Pablo oyocuai Timoteo Cristo recocuer mombehu āgua*

<sup>3</sup> Che yeroqui pāhuve, chemahenduha nde rese pītu, ari yacatu rupi. “Aviye ndeu” ahe Tūpa upe nde recocuer rese. Che aporaviqui tupri ité Tūpa rese che pihañemoñeta tuprisa pipe yepi inungar che ramoi eta oyapo yuvireco aracahe.

<sup>4</sup> Ndacheresarai eté acoi nde yaseho agüer sui. Iyavei oroepia pota tēi che yemboviharere āgua.

<sup>5</sup> Supi eté chemahenduhaño ité nde Tūpa reroyasa supi eté vahe erereco vahe rese. Iyavei nde yari Loida, nde si Eunice, ahe niha yipindar ēgüe ehi yuvireco. Evocoyase ayeroyaño ité nde rese, nde avei ēgüe erese.

<sup>6</sup> Sese che oromonguerēhi embouvicha catu co Tūpa ombou vahe ndeu acoi amondose che po nde harive; ahe ereco catu ndeyeupe.

<sup>7</sup> Esepia, Tūpa nomboui siquiyesa yandeu. Ahe rumo ombou yande reco moviracuasa, poroaisusa, iyavei yande mbopihañemoñeta tupri āgua.

<sup>8</sup> Evocoyase eresiquiye eme catu yande Yar recocuer mombehu. Nderechĩ chiveira che roquendasa sui tēi. Esepia, yande Yar recocuer mombehusa sui tēi niha che roquenda yuvireco. Iyacatu rumo, nde avei ereñemosañora co mbahe-mbahe tēi Tūpa pīratasa pipe. Ahe oura ndeu ñehesa pīsirosa resendar mombehusa sui.

<sup>9</sup> Tūpa niha yande pīsiro iyavei yande renoi yande reco tupri āgua sese, ndahei yande rembiapo pipe. Ahe rumo güemimbotar rupi yande raisu Cristo Jesús rese yande recose. Ahe Tūpa ité yande raisu yipisuive ivi apo viteñiseve.

<sup>10</sup> Cūrítei rumo ahe omboyecua oporoaisusa yande Pīsirosar Jesucristo ouse, acoi ou vahe co ivi pipe manosa pīratasa recopi āgua. Iyavei ñehesa pīsirosa pipe avei oicua uca tecovesa ndopai vahe.

<sup>11</sup> Tūpa niha che cuai co ñehesa mombehu āgua. Che cuai avei apóstol che reco āgua iyavei che porombohe āgua.

<sup>12</sup> Sese niha che opacatu aiporara co mbahe-mbahe tēi vichico. Nachi eté rumo yande Yar rese che yeroyasa pipe. Esepia, aicua ahe vireco pīratasa acoi ñehesa ombou vahe cheu imocañiñhi āgua acoi Jesús yevi āgua rupi eté.

<sup>13</sup> Erecoveño ité porombohesa aviye vahe che suindar, iyavei eicoño ité Tūpa rese nde yeroyasa pipe iyavei poroaisusa yareco vahe pipe Cristo rese yaicose.

<sup>14</sup> Esāro avei co ñehesa aviye vahe Tūpa ombou vahe ndeu Espiritu Santo reco pīratasa pipe yareco vahe yandeyese.

<sup>15</sup> Ereicua niha co ava opacatu Asia pipendar oyepepiño che sui yuvireco. Ipāhuve yuvirecoi mbia ñuvirío, ahe serer: Figelo, Hermógenes.

<sup>16</sup> Yande Yar tomondo paraisuerecosa Onesíforo mu upe. Esepia, Onesíforo setá yupagüer che mbovaha. Iyavei nochí eté ava rovaque che roquendasa sui.

<sup>17</sup> Ouse rumo Roma ve, ndopituhui eté che reca.

<sup>18</sup> Yande Yar tomondo oporoparaisuerecosa chupe ahe arı pipe curi. Iyavei nde ereicua tuprı ité ahe mbıa yande pııivıi vahe Efeso ve.

## 2

### *Jesucristo sundao oyemovıracua vahe*

<sup>1</sup> Iyavei nde no, che rahır, eyemovıracua mbahecuasa Jesucristo ombou vahe pipe ndeu.

<sup>2</sup> Acoi che porombohesa eresendu vahe ava rehıi rovaque amondo vahe ndeu, embohe tuprı mbıa oyeroya vahe, oicatu vahe avei ambuae mbohe água.

<sup>3</sup> Nde eyemovıracuaño teco asi upe Jesucristo uve nara inungar sundao oyemovıracua vahe ité.

<sup>4</sup> Ñepeı yepe sundao ndosırıi eté ocuaita sui. Esepia, ahe oyemoingatu voi eté ocuai água güerecuar upe.

<sup>5</sup> Iyavei iguayı rai vahe, ndoıpııı chira porerecosa uguayı tuprıēhi pipe.

<sup>6</sup> Iyavei yande inungar que ava oñoti vahe mbahe, ahe rane omonuha güemiti yavıyese oyeupe yepi.

<sup>7</sup> Eyapısaca tuprı co che ñehe rese. Yande Yar niha osenducua uca tuprıra opacatu co mbahe ndeu.

<sup>8</sup> Iyavei no ndemahenduha Jesucristo rese. Ahe niha ocuerayevı vahe. Iyavei aracahendar mborerecuar David suindar secı. Co niha ñehesa ñepııırosa resendar amombehu vahe vıchıco.

<sup>9</sup> Co ñehesa mombehusa sui tēi che mombarısu yuvıreco. Che roquendasave avıye oporapıchı vahe che rereco yuvıreco. Tūpa Ñehengagüer mombıta rumo ndoıcatui eté yuvıreco.

<sup>10</sup> Sese che añemosañı opacatu mbahe-mbahe tēi upe opacatu Tūpa rembıporavo recocuer avıye água rese ‘tovıreco catu pııırosa porañete, apırıēhi vahe Jesucristo rese yuvıreco’ che yapave.

<sup>11</sup> Co niha supı tuprı vahe:

Yamanose Cristo rese, ahese yaıcove aveıra sese.

<sup>12</sup> Yañemosase mbahe tēi upe, ahese yande yaıcora mborerecuar imborerecuasave ipıri. “Ndaıcuai Jesucristo” yahese, ahese ahe aveı, “Ndopocuai vahe” ehiñora yandeu.

<sup>13</sup> Yepe co cotı tēi yarovara yande recocuer seroyaēhisave, ahe rumo ndovırovai chıetera güeco ĩvisa.

Esepia, ndoıcatui, “Ndahei che ahe aıco” ehi vaherã.

### *Ava osē tuprı vahe güecoãhasa Tūpa upe nara*

<sup>14</sup> Emamahenduha yuvıreco co ñehesa rese, iyaveı eyocuai Tūpa rovaque: topoi ñehıpoepı-epısa sui yuvıreco, co ñehıpoepı-epısa ēgüe ehi tēi vahe. Esepia, omomara ambuae ava osenduse iñehe rai yuvıreco.

<sup>15</sup> Eyapo tuprı mbahe opacatu nde catugüer rupı nde recocuer mboyecua água Tūpa rovai inungar oporavıquı tuprı vahe, nochı vahe. Ēgüe ere, eporombohe tuprı ñehesa supı eté vahe rese.

<sup>16</sup> Eyepepi ñehe tēısa, ēgüe ehi tēi vahe sui. Esepia, co nungar ñehesa tēi ombouvıcha catu mbahe naporai vahe.

<sup>17</sup> Iyaveı iporombohesa rai oyembouvıcha inungar caracha vai ndocuera catui vahe, oyembouvıcha-vıchıañı yepi. Ēgüe ehi Himeneo, Fileto

<sup>18</sup> oyavı porombohesa supı eté vahe sui yuvıreco. “Opa cuerayevısa. Ndıpo irı chıra” ehi tēi yuvıreco. İpipe Jesús reroyasar oıpıhañemoñeta rerova yuvıreco.

<sup>19</sup> Tūpa rumo omondo mbahe moviracua tupri āgua, sese icuachiasa aipo ehi vahe: “Yande Yar oicua ité oyeupendar ava” ehi, iyavei, “Opacatu yande Yar rer vireco vahe, toyepipi mbahe naporai vahe sui yuvireco yepi” ehi.

<sup>20</sup> Oi guasu pipe, ndahei guarepochi, oro apopri güeraño oime, oime avei ivirape, ñaihu apopri avei no. Ñepi iporupirã ari imboeteisa pipe nara, ambuae rumo ari rupi iporupirã.

<sup>21</sup> Acoi ava oñemoatiro vahe co tecocuera sui Tūpa upe nara, ahe ipehasa inungar vaso oro apopri poromboeteisa pipe iporupirã; ahe ava oyemoingatu voi eté oico mbahe icatupri vahe apo āgua Tūpa upe.

<sup>22</sup> Eyepipi mbia chihivahe pihañemoñeta rai tēisa sui. Emohivi tupriño ité nde recocuer sereco. Eyeroyaño ité Tūpa rese. Esaisu catu avei ava, eico avei nde reco tupri pipe, inungar Jesucristo reroyasar oyapo opihañemoñeta tuprisa pipe yuvireco.

<sup>23</sup> Eremboyeroyai rene ñehesa porandu-randu tēisa, ēgüe ehi tēi vahe. Ereicua niha ichui tēi oime yeamotarēhisa yepi.

<sup>24</sup> Iyavei yande Yar rese oporaviqui vahe, ndiyai oyeecopi oñehe pipe yuvireco. Iyacatu rumo, aviyera secocuer opacatu upe, oporombohe tupri, oñemosañora ombahe mboasiēhisa pipe oico.

<sup>25</sup> Iyavei omboaracuara güeco asiēhisa pipe acoi ava ndiporeroyai vahe. Esepia, aviyeteramo Tūpa osecuñarora ipihañemoñeta raisa oyeupe yevi iri āgua: ipipe sui porombohesa supi eté vahe oicua yuvireco.

<sup>26</sup> Ipipe sui avei toyemopose, toyuvinose Carugar povri sui semimbotar apo iriēhi āgua.

### 3

#### *Mara ehira ava ari ipa vahe pipe curi*

<sup>1</sup> Iyavei tereicua ari ipa vahe yepotasa, ahese oimera tecocuer yavai catu vahe.

<sup>2</sup> Ahese ava ahe ae tēi oyeaisura yuvireco, guarepochi tēi oipota raira, oyemboivate aira, oyemboetei ai tēi aveira. Oñehe raira Tūpa rese yamotarēhisave. Nomboyeroyai chira oyesupa yuvireco. Setá aveira, “Aviye ndeu” ndehi vahe ava upe. Iyavei nomboetei chira Tūpa rese pihañemoñetasa yuvireco.

<sup>3</sup> Ndosaisui chira oyesuindar yuvireco. Niñeroi chiaveira oyeupe yuvireco. Iyavei imahechiroi aira. Noñemosai chira mbahe tēi apo āgua yuvireco. Güeco asi pipe avei yuvirecoira. Iyavei opacatu mbahe aviye vahe oyamotarēhira yuvireco.

<sup>4</sup> Iyavei omondora ava yamotarēhimbar upe, ndiporomboetei chira güemimbotar apo yuvireco. Iyavei oyemboivate aira yuvireco, osecara güemimbotar tēi oyemboviha āgua yuvireco. Ipipe rumo Tūpa ndosaisui chira yuvireco.

<sup>5</sup> Ahe inungar-ra Tūpa rese ité yuvirecoi vahe viña. Tūpa pīratasa rumo nomboyecuai chietera güembiapo pipe yuvireco oyese.

Sese nde, eyepipiño evocoi nungar ava sui.

<sup>6</sup> Esepia, evocoi nungar ava pāhuve oime yuviroiqueño tēi vahe oi rupi cuña ndoicatui vahe angaipa rerecosar mbopa āgua. Esepia, ahe cuña opihañemoñeta raisa pipe yuvirecoi vahe.

<sup>7</sup> Yepe oyapisaca tupri tēira ñehesa rese yuvireco viña, ndosupitii eté rumo co porombohesa supi eté vahe renducua āgua yuvireco.

<sup>8</sup> Inungar co ava ipaye vahe Janes, Jambres serer vahe oyemboyere Moisés amotarēhi yuvireco, ēgüe ehi avei evocoi ava porombohesa supi eté vahe amotarēhisar yuvireco. Ahe oyemomara vahe opihañemoñeta rai pipe yuvireco. Ndoviroyai eté Jesús porombohesa yuvireco.

<sup>9</sup> Ndoporombopa iri chira rumo yuvireco. Esepia, opacatu ava oicua yuvireco imbahecuaēhi rese, inungar co ñuvirío mbia Moisés amotarēhimbar yuvirecoi aracahe.

*Timoteo cuaitarã ipa vahe*

<sup>10</sup> Nde rumo che reco rupi tupri ité ereico. Esepia, ereroya tupriño ité che porombohesa, che pihañemoñetasa, che Cristo rese yeroyasa, che reco mbegüesa, che poroaisusa iyavei che ñemosasa

<sup>11</sup> opacatu mbahe tẽi porarasa rese. Nde niha ereicua opacatu mbahe tẽi oime vahe cheu co tecua guasu, Antioquía ve, Iconio ve, Listra ve avei no, iyavei che paraisusa mara-mara tẽi che rerecose yuvireco. Yande Yar rumo che pĩsiro opacatu evocoi mbahe-mbahe tẽi sui.

<sup>12</sup> Supi eté opacatu acoi Jesucristo rese güecocuer vireco pota vahe oiporarara mbahe-mbahe tẽi yuvireco.

<sup>13</sup> Ava secocuer naporai vahe rumo, iporombopa serai vahe avei ombouvicha catura güecocuerai; oporombopa-mbopa tẽira yuvireco. Iporombopasa pipe rumo ambuae omboevira chupe.

<sup>14</sup> Nde rumo ereyemoviracuaño itera acoi ereyembohe vahe rese. Ahe ereroya tupriño ité. Esepia niha, nde mbohesar ereicua.

<sup>15</sup> Iyavei eyemomahenduha co rese: nde chíhivahe suive ité niha ereicua Tũpa ñehe icuachiapri eico. Ahe niha nde mombahecua vahe nde pĩsiro ãgua Jesucristo reroyasa pipe.

<sup>16</sup> Opacatu co ñehesa icuachiapri ou vahe Tũpa sui, aviye ai eté porombohe ãgua, iyavei poromboyapisaca ãgua, poromboaracua tupri ãgua iyavei ava upe ñehe tupri ãgua secocuer mohĩvi ãgua yepi.

<sup>17</sup> Ichui, ava Tũpa rese yuvirecoi vahe oyemoingatu voira opacatu tecocuer tupri apo ãgua yuvireco.

**4**

<sup>1</sup> Iyavei no, co rese che orocuai pota Tũpa rovaque, Jesucristo rovaque avei acoi ou vaherã omborerecuasa reseve oicove vahe, omano vahe recocuer rese porandu ãgua.

<sup>2</sup> Emombehu Tũpa Ñehengagüer ari rupi. Erova ité ava reco. Eporomboaracua, eporomonguerẽhi tupri avei opacatu nde reco asiẽhisa pipe.

<sup>3</sup> Esepia, coiye ava ndosendu pota iri chira porombohesa aviye vahe yuvireco. Ahese güemimbotar tẽi osecara ombohe ãgua, güemimbotar tẽi avei omombehu ucara oyeupe yuvireco.

<sup>4</sup> Iyavei oyepepira co mbahe supi eté vahe sui. Viroyara rumo opacatu ava remimombehu tẽi yuvireco.

<sup>5</sup> Nde rumo, ererecoveñora nde aracua tupriisa. Eñemosañõ mbahe naporai vahe upe. Ndehañeco catu ñehesa pĩsirosa resendar mombehu ãgua. Emboaviye tupri avei opacatu nde poraviquisa.

<sup>6</sup> Virovi ari che retecuer mondo ãgua manosave inungar mbahe seropovẽhepri yande Yar upe.

<sup>7</sup> Ayapopa che recoeté pipe che poraviquisa aviye vahe che amotarẽhimbar pãhuve. Amboaviye che cuaita. Ndayepipi eté che yeroyasa sui.

<sup>8</sup> Cũritei che rãro ivave co porerecosa che poraviqui aviye vahe resendar. Yande Yar mborerecuar seco ivi vahe niha omboura cheu ahe ari pipe. Ndahei chira cheu güeraño. Ombou aveira opacatu Cristo raisusa pipe iyevisa osãro vahe upe yuvireco.

*Pablo, “Eyu rane che repia” ehi Timoteo upe*

<sup>9</sup> Ndepoyava catu eyu che repia.

<sup>10</sup> Esepia, Demas che reya co mbahe ivi pipendar tẽi potasave, ichui tẽi oso tecua Tesalónica ve. Crescente oso tecua Galacia rupi. Iyavei Tito oso Dalmacia ve.

<sup>11</sup> Lucas güeraño oicove che piri. Eseca Marcos, tou nde rupi che pĩtivii ãgua mboraviqui rese.

<sup>12</sup> Tíquico amondo tecua Efeso ve.

<sup>13</sup> Acoi ereyuse, eru avirave che yemboyohasa aseya vahe Troas ve Carpo rētave. Iyavei cuachiar guasu, ambuae cuachiar reseve, ahe aipota catu vahe; erupa eyu.

<sup>14</sup> Alejandro, guarepochi mombesar, oyapo mbahe tēi cheu. Yande Yar rumo oicudara sembiapogüer rese chupe.

<sup>15</sup> Iyavei nde eicua catu ichui. Esepia, ahe yande amotarēhi mbahe yande remi-mombehu rese oico.

<sup>16</sup> Yipindar añehese che yoepi ãgua mborerecuareta rovai, ndipoi eté que che pñtivisar; opacatuño ité che reya yuvireco. Tũpa tiñero sese yuvireco chupe.

<sup>17</sup> Yande Yar Jesucristo rumo che pñtivi. Che momirata co ñehesa pñsirosa resendar mombehu tupri ãgua opacatu ava ndahei vahe judío upe. Ëgüe ehi avei che renose mbahe tēi sui.

<sup>18</sup> Ahe che pehara opacatu mbahe-mbahe tēi sui iyavei che pñsirora oyepiri ivave che so ãgua. ¡Ëgüe tehi timboeteisa catu yande Yar apirēhi vahe yepi!

*Mahenduhasa opacatu upe*

<sup>19</sup> Emombehu che mahenduha Prisca upe, Aquila upe iyavei opacatu Onesíforo rēta pendar upe avei.

<sup>20</sup> Erasto opita Corinto ve, Tróximo rumo imbaheasi, evocoyase aseya Mileto ve.

<sup>21</sup> Ndepoyava catu eyu irohi yu renondeve. Imahenduha yuvireco nde rese Eubulo, Pudente, Lino, Claudia iyavei opacatu yande Yar viroya vahe yuvireco.

<sup>22</sup> Yande Yar Jesucristo toico nde rese. Iyavei Tũpa tape rovasa opacatu pe rereco. Aviye. Aipo rupive.

## PABLO REMBICUACHIA TITO UPE TITO

### *Pablo mahenduhasa Tito upe*

<sup>1</sup> Che, Pablo, Tūpa rembiguai aico iyavei Jesucristo apóstol semimbou aico Tūpa rese yeroyasa mondo āgua sembiporavo eta upe iyavei Tūpa rese pīhañemoñetasa supī tuprī vahe cua uca tuprī āgua.

<sup>2</sup> Esepia, tecovesa apirēhi vahe rārosa pipe sui viroyara, oicua aveira yuvireco. Tūpa ndoporombopai vahe niha omombehu co tecovesa mondo āgua ivi apo viteēhiseve oico.

<sup>3</sup> Ichui cūrītei arī oyepota yandeu iñehengagüer cua āgua. Sese Tūpa, yande Pīsirosar, che cuai oñehengagüer mombehu.

<sup>4</sup> Tito, co che ñehe aicuachía ndeu; nde niha che rahir ité ereico Jesucristo rese yande recosa pipe. Esepia, oyoya yaroya vahe yaico. Yande Ru Tūpa, yande Pīsirosar Jesucristo tombou oporovasasa nde reco tuprī āgua ndeu.

### *Tito poraviquisa caha pāhu Creta ve*

<sup>5</sup> Che oroeya vitu co caha pāhu Creta ve mbahe opita vite vahe moingatu tuprī āgua. Iyavei, “Eiporavo ava, Jesucristo viroya vahe rāro āgua ñepeipei tecua rupindar” ahe acoi ndeu cuese.

<sup>6</sup> Evocoi Jesucristo viroya vahe rārosar toyuvirecoi güeco tuprī āgua. Tipo eme “co oyapo mbahe” ehi-ehi tēi vahe yuvireco oyeupe. Ñepeño güembireco virecora yuvireco; tahir evocoyase Jesucristo reroyasar pāvera. Iyavei ndoyuvirecoi chira ndoyemboaracuai vahe nungar oporeroyaēhisa pipe ambuae ava ñeheēhi āgua sese yuvireco.

<sup>7</sup> Acoi Jesucristo reroyasar rārosar yuvirecoi vahe, ahe icuaita mbahe Tūpa upendar rese. Sese taseco ivi tuprī yuvireco. Iyavei toico eme oporeroyaēhisa pipe, toñemoiro eme avei, ndahei chiaveira caguar tēi; ndivava serai chiaveira, tiguarepochi pota rai eme yuvireco.

<sup>8</sup> Iyacatu rumo omoinguera ava oyepota vahe güētave oyepiri. Iyavei aviye aira yepi. Osāro tuprīra güecocuer. Iyavei taseco ivi güeco catuprī pipe Tūpa upe. Tosāro tuprī avei opīhañemoñetasa yuvireco.

<sup>9</sup> Iya oyemboya catu oyembohesa supī tuprī vahe rese yuvireco. Ipipe sui tomonguerēhi catu ambuae yuvireco co ñehesa maranehi pipe iyavei ambuae seroīrosar pīhañemoñeta mohivi āgua.

<sup>10</sup> Esepia, oime setá nimbahe reroyai vahe; judío “peyembocircuncida pe ñepisiro āgua” ehi vahe pāhuve oime catu evocoi nungar. Ahe omondo-mondo tēi vahe oñehe, ombopa tēi vahe avei ava yuvireco.

<sup>11</sup> Ēgüe ehi vahe iyacatu pemonguiriri. Esepia, ahe niha setá ava oñemu vahe omboyepepi uca porombohesa supī tuprī vahe sui yuvireco. Oporombohe mbahe co coti tēi vahe rese guarepochi rereco āgua tēi yuvireco.

<sup>12</sup> Ñepe mbia, otūpa ñehe mombehusar, Creta iguar ae aipo ehi omu rese oñehe: “Co Creta iguar yuvirecoi vahe semirañete ai, mbahe mimba nungar tēi, icaru ai, yangaipai vai yuvireco yepi” ehi oñehe.

<sup>13</sup> Supi eté aipo ehi; sese emboaracua pīrata ité. Evocoyase toviroya tuprī Tūpa yuvireco.

<sup>14</sup> Iyavei toviroya eme co judío oyesui tēi mbahe omombehu vahe iyavei ava porocuita tēi yuvireco. Esepia, ahe oyemboyere mbahe supī vahe sui yuvireco.

<sup>15</sup> Acoi ava ndaseco marai vahe upe opacatu mbahe nimarai. Ndiporeroyai vahe, ipihañemoñeta rai tēi vahe upe rumo, ndipoi eté mbahe nimarai vahe. Esepia, ipihañemoñeta, yaracuasa avei naporai eté.

<sup>16</sup> Iyavei, “Che aicua Tūpa” ehi tupri tēi angahu yuvireco. Mbahe sembiapo rese rumo icuasa seroyaēhisa yuvireco. Ahe niha ava ndosepia potai vahe, ndiporeroyai vahe yuvireco, ndoicatui mbahe aviye vahe apo yuvireco yepi.

## 2

### *Porombohesa nimarai vahe*

<sup>1</sup> Nde ñehe toyoya tupri co porombohesa nimarai vahe rese yepi.

<sup>2</sup> Evocoyase mbia oñaro catu vahe Tūpa reroyasar toñearo tupri, imboyeroyapri toyuvirecoi, tosāro tupri güecocuer, tovireco tupri avei Tūpa reroyasa, oporoaisusa. Iyavei güeco mbegüesa pipe toñemoso mbahe-mbahe tēi upe.

<sup>3</sup> Ëgüe tehi avei cuña oñaro vahe Tūpa reroyasar yuvireco: güeco tupri tovireco oporomboeteisa pipe yuvireco. Iyavei timahechiroi eme, ndosavaipoi chiaveira. Ahe rumo omboyecuarā güecocuer aviye vahe,

<sup>4</sup> ombohera cuñatai imer raisu āgua, imembri raisu āgua avei.

<sup>5</sup> Tombohe avei seco tupri āgua, iñearo tupri āgua angaipa sui iyavei sēta pipendar rese hañeco tupri āgua yuvireco. Tomboaracua avei seco aviye āgua, imer mboyeroya āgua avei. Evocoyase noñehe-ñehe tēi chira ava Tūpa Ñehengagüer rese yuvireco.

<sup>6</sup> Ëgüe ere avei emonguerēhi mbia chīhivahe secocuer rese iñearo tupri āgua.

<sup>7</sup> Iyavei emboyecua nde recocuer aviye vahe opacatu mbahe rese yuvireco chupe; nde imbohe tuprisa pipe emboyecua nde reco maranehisa, nde poromboeteisa avei.

<sup>8</sup> Iyavei ereñehera nde reco tupri pipe. Ipipe ambuae noñehe rai chira yuvireco nde rese. Evocoyase yande amotarēhimbar yuvinochira ndoicatuise, “Mbahe” ohe āgua yuvireco yandeu.

<sup>9</sup> Emboaracua avei mbiguai yuvirecoi vahe: toviroya opacatu mbahe rese güerecuar, tomboyeroya imboeteisave, toiñehepoepi eme avei yuvireco.

<sup>10</sup> Iyavei toñomi eme mbahe. Iyacatu rumo seroyapri tupri yuvirecoira. Evocoyase opacatu osepiase seco tuprisa, omboeteira yande Pīsiosar Tūpa recocuer resendar yembohesa yuvireco.

<sup>11</sup> Tūpa niha omboyecua oporoaisusa yandeu. Ahe güeru pīsiosa opacatu ava upe.

<sup>12</sup> Co poroaisusa Tūpa suindar yande mbohe mbahe-mbahe tēi iyavei yande remimb-otar tēi reya āgua. Iyavei yande mbohe co ivi pipe yande ñearo tupri āgua, yande reco ivi āgua iyavei Tūpa mboetei āgua.

<sup>13</sup> Iyavei yasāro yande viharetosa pipe Tūpa omboaviye vaherā güemimombehu, ahe Jesucristo yande Tūpa seco ivaté vahe, yande Pīsiosar yevi irisa oporañetosa pipe.

<sup>14</sup> Ahe oyemondo oyeyuca uca yande rese yande pīsiro āgua opacatu mbahe-mbahe tēi sui yande reco moatiro tupri āgua. Evocoyase yande yaico chupe nara güeraño ité yande querēhisave opacatu mbahe aviye vahe apo āgua.

<sup>15</sup> Evocoi rese erembohera, eremonguerēhira, eremboaracua aveira opacatu nde porocuita pipe. Sese tipo eme que nde reroirosar.

## 3

### *Jesús reroyasar cuaita*

<sup>1</sup> Co rese emomahenduha: toyapo ava mborerecuar guasu porocuita yuvireco iyavei opacatu ambuae mborerecua-recuarimi porocuita avei. Iyavei toyemoingatu tupri opacatu mbahe aviye vahe apo āgua yuvireco.



<sup>2</sup> Toñehe-ñehe tēi eme ambuae ava rese yuvireco. Iyavei tiñemoiro serai eme, toporoaisu, tomboyecua avei güeco mbegüesa opacatu ava upe yuvireco.

<sup>3</sup> Esepia, yipindar yande avei ndayande mbahecua i yaico iyavei ndayaroyai Tūpa. Ocañi tēi vahe yaico, iyavei yande mbiguai tēi yaico opacatu mbahe yande remimbotar apo pipe; iyavei yaseca-seca mbahe tēi vahe yande yembovaha āgua. Iyavei yaicoño mbahe tēi pipe, yaipotaño tēi ambuae ava mbahe, yamotarēhimbrī yaico iyavei yandeyeupe ae-ae yayeamotarēhi.

<sup>4</sup> Ipare rumo Tūpa, yande Pīsīrosar, omboyecua güeco tupri, oporoaisusa opacatu ava upe.

<sup>5</sup> Yande pīsīro, ndahei rumo yande rembiapo aviyesa sui, ahe rumo vireco oporoparisuerecosa yandeu nara. Ichui omoatiro yande recocuer yande reco mopiasu. Iyavei Espiritu Santo pipe yande recocuer recuñaro tecove piasu rereco āgua.

<sup>6</sup> Iyavei yande Pīsīrosar Jesucristo rembiapo sui Tūpa ombou catu oEspiritu Santo yandeu,

<sup>7</sup> ipipe yande reco ai sui yande renose yande reco ñvi tupri āgua oporoaisusa pipe 'toipisi co tecovesa apirēhi güemiaro yuvireco' oya.

<sup>8</sup> Aipo ñehesa supi eté vahe. Che aipota sese ereporombohera. Ipipe Tūpa reroyasar toyapo mbahe aviye vahe yuvireco. Evocoi ñehesa aviye ité opacatu oiporu vaherā yuvireco.

<sup>9</sup> Ereyepēpīra rumo opacatu co nungar mbahe sui: yipindar ñehesa yepoepi tēisa sui, ipare aracahendar ava recocuer rese ñehesa sui. Ereyepēpī aveira iporomoñemoiro serai vahe sui, Moisés porocuita resendar sui tēi ñehepoepi-episa sui avei. Esepia, evocoi nungar mbahe ēgüe ehi tēi vahe.

<sup>10</sup> Acoi ava omoimese yemboyahosa Tūpa reroyasar pāhuve, eñehe chupe. Nande reroyaise, eñehe iri chupe. Nande reroya catu itese, eremosera peyesui.

<sup>11</sup> Tereicua evocoi nungar ava oyavi vahe güecocuer yepi, ahe ae oyemocañi vahe oangaipa pipe oico.

### *Tito upendar ñehesa*

<sup>12</sup> Acoi amondose Artemas, anise Tíquico ndeu, eyu pihavi che repia tecua Nicópolis ve. Esepia, aheve apita pota sōhisa vahe pituhu rāro.

<sup>13</sup> Eipitivi opacatu nde catugüer rupi ava recocuer moingatasar Zenas, Apolos avei. Ahe chupe emondo mbahe semimbotar. Evocoyase toyuviraso tupri oguatasa rupi; tipane eme que mbahe chupe yuvireco.

<sup>14</sup> Iyavei ambuae Jesús reroyasar eipe pendar toyembohe avei yuvireco mbahe tupri apo āgua iyavei ava mbahe chupe ipane vahe pñivi āgua. Evocoyase secocuer aviye itera yuvirecoi.

### *Mahenduhasa iyavei porovasasa ipa vahe*

<sup>15</sup> Opacatu yuvirecoi vahe cohava che piri omondo omahenduhasa yuvireco ndeu. Iyavei emombehu che mahenduhasa yande mboripar iporeroya vahe upe. Tūpa tape rovasa eipeve opacatu. Aipo rupive.

## PABLO REMBICUACHIA FILEMÓN UPE FILEMON

### *Pablo mahenduhasa Filemón upe*

<sup>1</sup> Che, Pablo, che roquendasa Jesucristo recocuer sui tēi. Aicuachía co che ñehe yande rívrí Timoteo reseve ndeu, Filemón. Nde niha ore rembiaisu iyavei ore ndugüer ité Tūpa upe mboraviqui apo ãgua ereico.

<sup>2</sup> Iyavei amondo co cuachiar yande reindri Apia upe, Arquipo upe avei. Ahe avei yande ndugüer mboraviqui apo ãgua Tūpa upe nara yuvirecoi, iyavei opacatu Jesús reroyasar nde rētave oñemonuha vahe upe nara.

<sup>3</sup> Yande Ru Tūpa, yande Yar Jesucristo tombou oporovasasa, güeco tuprisa avei pēu.

### *Filemón poroaisusa iyavei Cristo rese iyeroyasa*

<sup>4</sup> Che niha, “Aviye ndeu” ahe yande Ru Tūpa upe che yeruresa pipe nde rese yepi.

<sup>5</sup> Esepia, ayandu aipo nde eresaisu iyavei ereroya yande Yar Jesús. Eresaisu avei opacatu ambuae seroyasar.

<sup>6</sup> Aporandu Tūpa upe nde rese nde ereyeroyase yande Yar rese inungar ore ‘toicua tupri opacatu mbahe aviye vahe orovireco vahe nde Rahir Jesucristo reroyasa sui’ viya.

<sup>7</sup> Cherorivete, ayemonguerēhi catu opacatu nde poroaisusa rese. Che rívrí, nde niha eremonguerēhi catu opacatu yande Yar reroyasar yuvireco.

### *Pablo oporandu mbahe aviye vahe rese Onésimo upe nara*

<sup>8</sup> Sese yepe che aico Cristo apóstol nde cuai ãgua viña.

<sup>9-10</sup> Che rumo aporandu ndeu nde poroaisusa rese mbahe aviye vahe apo ãgua co nde rembiguaigüer Onésimo upe nara. Che niha Pablo, acuacuami vichico. Cūritei rumo aico soquendapri Jesucristo recocuer sui. Co Onésimo secoi che rahir nungar yande Yar reroyasa pipe cohove che roquendasave.

<sup>11</sup> Aracaco co nde rembiguai secoise nde piri, ēgüe ehi tēi vahe secocuer ndeu viña. Cūritei rumo ēgüe ndehi iri chira oico ndeu, iyavei cheu no.

<sup>12</sup> Amboyeví co imondo ndeu eipeve. Eipisi inungar-ra che itera viña.

<sup>13</sup> Che aipota opita vaherã nde nungar tupri che pítivi ãgua viña, co soquendapri vite che recose Jesucristo ñehengagüer sui.

<sup>14</sup> Che rumo ndaipotai mbahe apo nde pihañemoñetasa cuaēhi viteseve. Nde rumo ereyapora co mbahe aviye vahe nde remimbotar rupi, ndahei chira che nde cuaisa pipe.

<sup>15</sup> Aviyeteramo Onésimo oyepepi pucu raimi nde sui oyevi iri vaherã nde piri nara.

<sup>16</sup> Ndahe iri chira mbiguai tēi. Ahe rumo aviye catu itera mbiguai güeco agüer sui. Esepia, yande rívrí niha yande rembiaisu secoi cūritei. Che asaisu etepri iyavei nde eresaisu catu irira che sui. Ndererecoi chira ava nungar tēi; erereco tuprira saisusa pipe yande rívrí nungar tupri ité yande Yar upe nara.

<sup>17</sup> Inungar nde rívrí che rereco eve. Ëgüe ere tupri aveira co mbia pisi.

<sup>18</sup> Acoi oyapose mbahe ndeu, anise vírocuase que mbahe nde sui, cheu emombehu. Che evocoyase amboepira ndeu.

<sup>19</sup> Che Pablo, aicuachía che po pipe ité seroya tupri ãgua, ahe co amboepira ndeu; che nde mbohesa pipe sui ereroya yande Yar. Ipipe inungar ireve vahe ēgüe ere cheu. Che rumo, “Ndereve cheu” ndahei eté ndeu.

<sup>20</sup> Supi eté, che rívrí, eyapomi mbahe icatupri vahe cheu che remimbotar yande Yar Cristo reroyasa pipe. Ipipe che mbovha catumi eve.

<sup>21</sup> Che aicuachía ndeu. Esepia, aicua nde ereyapo tuprira aipo che porandusa, iyavei ereyapo catu itera co sui.

<sup>22</sup> Iyavei amoha Tũpa che renose vagherã che roquendasa sui pe yeruresa pĩpe che so ãgua eipeve pe repia. Sese emoingatumi avei che pĩtuhu ãgua.

*Mahenduhasa, porovasasa ipa vahe*

<sup>23</sup> Che ndugüer, Epafra, oondo omahenduhasa ndeu. Ahe avei soquendapri cohave yande Yar Jesucristo recocuer rese.

<sup>24</sup> Iyavei Marcos, Aristarco, Demas, Lucas che ndugüer oporaviqui vahe Tũpa uve, ahe avei oondo omahenduhasa yuvireco ndeu.

<sup>25</sup> Yande Yar Jesucristo tape rovasa opacatu eipeve. Aipo rupive.

## ICUACHIAPRI HEBREO YUVIRECOI VAHE UPE HEBREOS

*Guahir Jesucristo pipe Tūpa oyemboyecua yandeu*

<sup>1</sup> Aracahe suive setá yupagüer Tūpa omombehu uca yande ramoi eta upe oñehe mombehusar upe. Iyavei ambuae mbahe rupi oseca imombehu tupri ãgua yuvireco chupe.

<sup>2</sup> Cūrítei yandeu omoñehe uca Guahir. Chupe avei oyapo uca opacatu mbahe. Ahe mbahe sembiapo chupe nara ité.

<sup>3</sup> Ahe niha Vu Tūpa recocuer porañetesa secoi. Ēgüe ehi eté, ahe Vu recocuer tupri ité. Ahe opacatu mbahe omoviracua oñehe pīratasa pipe. Yande angaipagüer sui yande moatiro pare oso, oguapī Vu acato coti oī ivave cute.

*Tūpa Rahir seco ivate catu Vu rembiguai iva pendar sui*

<sup>4</sup> Tūpa Rahir secoi ivate catu vahe Vu rembiguai iva pendar yuvirecoi vahe sui. Ahe vireco omborerecuasa ivate catu vahe ichui.

<sup>5</sup> Esepia, Tūpa aipo ndehi eté güembiguai upe:

“Nde che Rahir ereico; co pipe amondo nde recove ãgua” ndehi eté. Iyavei:

“Che Tu aicora, ahe evocoyase che rahir secoira” ndehi avei chupe.

<sup>6</sup> Ichui rumo ombouse Guahir ñepe vahe co ivi pipe aipo ehi:

“Tomboetei opacatu che rembiguai yuvireco” ehi.

<sup>7</sup> Evocoyase güembiguai rese oñehe Tūpa aipo ehi icuachiapri aracahendar pipe:

“Ayapo che rembiguai ivitu nungar, tata nungar avei cheu oporaviqui vaherã” ehi.

<sup>8</sup> Tahir rese ñehesa rumo aipo ehi icuachiapri aracahendar pipe:

“Che Yar Tūpa, nde mborerecuasa rumo apirēhi vaherã ité.

Ereporocuai nde reco ivi tuprisa pipe yepi.

<sup>9</sup> Mbahe ihivi vahe raisusar ereico.

Iyavei mbahe naporai vahe raisuēhisar.

Sese nde Yar Tūpa ité, nde poravo, omondo avei torivetesa ndeu ivate catu vahe opacatu nde mboetasa sui” ehi.

<sup>10</sup> Iyavei aipo ehi iri:

“Nde, ore Yar, yipisuive eremoviracua vahe ivi.

Nde ité avei ereyapo iva.

<sup>11</sup> Opacatu co nde rembiapo opa vaherã tēi,

inungar turucuar cuacua oyearo vahe opa.

Nde rumo apirēhi vaherã ité ereico.

<sup>12</sup> Ipare ereyapara inungar turucuar yapapri iyavei eresecuñarora inungar oturucuar osecuñaro vahe.

¡Nde rumo ndereñecuñaroi chietera!

Iyavei nde recocuer ndopai vaherã ité” ehi.

<sup>13</sup> Ndahei que ñepe iva pendar güembiguai upe Tūpa aipo ehi:

“Eguapī che acato coti, ahese che amondora nde amotarēhimbar nde povrive” ehi.

<sup>14</sup> Esepia, opacatu Tūpa rembiguai espíritu yuvirecoi chupe oporaviqui ãgua, icuaiapri avei ava ipīsiropirã pītivii ãgua.

## 2

*Yandemahemoha tupri yande pīsirosa rese*

<sup>1</sup> Sese iyacatu co ñehesa yasendu vahe rese yayapisaca tupri catu co tecocuer piasu sui yande yepetiñhi ãgua.

<sup>2</sup> Esepia, co Tũpa rembiguai remimombegüer seroyapri ité secoi, iyavei oyemboangaipa vahe, ndoviroyai vahe avei imombaraisupri ité sembiapo rupi yuvirecoi aracahe.

<sup>3</sup> ¿Mara yahera pĩha evocoyase yande yañemi Tũpa ñemoirosa sui viña acoi ndayan-demahemoha tupriise co yande pĩsirosa aviye vahe rese? Esepia, yande Yar ahe rane ité omombehu co ñehesa ñepisirosa resendar. Ipare sendusar, “Supi eté co ñehesa” ehi yuvireco. Ichui ahe avei omombehu yuvireco yandeu.

<sup>4</sup> Iyavei Tũpa oyapo setá mbahe yavai rai vahe poromondiisa ndayasepiai vahe. Iyavei oEspíritu Santo pipe, omboyovirati mbahecuasa imbou yandeu güemimbotar rupi ‘toicua yuvireco co ñehesa supi tupri vahe’ oyapave.

### *Jesucristo ava nungar tupri secoi*

<sup>5</sup> Ndahei güembiguai povrive omondo Tũpa ivi oime vaheñã, acoi oromombehu vahe pẽu.

<sup>6</sup> Oime rumo icuachiapri arachendar pipe omombehu tupri vahe:  
“Che Yar, ¿uma vo evocoyase ava?”

¿Mahera ndemahenduha ava tẽi rese, iyavei eresãro no?

<sup>7</sup> Ndaseta arĩimi erereco ivi coti catu nde rembiguai sui.

Ipare voi rumo eremondo nde porañetesa imboeteisave chupe.

<sup>8</sup> Iyavei opacatu erereco uca mbahe nde rembiapo ipovrive” ehi imombehu.

Ëgüe ehise Tũpa, ndoseyai eté que ñepe yepe mbahe ipo pendarẽhi. Cũritei rumo ndaopacatu tupri vitei mbahe ipovrive.

<sup>9</sup> Yaicua niha Jesús, ahe Tũpa güembiguai sui ndaseta araviter ivi coti catu vireco. Oporoaisusa pipe oipota imano ãgua opacatu ava repirã. Cũritei rumo iyemombaraisu pare, omondo oporañetesa imboeteisave chupe.

<sup>10</sup> Iyavei opacatu mbahe oime Tũpa upe, ichuindar avei ‘toyuviroique opacatu che rahir che reco porañetesave’ oyapave. Sese omombaraisu uca Guahir Jesucristo ‘tomboaviye tupri rane che remimbotar Poropĩsirosar güeco ãgua’ oya.

<sup>11</sup> Esepia, opacatu vireco ñepe Vu yuvireco co seco catupri vahe, seco mbocatuprisar avei. Sese Tahir nochi eté, “Che rivireta peico” ohe ãgua viroyasar upe.

<sup>12</sup> Ahe aipo ehi icuachiapri arachendar pipe:

“Añehera nde rese che rivireta upe.

Asapuca aveira sapucaisa ndeu opacatu ava ndeu oñemonuha vahe pãhuve” ehi.

<sup>13</sup> Iyavei aipo ehi:

“Che ayeroya itera sese” ehi.

Ichui aipo ehi iri:

“Co oroico Tũpa rahir cheu ombou vahe rese” ehi icuachiapri pipe aracahe.

<sup>14</sup> Inungar ava vireco vahe guahir, oyoya soho, suvi; ëgüe ehi avei Jesús vireco voho, vuv yande nungar; omano pipe sui omocañi vaheñã iporoyuca ai vahe pĩratasa; ahe Carugar.

<sup>15</sup> Opacatu ava manosa sui osiquiyesa pipe mbiguai tẽi nungar yuvirecoi vahe güecove viteseve, evocoi nungar sui senose ãgua, ëgüe ehi Jesús.

<sup>16</sup> Esepia, ahe ndoui Tũpa rembiguai pĩtivii ãgua, ahe rumo ou Abraham suindareta pĩtivii ãgua.

<sup>17</sup> Sese niha tivireta nungar tupri ité oyapo Tũpa, “Toime che rovaque pahi rereciar ivate catu vahe seco tupri vahe; taseco mbegüe avei, tomondo güetecuer ava angaipa repirã ñeroisa reime ãgua” ehi.

<sup>18</sup> Esepia, ahe avei oiporara Carugar poroãtoisa. Sese cũritei ahe oicatu ité ava Carugar remiatoi pĩtivii ãgua.

## 3

*Jesús ivate catu vahe Moisés sui*

<sup>1</sup> Evocoyase, che rivireta, iporavopri, pe Tūpa remienoi peico vahe chupe nara. Peyapisaca tupri Jesucristo recocuer rese. Ahe secoi yandeu apóstol iyavei pahi ivate catu vahe yande yeroyasa.

<sup>2</sup> Ahe ité niha omboaviye tupri Vu remimbotar, osenoise imbou co tecocuer apo āgua inungar Moisés omboaviye tupri ocuaita Tūpa mbahe rāro aracahe.

<sup>3</sup> Jesús rumo imboeteipri catu Moisés sui. Inungar acoi oi aposar imboeteipri catu oi sui secoi.

<sup>4</sup> Esepia, ñepeí-peí oi vireco oaposar viña. Tūpa rumo opacatu mbahe aposar secoi.

<sup>5</sup> Supi eté Moisés Tūpa rembiguai güeco pipe omboaviye opacatu oporaviquisa itūparo rese. Esepia, omombehu Tūpa omboyecua pota vahe ava upe yepi.

<sup>6</sup> Cristo rumo tahir güeco pipe omboaviye ocuaita Vu tūparo rese. Ahe tūparo yande yaico yayeroyaño itese Cristo rese iyavei yasāroño itese yande yembovihasa pipe co mbahe aviye vahe oime vaherā yandeu curi.

*Mbituhusa Tūpa upendar yuvirecoi vahe upe*

<sup>7</sup> Sese inungar aipo ehi Espíritu Santo icuachiapri aracahendar pipe:

“Co pipeve voi, pesenduse Tūpa ñehe,

<sup>8</sup> peyepihamoatai rene catu chupe, ndapeicoi chira ava ndiava reroyai vahe nungar acoi ivi iporupirēhisa rupi Tūpa recoāhasar yuvirecoi vahe aracahe.

<sup>9</sup> Aheve avei acoi che recoāha tēi pe ramoi mbahe güemiapo pipe, yepe cuarenta araviter rupi osepia tēi mbahe che rembiapo yuvireco viña.

<sup>10</sup> Sese añemoiro ahe ava upe, aipo ahe:

‘Ipīhañemoñeta rai co coti tēi vahe rese yepi iyavei ndoicua potai eté che recocuer yuvireco’ ahe chupe.

<sup>11</sup> Sese che añemoiro ahe ava upe, ‘Ñepeí reseve ndapepituhui chietera che pituhusa pipe’ ahe yuvireco chupe” ehi aracahe.

<sup>12</sup> Che rivireta, peñearo catu; tipo eme que ñepeí ipīhañemoñeta naporai vahe Tūpa reroyaēhisa pipe oyepipi vahe rā ichui.

<sup>13</sup> Iya rumo peyemonguerēhi catu ñepeí-peí ari yacatu rupi cūritei pe recove pipe angaipa upe pe yembopa uca iriēhi āgua, pe mbahe reroya iriēhi āgua rese avei.

<sup>14</sup> Esepia, yayemoviracua tuprise Cristo rese yande yeroyasa yipisuive yareco vahe pipe yande mano āgua rupi eté, ahese yaico itera sese.

<sup>15</sup> Supi niha acoi aipo ehi ñehesa:

“Co pipe voi pesenduse Tūpa ñehe,

peyepihamoatai rene catu chupe; ndapeicoi chira ava ndiava reroyai vahe nungar” ehi vahe.

<sup>16</sup> ¿Ava pīha acoi ava iñehe mara vahe yuvireco Tūpa ñehe rendu pare chupe? Moisés remienose Egipto ivi sui ēgüe ehi yuvireco.

<sup>17</sup> ¿Ava upe pīha acoi Tūpa oñemoiro cuarenta araviter rupi? Acoi oyemboangaipa vahe omanopa vahe yuvireco ivi iporupirēhisa rupi.

<sup>18</sup> ¿Uma upe pīha acoi ñepeí reseve, “Ndapeiquei chietera che pituhusa pipe pe pituhu āgua” ehi Tūpa? Acoi viroyaēhisar upe aipo ehi.

<sup>19</sup> Sese yaicua seroyaēhi pipe ndoicatui yuviroique ipipe.

## 4

<sup>1</sup> Oime vite Tūpa remimombehu yande yaique vahe rā ipiri yande pituhu āgua. Sese iya ité yañearo tupri. Aní chira que ñepeí pe pāhu pendar ndoiquei chira.

<sup>2</sup> Esepia, yandeu avei imombehusa ñehesa poropĩsirosa resendar inungar yande ramoi upe ivi iporupirẽhi rupi yuvireco aracahe. Co ñehesa rumo ndoipĩtivii eté ahe ava yuvireco. Esepia, ahe osendu yuvireco seroyaẽhisave tẽi.

<sup>3</sup> Yande rumo yaroya vahe, yaiquera yande pĩtuhu ãgua, ahe chupe Tũpa aipo ehi:

“Sese añemoiro ahe ava upe; ñepei reseve,  
‘Ndoyviroiquei chietera che pĩtuhusa pipe opĩtuhu ãgua yuvireco’ ahe” ehi.  
Tũpa rumo yipive ité opa omboaviye oporaviquisa iva, ivi.

<sup>4</sup> Esepia, co imbosietesa ari resendar ñehesa oime icuachiapri aracahendar pipe:

“Tũpa opĩtuhu opacatu oporaviquisa sui imbosietesa ari pipe” ehi.

<sup>5</sup> Iyavei aipo ehi iri icuachiapri pipe:

“Ndoyviroiquei chietera che pĩtuhusa pipe opĩtuhu ãgua yuvireco” ehi.

<sup>6</sup> Ipane vite rumo amove ava yuviroique vaheerã ahe pĩtuhusave. Acoi yipindar osendu tẽi vahe rumo ñehesa poropĩsirosa resendar, ndoyviroiquei eté seroyaẽhisa pipe yuvireco.

<sup>7</sup> Sese Tũpa omombehu tupri iri ambuae ari, chupe ité, “Co pipe” ehi. Ahe acoi coiyé mborerecur guasu David upe omombehu ucasa aracahe yandeu icuachiapri pipe, aipo ehi vahe:

“Co pipe voi, pesenduse Tũpa ñehe,  
peyepihamoatai rene catu chupe” ehi vahe.

<sup>8</sup> Ehi revo Josué omondose co pĩtuhusa israelita upe aracahe viña, Tũpa evocoyase noñehe iri chira co ambuae ari rese viña.

<sup>9</sup> Evocoyase oimeño itera mbituhusa iporavopri ava Tũpa upendar upe nara:

<sup>10</sup> Acoi oique vahe evocoyase pĩtuhusa pipe, opĩtuhu oporaviquisa sui inungar Tũpa opĩtuhu ombahe mboaviye pare aracahe.

<sup>11</sup> Sese yayemoviracua catura yande reique ãgua evocoi mbituhusa pipe. Aní chira ava aracahendar seroyaẽhisar recocuer rupi tupri avei yaicora.

<sup>12</sup> Esepia, Tũpa Ñehengagüer oicove vahe, ipĩrata avei. Ahe inungar avei quise saimbe catu vahe que ambuae quise pucu saimbe yoya vahe sui. Ahe oique vahe ité yande aviterve; ãgüe ehi avei ñehengagüer oñatoi eté yande hã, yande espíritu avei. Iyavei omboyecua tupri ité yande pihañemoñeta.

<sup>13</sup> Ndipoi eté niha mbahe Tũpa rembiapo ñomipri ichui. Opacatu ité oicua, osepia avei opacatu mbahe. Ahe niha oporandura opacatu yande recocuer rese yandeu curi.

### *Jesús niha pahi ivate catu vahe secoi*

<sup>14</sup> Jesús, Tũpa Rahir, pahi ivate catu vahe secoi yandeu oique vahe ivave Tũpa piri. Sese yayemoviracuaño itera sese yande yeroyasa pipe.

<sup>15</sup> Esepia, yande pahi ivate catu vahe oicuaño ité yande recocuer pĩrataẽhisa. Ahe avei niha yande nungar aracaco viroparaisu opacatu mbahe-mbahe tẽi güecoãhasa. Ahe rumo ndoyemboangaipai eté ipipe.

<sup>16</sup> Sese yayemboya catura yande yeroyasa pipe yande Ru Tũpa rese. Esepia, ahe yande raisu ité. Ipipe sui tayande paraisuereco güeco aviyesa pipe yande pĩtivii ãgua mbahe tẽi oimese yandeu.

## 5

<sup>1</sup> Opacatu pahi ivate catu vahe iporavopri secoi ava pãhu sui ava recocuer reropovẽhe ãgua Tũpa upe iyavei porerecosa mondo ãgua chupe, mbahe mimba yucapri reropovẽhe ãgua avei ava angaipa repirã.

<sup>2</sup> Ahe pahi niha oiporara avei teco asisa ambuae ava nungar. Sese güeco asiẽhisa pipe oipĩtivii ava ndayaracuai vahe, oyavi vahe avei.

<sup>3</sup> Ahe rumo güeco pĩrataẽhisa pipe viropovẽhe mbahe mimba yucapri Tũpa upe oan-gaipa repirã, opacatu ambuae ava angaipa repirã avei.

<sup>4</sup> Ndiyai chira que ava oyesui tēi pahi oyeapo. Tūpa ité rumo osenoira imboetei uca āgua inungar acoi Aarón upe aracahe.

<sup>5</sup> Ēgüe ehi avei Cristo, ahe noñeenoi pahi ivate catu vahe güeco āgua oyesui tēi. Tūpa ité osenoi imboetei uca āgua acoi aipo ehise:

“Nde che rahir ereico, co pipe amondo nde recove āgua” ehi.

<sup>6</sup> Aipo ehi avei ambuae icuachiapri pipe:

“Nde ereico pahi ivate catu vahe apirēhi vaherā, inungar tupri mbia Melquisedec serer vahe” ehi.

<sup>7</sup> Co ivi pipe Cristo oicove vitesse, oyoeroqui pīrata oyasehosa pipe Vu Tūpa upe yepi. Esepia, ahe oicatu ipisiro āgua manosa sui. Ēgüe ehi iporeroya tuprisa pipe, Tu osendu iyeroqui yepi.

<sup>8</sup> Yepe Tahir ité viña, güeco paraisu pipe rumo oyembohe imboyeroya āgua;

<sup>9</sup> evocoiya güeco pipe omboaviye güeco catuprisa. Ipipe sui güeru poropisirosa ndopai vahe opacatu viroyasar upe nara.

<sup>10</sup> Esepia, Tūpa niha osenoi pahi ivate catu vahe seco āgua inungar Melquisedec aracahe.

*Peicua catu, “Ndaroyai eté co tecocuer piasu” pe hesa sui*

<sup>11</sup> Orovireco vite mo setá mbahe ore ñehe āgua pēu co mbahe tecocuer resendar rese. Yavai etepri rumo imombehu tupri āgua. Esepia, pe ndapesenducua tupri vitei eté.

<sup>12</sup> Aracacove peporombohera viña; peipota vite rumo pēu mbahe ndayavaimi vahe imombehu iri āgua yembohesa Tūpa suindar. Ndapeyemoviracuai rumo; peihu iri pota cambi mbahe sāta vahe hu rāgüer sui.

<sup>13</sup> Esepia, acoi ēgüe ehi vahe pītani osi rese ocambu vite vahe nungar tēi pe recocuer. Ipipe sui ndapeyembohei eté Tūpa Ñehengagüer rese mbahe tupri pe reco āgua.

<sup>14</sup> Co tembihu sāta vahe rumo ahe ava ocuacua vahe upe nara. Esepia, ahe oyembohe tupri catu ñehengagüer rese güeco tupri āgua yepi. Ipipe sui oicua ité mbahe aviye vahe poravo mbahe naporai vahe sui.

## 6

<sup>1</sup> Sese ndiyai yayembohe yembohesa yipindar vahe Cristo resendar ahe avei-vei vahe rese. Iya rumo yaguata catu tenonde inungar ava oicua catu vahe mbahe. Ipipe sui tayaicua seroyasa pipe ambuae mbahe Tūpa suindar co mbahe rese yembohe iri rāgüer sui. Ahe yipindar vahe co: yande ñecuñarosa, yande reco ai sui yande poisa, manosa apirēhi vahesave yande rerasoēhi āgua, iyavei Tūpa rese yande yeroyasa,

<sup>2</sup> yembohesa poroāpiramosa resendar, po mondosa Tūpa reroyasar harive, omano vahe cuerayevisa iyavei ava recocuer rese porandusa resendar avei.

<sup>3</sup> Tūpa oipotase yayembohera ambuae mbahe yavai catu vahe rese.

<sup>4</sup> Acoi ava yipindar osenducua vahe Tūpa remimbotar, osāha vahe avei Tūpa suindar porerecosa iyavei oyandu ité Espiritu Santo güecocuer pipe,

<sup>5</sup> osāha vahe avei Tūpa Ñehengagüer aviye vahe iyavei osāha chīhi ipīratasa curi oime vaherā viña,

<sup>6</sup> oyepepise rumo ichui, ndayaicatu iri seco reroyevi iri āgua Tūpa upe. Esepia, yaticapri nungar iri eté vireco Tūpa Rahir iyavei ambuae ava omoñehe-ñehe tēi iri sese.

<sup>7</sup> Esepia, ava inungar ivi osupite vahe amar oquise yepi. Iha tuprise mbahe miti oyese oporaviqui vahe upe, evocoiyase evocoi nungar ava oipisira porovasasa Tūpa suindar.

<sup>8</sup> Ahe ivi rese yu pāve tēi oyesuse, ahe naporai eté. Evocoi nungar ava Tūpa poromocañisavrive tēi, sapipirā tēi avei yuvirecoira curi.

*Yande remiaro aviye vahe yande moviracua tupri vahe*

<sup>9</sup> Che mboripar saisupri, yepe aipo orohe pēu viña, oromoha ité rumo mbahe aviye catu vahe pēu co ñepisirosa pare.



<sup>10</sup> Esepia niha, Tūpa seco aviye vahe, ahe ndasesarai chietera pe rembiapo aviye vahe sui pe poroaisusa pemboyecua vahe peipitiviise seroyasar. Ahe niha co peyapoño vite peico.

<sup>11</sup> Ore rumo oroipotaño ité ñepei-pei pe pemboyecuaño itera ari cañi rupi eté co pereco vahe pe querēhisa pe remiaro aviye vahe rupiti āgua.

<sup>12</sup> Ndroipotai pe atēhisa perecora co tecocuer upe. Oroipota rumo pe saquicue moñara acoi ava yande Yar rese oyeroyasa pipe iyavei güeco ñemosasa pipe oipisi vahe porerecosa imombehupri Tūpa sui.

<sup>13</sup> Peyemomahenduha acoi Tūpa güemimbotar omombehuse Abraham upe: “Che rer pipe amboaviyera co mbahe ndeu” ehise chupe aracahe. Esepia, ndipoi eté ambuae ivate catu vahe ichui ēgüe ehi vaherā. Sese ahe güerer ité osenoi

<sup>14</sup> aipo ehi chupe: “Supi eté oroovasa itera, iyavei setara ava nde suindar” ehi.

<sup>15</sup> Evocoyase Abraham osāro güeco mbegüesa pipe, ēgüe ehi ipisi oyeupendar Tūpa remimombehu.

<sup>16</sup> Ava omoingatu potase oñehe, ivate catu vahe rer pipe omoingatu yuvireco yepi. Ēgüe ehise yuvireco, ndiya iri eté ipare oñehe vitera sese.

<sup>17</sup> Tūpa güerer pipe ité omoingatu oñehe omombehuse güemimbotar aracahe ‘toicua tupri che remimombehu pisi āgua che ñehe ñepei reseve vahe yuvireco, iyavei amboaviye itera che remimombehu chupe’ oyapave aipo ehi aracahe.

<sup>18</sup> Ēgüe ehi oime ñuvirío mbahe imboyepoepipirēhi: Tūpa niha ndoporombopai vahe ité, ipipe avei yande monguerēhi catu yande yaseca vahe iporopitiviisa iyavei yayeroya vahe ñearosa yandeu ombou vahe rese.

<sup>19</sup> Co mbahe yasāro vahe omoviracua tupri yande hā, inungar mbahe carite guasu mombitasa omoviracua tupri carite ivitu sui. Ēgüe ehi yande remiaro oi que turucuar guasu tūparo asiasta cupeve oi imaranehi catu vahesave ivave.

<sup>20</sup> Aheve Jesús oi que yande raperā mboi āgua. Ēgüe ehi ahe apirēhi vahe ité pahi ivate catu vahe güeco āgua, inungar tupri Melquisedec aracahe.

## 7

### *Jesús pahi Melquisedec nungar tupri ité*

<sup>1</sup> Co Melquisedec aipo mborerecuar guasu Salem pendar, iyavei pahi Tūpa ivate catu vahe upendar secoi aracahe. Abraham oyevise peri rupi ovavasa sui ou mborerecuar guasu eta momba pare, ahese aipo osē voi eté oso Abraham rovaichi Tūpa porovasasa mondo āgua chupe.

<sup>2</sup> Iyavei aipo Abraham omondo oporerecosa vavasa sui mbahe güeru vahe diez vahe sui ñepei-pei chupe. ‘Mborerecuar guasu seco iñi vahe’ oyapave Melquisedec ehi. Iyavei ahe mborerecuar Salem pendar, ahe tecua Salem ‘mbahe tupri’ oya; sese mborerecuar guasu mbahe tupri vahe secoi.

<sup>3</sup> Ahe iyepa rumo ndicuasai eté iyavei ichi, tamoi, ari iharagüer ndicuasai vahe ité. Ndicuasai avei imano agüer yuvireco. Secocuer rumo inungar Tūpa Rahir recocuer; ahe pahi apirēhi vahe ité.

<sup>4</sup> Peyapisaca tupri co mbia recocuer rese: ivate ité secoi aracahe. Yande ramoi Abraham teieté avei omondo diez sui ñepei-pei mbahe porerecosa mborerecuar guasu eta sui güembierocua chupe.

<sup>5</sup> Moisés porocuita pipe rumo opacatu Leví suindar pahi eta yuvirecoi vahe vireco ité ocuita opacatu ava sui diez sui ñepei-pei iporaviquimi rerocua āgua yuvireco. Abraham suindar ité niha ēgüe ehi yuvireco.

<sup>6</sup> Yepe Melquisedec ndahei Leví suindar viña, ahe rumo oipisi ité Abraham sui evocoi porerecosa; Abraham, ahe acoi oipisi vaherã mbahe Tũpa remimombehu. Ĕgũe ehi Melquisedec Abraham rovasa.

<sup>7</sup> Supi eté sovasapri sui oporovasa vahe ivate catu secoi yepi.

<sup>8</sup> Evocoi levita suindar oipisi ava poraviqui repri diez sui ñepeipei. Ahe ava rumo omano vaherã tẽi yuvirecoi. Icuachiapri aracahendar pipe rumo Melquisedec serer vahe oicoveño vahe ité.

<sup>9</sup> Ndojavii evocoyase opacatu pahi eta Levi suindar omondo vahe porerecosa Abraham rupive chupe yuvireco viña.

<sup>10</sup> Esepia, Abraham oyeseve vite Levi oyesuindar vireco, evocoyase ihaẽhi viteseve oyepia Melquisedec rese yuvireco aracahe.

<sup>11</sup> Ava israelita yuvirecoi vahe oipisi mborocuaita pahi levita sui yuvireco; ahe Aarón suindar yuvirecoi. Supi etese rumo ava virecose Tũpa suindar güeco catuprisa evocoi mborocuaita reroya pipe viña, evocoyase ndoyemboyecuai chietera ambuae pahi viña. Ndahei chira rumo ahe Aarón nungar, ahe Melquisedec nungar itera.

<sup>12</sup> Esepia, Tũpa osecuñarose evocoi pahi cuaita, osecuñaro aveira supive mborocuaita;

<sup>13</sup> iyavei yande Yar, ahe sese acoi icuachiapri pipe ñehesa, ndahei Levi suindar, ahe rumo ambuae judío ramo suindar. Ahe ichui acoi ndipoi eté osẽ vahe ambuae pahi.

<sup>14</sup> Esepia, icuapri ité yande Yar Judá suindar secoise. Iyavei Moisés noñehi ahe ichuindar turi vahe rese oñehese pahi cuaita rese.

<sup>15</sup> Iyavei co oyecua tupri catu itera, oyecuase pahi ipiasu vahe Melquisedec nungar.

<sup>16</sup> Ahe rumo ndahei porocuaita “uma sui osẽra pahiguã” ehi vahe sui oique pahi güeco ãgua; güecocuer pĩrata ndopai vahe reseve oique.

<sup>17</sup> Esepia, Tũpa ité aipo ehi oñehese:

“Nde pahi apirẽhi vaherã ité ereico inungar Melquisedec” ehi.

<sup>18</sup> Sese mborocuaita aracahendar opa ité. Esepia, ahe nipiratai, ndayande pĩtivii eté.

<sup>19</sup> Esepia, Moisés porocuaita ndosecocuer mbocatupri eté ava. Yande rumo yasãro mbahe avıye catu vahe yande recocuer uve nara. Supi niha yayemboya Tũpa rese.

<sup>20</sup> Tũpa rumo oñehese omoingatu ñepeipei reseve güerer pipe. Ambuae pahi rumo ndahei ñepeipei reseve senoipri yuvirecoi Tũpa rer pipe.

<sup>21</sup> Yande Yar rumo Tũpa osenoi ñepeipei reseve güerer pipe pahi seco ãgua icuachiapri pipe aipo ehise chupe:

“Yar Tũpa osenoi ñepeipei reseve, sese nosecuñaroi chietera:

‘Nde pahi apirẽhi vaherã ité ereico’ ehi”

ehi icuachiapri pipe.

<sup>22</sup> Sese Jesús rese yaicua Tũpa omboavıyera güemimbotar ipiasu vahe yandeu avıye catu vahe yipindar vahe sui.

<sup>23</sup> Yipindar setá pahi yuvirecoi. Opa-opaño rumo omano.

<sup>24</sup> Jesús rumo nomanoi vahe ité, sese nomondoi chietera pahi güecosa ambuae upe.

<sup>25</sup> Sese ahe oicatu ité ñepeipei reseve viroyasar Tũpa rese oyemboya vahe pĩsiro ãgua apirẽhi. Esepia, ahe oicove vaherã ité apirẽhi oyerocu vaherã Vu Tũpa upe sese.

<sup>26</sup> Supi eté Jesús pahi ivate catu vahe secoi. Evocoi nungar niha ipane ité yandeu yipindar. Ahe ndaseco marai vahe, ndoyapoi vahe mbahe tẽi güeco maranehisa pipe, ndahoyoyai avei ava angaipa viyar rese, iyavei ahe ivate catu vahe iva pendar sui.

<sup>27</sup> Ndahei eté ambuae pahi eta nungar secoi, ndoyuca ranei ari yacatu rupi mbahe mimba Tũpa upe seropovẽhe ãgua yipindar oangaipa rese, ipare opacatu ambuae angaipa rese. Ñepeipei reseve ité rumo güete viropovẽhe opacatu ava angaipa repirã.

<sup>28</sup> Moisés porocuaita rupi iporavopri pahi ivate catu vaherã ava ndahei seco tupri vahe; Tũpa rumo Moisés porocuaita pare osenoi ñepeipei reseve Guahir seco catupri vahe ‘tasecoi pahi ivate catu vahe apirẽhi vaherã ité’ oya.

## 8

*Jesús Tūpa remimbotar ipiasu vahe omoime yandeu*

<sup>1</sup> Co rupi eté oroyepota ore remimombehu mbahe aviye catu vahe upe. Yareco ité evocoi nungar pahí ivate catu vahe. Ahe oguapí Vu acato coti omborerecuasa pipe ivave oĩ.

<sup>2</sup> Aheve pahí secoi oporaviqui Vu rēta supi eté vahe pipe. Ahe ivave ité yande Aposar rembiapo, ndahei ava tēi rembiapo.

<sup>3</sup> Opacatu pahí ivate catu yuvirecoi vahe senoisa mbahe oporerecosa iyavei mbahe mimba yucapri viropovēhe vahe rā Tūpa upe yuvireco. Sese Jesucristo avei vireco mbahe viropovēhe vahe rā Vu Tūpa upe.

<sup>4</sup> Ahe secoise co ivi pipe viña, ndahei chietera pahí secoi viña. Esepia, cohave oime vite ité pahí mbahe viropovēhe vahe Moisés porocuita rupi yuvireco.

<sup>5</sup> Co ivi pipendar pahí rumo ihañeco íva pendar rahanga rese tēi yuvireco. Yaicua niha ahe sahanga tēi. Esepia, Moisés oyapo potase tūparo, Tūpa aipo ehi chupe: “Emahecua tupri acoi ivitri ve amboyecua vahe rese ndeu. Ahe inungar tupri eyapo” ehi chupe.

<sup>6</sup> Yande pahí ivate catu vahe rumo, Jesús, vireco ocuita aviye catu vahe ambuae pahí sui. Esepia, Tūpa remimbotar ipiasu vahe Jesús güeru vahe yandeu aviye catu vahe ité yipindar vahe sui iyavei sesendar Tūpa remimombehu aviye catu vahe avei.

<sup>7</sup> Esepia, yipindar Tūpa remimbotar oicatusé yande recocuer recuñaro ãgua viña, ndipoi chira ambuae semimbotar ipiasu vahe yandeu viña.

<sup>8</sup> Tūpa rembiepiave rumo ava recocuer mbahe tēi eté. Sese aipo ehi icuachiapri pipe co ava rese aracahe:

“Yande Yar aipo ehi:

‘Oimera ari ayapo iri ãgua che remimbotar ipiasu vahe ahe Israel pendar upe, Judá pendar upe avei.

<sup>9</sup> Ndahoyoyai chira rumo acoi tamoi eta rese yipindar ayapo vahe che remimbotar.

Ahese acoi opa anose ivi Egipto sui,  
nomboaviyei eté rumo che porocuita yuvireco.

Sese apoi ichui’ ehi yande Yar Tūpa.

<sup>10</sup> ‘Co ari pare rumo na ahera che remimbotar apo Israel pendareta upe’ ehi yande Yar Tūpa,

‘Amondora che porocuita iyapisacasa pipe,  
aicuachía aveira ipihañemoñetasa pipe.

Evocoiyase che iTūpa aicora; ahe evocoiyase cheundar yuvirecoira.

<sup>11</sup> Nombohe iri chira ondugüer, omu avei che cua uca ãgua yuvireco.

Esepia niha, opacatu chihivahe catu vahe sui,  
ava ocuacua catu vahe avei che cuara yuvireco.

<sup>12</sup> Iyavei cheñero aveira mbahe tēi sembiapogüer rese yuvireco chupe; ndayemomahenduha iri chiaveira yangaipagüer rese’ ehi yande Yar”

ehi icuachiapri pipe aracahe.

<sup>13</sup> Oñehese Tūpa güemimbotar piasu rese, omombehu yipindar vahe cañi ãgua; chihimi tēi ipane icañipa ãgua.

## 9

*Tūparo ivi pipendar iyavei tūparo íva pendar*

<sup>1</sup> Evocoiyase yipindar Tūpa remimbotar vireco ava cuaitarã iñemonuha ãgua Tūpa mboeteisa pipe iyavei vireco tūparo co ivi pipendar.

<sup>2</sup> Ahe tūparo pipe na ehi mbahe imoingatusa: yipindar oi Nimarai Vahe serer. Ipipe oime vera renda iyavei mesa pan sovasapri Tūpa upendar reseve.

<sup>3</sup> Imoñuviriosa turucuar tũparo asiassa cupeve oime ambuae oi, ahe serer Nimarai Catu Vahe.

<sup>4</sup> Aheve oime itaisi rapisa renda oro apopri, aheve avei oime Tũpa porocuita riru oro pipe yaopri. Ahe ipipe oime cambuchi oro apopri ahe tembihu maná riru, ipipe avei oime Aarón pococa ahe sorí vahe, iyavei mborocuita cuachiapri ita ipe vahe rese oime ipipe.

<sup>5</sup> Ahe mborocuita riru harive oime Tũpa rembiguai rahanga oyovai yuvinochai, “Tũpa oime ité cohave” he ãgua. Ahe ipepo oyopri tupri Tũpa porocuita riru rovapisa yuvireco. Co rupive revo amombehura co mbahe pẽu.

<sup>6</sup> Evocoi nungar mbahe moingatupri pare, pahi eta yuviroiqueño yipindar oi asiapri pipe ari rupi ocuita apo ãgua.

<sup>7</sup> Imoñuviriosa oi pipe rumo pahi ivate catu vaheño oique ñepi reseve ñepi-pe araviter pipe, iyavei güeique yacatu viroique mbahe mimba ruvi viropovêhe vaherã Tũpa upe oangaipa rese, ava icuaẽhi pipe angaipa oyapo vahe repirã avei.

<sup>8</sup> Co rese Espiritu Santo oicua uca yandeu avaño tẽi ndiya vitei eté oique ipa vahe oi imaranehi catu vahe pipe Tũpa rovai oime vitesse yipindar oi yasiapri.

<sup>9</sup> Co opacatu mbahe yande mbohe mbahe cõriteindar rese. Esepia, co porrecosa iyavei mbahe seropovêhepri aheve Tũpa upe, nomoatiroi eté imboeteisar pihañemoñetasa.

<sup>10</sup> Ahe rumo carusa, ihusa, ñemoatirosa nungar mbahe resendar tẽi; yande retecer resendar tẽi porocuita. Ahe rumo egüe ehiñomi tẽi yuvireco Tũpa remimbotar ipiasu vahe yu ãgua renonde.

<sup>11</sup> Poropisiosar rumo ou cute. Iyavei ahe ité cõritei yande pahi ivate catu vahe secoi mbahe aviye vahe güeru vahe yandeu. Ahe pahi reiquesa rumo ndahei ava rembiapo nungar tẽi, ahe rumo aviye catu ité iyavei ndahei eté co ivi pipe yapopri.

<sup>12</sup> Cristo rumo oique ité imaranehi catu vahesave ivave. Ndahei rumo ovesa iyavei guaca rahir ruvi reropovêhe ãgua, ahe rumo viropovêhe vuvi ité opacatu rese; egüe ehi ahe ñepi reseve oique apirẽhi vahe ñepisiosa reime ãgua yandeu.

<sup>13</sup> Supi eté guaca cuimbahe ruvi iyavei ovesa ruvi, guaca cuña tanimbu acoi imondopri vahe ava seco mara vahe rese, ahe avei vireco raimi tẽi pĩratasa ava rete moatiro ãgua.

<sup>14</sup> Cristo ruvi rumo vireco catu ité pĩratasa. Esepia, Cristo, Espiritu apirẽhi vahe pipe, oyemondo ahe ae Tũpa upe inungar mbahe seropovêhepri nimarai vahe, iyavei suvi yande pihañemoñetasa moatiro opacatu yande rembiapo ai manosave yande rereco vahe sui Tũpa oicove vahe upe mbahe apo uca ãgua yandeu.

<sup>15</sup> Sese Jesucristo secoi Vu remimbotar ipiasu vahe moingatusar ava reru ãgua Tũpa upe omano pipe. Ipipe sui oime ñeroisa oyemboangaipa vahe yipindar mborocuitavriye yuvirecoi vahe upe ‘toipisi che rembiporavo yuvireco oyeupendar mbahe apirẽhi vahe che remimombehugüer rupi’ oya.

<sup>16</sup> Que ava oicua ucase güemimbotar ombahe mondo ãgua omano renondeve, icuasa tupri ranera rumo imanosa semimbotar apo ãgua renonde.

<sup>17</sup> Esepia, ndiya vitei eté omano vaherã recove vitesseve mbahe imondosa iyarã upe. Imanore voi rumo aviye imondosa.

<sup>18</sup> Sese yipindar vahe Tũpa remimbotar yaposa mbahe mimba ruvi piyere pipe.

<sup>19</sup> Esepia, Moisés omombehupase mborocuita opacatu ava upe, oipisi ovesa ragüer pĩra vahe iyavei ivira hisopo serer vahe rãca, ahe omoaqui guaca rahir ruvi iyavei ovesa rahir ruvi, i rese oyeseha vahe pipe. Ipipe opa osipii cuachiar mborocuita resendar, opacatu ava avei.

<sup>20</sup> Evocoiyase aipo ehi icuachiapri pipe: “Co mbahe ruvi oicua tupri uca co porocuita Tũpa ombou vahe omboyeroya ãgua pẽu” ehi.

<sup>21</sup> Mbahe mĩmba ruvi pipe avei opa Moisés osipĩ tũparo iyavei opacatu mbahe ipĩpendar iporupri.

<sup>22</sup> Porocuaita rupi eté tuvĩ pipe seni opacatu mbahe oñemoatiropa Tũpa rovaque; ndipoi eté ñeroisa angaipa upe mbahe ruvi piyerepri porẽhise.

*Tũpa upe güete reropovẽhe pipe Cristo omocañi angaipa*

<sup>23</sup> Iyacatu ité imoatirosa evocoi nungar mbahe mbahe mĩmba seropovẽhepri ruvi pipe. Esepia, co mbahe iva pendar nungar tẽi sahangaposa; iva pendar ité rumo ipotasa seropovẽhepirã mbahe aviye catu vahe evocoi sui.

<sup>24</sup> Esepia, Cristo ndoiqei tũparo oi imaranehi catu vahe ava rembiapo pipe tẽi. Esepia, ahe iva pendar rahanga tẽi. Ëgũe ehi rumo ahe oi que ité ivave. Aheve cũritei secoi Tũpa rovai yande pĩtivii ãgua oyerogui pipe.

<sup>25</sup> Judío pahi ivate catu vahe niha ñepi reseve oi que araviter yacatu oi imaranehi catu vahe pipe mbahe ruvi tẽi reropovẽhe ãgua; ndahei rumo vuvĩ ité viropovẽhe. Cristo rumo ndoyeeropovẽhe pihi Tũpa upe.

<sup>26</sup> Ëgũe ehise rumo, yipĩsui omano pihi ra viña. Cũritei rumo oyemboyecua co ipa arĩ rupi ñepi reseve, apirẽhi vaherã viropovẽhe ãgua güete Tũpa upe ‘tocañipa angaipa’ oya.

<sup>27</sup> Supi eté opa rane itera ava omano yuvireco, ipare voi ñepi reseve oimera porandusa.

<sup>28</sup> Indó, Cristo oyeeropovẽhe ñepi reseve opacatu angaipa mocañi ãgua. Ipare rumo oyevi irise ou, ndahe iri chira angaipa recocuer rese. Ahe rumo oyevira ou guãrosar piñiro ãgua.

## 10

<sup>1</sup> Esepia, Moisés porocuaita mbahe aviye vahe ou vaherã rahanga tẽi, ndahei ahe eté vahe ité. Sese ahe porocuaita ndoicatui eté ava Tũpa rese oyemboya vahe reco mohivi tupri ãgua mbahe seropovẽhepri araviter yacatundar pipe tẽi.

<sup>2</sup> Porocuaita oicatusẽ pe angaipa sui pe moatiro tupri ãgua, ndapeyandu iri chira pe angaipa viña iyavei pahi ndoviropovẽhe iri chiaveira mbahe ruvi Tũpa upe yuvireco viña no.

<sup>3</sup> Co seropovẽhepri rumo yande momahenduha uca ãgua tẽi yande angaipagũer rese araviter yacatu.

<sup>4</sup> Esepia, mbahe mĩmba ruvi tẽi nomocañi eté yande angaipa yande sui.

<sup>5</sup> Sese Cristo co ivi pipe ouse, aipo ehi Tũpa upe:

“Ndereipota iri niha mbahe mĩmba tẽi porerrecosa seropovẽhepirã ndeyeupe, nde rumo ereyapo che retocuer evocoi nungarã.

<sup>6</sup> Ndahei niha nde piha rupi mbahe rapipri mbahe mĩmba yucapri ndeu seropovẽhepri ñepi reseve angaipa mocañi ãgua.

<sup>7</sup> Evocoyase che aipo ahe:

“Che ayu nde remimbotar apo ãgua, che Ru Tũpa, che resendar icuachiapri remimombehu rupi tupri mboaviye ãgua” ehi.

<sup>8</sup> Yipĩndar aipo ehi, Tũpa ndoipotai eté, iyavei ndahei ipiha rupi mbahe mĩmba reropovẽhepri, porerrecosa mbahe sapipri avei angaipa mboyeho ãgua, yepe ahe mborocuaita rupi seropovẽhesa viña.

<sup>9</sup> Ipare aipo ehi: “Che ayu nde remimbotar apo ãgua” ehi. Ahe ipipe omombopa yipĩndar vahe mbahe seropovẽhepri co ambuae mbahe ipiasu vahe apo ãgua.

<sup>10</sup> Tũpa evocoyase yande peha angaipa sui oyeupe nara. Esepia, Jesucristo oyapo ité semimbotar mbahe ñepi reseve apirẽhi vaherã güete mondo pipe.

<sup>11</sup> Opacatu judío pahi eta arĩ yacatu oyapo ocuaita iyavei mbahe mĩmba avei-vei viropovẽhe Tũpa upe yuvireco. Yepe ahe viropovẽhe tẽi yuvireco viña, nomocañi catui eté rumo angaipa.

12 Jesucristo rumo oyeeropovêhe ñepei reseve angaipa repirã apirêhi vaherã. Ipare oso ivave, uguapi oĩ Vu acato coti.

13 Aheve osãro oĩ Vu Tũpa opase voi omondo yamotarêhimbar ipovrive.

14 Esepia, ñepei reseve oyeeropovêhe pipe osecomohivi tupri Vu Tũpa rembipeha apirêhi vaherã.

15 Iyavei Espiritu Santo aipo ehi tupri avei icuachiapri aracahendar pipe yandeu:

16 “Co ari pare rumo na ahera che remimbotar apo chupe’ ehi yande Yar Tũpa, ‘Coiye amondora che porocuita ipihañemoñetasa pipe, amondo aveira iyapisacasa pipe’ ehi.

17 Ndayemomahenduha iri chietera yangaipagüer rese iyavei mbahe tẽi sembiapogüer rese yuvireco” ehi aracahe.

18 Êgüe ehi angaipa rese oimese ñeroisa, ahese ndiya iri seropovêhesa mbahe angaipa repirã.

### *Yayemboya catura Tũpa rese*

19 Sese che rivireta, iya ité cũritei yande reique água Tũpa rovai yande siquiyeêhisa pipe Jesucristo ruvi pipe sui.

20 Yaicoveño itera ipiasu vahe tecocuer tecovesa yandeu ombou vahe pipe. Ahe niha omboi tũparo pipe asiata turucuar yande reique água Tũpa rovai. Ahe turucuar inungar Jesús rete.

21 Iyavei ahe yande pahi ivate catu vahe ité secoi Vu Tũpa rêta rãrosar;

22 sese yayemboya catura Tũpa rese yande pihañemoñeta tuprisa pipe iyavei yande yeroyasa ipa voi vahe pipe. Supi eté ahe opa yande reco mbocatupri yande pihañemoñeta raisa sui iyavei omoatiro yande rete i maranehi pipe.

23 Yayemoviracua catura mbahe aviye vahe yande remiaro pipe yamombehu vahe ava upe yande pihañemoñeta rerovaêhisa pipe. Esepia, Tũpa omboaviye itera mbahe güemimombegüer yandeu.

24 Iyavei yasecañora ñepei-peí yañepitiví vaherã yande yeaisu catu água iyavei mbahe tupri apo água yandeyeupe.

25 Ndayamopanei chira yande ñemonuhasa Tũpa upe. Ndayaicoi chira omopane vahe nungar, iya rumo yayemonguerêhi catura ñepei-peí yandeyeupe. Esepia, viroví ari yande Yar yevi iri água.

26 Acoi, “Tayemboangaipaño ité” yahese mbahe supi tupri vahe cua pare yaico, ndipo iri ambuae seropovêhepirã evocoi yande angaipa repirã yandeu;

27 Tũpa ñemoirosa ipirata vahe güeraño oimera yandeu iyavei tata guasu apirêhi vahe opara omocañi Tũpa amotarêhimbar yuvirecoi vahe.

28 Ava Moisés porocuita ndoviroyai vahe que ñuvirío, anise mbosapi rembiepiave, ahe secocuer mombehuse, ahe yucapri ité saisuêhisa pipe yuvirecoi.

29 Peyapisaca tupri co rese: ipirata catu oimera Tũpa ñemoirosa tahir reroirosar upe curi iyavei acoi ava vireco vahe suvi inungar mbahe êgüe ehi tẽi vahe iyavei viroiro tẽi vahe guaisusar Espiritu, chupe avei oimera Tũpa ñemoirosa ipirata catu vahe. Esepia, co tuví rese niha seroyapri ité Tũpa remimbotar. Ipipe avei niha ahe ava Tũpa rembipeha yuvirecoi.

30 Yaicua niha yande Yar aipo ehise: “Che ité asepira, sembiapo ai amboyevira chupe” ehi aracahe. Iyavei ambuae ñehesa aipo ehi vahe: “Yar oporandura mbahe sembiapogüer rese ava oyeupendar upe” ehi.

31 ¡Mbahe tẽi eté yaiquese Tũpa oicove vahe ñemoirosa pipe!

32 Peyemomahenduha acoi aracaco co tesapesa nungar supi eté vahe pisi ramosa, peyemoviracuaño ité pe recoãhasa upe pe yemombaraisusa pipe.

<sup>33</sup> Esepia, acoi amove pe pãhu pendar rese iñehe-ñehe tēi yuvireco, mara-mara tēi avei pe rereco opacatu ava rovaque. Ambuae pe pãhu pendar evocoyase peipitivi pe yemombaraisusa rese.

<sup>34</sup> Pesaisuño ité avei ambuae soquendapri yuvireco. Opase pe mbahe virocua yuvireco pe sui peñemosuño avei pe viharetesa pipe peico. Esepia, peicua ivave perecora mbahe aviye catu vahe iyavei apirēhi vahe.

<sup>35</sup> Sese pemocañi tēi eme Tūpa rese pe yeroyasa. Esepia, evocoyase pe recosa pipe omoime ucara mbahe tupri pēu curi.

<sup>36</sup> Pe rumo peyemoviracuaño itera mbahe-mbahe tēi upe Tūpa remimbotar apo āgua semimombegüer oime vahe rã pisi āgua curi.

<sup>37</sup> Supi eté icuachiapri pipe Tūpa aipo ehi:

“Pihavi eté oura acoi ou vahevi.

Ndiaracahei chietera.

<sup>38</sup> Acoi cheundar seco catupri vahe rumo che rese oyeroyasa pipe oicovera.

Acoi oyepese rumo che sui, che evocoyase ndavihai chira sese” ehi aracahe.

<sup>39</sup> Yande ndahei oyepesi vahe nungar yaico. Evocoi nungar niha ocañi tēi vahe rã yuvireco. Yande rumo yayeroya sese; ipipe yañepisiro.

## 11

### *Tūpa rese yeroyasa*

<sup>1</sup> Supi eté yarecose yande yeroyasa Tūpa rese, ahese yaicua ahe ombou itera mbahe yasãro vahe yandeu, iyavei yaicua ité oime mbahe ndayasepiai vahe.

<sup>2</sup> Supi eté amove yande ramoi aracahendar upe, “Aviye ité” ehi Tūpa oyese yeroyasa pipe sui.

<sup>3</sup> Tūpa rese yande yeroyasa pipe yaicua ahe oñehe pipe ité oyapo opacatu mbahe. Sese yaicua cūrteindar mbahe yasepia vahe mbahe ndayasepiai vahe apopri.

<sup>4</sup> Sese oyeroya pipe Abel viropovēhe oporerrecosa aviye catu vahe Caín porerrecosa sui chupe. Sese, “Co ava seco catupri vahe che rovaque” ehi iyeroyasa rese oipisi tuprise iporerrecosa. Yepe Abel omano viña, oimeño vite rumo Tūpa rese yeroya agüer resendar ñehesa.

<sup>5</sup> Enoc avei Tūpa rese oyeroyasa pipe serasosa co ivi pipe sui, “Tomano rane” ndehi eté chupe. Ava ndoseca iri eté yuvireco. Esepia, Tūpa ité viraso secove reseve. Yipindar rumo Tūpa virasoēhi vitesese, “Enoc recocuer aviye ai rane ité chupe” ehi icuachiapri aracahendar.

<sup>6</sup> Ndahei eté rumo Tūpa piharu yaico ndayayeroyaise sese. Esepia, oyemboya pota vahe sese, “Oime ité Tūpa” ehi rane itera, iyavei, “Oime itera mbahe secasar upe nara” ehi aveira.

<sup>7</sup> Noé avei oyeroya Tūpa rese. “Oimera mbahe tēi co ivi pipe ndapesepia vitei vahe” ehise chupe, viroya voi eté. Evocoyase seroyasave oyapo arca oyesuindar pisiro āgua. Iyavei sese oyeroya pipe omombehu ava co ivi pipendar cañi āgua. Ahe rumo Tūpa rese oyeroya pipe oñepisiro.

<sup>8</sup> Abraham avei oyeroya Tūpa rese. Esepia, Tūpa, “Eso ambuae ivi ndeu amboyecua vahe rã vahesave, ahe amondora ndeu” ehise, omboyeroyaño ité. Yepe ahe ivi ndoicuai viña, osēño ité rumo oivi sui oso.

<sup>9</sup> Ipare Tūpa rese oyeroya pipe avei secoiño ité ahe ivi pipe. Ndoyavii ambuae ivi pendar secoi vahe; oi mbahe pিরer apopri pipe tēi aheve secoi. Ēgüe ehi tupri avei tahir Isaac iyavei sumino Jacob. Ahe avei oipisi vahe rã Tūpa remimombehu ivi yuvireco.

<sup>10</sup> Esepia, aipo Abraham osãroño ité tecua ivave oviracua vahe. Tūpa niha ahe tecua rãhasar, yaposar avei.

11 Yepe Sara nimembii vahe viña iyavei Abraham ocuacuami, Tūpa rese oyeroyasave rumo oipisi pīratasa Tūpa sui guahi āgua. Esepia, viroyaño ité Tūpa oñehe omboaviye āgua chupe.

12 Evocoyase yepe Abraham ocuacuami viña, viresco rumo guahir. Ahe ichuindar sehi eteanga coiyé inungar yasitata iyavei inungar ivi cuhi para guasu popi rupindar ndayaipapa catui vahe ité.

13 Ahe ava rumo opacatu omanopa tēi; ndoipisi eté mbahe semimombehugüer oyeupendar. Ahe mbahe amombri rupi osepiañomi tēi yuvireco oyeroyasa pipe, soriveteño avei sese. Ēgüe ehi oicuaño ité ndahei co ivi pipendar güecosa; ahe rumo yuvirecoveño raimi tēi co ivi pipe.

14 Aipo ehi vahe oicua uca tupri yandeu oseca vite oyeupendar ivi yuvireco.

15 Ipihañemoñetase rumo ivi güeco agüer rese yuvireco viña, oyevi iriño itera aheve avei yuvireco viña.

16 Ahe rumo oipota ambuae ivi aviye catu vahe yuvireco, ahe iva pendar. Sese Tūpa nochí eté, “Che Ru Tūpa” oyeupe hese. Esepia, viresco ité tecua imoingatupri chupe.

17 Tūpa rese yeroyasa pipe avei Abraham oyemoingatu voi guahir ñepeí vahe Isaac reropovēhe āgua Tūpa upe güecoāhasa pipe. Yepe Tūpa aipo ehi chupe aracahe viña:

18 “Nde rahir Isaac sui setá oimera nde suindar” ehi.

19 Esepia, oicua ité Tūpa viresco pīratasa ava omano vahe mbogüerayevi iri āgua. Evocoyase imano rāgüer sui eté oipisi iri guahir aracahe. Ahe evocoyase omboyecua mbahe yandeu.

20 Tūpa rese oyeroya pipe avei Isaac osovasa Jacob, Esaú avei mbahe oime vaherā pisi āgua.

21 Iyavei Tūpa rese oyeroya pipe avei Jacob omano pota āgua, osovasa ñepeí-peí José rahir. Ahese opococa rese tēi eté oyemoviracua oyeroqui āgua Tūpa upe imboeteisa pipe.

22 Tūpa rese oyeroya pipe avei José, omano āgua renonde, aipo ehi: “Yande mu israelita opara yuvínose ivi Egipto sui curi” ehi. Ipare oyocuai omu oitacuer rerova āgua aracahe.

23 Tūpa rese oyeroya pipe avei, ohase Moisés, iyésupa oñomi mbosapi yasi rupi yuvireco. Esepia, ahe pītani icatupri ai, iyavei ndoyembosiquiyeyi eté mborereciar guasu porocuita yuca āgua sui.

24 Tūpa rese oyeroyasa pipe avei, ocuacuase Moisés, ndoipotai eté, “Egipto pendar mborereciar guasu rayri membri” oyeupe he āgua.

25 Ahe rumo oipota catu mara-mara tēi güereco āgua Tūpa reroyasar reseve chíhi rupive mbahe tēi rese yemboviha rāgüer sui.

26 Aviye catu ité chupe Tūpa rembiporavo upe nara mbahe tēi porara āgua Egipto pendar mbahe eta sepirusu vahe rereco rāgüer sui. Esepia, ahe oicuaño ité oyeupe nara porerecosa Tūpa ombou vaherā.

27 Tūpa rese oyeroya pipe avei osē ivi Egipto sui osiquiyēhisa pipe mborereciar guasu roriēhise. Oyemoviracuaño ité oyese mbahe apo āgua; aviye osepi vahe ité Tūpa acoi ndoyecuai vahe.

28 Tūpa rese oyeroya pipe avei oyapo Pascua pieta. Opa uca oipichi ava upe oquenda rese mbahe mimba ruvi Tūpa rembiguai oporoyuca vahe ava israelita rahir ipi yucaēhi āgua.

29 Tūpa rese oyeroya pipe avei ava israelita osasa para guasu Pīra Vahe ivi ipiru vahe hari rupi yuviraso. Ipare yamotarēhimbar Egipto pendar, “Ēgüe yahe avei” ehi yuvireco viña, i rumo opaño oyopi.

30 Tūpa rese oyeroya pipe avei israelita oyerese siete ari rupi tecua Jericó rese, opa ñachisa onduru.



<sup>31</sup> Tūpa rese oyeroya pipe avei Rahab, oyemondo-mondo tēi vahecuer, nomanoi eté ambuae ava mbahe-mbahe tēi vahe rupi. Esepia, ahe oipisi tupriño güetave israelita Jericó ivi repiasar.

<sup>32</sup> ¡Setá vite ambuae ava recocuer oime amombehu vaherã pēu! Ipane ité rumo ari imombehupa água: Gedeón, Barac, Sansón, Jefté, David, Samuel iyavei opacatu Tūpa ñehe mombehusar recocuer.

<sup>33</sup> Evocoi avei Tūpa rese oyeroya pipe osecopi ité ambuae ivi pendar, oporocuai tupri güeco ñvisa pipe, oipisiño ité Tūpa suindar mbahe semimombehugüer yuvireco, oiyurumboyaño avei yaguar,

<sup>34</sup> ombogüe avei tata ipirata vahe, oyeepi avei quise pucu pipe oyuca rãgüer sui; ava nipiratai vahecuer rumo oyemomirata yuvireco, oyemoviracua ité vavasave oyese; opaño ité oamotarēhisar sundao osecopi yuvireco.

<sup>35</sup> Oime amove cuña ipãhuve vireco iri vahecuer omu manosa sui imbogüerayevipri.

Ambuae rumo omanopaño ité teco rasisa pipe, “Yasē catu co nungar mbahe sui” ndehi eté yuvireco cuerayevisa aviye catu vahe pipe güeco água.

<sup>36</sup> Ambuae iparaisu catu ava upe oñeroirosa pipe, onupasa pipe, oapichi-pichisa pipe, voquendasa pipe avei yuvireco.

<sup>37</sup> Ambuae ita pipe oapi-apisave omano, amove imombitesa ivira asiasa pipe, anise ambuae yucasa quise pucu pipe, amove ipãhu pendar oguata tēi, ovesa, cavara pিরer añomi tēi iyemondesa, iparaisu mbahe porēhi yuvireco nombohe catui ava ipihañemoñetasa pipe sereco iyavei mara-mara tēi vireco yuvireco no.

<sup>38</sup> Evocoi seco catupri vahe yuvireco ndiyai co ivi pipendar Tūpa cuaparēhi upe vireco vaherã oyepãhuve, ahe oguata tēi ivi iporupirēhisa rupi, ivitri rupi, mbaheciar rupi avei yuvireco.

<sup>39</sup> Yepe ahe opacatu aviye ité Tūpa upe oyeroyasa rese yuvireco viña, ndoipisi eté rumo oyeupe Tūpa remimombehugüer yuvireco.

<sup>40</sup> Esepia, Tūpa omoime mbahe aviye catu vahe yandeu ‘oyoya tupri toipisi güecocuer ihivi tupri água che remimombehugüer rupi yuvireco’ ohesa pipe chupe, yandeu opacatu avei.

## 12

### *Yamahecua tupri va yande yeroyasa pipe Jesús rese*

<sup>1</sup> Sese yande, yaicuase setá ité evocoi ava oime omboyecua vahe Tūpa rese oyeroyasa, iyacatu ité yaseyapa opacatu mbahe ndayande mbohe catui vahe Tūpa upendar mbahe rese iyavei yande angaipa yande mboha tupri vahe. Ichui yayemoviracuaño itera yande cuaita Tūpa ombou vahe rese yandeu inungar ivava catu vahe.

<sup>2</sup> Yamahe tupri itera Jesús rese. Ahe ichui niha yareco yande yeroyasa Tūpa rese. Ahe avei oyese yande mboporeroya tupri catu. Oiporara curusu rese omano ochiēhisa pipe. Esepia, ahe oicua ité oparaisu pare virecora oviharetesa, oguapise omborerecuasave Vu acato coti oĩ.

<sup>3</sup> Pe avei catu, pepihañemoñeta Jesús recocuer rese; ahe oiporara ité mbahe rasicuer ava yangaipa vahe mara-mara tēi güerecose. Sese pecuerai eme Cristo rese peico água iyavei, “Ndorequerēhi iri” ndapeyei chira.

<sup>4</sup> Esepia, pe ndapemano vitei eté angaipa upe pe yembopihaviracuasa pipe.

<sup>5</sup> Peresarai eté Tūpa pe mboaracuasa sui tahir ité pe recosa pipe; icuachiapri araca-hendar pipe aipo ehi:

“Che rahir, eyemoingatu voiño Yar nde mombaraisusa upe nde reco mohivi tupri água, iyavei, ‘Ndachequerēhi iri’ nderei chaveira chupe ndeu oñehe piratase.

<sup>6</sup> Esepia, Tūpa osecomohivi tupri ava güembiaisu iyavei omombaraisu rane guahir sereco água” ehi.

<sup>7</sup> Peñemosañu catu pe mombaraisusa upe pe reco mohivi ãgua. Esepia, Tũpa ãgũe ehise pũu guahir ite pe rereco. ¿Oime pũha que ñepepe ava guahir upe noñehe pũratu vahe secocuer mohivi ãgua?

<sup>8</sup> Tũpa ndape recocuer mohivise inungar oyapo ambuae guahireta upe yepi, pe evocoyase inungar-ra chũhivahe ndiyesupai vahe, ãgũe peye tẽi peico chupe.

<sup>9</sup> Iyavei, chũhivahe tẽi vite yaicose, yande yesupa co ivi pipendar yande nupa yande recocuer mohivi ãgua, ahese yamboetei. Sese yamboetei catura yande Ru Tũpa iva pendar tecovesa rereco ãgua.

<sup>10</sup> Yande yesupa co ivi pipendar opihañemoñetagus rupi tẽi yande nupa yaicove raimi tẽise co ivi pipe; Tũpa rumo yande mombaraisu yandeu mbahe tupri ãgua rese yande reco maranehi ãgua inungar ahe ndaseco marai vahe.

<sup>11</sup> Supi ete yipendar, poronupasa yaipisi ramose, tasi yandeu. Coiye rumo yande imboyeroyasa pipe yayapo catura mbahe ihivi vahe. Ahe evocoyase yande recocuer rerecora mbahe tupri pipe.

### *Peicua catu Tũpa ñehe rendu potaẽhi sui*

<sup>12</sup> Sese pemopoase iri pe reco pũratasa iyavei peyemonguerẽhi iri pe guata ãgua yande Yar rupi.

<sup>13</sup> Ipare peseca peri ihivi vahe pe recocuer uve nara ‘toingatu che pi ndoguatai vahe’ pe yapave ‘timara catu iri eme’ pe hesa pipe.

<sup>14</sup> Peico catu opacatu ava upe mbahe tupri pipe, peico avei pe reco maranehi pipe. Esepia, ava ndovirecoi vahe gũeco maranehi, ndosepiai chietera yande Yar.

<sup>15</sup> Peñearo tupri catu, tipo eme ava ndoipisii vahe Tũpa porovasasa pe pãhuve, iyavei tipo eme mbahe tẽi que ava pũha pipe; aviyeteramo opacatu rese ova tiẽtera.

<sup>16</sup> Tipo eme catu pe pãhu pendar oyemboaguasa tẽi vahe. Tipo eme avei ava Tũpa upendar mbahe viroĩro vahe pe pãhuve inungar Esaũ aracahe. Ahe omondo Tũpa porovasasa oyeupendar tahir ipi gũecosa resendar mimoi repirã tẽi vivri upe.

<sup>17</sup> Iyavei peicua, ipare acoi Esaũ oipisi pota Tũpa porovasasa vu sui viña. Ahe rumo ndiya iri ete sovasapirã secoi. Yepe oyasehõ iteanga viña, ndiya iri ete rumo mbahe sembierecovi rãgũer mboyevi ãgua chupe.

<sup>18</sup> Peyemboyase Tũpa rese, ndahei inungar pe ramoi israelita arachendar. Esepia, ahe ivitri Sinaĩ sese yapoco vahe rese tẽi oyemboya vahe yuvireco; ahe ivitri rese sendi ite inungar tata rendigũer; oime pũtu, pũtumimbi vahe, ivitu ai avei sese.

<sup>19</sup> Iyavei ndapesendui mimbi imoñehepri, Tũpa ñehe avei. Arachendar rumo osendu ite yuvireco. Iñehe renduse rumo, osiquiyepave ndoipota iri ahe oyeupe ñehe yuvireco.

<sup>20</sup> Esepia, ahe oyembosiquiye ite evocoi porocuita aipo ehi vahe sui: “Acoi opũro vahe ivitri rese, yepe que mbahe mimba tẽi viña, ahe peyapi-yapi yuca ita pipe, anise lanza pipe avei” ehi.

<sup>21</sup> Ahe mbahe oyecua vahe aipo oporombosiquiye vahe ite. Evocoyase Moissẽs teietẽ aipo ehi: “Che siquiyepave ariri ete” ehi.

<sup>22</sup> Pe rumo peyemboya iva pendar ivitri Siõn ve, Tũpa oicove vahe recuave. Ahe tecua Jerusalẽn iva pendar. Aheve Tũpa rembiguai setã iteanga vahe oñemonuha imboetei ãgua yuvireco yepi.

<sup>23</sup> Iyavei peyemboya opacatu ava Tũpa rahir ipi Cristo reroyasar rese, ahe serer icuachiapri ivave. Peyemboya avei Tũpa rese, ahe niha yande recocuer rese oporandu vahe secoi; iyavei peyemboya ava seco aviyeye vahe espĩritu yuvirecoi vahe rese. Ahe niha Tũpa osecomohivi tupri sereco.

<sup>24</sup> Peyemboya avei Jessũs rese, ahe omoime yandeu Tũpa remimbotar ipiasu vahe, ahe suvi yande moatiro vahe. Ahe aviyeye catu yandeu Abel ruvi sui.

<sup>25</sup> Sese peicua catu, “Ndoroviroyai” peye vaheã acoi pëu oñehe vahe upe. Esepia, Moisés reroyaëhisa pipe pe ramoï noñemi eté Tũpa ñemoïrosa sui yuvireco, oyeupe, “¡Peicua catu!” ehise co ivi pipe aracahe. Ëgüe ehise chupe yuvireco aracahe, ëgüe ehi catu iri tiëtera yandeu. Nayañemi chietera ichui cute ndayaroyaise co iva pendar, “Peicua catu” ehise yandeu.

<sup>26</sup> Tũpa oñehe pipe omboriri eté ivi aracahe; cũritei rumo yandeu aipo ehi: “Che omboriri irira ivi, ndahei chira rumo ivi güeraño, iva avei omboririira” ehi.

<sup>27</sup> ‘Amboriri irira’ aipo oyapave aipo ehi: “Opara mbahe omi vahe omocañi güemiapo Tũpa ‘topita apirëhi mbahe nomi vahe’ oyapave” ehi.

<sup>28</sup> Tũpa mborerecuasa ombou vahe yandeu ahe nomi chietera. “Aviye ndeu” yahera evocoyase sese chupe; ipipe sui yayerure catu yande piha pipe chupe imboeteisave semimbotar rupi.

<sup>29</sup> Esepia niha, ahe inungar tata ñepei reseve mbahe omocañipa vahe.

## 13

### *Mara yahera Tũpa mbovaha*

<sup>1</sup> Ndapepoi chietera pe yeaisusa sui ñepei-peï oyeivri nungar pe recosa pipe.

<sup>2</sup> Iyavei peresarai eme pe avasa sui ava oyepotase pe piri. Esepia, co nungar apo pipe amove ava omoingue Tũpa rembiguai güëtave icuaëhi pipe.

<sup>3</sup> Peyemomahenduha avei soquendapri rese inungar-ra pe avei supive soquendapri peico vahe viña. Iyavei peyemomahenduha ava mara-mara tõi serecopri rese. Esepia, aviyeteramo ëgüe ehi aveira pëu.

<sup>4</sup> Pe opacatu pemboetei avei mendasa, iyavei peico pe reco maranehisa pipe mendasa rese. Esepia, Tũpa oicudara oyemboaguasa tõi vahe upe.

<sup>5</sup> Ndahei guarepochi tõi peipota raira. Iya rumo peyembovahaño mbahe pereco vahe rese. Esepia, Tũpa aipo ehi: “Ndoroeyai chietera, ndapoi chietera nde sui” ehi aracahe.

<sup>6</sup> Evocoyase aipo yahera Yar rese yande yeroyasa pipe: “Che Yar che pñivii, ndasiquiyei chietera ava tõi sui oyapo potase mbahe cheu” yahera.

<sup>7</sup> Peyemomahenduha pe reroguatasa rese, pëu Tũpa Ñhengagüer mombehusar rese avei. Pepihañemoñeta tupri secocuer rese, seco apri rese avei; iTũpa reroya agüer rupi tupri avei peico.

<sup>8</sup> Jesucristo recocuer noñecuñaroi vahe ité, yipisuive secoi apirëhi vahe.

<sup>9</sup> Peyembopa ucai rene yembohesa co coti tõi vahe upe. Aviye catu yayemomirata Tũpa poroaisusa rese que mborocuaita tembihu resendar sui. Esepia, co nungar mbahe ndovireco ucai mbahe aviye vahe ohusar upe.

<sup>10</sup> Yande rumo yareco ambuae ité Tũpa upe seropovëhepri. Ahe niha ndiyai eté pahi tũparo yipindar yuvirecoi vahe pendar yuvirohu.

<sup>11</sup> Supi eté judío pahi ivate catu vahe viroique mbahe ruvi tõi Tũpa rëta oi imaranehi catu vahe pipe seropovëhe ava angaipa rerocua ãgua; ahe mbahe mimba rete rumo osapi tecua ivi yuvireco yepi.

<sup>12</sup> Ëgüe ehi avei niha Jesús iparaisu, omano tecua ivi ava reco mbocatupri ãgua vuvi pipe.

<sup>13</sup> Ëgüe vahe aveira yasora Jesús upe yande paraisu ãgua supi ava yande reroïrosa pipe yaico.

<sup>14</sup> Supi eté, co ivi pipe ndayarecoi eté tecua apirëhi vahe. Yande rumo yaseca evocoi tecua oime vaheã yandeu curi.

<sup>15</sup> Sese Jesús rembiapo rese iyacatu yamboeteira apirëhi vaheã yande Yar Tũpa. Co imboeteisa inungar mbahe seropovëhepri ari rupi chupe. ¡Ëgüe yahera imboetei yande ñehe pipe!

<sup>16</sup> Peresarai eme catu ambuae ava upe mbahe tupri aposa sui. Iyavei pemondoño ité mbahe pereco vahe ambuae ava upe. Esepia, evocoi nungar inungar mbahe seropovēhepri Tūpa upe. Ahe niha Tūpa oipota.

<sup>17</sup> Pemboyeroya pe cuaisar, peyapo semimbotar. Esepia, ahe ndopituhui eté pe recocuer rāro yuvireco. Esepia, oicua Tūpa oicuara mbahe sembiapo rese chupe curi. Sese pemboyeroya catu 'tayavai eme iporaviquisa chupe; tasorivete oporaviquisa rese yuvireco' pe yapave. Pemboavaise rumo, nosei chietera mbahe aviye vahe ichui pe recocuer upe nāra.

<sup>18</sup> Peyerure Tūpa upe ore rese. Supi eté, ore oroyandu ité mbahe aviye vahe oroyapo ore pihañemoñeta pipe yepi. Esepia, oroyapo pota mbahe aviye vahe opacatu mbahe rese ava rembiepiave.

<sup>19</sup> Che yevi pihaiivi āgua rese ité aporandu pe yeruresa rese pēu Tūpa remimbotar rupi.

### *Mahenduhasa ipa vahe*

<sup>20</sup> Tūpa mbahe tupri rerecosar, ahe niha ombogüerayevi vahe yande Yar Jesucristo yande rārosar ivate catu vahe, suvi pipe omboyecua güemimbotar piasu ndopai vahe imbou yandeu,

<sup>21</sup> tombou pe reco mohivisa iyavei pe reco aviyesa opacatu pe semimbotar apo āgua; iyavei ahe toyapo mbahe opacatu güemimbotar yande rese Jesucristo rembiapo sui. ¡Ēgüe tehi imboeteipri apirēhi tasecoi Cristo yepi!

<sup>22</sup> Che rivireta, peñemosañ co che opomboaracua vahe rese, moviro tēi niha co ñehesa aicuachía pēu.

<sup>23</sup> Aipota pe peicua yande rivri Timoteo imosesa soquendasa sui. Oyepota pihavise, arasora cheyeupi che sose pe repia.

<sup>24</sup> Pemombehu che mahenduha opacatu ava pe cuaisar upe, opacatu ambuae Tūpa upendar ava upe avei. Ivi Italia rupindar avei ombou omahenduhasa yuvireco pēu.

<sup>25</sup> Aipo rupive, yande Ru Tūpa tape rovasa opacatu.

## SANTIAGO REMBICUACHIA SANTIAGO

### *Mahenduhasa*

<sup>1</sup> Che, Santiago, Tūpa, yande Yar Jesucristo rembiguai aico. Amondo che mahenduhasa doce yuvirecoi vahe Israel iguar opacatu ivi rupi oñemosai vahe upe.

### *Mbahecuasa ou vahe Tūpa sui*

<sup>2</sup> Che rivireta, pevihareteñora peico acoi oimese tecoãhasa pëu yepi.

<sup>3</sup> Esepia, peicua niha pe poreroyasa rese oimese mbahe tecoãhasa, ahe ipipe peyembohe pe ñemosãgua rese peico.

<sup>4</sup> Peicoño ité pe reco ñemosasa pipe pe reco mohivi tupri catu ãgua. Evocoyase nipane iri chira mbahe Tūpa suindar pëu.

<sup>5</sup> Iyavei acoi ipanese que ava pe pãhu pendar upe yaracua ãgua, toporandu Tūpa upe. Evocoyase ahe omboura chupe. Esepia, ahe opacatu upe mbahe ombou güecatêhiêhisa pipe iyavei ombahe mboasiêhisa pipe avei.

<sup>6</sup> Iyacatu rumo evocoi ava oporandura Tūpa upe sese oyeroyá pipe, ndahei chira opihañemoñeta rerova-rova têisa pipe inungar acoi ivitu i ombohitu-hitu têi vahe.

<sup>7</sup> Acoi êgüe ehi-ehi têi vahe ava ndoipisii chira mbahe yande Yar sui yuvireco.

<sup>8</sup> Esepia, ñepe ari ipihañemoñeta ñepe mbahe rese, ambuae ari ambuae rese. Ndoymoviracuai güeco tupri ãgua rese yuvireco.

<sup>9</sup> Iyavei que Jesús reroyasar seco mbegüe vahe toyembovihareteño yepi Tūpa omboeco ivate ãgua rese.

<sup>10</sup> Iyavei mbahe yar secoi vahe pe pãhuve, toyemboviha viteño Tūpa viroyise seco ivatesa sui. Esepia, mbahe yar yuvirecoi vahe inungar caha potri êgüe ehi raimi têi vahe yuvireco.

<sup>11</sup> Evocoyase acoi ari osêse, sacú iteangase, ahese caha opa ipiru; ipotri avei opa oviapi ichui iyavei iporañetesa opa ichui. Êgüe ehi aveira ava mbahe yar; omanora oporaviquisa sui.

### *Tecoãhasa, poroãtoisa resendar*

<sup>12</sup> Acoi ava oyemoviracua vahe poroãtoisa upe oyembovihara oico. Esepia, osasa tuprise evocoi poroãtoisa, oipisira porerecosã, ahe tecovesa apirêhi vahe Tūpa ombou vahe guaisupar upe.

<sup>13</sup> Acoi ava oyanduse poroãtoisa oyeupe mbahe têi apo ãgua, “Tūpa revo êgüe ehi cheu” ndehi chira. Esepia niha, Tūpa atoisar ndipoi eté mbahe têi oyapo uca vaheerã chupe. Iyavei ahe noñatoi avei mbahe têi apo ãgua ava.

<sup>14</sup> Co rumo ava opihañemoñeta rai upe oñeato uca mbahe têi apo ãgua yepi.

<sup>15</sup> Güemimbotarai pipe evocoyase oyapo angaipa. Ipare angaipa apo pipe sui ou manosa chupe.

<sup>16</sup> Che rivireta, che rembiaisu, peyembopai rene.

<sup>17</sup> Esepia, opacatu mbahe aviye vahe ahe Tūpa ombou vahe yandeu. Ahe niha opacatu iva rese mbahe aposar. Ndahei rumo güembiapo nungar secoi. Esepia, sembiapo oñecuñaro vahe.

<sup>18</sup> Ahe rumo ombou ité tecovesa yandeu co ñehesa supi eté vahe pipe ‘toyuvirecoi inungar yipindar mbahe miti ha seropovêhepri cheu opacatu che rembiapo sui’ ohesave yandeu.

*Tūpa rese yande pihañemoñetasa supi tupri vahe*

<sup>19</sup> Iyavei che riviřeta, che rembiaisu, peyemomahenduha co che ñehe rese: peyapisaca tupri voira ambuae ava ñehe rese, mbegüe rupi rumo peñehera chupe iyavei ndapemba-hemboasi voi tēi chiaveira.

<sup>20</sup> Esepia, yambahemboasi voi tēise, ndayayapoi Tūpa remimbotar.

<sup>21</sup> Evocoyase peseya teco raisa, opacatu ambuae oime vahe mbahe naporai vahe pe pāhuve. Co catu pe yemominisave peroya catu vite Tūpa ñehe omoingue vahe pe piha pipe. Ahe niha vireco pīratasa pe pīsiro āgua.

<sup>22</sup> Pe rumo pemboaviyera co pe mbohe vahe ñehesa; ndahei acoi pesenduño tēira. Esepia, pesenduño tēise, pe ae peyembopara.

<sup>23</sup> Supi eté acoi ava osenduño tēise Tūpa Ñehengagüer, ipare rumo ndoviroyai, ahe inungar acoi ava osepiño tēi vahe vova yepiasa pipe.

<sup>24</sup> Ipare rumo oyepepise ichui, cūrteimi sesaraiño ichui.

<sup>25</sup> Acoi ndasesarai vahe ité rumo güemiendu sui iyavei oyapisaca tupri vahe co mborocuita maranehi mbahe-mbahe tēi sui yande rerocua vahe rese iyavei oye-moviracuaño ité vahe oyapo vahe rā iporocuita, ahe oviharetera opacatu güemiapi tupri rese.

<sup>26</sup> Amove ava, “Che aguata tupri Tūpa rupi” ehi tēi. Ndoicuai rumo oñehe monguiriri āgua. Evocoyase ahe ae oyembopa oico. Sembieroya evocoyase ēgüe ehi tēi vahe.

<sup>27</sup> Yarecose rumo yande rembieroya icatupri, nimarai vahe yande Ru Tūpa rovai, ahese yaipitivira co tirēhi, imer mano vahecuer avei iparaisusa rese. Iyavei ndayayapoi chira mbahe naporai vahe.

## 2

### *Ndayamboyoavirati chira ava mboeteisa sereco*

<sup>1</sup> Iyavei no, che riviřeta, pe peroya vahe yande Yar Jesucristo seco porañete vahe peico, ndapeyeaisu yoavii chira.

<sup>2-3</sup> Inungar-ra que ava mbahe yar oiquese pe ñemonuhasave viña, ahe icuã penda oro vahe, iturucuar catupri ai vahe. Sese pehañeco tupri, “Eguapi co tenda aviye catu vahesave” peyera chupe. Ahe pipeve avei co oiquese pe pāhuve iparaisu vahe oturucuar cuacua vahe reseve, “Eipe peve nde epita, anise eguapi ivive” aipo peyeñora co chupe viña.

<sup>4</sup> Evocoyase ēgüe peyese, peyapo mbahe ndoyoyai vahe, naporai vahe pe pāhuve ae iyavei peyeapo ava poravosar nungar peico pe pihañemoñeta raisa pipe.

<sup>5</sup> Che riviřeta, che rembiaisu, pesendu aipo ñehesa: Tūpa oiporavo ava iparaisu vahe co ivi pipe ‘toyuvirecoi mbahe yar nungar che reroyasa rereco’ oya, iyavei ‘toipisi che remimombegüer rupi che mborerecuasa oyeupe nara’ oyapave guaisupar upe.

<sup>6</sup> Pe rumo seroĩrosa pipe pemochi ava iparaisu vahe. ¿Ndahei vo mbahe yar mara-mara tēi pe rereco yuvireco yepi? Ahe niha pe mbotiriri mborerecuar rovai pe reraso yuvireco yepi.

<sup>7</sup> Ahe avei niha oñehe-ñehe tēi seroĩrosa pipe yande Yar yaroya vahe rer imboyeroy-apri rese yuvireco.

<sup>8</sup> Supi eté yayapo mbahe aviye vahe yamboaviyese mborocuita ivate catu vahe icuachiapri aipo ehi vahe: “Pesaisu ava pe yeaisu nungar” ehi vahe.

<sup>9</sup> Acoi yayeaisu yoavirati tēise rumo, ahese yayapo angaipa, yayavi mborocuita Tūpa rovai.

<sup>10</sup> Esepia, acoi ava viroya vahe opacatu mborocuita, ipare rumo oime que ñepe nomboaviye tupri vahe, ahe oyavi opacatu mborocuita.

<sup>11</sup> Esepia, Tūpa ité niha aipo ehi: “Ndapeyemboaguasai chira” ehi. Ahe avei aipo ehi: “Ndapeporoyuca chira no” ehi. Yepe acoi ndapeyemboaguasai chira viña, pe poroyuca pipe rumo, peyavi mborocuita.

<sup>12</sup> Evocoyase peñehe tuprīra iyavei peico tuprī aveira. Esepia, oporandura yande recocuer rese yande Yar oporocuita pīpe güeru vahe yande reco tuprī ãgua.

<sup>13</sup> Supi eté acoi ndoiparāisuerecoi vahe ava, ahe chupe ndipoi chiaveira poroparāisuerecosa mborandusave. Oporoparāisuereco vahe rumo, ahe soriveté catura yuvīreco ahe ari pīpe mborandusave curi.

*Yamboaviye itera mbahe; ndahei chira yande ñehe tēi*

<sup>14</sup> Che rivīreta, ¿aviyera pīha acoi ava, “Ayeroya yande Yar rese” ehi tēi vahe, ndoyapoise mbahe aviye vahe yuvīreco? ¿Oicatura pīha ahe oñepīsiro aipo ohe pīpe tēi yuvīreco?

<sup>15</sup> Inungar-ra oimese que yande rivīri, anise yande reindrī upe ipanera iturucuarã, semihura ari yacatu rupindar viña.

<sup>16</sup> Evocoyase que pe aipo peyeñora chupe viña: “Aviye, eso tuprī eico. Eyeao eso sōhisagüer sui, ecaru tuprī” peyera. Ipare rumo ndapemondoise mbahe ipane vahe chupe, ¿aviyera pīha ava upe aipo yande he tēi viña?

<sup>17</sup> Ëgüe ehi avei, “Ayeroya yande Yar rese” yande hesa; ndayayapoise rumo mbahe aviye vahe aipo yande hesa pīpe, aipo yahe tēi yaico.

<sup>18</sup> Aviyeteramo ava pe pãhu pendar aipo ehira cheu: “Nde ereyeroya yande Yar rese, che rumo ayapo mbahe tuprī” ehi. Che evocoyase aipo ahera chupe: “Emboyecua ru nde yeroyasa mbahe nde rembiapoēhi pīpe. Evocoyase che amboyecua che yeroyasa oime vahe che rembiapo pīpe ndeu” ahera.

<sup>19</sup> Nde niha aipo, “Che aicua oime ñepēi Tũpa” ere. Supi eté aipo ere. Co rumo caruguar avei oicua. Ichui osiquiyepave rumo ahe orīri eté yuvīreco.

<sup>20</sup> ¡Mbia, tapeico eme ndayaracuai vahe! ¿Ereicua vo co nde mbahe apoēhisa nde yeroyasa ãgüe ehi tēi vahe?

<sup>21</sup> Esepia, Tũpa oip̄isi yande ramoi Abraham seco tuprīsa pīpe oicuavēhese porerecosa nungar guahir Isaac chupe aracahe.

<sup>22</sup> Indó, Abraham yeroyasa omboyecua ité güembiapo catuprī reseve. Evocoyase ãgüe ehi ahe güembiapo tuprī pīpe omboaviye tuprī oyeroyasa oico aracahe.

<sup>23</sup> Ëgüe ehi yaviye icuachiaprī aipo ehi vahe: “Abraham viroya ité Tũpa, evocoyase, ‘Co seco catuprī vahe’ ehi Tũpa ip̄isi” ehi. Ahese ava, “Abraham Tũpa mboripar ité” ehi yuvīreco chupe.

<sup>24</sup> Indó, Tũpa, “Co seco catuprī vahe” ehi ava upe sembiapo tuprī repiase yepi, ndahei iyeroyasa rese güeraño.

<sup>25</sup> Ëgüe ehi tuprī avei cuña ndip̄ihai vahe Rahab upe. Esepia, ahe omoingue ñuvirío ava ivī repiase imondoprī güēta pīpe, ipare oñomi imondo ambuae perī rupi yamotarēhisar sui. Ipīpe sui Tũpa oip̄isi inungar-ra seco ivī tuprī vahe viña.

<sup>26</sup> Ëgüe ehi yande rembiapo catuprī ndayamboyecuaise yande yeroyasa pīpe, ahe inungar avei Espiritu ndasecoise yande rese, yande yeroyasa evocoyase omano tēi eté oico.

### 3

*Yande ñehe resendar*

<sup>1</sup> Che rivīreta, yip̄indar ndapeyeapoi chira setá eteprī oporombohe vahe peyepãhuve. Esepia, peicua niha yande oporombohe vahe yaicose, Tũpa oporandu catu itera ambuae ava sui yande porombohe agüer rese yandeu curi.

<sup>2</sup> Opacatu yande yayavī setá mbahe rese yepi. Oimese que ava ndoyavī vahe oñehe, ahe ava seco ivī tuprī vahe. Iyavei oicua tuprī opacatu güeco rereco tuprī ãgua.

<sup>3</sup> Inungar acoi yamondose cavayu yuru penda sese seroguata ãgua. Ahese opacatu cavayu retocuer yaicatu imboyahuva ãgua.

<sup>4</sup> Inungar tupri avei carite guasu, yepe tuvicha iyavei yepe ivitu omoañi opĩratagüer pipe viña, serovasa rahimi pipe rumo seroguatasar omohivi-hiviño seraso güemimbotar rupi.

<sup>5</sup> Ëgüe ehi avei yande ãpecu, yepe chĩhimi tẽi viña, ipipe rumo yayapo tẽi mbahe tuvicha vahe ava upe. Inungar avei que tata chĩhimi vahe sui tẽi yuvi guasu opa ocai.

<sup>6</sup> Ëgüe ehi yande ñehesa tata nungar. Iyavei yande ãpecu pipe opacatu mbahe-mbahe tẽi yamombehu. ¡Evocoi mbahe-mbahe tẽi mombehusar yande resendar ité! Ahe amove ovireco mara opacatu yande recocuer. Inungar tata ova-ova vahe mbahe rese. Evocoi yande ñehese tẽisa caruguar suindar.

<sup>7</sup> Ava oicatu opacatu mbahe mĩmba nimasoi vahe mboaracua ãgua, vĩrai, mboi iyavei mbahe ipi para guasu pipendar avei no.

<sup>8</sup> Ndipoi eté rumo que ava oipoepi vaherã oñehese. Yandeu ndiyai eté ipoepi ãgua. Yande ñehesa oporoyuca vahe nungar ité yepi, mbahe tẽi eté.

<sup>9</sup> Co yande ãpecu pipe yamboetei yande Yar Tũpa, ipipe avei rumo yamomara ava, ahe ava rumo Tũpa oyapo onungar.

<sup>10</sup> Ëgüe ehi eté, yande ñehese pipe yamboetei Tũpa, ipipe avei yaroĩro ava. Che rivireta, ndiyai evocoi nungar mbahe yayapo yepi.

<sup>11</sup> ¿Oicatura pĩha osẽ ñepe i ohẽ vahe sui sẽhe vahe, iro vahe avei viña?

<sup>12</sup> ¿Ihara pĩha higuera ivira rese aceituna viña? ¿Iyavei oicatura pĩha uva hi rese oha higo viña no? ¡Aní, ndoicatu eté! Iyavei ndoicatu ñepe i ohẽ vahe sui osẽ i, sẽhe vahe sẽhe asi vahe reseve.

### *Mbahecuasa supi eté vahe*

<sup>13</sup> Acoi oimese pe pãhuve yaracua vahe, oyapisaca vahe, tomboyecua catu güeco catuprisa, güeco mbegüesa avei ombahecuata tuprisa pipe.

<sup>14</sup> Oimese rumo pe pĩhave pe poroamotarẽhisa mbahe pota raisa pipe, iyavei peyeupe nara tẽi mbahe peseca, ahese ndiyai peyembovĩha tupri tẽi 'che yaracua vahe aico' pe yapave. Esepia, peremira tẽira supi eté vahe mbahe rese.

<sup>15</sup> Ëgüe ehi eté evocoi nungar aracuasa ndahei Tũpa suindar. Ahe rumo co ivi pipendar tẽi vahe, ava pĩhañemoñeta sui tẽi osẽ vahe iyavei caruguar suindar tẽi avei.

<sup>16</sup> Esepia, poroamotarẽhisa yande mbahe pota raisa pipe yarecose iyavei yaipotase mbahe yandeyeupe nara tẽi, ichui osẽ ñehespoepisa iyavei opacatu mbahe tẽi.

<sup>17</sup> Acoi vireco vahe rumo Tũpa suindar aracuasa, ahe vireco itera opacatu ava rovaque güeco maranehisa iyavei secoira güeco mbegüesa pipe. Ahe ndaseco asii chiaveira. Iyavei oyemoingatu voi vahe, ahe oporoparisuereco vahe, nomboyovirati vahe güecocuer. Ahe ipihañemoñetasa ñepe reseve vahe iyavei oyapo tupri vahe mbahe.

<sup>18</sup> Iyavei acoi oseca vahe mbahe tupri yepi, oipisi itera opĩha pipe teco ivisa.

## 4

### *Co ivi pipendar mbahe raisusa*

<sup>1</sup> ¿Que sui pĩha ou vavasa iyavei ñehespoepi-episa pe pãhuve? Ahe ou pe mbahe pota raisa sui pereco vahe pe pĩhañemoñetasa pipe.

<sup>2</sup> Pe peipota rai mbahe. Ipare rumo ndapeicatu sereco ãgua. Evocoyase peporoyuca pe mbahe pota raisa pipe. Ndiyai eté rumo pẽu sereco ãgua. Ipipe sui peyeecoãha, pevava avei no. Ndapeyosui eté rumo mbahe pe remimbotar. Esepia, ndapeporandui Tũpa upe.

<sup>3</sup> Acoi peporanduse rumo sese, ndapeipisi. Esepia, peporandu rai tẽi, peipota pe yembovĩha ãgua rese nara tẽi.

<sup>4</sup> ¡Pe mbia, peyavi vahe pe recocuer! ¿Ndapeicuai vo acoi ava Tũpa cuaparẽhi mboripar tẽi yuvirecoi vahe, ahe Tũpa amotarẽhimbar yuvirecoi? Ëgüe ehi eté acoi oipota vahe co ivi pipendar mbahe-mbahe tẽi pipe güeco ãgua, ahe oyeapo Tũpa amotarẽhimbar.



<sup>5</sup> Supi eté Tūpa Ñhengagüer aipo ehi: “Tūpa osaisu güecatēhisa pīpe o Espíritu omondo vahe yande pīha pīpe” ehi.

<sup>6</sup> Ahe rumo yande pītivīi catu oporoaisusa pīpe. Esepia, icuachiapri aracahendar pīpe aipo ehi: “Tūpa oyamotarēhi ava oyeecomboivate ai vahe. Oipītivīi rumo seco mbegüe vahe saisusave” ehi.

<sup>7</sup> Sese pemboyeroya catu Tūpa. Peyemoviracua carugar remimbotar apoēhi āgua. Ahese ahe oyepepira pe sui.

<sup>8</sup> Peyemboya Tūpa rese, ahe evocoyase oyemboyara pe rese. Pe, angaipa viyar, ¡peñemoatiro mbahe peyapo vahe sui! ¡Iyavei pemoatiro pe pīhañemoñetasa ñuvirío pereco vahe sui!

<sup>9</sup> ¡Tatasi pēu, tapeyaseho, perorivate iri eme, pemboasi pe angaipa pe yemboviharēhisave!

<sup>10</sup> Peñenopiha Yar rovai imboyeroysa pīpe. Ahe evocoyase pe reco mboivatera.

### *Peroiro eme pe mboetasa*

<sup>11</sup> Che rivireta, aní chira peñehe mara peyeupe. Acoi oñehe rai vahe iyavei viroiro vahe ambuae Jesús reroyasar, ahe oñehe rai tēi aveira mborocuita rese seroirosave. Ëgüe peyese, evocoyase seroyaēhisa pīpe peyemboivate catura mborocuita sui viña.

<sup>12</sup> Oime rumo ñepeño ité ombou vahe mborocuita yandeu iyavei oporandu vahe yande recocuer rese. Ahe güeraño avei oicatu oporopisiro iyavei oporomocañi āgua no. Evocoyase pe, ¡ndiyai pe cotindar reroiro āgua pēu!

### *Ndayaicuai mbahe oime vaherã yandeu ayihive*

<sup>13</sup> Pesendu pe aipo peye vahe: “Cūrītei, anise ayihive yasora que tecuave, anise que tecua guasuve revo. Aheve yaicora ñepe araviter yande poraviqui āgua. Ahese yamogana catura guarepochi” aipo peye vahe.

<sup>14</sup> ¡Ndapeicuai rumo mbahe oime vaherã pēu ayihive! ¿Mara ehi pīha yande recocuer? Ahe inungar ivichi oyecua raimi tēi vahe, ipare opaño ocañi.

<sup>15</sup> Iyacatu aipo peyera viña: “Oipotase yande Yar yande reco āgua, yayapora co nungar mbahe, que ambuae mbahe” peyera yepi.

<sup>16</sup> Pe rumo peñeño pe yemboivate aisa pīpe mbahe pe rembiaporã rese. Opacatu evocoi nungar mbahe rumo naporai.

<sup>17</sup> Esepia, acoi oicua vahe mbahe tupri apo āgua, ipare rumo ndoyapoi eté, ahe oyapo angaipa.

## 5

### *Imbahe eta vahe paraisusa resendar*

<sup>1</sup> ¡Pe mbahe yar, pesendu co: peyaseho iyavei perãse! Esepia, peiporarara mbahe tēi peico.

<sup>2</sup> Opacatu pe mbahe eta ocañi tēi vaherã. Esepia, pe mbahe pe reco ati vahe opa ituyu. Iyavei pe turucuar yayi vahe opa avei ohu sasoi.

<sup>3</sup> Pe oro, pe guarepochi opa opochi ati-ati no. Ahe niha pe recoãha āgua, omboyecua vahe mbahe tēi pēu. Iyavei pe mbahe pota raisa ndoyavīi pe roho ocai vahe vireco. Esepia, pemonuha guasu tēi mbahe pereco ati vahe sereco co ari ipa vahe pīpe.

<sup>4</sup> Peyapisaca, acoi oipoho vahe mbahe pēu nara yuvireco, chupe ndapemboepii eté. Sese sāsé tēi yuvireco. Ahe rumo yande Yar ipiratá vahe, ivate catu vahe oicua.

<sup>5</sup> Co ivi pīpe tēi pe peyecomoiendiyai peico iyavei peyembovīha co ivi pīpendar mbahe rese inungar guaca imonguirapri yuca āgua. Ipīpe peyemoingatū pe cañi āgua.

<sup>6</sup> Pe ñehe pīpe pemombaraisu ava ndoyapoi vahe mbahe yuvireco; yepe, “Mara” ndehi yuvireco pēu viña, pe rumo peyucaño.

*Ñemosasa iyavei yeroquisá resendar*

<sup>7</sup> Che rívíreta, peñemosañó yande Yar yeví iri água rese. Inungar ava omaheti vahe osãro rane güemiti poho água. Esepia, ahe osãro yípíndar oquí vahe iyavei ipa oquí vahe mbahe miti avíye água.

<sup>8</sup> Pe avei peñemosañó, peyemonguerēhi catu. Esepia, cōimi eté yande Yar yeví água cute.

<sup>9</sup> Iyavei che rívíreta, peñemoiroi rene peyeupe. Evocoyase Tūpa ndoporandui chira co mbahe rese pēu. Esepia, mborerecuar guasu iva pendar oyemoingatu voi ohã yandeu porandu água.

<sup>10</sup> Che rívíreta, peico catu inungar Tūpa ñehe mombehusar aracahendar yuvirecoi vahe. Ahe oñemosañó mbahe rasícuer upe yande Yar rer pipe oñehe água yuvireco.

<sup>11</sup> Yande rumo yaicua sovasapri ava oñemosá vahe mbahe rasícuer upe yuvireco. Pesendu niha pe acoi mbía Job serer vahe ñemosasa. Ipare peicua avei mbahe avíye vahe yande Yar oyapo chupe. Yande Yar niha oporoparisuereco vahe.

<sup>12</sup> Che rívíreta, peyapisaca tupri catu co che ñehe rese. Pe ñehe água ndapeiporui chiera que iva rer iyavei que ambuae mbahe pe ñehe reroya uca água. Iyacatu rumo, “Supi eté” peyese, supiño itera; “Aní” peyese, aní chiño itera Tūpa poronupasa pisiēhi água.

<sup>13</sup> Aviyeteramo que pe pãhu pendar iparaisura oico; toyeróqui. Aviyeteramo oimera que sorivete vahe oico; ahe tosapucai Tūpa upe.

<sup>14</sup> Aviyeteramo que ava imbaheasira oico, toñehe evocoyase Jesús reroyasar rãrosar upe. Ahe tomondo aceite yande Yar rer pipe yuvireco sese. Ipare tovíroyeroquí yuvireco.

<sup>15</sup> Acoi oyeróquise oyeroyasa pipe sese yuvireco, imbaheasi vahe evocoyase ocuerara; yande Yar avei omopuhara. Acoi angaipa vírecose, oime aveira ñerosa chupe.

<sup>16</sup> Sese pemombehu pe angaipa peyeupe, peyeroquí avei peyese pe yembogüera tupri uca água. Ava avíye vahe oyeróquise oquerēhisave opacatu güecocuer pipe, ahe iyeroquisá ipĩratá ité.

<sup>17</sup> Acoi Tūpa ñehe mombehusar Elías yande nungar avei. Ahe oporandu oyeróquisa pipe Tūpa upe, “Toquí eme” ehi. Aipo ehise, ndoquí eté iví haríve mbosapí aravíter imombitesa rupi.

<sup>18</sup> Ipare oyeróqui iri, ahese oquí iyavei mbahe miti iha iri.

<sup>19</sup> Che rívíreta, acoi oimese oyahuva vahe supi eté vahe sui pe pãhuve, ipare ambuae víroyevise Jesús upe,

<sup>20</sup> tapeicua pe acoi víroyeví vahe angaipa viyar secocuerai sui, oipĩsiro ihã imano rãgüer sui. Iyavei omoime ñerosa tuvichá vahe yangaipa upe. Aipo rupive.

## PEDRO REMBICUACHIA YIPINDAR VAHE SAN PEDRO

### *Pedro mahenduhasa Jesús reroyasar opacatu rupi oñemosai vahe upe*

<sup>1</sup> Che, Pedro, Jesucristo apóstol aicuachía co che ñehe pëu, pe Tūpa rembiporavo pe recua pipe sui peñemosai vahe ivi Ponto, Galacia, Capadocia, Asia iyavei Bitinia rupi peico vahe upe.

<sup>2</sup> Supi eté pe yande Ru Tūpa rembiporavo yipisuive peico semimbotar rupi. Evo-coiyase oEspíritu Santo pipe pe peha oyeupe nara viroyasar pe reco āgua ‘imoatiroprī toyuvirecoi che Rahir ruvi pipe oangaipagüer sui’ oya. Peipisi catu Tūpa porovasasa pe reco tupri āgua.

### *Tūpa suindar mbahe aviye vahe rãrosa*

<sup>3</sup> ¡Imboeteipri tasecoi Tūpa, yande Yar Jesucristo Ru! Ahe niha oporoparisuerecosa pipe yande recocuer mbopiasu. Ëgüe ehi yandeu Guahir Jesucristo ocuerayevise. Ipipe sui yaicuaño ité oimera mbahe aviye vahe Tūpa suindar yandeu.

<sup>4</sup> Ipipe sui avei Tūpa oipisi ucara pëu pe mombahesa ivave yapocatupri nocañi vaherã, ndituyui vaherã iyavei ndopai vaherã ité.

<sup>5</sup> Pe peyeroya ité Tūpa rese. Sese niha ahe opĩratasa pipe pe repi mbahe tēi sui poropĩsirosa pe reco āgua. Ahe vireco vahe imoingatupri ari ipa vahe mboyecua āgua pëu.

<sup>6</sup> Co rese peyembovihareteño peico, yepe cūritei pe reco pipe peparaisu pucu raimi tēi setá pe recoāhasa pipe peico viña.

<sup>7</sup> Esepia, pe yeroyasa Tūpa rese aviye oro, ahe sãhasa tata pipe yepi. Ëgüe ehi aveira pe recocuer sãhambri tata nungar mbahe yavai vahe pipe, “¿Aviye vahe ité pĩha?” hesave. Yañemosase evocoi mbahe yavai vahe upe, ahese yande yeroyasa aviye catura oro ocañi tēi vaherã sui. Ëgüe yahese, “Che rese pe yeroyasa aviye ité” ehira yande Yar yandeu. Ahese yarecora teco porañetesa iyavei imboeteipri yaicora acoi Jesucristo oyevise curi.

<sup>8</sup> Pe niha pesaisu yande Yar Jesucristo, yepe ndapesepiai viña; cūritei rumo sepiaēhi pipe peyeroya sese. Sese pereco ité pe viharetesa tuvichá, aviye catu vahe, ndapeicatui vahe ahe imombehu.

<sup>9</sup> Esepia niha, pesupiti pe remiaro poropĩsirosa apirēhi vahe peico pe yeroyasa pipe.

<sup>10</sup> Aracahe suive ava Tūpa ñehe mombehusar oicua tupri pota ité co poropĩsirosa resendar yuvireco ‘¿mara ehi eté pĩha co tecocuer?’ oyapave yuvireco. Iyavei oñemoñeta yuvireco Tūpa oporoaisusa pipe pëu mbahe ombou vaherã rese.

<sup>11</sup> Cristo Espiritu senondeve oicua uca mbahe Tūpa ñehe mombehusar upe aipo ehi: “Poropĩsirosar oyemombaraisu ranera, ipare rumo teco orisa porañete vahe oimera” ehi chupe aracahe. Sese, “¿Umara pĩha evocoi mbia?” ehi; “¿Mbahesera vo oimera co Espiritu remimombehu yandeu?” ehi yuvireco.

<sup>12</sup> Tūpa rumo omboyecua chupe, ndahei chupe nara ité imombehupri yuvireco, pëu nara ité rumo. Ahe avei niha poropĩsirosa resendar ñehesa mombehusar omombehu pëu cūritei, Espiritu Santo pĩratasa pipe imbouprī iva pendar yandeu. ¡Tūpa rembiguai avei oicua tupri pota tēi cūritei yuvireco viña!

### *Tūpa yande poravo yande reco maranehi āgua*

<sup>13</sup> Sese pe pihañemoñeta tuprisa pipe pemahemoha tuprira peyese Tūpa porovasasa pëu ombou vaherã rese pe yeroya catu āgua acoi Jesucristo oyevise curi.

<sup>14</sup> Tahir iporeroya vahe pe recosa pipe ndapeicoi chira mbahe pe remimbotarai pipe, acoi pereco vahecuer peyese Tūpa recocuer cuaēhi viteseve.

<sup>15</sup> Peicora rumo pe reco maranehisa p̄ipe ité. Esepia, Tūpa pe poravo oyeupe nara; ahe ndaseco marai vahe ité.

<sup>16</sup> Supi eté icuachiap̄ri aracahendar p̄ipe aipo ehi imombehu: “Pe tapeico seco maranehi vahe. Esepia, che ndaseco marai vahe aico” ehi.

<sup>17</sup> Tūpa niha opacatu ava upe secocuer rese nomboyoavirat̄i chira oporandu curi, sese pe, “Che Ru” peye vahe chupe peyembosiquiyera mbahe t̄ei apoēhi āgua imboeteisave co ivi p̄ipe peico v̄itese.

<sup>18</sup> Esepia, Tūpa pe p̄is̄iro aracahendar pe ramoi suindar aracuasa ēḡüe ehi t̄ei vahe sui. Peicua tup̄ri ité niha co porop̄is̄irosa rep̄ri nimboep̄isai eté que mbahe ocañi t̄ei vahe r̄ã p̄ipe inungar oro, anise guarepochira viña.

<sup>19</sup> Imboep̄isa rumo Cristo ruvi maranehi p̄ipe. Ahe seropov̄ēhep̄ri, inungar ovesa nimarai vahe.

<sup>20</sup> Ahe Tūpa oiporavo aracahe ivi, iva apoēhi v̄iteseve ēḡüe ehi vahe r̄ã. Cūritei rumo oyemboyecua p̄ēu mbahe tup̄ri āgua.

<sup>21</sup> Secocuer sui niha peroya Tūpa peico, ahe omboḡüerayevi vahe omano vahe p̄āhu sui, ipare omondo oyemboeteisa, ḡüeco porañetesa avei chupe. Ip̄ipe sui peyeroya Tūpa rese iyavei pes̄aro co mbahe aviye vahe p̄is̄i āgua ichui.

<sup>22</sup> Cūritei Tūpa Ñehengaḡüer supi tup̄ri vahe mboyeroyasa p̄ipe imoat̄irosa pe recocuer pes̄aisu vahe r̄ã ambuae Jesús reroyasareta. Evocoyase ēḡüe peyera peyeaisu catu opacatu pe p̄ihañemoñeta tup̄risa p̄ipe, iyavei opacatu pe p̄iratasa p̄ipe.

<sup>23</sup> Pe niha pereco tecovesa p̄iasu, ndahei pe yesupa omano t̄ei vahe suindar. Ahe rumo Tūpa Ñehengaḡüer supi tup̄ri ap̄ir̄ēhi vahe reroya p̄ipe.

<sup>24</sup> Esepia, icuachiap̄ri aracahendar p̄ipe aipo ehi:  
“Opacatu ava inungar caha, iyemboeteisa evocoyase inungar ipotri.  
Ipare ahe caha opa omano, ipotri avei opa oviapi;

<sup>25</sup> Tūpa Ñehengaḡüer rumo ap̄ir̄ēhi vahe r̄ã ité yepi” ehi.  
Ahe co ñehesa imombehup̄ri porop̄is̄irosa resendar p̄ēu nara.

## 2

<sup>1</sup> Sese peseya opacatu mbahe naporai vahe; opacatu porombopasa t̄ei, pe reco tup̄ri angahu t̄eisa, ambuae ava mbahe pota raisa, iyavei opacatu mahechiroi resendar.

<sup>2</sup> Inungar p̄itanimi ocuacua āgua oipota cambi; ēḡüe peye aveira pe quer̄ehisa p̄ipe Tūpa Ñehengaḡüer rese pe yembohe catu iri āgua, peico tup̄ri āgua porop̄is̄irosa p̄ipe,

<sup>3</sup> que peicua itese yande Yar reco aviyesa.

### *Cristo inungar ita ndopai vahe*

<sup>4</sup> Peyemboya catu yande Yar rese. Ahe inungar ita ndopai vahe. Ava rumo ov̄iroñroño yuv̄ireco. Tūpa rumo ahe ita oiporavo aviye catu vahe.

<sup>5</sup> Ēḡüe ehira pe rereco oyeupe inungar ita ndopai vahe; ip̄ipe sui omopuhara ot̄ūparoguā pe rese. Iyavei pahi ndaseco marai vahe nungar peicora semimbotar rupi chupe. Pe evocoyase Jesucristo rembiapo p̄ipe sui peyapora Esp̄iritu upendar mbahe aviye vahe. Ahe inungar mbahe seropov̄ēhep̄ri aviye vahe Tūpa upe.

<sup>6</sup> Esepia, icuachiap̄ri aracahendar p̄ipe aipo ehi:  
“Che amondo ñepe i ta nungar ava aviye vahe tecua Sión ve imov̄iracua āgua.  
Ahe che rembiporavo iporañete vahe, imboeteip̄ri.  
Acoi oyeroyá vahe sese, ahe noch̄i chietera ichui” ehi.

<sup>7</sup> Pe seroyasar peico vahe upe evocoi ita aviye vahe ité. Seroyasar̄ehi upe rumo imboaviyesa co ñehesa aipo ehi vahe:

“Oĩ aposar rumo v̄iroñroño co ita yuv̄ireco.  
Ahe ita rumo coiye v̄iracuasa aviye catu vahe”

ehi.

<sup>8</sup> Iyavei omboaviye aipo ñehesa:

“Co ita oipihapi oiti uca ava” ehi. Esepia, Tūpa suindar ñehesa reroyaēhi pipe sui oyemondo uca mbahe tēi pipe yuvireco. Ēgüe ehi vaheṛā ité rumo ahe secocuer yuvireco.

<sup>9</sup> Pe rumo ava oyesuindar nungar iporavopri peico Tūpa uve nara, imborerecuasa upendar pahi, iyavei chupendar ava seco maranehi vahe peico. Ēgüe peye Tūpa reco pīratasa mombehu āgua peico. Esepia, ahe pe renose pītumimbisa nungar pe recocuerai sui tesapesa aviye vahe pipe pe reique āgua.

<sup>10</sup> Yipindar ndahe vitei eté Tūpa upendar ava peico, cūritei rumo ahe ité peico; yipindar ndaperecoi Tūpa poroparisuerecosa, cūritei rumo pereco ité cute.

### *Peico catu Tūpa mboetei āgua*

<sup>11</sup> Che rivireta, che rembiaisu, peico raimi tēi vahe co ivi pipe, pepoi opacatu co ivi pipendar pe pihañemoñeta raisa sui. Esepia, pemomara uca tēi pe recocuer ipipe.

<sup>12</sup> Pereco tupri pe recocuer aviye vahe ava Tūpa ndoicua vitei vahe rovaque. Yepe ava remieroïro peico inungar-ra mbahe tēi aposar viña, osepiase rumo pe rembiapo catupri, omboeteira Tūpa yuvireco ahe ari pipe acoi yande Yar oporanduse opacatu ava recocuer rese curi.

<sup>13</sup> Yande Yar raisusa pipe pemboyeroya opacatu pe rerecuar co ivi pipe: que mborerecuar guasu ivate catu vahe,

<sup>14</sup> anise yivirindar. Ahe pe recua pipendar rārosar imondopri ava naporai vahe mombaraisu āgua, iyavei ava seco catupri vahe upe, “Aviye nde recocuer” he āgua.

<sup>15</sup> Esepia, Tūpa oipota pe peyapora mbahe aviye vahe ava mbahe ndoicuai vahe upe, ndayaracuai vahe upe pe rese iñehe-ñehe tēiēhi āgua.

<sup>16</sup> Peico tupri ava rovaque mbiguai tēi nungar sui senosepri pe recosa pipe. Ndiyai rumo ipipe peyapo iri mbahe tēi. Peico tuprira rumo Tūpa rembiguai pe recosa pipe.

<sup>17</sup> Pemboeteira opacatu ava. Pesaisu catu pe rivireta Jesús reroyasar; pemboetei Tūpa; pemboyeroya avei mborerecuar guasu.

### *Yembohesa yande Yar Jesucristo mombaraisu agüer resendar*

<sup>18</sup> Pe, ava rembiguai, pemboyeroya catu pe rerecuar imboeteisa pipe que seco catupri vahe, que ndaseco pōrai vahe avei.

<sup>19</sup> Esepia, aviye catu yañemosase mbahe-mbahe tēi ava rembiapo upe Tūpa mboyeroya tupriisa pipe.

<sup>20</sup> Mbahe tēi aposa pipe rumo pe mombaraisuse yuvireco, ndipoi eté evocoyase ichui mbahe aviye vahe peñemosase evocoi nungar mbahe upe. Co rumo acoi mbahe tupri aposa pipe pe mombaraisuse yuvireco, ipare peñemosase chupe, ahe rumo aviye catu itera Tūpa upe.

<sup>21</sup> Pe paraisu āgua rese niha Tūpa pe poravo. Esepia, Cristo oyemombaraisu pe recocuer rese. Ahe rane ēgüe ehi pe rese pe secocuer moña āgua.

<sup>22</sup> Ahe ndoyapoi vahe ité angaipa iyavei ndoporombopai vahe ité.

<sup>23</sup> Acoi ava iñehe mara-mara tēise yuvireco chupe, nomboyevii eté iñehe raisa. Iyavei acoi omombaraisuse yuvireco, “Ayepira sese” ndehi eté. Ahe rumo, “Che Ru Tūpa seco ñivi vahe oicudara chupe yuvireco” ehiño oyeupe mbahe-mbahe tēi aposar upe.

<sup>24</sup> Cristo teieté viraso yande angaipagüer güete pipe curusu rese ‘toyepipi angaipa sui yuvireco. Ipipe sui toyuvirecoi teco ivisave’ oyapave yandeu. Ahe niha yapichapri secoi pe recocuer moingatü āgua.

<sup>25</sup> Esepia, pe niha yipindar inungar ovesa ocañi tēi vahe peico viña. Cūritei rumo peyevi Cristo upe. Ahe pe recocuer osāro cūritei inungar ovesa rārosar.

## 3

*¿Mara ehira ava omenda vahe recocuer yuvireco?*

<sup>1-2</sup> Ëgüe peye aveira cuña, pemboyeroya itera pe mer. Esepia, amove ndoviroya vitei Tüpa Ñehengagüer yuvireco; pemboyecuase rumo pe reco tuprisa imboeteisa avei chupe, aviyeteramo ahe avei viroyara, yepe ndapeñehei chira chupe viña.

<sup>3</sup> Acoi pemboyecua potase pe yemoporañetesa ndahei chira pe rete rese inungar oãca rese mbahe omoporañete ai vahe, ndahei chiaveira pe yemondesa sendi yai vahe oro nungar, que turucuar porañete catu vahe.

<sup>4</sup> Iya rumo pe aviter pipe sui mbahe porañete ipocopi vahe pemboyecua pe reco mbegüemisa iyavei pe recoasiëhisa pipe. Evocoi nungar aviye catu ité Tüpa rovaque.

<sup>5</sup> Ëgüe ehi avei cuña seco catupri vahe güeco porañetesa imboyecua aracahe. Ahe oyeroya Tüpa rese yuvireco, omer avei omboyeroya yuvireco.

<sup>6</sup> Inungar Sara aracahe, omboyeroya ité omer Abraham, “Che yar” ehi chupe. Pe inungar ichuindar peico peyapose mbahe aviye vahe pe siquiyeëhisa pipe.

<sup>7</sup> Iyavei pe imer, pereco mbegüera pe rembireco upe. Pemboeteira sereco. Esepia, ahe nipirata tupri, iyavei Tüpa omboura güeco tuprisa pipe tecovesa apirëhi vahe oyoya voi pëu. Ëgüe peyese, Tüpa osendu itera pe yeruresa.

*Paraisusa mbahe tupri aposa rese*

<sup>8</sup> Iyavei na peyera pe opacatu peyese inungar ñepeï oñemu vahe. Oyoya tupri mbahe tapeyandu. Peyeaisu catura Jesús reroyasar pe recosa pipe. Peyemboavara oyeupe pe reco mbegüesa pipe.

<sup>9</sup> Oyapose ava que mbahe tëi pëu, anise que oñehe raise, ndapemboyevi chira chupe. Iyacatu rumo mbahe tuprisa pipe pemboyevira chupe. Evocoi nungar mbahe apo ägua niha Tüpa pe poravo ‘toipisi che porovasasa’ oyapave.

<sup>10</sup> Esepia,

“Peipotase pe recocuer aviye tupri ägua pe yemboviharetisa pipe, pemombituhu pe ñehe raisa iyavei ndapeporombopai chira.

<sup>11</sup> Pepoi aveira mbahe tëi sui, pesecara mbahe aviye vahe.

Peseca teco tuprisa peyeupe nara, peguata supi.

<sup>12</sup> Esepia, supi eté, yande Yar osãro ava seco catupri vahe iyavei osendu oyeupe yeruresa. Ava mbahe tëi aposar rumo ndoipisi eté” ehi.

<sup>13</sup> Ndipoi chira revo que ava mbahe tëi oyapo vahe pe recocuer upe yuvireco, pequerëhise mbahe aviye vahe apo.

<sup>14</sup> Peparaisuse rumo mbahe pe rembiapo aviye vahesa rese, jsovasapri peico! Peyembosiquiyei rene que ava sui.

<sup>15</sup> Pemboeteiñora rumo Cristo pe Yar secosa rese pe piha pipe. Peyemoingatu voira ava pe remiaro rese oporanduse pëu pe querëhisa pipe imombehu tupri ägua.

<sup>16</sup> Ëgüe peyera rumo pe reco mbegüesa pipe imboeteisave. Peico tuprira pe pihañemoñeta tupri rereco. Acoi que oñehe rai vahe pe Cristo reroyasa recocuer rese, ahe yuvinochira oñehe sui curi.

<sup>17</sup> Tüpa oipotase pe yemombaraisu, aviye catu mbahe aviye vahe apo pipe yepi mbahe tëi apo rägüer sui.

<sup>18</sup> Esepia niha, Cristo teieté omano yande angaipa repirã ñepeï reseve. Güeco maranehi pipe ëgüe ehi ava recocuerai rese opacatu pe reraso ägua Vu Tüpa upe. Ahe omano güete rese. Ipare rumo ocuerayevi güeco espíritu pipe.

<sup>19</sup> Güeco espíritu pipe avei oso, omombehu Vu Tüpa remimbotar ava hã soquendapri yuvirecoi vahe upe.

<sup>20</sup> Ahe ava Noé recosendar ndiporeroyai vahe yuvireco aracahe. Tūpa osāro güeco mbegüesa pipe secocuer moingatu āgua viña Noé oyapo vitesese arca oico. Ahe ipipe oñepisiro ochomi tēi yuvireco amarusu sui.

<sup>21</sup> Ahe i osāhangapo i poroāpiramosa, ahe omboyecua yande ipīsipropi yande recosa. Poroāpiramosa rumo i pipe ndahei yande rete moatiro āgua. Co rumo yaporandura Tūpa upe, yande pīhañemoñetasa moatiro āgua. Ipipe sui evocoyase yañepisirora yande Yar Jesucristo cuerayevisa pipe.

<sup>22</sup> Ahe oso ivave oguapi oī Vu acato coti. Opatatu sembiguai eta, mborerecuareta, opacatu imborerecuasa ipirata vahe avei ipovri pendar yuvirecoi.

## 4

### *Yandehañeco yandeyese mbahecuasa Tūpa suindar yaipisi vahe pipe*

<sup>1</sup> Cristo oiporara mbahe rasicuer güete rese. Pe avei evocoyase peyemoingatu voi ěgüe peye vaherā peico chupe nara. Esepia, acoi ava oyemomborara vahe güete pipe oseya angaipa yuvireco.

<sup>2</sup> Ipipe sui ndoyuvireco iri chira ari rupi ava tēi pīhañemoñetasa pipe. Tūpa remimbotar rupi eté rumo oyapo pota mbahe co ivi pipe yuvirecoi vitesese.

<sup>3</sup> Ěgüe peye pucu rane niha pe rembiapo ai pipe peico ava Tūpa reroyasarēhi recocuer nungar rupi tupri. Ahese mbahe-mbahe tēi peyapo pe pīhañemoñeta raisa pipe, savaiposa, pietasave pe rāse tēi pipe pe aracuasa pemocañi pe ihu tēisa pipe, pemboetei avei mbahe rahanga tēi peico.

<sup>4</sup> Cūrítei rumo pe mboriparer, ndoyembovihai tēi pe rese, ndapeico irise supi semimbotarai apo āgua. Ahe oñehe-ñehe tēi yuvireco pe recocuer piasu rese.

<sup>5</sup> Ahe chupe rumo oimera porandusa. Esepia, yande Yar oyemoingatu opacatu ava recocuer rese oporandu āgua omano vahe upe, oicove vite vahe upe avei curi.

<sup>6</sup> Sese niha co ñehesa pīsirosa resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirā, iespíritu rumo yuvirecoi apirēhi inungar Tūpa.

<sup>7</sup> Virovi rumo ari ipa vahe oico, sese pe yapisacasa pipe pepīhañemoñeta tupri iyavei peyerure catuño ité pe yeroya tuprisa pipe.

<sup>8</sup> Co catu opacatu tupri ité peyeaisura pe pīha pipe. Esepia, ěgüe yahera poroaisusa pipe yande ñero voira seta ava yangaipa vahe upe.

<sup>9</sup> Peipisi tupri ava yuviraso vahe pe rētave; “¿Mbahe rese pīha co ou?” peyei rene pe pīhañemoñeta pipe pe piri ou vahe upe.

<sup>10</sup> Ñepeipei yande yaiporura Tūpa suindar mbahecuasa yareco vahe ambuae Jesús reroyasar rese hañeco tupri āgua. Yaiporu tupri co Tūpa porovasasa setá vahe yande cuaita mboaviye tupri āgua.

<sup>11</sup> Acoi pemombehuse Tūpa suindar mbahe, pemombehura inungar iñehe ité; acoi peporopitívii potase, peyapoño opīratasa pēu Tūpa ombou vahe pipe. Opatatu mbahe peyapo vahe peyapo ‘tomboetei ava yuvireco Tūpa yande Yar Jesucristo rembiapo pipe sui’ pe hesa pipe. Esepia, chupendar ité imboeteisa iyavei imborerecuasa. Ěgüe tehi apirēhi vaherā ité.

### *Yemombaraisusa Cristo reroyasar yande recosa pipe*

<sup>12</sup> Che rivireta, che rembiaisu, ndapeyesapiha ucai chira, acoi oimese mbahe-mbahe tēi yande recoāhasa pēu ‘ndoyavii, ndipoi chietera evocoi nungar mbahe cheu viña’ pe hesa pipe.

<sup>13</sup> Yayembovihareteñora rumo ipipe. Esepia, yande rereco yande Yar yemombaraisu agüer nungar pipe yuvireco. Evocoyase yayemboviharete itera acoi yande Yar oyevisse güeco pīratasa pipe.

<sup>14</sup> Iñehe marase yuvireco pëu Cristo reroyasar pe recosa rese, sovasapri peico. Esepia, Tūpa Espíritu güeco porañetesa pipe secoi eté pe rese.

<sup>15</sup> Acoi pe pāhu pendar omombaraisuse yuvireco, ndahei chira rumo iporapichisa rese, ndahei chiaveira imondasa sui, que mbahe tēi aposa rese. Ndahei chiaveira que ambuae ava mbahe rese iñemañeco tēisa sui ěgüe ehira serecosa.

<sup>16</sup> Co rumo acoi peparaisuse Cristo reroyasar pe recosa pipe, ndapechĩ chietera. Pesapucaira rumo Tūpa upe imboeteisa pipe serer pereco vahe rese.

<sup>17</sup> Esepia, oyepota ité ari Jesús reroyasar upe rane ité tecocuer rese porandu āgua. ěgüe ehise yandeu, mbahe tēi catu itera Jesús reroyasarēhi upe.

<sup>18</sup> Yavaise seco catupri vahe upe iñepisiro āgua, ¿mara ehira pīha ava ndaseco pōrai vahe ava angaipa viyar yuvirecoi vahe upe?

<sup>19</sup> Sese peyemomborarase Tūpa remimbotar rupi, iyacatu peguataño itera mbahe aviye vahe pipe. Iyavei peyemondo itera yande Aposar upe ahe pe hā rāro āgua. Esepia, ahe niha yeroyasa ité secoi.

## 5

### *Aracuasa Jesús reroyasar upe*

<sup>1</sup> Che amboaracua pota pe pāhu pendar Jesús reroyasar rārosar. Inungar avei niha che aico iyavei asepia vahe ité yande Yar mombaraisu agüer. Inungar ahe vireco teco orisa, ěgüe ahe aveira acoi yande Yar oyevise curi.

<sup>2</sup> Pesāro tupri catu Tūpa upendar ava eta pe remiaro co omondo vahe pëu inungar ovesa rese yangarecuar osāro tupri vahe ovesa; peyapora pe querēhisa pipe ité. Ahe niha Tūpa oipota, ndahei ambuae yande cuaisa pipe tēi, ndahei avei guarepochi pota raisave yayapo. Yayapora rumo mboraviqui yande querēhisa pipe ité.

<sup>3</sup> Ndapeicoi chira pe remiaro upe inungar que mborerecuar güeco ivatesa pipe oporocuai pīrata vahe. Pemboyecuaru rumo pe recocuer aviye vahe chupe imbohesa tupri pipe.

<sup>4</sup> Evocoyase acoi oyevise yande Yar, yande rārosar ivate catu vahe, ahese peipisira mbahe porerecosa, teco ori porañete apirēhi vahe.

<sup>5</sup> Iyavei no pe mbia chīhivahe, pemboyeroyara ava pe rārosar peico. Iyavei opacatu peyemboyeroyara pe reco mbegüesa pipe peyeupe peico. Esepia, “Tūpa ava oyeecomboivate ai vahe amotarēhimbar secoi; ava seco mbegüemi vahe upe rumo ombou oporovasasa” ehi.

<sup>6</sup> Peyecomombegüe catu peico Tūpa pīratasa povrive. Evocoyase pe reco mboivatara curi.

<sup>7</sup> Opacatu mbahe rese pe pīhañemoñeta atisa pemombehura Tūpa upe. Esepia, ahe pe rārosar ité secoi.

<sup>8</sup> Pearacua cañi rene peyesui, pemahemoha ari rupi peyese. Esepia, pe amotarēhimbar Carugar pe reco momara pota yepi inungar yaguar oñaro vahe oguata tēi oporoeca ‘tamomara ava’ oyapave.

<sup>9</sup> Sese peyemoviracuara Tūpa rese pe yeroyasa pipe Carugar upe. Esepia, peicua niha opacatu rupi avei yande rivireta Tūpa rese yuvirecoi vahe iparaisu co nungar mbahe pipe.

<sup>10</sup> Peparaisumi pare rumo, Tūpa teieté pe reco mohivi tuprira, iyavei pe reco moviracuara, pe momirata aveira pe yepipi iriēhi āgua ichui. Ahe niha oporovasasa pipe yande poravo oyeupe nara, yande yaso vahe rā supi teco ori ndopai vahesave yande Yar rese yande recosa pipe.

<sup>11</sup> ěgüe tehi tasecoi güeco pīratasa apirēhi vahe pipe.

### *Mahenduhasa ipa vahe*



<sup>12</sup> Yande rĩvri Silvano omboaviye tupri vahe ité ocuaita yepi, ahe che pĩtĩvĩsa pipe co ayapo imondo che rembicuachía ndipucuimi vahe pe mboaracua catu ãgua ‘ĩpipe toicua tupri catu yuvireco co porovasasa oĩpisi vahe, supĩ eté omboyecua vahe Tũpa poroaisusa’ che hesave. ¡Peyemoviracua tupri ité sese!

<sup>13</sup> Iyavei Babilonia pendar Jesús reroyasar yuvirecoi vahe oyoya vahe pe rese iporavopri, ahe ombou omahenduhasa yuvireco pẽu. Marcos, che rahir nungar avei imahenduha pe rese.

<sup>14</sup> Peyeovaupite “avirave” apo pe yeaisusa pipe.

Tapereco tecocuer tupri yande Yar Jesucristo rese peico vahe. Aipo rupive.

## IMONUVIRIOSA PEDRO REMBICUACHIA SAN PEDRO

### *Pedro mahenduhasa Jesús reroyasar upe*

<sup>1</sup> Che, Simón Pedro, apóstol, Jesucristo rembiguai aico. Co aicuachía che ñehe pëu nara, pe peipisi vahe yande Yar rese pe yeroyasa aviye vahe inungar ore. Esepia, yande Yar Tüpa, yande Písirosar Jesucristo seco ñvi vahe yuvirecoi.

<sup>2</sup> Tapeipisi catu porovasasa iyavei teco tupri Tüpa, yande Yar Jesús cua tupri pipe.

### *Jesús reroyasar recocuer*

<sup>3</sup> Tüpa ombou güeco pĩrata pipe opacatu mbahe ipane vahe yande recove água, sese yande pihañemoñeta catu água avei yande secocuer cua tupri pipe. Ahe yande poravo güeco porañetesa pipe, güemiapo porañete vahe pipe avei.

<sup>4</sup> Ipipe avei oseyá oñehe imboavíepirã yandeu; ahe ñehe ègüe ndehi tẽi vahe, aviye catu vahe ité. Co yandeu ñehesa pipe sui perecora Tüpa reco aviye vahe peyese pe yepipi água mbahe tẽi sui. Ahe acoi oime vahe co ñvi pipe ava remimbotar tẽi sui.

<sup>5</sup> Sese pe peyeroya vahe Jesús rese, peyemomirata catu aveira peyapo vaherã mbahe aviye vahe. Peseca aveira Tüpa remimbotar cua tupri catu água.

<sup>6</sup> Iyavei peñearo tupri. Ipare peñemosañõ aveira mbahe tẽi upe. Ipipe sui peyemondo tupri catura Tüpa upe.

<sup>7</sup> Ipare peyeaisura peyeivri nungar pe recosa pipe. Ipipe sui peseca catu viterã ava raisu tupri água.

<sup>8</sup> Esepia, perecose evocoi nungar mbahe pe recocuer pipe, pembouvicha catuse avei, ahese pe recocuer ègüe ndehi tẽi chira, peicua tupri catu aveira yande Yar Jesucristo.

<sup>9</sup> Acoi ndovirecoi vahe rumo evocoi nungar mbahe oyese, ahe oyeapo inungar ndasesapiso vahe, anise mbahe ndosepia tupri vahe, sesaraiño oangaipa rese ñero agüer sui.

<sup>10</sup> Sese che rivireta, peyemoviracua catu Tüpa pe renoisa mboyecua água iporavopri pe recosave. Ègüe peyese, ndapevĩapi chietera mbahe tẽi pipe.

<sup>11</sup> Evocoi nungar pipe sui pe pisi tupri omborerecuasa ndopai vahe pipe yande Yar, yande Písirosar Jesucristo.

<sup>12</sup> Sese niha opomomahenduhã itera evocoi nungar mbahe rese, yepe peicua, peicoveño avei mbahe supi tupri vahe rese.

<sup>13</sup> Aviyeño itera revo che recove vitesese opomomahenduha vite co aracuasa rese.

<sup>14</sup> Esepia, yande Yar Jesucristo oicua uca cõimi che mano água cheu.

<sup>15</sup> Opombohera rumo opacatu che catugüer rupi co tecocuer rese che manore pe mahenduha água.

### *Co osepia vahe ité Jesús mborerecuasa yuvireco*

<sup>16</sup> Co porombohesa oromombehu vahe pëu yande Yar pĩratasa resendar, iyevi iri água resendar avei, ndahei oreyesui tẽi. Ore rumo orosepia vahe ité ore resa pipe yande Yar mborerecuasa.

<sup>17</sup> Orosepia niha yande Ru Tüpa omboeteise Guahir iyavei omondose chupe seco porañete iri água aipo ehise oñehe güeco porañetesa pipe: “Co che Rahir, che rembiaisu ité, sese niha che ayembovĩharete vichico” ehise.

<sup>18</sup> Ore ité niha aipo ñehesa orendu iva suindar oroicose yande Yar rupi ivitri imboeteipri vahesave.

<sup>19</sup> Ahe ñehesa omboyecua catu ñehesa arachendar Tüpa ñehe mombehugar remi-mombehugüer supi tupri vahe Cristo resendar. Iya ité pëu pe yapisaca tupri água sese;

inungar que tataendi pītusave osesape vahe oico acoi osēse voi cōhe rerusar yasitata guasu ou, ēgüe ehi co ñehesa pe piha pipe sesape.

<sup>20</sup> Peicua catu co mbahe, co ñehesa aracahendar icuachiapri Tūpa suindar ité, ndahei yandeyesui tēi yaicua imombehu āgua.

<sup>21</sup> Esepia, ndahei iñehe mombehusar oyesui tēi omombehu yuvireco. Ahe rumo ava seco catupri vahe ité. Tūpa ité omombehu uca oñehe chupe Espiritu Santo pīratasa pipe aracahe.

## 2

### *Oporombopa vahe porombohesa*

<sup>1</sup> Yuvirecove rumo aracahe porombohesar oporombopa tēi vahe Israel ivi rupi. Oime aveira niha pe pāhuve co nungar oporombopa tēi vahe yuvireco. Ahe ñemisa pipe oporombohera co coti tēi vahe ava reco momara tēi āgua; evocoiya güeco pipe oicucañora oyar opīsīrosar. Co rumo güecocuer momba pihaivi āgua tēi ēgüe ehira yuvireco.

<sup>2</sup> Setá ava oguatara secocuerai rupi. Ipīpe sui ambuae ava oñehe rai tēira porombohesa supi tupri vahe rese yuvireco.

<sup>3</sup> Mbahe pota raisa pipe pe mbopara yuvireco co porombohesa co coti tēi vahe rese. Icañi rumo oimeño itera yuvireco chupe. Yipisuive ité niha ahe imocañipirā yuvirecoi.

<sup>4</sup> Esepia, aracahe Tūpa niñeroi eté güembigui oyemboangaipa vahe upe. Ahe opa ité omondo mbahe tēsive. Ēgüe ehi seyapa pītumimbisave, inungar ñapichimbri carena pipe yapocatupri yuvireco cañisave nara.

<sup>5</sup> Iyavei acoi Tūpa niñeroi avei ava aracahendar ndaseco pōrai vahe ivi pipe yuvirecoi vahe upe. Omocañi ité amarusu pipe ahe ava yuvireco. Noé acoi omombehu vahe tecocuer ihīvi vahe resendar iyavei ava siete yuvirecoi vahe supindar, ahe güeraño ité oipīsīro.

<sup>6</sup> Iyavei opa omocañi tata pipe tecua Sodoma, Gomorra avei; ēgüe ehi imbotanimbu tupri ‘na ahe aveira niha ambuae ava che reroyaēhisar upe curi’ ohesave.

<sup>7</sup> Lot güeraño rumo ahese oipīsīro. Ahe mbia aviye vahe secocuer; ndoyembovīhai tēi ambuae ava recocuer mbahe-mbahe tēi yuvirecoi vahe repiase.

<sup>8</sup> Co mbia aviye vahe secoise ahe ava pāhuve ari rupi, tasi tēi ipihañemoñeta pipe osepiase, osenduse avei mbahe tēi yuvirecoi vahe rembiapo.

<sup>9</sup> Índó, yande Yar oicua viroyasar renose āgua mbahe tēi sui; oicua avei mbahe tēi pipe yuvirecoi vahe rereco imombaraisu āgua ari cañise curi.

<sup>10</sup> Tūpa omombaraisu catu itera acoi ndopoi vahe güemimbotarai sui, viroiro vahe yande Yar mborerecuasa, oyecomboivate ai vahe güemimbotar aposa pipe, acoi osiquiyeēhisa pipe oñehe rai vahe seco ivate, ipīrata vahe rese.

<sup>11</sup> Tūpa rembiguai eta iva pendar rumo yepe ipīrata catu vahe, omborerecuasa vireco catu vahe avei yuvireco viña, niñehe-ñehe tēi rumo Yar rovai yuvireco sese.

<sup>12</sup> Co ava mbahe mimba nungar tēi ndovirecoimi eté opihañemoñetasa yuvireco. Opoco voiño tēi mbahe rese; evocoi nungar yuviroha yucapirā tēi eté. Ahe oñehe rai tēi vahe mbahe güemienducuaēhi rese. Mbahe mimba nungar tupri avei rumo omanora yuvireco güecocuerai pipe.

<sup>13</sup> Oyemombaraisu uca ambuae ava mombaraisusa pipe sui tēi, “Yayembovīha mbahe yande rembiapo ai rese” ehi tēi eté yuvireco viña. ¡Oporomochi pipe tēi rumo yuvirecoi, yuvirasose pe pietasave pe piri, güeco rai reseve oyembovīha oporombopasa tēi pipe yuvireco!

<sup>14</sup> Osepiase cuña, oipota voiño tēi; ndaporambai avei iyemboangaipasa chupe. “Yayapoño mbahe” ehiño ndoyembohe catui vahe upe. Evocoi nungar oyembohe-mbohe catu mbahe pota raisa reca āgua oyeupe yuvireco. Ava ocañi tēi vaherā yuvirecoi.

<sup>15</sup> Ocañi tēi secocuer yuvireco Tūpa ñehe mombehusar Beor rahir Balaam recocuerai nungar pipe. Esepia, oyepepi tecocuer aviye vahe sui mbahe tēi apo āgua guarepochi pota raisa pipe yuvireco.

<sup>16</sup> Tūpa rumo oyaca yangaipa rese guaricu omoñehe ucase ava ñehe pipe chupe. Ahese ramo opoi oaracuaēhisa sui.

<sup>17</sup> Co ava oporombohe vahe inungar ivicuar ipiru vahe. Iva quiha ivitu remimombo nungar tēi avei. Apirēhi vahe ité imombopirā yuvireco pītumimbi catu vahesave nara.

<sup>18</sup> Esepia, oñehe tupri ai angahu tēi ava monguerēhi āgua ava pihañemoñeta raisa rupi seroyevi āgua. Ipipe sui ombopa tēi ahe ava seco catupri pota vahe yuvireco evocoi nungar mbahe tēi pipe iyevi iri āgua.

<sup>19</sup> “Opacatu mbahe apo yaicatu yande reco pipe” ehi tēi yuvireco. Ahe ae rumo mbiguai tēi nungar yuvirecoi güecocuerai apo pipe. Esepia, noyuvinose catui eté ichui. Supi eté, yayapoño itese que mbahe tēi, ahe evocoyase mbiguai nungar ité yande rereco uca.

<sup>20</sup> Esepia, acoi oicua vahe yande Yar, yande Pīsīrosar Jesucristo yuvireco, ipipe oyepepi co ivi pipendar mbahe-mbahe tēi sui, oyeiti uca irise rumo co nungar mbahe tēi pipe, ichui ndoicatu iri yuvinose. Ipare mbahe tēi catu yipindar secocuer sui yuvireco chupe.

<sup>21</sup> Oyeupe Tūpa porocuita imondopri aviye vahe cua pare oyepepise ichui, aviye catura revo ndoicuaise co tecocuer ihivi vahe yuvireco viña.

<sup>22</sup> Supi tupri ité yaviye ñehesa sesendar: “Cave rumo ohu iri ogüēhe. Iyavei cuchi oyasu pare, oyevi iri tuyuve oyemboavaete āgua” ehi vahe.

### 3

#### *Yande Yar yevisa*

<sup>1</sup> Che rivireta, che rembiaisu, co aicuachía iri che ñehe pēu. Ipipe opomopihañemoñeta tupri uca pota che pe mboaracuasa pipe.

<sup>2</sup> Peyemomahenduha aracahendar Tūpa ñehe mombehusar seco catupri vahe ñehengagüer rese, yande Yar Poropīsīrosar porocuita rese avei acoi apóstol pe mbohe vahecuer yuvireco.

<sup>3</sup> Peicua ranera co ari imombehupri ipa vahe vīrovise, oimera ava ahe oviroñora co tecocuer aviye vahe Tūpa suindar güemimbotarai pipe yuvireco

<sup>4</sup> aipo ehira, “¿Marase tēi vo aipo oura Tūpa Rembiporavo imombehupri ou vaherā curi? Esepia, yande ramoi opa tēi omano yuvireco. Cūritei opacatu ahe tupriño tēi tecocuer aracahe ivi apo suive” ehi tēira yuvireco.

<sup>5</sup> Ahe nimahenduha potai yuvireco co aracahendar rese. Esepia, Tūpa oyapo oñehe pipe iva, ivi avei, ahe ivi osē vahe i sui, i pāhuve avei secoi.

<sup>6</sup> Coiye i pipe avei opa omocañi ivi, ombouse amarusu aracahe.

<sup>7</sup> Cūriteindar rumo iva, ivi imoingatupri tata uve nara Tūpa porocuita rupi. Evocoi tata pipe avei ocañi tēira ava mbahe tēi aposar yuvirecoi vahe curi.

<sup>8</sup> Che rivireta, che rembiaisu, peresarai rene co mbahe sui: yande Yar upe ñepei ari inungar mil araviter; mil araviter evocoyase inungar ñepei arimi tēi chupe.

<sup>9</sup> Esepia, yande Yar ndiaracahei eté oñehe mboaviye āgua; inungar amove ava, “Iharacahe tēi” ehi yuvireco viña. Ahe rumo aviye etepri güeco mbegüesa pipe yandeu. Esepia, ndoipotai que ñepei yepe yande cañi tēi āgua; ahe rumo oipota opacatú tupri ité yande recocuer ñecuñaro āgua.

<sup>10</sup> Yande Yar ari yande resapiha tēira inungar imonda rai vahe ou pītu pipe yepi. Ahese iva ocañi tupri tēira viapugüer ipīrata vahe pipe curi. Opacatu mbahe yapopri opara yuvirocai. Ipipe sui co ivi opacatu ipor reseve ocañi tēi etera.

<sup>11</sup> Opacatu ité niha co mbahe yapopri ocañi tēi vaherā. Sese, ¡peyemoviracuaño itera pe reco maranehisa rese Tūpa rese pe pihañemoñetasa pipe!

<sup>12</sup> Pesãroño Tũpa yepotasa resendar ari, iyavei peyapo opacatu peicatugüer rupi ‘toyepota poyava voi’ pe yapave. Ahe ari pipe iva opara ocañi tẽi eté tata pipe. Ipipe sui opacatu mbahe yapopri ticupa tuprira curi.

<sup>13</sup> Yande rumo yasãro ité iva, ivi ipiasu vahe Tũpa remimombehu. Aheve opacatu ava yuvirecoira güeco aviyesa pipe.

<sup>14</sup> Sese che rembiaisu, pesãro viteseve co tecocuer, ãgüe peyera opacatu peicatugüer rupi pe reco tupri ãgua pe angaipaẽhi pipe, pẽu Tũpa, “Peyavi mbahe” ehiẽhi ãgua.

<sup>15</sup> Tapeicua co: yande Yar seco mbegüe yandeu yande pĩsiro ãgua. ãgüe ehi avei yande rembiaisu Pablo icuachía oyeupe Tũpa ombou vahe mbahecuasa pipe pẽu.

<sup>16</sup> Opacatu ocuachiar pipe omombehu evocoi nungar mbahe pẽu, yepe amove yavai senducua ãgua yuvireco viña. Sese amove ndoyemoviracua tupri vahe yande Yar rese iyavei ndoyemboaracua tupri vahe, ahe co coti tẽi virova ñehesa, inungar oyapo ambuae ñehesa icuachiapri Tũpa suindar rese. Ipipe güecocuer omocañi tẽi ahe.

<sup>17</sup> Che rivri, che rembiaisu, peicua ité niha evocoi mbahe; sese peñearo tuprira pe yembopa ucaẽhi ãgua ava ndiporeroyai vahe upe Tũpa rese pe recocuer yemoviracuasa sui pe yepipiẽhi ãgua.

<sup>18</sup> Peicua tupri catura rumo yande Yar Poropĩsirosar Jesucristo iyavei peicoveño itera iporovasasa pipe. ¡ãgüe tehi imboeteipri tasecoi cũritei apirẽhi vaheerã! Aipo rupive che ñehe pẽu.

## JUAN REMBICUACHIA YIPINDAR VAHE SAN JUAN

### *Ñehesa tecovesa resendar*

<sup>1</sup> Co cuachiar pipe oromombehu pëu co yipisuive secoi vahe. Ahe orosendu, orosepia avei ore resa pipe ité iyavei oropoco ité sese. Ahe niha Tūpa Ñehesa tecovesa resendar.

<sup>2</sup> Co tecovesa oyemboyecua, orosepia iyavei ahe secocuer oromombehu. Ahe tecovesa apirēhi oromombehu vahe pëu. Ahe Vu rese secoi vahe oyemboyecua vahe oreu.

<sup>3</sup> Oromombehu co orosepia vahe, orosendu vahe ñepi vahe nungar pe reco āgua ore rese inungar ore oroico yande Ru Tūpa rese, Tahir Jesucristo rese avei.

<sup>4</sup> Evocoyase cūritei oroicuachía evocoi mbahe pëu yande yemboviharere catu āgua.

### *Tūpa tesapesa secoi*

<sup>5</sup> Iyavei Jesucristo ore mbohe co ñehesa rese, ahe oromombehu pëu: yande Ru Tūpa niha tesapesa secoi; ndipoi eté pītumimbisa sese.

<sup>6</sup> “Che aico tupri Tūpa rese” yahese, yaicoño rumo angaipa pipe, ahe inungar pītumimbi vahe, ahese yande remira tēi iyavei ndayayapoi mbahe supi tupri vahe.

<sup>7</sup> Yaicose rumo tesapesa pipe inungar yande Ru Tūpa secoi tesapesa, evocoyase yaico tupri yandeyupe. Iyavei suvi yande moatiro opacatu angaipa sui.

<sup>8</sup> Iyavei, “Ndarecoi angaipa che piha pipe” yahe tēise, yande ae yayembopa ipipe. Evocoyase mbahe supi eté vahe ndayarecoi yandeyese.

<sup>9</sup> Acoi yamombehuse yande angaipagüer Tūpa upe, ahese ahe omboura oñeroisa yande angaipa rese yandeu iyavei omoatirora opacatu mbahe-mbahe tēi yande sui. Esepia, ahe seco iivi vahe.

<sup>10</sup> Iyavei, “Che ndacheangaipai eté” yahe tupri tēise yaico, evocoyase Tūpa semirañete ai vahe nungar yareco. Ipipe ndayaroyai iñehengagüer.

## 2

### *Jesucristo yande reco moingatusar*

<sup>1</sup> Che rahireta, co aicuachía pëu pe angaipaēhi āgua. Que revo ava oime oyemboangaipa vahe pe pāhuve, yareco rumo yande Pītivisar yande Ru rovai. Ahe Jesucristo, seco iivi vahe.

<sup>2</sup> Ichui oime avei ñeroisa yande angaipa rese yandeu iyavei opacatu ava uve. Esepia, ahe omano curusu rese yande angaipa mocañi āgua yande sui.

<sup>3</sup> Acoi yayapo tuprise Tūpa porocuita, ahese supi eté yaicua Tūpa.

<sup>4</sup> Oime amove ava “che aicua Tūpa” ehi vahe; nomboaviyei rumo iporocuita. Ahe semirañete ai vahe, ndovirecoi mbahe supi tupri vahe oyese.

<sup>5</sup> Acoi yamboaviyese iñehengagüer, ahese supi eté yasaisu Tūpa. Ipipe sui yaicua yande reco tupri Jesucristo rese.

<sup>6</sup> Acoi “aico tupri Tūpa rese” ehi vahe, ahe secoira Jesucristo nungar.

### *Mborocuita ipiasu vahe resendar*

<sup>7</sup> Iyavei, che rivireta, ndaicuachiai mborocuita ambuae ipiasu vahe pëu. Aheño ité mborocuita pereco vahe yipisuive. Ahe acoi yipindar pesendu vahe.

<sup>8</sup> Co aicuachía vahe rumo ogüeru mborocuita ipiasu vahe. Ahe supi eté tesapesa Jesucristo vireco vahe iyavei pereco vahe avei. Esepia, pītumimbi opara. Tesapesa evocoyase osesape.

<sup>9</sup> Oime amove ava “che aico tesapesave” ehi angahu tēi vahe; oyamotarēhiño rumo ambuae omboetasa Tūpa reroyasar. Evocoi nungar recocuer pītumimbisave tēi vite.

<sup>10</sup> Acoi osaisu vahe ambuae omboetasa Tūpa reroyasar, ahe secoi tesapesave. Sese nomboangaipa ucai omboetasa.

<sup>11</sup> Acoi ndoyambotai vahe omboetasa, pītumimbisa pīpe tēi secoi, ndoicuai avei que rupi güecocuer virecora. Esepia, pītumimbi vahe nomboesapisoi.

<sup>12</sup> Che rahireta, co aicuachía pēu nara. Esepia, Tūpa iñero pe angaipa rese pēu Jesucristo recocuer pīpe.

<sup>13</sup> Pe, yesupa peico vahe upe co aicuachía. Esepia, peicua yīpīsuive oicove vahe. Aicuachía avei pēu, mbīa chīhivahe. Esepia, pesecopī Carugar.

<sup>14</sup> Iyavei pe tahireta aicuachía opacatu pēu. Esepia, peicua vahe niha yande Ru Tūpa. Aicuachía avei pēu, pe iyepia. Esepia, peicua yīpīsuive oicove vahe. Aicuachía avei pēu, mbīa chīhivahe. Esepia, peyemovīracua etepri, peipīsi avei Tūpa Ñehengagüer pe pīha pīpe. Ipīpe pesecopī Carugar.

<sup>15</sup> Evocoyase pesaisu eme co mbahe tēi ivi pīpendar. Acoi ava co mbahe tēi osaisu vahe, ahe ndosaisui yande Ru Tūpa yuvireco.

<sup>16</sup> Esepia, opacatu co mbahe tēi ndahei yande Ru Tūpa suindar; ahe rumo co ivi pīpendar suindar. Ahe niha opacatu yande pīhañemoñeta raisa, yaipota vahe sese yamahese, iyavei opacatu yande rembiereco rese yande yemboivate ai tēisa.

<sup>17</sup> Co ivi pīpendar mbahe tēi iyavei ava mbahe pota raisa opa pota ité ocañi. Acoi ava oyapo vahe rumo Tūpa remimbotar, yuvirecoira apirēhi vaherā ité.

### *Mbahe supi eté vahe iyavei mbahe ndahei vahe supi*

<sup>18</sup> Che rahireta, co ari ipa vahe ité yandeu. Iyavei acoi pesendu “oura Jesucristo amotarēhimbar” ehi vahe, ahe cūrītei setá oyemboyecua yamotarēhimbar yuvireco. Sese yaicua ari ipa vahe yepota āgua.

<sup>19</sup> Ahe oyepepi yande pāhu sui; ndahei eté rumo yande rīvri yuvireco Tūpa rese. Esepia, acoi yande rīvri itese, ahese opītara yande pīri yuvireco viña. Ēgüe ehi oyecua ndahei opacatu yande rīvri yuvirecoi.

<sup>20</sup> Cristo omondo Espīritu Santo pēu. Sese opacatu pe peicua mbahe supi tupri vahe.

<sup>21</sup> Pe niha peicua co mbahe supi eté vahe. Sese aicuachía co pēu. Esepia, mbahe supi eté vahe sui ndoui temira.

<sup>22</sup> Acoi “Jesús ndahei Poropīsīrosar imboupri” ehi vahe, ahe semira tēi vahe, yamotarēhimbar yuvirecoi. Ahe niha ndovīroyai Tu, Tahīr avei yuvireco.

<sup>23</sup> Acoi ava “evocoi ndahei Tūpa Rahīr” ehi vahe, ndovirecoi Tu oyese yuvireco. Acoi “evocoi niha Tūpa rahīr” ehi vahe rumo, ahe vireco yande Ru Tūpa oyese yuvireco.

<sup>24</sup> Sese yīpīsuive pesendu vahe ñehesa peyapocatu pe pīha pīpe. Ēgüe peyese, ahese peico tuprīra Jesucristo rese, Tu rese avei.

<sup>25</sup> Esepia, Jesucristo aipo ehi: “Pe perecora co tecovesa apirēhi vahe peyese” ehi yandeu.

<sup>26</sup> Sese co ava pembopa pota vahe resendar aicuachía pēu.

<sup>27</sup> Pe pereco Espīritu Santo Jesucristo ombou vahe pēu. Sese ndiyai eté ambuae pe mbohera. Espīritu ae pe mbohe opacatu mbahe rese oico. Iporombohesa supi eté, ndoporombopai vahe. Sese peicoño Jesucristo rese Espīritu Santo pe mbohesa rupi.

<sup>28</sup> Iyavei che rahireta, peicoño ité Cristo rese yareco vaherā sese yande yeroyasa. Acoi ogüeyise iva sui curi, ahese nayachī chietera sovai ichui.

<sup>29</sup> Pe niha peicua Jesucristo seco ivi vahe. Iya peicua avei opacatu oyapo vahe mbahe ihīvi vahe, ahe Tūpa rahīr ité yuvirecoi.

## 3

*Tūpa rahir yuvirecoi vahe*

<sup>1</sup> Mara ehi rutei Tūpa yande raisu. Ahe aipo ehi yandeu: “Pe niha che rahireta peico” ehi, ahe supi eté aipo ehi. Sese niha co ava ndoviroyai vahe Tūpa, ndoicatu eté yande recocuer cua āgua. Esepia, ndoicuai Tūpa recocuer yuvireco.

<sup>2</sup> Che rīvireta, yaico ité Tūpa rahir. Yande rumo ndayaicua tupri vitei yande reco āgua ipare. Cūritei rumo co mbahe yaicua: acoi oyemboyecuase Jesucristo, yaicora inungar. Esepia, yasepia itera opacatu seco reseve.

<sup>3</sup> Iyavei opacatu osāro vahe Jesucristo yuvireco, oyepepiño ité opacatu angaipa sui güeco catupri āgua, inungar ahe secoi.

<sup>4</sup> Opacatu ava oyemboangaipa vahe, ahe oyavi Tūpa porocuaita. Esepia, angaipa Tūpa porocuaita mboaviyeēhisa yepi.

<sup>5</sup> Pe rumo peicua Jesucristo ou co ivi pipe yande angaipagüer mocañi āgua. Ahe niha ndovirecoi eté angaipa oyese.

<sup>6</sup> Opacatu ava sese yuvirecoi vahe ndoyapoi angaipa. Acoi ava yangaipa vahe rumo ndosepiai, ndoicuai avei secocuer yuvireco.

<sup>7</sup> Che rahireta, peyembopa uca eme ambuae ava upe, acoi oyapo vahe mbahe aviye vahe yepi, ahe secocuer aviye vahe ité inungar Jesucristo.

<sup>8</sup> Acoi oyapo vahe angaipa, ahe Carugar suindar. Esepia, Carugar yipisuive ité oyapo angaipa. Sese ou Tūpa Rahir Carugar rembiapo mocañi āgua.

<sup>9</sup> Opacatu yuvirecoi vahe Tūpa rese ndoyapoi angaipa. Esepia, ahe vireco ité Tūpa recocuer oyese yuvireco. Sese ndoicatu iri angaipa apo āgua yuvireco. Esepia, ahe Tūpa rahir ité yuvirecoi.

<sup>10</sup> Icuapri ité Tūpa rahir yuvireco, icuapri avei Carugar rahir yuvirecoi vahe. Esepia, acoi ndoyapoi vahe mbahe tupri iyavei ndosaisui vahe Tūpa reroyasar, ahe ndahei eté Tūpa rahir yuvirecoi.

*Yayeaisura ñepi-pei yande yacatu*

<sup>11</sup> Co niha ñehesa, acoi pesendu vahe yipisuive, ahe co yayeaisura ñepi-pei.

<sup>12</sup> Ndayaicoi chira inungar Caín, ahe Carugar remimbohe oyuca vīvri. ¿Mahera pīha oyuca? Esepia, tivri oyapo mbahe aviye vahe; Caín rumo oyapo mbahe naporai vahe.

<sup>13</sup> Che rīvireta, pepihañemoñetai rene Tūpa ndoicuai vahe pe reroīrose yuvireco.

<sup>14</sup> Yande rumo yaicua aracacondar yande hā cañi tēi agüer. Cūritei rumo yasē evocoi nungar sui tecovesa apirēhi vahe pipe yande reco āgua. Esepia, yande niha yasaisu yande rīvireta Tūpa rese yuvirecoi vahe. Acoi ndosaisui vahe rumo ahe ihā ocañi tēi vite ité yuvireco.

<sup>15</sup> Opacatu ava ndoyambotai vahe yande rīvri, ahe iporapichi serai vahe nungar. Pe rumo peicua ava iporapichi serai vahe ndovirecoi tecovesa apirēhi vahe oyese.

<sup>16</sup> Jesucristo niha omondo güecocuer manosave yande recocuer repirā. Ichui yande yaicua poroaisusa. Sese yande avei ēgüe tayahe yande rīvireta rese.

<sup>17</sup> Acoi ava vireco tēi vahe mbahe eta oyeupe nara, osepiaño tēi rumo vīvri upe mbahe ipane vahe, iyavei ndoipitivi, ahe ndovirecoi Tūpa poroaisusa oyese yuvireco.

<sup>18</sup> Che rahireta, yande poroaisusa rumo ndahei chira yande ñehe pipe tēi, iyacatu rumo yamboyecua mbahe yande rembiapo pipe.

*Yande yeroyasa yareco vahe Tūpa rovai*

<sup>19-20</sup> Ēgüe yahese, yande yaicua yande recocuer supi eté vahe pipe yaico. Acoi, “Ndahei revo Tūpa rahir aico” yahese, ahese Tūpa rovaque yayemomahenduhara evocoi nungar rese: “Tūpa niha tuvichá catu yande pihañemoñetasa sui. Ahe opacatu mbahe oicua.” Sese yayeroyara.



<sup>21</sup> Supi eté che rívíreta, yaicua itese yande p̄ha p̄pe yande reco tupri Tũpa rese, ahese yayeroyaño itera sovai.

<sup>22</sup> Ahe avei niha ombou opacatu mbahe yandeu yaporanduse chupe. Esepia, yamboyero ya iporocuaíta iyavei yayapo semimbotar yaico.

<sup>23</sup> Co ité iporocuaíta: yaroyara Tahír Jesucristo iyavei yayeaisura ñepei-pei Tũpa yande cuaisa rupi tupri.

<sup>24</sup> Acoi yaroyase iporocuaíta, ahese yaicora Tũpa rese; ahe avei secoira yande rese. Iyavei ahe ombou Espírítu yandeu. Ichui yaicua Tũpa secoi yande rese.

## 4

### *Espírítu Tũpa suindar iyavei espírítu Cristo amotarẽhimbar*

<sup>1</sup> Che rahireta, aní chira peroya opacatu “Espírítu p̄pe añehe” ehi vahe. Iyacatu rumo pesãha rane ‘¿Tũpa suindar ité p̄ha?’ pe hesa p̄pe. Esepia, setá vai oporombohe angahu tẽi vahe oguata opacatu ivi rupi yuvireco.

<sup>2</sup> Co rese peicuara ava Espírítu Tũpa suindar víreco vahe: “Jesucristo ou opacatu güete reseve” ehise, aipo ehi vahe víreco Espírítu Tũpa suindar ité.

<sup>3</sup> Acoi aipo ndehi vahe rumo, ndovirecoi eté Espírítu Tũpa suindar oyese. Ahe rumo víreco espírítu Cristo amotarẽhimbar tẽi. Aracaco niha pesendu ñehesa acoi yamotarẽhisar espírítu ou vaherã resendar. Ahe cūrítei secoi co ivi p̄pe.

<sup>4</sup> Che rahireta, pe rumo Tũpa suindar peico. Iyavei pesecopi ité acoi semira tẽi vahe peico. Esepia, Espírítu secoi vahe pe rese, ahe ip̄rata catu Carugar sui.

<sup>5</sup> Evocoi co ivi p̄pendar tẽi yuvirecoi vahe. Esepia, oñehe mbahe ivi p̄pendar rese tẽi yuvireco. Iyavei ava supindar ae ité oyapisaca ñehe rese yuvireco.

<sup>6</sup> Yande rumo Tũpa suindar yaico. Acoi oicua vahe Tũpa oyapisaca yande ñehe rese yuvireco. Acoi ndahei vahe Tũpa rahír, ahe yande ñehe ndosendu potai yuvireco. Sese yande yaicuara víreco vahe Espírítu supi eté vahe, yaicua aveira víreco vahe espírítu oporombopa tẽi vahe.

### *Tũpa oporoaisu vahe*

<sup>7</sup> Che rívíreta, che rembiaisu, yayeaisu ñepei-pei. Esepia, yeaisusa Tũpa suindar. Opacatu osaisu vahe ava, ahe Tũpa rahír, oicua ité avei Tũpa yuvireco.

<sup>8</sup> Acoi ndosaisui vahe ava, ahe ndoicuai Tũpa yuvireco. Esepia, Tũpa yeaisusa secoi.

<sup>9</sup> Ëgüe ehi omboyecua oporoaisusa yandeu. Ahe niha, ombou Guahír ñepei vahe co ivi p̄pe ichui yande recove ãgua.

<sup>10</sup> Ndahei yande rane yasaisu Tũpa. Ahe rane rumo yande raisu iyavei ombou Guahír imano ãgua yande angaipa repirã. Ahe niha poroaisusa supi eté vahe.

<sup>11</sup> Che rívíreta, che rembiaisu, ãgüe ehi Tũpa yande raisu. Evocoyase ãgüe yahe aveira yande yayeaisu ñepei-pei yepi.

<sup>12</sup> Ndipoi eté ava osepia vahe Tũpa. Yayeaisuse rumo, Tũpa secoi yande rese. Iporoaisusa evocoyase oime ité yande rese.

<sup>13</sup> Ahe ombou oEspírítu yandeu; ip̄pe sui yaicua sese yande reco iyavei yaicua ahe secoise yande rese.

<sup>14</sup> Iyavei orosepia vahe, oromombehu: yande Ru ombou Guahír ava ivi p̄pendar p̄siro ãgua.

<sup>15</sup> Acoi ava “Jesús niha Tũpa Rahír” ehi vahe, ahe secoi eté Tũpa rese; Tũpa evocoyase secoi sese.

<sup>16</sup> Ëgüe yahe icua, seroya tupri ãgua co Tũpa yande raisusa. Ahe niha yeaisusa. Acoi víreco vahe oporoaisusa, yuvirecoi avei sese; ahe avei secoi sese.

<sup>17</sup> Ëgüe yahe Tũpa poroaisusa mboaviye tupri ichui yande siquiyeẽhi ãgua acoi oye-potase ari cañi yandeu. Esepia, yande yaico co ivi p̄pe inungar Jesucristo.

<sup>18</sup> Yasaisu tupri itese Tūpa, ndipoi chira siquiyesa yandeu. Ēgüe yahese, opara siquiyesa yande sui. Esepia, cañisa sui oime siquiyesa yandeu. Sese acoi ava osiquiye ai vahe, ndoporoaisu tuprii eté.

<sup>19</sup> Yipindar Tūpa yande raisu. Sese cūritei yande avei yasaisu Tūpa.

<sup>20</sup> Amove ava aipo ehi tēi: “Che asaisu Tūpa” ehi. Ahe ramoseve rumo viroïro omboetasa Tūpa reroyasar. Evocoyase ahe semira tēi vahe. Esepia, acoi ndosaisui vahe omboetasa Tūpa reroyasar sepiase, ndoicatu Tūpa ndayasepiai vahe raisu āgua.

<sup>21</sup> Jesucristo ombou co porocuita yandeu: acoi osaisu vahe Tūpa, tosaïsu avei omboetasa seroyasar yuvireco.

## 5

### *Yande mbahe-mbahe tēi co ivi pipendar recopisa*

<sup>1</sup> Opacatu viroya vahe Jesús Tūpa Rembiporavo Poropĩsirosar seco rese, ahe Tūpa rahir yuvirecoi. Iyavei osaisu vahe ava, osaisu avei tahir yuvireco.

<sup>2</sup> Yande yasaisuse Tūpa, yayapose avei iporocuita, ahese yaicua yasaisu avei ava Tūpa rahir yuvirecoi vahe.

<sup>3</sup> Yamboaviyese Tūpa porocuita, ahese yamboyecua Tūpa raisusa yaico. Iyavei iporocuita ndahei yavaï etepri yapo āgua.

<sup>4</sup> Esepia, opacatu Tūpa rahir yuvirecoi vahe osecopi mbahe-mbahe tēi ivi pipendar Cristo rese yeroyasa pipe yuvireco.

<sup>5</sup> Acoi oyeroya vahe Jesucristo Tūpa Rahir secosa rese, ahe oicatu co ivi pipendar mbahe-mbahe tēi recopi āgua yuvireco.

### *Tūpa rahir recocuer resendar ñehesa*

<sup>6</sup> Co Jesucristo yusa icuasa i pipe ñapiramombrise: ndahei i reseño, suvi rese avei icuasa. Espiritu avei osecu mombehu. Esepia, ahe omombehu mbahe supi eté vahe yepi.

<sup>7</sup> Evocoyase oime mbosapi imboyecuar:

<sup>8</sup> Espiritu, i, iyavei suvi. Ahe mbosapi oyoya tupri.

<sup>9</sup> Yaroya revo ava remimombehu; Tūpa remimombehu rumo aviye catu vahe ité ichui. Esepia niha, ahe Guahir omombehu.

<sup>10</sup> Acoi viroya vahe Tūpa Rahir vireco ité ahe semimombehu opiha pipe. Acoi ndoviroyai vahe rumo Tūpa, semirañete ai vahe nungar tēi vireco. Esepia, ndoviroyai Tūpa ñehes Tahir resendar.

<sup>11</sup> Co Tūpa remimombehu: ahe ombou yandeu tecovesa apirēhi vahe. Co tecovesa Tahir rese secoi.

<sup>12</sup> Acoi oipisi vahe Tūpa Rahir opiha pipe, ahe vireco avei co tecovesa. Acoi ndoipisi vahe rumo, ndovirecoi eté tecovesa oyese.

### *Poromboaracuasa ipa vahe*

<sup>13</sup> Co aicuachía pēu, pe pereco vahe Tūpa Rahir, peicua āgua pe supi eté pereco tecovesa apirēhi.

<sup>14</sup> Yande rumo yayeroya co rese: yaporanduse mbahe rese Tūpa remimbotar rupi chupe, ahese ahe yande ñehes osendu.

<sup>15</sup> Evocoyase yaicua ahe osendu yande yeruresa, yaicua avei mbahe yande porandusa ombou vahrã yandeu.

<sup>16</sup> Acoi osepia vahe yande mboetasa Tūpa reroyasar oyemboangaipa vahe, ahe rumo ndahei manosave nara, oyerquirã sese. Evocoyase Tūpa omondora secove āgua chupe. Oime rumo angaipa ahe güeru manosa. Che, “Peyeroqui evocoi nungar angaipa rese” ndahei pēu.

<sup>17</sup> Opacatu mbahe-mbahe tēi ahe angaipa. Oime rumo angaipa ndayande rerasoi vahe manosave.

<sup>18</sup> Yaicua Tũpa rahĩr ndoyapoi angaipa yuvĩreco. Esepia, Tahĩr osãro evocoi nungar. Ichui Caruguar ndopocoi sese.

<sup>19</sup> Sese yaicua yande Tũpa rahĩr yaico. Iyavei opacatu ava ndovĩroyai vahe Tũpa, ahe Caruguar povri pendar tẽi yuvĩrecoi.

<sup>20</sup> Iyavei yaicua Tũpa Rahĩr ogũeru oaracuasa yandeu Tũpa supi eté vahe cua ãgua iyavei yaico co supi eté vahe rese. Ahe niha Tahĩr Jesucristo, ahe avei Tũpa supi eté vahe iyavei tecovesa apĩrẽhi vahe.

<sup>21</sup> Che rahĩreta, peñearo tupri tũpa angahu tẽi sui. Aipo rupive co che ñehesa amombehu pẽu.

## IMOÑUVIRIOSA JUAN REMBICUACHIA SAN JUAN

### *Mbahe supí eté vahe iyavei yeaisusa*

<sup>1</sup> Che, icuapri, aicuachía co che ñehe pëu pe Tūpa rembiporavo peico vahe opacatu eipeve peico vahe upe. Che niha supí eté opoaisu. Ndahei rumo che güeraño opoaisu, opacatu oicua vahe porombohesa supí eté vahe avei pe raisu yuvireco.

<sup>2</sup> Opoaisu ité mbahe supí eté vahe yande pīha pīpe yareco vahe rese. Ahe ndopai chivaherã ité.

<sup>3</sup> Yande Ru Tūpa, yande Yar Jesucristo, Tūpa Rahir, tombou oporovasasa, oporoparisuerecosa pëu nara. Tombou avei güeco tuprisa, güeco supí eté vahe pīpe oporoaisusa pīpe avei pëu.

<sup>4</sup> Che mboviharete aicuaase pe pāhu pendar yuvirecoi vahe güecocuer aviyesa pīpe. Esepia, ahe viroya porombohesa supí eté vahe yuvireco. Ahe niha yande Ru Tūpa porocuita yandeu.

<sup>5</sup> Iyavei, che rivireta, che rembiaisu, tayayeaisu catu ñepeipei. Co aicuachía vahe ndahei porocuita ipiasu vahe. Ahe niha acoi yipindar icuachiapri pëu.

<sup>6</sup> Co yande yeaisusa, yande guata tupri āgua Tūpa porocuita rupi. Co Tūpa porocuita yipisuive pesendu vahe, ahe omombehu yande yeaisu tupri āgua yandeu.

### *Iporombopa serai vahe resendar*

<sup>7</sup> Setá vai oguata ivi yacatu rupi oporombopa tēi vahe yuvireco. Ahe, “Jesucristo ou güete reseve” ndehi eté yuvireco. Ahe oporombopa tēi vahe Jesucristo amotarēhimbar yuvirecoi.

<sup>8</sup> Peñearo catu pe poraviqui repri mocañi tēiēhi āgua. Tapeipisi catu opacatu Tūpa porerecosa peyeupe nara.

<sup>9</sup> Oime ava oyepepiño vahe Cristo porombohesa sui. Ahe Tūpa ndovirecoi opīha pīpe yuvireco. Acoi oyapisaca tupri vahe Cristo porombohesa rese, ahe vireco Tūpa, Tahir avei oyese.

<sup>10</sup> Acoi oyepotase ava oporombopa tēi vahe pëu, ndovirecoi vahe co porombohesa, ndapeipisi chira pe rētave. Iyavei ndapemboaviravei chiaveira.

<sup>11</sup> Acoi pemboaviravese, pe avei pehara sembiapo pīpe.

### *Ñehesa ipa vahe*

<sup>12</sup> Che niha amombehu pota setá mbahe pëu. Namombehu potai rumo cuachiar pīpe. Che teieté aso pota pëu che ñehe āgua. Ahese yayemboviharetera oyese.

<sup>13</sup> Iyavei Tūpa rembiporavo oñemonuha vahe cohove opacatu omondo omahenduhasa yuvireco pëu. Aipo rupive co che ñehesa amondo pëu.

## IMOMBOSAPISA JUAN REMBICUACHIA SAN JUAN

### *Gayo recocuer aviye vahe resendar*

<sup>1</sup> Che, icuapri, aicuachía co che ñehe ndeu, che mboripar, che rembiaisu, Gayo. Che supi eté oroaísu yepi.

<sup>2</sup> Che rembiaisu, che rívrí, cūritei nde recocuer erereco tupri Tūpa rese. Che ayeroqui nde rese opacatu nde reco tupri āgua iyavei tipo eme mbaherasisa ndeu.

<sup>3</sup> Che aviharete asenduse yande rívrí ñehe nde recocuer resendar yugüeruse cohava. Ahe aipo ehi yuvireco cheu: “Evocoi Gayo oyemoviracua tupri mbahe supi eté vahe pipe” ehi yuvireco ndeu.

<sup>4</sup> Ndipoi eté niha ambuae ñehesa asendu vahe che mboviharete catu vahe que che rahireta oguatase co porombohesa supi eté vahe rupi yuvireco.

<sup>5</sup> Che rívrí, che rembiaisu, ereyapo tupri opacatu mbahe yande rívríreta upe iyavei ambuae tecua pendar oyepota vahe upe avei.

<sup>6</sup> Ahe omombehu ore ñemonuhasave opacatu nde poroaísusa resendar yuvireco oreu. Eyapo catu mbahe icatupri vahe; eipitívii catu chupe mbahe ipane vahe rese iguataño āgua Tūpa remimbotar rupi yuvireco.

<sup>7</sup> Esepia, ahe oguata yuvireco Jesucristo rer pipe. Ndoipisii eté rumo mbahe ipane vahe opitívii āgua yuvireco ava Tūpa reroyasarēhi sui.

<sup>8</sup> Sese yande ēgüe yahera yaico evocoi nungar upe ñehesa supi eté vahe rese ipitívii āgua.

### *Diótrefes recocuerai iyavei Demetrio recocuer aviyesa*

<sup>9</sup> Che aicuachía che ñehe eipeve Tūpa upe oñemonuha vahe upe cuese. Diótrefes rumo ndoviroyai ore mborerecuasa. Esepia, ahe oipota rai mborerecuar güeco āgua ipāhuve.

<sup>10</sup> Evocoiyase asose eipeve, amboaracuara opacatu Tūpa viroya vahe rovai sembiapo ai rese. Esepia, ahe oñehe-ñehe tēi ore rese, ndahei ahe güeraño, ndoipisi potai avei güētave yande rívríreta oyepota vahe. Iyavei ndoipotai ambuae upe ipisi āgua sētave. Acoi oipisise, omombo voiño ité ñemonuhasa sui.

<sup>11</sup> Che rívrí, che rembiaisu, ereicoi rene evocoi ava recocuer nungar. Ereicora rumo ava aviye vahe recocuer rupi. Esepia, oyapo vahe mbahe aviye vahe, ahe Tūpa suindar. Acoi oyapo vahe rumo mbahe naporai vahe, ahe ndoicuai vahe Tūpa.

<sup>12</sup> Opacatu, “Demetrio aviye ité” ehi yuvireco. Ahe supi eté aipo ehi; aipo avei ore oromombehu. Pe niha peicuaño ore oromombehu mbahe supi eté vahe.

### *Ñehesa ipa vahe*

<sup>13</sup> Che niha amombehu pota setá mbahe ndeu. Namombehu potai rumo cuachiar pipe tēi ndeu.

<sup>14</sup> Esepia, aso pota ité nde repia. Ahese voi yañemoñetara oyeovai eté.

<sup>15</sup> Eico tupri. Yande mboripar coha pendar omondo omahenduhasa yuvireco ndeu. Iyavei, eyapo mbahe icatupri vahe, emombehu nde teieté che mahenduhasa ñepei-pei yande mboripareta upe eipeve. Aipo rupive.

## JUDAS REMBICUACHIA SAN JUDAS

### *Judas mahenduhasa Jesús reroyasar upe*

<sup>1</sup> Che, Judas, aico Jesucristo rembiguai, Santiago rivri. Che aicuachía co che ñehe pëu. Pe niha yande Ru Tüpa rembiaisu semienoi peico. Jesucristo niha pe rãro opacatu mbahe-mbahe tēi sui.

<sup>2</sup> Tüpa tombou catu pëu pe paraisuerecosa pe reco tupri ãgua pe raisusa pipe.

### *Oporombohe vahe ava mbopa tēi ãgua resendar*

<sup>3</sup> Che rivireta, che rembiaisu, yipindar chepihañemoñeta ité yande pĩsirosa resendar cuachía ãgua pëu viña. Ipare rumo chepihañemoñeta iri: iyaño revo che aicuachía pe yemoviracua tupri catu ãgua yembohesa yaroya vahe rese. Ahe yembohesa yaroya vahe ñepeí reseve imondopri opacatu yandeu Jesucristo rese yaico vahe.

<sup>4</sup> Esepia, amove ava iporombopa serai vahe yuviroique mbegüe angahu pe pãhuve. Aracahe suive rumo Tüpa Ñehengagüer icuachiapri pipe omombehu evocoi nungar ava imocañisa tēira yuvireco. Ahe ava ndaseco pōrai vahe, “Tüpa aviye ité, ndoyapoi chietera mbahe yandeu” ehi tiēte yuvireco. Sese oyapoño mbahe tēi. Iyavei, “Jesucristo ndahei yande Rerecuar” ehiño tēi vahe yande Yar ñepeí vahe upe yuvireco.

<sup>5</sup> Che opomomahenduha pota iri acoi peicua tupri vahe rese. Yipindar yande Yar Tüpa vinose yande ramoi eta Egipto sui. Ipare rumo opa omocañi viroyasarēhi.

<sup>6</sup> Inungar avei Tüpa rembiguai yipindar vahe yuvirecoi, nomboaviyei vahe ocuaita. Ipipe sui Tüpa osoquenda pĩtumimbi ndopai vahesave ari cañise nara.

<sup>7</sup> Iyavei ava Sodoma pendar, Gomorra pendar iyavei ahe tecua ivirindar avei inungar acoi Tüpa rembiguai oyemondo mbahe tēi pipe, ahe avei oyemondo vahe oyemboaguasa-guasa tēi ãgua yuvireco. Iyavei cuimbahe, cuimbahe rese; cuña, cuña rese no. Ipipe sui oiporara tata guasu apirēhi vahe yuvireco. Ahe opita opacatu yande yembosiquiye ãgua.

<sup>8</sup> Ēgüe ehi avei niha evocoi nungar ava pe pãhu pendar. Esepia, ahe oqueraisa nungar reroyasa pipe sui tēi omonguiha viteño güecocuer oangaipa pipe. Iyavei ndoviroyai vahe yande Yar mborerecuasa. Ahe avei oñehe-ñehe tēi vahe iva pendar rese yuvireco.

<sup>9</sup> Aracahe Tüpa rembiguai ivate vahe Miguel oyepoepi-epi Carugar rese yuvireco Moisés retecuer rese. Yepe ahe Tüpa rembiguai rerecuar viña, ndiyai rumo chupe iñehe mara ãgua Carugar upe. Evocoyase aipo ehi chupe: “¡Tüpa oicua co rese ndeu!” ehiño.

<sup>10</sup> Evocoi ava pe pãhu pendar rumo oñehe tēiño vahe que mbahe ndosenducuai vahe rese yuvireco. Iyavei co mbahe oicua vahe oyesui tēi inungar mbahe mimba ndipihañemoñetai vahe oyesui tēi imbahecua, ahe oiporu yuvireco oyemocañi ãgua tēi.

<sup>11</sup> ¡Paraisu yuvireco! Caín recocuer rupi tupri avei oyapo mbahe yuvireco. Inungar Balaam guarepochi pota raisave tēi oyavi güeco yuvireco. Inungar Coré omano opereroyaēhisa pipe.

<sup>12</sup> Pe peñemonuhase pe yeaisusa pipe pe caru ãgua, ahese ahe avei yuviroique pe pãhuve; noyuvinochi eté ocaru ãgua pe piri. Ndapeicuai rumo ahe pe recocuer monguiha ãgua tēi yuviroique vahe pe pãhuve. Evocoi inungar ovesa rãrosar oyese tēi ihañeco vahe yuvireco. Iyavei ahe inungar iva quiha ndovirecoi vahe i, ivitu remimombo tēi. Ahe avei inungar ivira ndihai vahe ohasa rupi, ipiru vahe, evocoyase ahe sapohopri.

<sup>13</sup> Inungar avei acoi iai pipe itu omombo tiyui vahe oyesui yepi. Ēgüe ehi avei evocoi mbia rembiapo poromochisa. Iyavei inungar yasitata amove omocañi vahe guaper

co coti tēi oso pītumimbisave, ěgüe ehi aveira ava Tūpa sui oyepepi vahe pītumimbisa apirēhive secocuer yuvirecoi.

<sup>14</sup> Iyavei Enoc, Adán raquicuerindar imboseisa rupi oyesu vahe, ahe oñehe evocoi nungar ava naporai vahe recocuer resendar rese aracahe aipo ehi: “Co che asepia che queraisa nungar pipe yande Yar turi iva pendar rehii reseve

<sup>15</sup> opacatu ava recoãha ãgua iyavei icañi mombehu ãgua opacatu mbahe-mbahe tēi aposar upe, opacatu oñehe-ñehe tēi yamotarēhisave yuvirecoi vahe upe avei” ehi.

<sup>16</sup> Ahe mbia niha oporoviroiro yuvireco. Iyavei oseca oyeupe nara mbahe güemimbotar tēi apo ãgua. Ahe oyemboivate ai vahe oñehe pipe tēi yuvireco. Iyavei oñehe tupri ai angahu tēi ambuae ava upe imbahe rerocua ãgua ichui.

### *Jesús reroyasar upendar poromboaracuasa*

<sup>17</sup> Pe rumo, che rivireta, che rembiaisu, peyemomahenduha acoi yande Yar Jesucristo apóstol ñehengagüer rese

<sup>18</sup> aipo ehi vahe: “Co ari cañi renonde oimera ava viroiro ai vahe Tūpa rembiapo yuvireco. Iyavei oyapoño itera güemimbotarai yuvireco” ehi vahe.

<sup>19</sup> Ahe ava niha omboyaho-yaho ucara ava Jesús reroyasar yuvireco. Güecocuer ivi pipendar tēi vireco vahe. Ahe niha ndovirecoi Tūpa Espiritu yuvireco.

<sup>20</sup> Pe rumo, che rivireta, che rembiaisu, peyemoviracua pe poreroyasa maranehi vahe rese. Iyavei peyeroqui Espiritu Santo pe rãrosa pipe.

<sup>21</sup> Peñearo tupri Tūpa pe raisusa pipe. Iyavei pesãro viteño yande Yar Jesucristo yande paraisuerecosa pipe tecovesa ndopai vahe mondo ãgua yandeu.

<sup>22</sup> Pesaisu ava ndoviroya tuprii vahe Jesús.

<sup>23</sup> Amove ava pesecoreroyevi voi icañi rãgüer sui. Ambuae peiparaisuereco. Peicua catura rumo, pesiquiye catu secocuerai sui; ndapeipotai chira mbahe sembiapo ai que ñepi yangaipa pipe pe viapiēhi ãgua.

### *Tūpa mboetei tupriisa*

<sup>24-25</sup> Tūpa yande Pisirosar ñepi vahe vireco pīratasa pe rãro angaipa pipe pe viapiēhi ãgua. Ahe avei pe rerecora güecocuer porañetesave pe reco angaipāēhisa pipe. Ichui peicora pe viharetasa pipe. Ahe imboeteipri tasecoi. ěgüe tehi timboyeroyasa seco pīratasa iyavei imborerecuasa yande Yar Jesucristo sui, yipisui, cūritei apirēhi vahe rã.

## TÛPA REMIMBOYECUA JUAN UPE APOCALIPSIS

### *Jesucristo yemoporēhisa*

<sup>1</sup> Che, Juan, aicuachía mbahe imboaviye pihavipirã pëu acoi Tûpa omboyecua vahe Guahir Jesucristo upe ‘tomboyecua oviroyasar yuvirecoi vahe upe’ oyapave. Ahe niha Jesucristo oicua uca Vu rembiguai pipe imboyecua uca ãgua güembiguai che recose cheu.

<sup>2</sup> Che supi eté amombehu opacatu mbahe asepia vahecuer iyavei amombehu evocoi Tûpa Ñhengagüer acoi Jesucristo oicua uca tupri vahe mbahe supi eté vahe.

<sup>3</sup> Sorivete catura acoi ava oyerogui vahe co Tûpa suindar ñehesa rese, acoi ava oyapisaca tupri vahe sese, viroya vahe avei icuachiapri pipendar yuvireco. Esepia, ari cañi virovi ité yandeu.

### *Juan oicuachía siete tecua pendar Jesús reroyasar ñemonuhasa upe*

<sup>4</sup> Che, Juan, aicuachía Jesús reroyasar siete tecua Asia ivi rupindar yuvirecoi vahe upe. Peipisi porovasasa, teco tupri Tûpa suindar, ahe yipivé vahe ité, cūrteindar apirēhi vahe avei; siete espíritu suindar avei no, ahe senda rovai yuvino hai vahe,

<sup>5</sup> iyavei Jesucristo suindar, evocoi omombehu tupri vahe ñehesa supi vahe. Ahe acoi yipindar ocuerayevi vahe iyavei mborerecuar ivate catu vahe secoi opacatu ambuae-ae tēi mborerecuar sui. Ahe yande raisu iyavei yande pisiro yande angaipa sui vuví pipe,

<sup>6</sup> iyavei yande rereco mborerecuarã, pahiguã avei no Vu Tûpa upe yande poraviqui ãgua. ¡Ēgüe tehi imboeteipri tasecoi opĩratasa pipe apirēhi vaheerã!

<sup>7</sup> ¡Esepia, Cristo iva quiha rese oura curi!

Ahese opacatu ava osepiara yuvireco, yamotarēhisarer, oicutu vahecuer avei.

Iyavei opacatu tecua ivi pipendar ahese oyaseho tēira yuvireco sepiase.

Ēgüe ehi etera curi.

<sup>8</sup> “Che aico yipindar iyavei ipandar” aipo ehi yande Yar Tûpa opacatu mbahe mboavaisarēhi evocoi yipivé vahe ité, cūrteindar apirēhi vahe avei.

### *Juan osepia oquer nungar pipe Jesucristo porañetesa*

<sup>9</sup> Che, Juan, pe riquehir aico, iyavei che pe nungar Tûpa povri pendar aico, cheparaisu avei vichico Jesucristo rese che recosave che ñemosasa pipe. Che roquendasa vichico caha pãhumi para guasu aviterve Patmos serer vahesave Tûpa Ñhengagüer mombehusa pipe sui tēi, Jesucristo recocuer mombehusa pipe sui tēi avei no.

<sup>10</sup> Acoi yande Yar ari pipe Espíritu povri ve aicose, asendu che raquicuei oñehe pĩrata vahe aviye acoi mimbí ñehe

<sup>11</sup> aipo ehi: “Eicuachía mbahe erese pia vahe. Ipare emondopa siete tecua pendar che reroyasar ivi Asia rupindar upe: Efeso ve, Esmirna ve, Pérgamo ve, Tiatira ve, Sardis ve, Filadelfia ve, ipa Laodicea ve” ehi cheu.

<sup>12</sup> Che evocoyase ayemboyere sese ‘¿ava pĩha oñehe cheu?’ che yapave. Ahese asepia siete tupri vera hi oro apopri,

<sup>13</sup> iyavei asepia ipãhuve mbia aviye tupri ava ité viña, iturucuar pucucuer ipi rupi tupri ité sese, sumbicuasa evocoyase oro apopri ipochiha rupi tupri ité oyepota.

<sup>14</sup> Iha morochí inungar acoi mbahe saviyu vahe, inungar avei yesapi ñapĩrata morochí vahe, sesa evocoyase aviye tupri ité tata rendigüer.

<sup>15</sup> Ipi evocoyase sendi yai eté, aviye acoi bronce ocai vahe horno pipe, iyavei iñehe ipĩratá iteanga inungar itu riapugüer.



<sup>16</sup> Oacato coti vireco siete tupri yasitata, iyavei iyuru sui osẽ quise pucu saimbe yoya vahe. Sova evocoyase aviye ari rendigüer ipĩratá vahe.

<sup>17</sup> Sepia ramoseve, aviapi ipive inungar omano vahe. Ahe rumo omondo opo oacato coti che rese aipo ehi cheu: “Nderesiquiyei chira. Esepia, che yipindar ité aico, ipandar avei.

<sup>18</sup> Aicove vahe ité; yepe amano viña, cūritei rumo aicove iri ndopai chivaherã ité aico. Che areco che mborerecuasa ava recocuer mocañi ãgua.

<sup>19</sup> Sese eicuachía co mbahe eresepia vahe: cūriteindar oime vahe mbahe iyavei mbahe oime vaheerã curi.

<sup>20</sup> Co acoi ndereicuai vahe eresepia vahe siete yasitata che acato coti, ahe yuvirecoi Tũpa rembiguai siete tecua rupindar che reroyasar rãrosar; evocoyase vera hi oro apopri, ahe yuvirecoi siete tupri tecua pipendar che reroyasar” ehi.

## 2

### *Ñehesa siete tupri tecua-tecua pendar Jesús reroyasar upe. Ñehesa Efeso pendar upe*

<sup>1</sup> “Eicuachía Tũpa rembiguai Efeso pendar che reroyasar rãrosar upe: ‘Acoi vireco vahe oacato coti siete yasitata, ahe acoi uguata vahe siete vera hi yacatu rupi, aipo ehi imombehu:

<sup>2</sup> Che aicua opacatu mbahe pe rembiapo, pe poraviqui pĩratasa iyavei pe yemoviracuasa. Aicua avei ndapeipotai ava naporai vahe pe pãhuve yuvirecoi vaheerã. Pesecoãha avei ava, ore apóstol oroico, ehi tẽi vahe; ipare peicua iporombopa tẽisa yuvireco.

<sup>3</sup> Che aicua peñemosañõ peyemombaraisu peico che raisupave; ndapecuerai eté ipipe.

<sup>4</sup> Che rumo aicua oime mbahe ndahei vahe che piha rupi pe recocuer: ndapeyeaisu iri inungar yipindar.

<sup>5</sup> Sese peyemomahenduha yipindar pe recocuer aviye vahe rese; pemboasi mbahe pe rembiapo, peyevi Tũpa upe; peyeaisu iri catu inungar yipindar. Anise ayevira pẽu, arocuapara pe vera hi senda sui acoi ndapeyeviise Tũpa upe.

<sup>6</sup> Co rumo mbahe pe rembiapo aviye cheu: ndapeipotaise nicolaítas rembiapo mbahe. Che avei niha ndaipotai eté.

<sup>7</sup> ¡Acoi osendu pota vahe, toyapisacaño Espiritu omombehu vahe rese opacatu che reroyasar upe! Acoi oyemoviracua vahe mbahe-mbahe tẽi apoẽhi ãgua, itohu amondora ivira ha tecovesa resendar oime vahe teco orisave che Ru piri, ehi’ erera icuachía chupe.

### *Ñehesa Esmirna pendar upe*

<sup>8</sup> “Eicuachía avei Tũpa rembiguai Esmirna pendar che reroyasareta rãrosar upe: ‘Acoi yipindar vahe, ipandar avei; ahe acoi omano vahe viña, ocuerayevi iri rumo. Ahe ombou co ñehesa pẽu aipo ehi:

<sup>9</sup> Che aicua pe yemombaraisusa, pe paraisusa avei; pe rumo mbahe yar nungar ité peico iva pendar mbahe rese. Aicua avei pe rese ava semira tẽi vahe, ore Tũpa rembiporavo judío oroico, ehi tẽi vahe. Ndahei rumo ahe yuvirecoi. Esepia, Carugar reroyasar tẽi evocoi yuvirecoi.

<sup>10</sup> Ndapesiquiyei chira pe paraisu ãgua sui. Esepia, Carugar osoquenda ucara amove pe pãhu pendar secoãha ãgua; pe paraisu rane itera niha diez ari rupi peico. Acoi peyemoviracua tuprise ité chupe, Cristo rese ité amanora, pe hesave, ahese amondora porrecosa tecovesa pẽu.

<sup>11</sup> ¡Acoi osendu pota vahe, toyapisacaño Espiritu omombehu vahe rese opacatu che reroyasar upe! Acoi ava oyemoviracua vahe mbahe-mbahe tẽi apoẽhi ãgua, ahe imanore ihã ndoporarai chira imoñuviriosa manosa pipe, ehi’ erera icuachía chupe.

### *Ñehesa Pérgamo pendar upe*

12 “Eicuachía avei Tũpa rembiguai Pérgamo pendar che reroyasareta rãrosar upe: ‘Aipo ehi acoi vireco vahe quise pucu saimbe yoya vahe:

13 Che aicua pe recosa. Aheve acoi Carugar oguapĩ oĩ; mborerecuar guasu nungar imboyeroyapĩ seci. Pe rumo peyemoviracuaño ité chupe che recocuer rese peico. Ndapeseyai eté che rese pe yeroyasa yepe oyuca tẽi che recocuer mombehu tuprisar Antipas evocoi tecua Carugar recosave.

14 Che rumo aicua mbahe pe resendar: eipeve amove ava ndoyepẽpi potai eté Balaam porombohesa sui yuvireco. Ahe omboaracua Balac israelita mboangaipa uca ãgua, toyuvirohuño mbahe roho seropovẽhepĩ mbahe rahanga upendar tẽi, oya, iyavei, toyemboaguasaño yuvireco, oyapave avei.

15 Iyavei amove ava pe pãhuve ndoyepẽpi potai eté nicolaíta porombohesa sui yuvireco.

16 Sese pemboasi pe recocuerai, peyevi Tũpa upe, anise che aso poyava voira pẽu, ahese avavara chupe yuvireco che yuru pipe sui osẽ vahe quise pucu pipe, ehi.

17 ¡Acoi ava osendu pota vahe, toyapisacaño Espiritu omombehu vahe rese che reroyasar yuvirecoi vahe upe! Acoi ava oyemoviracua vahe mbahe-mbahe tẽi apoẽhi ãgua, semihura amondora ndasepiasai vahe maná. Iyavei amondora ita morochi vahe chupe. Ahe ita rese icuachiasara terer ipiasu vahe oĩ, evocoi ava oipisi vahe güeraño oicuarã, ehi’ erera icuachía.

### *Ñehesa Tiatira pendar upe*

18 “Eicuachía avei Tũpa rembiguai Tiatira pendar che reroyasareta rãrosar upe: ‘Tũpa Rahir acoi vireco vahe güesa inungar tata rendigüer, ipi avei inungar acoi bronce rapipĩ aipo ehi imombehu:

19 Che aicua mbahe opacatu pe rembiapo; aicua pe poroaisusa, che rese pe yeroyasa, mbahe rese pe hañecosa iyavei pe yemoviracuasa. Aicua avei yipindar sui mbahe peyapo catú aviye vahe.

20 Oime rumo mbahe pe rembiavi: peñemosañõ evocoi cuña Jezabel pe pãhu pendar upe, ahe acoi õñhe tẽi angahu vahe Tũpa rese viña. Ahe rumo ombopa tẽi oporombohesa pipe che rembiguai iyemboaguasa-guasa tẽi uca ãgua sereco iyavei ohu uca mbahe roho mbahe rahanga tẽi upe seropovẽhepĩ yuvireco chupe.

21 Che amondo vite tẽi arĩ chupe, tomboasi oangaipa Tũpa upe oyevi ãgua, che yapave viña. Ahe rumo ndopoi potai eté oyemboaguasa tẽisa sui.

22 Evocoiyase cõritei che amombaheasi ucara supave ino; iyavei acoi sesendarer yuvirecoi vahe, ahe avei iparaisu catura yuvireco acoi noñecuñaro potaise ité yuvireco.

23 Ipare ayucapara imembrĩ ichui. Ëgüe ehi opacatu che reroyasar oicuarã yuvireco che aicua tupri ité opacatu ava pihañemoñetasa iyavei ñepeipei pe yacatu amondora pe rembiapogüer repri pẽu.

24 Pe rumo opacatu Tiatira pendar ndaperoyai vahe co porombohe raisa iyavei ndapeyemboheĩ vahe Carugar suindar aracuasa, ndicuasai yavai vahe, ehi vahe rese, pẽu ndarecoi que ambuae che porocuaíta.

25 Peyemoviracuañõ rumo evocoi mbahe pereco vahe rese, acoi che ayevise voi vitu curi.

26 Acoi ava oyemoviracua vahe mbahe-mbahe tẽi apoẽhi ãgua, oyapo vahe che remimbotar mano rupi eté, chupe amondora mborerecuar seco ãgua opacatu ivi rupi

27 inungar che Ru ombou che mborerecuarã cheu; Ëgüe ehi aveira oporocuai opacatu tecua rupi inungar acoi vara guarepochi, mbahe riapiipa uca ãgua, aviyeira acoi mahe-moinda ñaihu apopri viña.

28 Iyavei amondora yasitata cõhe rerusar chupe.

29 ¡Acoi ava osendu pota vahe, toyapisacaño Espiritu omombehu vahe rese opacatu che reroyasar yuvirecoi vahe upe! ehi’ erera icuachía.

### 3

#### *Ñehesa Sardis pendar upe*

<sup>1</sup> “Eicuachía avei Tũpa rembiguai Sardis pendar che reroyasareta rãrosar upe: ‘Acoi ava vireco vahe siete tupri Tũpa espĩritu iyavei acoi siete tupri yasitata no aipo ehi imombehu: Che aicua mbahe opacatu pe rembiapo; aicua yepe amove ava, Co mbia yuvirecoi vahe ité Tũpa upe nara, ehi pẽu viña; omano vahe nungar tẽi rumo peico.

<sup>2</sup> Peyemopoase catu peico iyavei pemonguerẽhi catu acoi viroya vite vahe. Esepia, oyepepĩpa pota ité yuvireco viña. Supi eté mbahe pe rembiapo che Ru rovaque, ndahei supĩ tupri vahe.

<sup>3</sup> Peyemomahenduha acoi porombohesa peipĩsi vahe rese; pepoi rene ichui. Peyevi catu Tũpa upe. Ndapeyemopoaseise rumo, asora pẽu inungar imonda rai vahe, ẽgũe ahera vicho pe resapĩha.

<sup>4</sup> Oime rumo amove ava pe pãhu pendar ndoyapoi eté angaipa yuvireco, evocoyase inungar ava oguata vahe oturucuar morochi vahe rese, ẽgũe ehi aveira ahe gũeco maranehi pĩpe oguata che rupi yuvireco. Esepia, ahe chupe iya ité.

<sup>5</sup> Acoi ava oyemovĩracua vahe mbahe-mbahe tẽi apoẽhi ẽgua, ahe sese imondesara turucuar morochi vahe. Ahe serer namboyehoi chira cuachiar tecovesa resendar pĩpe sui, asenoira rumo che Ru rovai iyavei sembiguai eta rovaque avei curi.

<sup>6</sup> ¡Acoi ava osendu pota vahe, toyapĩsacaño Espĩritu omombehu vahe rese che reroyasar yuvirecoi vahe upe! ehi’ erera icuachía.

#### *Ñehesa Filadelfia pendar upe*

<sup>7</sup> “Eicuachía avei Tũpa rembiguai Filadelfia pendar che reroyasareta rãrosar upe: ‘Co seco maranehi vahe, supĩ tupri vahe ité, vireco vahe mborerecuasa aracahendar mborerecuar guasu David nungar, acoi omboise que oquenda, ñepeĩ yepe que ava nomboyai chietera; iyavei acoi omboyase, ñepeĩ yepe que ava nomboi chiete aveira, ahe aipo ehi:

<sup>8</sup> Che rumo aicua mbahe opacatu pe rembiapo. Esepia, che amondo pe rovaque inungar oquenda imboipri pẽu pemombehu vaherã che recocuer. Ahe que ñepeĩ yepe ava nomboyai chietera yuvireco. Esepia, yepe pe nipirata tuprii vahe, peroya ité rumo che ñehe iyavei ndacheñomi eté ava sui peye.

<sup>9</sup> Co Carugar reroyasar semira tẽi vahe, ore Tũpa rembiporavo judío oroico, ehi tẽi vahe, ndahei rumo ahe eté vahe yuvirecoi. Ahe amoñenopĩhapa ucara pe rovai, toicua yuvireco che pe raisusa, che yapave.

<sup>10</sup> Esepia, peroya ité che porocuaita, peyemovĩracua ité evocoi mbahe tẽi upe peico. Evocoyase che opoepĩra acoi ari tecoãhasa ouse opacatu ivi rupindar upe curi.

<sup>11</sup> Ayevi poyavara. Peyemovĩracua catu Tũpa reroyasa pereco vahe rese. Evocoyase ñepeĩ yepe que ava ndovirocui chietera Tũpa suindar porerecosa pe sui.

<sup>12</sup> Acoi oyemovĩracua vahe mbahe-mbahe tẽi apoẽhi ẽgua yuvireco, ahe che Ru piri nara ité yuvirecoira. Ahe evocoyase inungar-ra che Ru Tũpa rẽta vĩracuasa ndopai vahe yuvireco. Sese arova ucara che Ru Tũpa rer iyavei che Ru Tũpa recua rer avei no, ahe Jerusalén pĩasu, evocoi ou vaherã iva pendar che Ru Tũpa sui, iyavei che rer ipĩasu vahe ité arovara sese no.

<sup>13</sup> ¡Acoi ava osendu pota vahe, toyapĩsacaño Espĩritu remimombehugũer rese che reroyasareta upe! ehi’ erera icuachía.

#### *Ñehesa Laodicea pendar upe*

<sup>14</sup> “Eicuachía avei Tũpa rembiguai Laodicea pendar che reroyasareta rãrosar upe: ‘Evocoi seco tupri vahe, omombehu vahe mbahe supĩ tupri vahe ité, ahe ichui oime opacatu Tũpa rembiapo, ahe aipo ehi:

15-16 Che aicua mbahe opacatu pe rembiapo. Pe inungar i ndahei sōhisa vahe iyavei ndahei sacu vahe. I sacu raimi tēi vahe nungar peico pe rembiapo pīpe. ¡Ñepei reseve vahe rumo aipota, ndahei iguayī tēi vahe! Pe recocuer rumo iguayī tēi vahe nungar, sese opomboyevīñora cheyesui.

17 Esepia, pepihañemoñeta: Che mbahe yar ité, opacatu mbahe areco, nipanei eté mbahe cheu, peye viña. Pe rumo ndapeicuai pe paraisusa che Ru rovaque inungar ndasesapisoi vahe peico. Iyavei ndapeyavīi nditurucuai vahe peico.

18 Sese opomboaracua; peseca iva pendar oro tatave imoatīropri nungar che sui pe paraisuēhi iri āgua che Ru rovaque; peseca avei turucuar morochi vahe teco tupriṣa peyeupe che suindar nani tupri vahe nungar pīpe pe recoēhi āgua, pe chīēhi āgua avei iyavei inungar ava oseca mosa güesa upe nara osareco iri āgua, ēgüe peye aveira.

19 Che añehe pīrata seco mohivi āgua che rembiaisu upe yepi. Peyemonguerēhi catu, pemboasi ité pe recocuer che Ru Tūpa upe pe yevī āgua.

20 Esepia, inungar que ava oquenda omotara oquendīpive ohā viña, ēgüe ahe pe pihave vichico; pesenduse che ñehe, pemboira cheu. Che evocoyase aiquera pe piri, yacarura oyepiri.

21 Acoi ava oyemoviracua vahe mbahe-mbahe tēi apoēhi āgua yuvireco, ahe amboguapī ucara che ipive imoi che porocuaisave, inungar che mbahe tēi reco reroyī pare, aguapī che Ru ipive vīte.

22 ¡Acoi ava osendu pota vahe, toyapisacaño Espíritu remimombehugüer rese che reroyasareta upe! ehi imombehu pēu' erera icuachía" ehi Jesús cheu.

## 4

### *Tūpa mboeteisa ivave*

1 Ipare asepia mbahe inungar oquenda oyemboi vahe ivave. Ahese evocoi ñehesa ipīrata vahe mimbī nungar yipīndar oñehe vahe cheu, ahe asendu iri: "Eyeupi ave. Che evocoyase mbahe amboyecua ndeu mbahe imboavīyepirā curi" ehi.

2 Ahe pīpeve voi, Espíritu pīratasa pīpe aico iyavei asepia tenda ivave, ahe iharīve ñepei uguapī oī.

3 Co uguapī vahe ndoyavīi eté ita jaspe porañetesa iyavei ndoyavīi cornalina porañetesa no. Iyavei oime oyere tupri vahe tenda rese inungar arco iris sendí vahe, inungar esmeralda.

4 Iyavei asepia evocoi rese oyere tupri ambuae veinticuatro tenda, ahe iharīve uguapī yuvinoi veinticuatro avei icuai pri yuvirecoi vahe; iturucuar morochí vahe yuvireco iyavei oāca rese omboyere tupri oro apopri yuvireco.

5 Evocoyase Tūpa renda sui yuvīnose overa-vera vahe, iyavei siapu guasu vahe, osunu vahe no; iyavei siete tupri tataendi sendipa yuvireco evocoi tenda rovai, ahe co siete tupri Tūpa espíritu.

6 Evocoi tenda rovai oime avei ndoyavīi tupri para guasu tīpīu vahe oyecua tupri vahe mbahe ipipe.

Ambuae tenda pāhu rupi oyere tupri Tūpa renda rese irungatu iva pendar yuvirecove vahe, ahe sesa oyere tupri vahe sese, ahe osareco tupri vahe güenonera, guaquicuei coti avei no.

7 Yipīndar yuvirecove vahe pāhu pendar ahe ndoyavīi tupri yagua pīta; saquicuerindar ndoyavīi tupri guaca cuimbahe; imombosapīsa ndoyavīi eté ava; imoirungatusa cute ndoyavīi vira guasu oveve vahe.

8 Evocoi iva pendar irungatu yuvirecove vahe vireco oyacatu seis tupri opepo yuvireco iyavei vireco opacatu güete rese güesa. Ndopituhui eté ari, pītu rupi aipo ehi yuvireco:

“¡Santo, santo, santo ité secoi, yande Yar Tūpa ité, ahe mbahe mboavaisarēhi, yipivé vahe ité, cūriteindar, apirēhi vahe!”

ehi yuvireco.

<sup>9</sup> Evocoi yuvirecove vahe omboetei yuvireco, “Aviye ndeu” ehi co oguapi vahe oĩ tenda harive ndopai vahe upe.

<sup>10</sup> Ēgüe ehise evocoyase veinticuatro tupri icuaipri yuvirecoi vahe, ahe oñenopiha imboeteisa pipe sovai yuvireco. Ipare osequi oāca resendar oyere tupri vahe omborecuasa resendar sovai aipo ehi:

<sup>11</sup> “Ore Yar Tūpa, iya ité nde mboeteisa, ndeu sapucaisa nde pĩratasa rese.

Esepia, nde ereyapo vahe mbahe opacatu; nde remimbotar rupi niha oime opacatu mbahe”

ehi yuvireco chupe.

## 5

### *Ovesami upe güeraño iyacatu cuachiar imboyapri mboi āgua*

<sup>1</sup> Che asepia cuachiar Tūpa vireco vahe oacato coti, icuachiapri ipipe coti, ocar coti avei no, imboyapri siete sello pipe.

<sup>2</sup> Ipare asepia Tūpa rembiguai seco ivate vahe, ahe oporandu pĩrata oico aipo ehi: “¿Ava upe vo iya cuachiar mboi āgua iyavei sello imboyeroyapri mondoro āgua no?” ehi.

<sup>3</sup> Ndipoi eté rumo que iva pendar, ivi pipendar, ivivri pendar oicatu vaheerā cuachiar pipira sepia āgua viña.

<sup>4</sup> Evocoyase che ayasehó iteanga. Esepia, ndipoi eté que ñepei yepe oime angara aviye vahe cuachiar pipira sepia āgua viña.

<sup>5</sup> Ahese icuaipri pāhu pendar ñepei aipo ehi cheu: “Ereyaseho iri eme. Esepia niha, evocoi ava yagua pĩta vahe vahe chupe, Judá suindar, acoi mborerecuar guasu David suindar avei, ahe niha Carugar osecoreroyi. Sese iya ité chupe siete sello mondoro cuachiar pipira āgua” ehi.

<sup>6</sup> Evocoyase, asepia Tūpa rovai iva pendar irungatu yuvirecove vahe pāhuve, icuaipri yuvirecoi vahe mbiterve, ñepei ava Ovesami nungar ihāi, aviye seropovēhepri. Ahe niha vireco siete tupri sāchi, siete tupri avei sesa; sesa evocoyase siete tupri Tūpa espíritu yuvirecoi opacatu ivi rupi imboguatapri.

<sup>7</sup> Ipare evocoi Ovesami oso, oipisi cuachiar evocoi tenda harive oguapi vahe yacato coti sui;

<sup>8</sup> ipisi pare, evocoi irungatu yuvirecove vahe, iyavei veinticuatro tupri icuaipri, ahe oñenopiha Ovesami rovai yuvireco. Oyacatu ñepei-pei vireco arpa yuvireco, itaisi riru oro apopri, ahe avei vireco yuvireco, ahe itaisi niha Tūpa reroyasar yeruresa.

<sup>9</sup> Osapucal ipiasu vahe sapucaisa pipe aipo ehi yuvireco:

“Ndeu iyacatu ité cuachiar pisi āgua,

imboyapri mondoro āgua avei no.

Esepia niha, nde yucapri seropovēhepri ereico.

Evocoyase nde ruvi pipe eremboepipa Tūpa upe nara opacatu ava ambuae-ae tēi vahe, ñehe ambuae-ae tēi vahe avei, ñepei-pei tecua yacatu rupindar, ivi rupindar avei yuvireco.

<sup>10</sup> Iyavei eremborerecu uca Tūpa upe nara,

erembopahi uca avei no, ipare ahe oporocuaire opacatu ivi rupi yuvireco” ehi osapucal yuvireco.

<sup>11</sup> Ipare asepia, asendu avei Tūpa rembiguai rehii ñehe evocoi oyere tupri vahe tenda rese yuvireco, iyavei evocoi yuvirecove vahe ñehe, icuaipri ñehe avei asendu setā iteanga yuvirecoi.

<sup>12</sup> Ahe aipo ehi pĩrata yuvireco no:

“¡Co Ovesami yucapirer, ahe chupe iyacatu ité mborerecuasa pisi ãgua, opacatu Tũpa suindar porerecosa pisi ãgua, mbahecuasa, pĩratasa, mboyeroyasa, poromboeteisa, iyavei sapucaisa pisi ãgua avei no!” ehi.

<sup>13</sup> Ahese asendu avei opacatu Tũpa rembiapo ivave yuvirecoi vahe, ivi pĩpendar, ivivri rupindar iyavei para guasu pĩpendar, aipo ehi yuvireco:

“¡Toime sapucaisa, Tũpa upendar mboyeroyasa, imboeteisa, iyavei pĩratasa, ahe timondosa apirēhi vaheṛã Tũpa acoi güendave oguapi vahe upe, Tahir Ovesami nungar upe avei no!” ehi.

<sup>14</sup> Evocoi irungatu ava yuvirecove vahe, “¡Ēgüe tehi eté!” ehi yuvireco. Iyavei icuaipri veinticuatro tupri yuvirecoi vahe, ahe oñenopiha yuvireco sovai imboeteisave.

## 6

### *Siete sello*

<sup>1</sup> Ipare asepia acoi Ovesami omondo yipindar vahe sello siete vahe cuachiar mboyasa sui. Ahese asendu avei ava irungatu yuvirecoi vahe pãhu pendar oñehe pĩrata. Iñehe ndoyavii osunu vahe, “¡Erio!” ehi cheu.

<sup>2</sup> Ahese asepia cavayu morochi vahe, ahe ava ihari pendar vireco virapar. Chupe omondo yeguaca yuvireco. Ēgüe ehi ahe osē seco pĩrata catu vahe ava reco reroyi ãgua.

<sup>3</sup> Omondorose acoi Ovesami imoñuviriosa sello, ahese asendu imoñuviriosa yuvirecove vahe pãhu pendar ñehe, “¡Erio!” ehi vahe cheu.

<sup>4</sup> Ipare osē cavayu pĩra vahe, ahe ava ihari pendar oipisi pĩratasa mbahe tupri sa rerocua ãgua ivi pĩpendar ava sui ‘toyeyuca-yuca tēi yuvireco’ oyapave. Ipare imondosa quise pucu chupe.

<sup>5</sup> Omondorose acoi Ovesami imombosapisa sello, ahese asendu imombosapisa yuvirecove vahe pãhu pendar ñehe, “¡Erio!” ehi vahe cheu. Amahe sese, ipare asepia cavayu sũ vahe, ahe ava ihari pendar vireco opo pipe mbahe rãhasa.

<sup>6</sup> Ipare asendu yuvirecove vahe cotindar ñehe, ahe aipo ehi: ‘Nēpei kilo trigo serocuasa guarepochi ñepei ari resendar mboraviqui repri pipe, mbosapi kilo cebada evocoyase serocuasa avei ñepei ari resendar mboraviqui repri pipe no. Pemocañi eme mbahe quira iyavei uva ricuer avei no’ ehi.

<sup>7</sup> Evocoi Ovesami omondorose imoirungatusa sello, ahese asendu ava imoirungatusa ñehe aipo ehi: “¡Erio!” ehi cheu.

<sup>8</sup> Amahe, ipare asepia cavayu iyu rasi vahe, ahe ava ihari pendar serer Tehögüer. Ipare saquicuei ou vahe oico ahe serer Omano-vahe-recosa. Ahe chupe yuvireco imondosa teco pĩratasa ivi imoirungatusa yahocuer rupi iguata ãgua ava yuca ãgua vavasa pipe, tieporēhi pipe, mbaherasi pipe, mbahe ipi pipe avei no.

<sup>9</sup> Evocoi Ovesami omondorose imbopoyandeposa sello, ahese asepia mbahe seropovēhepri rendavri ve ava hã, ahe yucasa vahe yuvireco Tũpa Ñehengagüer mombehusa sui tēi iyavei Jesús reroyasa sui tēi avei no.

<sup>10</sup> Ahe aipo ehi pĩrata yuvireco: “Ore Yar Tũpa seco maranehi, supi tupri vahe, ¿mbahese vo eremombaraisura ore yucasarer yuvirecoi vahe ivi pĩpendar ore repisave?” ehi yuvireco.

<sup>11</sup> Ipare imondosa iyacatu turucuar morochi vahe chupe, ahese aipo ehi: “Pepituhu vite rane, tayaviyepa rane pe rivireta retacuer Cristo upendar mbahe aposa pipe yucapri pe nungar yuvireco” ehi.

<sup>12</sup> Ipare Ovesami omondorose imoñepei ovasa sello, ahese oime ivi riri ipĩratá vahe. Ari evocoyase sũ, aviyē acoi turucuar sũ vahe mano sendar yemondesa iyavei yasi pĩra inungar tuvi,

<sup>13</sup> yasitata evocoyase opa ovipari va sui ivi rese yuvireco no inungar acoi higo hacri ombosururu vahe ivitu ai yepi.

<sup>14</sup> Ahese ìva ndoyecua iri cute inungar acoi cuachiar yeapoapipri vahe, opacatu tupri avei ivitri, caha pãhu avei no osiri güenda sui yuvireco.

<sup>15</sup> Mborerecuareta avei co ivi pipendar yuvirecoi vahe opa tēi oñemi mbahecuar pipe yuvireco, ita guasu pãhu rupi avei yuvireco no, oyoya guasu seco ivate vahe, sundao rerecuareta, mbahe yar seco pĩratá vahe, iyavei opacatú tupri mbiguai eta, ava ndahei vahe mbiguai avei;

<sup>16</sup> iyavei aipo ehi yuvireco ivitri upe, itape guasu upe avei no, “¡Eviapi ore harive, toroñemipa tēi Tũpa sui iyavei Ovesami sui acoi ombou vahe co poronupasa ipĩrata vahe oreu!

<sup>17</sup> Esepia, oyepota ité Tũpa ñemoirosa oreu. Ndipoi chietera ava oyemoviracua tupri vahe oyese chupe” ehi yuvireco.

## 7

### *Israel suindar iporavopri yuvirecoi vahe*

<sup>1</sup> Ipare asepia irungatu tupri Tũpa rembiguai ìva pendar yuvinohai vahe irohi coti, norte coti, ari sēsa coti, caharu coti avei no omombituhu tupri vahe irungatu ivitu yuvirecoi vahe ivi hari rupi ipeyuēhi ãgua, que para guasu pipe angara viña, que ñepepe yepe ivira ro angara viña no.

<sup>2</sup> Ipare asepia avei ambuae Tũpa rembiguai ìva pendar ou vahe ari sēsa coti sui, ahe vireco oyese Tũpa oicove vahe rer mondose. Ahe niha osapucaí pĩratá evocoi irungatu tupri Tũpa rembiguai ìva pendar yuvirecoi vahe upe, oipisi vahe pĩratasa ivi, para guasu momara ãgua yuvireco, aipo ehi:

<sup>3</sup> “¡Ndapemomara vitei chira rumo ivi, para guasu avei, ivira avei no, co ndoromondo viteiseve ava Tũpa rembiguai eta upe isiva rese Tũpa rer icuachiapri!” ehi.

<sup>4</sup> Ipare asendu Tũpa rer oipisi vahe retacuer: ciento cuarenta y cuatro mil tupri, evocoi opacatu doce judío ramoí suindar pãhu sui iporavopri yuvireco.

<sup>5</sup> Doce mil tupri yuvirecoi iporavopri Judá suindar, doce mil tupri Rubén suindar, doce mil tupri Gad suindar,

<sup>6</sup> doce mil tupri Aser suindar, doce mil tupri Neftalí suindar, doce mil tupri Manasés suindar,

<sup>7</sup> doce mil tupri Simeón suindar, doce mil tupri Leví suindar, doce mil tupri Isacar suindar,

<sup>8</sup> doce mil tupri Zabulón suindar, doce mil tupri José suindar, ipa evocoiyase doce mil tupri Benjamín suindar.

### *Ava rehi iturucuar morochi vahe*

<sup>9</sup> Ipare asepia setá iteanga ava, opacatu ivi rupindar, ambuae-ae tēi vahe, ambuae-ae tēi vahe iñehe yuvireco iyavei secua ambuae vahe avei no. Ahe opũhapa vahe Tũpa rovai Ovesami rovai avei yuvireco no, ahe ndayaicatui eté ipapapa ãgua. Esepia, setá etepri yuvireco iyavei iturucuar morochí vahe pãve; pindo-pindomi vireco opove yuvireco no.

<sup>10</sup> Ipare opacatú guasu oñehe pĩrata yuvireco aipo ehi:

“¡Poropĩsirosa yande Ru Tũpa suindar, ahe oguapi vahe oĩ güendave, iyavei Ovesami suindar avei no!” ehi.

<sup>11</sup> Iyavei opacatu Tũpa rembiguai ìva pendar yuvirecoi vahe oyere tupri Tũpa renda rese, icuaipri rese avei yuvinoha iyavei irungatu yuvirecove vahe rese avei no; ahese oyeaivi omboya ité osiva ivi rese senda rovai Tũpa mboeteisave yuvireco,

<sup>12</sup> aipo ehi:

“¡Ëgüe tehi!

Sapucaisa, poromboeteisa, mbahecuasa, ‘¡Aviye ndeu’ hesa, poromboyeroyasa, mborerecuasa,

teco pĩratasa avei tasecoi yande Ru Tũpa upe!

¡Ēgüe tehi apirēhi vaherã ité yepi!” ehi.

<sup>13</sup> Ahese icuaipri ipãhu pendar aipo ehi cheu cute: “¿Ereicua vo co ava rehî iturucuar morochi vahe pâve yuvirecoi, ereicua que sui pîha yugüeru?” ehi.

<sup>14</sup> Che evocoyase, “Nde rumo ereicua” ahe chupe. Ipare ahe aipo ehi cheu: “Co acoi yuvínose tupri vahe ité teco asisa sui yuvireco, inungar oyosei, omomorochi vahe oturucuar, ěgüe ehi avei güecocuer imomorochi Ovesami ruvi pipe yuvireco.

<sup>15</sup> “Sese Tûpa renda rovai yuvirecoi, chupe mbahe apo ãgua ari, pîtu rupi avei sêta pipe. Güendave oguapi vahe oî, güecocuer pipe osepîra.

<sup>16</sup> Evocoi ndiyumbiasî iri chira yuvireco, ndihusei iri chiaveira, iyavei ari ndoyope iri chira, ndasacuvasi iri chiaveira chupe no.

<sup>17</sup> Esepîa, evocoi Ovesa secoi Vu renda rovai, ahe osãrora ava rehî sereco inungar ovesa rãrosar.

Ipare opara viraso tecovesa resendar î ndopai vahesave imboihu ãgua.

Tûpa evocoyase omombituhupara imboyasehosa sui yuvireco” ehi.

## 8

### *Imoñuvirío ovasa sello iyavei itaisî rapîsa oro apoprî*

<sup>1</sup> Ipare coiye cute co Ovesami omondorose imoñuvirío ovasa sello cuachiar mboyasa ichui, ahese sîu tupri ivave ñepeî hora yemombitesa rupive.

<sup>2</sup> Ichui asepiâ siete tupri Tûpa rembiguai îva pendar yuvínohai vahe Tûpa rovai, chupe opa imondosa siete tupri mimbi.

<sup>3</sup> Ipare ou ambuae Tûpa rembiguai îva pendar oro itaisî rapîsa reseve, iyavei ou ohã itaisî rapîsa renda rovai; ipare imondosa tuvichá itaisî chupe oicuavêhe vaherã oyoya tupri opacatu ava Tûpa upendar yeruresa rese oro mbahe reropovêhepri renda harive; ahe Tûpa renda rovai chini vahe.

<sup>4</sup> Itaisî râtachi evocoyase oso Tûpa rembiguai îva pendar po sui. Ēgüe ehi oyepota oso Tûpa recosave, oyoya tupri chupendar yeruresa rese.

<sup>5</sup> Ipare evocoyase Tûpa rembiguai îva pendar opoco itaisî rapîsa rese, omboapîpo mbahe reropovêhepri renda pendar tâtapîi pipe. Ipare opa omombo îvi hari rupi. Aheseve voi osunu vahe opororo-roró, overa-vera iyavei îvi orîrii.

### *Siete vahe mimbi*

<sup>6</sup> Evocoyase siete tupri Tûpa rembiguai îva pendar oyemoingatu voi güemimbi moñehe ãgua yuvireco.

<sup>7</sup> Yipîndar vahe Tûpa rembiguai omoñehe güemimbi, ahese imombosa îvi hari rupi amanda iyavei tata oyeseha vahe tuvî rese. Ipare opa ocai îvi mombosapîsa yahocuer. Oyoya tupri îvîra mombosapîsa yahocuer rese iyavei capihi reseve avei opa yuvîrocai.

<sup>8</sup> Imoñuviriosa Tûpa rembiguai omoñehe güemimbi. Ahese imombosa para guasu pipe inungar tupri acoi îvîtri sendî vahe tata pipe; ipare para guasu mombosapîsa yohacuer oyeapo tuvî.

<sup>9</sup> Iyavei para guasu mombosapîsa yahocuer pipendar ava omano yuvireco. Ipare carite guasu mombosapîsa yahocuer pipendar opa tupri avei imocañîsa.

<sup>10</sup> Ipare imombosapîsa Tûpa rembiguai îva pendar omoñehe güemimbi, ahese yasitata tuvichá vahe ovîapi îva sui ou. Sendî guasu inungar acoi îvîra rese tata sendî guasu vahe. Ahe ovîapi îai mombosapîsa yahocuer pipe iyavei îvi sui î ohê vahe mombosapîsa yahocuer pipe avei no.

<sup>11</sup> Yasitata rer evocoyase Iro-vahe. Ipare î mombosapîsa yahocuer iró iteanga. Evocoi î pipe setá ava omano yuvireco.

<sup>12</sup> Imoirungatusa Tûpa rembiguai omoñehe güemimbi. Ipare ari mombosapîsa yahocuer imegua, yasî mombosapîsa yahocuer, iyavei yasitata mombosapîsa yahocuer



avei no. Ichui imombosapisa yahocuer ndosesape iri yuvireco ari mombosapisa yahocuer pipe, pĩtu mombosapisa yahocuer pipe avei no.

<sup>13</sup> Ipare asepia, asendu avei no vira guasu ovevese iva mbiter rupi, aipo ehi pucu oñehese oico: “¡Too, too! ¡Iparaisu catura moco ava yuvirecove vite vahe ivi pipe yuvireco acoi omoñehese ambuae mbosapi Tũpa rembiguai güemimbi yuvireco!” ehi.

## 9

<sup>1</sup> Tũpa rembiguai imbopoyandeposa omoñehese güemimbi, ahese asepia yasitata ovĩapi vahe iva sui ou ivive. Ipare chupe imondosa ivicuar picucu pĩtumimbi vahe mboisa.

<sup>2</sup> Ipare omboise ivicuar rovapisa, ichui opũha tãtachi, inungar acoi horno guasu pipe sui osẽ vahe. Evocoyase evocoi tãtachi ndosesape uca iri ari upe, niporẽhi iri etẽ mbahe.

<sup>3</sup> Iyavei evocoi tãtachi sui opa yuvĩnose tucru guasu rehii oñemosai opacatu ivi rupi; chupe avei imondosa seco pĩrata ãgua inungar acoi mbaherumbiquiãpe.

<sup>4</sup> Icuaisa rumo opacatu capihi mbahe rocri iyavei ivira momaraẽhi ãgua, ãgũe ehi rumo acoi ava nomboyecuai vahe osiva rese Tũpa rer, chupe nara itẽ.

<sup>5</sup> Nimondosai rumo mborocuita chupe ava yuca ãgua. ãgũe ehi rumo ‘tomombaraisu pucu rane poyandepo yasi rupi sereco’ oyapave tẽi, inungar tupri acoi mbaheherumbiquiãpe rasicuer.

<sup>6</sup> Evocoi ari rupi ava oipota tẽira omano ãgua yuvireco viña. Imanosa rumo que vitera yuvireco ichui.

<sup>7</sup> Tucru guasu rehii inungar cavayu imoingatupri vavasave nara yepi; oãca rese evocoyase vireco ndoyavii yeguaca oro apopri, iyavei sova avĩye tupri itẽ ava repiaca.

<sup>8</sup> Iha ndoyavii cuña ha, sãi evocoyase ndoyavii tupri yagua pĩta rãi.

<sup>9</sup> Setecuer evocoyase oyopia tupri guarepochi apopri, iyavei ipepo riapugũer avĩye tupri itẽ acoi cãreto riapugũer cavayu vinoña vahe vavasave.

<sup>10</sup> Vireco vuguai rese opopiar avĩye mbaherumbiquiãpe popiar. Ahe niha vireco opĩratasa poyandepo yasi rupi ava momara ãgua tẽi.

<sup>11</sup> Evocoi tucru guasu rerecuar, ahe icuaipri ivicuar ipicucu vahe mboi ãgua. Ahe serer hebreo ñehese pipe Abadón; griego ñehese pipe evocoyase Apolión ehi.

<sup>12</sup> Opa yipĩndar vahe mbahe-mbahe tẽi; oime vite rumo co pare ñuvirio mbahe tasi vahe.

<sup>13</sup> Imoñepi ovasa Tũpa rembiguai omoñehese güemimbi, ahese asendu ñehesa itaisi rapisa renda oro apopri Tũpa rovindar irungatu sãchi vahe pãhu sui.

<sup>14</sup> Ahe aipo ehi evocoi imoñepi ovasa Tũpa rembiguai upe: “Eyorapa evocoi irungatu Tũpa rembiguai ñapichimbri iai guasu Eufrates ivirindar” ehi.

<sup>15</sup> Evocoyase opa yorasa ava mombosapisa yahocuer yuca ãgua yuvireco. Esepia, evocoi imoingatupri co ari rupi tuprise nara yuvireco.

<sup>16</sup> Ipare asendu sundao rehii cavayu harive yuvirecoi vahe, ahe setacuer doscientos millones tupri.

<sup>17-18</sup> ãgũe ehi asepia cavayu rehii che quer nungar pipe, ihari pendar evocoyase vireco opochiha rupi tupri oyoepisa guarepochi apopri yuvireco, ahe iparagũer pĩra vahe tata nungar, sovi vahe, iyu vahe avei no. Cavayu rehii ãca evocoyase avĩye tupri yagua pĩta ãca, iyuru sui evocoyase yuvĩnose-nose tata, tãtachi iyavei azufre. Ipipe sui ava mombosapisa yahocuer opa tupri omano yuvireco.

<sup>19</sup> Esepia niha, cavayu pĩratasa iyuru rese chini, suguai rese avei no; ahe suguai ndoyavii tupri itẽ mboi ãca, ipipe avei ava omomara.

<sup>20</sup> Ava rumbirer rumo nomanopa vitei vahe co mbahe tẽi sui yuvireco, nosecuñaroi etẽ güecocuera yuvireco. Ndopoi potai etẽ carugar mboetei aisa sui, iyavei opacatu mbahe rahanga tẽi oro apopri, guarepochi, bronce, ita, anise ivira apopri mboeteisa sui

avei yuvireco. Evocoi mbahe apopri rumo ndosarecoi vahe, ndosendui vahe ité mbahe, ndoguatai vahe avei.

<sup>21</sup> Iyavei noñecuñaro potai eté oporapichisa sui yuvireco, opaye aisa sui, que cuña, que cuimbahe ambuae rese angaipa aposa sui, omonda raisa sui avei.

## 10

### *Tūpa rembiguai iva pendar vireco vahe icuachiapri cuachiarmpi*

<sup>1</sup> Ipare asepia ambuae Tūpa rembiguai iva pendar ipiratá vahe ogüeyise iva sui ou mbahe pītu pāhuve; ahe ñaca rese arco iris oyere tupri. Sova sendí aviye ari, setima evocoyase ndoyavii tata rendigüer opūha tupri vahe.

<sup>2</sup> Cuachiarmpi oyemboi vahe vireco opove. Opri oacato cotindar pipe opiro para guasu rese, ambuae opive evocoyase opiro ivi rese.

<sup>3</sup> Evocoyase sãse pīratá, inungar yagua pīta rãse; sãsese, evocoyase siete tupri osunu vahe ñehe oyendu yuvireco.

<sup>4</sup> Oñehepase, ahese iñehe che aicuachiarmpi viña; asendu rumo iva sui ñehesa aipo ehi vahe: “Eremboyecuai rene acoi siete tupri osunu vahe ñehe, ndereicuachiarmpi chietera” ehi cheu.

<sup>5</sup> Evocoyase Tūpa rembiguai asepia vahecuer, ahe acoi opiro vahe para guasu rese, ivi rese avei opo oacato cotindar omopuha iva coti.

<sup>6</sup> Ichui Tūpa ndopai vahe rer pipe evocoi oyapo vahe iva, ivi, para guasu iyavei opacatu mbahe ipor reseve, omoingatu oñehe aipo ehi: “Nasarosa iri chietera;

<sup>7</sup> oyepotase rumo imoñuvirio ovasa Tūpa rembiguai upe güemimbi moñehe ãgua, ahese imboaviesara Tūpa remimbotar yipindar ndicuasai vahe, ahe acoi omombehu vahe güembiguai oñehe mombehusar upe aracahe” ehi.

<sup>8</sup> Ñehesa asendu vahe iva sui oñehe iri cheu aipo ehi: “Eso, tereipisi cuachiarmpi imboipri Tūpa rembiguai vireco vahe evocoi opiro vahe para guasu rese ohã, ivi rese avei no” ehi.

<sup>9</sup> Evocoyase aso Tūpa rembiguai upe, aporandu cuachiarmpi rese, ahese ahe aipo ehi cheu: “Ndo co, eipisi, ehu. Nde yuru pipe evocoyase sēhera eiri nungar, nde aviterve rumo irora” ehi cheu.

<sup>10</sup> Ahese aipisi cuachiarmpi cute Tūpa rembiguai sui, ipare ahu; yipindar sēhé che yuru pipe inungar eiri, amocopase rumo, che aviterve iró cheu.

<sup>11</sup> Evocoyase aipo ehi yuvireco cheu: “Nde ereñehe irira Tūpa aipo ehi vahe rese ambuae-ae tecua pipendar rese, ivi rupindar rese, ambuae-ae iñehe vahe rese, mborrecuar rese avei no” ehi.

## 11

### *Ñuvirio ava Tūpa recocuer mombehusar*

<sup>1</sup> Ipare ombou vara mbahe rãhasa yuvireco cheu, ichui aipo ehi yuvireco cheu no: “Erio, teresãhapa tūparo, mbahe reropovēhepri renda avei, ipare opara ereipapa ipipendar Tūpa mboeteisar retacuer” ehi.

<sup>2</sup> “Nderesãhai chira rumo ñachimbrí pipe tūparo rocar rupi. Esepia, evocoi opa imondosa ava Tūpa ndoicuai vahe upe, ahe opirora tecua nimarai vahe rese yuvireco cuarenta y dos yasi rupi” ehi.

<sup>3</sup> “Ipare ñuvirio ava amondora che recocuer mombehu ãgua opacatu ava upe mil doscientos sesenta ari rupi. Ahe omondera turucuar ipo guasu vahe yuvireco” ehi.

<sup>4</sup> Co ava ñuvirio, ahe inungar ñuvirio ivira Olivo iyavei inungar ñuvirio vera hi yuvinoha vahe ivi Yar rovai.

<sup>5</sup> Acoi que oimese ovireco mara pota vahe, ahese che reco mombehusar yuru sui osēra tata sapipa ãgua; ēgüe ehira ava omano que che reco mombehusar reco momara potasar.

<sup>6</sup> Co ñuvirío vireco opĩratasa oqui vahe mombita ãgua, acoi ari rupi che reco mombehu viteseve yuvireco; iyavei vireco pĩratasa i recuñaro ãgua tuvi pipe yuvireco, imombaraisu uca ãgua avei ivi opacatu-catu tẽi mbaherasi pipe güemimbotar rupi.

<sup>7</sup> Omboaviyepase rumo Tũpa reco mombehusa yuvireco, ahese osẽra ivicuar guasu ipicucu vahe sui mbahe ipi vai. Ahe ovavara sese, osecopira, ichui oyucara.

<sup>8</sup> Sehõgüer evocoyase yangarecuavẽhi tẽi yugüeru tecua guasu rocar rupi, ahe tecua pipe avei yande Yar oyatica curusu rese yuvireco, ahe tecua pendar upe amove ava, “Sodoma pendar nungar yuvirecoi” ehi yuvireco; “Egipto pendar nungar yuvirecoi” ehi avei yuvireco no.

<sup>9</sup> Ipare mbosapi ari yemombitesa rupi, ava-ava tẽi tecua rupindar, ava ambuae-ae tẽi vahe, iñehe ambuae vahe iyavei ambuae-ae ivi rupindar osepiaño tẽira sehõgüer yuvireco iyavei ahe noñoti ucai chietera ava upe yuvireco.

<sup>10</sup> Ava yuvirecove vahe ivi pipe, ahe oviharetera yuvireco imano rese. Ëgüe ehira sorivete, iporerrecora oyese yuvireco. Esepia, evocoi ñuvirío ava Tũpa ñehe mombehusar imombaraisupirer yuvirecoi.

<sup>11</sup> Mbosapi ari yemombite pare rumo, Tũpa opa ombogüerayevi, ahese opũhapa yuvireco. Evocoyase ava opacatu osepia vahe osiquiyé iteanga yuvireco ichui.

<sup>12</sup> Ipare ahe ñuvirío osendu yuvireco ñehesa ipĩrata vahe iva suindar aipo ehi vahe: “¡Peyeuropa ave ivate!” ehi. Evocoyase opa oyeupi ivave yuviraso iva quihã pãhu rupi oamotarẽhisareta rembiepiave.

<sup>13</sup> Aheseve voi oime ivi ririi tuvichá vahe, ichui tecua guasu imbodiesa yahocuer opa onduru; ahese siete mil tupri ava opa omano yuvireco. Evocoyase ava rumbirer, osiquiyepave tẽi osapucaí Tũpa iva pendar upe imboeteisa pipe yuvireco.

<sup>14</sup> Opa mbahe-mbahe tẽi moñuviriosa cute; ou poyava irira rumo imombosapisa.

### *Imoñuvirío ovasa Tũpa rembiguai omoñehe güemimbi*

<sup>15</sup> Imoñuvirío ovasa Tũpa rembiguai omoñehese güemimbi, ahese oyeendu ñehesa ipĩrata vahe iva suindar aipo ehi vahe:

“Yande Yar Tũpa, Sembiporavo Poropĩsĩrosar avei vireco co ivi pipendar mborerecuasa opovrive yuvireco cute.

Ahe evocoyase mborerecuar apirẽhi vaherã itera secoi” ehi.

<sup>16</sup> Evocoyase veinticuatro tupri icuapri, evocoi oguapi vahe yuvinoi Tũpa renda rovai, ahe oyeaivi omboya ité osiva ivi rese imboeteisa pipe yuvireco,

<sup>17</sup> aipo ehi:

“Aviye ndeu ore Yar, Tũpa mbahe mboavaisarẽhi, nde acoi yipisuive vahe ité, ereicoveño avei cũritei.

Esepia, nde pĩratasa tuvichá vahe pipe ereporocuai eico.

<sup>18</sup> Ambuae tecua rehii pendar nde amotarẽhí ité yuvireco.

Nde ñemoirosa rumo cũritei oyepota, iyavei nde porandusa oime voira ava omano vahe upe.

Iyavei eremondora mbahe porerecosa nde rembiguai eta nde ñehe mombehusar upe, ndeundar seco catupri vahe upe, iyavei acoi nde rer mboeteisar upe no, que seco ivate vahe upe, que seco ivi coti catu vahe upe avei no; iyavei eremocañira co ivi pipe mbahe tẽi rerusar” ehi yuvireco.

<sup>19</sup> Ahese oyemboi tũparo iva pendar, iyavei oyecua tupri cuachiar porocuita resendar riru. Ipare overa-vera, siapu guasu, osunu, ivi oririi, amanda osururú avei no.

## 12

*Cuñã iyavei mbahe ipi oporomocañi vahe*

<sup>1</sup> Evocoyase iva rese oyecua mbahe poromondiisa tuvichá vahe ambuae mbahe mboyecua água: oime cuña iturucuar inungar ari rendigüer, aviye opïro vahe yasi rese ohã, oãca yeguaca rese doce tupri yasitata vireco.

<sup>2</sup> Co cuña ipuruha oico, sãsé tẽi omembrĩ iha pota água oyesui. Esepia niha, oiporará ité tasicuer.

<sup>3</sup> Ipare coiye oyecua iva rese ambuae mbahe mboyecua tupri: mbahe ipi pĩra vahe, ahe ñaca siete tupri, sãchi evocoyase diez iyavei vireco yeguaca oãca yacatu.

<sup>4</sup> Suguai evocoyase ombotiriri yasitata iva pendar imombosapisa sui ñepeiyahocuer seraso. Ipare opa omombo ivive. Ahe evocoyase opita osãro cuña imembira pota vahe rovai ohã, “Tahupaño voi imembrĩ oha ramoseve” ehi viña.

<sup>5</sup> Ipare co cuña membrĩ oha cuimbahemi, ahe mborerecuar virecora mbococa guarepochi apopri, ipĩrata catu vahe secoira opacatu ava ivi rupindar upe. Ichui serocuasa voi serasosa Tũpa rovai.

<sup>6</sup> Cuña evocoyase oñemi ivi iporupirẽhisave oso. Aheve omoingatu Tũpa iyemboerecua água, eipeve icaru água mil dosciento sesenta ari rupi.

<sup>7</sup> Oime avei vavasa ivave; ahese Tũpa rembiguai iva pendar ivate catu vahe Miguel güeru ovoya eta ovava água mbahe ipi oporomocañi vahe upe ivoya upe avei yuvireco.

<sup>8</sup> Ndoicatui eté rumo Miguel recopi água yuvireco. Sese ndipoi eté ivave seco água yuvireco chupe.

<sup>9</sup> Ëgüe ehi imboyepepisa mbahe ipi oporomocañi vahe reco pĩratasa sembiguai eta reseve; opa imombosa ivi pipe yuvireco. Evocoi mboi vai, “Carugar” ehi vahe yuvireco chupe; “Satanás” ehi avei yuvireco chupe. Evocoi niha ava ombopa-mbopa tẽi vahe opacatu ivi pipe yuvireco.

<sup>10</sup> Evocoyase asendu ñehesa ipĩrata vahe ivave, aipo ehi vahe:

“Cũritei oime poropĩsirosa, pĩratasa iyavei yande Tũpa mborerecuasa, Poropĩsirosar mborerecuasa avei no.

Esepia niha, imboyepepisa iva sui acoi oseca-seca vahe yande rivri Tũpa reroyasareta recocuer momara água pĩtu, ari yacatu rupi yande Ru Tũpa rovai.

<sup>11</sup> Yande rivri osecoreroyi Ovesami ruvi piyere pipe sui yuvireco iyavei acoi secocuer mombehu tupri pipe sui avei no.

Esepia niha, ndosiquiyei eté güetecuer mocañi água yuvireco.

Ahe rumo oyemoingatu voi eté omano água.

<sup>12</sup> ¡Peyemboviha catu pe iva iguar peico vahe!

Pe rumo, ¡peparaisu catura ivi pipe, para guasu pipe avei peico vahe!

Esepia niha, Carugar ogüeyi pẽu oñemoirosa pipe, oicuase güeco pucuehi água” ehi.

<sup>13</sup> Ipare mbahe ipi oporomocañi vahe oicuase imombopri güecose ivi rese, ahese omoña cuña imembrĩ cuimbahemi reseve yamotarẽhisa pipe.

<sup>14</sup> Evocoi cuña upe rumo imondosaño ñuvirío vira guasu pepo iveve água chupendar ivi imoingatupri ava porẽhisave seco água, amombrĩ mbahe ipi oporomocañi vahe sui. Aheve oyopoi mbosapi araviter yemombitesa rupive.

<sup>15</sup> Ipare mbahe ipi oporomocañi vahe oyuru rupi ombotipimacua cuña raquicuei iai apo ‘tocañi tẽi’ oyapave viña.

<sup>16</sup> Ivi rumo oime co cuña pĩtivilisa, ahe oyeca. Ipare opa omoco iai evocoi mbahe ipi oporomocañi vahe rembiapo.

<sup>17</sup> Evocoyase, oñemoiró iteanga cuña rese, ipare oso ovava ambuae ichuindar rehi rese, ahe omboyeroa vahe ité Tũpa porocuaíta yuvireco iyavei yuvirecoi tupri vahe Jesucristo remimombehu rupi.

<sup>18</sup> Ipare mbahe ipi oporomocañi vahe opita para guasu popive ohã.

## 13

### *Ñuvirío mbahe ipi vai*

<sup>1</sup> Ipare asepia para guasu pipe sui osēse mbahe ipi vai, ahe siete tupri ñaca vahe iyavei diez tupri sãchi. Guãchi yacatu evocoyase vireco ñepei-pei oyeguaca, iyavei oãca yacatu rese vireco terer Tũpa upe mbahe tēi vahe.

<sup>2</sup> Co mbahe ipi vai aviye tupri acoi yaguar iparaũ vahe; iyavei ipi aviye tupri oso pi, iyuru evocoyase aviye yagua pĩta yuru. Mbahe ipi oporomocañi vahe evocoyase omondo opĩratasa iyavei omborerecuasa chupe.

<sup>3</sup> Ñepei mbahe ipi vai ãca oyeapicha guasu vahe ndoyavi omano vaheerã ité viña; ahe rumo ocuera tupri iriño evocoyase opacatu guasu ava sepiase, ndoyembovihai. Ichui viroya catu yuvireco.

<sup>4</sup> Omboetei guasu mbahe ipi oporomocañi vahe sereco yuvireco. Esepia, omondo omborerecuasa mbahe ipi vai upe. Ipare ahe avei omboetei ai yuvireco no, aipo ehi yuvireco: “Ndipoi eté mbahe ipi vai nungar, iyavei ndipoi eté ava oicatu vahe ovava vaheerã sese” ehi yuvireco.

<sup>5</sup> Iyavei mbahe ipi vai upe ipotasa iyemboivate ai ãgua oñehe pipe ava rovaque iyavei Tũpa reroĩro ãgua avei no, iyavei mborerecuar guasu seco ãgua cuarenta y dos yasi rupi.

<sup>6</sup> Ēgüe ehi iñehe mara-mara tēi Tũpa rese, iñehe-ñehe tēi avei serer maranehi rese, sēta rese, iva pendar rese avei no.

<sup>7</sup> Imondosa avei chupe vavasa apo uca ãgua Tũpa upendar ava eta upe secopi ãgua. Ipare imondosa avei mborerecuar seco ãgua chupe ava ambuae-ae tēi vahe upe, secua ambuae vahe upe, ambuae-ae tēi iñehe vahe upe, iyavei ambuae ivi rupindar upe avei no.

<sup>8</sup> Ipare omboetei ai sereco yuvireco opacatu ava ivi pipendar acoi ivi apoēhi suive ndovirecoi vahe güerer Ovesami cuachiar tecovesa resendar pipe, ahe niha acoi yucapirer.

<sup>9</sup> Que amove osendu pota vahe, toyapisacaño co rese:

<sup>10</sup> “Acoi ava oyeoquenda uca vaheerã, oyeoquenda ucaño itera; iyavei acoi ava omano vaheerã quise pucu pipe, ipipeño ité omanora.”

Co pipe oyecua Tũpa rese yeroyasa iyavei ipĩratasa ava chupendar rese.

<sup>11</sup> Ipare asepia ambuae mbahe ipi vai osē vahe ivivri sui. Co vireco ñuvirío guãchi ndoyavi tupri Ovesa rãchi, mbahe ipi oporomocañi vahe ñehe pipe rumo oñehe oico.

<sup>12</sup> Ahe vireco opacatu evocoi yipindar vahe mbahe ipi vai mborerecuasa sovaque, iyavei ava ivi pipendar yuvirecoi vahe upe omboetei uca yipindar mbahe ipi vai, ahe acoi ocuera tupri vahe oyeapichasa oyuca rãgüer sui.

<sup>13</sup> Iyavei oyapo setá mbahe poromondiisa mbahe mboyecua ãgua. Iva sui eté niha oiti uca tata ivive imbou opacatu ava rembiepiave.

<sup>14</sup> Ombopa tēi ava ivi pipendar yuvirecoi vahe mbahe poromondiisa pipe evocoi imondosa vahe yapo ãgua chupe yipindar mbahe ipi vai rovai. Ipare oporocuai yapichapri ocuera tupri vahe rahangapo ãgua imboeteisave.

<sup>15</sup> Ipare imondosa pĩratasa chupe tecovesa mondo ãgua evocoi sahanga upe ‘toñehe, toyuca uca avei ava opacatu omboeteiēhisar’ oyapave.

<sup>16</sup> Ipare ava opacatu yuvirecove vahe upe, seco mbegüemi vahe upe, seco ivate vahe upe avei, que mbahe yar upe, que iparaisu vahe upe, ava nimañecoprii vahe upe, mbiguai tēi upe, ahe chupe, “Toyecuachía opo oacato cotindarve yuvireco, anise osivave” ehi.

<sup>17</sup> Ahese ava ndipoi eté oicatu vahe mbahe rerocua, anise que mbahe mondo ãgua acoi ndovirecoise mbahe ipi vai rer, anise serer retacuer ndovirecoise oyese no.

<sup>18</sup> Iya pereco mbahecuasa co renducua tupri ãgua. Acoi osenducua vahe toicua tupri mbahe ipi vai rer retacuer. Evocoi niha ava rer retacuer. Ahe seiscientos sesenta y seis.

## 14

### *144,000 ava iporavopri sapucaisa*

<sup>1</sup> Ipare asepia Ovesami ivitri Sión rese imoha. Ahe supi yuvirecoi ciento cuarenta y cuatro mil tupri ava evocoi oicuachía vahe Ovesami rer, Tu rer avei osiva rese yuvireco.

<sup>2</sup> Ipare asendu mbahe riapu iva sui ou vahe; ndoyavii acoi itu guasu riapugüer iyavei ndoyavii eté acoi osunu vahe opororo-roró iteanga vahe; ndoyavii avei acoi ava setá vahe omoñehese arpa yuvireco, Ëgüe ehi siapugüer.

<sup>3</sup> Ipare osapucaí sapucaisa ipiasu vahe yuvireco Tūpa rovai iyavei iva pendar irungatu yuvirecove vahe rovai, icuai pri eta rovai avei no. Ñepe yepe que iva pendar ndoicatui eté evocoi sapucaisa rese oyembohe vahe. Ëgüe ehi rumo ava ciento cuarenta y cuatro mil tupri yuvirecoi vahe, evocoi oñepisiro vahe ivi pipendar pãhu sui, ahe güeraño tupri ité oicatu osapucaí yuvireco.

<sup>4</sup> Co ava ndoyapoi vahe ité mbahe co coti tēi cuña rese. Esepia, oñearo tupri güeco catupri sa pipe yuvireco; iyavei osaquicue moñaño ité Ovesami que iguatasa rupi. Opa serocuasa ava pãhu sui iyavei inungar yipindar mbahe seropovēhepri Tūpa upe, Ovesami upe avei.

<sup>5</sup> Ndipoi eté que temira sese. Esepia niha, ndipoi eté mbahe oyavi vahe yuvireco.

### *Mbosapi Tūpa rembiguai omombehu ñehe ava upe yuvireco*

<sup>6</sup> Evocoiyase asepia ambuae Tūpa rembiguai iva pendar oveve vahe iva mbiter rupi iyavei vireco Tūpa Ñehengagüer p̄sirosa resendar ndopai vahe imombehu ñgua opacatu ava co ivi pipendar upe: opacatu ivi rupindar upe, ava ambuae-ae vahe upe, ñehe ambuae-ae vahe upe, opacatu tecua rupindar upe avei no.

<sup>7</sup> Ipare oñehe p̄rata aipo ehi: “Pesiquire Tūpa sui iyavei pesapucaí seco ivatesa rese chupe no. Esepia niha, cūritei oyepota ari chupe ava recocuer rese iporandu ñgua. Pemboetei catu oyapo vahecuer iva, ivi, para guasu, i ohē vahe avei no” ehi.

<sup>8</sup> Ambuae Tūpa rembiguai iva pendar raquicuerindar aipo ehi oico: “¡Oviapi Babilonia guasu cute! ¡Esepia niha, evocoi opa ombosavaipo opacatu ambuae tecua pendar ohigua yemboaguasa tēisa resendar pipe!” ehi.

<sup>9</sup> Ipare ambuae Tūpa rembiguai iva pendar imombosapisa, saquicue moña aipo ehi p̄ratá iri oico: “Acoi que ava omboetei vahe mbahe ipi vai sereco, sahanga avei no, iyavei acoi oyembohe catu vahe oyecuachía ñgua osiva rese, que opo rese no,

<sup>10</sup> oipisi itera Tūpa ñemoirosa ip̄rata vahe ité; ipare omombaraisura setecuer azufre ocai vahe pipe güembigui iva pendareta reco maranehi rovaque, Ovesami rovaque avei no.

<sup>11</sup> Tātachi icaigüer pendar evocoiyase oyeupira ndopai vahe, ahese ndipoi chietera pituhusa p̄tu, ari pipe evocoi mbahe ipi vai mboeteisar upe, sahanga mboeteisar upe avei no, iyavei acoi vireco vahe serer cuachiapri oyese yuvireco no” ehi.

<sup>12</sup> ¡Ëgüe ehira Tūpa rese ité yuvirecoi vahe yeroyasa oyecua ahe acoi iporocuita mboaviye tuprisar, Jesús reroya tuprisar avei yuvireco!

<sup>13</sup> Ahese asendu ñehesa iva pendar aipo ehi vahe cheu: “Eicuachía co: Co pipe suive sorivete catura acoi ava omano vahe yande Yar rese yuvireco” ehi.

“Ëgüe ehi eté —ehi Espiritu imombehu—, opituhura oporaviquisa sui yuvireco. Esepia, mbahe sembiapo rerãcua osora ivave supi” ehi.

### *Ivi pipendar recoñhasa*

<sup>14</sup> Ahese asepia iva quihá morochí vahe; iharive ndoyavii ava oguapi vahe oí. Vireco niha oyeguaca oro apopri oãca rese iyavei mbahe miti asiãsa saimbé vahe vireco opove.

<sup>15</sup> Ipare osē ambuae Tūpa rembiguai tūparo sui. Ahe osapucaí p̄rata evocoi iva quihá harive chini vahe upe: “¡Eyasia nde remiti iyavei emonuhá nde rembiasia! ¡Esepia, nde remiti ivi pendar yaviye ité!” ehi ava recocuer uve chupe.

16 Evocoyase evocoi chini vahe oyasia güemiti ivive oico, ahese opa omonuha güembiasia.

17 Ipare osē ambuae Tūpa rembiguai tūparo sui, ahe avei vireco mbahe miti asiasa saimbé vahe.

18 Ipare ambuae Tūpa rembiguai osē mbahe reropovēhepri renda sui, ahe tata rese hañecosar secoi. Iyavei oñehe pīrata evocoi vireco vahe mbahe miti asiasa upe aipo ehi: “¡Eyasia uva ha apacuar, evocoi oime vahe ivi pipe! ¡Esepia niha, opa yavīye!” ehi.

19 Evocoyase co Tūpa rembiguai inungar oyasia vahe uva ha ēgüe ehi opa ava ipeha ivi pipendar. Ipare opa oyapocatu Tūpa ñemoirosa rāro āgua.

20 Ipare inungar uva ha icambepri tecua cupeve, ēgüe ehi co ava imombaraisu; ichui osē tuvi evocoi tipigüer oyepota ité cavayu yuru penda rupi eté sese, ahe ipucucuer trescientos kilómetros tupri ité.

## 15

### *Ipa siete tupri Tūpa rembiguai güeru mbaherasi yuvireco*

1 Ipare asepia ivave ambuae mbahe mboyecuasa tuvichá vahe poromondiisa: siete Tūpa rembiguai, siete tupri mbaherasi ipa vahe vireco vahe, ahe ipá vahe ité Tūpa ñemoirosa.

2 Iyavei asepia para guasu ndoyavii yepiasa oyeseha vahe tata rese. Ahe ipopive yuvinoha ati mbahe ipi vai recopisar, sahanga recopisar iyavei nomondo uca potai vahe serer cuachía āgua yuvireco oyese. Ahe vireco Tūpa upendar arpa yuvireco.

3 Ipare osapucaí Tūpa rembiguai Moisés sapucaisa yuvireco, iyavei Ovesami sapucaisa aipo ehi:

“Tuvichá opacatu mbahe nde rembiapo, che Yar Tūpa opacatu mbahe mboavaisarēhi; nde recocuer supi tupri vahe ité; seco ivi vahe.

¡Too, nde mborerecuar guasu opacatu ivi rupindar ereico!” ehi.

4 “Yar, nde sui opacatu ité osiquiyera yuvireco nde mboetei āgua.

Nde güeraño ité ereico seco maranehi vahe, opara yugüeru opacatu ambuae tecua rupindar iyavei nde mboeteira yuvireco. Esepia niha, sepiasa nde rembiapo supi tupri vahe” ehi.

5 Ipare asepia ivave oyemboise Tūpa rēta imaranehi vahe. Aheve acoi yapocatusa mborocuita resendar.

6 Evocoyase ichui yuvino-sepa evocoi siete Tūpa rembiguai vireco vahe siete tupri mbaherasi vai yuvireco. Ahe iturucuar secose vahe, ndiquihai vahe, sendí iteanga. Vumbicua ipe vahe oro apopri pipe evocoyase oyeumbicua opochiha rupi tupri yuvireco.

7 Ipare ñepeí evocoi irungatu iva pendar yuvirecove vahe pāhu pendar omondo siete tupri Tūpa rembiguai upe siete Tūpa ñemoirosa riru oro apopri, ahe oicove vahe ité, ndopai vahe.

8 Ipare Tūpa rēta omboapipo tātachi, evocoi ou vahe Tūpa reco porañetesa iyavei ipīratasa sui. Aheve ndiyai eté que ava upe seique āgua acoi opase voi eté omomba siete tupri mbaherasi vai vireco vahecuer siete Tūpa rembiguai.

## 16

### *Siete Tūpa ñemoirosa riru*

1 Evocoyase asendu ñehesa ipīrata vahe osē vahe Tūpa rēta pipe sui. Ahe aipo ehi siete Tūpa rembiguai yuvirecoi vahe upe: “Peso, tapeipiyerepa ivi hari rupi evocoi siete tupri mbahe riru pipendar Tūpa ñemoirosa” ehi.

<sup>2</sup> Yipindar vahe Tūpa rembiguai opa oipiyere igua riru pipendar ivi hari rupi; evocoi opacatu ava vireco vahe mbahe ipi vai rer oyese sahanga mboeteisar tēi avei, ahe chupe oime setá caracha vai tasi vahe.

<sup>3</sup> Tūpa rembiguai imoñuviriosa opa oipiyere igua riru pipendar para guasu pipe. Ahe evocoyase oyeapo omano vahe ruvi nungar; ichui opa omano opacatu mbahe yuvirecove vahe ipipe.

<sup>4</sup> Tūpa rembiguai imombosapisa opa oipiyere igua riru pipendar iai pipe, i ohē vahe pipe avei no. Ipare opa ahe oyeapo tuvi yuvireco.

<sup>5</sup> Co pare asendu Tūpa rembiguai i rese ihañeco vahe ñehesa aipo ehi: “Nde seco tupri vahe ité ereico evocoi ava upe eremouse nde ñemoirosa, che Yar Tūpa, seco maranehi vahe.

Nde yipisuiendar ité ereico.

<sup>6</sup> Esepia, ahe opa oyuca ndeundar ava iyavei nde ñehes mombehusar yuvireco.

Cūrítei rumo eremboihu uca tuvi pipe.

¡Evocoi nungar upe aviyesa rupi eté!” ehi.

<sup>7</sup> Asendu avei ambuae ñehesa mbahe reropovēhesa renda sui aipo ehi vahe: “Supi eté, che Yar Tūpa, opacatu mbahe mboavaisarēhi, nde ava recocuer mombaraisusa supi tupri vahe ité iyavei nde reco ivi vahe ité no” ehi.

<sup>8</sup> Tūpa rembiguai imoirungatusa, opa oipiyere mbahe riru pipendar ari rese, ipare ari upe imondosa pīratasa ava rapipa āgua.

<sup>9</sup> Ipare opacatu ité ava yuvirocaipa tupri; ndoyevii eté rumo Tūpa upe iyavei nomboeteiño ité yuvireco. Ēgüe ehi rumo iñehes mara-mara tēiño mbaherasi rerecose Tūpa upe yuvireco.

<sup>10</sup> Tūpa rembiguai imbopoyandeposa oipiyere mbahe riru pipendar mbahe ipi vai renda rese. Ahese aviyeteramo tēi sereciar ipovri pendar avei pītumimbisave yuvirecoi. Ava evocoyase oñeapicusuhu-suhu tēi yuvireco mbahe rasiouer pāhuve;

<sup>11</sup> ndopoiño ité rumo mbahe-mbahe tēi aposa sui yuvireco, ahe rumo iñehes mara-mara tēiño Tūpa ivate vahe rese oyeupe mbahe tasi vahe pāhuve yuvireco.

<sup>12</sup> Tūpa rembiguai imoñepepe ovasa oipiyere mbahe riru pipendar iai guasu Eufrates pipe. Ahe evocoyase opa ipiru peri apo āgua añihivei coti sui mborerecuareta yu āgua.

<sup>13</sup> Ipare asepia mbahe ipi oporomocañi vahe, mbahe ipi vai, ndahei vahe Tūpa ñehes mombehusar supi vahe avei, ahe yuvirecoi vahe yuru rupi yuvinose mbosapi caruguar vireque nungar.

<sup>14</sup> Co Caruguar suindar yuvirecoi, ahe oyapo poromondiisa mbahe mboyecuasa yuvireco. Ipare opa yuvinose opacatu ivi rupi mborerecuareta monuha āgua vavasave nara, acoi ari cañi pipe Tūpa mbahe mboavaisarēhi amotarēhisave.

<sup>15</sup> “Peyapisaca tupri che ñehes rese, che aviyeteramo tēi ayura imonda rai vahe nungar curi. Sorivetera acoi ava imahemoha vahe oyemonde tupri vahe güembiapo aviyé vahe pipe. Ahese nochi chietera oico che sui” ehi.

<sup>16</sup> Ipare opa omonuha mborerecuareta hebreo ñehes pipe serer Armagedón ve.

<sup>17</sup> Evocoyase imbosietesa Tūpa rembiguai oipiyere iñemoirosa mbahe riru sui ivitu rupi. Ipare iva pendar Tūpa rēta pipe sui osē ñehes ipīrata vahe evocoi ou vahe senda sui: “¡Opa ité yaposa cute!” ehi.

<sup>18</sup> Ahese oime overa vahe, mbahe siapu guasu vahe iyavei osunu vahe. Ipare ivi oriri ipīrata catu vahe opacatu ivi riri sui ava yuvirecove vitesese ivi pipe.

<sup>19</sup> Tecua guasu oyeca-yeca mbosapi rupi, opacatu tecua evocoyase opa onduru ivi pipendar. Ipare Tūpa oyemomahenduha evocoi tecua guasu Babilonia pendar rembiapo ai rese, evocoyase omondo oñemoirosa ipīrata catu vahe chupe.

<sup>20</sup> Opacatu caha pāhu, ivitri avei ocañipa ité yuvireco.



<sup>21</sup> Iyavei yuvireoviapipa iva sui ava harive amanda guasu, ahe iposigüer cuarenta kilos rutei. Ava rumo ñehe mara-mara tēiño vite ité Tūpa upe yuvireco amanda sui tēi. Esepia niha, evocoi Tūpa poronupasa ivaté catu vahe.

## 17

### *Cuña oyemondo-mondo tēi vahe mocañisa*

<sup>1</sup> Siete Tūpa rembiguai vireco vahecuer mbahe riru yuvireco, ipāhu pendar ñepeu ou aipo ehi cheu: “Erio, amboyecua co cuña yaguasa serai vahe upe ñemoirosa ndeu, ahe evocoi uguapi i harive oĩ” ehi.

<sup>2</sup> “Co cuña rese yaguasa-guasa tēi mborerecuareta ivi pipendar yuvireco iyavei ava ivi pipendar inungar osavaipo vahe ndopoi potai eté oyemboaguasasa sui yuvireco” ehi cheu.

<sup>3</sup> Ipare che quer nungar pipe Espiritu omboyecua vahe cheu, Tūpa rembiguai iva pendar che reraso ava porēhisave. Aheve asepia cuña mbahe ipi vai pira vahe harive chini. Evocoi mbahe ipi vai opacatu rupi oyapete tupri ñehesa vai Tūpa amotarēhisa sereco oyese, iyavei vireco siete tupri oāca, diez tupri guāchi.

<sup>4</sup> Co cuña turucuar, suendi vahe, pira vahe avei no, iyavei oyemoendi yai oro pipe oico, ita iporañete ai vahe pipe, opohir pipe avei no. Vireco igua riru oro apopri. Ipipe omboapipo mbahe yavaeté vahe sereco oyemboaguasa-guasa tēisa;

<sup>5</sup> iyavei icuachiapri isiva rese terer ndicuasai vahe aipo ehi vahe: “Co Babilonia guasu, cuña yaguasa-guasa tēi vahe si, opacatu ava ivi pipendar secocuer yavaeté vahe si avei no” ehi.

<sup>6</sup> Ipare aicua evocoi cuña osavaipo vahe oĩ Tūpa reroyasar ruvi pipe iyavei acoi Jesús recocuer mombehusa sui tēi yucapri vahe ruvi pipe avei no.

Co asepiase che quer nungar pipe, ndache mbovihai eté.

<sup>7</sup> Ahese ahe Tūpa rembiguai iva pendar aipo ehi cheu: “¿Mahera vo nderevihai eico? Aicua ucara mo ndeu co imombehusa ndicuasai vahe cuña resendar, iyavei acoi mbahe ipi vai vireco vahe siete tupri oāca, diez tupri avei acoi sāchi” ehi.

<sup>8</sup> “Acoi mbahe ipi vai eresepia vahe ahe yipive secoi vahe, cūritei rumo ndipo iri; osēra rumo ivicuar guasu ipicucu vahe sui omano āgua renonde curi. Acoi ava ivi pipendar ndovirecoi vahe güerer cuachiar tecovesa resendar pipe yuvireco yipive ivi apoēhiseve, ahe ndovihai chira yuvireco osepiase evocoi mbahe ipi vai yipive oicove vahe viña, ndoicove iri rumo, oyevi irira curi.

<sup>9</sup> “Co rese icuasara uma vireco mbahecuasa senducua āgua: Co siete tupri vahe ñaca ahe omombehu ‘siete tupri ivitri’ oyapave. Ahe iharive evocoi cuña uguapi oĩ iyavei ahe siete ñaca avei omoporēhi ‘siete tupri mborerecuar’ oyapave.

<sup>10</sup> Cinco tupri mborerecuar evocoi ipāhu pendar ndipo iri yuvireco, ñepeño evocoyase oporocuai cūritei oico, ambuae rumo ndou vitei. Ouse rumo ipandar, ou raimi tēira.

<sup>11</sup> Mbahe ipi vai secoi vahe yipindar, ndoicove iri cūritei, ahe imbohochosa secoira mborerecuarā, yepe siete tupri vahe mborerecuar guasu mboetasa viña, ahe rumo ocañi tēi vahe rā secocuer” ehi.

<sup>12</sup> “Evocoi diez tupri vahe sāchi, ahe mborerecuar diez tupri ndoyuviroique vitei vahe oporocuai vahe rā yuvireco. Oyoya rumo oporocuai raimi tēira mbahe ipi vai reseve yuvireco curi.

<sup>13</sup> Co diez tupri mborerecuar yuvirecoi vahe oyoya guasura ipihañemoñeta evocoi mbahe ipi vai upe omondo vahe rā pīratasa iporocuai āgua yuvireco.

<sup>14</sup> Ipare ovavara Ovesami rese yuvireco; Ovesami rumo osecoreroyira. Esepia niha, ahe yande Yar opacatu ava Yar iyavei mborerecuar guasu secoi no opacatu mborerecuareta rerecuar, iyavei acoi ava yuvirecoi vahe sese, ahe senoipri yuvirecoi iyavei iporavopri oyemoviracuaño vahe ité supi uguata āgua yuvireco” ehi.

<sup>15</sup> Iyavei Tūpa rembiguai aipo ehi cheu: “Evocoi para guasu erese pia vahe, iharive cuña yaguasa-guasa tēi vahe oguapī oī, ahe ‘ava rehīi tecua yacatu rupindar, iñehe ambuae-ae vahe iyavei opacatu ambuae tēi vahe ivi rupindar’ oyapave.

<sup>16</sup> Evocoi erese pia diez tupri vahe sāchi mbahe ipi vai rese, ahe ndoyambotai chira cuña yaguasa-guasa tēi vahe; iyavei osequiī tupri seya; ohupara soho, ipare opara osapi.

<sup>17</sup> Tūpa niha omondo ipiha pipe mbahe güemimbotar apo āgua ‘ahe toyemonguerēhi yuvireco omborerecuasa mondo āgua mbahe ipi vai upe; tomboaviye rane ité che remimombhugüer yuvireco’ oyapave.

<sup>18</sup> Iyavei evocoi cuña yaguasa-guasa tēi vahe erese pia vahe, evocoi niha tecua guasu ivi pipendar mborerecuareta vireco vahe opovrive yepi” ehi Tūpa rembiguai cheu.

## 18

### *Babilonia viapi agüer*

<sup>1</sup> Ipare ase pia ambuae Tūpa rembiguai ipirata vahe ogüeyi vahe iva sui. Vireco omborerecuasa ivate vahe, ahe sendigüer osesape tupri ivi rupi.

<sup>2</sup> Iyavei oñehe pīrata oico aipo ehi:

“¡Oviapi tecua Babilonia cute!

Carugar yuviroique sese, opacatu carugar naporai vahe iyavei vīrai vai nungar yuviroique sese.

<sup>3</sup> Esepia niha, opacatu ambuae ivi rupindar inungar osavaipo vahe ndopoi potai eté yemboaguasasa sui, evocoyase mborerecuareta ivi pipendar oyapo mbahe tēi yuvireco sese, iyavei mbahe mboepisar ivi pipendar oyemombahe eta imbahe porañete ai vahe pota raisa pipe sui yuvireco” ehi.

<sup>4</sup> Evocoyase asendu ambuae ñehesa iva sui ou vahe, ahe aipo ehi:

“Peyepipi evocoi tecua guasu sui, pe peico vahe cheundar evocoi yangaipa rese imboyoyaēhi āgua.

Iyavei ñepe yepi taperupiti eme imbaherasisa.

<sup>5</sup> Esepia niha, yangaipagüer oyepota ité ivave.

Tūpa evocoyase oyemomahenduha mbahe-mbahe tēi sembiapogüer rese chupe.

<sup>6</sup> Inungar ahe ambuae upe, ēgüe peye tupri avei chupe; pemboepi ñuvirío rupi mbahe sembiapogüer chupe; pemomirata catu mbahe igua ñuvirío rupi pemboyeseha imondo chupe;

<sup>7</sup> pemondo setecuer mombaraisusa chupe, tiparaisu tahoyoya iyemondo-mondo tēi agüer iyemboetei ai agüer rese avei no.

Esepia niha, ahe aipo ehi opiha pipe oico:

‘Cohave che aguapī vīte mborerecuar che reco nungar pipe.

Ndahei imer mano vahecuer che aico, iyavei ndacheparaisui chietera’ ehi viña.

<sup>8</sup> Sese niha aviyeteramo tēi oura mbaherasisa chupe:

paraisusa, tieporēhi, manosa; ipare sapisara.

Esepia niha, yande Yar Tūpa mbahe mboavaisarēhi secoi, ahe, ‘Tomano’ ehi chupe” ehi.

<sup>9</sup> Evocoyase mborerecuar ivi pipendar yuvirecoi vahe co cuña resendarer, chupe oyemondo-mondo tēi vahecuer imbahe eta rese, oyaseho tēira yuvireco iyavei ndoyembovihai chira sese osepiase evocoi cuña rātachi yuvireco curi.

<sup>10</sup> Opitañora amombrive osiquiyepave, iparaisusa sui aipo ehi tēira yuvireco:

“¡Ndeparaisu catu, tecua guasu Babilonia, nde reco pīrata vahe tie viña!

Esepia niha, co aviyeteramo tēi ou nde mombaraisu catusa” ehira yuvireco.

<sup>11</sup> Evocoyase ava mbahe mboepisar ivi pipendar yuvirecoi vahe, ahe avei oyaseho tēira iyavei ndoyembovihai chietera evocoi tecua rese yuvireco. Esepia niha, ndipo iri chietera que vīrocua vaherā imbahe yuvireco ichui,

<sup>12</sup> co opacatu mbahe sepi vaherã ahe: oro, guarepochi, ita iporañete ai vahe, mbohîr sendi vahe, turucuar secose vahe, turucuar sendi vahe, iyavei pîraumbi vahe, pîra vahe no; iyavei opacatu-catu tēi ivirape sîacua vahe; mbahe-mbahemi marfil apopri, ivira icatupri vahe apopri, bronce apopri, guarepochi apopri, mármol avei;

<sup>13</sup> mbahe serocuapri yahu vahe canela, tembihu moiacuasa; itaisi, mirra, mbahe sîacua vahe; uva ricuer, mbahe quira, trigo cuhi aviye vahe, trigo avei; iyavei mbahe mimba ovosii vahe no, ovesa, cavayu, cãretomi iyavei mbiguai no.

<sup>14</sup> Aipo ehi tēira yuvireco co tecua guasu upe:

“¡Nderereco iri acoi mbahe ha ereipota etepri vahe; iyavei eremocañi tēi apirēhi opacatu nde mbahe eta nde yemboeteisa avei!” ehirã.

<sup>15</sup> Evocoyase evocoi mbahe mboepisareta oyemombahe eta vahecuer co mbahe rese tecua guasu sui, ahe opitañora amombrive osiquiyepave iparaisusa repiase yuvireco. Oyaseho tēira iyavei ndoyembovihai tēi chira yuvireco no,

<sup>16</sup> iyavei aipo ehi tēira yuvireco:

“¡Too! ¡Iparaisú iteanga tecua guasu pendar!

Inungar tie cuña acoi oyemonde tupri vahecuer secoi cuese viña iyavei iturucuar suendi,

pîra vahe; oro pipe oyemboetei vahecuer,

itami iporañete vahe pipe iyavei mbohîr sendi vahe pipe oyemboetei vahe no.

<sup>17</sup> ¡Aviyeteramo tēi rumo opa ocañi imbahe eta ichui!” ehi.

Evocoyase opacatu ava carite guasu pipendar rerecuar, ava imbehi ivirindar carite guasu reroguatasar, i rupi oporaviqui vahe oyeupe nara mbahe rereco ãgua, ahe opaño opita amombrive yuvireco ichui

<sup>18</sup> iyavei co tecua rãtachi repiase, ahese osapucaí pîrata tēi yuvireco: “¡Ndipoi eté niha yipisui tecua na ehi vahe!” ehi yuvireco.

<sup>19</sup> Ipare imboasipave omondo ivi cuhi oãcave yuvireco, oyaseho iyavei ndoyembovihai tēi, ipare osapucaí tēi yuvireco aipo ehi:

“¡Too! ¡Iparaisu catu tecua guasu pendar!

Esepia niha, evocoi tecua guasu mbahe eta pipe sui ava i rupi oporaviqui vahe oyemombahe yar yuvireco viña.

¡Aviyeteramo tēi rumo opa ocañi!” ehi.

<sup>20</sup> Peyembovihaiño evocoi tecua rese, pe iva pendar, iyavei opacatu chupendar peico vahe, pe no Jesús apóstol peico vahe,

opacatu Tûpa ñehe mombehusar peico vahe avei no.

Esepia niha, co tecua omocañisa pipe Tûpa oyapo mbahe tupri pēu nara.

<sup>21</sup> Ahese Tûpa rembiguai iva pendar seco pîrata vahe osupi ita inungar mbahe mbocuhisa, ipare omombo para guasu pipe aipo ehi:

“Na ehi aveira tecua guasu Babilonia mocañisa.

Imombopri secoira.

Ipare ndapesepia iri chietera apirēhi vaherã” ehi.

<sup>22</sup> “Ndasendusa iri chietera ocar rupi arpa moñehesar, mimbî moñehesar, iyavei mimbî guasu moñehesar avei no; ndererecoi chietera ava oporaviqui vaherã, ndasendusa iri chiaveira ita mbahe mbocuhisa monarasa nde suindar.

<sup>23</sup> Iyavei ñepeí yepe que tataendi ndosesapei chietera ndeu, ndasendusai chiaveira ava aivu mendasa rupi, yepe niha nde ava upe mbahe mondosar seco pîrata etepri vahe opacatu rupi ereico viña.

Iyavei erembopa-mbopa tēi opacatú ambuae tecua rupindar eico nde payesa pipe” ehi Tûpa rembiguai chupe.

<sup>24</sup> Esepia niha, evocoi tecua guasu pipe oyecua Tûpa ñehe mombehusar ruvi, Tûpa upendar ava ruvi, iyavei opacatu ava yucapri vahe ivi pipendar ruvi avei.

## 19

<sup>1</sup> Co pare, asendu ava rehiñ ñehe pĩrata ivave aipo ehi vahe:

“¡Imboeteipri yande Yar tasecoi!

Poropĩsĩrosa, teco porañetesa iyavei ipĩratasa ahe yande Ru Tũpa suindar.

<sup>2</sup> Esepia niha, ahe oyapo mbahe supi eté vahe,

‘Tocañi’ ehise co cuña oyemboaguasa-guasa tẽi vahe nungar tecua guasu upe evocoi niha oseco momara tẽi vahe ava ivi pĩpendar güeco rai pĩpe; ichui Tũpa osepi oyeupendar” ehi.

<sup>3</sup> Ipare aipo ehi iri yuvireco no:

“¡Imboeteipri yande Yar tasecoi!

Esepia niha, evocoi tecua rãtachi ndopai chietera” ehi.

<sup>4</sup> Evocoyase veinticuatro tupri iva pendar icuapri yuvirecoi vahe iyavei irungatu iva pendar yuvirecove vahe, ahe Tũpa mboeteisa pĩpe oyeavi ivi rese yuvireco. Ipare aipo ehi yuvireco no: “¡Ëgüe tehi! ¡Imboeteipri yande Yar tasecoi!” ehi.

<sup>5</sup> Evocoyase Tũpa renda sui tupri oyeendu ñehesa aipo ehi vahe:

“¡Pemboetei yande Ru Tũpa opacatu peroya vahe, que seco ivi coti catumi vahe, que seco ivate vahe avei, pe pesiquiye vahe imboyeroya ãgua!” ehi.

### *Pieta mendasa Ovesami resendar*

<sup>6</sup> Asendu avei ava rehiñ ñehe, inungar acoi itu guasu riapu, ndoyavi avei osunú guasu vahe aipo ehi:

“¡Imboeteipri yande Yar tasecoi!

Esepia niha, yande Yar Tũpa opacatu mbahe mboavaisarẽhi omboipi oporocuai.

<sup>7</sup> Tayayembovaha catu yaico iyavei tayamondo yande viharetesa, yande sapucaisa yande Ru Tũpa upe.

Esepia niha, cũritei oyepota mendasa ari Ovesami upendar.

Sembireco evocoyase opa oyemoingatu oico:

<sup>8</sup> chupe ipotasa iyemonde ãgua turucuar secose vahe, ndiquihai, sendi vahe pĩpe.

Esepia niha, co turucuar secose vahe ‘Tũpa rese yuvirecoi vahe recocuer ihivi vahe’ oyapave aipo ehi” ehi.

<sup>9</sup> Evocoyase Tũpa rembiguai, “Na ere icuachia: ‘Sorivete catu acoi ava mendasave ichohopri yuvireco’ ere” ehi cheu. Iyavei aipo ehi cheu no: “Co niha Tũpa ñehesa supi tupri vahe ité” ehi.

<sup>10</sup> Ipare añenopiha Tũpa rembiguai rovai imboetei ãgua. Ahe rumo aipo ehiño cheu: “Ëgüe erei rene. Esepia, che Tũpa rembiguai tẽi aico nde nungar iyavei nde rivireta nungar oguata vahe Jesús ñehengagüer rupi. Emboetei Tũpa” ehi.

Esepia niha, evocoi Jesús recocuer mombehusar moñehe ucasar, ahe niha acoi omombehu uca vahe Tũpa ñehe mombehusar upe.

### *Cavayu morochi vahe rerogatasar*

<sup>11</sup> Evocoyase asepi iva oyemboi vahe. Aheve aviyeteramo tẽi cavayu morochi vahe oyemboyecua, evocoyase ava sese oyeupi vahe rer: “Ocuaita-omboaviye-tupri-vahe iyavei Supi tupri vahe” ehi. Esepia, güeco ivisa pĩpe oporocuai iyavei oyapo vavasa.

<sup>12</sup> Sesa evocoyase ndayaviyei eté acoi tata rendigüer; iyavei oãca rese setá vireco oyeguaca, iyavei vireco terer icuachiapri oyese; ahe güeraño ité oicua.

<sup>13</sup> Iturucuar evocoyase imopirapri tuvi pĩpe; serer evocoyase, “Tũpa Ñehe” ehi.

<sup>14</sup> Sundao rehiñ iva pendar saquicuerive yuvirecoi. Iturucuar secose vahe pãve morochi vahe, ndiquihai vahe avei. Ahe cavayu morochi vahe harive yuvirecoi.

<sup>15</sup> Iyuru pĩpe sui osẽ quise pucu saimbe vahe opacatu ambuae-ae tecua rupindar momara ãgua. Ahe oyocuaia oamotarẽhisar guarepochi apopri opo pendar pĩpe. Iyavei

osecoãhara inungar uva opive otiamii vahe yuvireco iyavei omboihura evocoi uva ricuer paraïsu catusa resendar pipe. Ahese Tũpa mbahemboavaisarẽhi oñemoïro itera chupe.

<sup>16</sup> Oturucuar popi rese vireco icuachiapri ohivipi rese avei aipo ehi vahe: “Mborerecuareta rerecuar guasu iyavei ava Yar ivate catu vahe” ehi.

<sup>17</sup> Ipare asepia Tũpa rembiguai opũha vahe arisave. Ahe osapucaï pĩrata opacatu vĩrai mbahe rohoguar upe oveve vahe ìva rese: “¡Perio! ¡Peñemonuha Tũpa suindar carusa guasusave;

<sup>18</sup> pehu co mborerecuareta roho, sundao eta rerecuar roho iyavei ava oico eté vahe roho, cavayu roho, ihari pendar roho avei, opacatu ava roho ava nimañecosai vahe roho, mbiguai roho, seco ìvi coti catumi vahe roho, seco ivate vahe roho avei!” ehi.

<sup>19</sup> Ahese asepia mbahe ipi vai iyavei mborerecuareta ìvi pipendar osundao reseve-seve. Ahe oñemonuha yuvireco ovava ãgua evocoi cavayu hari pendar rese iyavei isundao rese avei no.

<sup>20</sup> Co mbahe ipi vai yipindar vahe soquendasa, oyoya evocoi Tũpa ñehe mombehusar angahu tẽi rese. Ahe acoi oyapo vahe mbahe yavai rai vahe yipindar mbahe ipi vai rovaque, evocoi mbahe yavai rai vahe apo pipe ombopa-mbopa tẽi ava, acoi seroyasar vireco vahe mbahe ipi vai rer oyese iyavei omboetei vahe sahanga yuvireco. Evocoiyase co mbahe ipi vai iyavei Tũpa ñehe mombehusar angahu tẽi, ahe opa imombosa secove reseve ipa azufre ocai vahe pipe yuvireco.

<sup>21</sup> Ambuae evocoiyase evocoi cavayu morochi vahe hari pendar yuru pipe sui osẽ vahe quise pucu pipe opa omano yuvireco. Evocoiyase opacatu vĩrai mbahe rohoguar opa soho pipe oyemohitaro yuvireco.

## 20

### *Mil araviter resendar ñehesa*

<sup>1</sup> Ipare asepia Tũpa rembiguai ogũeyi vahe ou ìva sui ìvicuar guasu ipicucu vahe mboyasar iyavei carena ipo guasu vahe opove vireco.

<sup>2</sup> Ipare oipisi mbahe ipi oporomocañi vahe mboi nungar aracahendar, ahe niha Caruguar secoi, Satanás serer vahe; ahe oicuhacua carena pipe mil araviter rupi imoi.

<sup>3</sup> Ahese omombo ìvicuar guasu ipicucu vahe pipe. Aheve osoquenda. Omondo sello soquenda rese opacatu ambuae-ae tecua rupindar mbopa-mbopa tẽi iriẽhi ãgua rese acoi osupitise voi mil araviter. Coiye rumo mil araviter pare, imosesa raimi tẽira.

<sup>4</sup> Ipare asepia tenda, iharive setá ava uguapi yuvinoi evocoi oipisi vahe omborecuasa yuvireco ava upe mbahe rese porandu ãgua. Iyavei asepia ava hã evocoi opa vahecuer oyasia ñaca yuvireco Jesús recocuer mombehusa sui tẽi iyavei Tũpa Ñehengagũer mombehusa pipe sui tẽi avei. Ahe ava nomboetei vahe mbahe ipi vai yuvireco; sahanga avei nomboetei yuvireco no; iyavei nomondo ucai vahe avei osiva rese serer yuvireco, opo rese avei. Ahe asepia opa ocuerayevi yuvireco. Ipare oporocuai Cristo rese mil araviter rupi yuvireco.

<sup>5</sup> Ahe co yipindar vahe cuerayevisa. Ambuae ava omano vahe rumo ndocuerayevi iri eté yuvireco osupitise voi mil araviter.

<sup>6</sup> ¡Sorivete catu acoi ava vireco vahe yipindar cuerayevisa yuvireco! ¡Esepia niha, ahe Tũpa upendar ité yuvirecoi! Imoñuviriosa manosa evocoiyase chupe ndipo iri eté. Ñgũe ehira rumo ahe Tũpa upe naraño ité pahi yuvirecoira, Cristo upe avei. Ipare mborerecuar yuvirecoira sese mil araviter rupi.

### *Caruguar recopisa*

<sup>7</sup> Acoi osupitise rumo mil araviter cute, ahese Caruguar yorasara soquendasa sui.

<sup>8</sup> Ichui osẽra opacatú ava ìvi pipendar mbopa-mbopa tẽi oico; osẽra ìvi Gog mbopa tẽi ãgua, ìvi Magog mbopa tẽi ãgua avei. Ipare omonuhara vavasave nara isundao eta. Esepia niha, ahe sehii etepri yuvireco inungar ìvi cuhi para guasu popi rupindar.

<sup>9</sup> Ëgüe ehi yugüeru ati amombri sui, oyerepa tupri Tüpa recua rese yuvireco no, evocoi tecua Jerusalén sembiasu rese avei. Tüpa rumo ombou tata iva sui, ahe ipipe opa tupri ité osapi.

<sup>10</sup> Caruguar evocoyase, ava mbopa-mbopa tēisar, ahe opa imombosa ipa azufre ocai vahe pipe. Aheve acoi opa imombosa mbahe ipi vai iyavei Tüpa ñehe mombehusar angahu tēi vahe avei no. Aheve iparaisura pītu, ari yuvireco apirēhi vaherã.

*Tüpa oguapira güendave ava recocuer rese porandu ãgua ari ipa vahe pipe*

<sup>11</sup> Evocoyase asepia tenda imboeteipri, morochi vahe. Iharive oime ava oguapi vahe oĩ. Sovai ivi iyavei iva opa ocañi tupri tēi. Ndoyecua iri eté co coti rupi yuvireco.

<sup>12</sup> Ipare asepia omano vahecuer seco ivate vahe, seco mbegüemi vahe avei no opüha yuvinoha Tüpa rovai; ahese cuachiar opa ipipirasa yuvireco, iyavei ambuae cuachiar. Ahe cuachiar tecovesa resendar. Omano vahecuer upe evocoyase porandusa evocoi cuachiar pipendar mbahe sembiapogüer rese.

<sup>13</sup> Omano vahecuer opa yuvinose para guasu pipe sui, iyavei tehögüer recosa sui opa yuvinose; ichui opacatu mbahe sembiapogüer rese porandusa yuvireco chupe no.

<sup>14</sup> Ipare manosa recua opa imondosa tata nungar ipa pipe. Evocoi ipa niha imoñuviriosa manosa.

<sup>15</sup> Aheve opa imondosa acoi ndovirecoi vahe güerer icuachiapri cuachiar tecovesa resendar pipe.

## 21

*Iva piasu iyavei ivi piasu*

<sup>1</sup> Ipare asepia iva piasu iyavei ivi piasu. Esepia niha, yipindar vahe mbahe opa ité ocañi yuvireco, para guasu avei no.

<sup>2</sup> Che asepia tecua nimarai vahe, ahe Jerusalén piasu, evocoi ogüeyi vahe Tüpa sui ou. Opacatu imoingatusa tupri vahe, inungar acoi cuña omenda ãgua oyemboetei tupri omevi upe.

<sup>3</sup> Ipare asendu ñehesa pīrata tenda suindar aipo ehi vahe: “Tüpa cūritei oicove ava rehi pāhu rupi oico. Ahe oicove vaherã ité sese yuvireco yepi, ahe ava evocoyase chupe nara ité yuvirecoira. Ahe teieté niha secoira yuvireco chupe.

<sup>4</sup> Ahe niha omombituhura opacatu ava resai; iyavei ava nomanoi chietera; ndoyasehoi chira yuvireco; ndipoi chira viharēhisa, tecoasisa avei chupe. Esepia niha, opacatu mbahe oime vahecuer yipindar, ndipo iri eté” ehi.

<sup>5</sup> Ahese evocoi oguapi vahe tenda harive oĩ, ahe aipo ehi cheu: “Che ayapo mbahe opacatu ipiasu vahe” ehi. Iyavei aipo ehi: “Eicuachía. Esepia niha, co ñehesa supi tupri vahe ité, evocoyase iya ité peyeroya sese” ehi.

<sup>6</sup> Ipare aipo ehi cheu: “Opa ité yaviye. Che aviye acoi letra omboipi vahe A sui yepi, Z rupi. Esepia, che yipive vahe ité, ipandar avei. Acoi ava ihusei vahe amboihuño tēira i tecovesa resendar ndasepii vahe pipe.

<sup>7</sup> Acoi ava oyemoviracua vahe ité mbahe-mbahe tēi apoēhi ãgua, ahe oipisira co mbahe opacatu omahera yuvireco. Evocoyase che aicora chupendar ité, ahe evocoyase che rahir ité yuvirecoira.

<sup>8</sup> Acoi ava osiquiye ai vahe rumo che recocuer sui, ndache reroyai vahe, ava ndiporoepia potai vahe, oporoyuca vahe, acoi ava oyemboaguasa tēi vahe, ipaye serai vahe, mbahe rahanga mboeteisar tēi iyavei opacatu ava semira-mira tēi vahe, ahe opara yuviraso ipa nungar azufre ocai pīrata vahe pipe. Ahe niha imoñuvirio manosa” ehi.

*Tecua Jerusalén piasu*

<sup>9</sup> Evocoyase ou ñepeí siete Tũpa rembiguai pãhu pendar acoi siete tupri igua riru, siete mbaherasi ipa vahe vireco vahecuer ipipe, ahe aipo ehi cheu: “Erio, amboyecua cuña omenda vahevi ndeu, Ovesami rebirecovi” ehi.

<sup>10</sup> Evocoi che quer nungar pipe Espiritu osepiá uca vahe cheu, che reraso ivitri guasu ivate vahesave. Aheve omboyecua tecua guasu Jerusalén nimarai vahe cheu, ogüeyi vahe Tũpa sui.

<sup>11</sup> Ahe tecua sendí iteanga Tũpa rendigüer pipe. Sendigüer evocoyase oyoya tupri ita iporañete vahe rese, oyoya avei ita jaspe serer vahe ipĩreri vahe rese.

<sup>12</sup> Oyerepa tupri tecua guasu rese ñachisa tuvichá vahe, ivaté iteanga iyavei vireco doce oquenda guasu. Evocoyase ñepeí-peí Tũpa rembiguai oquenda yacatu; iyavei Israel suindar doce tupri vahe serer icuachiasa oquenda yacatu rese.

<sup>13</sup> Vireco niha mbosapi oquenda añihivei coti, mbosapi norte coti, mbosapi irohi coti iyavei mbosapi caharu coti no.

<sup>14</sup> Tecua guasu ñachisa vireco doce tupri ita imoviracuasa. Ahe sese evocoi doce tupri yuvirecoi vahe Ovesami apóstol rer icuachiasa yuvireco.

<sup>15</sup> Evocoi Tũpa rembiguai oñehe vahe cheu vireco vara oro apopri tecua rãha ñgua, opacatu soquendipi rãha ñgua, ñachisa rãha ñgua avei no.

<sup>16</sup> Tecua guasu pucucuer oyoya tupri ipigüer rese. Evocoyase Tũpa rembiguai osãha tecua guasu ruvichagüer; osãhase ipucucuer dos mil dos cientos kilómetro tupri ité; ipucucuer, ihivategüer iyavei ipigüer oyoya pãve tupri ité no.

<sup>17</sup> Ipare osãha ñachisa: osãhase ipigüer sesenta y cinco metro tupri. Evocoi Tũpa rembiguai osãha ava rebiporu pipe.

<sup>18</sup> Tecua ñachisa ahe ita porañete vahe Jaspe serer vahe apopri; tecua evocoyase oro pãve tupri, aviye vidrio secose catu vahe.

<sup>19</sup> Ñachisa moviracuasa vireco opacatu ambuae ita-ita tẽi iporañete vahe pãve: yipindar iviracuasa jaspe, imoñuviriosa zafiro, imombosapisa ágata; imoirungatusa esmeralda;

<sup>20</sup> imbopoyandeposa ónice; imoñepeí ovasa, cornalina; imoñuvirio ovasa, crisólito; imombosapi ovasa, berilo; imoirungatu ovasa, topacio; imbopoyandepo ovasa, crisoprasa; co opoyandepo yovaivesa ahe jacinto; imoñuvirio yovaivesa, amatista.

<sup>21</sup> Doce tupri vahe oquenda guasu ahe doce tupri mbohí; ñepeí-peí oquenda ñepeí mbohí sui yapopri. Calle guasu tecua aviter rupindar evocoyase oro pãve, inungar vidrio yande porẽhi tupri vahe ipipe.

<sup>22</sup> Ndasepiái eté evocoi tecua guasu pipe ñepeí yepe tũparo. Esepia niha, yande Yar Tũpa mbahe mboavaisarẽhi, Ovesami reseve yuvirecoi aheve.

<sup>23</sup> Evocoi tecua guasu ndovireco iri eté ari, yasi güesape ñgua. Esepia niha, Tũpa ité osesape güendigüer pipe, iyavei Ovesami tataendi nungar secoi aheve yuvirecoi vahe upe.

<sup>24</sup> Sendigüer osesapera opacatu tecua rupindar iguatasa rupi, iyavei ava mbahe yar mborerecuar ivi pipendar opara güeru ombahe eta porañete vahe yuvireco chupe.

<sup>25</sup> Evocoyase soquendipi nimboyasai chietera ari yacatu rupi. Pĩtu ndipoi chiaveira aheve.

<sup>26</sup> Ipare opara aheve ambuae tecua mbahe eta, porañete vahe omoingue yuvireco;

<sup>27</sup> ava angaipa viyar rumo, Tũpa remimbotarẽhi oyapo vahe, iporombopa serai vahe, ahe ndoyuviroiquei chietera aheve. Ëgüe ehi rumo acoi ava vireco vahe güerer icuachiapri Ovesami cuachiar tecovesa resendar pipe yuvireco, ahe güeraño yuviroiquera aheve.

## 22

<sup>1</sup> Ipare Tũpa rembiguai omboyecua iai tecovesa resendar cheu, típiu, oyecua tupri, osẽ vahe Tũpa iyavei Ovesami renda porañete vahe sui.

<sup>2</sup> Calle guasu mbiter rupi oso. Iyavei iai ique yacatú oime ivira tecovesa resendar, iha vahe doce yupagüer rupi ñepeí araviter pipe. Iyavei evocoi ivira ro aviye ai ava opacatu rupindar mbogüera água.

<sup>3</sup> Ndipoi chietera aheve que mbahe tēivri pendar. Tūpa renda porañete vahe iyavei Ovesami renda avei chinira evocoi tecua guasu pipe. Aheve sembiguai eta omboeteira yuvireco.

<sup>4</sup> Osepiara sova iyavei virecora serer osiva rese yuvireco.

<sup>5</sup> Aheve ndipoi chietera p̄itu, iyavei ava aheve yuvirecoi vahe ndosecai chietera tataendi. Ndosecai chiaveira que arí güesape água yuvireco. Esepia niha, yande Yar Tūpa teieté osesopera. Ipare ahe ava mborerecuar apirēhi vaherā ité yuvirecoira sese.

*Cōimi eté Jesucristo yevi água*

<sup>6</sup> Ipare Tūpa rembiguai aipo ehi cheu: “Co ñehesa supi tupri vahe ité, sese iya ité peyeroya. Iyavei yande Yar Tūpa acoi omboyecua tupri vahe mbahe oyesuindar oñehe mombehusar upe, ahe ombou güembiguai íva pendar mbahe omboaviye poyava voi vaherā mboyecua água viroyasareta upe” ehi.

<sup>7</sup> “¡Ayeví poyava voira curi! ¡Sorivete catura acoi ava viroya vahe ñehesa Tūpa suindar mbahe oime vaherā resendar co cuachiar pipe!” ehi.

<sup>8</sup> Che, Juan, asepia iyavei asendu ité co mbahe. Sendu pare voi, añenopiha evocoi Tūpa rembiguai rovai imboetei água viña.

<sup>9</sup> Ahe rumo aipo ehiño cheu: “Aní ereñenopiha che rovai. Esepia niha, che Tūpa rembiguai tēi aico, nde nungar, nde rivireta nungar avei evocoi oñehe vahe Tūpa Ñhengagüer rese yuvireco, iyavei inungar opacatu viroya vahe co cuachiar pipendar icuachiapri yuvireco no. Tūpa catu pemboetei” ehi.

<sup>10</sup> Aipo ehi avei cheu no: “Ereicuacuí rene co ñehesa Tūpa suindar mbahe oime vaherā resendar sereco, evocoi icuachiapri cuachiar pipe. Esepia niha, arí cōimi secoi imboaviye água.

<sup>11</sup> Acoi ava mbahe tēi aposar, toyapoño mbahe tēi; iyavei acoi ava seco rai vahe, taseco raiño ité oico; acoi ava seco tupri vahe rumo, ahe toyapoño mbahe tupri oico; iyavei acoi ava Tūpa upe oyemondo tupri vahe ité, ahe taseco tupriño avei oico chupe” ehi.

<sup>12</sup> “Supi eté ayeví poyavara, iyavei arura mbahe porerecosa ñepeí-peí ava rembiapogüer rupi-rupi amondo vaherā chupe.

<sup>13</sup> Che aico inungar letra A iyavei Z, yipindar vahe, ipandar vahe avei no; yipive vahe ité apirēhi vaherā” ehi.

<sup>14</sup> “Sorivete catura acoi ava omoatiro vahe güecocuer. Esepia, ahe oipisira ivira ha tecovesa apirēhi vahe resendar. Ipipe sui oiquera tecua guasu pipe.

<sup>15</sup> Ava rehí ndiporeroyai vahe rumo opitapara ocarve tēi yuvireco, iyavei ava ipaye serai vahe, oyemboaguasa-guasa tēi vahe, oporoyuca vahe, mbahe rahanga upe tēi oyerogui vahe, iyavei opacatu ava oipota rai vahe oporombopa-mbopa tēi água yepi” ehi.

<sup>16</sup> “Che, Jesús, amondo che rembiguai íva pendar mbahe mombehu água opacatu che reroyasar upe oñemonuha vahesa rupi-rupi. Che aico mborerecuar guasu David suindar. Iyavei aico inungar yasitata guasu sendi vahe añihiveindar no” ehi cheu.

<sup>17</sup> Espíritu Santo iyavei Ovesami rebireco aipo ehi: “¡Perio!” ehi ava upe yuvireco. Iyavei acoi ava osendu vahe iñehe, “¡Perio!” tehi ambuae ava upe yuvireco. Iyavei acoi ava ihusei vahe, toyugüeruño; acoi ava oipota vahe, toipisi i tecovesa resendar ndasepi vahe yuvireco.

<sup>18</sup> Opacatu acoi ava osendu vahe co ñehesa Tūpa suindar mbahe oime vaherā resendar icuachiapri co cuachiar pipe yuvireco, ahe chupe, “Peicua catu” ahe. Amove que ava co mbahe resendar omboeapi iri vahe, ahe chupe Tūpa omboeapi aveira co cuachiar pipendar mbahe-mbahe tēi imombehupri.



<sup>19</sup> Amove que ava virocua vahe co cuachiar pipe sui ñehesa Tũpa suindar, Tũpa avei evocoyase ndoipotai chira chupe co cuachiar pipe imombehupri ivira ha tecovesa resendar rereco ãgua iyavei co tecua maranehi pipe seique ãgua.

<sup>20</sup> Acoi co mbahe mombehugar aipo ehi: “Supi eté ayevi poyavara” ehi.

Ëgüe tehi ayase. ¡Erio, che Yar Jesús!

<sup>21</sup> Yande Yar Jesucristo tape rovasa opacatu. Avıye, aipo rupive.